

V E R I T A S
RELIGIONIS CHRISTIANÆ.

THE
JOURNAL
OF
THE
ROYAL
ANTHROPOLOGICAL
INSTITUTE
OF GREAT
BRITAIN
AND IRELAND
VOLUME
LXXV
PART I
1945

VERITAS RELIGIONIS CHRISTIANÆ

CONTRA

*Atheos Polytheos Idolol^{at}ras Mahometanos
& Judæos*

Ex prodigioso ejus inter Paganorum perfe-
cutiones augmento & mirabili
constantia Martyrum

DEMONSTRATA

PER

FR. VINCENTIUM LUDOVICUM GOTTI

ORDINIS PRÆDICATORUM

· In Bononiensi Universitate Controversiarum Fidei Professore

NUNC

S. R. E. CARDINALEM.

TOMUS VI.



ROMÆ, ex Typographia Bernabò, MDCCXXXVIII.

SUPERIORUM PERMISSU.



IMPRIMATUR

Si videbitur Reverendissimo Patri Magistro Sacri
Apostolici Palatii .

Pbi. Episcopus Pisauriensis Vicesgerens .

APPROBATIONES.

I.

AD Veritatem Christianæ Religionis ostendendam confirmandam vindicandamque, mirum quantum facit studiosè recollere innumerorum prope Martyrum sanguinem, in ejusdem Veritatis, quam constantissime profitebantur, odium ubique effusum, semen factum esse Christianorum: Adeò ut eisdem artibus, quibus Christianæ Religionis hostes eam sive præfocare, sive evellere conati sunt, Deo mirificè disponente, immensum crevit, ac propagata fuerit. Hujusmodi autem argumentum eximiis, quibus pollet, scribendi dotibus ex professo versat Eminentissimus Fr. Vincentius Ludovicus S. R. E. Cardinalis Gotti in Opere ab se inscripto: *Veritas Religionis Christianæ &c.* quod, jubente Reverendissimo Patre Fr. Johanne Benedicto Zuanello S. P. A. Magistro, cum perlegerim, ac libraverim, id quemadmodum sacrâ eruditione refertissimum ita sanissimum atque utilissimum adinveni, luce præloque maximè dignum. Romæ Nonis Septembribus 1737.

Thomas Sergius Congr. Piorum Oper. S. R. Inquis. Consultor.

DE Republica Fideque Christiana pergit benemereri Eminētissimus Cardinalis Gotti, dum in præsentī Opere, quod legi de mandato Reverendissimi P. Magistri Sacri Palatii Apostolici, ut veritatem Christianæ Religionis contra Atheos cæterosque Infideles demonstrēt, veteres in Christianos persecutiones & Martyrum gloriosam invictamque constantiam, more suo, hoc est more hominis omni doctrina eruditi, ex aureæ vetustatis monumentis accuratè graviterque recenset. Et optimo quidem meâ sententiâ consilio: quoniam majori nunquam triumpho vicit adversarios suos Christiana Religio, ut ferè cum Sulpitio Severo loquar, quàm cum trium sæculorum stragibus vinci non potuit. Etenim nisi eadem à Deo fuisset, inter continuatas diuturnasque per secula strages non triumphatrix, sed potius tetrīs carceribus, flagellis, unguis, equuleis, metallis, ignibus, stipitibus, crucibus, sive quibus aliis pœnis, quas tanto tempore excogitavit ingeniosa crudelitas, prorsus oppressa fuisset. Cui argumento, cum perspicuum sit Soleque illustrius, homines minimè obcæcatos, ita necesse est cedere, quemadmodum lancem in libra ponderibus impositis necesse est deprimi. Optimum ergo fuit hujus etiam libri consilium: in quo cum omnia puris ex fontibus hausta, incorruptis atque integris testibus confirmata, maximâque cum dignitate explicata fuerint; idcirco censeo, & quod maximam ob eundem gratiam Eminētissimo Authori habere debeamus, & dignissimum esse qui ab omnibus attentè legatur.

Ex Hospitio nostri Monasterii S. Crucis in Jerusalem de Urbe Kalendis Augusti 1737.

D. Joachim Besozzi Abbas S. Crucis in Jerusalem, Procurator Generalis Cisterciensium Lombardia, & S. Rom. Inquis. Consultor.

IMPRIMATUR.

Fr. Jo: Benedictus Zuanelli Ordinis Prædicatorum
Sacri Palatii Apostolici Magister.

ELEN-

ELENCHUS

Eorum quæ in hoc sexto Tomo
continentur.

CAPUT PRIMUM.

De Persecutionibus in Generali.

§. I.	<i>Mirabilis in hoc Providentia Dei.</i>	pag. 1.
§. II.	<i>Exitus Persecutionum.</i>	5.
§. III.	<i>Persecutionum diversitas.</i>	7.

CAPUT II.

De Neronis in Christianos Persecutione.

§. I.	<i>An & quomodò fueris prima.</i>	9.
§. II.	<i>Neronianæ Persecutionis initia & progressus.</i>	12.
§. III.	<i>Martyres in Neroniana Persecutione.</i>	15.

CAPUT III.

De Persecutione Domitiani.

§. I.	<i>Initia Persecutionis.</i>	19.
§. II.	<i>Martyres sub Domitiano Flavius Clemens &c.</i>	21.

CAPUT IV.

De Persecutione sub Trajano.

§. I.	<i>Qualis fueris & quomodò peracta.</i>	26.
§. II.	<i>Martyres sub Trajano.</i>	31.

CAPUT V.

De Persecutione sub Hadriano.

§. I.	<i>Afferitur Persecutio.</i>	37.
§. II.	<i>Martyres, qui in ea passi sunt Romæ.</i>	41.
§. III.	<i>Martyres alii sub Hadriano passi.</i>	44.
§. IV.	<i>An Hadrianus à Persecutione cessaverit?</i>	50.

CAPUT VI.

De Persecutione sub Marco Aurelio Antonino.

s. I.	<i>De Tito Antonino Pio.</i>	55.
s. II.	<i>De Marco Aurelio, ejusque Persecutionis origine.</i>	58.
s. III.	<i>SS. Glyceria Felicitatis & filiorum ejus Martyria.</i>	62.
s. IV.	<i>SS. Ptolemæi & aliorum Martyrium.</i>	65.
s. V.	<i>S. Justini Genus Gesta & Martyrium.</i>	69.
s. VI.	<i>Victoria per Christianos obtenta, & Martyres Lugdunenses.</i>	76.
s. VII.	<i>Alii Martyres sub Marco Aurelio.</i>	82.

CAPUT VII.

Persecutio sub Severo.

s. I.	<i>Commodi Imperium.</i>	85.
s. II.	<i>Imperii Severi initia.</i>	87.
s. III.	<i>Persecutio sub Severo.</i>	90.
s. IV.	<i>SS. Perpetua Felicitas &c. Martyres sub Severo.</i>	98.
s. V.	<i>SS. Leonides Plutarchus &c. Potamiana Irenæus An- deolus.</i>	109.
s. VI.	<i>Martyres alii sub Severo.</i>	115.

CAPUT VIII.

De Persecutione sub Maximino I.

s. I.	<i>Sors Christianorum usque ad Maximinum.</i>	119.
s. II.	<i>Initia & exitus Persecutionis.</i>	124.
s. III.	<i>Martyres sub Maximino.</i>	127.

CAPUT IX.

De Persecutione Decii.

s. I.	<i>Status Ecclesie initio Imperii Decii.</i>	132.
s. II.	<i>De initiis Persecutionis, de Lapsis & Libellaticis.</i>	135.
s. III.	<i>Quorundam Lapsorum Punitio.</i>	141.
s. IV.	<i>Martyres Alexandria.</i>	144.
s. V.	<i>Martyres in Africa.</i>	148.
s. VI.	<i>Martyres in Italia & Gallia.</i>	150.
s. VII.	<i>Aliqui Martyres in Oriente.</i>	155.
s. VIII.	<i>SS. Carpus &c. Pionius & Achatius.</i>	164.
s. IX.	<i>Martyres in Græcia.</i>	173.
s. X.	<i>De Septem Dormientibus Christophoro & Themisto- cle.</i>	180.
s. XI.	<i>Persecutionis Decii exitus. Cornelii electio.</i>	186.

CAPUT X.

De Gallo & Volufiano.

- §. I. *De horum Imperii initiis. De Novato & Novatiano.* 192.
 §. II. *Galli & Volufiani Persecutio.* 200.

CAPUT XI.

De Valeriani Persecutione.

- §. I. *Initia Imperii & causa Persecutionis.* 207.
 §. II. *Initia Persecutionis Romæ, & S. Stephani aliorumque Martyrium.* 209.
 §. III. *Ecclesiæ Ministros præcipuè insequitur.* 214.
 §. IV. *SS. Sixti II. & Laurentii Martyrium.* 217.
 §. V. *Martyres Massæ Candida nuncupati.* 226.
 §. VI. *S. Cyprianus ejusque Passio.* 228.
 §. VII. *SS. Fructuosi & Sociorum Martyrium.* 239.
 §. VIII. *SS. Lucius Montanus Flavianus &c. Martyres.* 242.
 §. IX. *SS. Jacobus Marianus & alii Africani Martyres.* 247.
 §. X. *SS. Virgines Romæ, & Pontius in Gallia, Martyres.* 252.
 §. XI. *SS. Priscus Malchus &c. Nicephorus Martyres.* 254.
 §. XII. *S. Felix Nolanus & S. Cyrillus puer.* 258.
 §. XIII. *Valeriani exitus infelix & Macriani.* 263.
 §. XIV. *Pax sub Gallieno. SS. Marinus & Asterius.* 266.
 §. XV. *Generalis Divina Ultio.* 269.

CAPUT XII.

Persecutio Aureliani.

- §. I. *Ejus Gesta & Exitus.* 272.
 §. II. *Martyres in Galliis.* 275.
 §. III. *Martyres Romæ & in Italia. SS. Felix Papa Agapitus & Restituta.* 276.
 §. IV. *SS. Felix Presbyter Irenæus Mustiola Narcissus &c.* 280.
 §. V. *S. Conon cum Filio & alii in Oriente.* 282.
 §. VI. *S. Mamas & alii.* 286.
 §. VII. *De Probo Imperatore, & Martyribus sub ipso.* 289.

CAPUT XIII.

Persecutio Diocletiani & Maximiani.

- §. I. *Horum Imperii initia.* 292.
 §. II. *SS. Claudius Asterius Neon &c. & Genesius Martyres.* 293.
 §. III.

S. III.	SS. Mauritius & Socii.	299.
S. IV.	SS. Donatus & Rogatianus & Quintinus Martyres.	304.
S. V.	SS. Victorius Fuscianus Gentianus &c. Rufinus &c. Crispinus & Crispinianus, Marca Virgo, Justus Piaton Jonas.	308.
S. VI.	SS. Fides Virgo Caprasius Vincentius & Victor &c. Martyres.	312.
S. VII.	S. Bonifacius Martyr.	317.
S. VIII.	SS. Sebastianus Marcus Marcellianus &c. Martyres.	322.
S. IX.	S. Lucina Vidua & alii, S. Maximilianus Martyres.	338.
S. X.	SS. Marcellus & Cassianus Martyres.	344.
S. XI.	Generalis Persecutionis initium & causa.	346.
S. XII.	Martyres Nicomedia, & S. Georgius.	351.
S. XIII.	Publicantur Libri contra Christianos.	359.
S. XIV.	Publicantur Edicta contra Christianos.	362.
S. XV.	SS. Agathopes & Theodulus S. Felix Thibaritanus Martyres.	366.
S. XVI.	S. Theodotus & septem Virgines Ancyra Martyres.	371.
S. XVII.	S. Romani & Infantis Martyrium.	379.
S. XVIII.	SS. Procopius Philippus Heraclea Episcopus & socii Martyres.	384.
S. XIX.	Novis Edictis aucta Persecutio.	391.
S. XX.	SS. Vincentius Levita Eulalia Leocadia Martyres.	397.
S. XXI.	SS. Cucuphas Justus Pastor & alii Hispania Martyres.	403.
S. XXII.	SS. Saturninus, Dativus &c. Martyres in Africa.	408.
S. XXIII.	SS. Agapes Chionia Irenes &c. Anysia Demetrius Martyres.	415.
S. XXIV.	SS. Theodora & Didymus Alexandria Martyres.	420.
S. XXV.	SS. Irenaeus Episcopus Sirmii Montanus & Pollio Martyres.	424.
S. XXVI.	SS. Soteris Virgo Pancratius Marcellinus Papa & Agnes Martyres.	428.
S. XXVII.	SS. Marciana Nabor Felix Victor & Euplius Diaconus Martyres.	433.
S. XXVIII.	SS. Asra Julianus & Ferreolus Martyres.	438.
S. XXIX.	SS. Tarachus Probus & Andronicus in Cilicia Martyres.	444.
		S. XXX.

s. XXX.	SS. Vitalis & Agricola Proculus Crispina.	
	Chrysogonus & Anastasia Martyres.	456.
s. XXXI.	SS. Cyprianus Antiochenus & Justina Martyres.	463.
s. XXXII.	SS. Julitta Quiricus Januarius Sosius & Socii Martyres.	472.
s. XXXIII.	SS. Arrianus Apollonius Timotheus Maura.	
	Asclas & alii Martyres Egypti.	477.
s. XXXIV.	SS. Theodorus Eutropius Cleonius & Basiliscus Martyres.	486.
s. XXXV.	SS. Apphianus & Edesius Agapius Anicetus & Photius Martyres.	496.
s. XXXVI.	SS. Acacius Gurius Samonas & Abibus Martyres.	501.
s. XXXVII.	SS. Pelagia Berenices Prosdoces & Domnina Martyres.	509.
s. XXXVIII.	SS. Euphemia Severus Phileas & Philoromus Martyres.	513.
s. XXXIX.	SS. Quirinus Petrus Balsamus & alter Petrus Martyres.	523.
s. XL.	SS. Pamphilus Valens Paulus Porphyrius & alii Martyres.	528.

CAPUT XIV.

Continuatio Persecutionis sub Licinio.

s. I.	Galerii & Maximini Exitus.	535.
s. II.	Qualis Licinius fuerit erga Christianos.	540.
s. III.	SS. XL. Milites & Severianus Martyres.	544.
s. IV.	SS. Macrobius & c. Theogenes Acacius & c. Leontius & alii Martyres.	548.
s. V.	SS. Ammon XL. Virgines Paulas Basileus Theodotus Blasius Martyres.	552.

CAPUT XV.

Martyres quorum ætas nescitur.

s. I.	SS. Arcadius Cassianus Faustus Januarius & Martialis Aciscus & Zoilus Martyres.	556.
s. II.	SS. Drosis Virgo Genesius Arelatensis & Julianus Ciliæ.	559.
		s. III.

S. III.	SS. Leo & Paregorius Julius Eutychius Pascrates & Valentio Martyres.	563.
S. IV.	SS. Nicander & Marcianus, Patricius & alij in Agypto & Africa Martyres.	566.
S. V.	Martyrum numerus innumerabilis.	571.
S. VI.	Conclusio Argumenti.	574.





CHRISTIANÆ RELIGIONIS V E R I T A S

Ex ejus inter persecutiones augmento.



MAXIMUM pro Veritate Religionis Christianæ eam unice à Deo esse invictè demonstrans argumentum est, quòd è Sanguine Jesu Christi vix nata totum contra se Mundum ex Judæis & Gentibus conspiratum invenit, tantumque abfuerit ut suffocata remanserit, quin potius illum ad se victum attraxerit: & hoc non armis non potentia, sed humilitate & patientiâ passiones tolerando; adeò ut quòd plures ex suis pro ea sanguinem vitamque offerrent & reipsa darent, eò magis augetur, ut brevi tempore totum Orbem pervaserit, eumque Christo subjugarit. Is erit præsentis Tractatus Scopus, hæc Christianæ Religionis gloria.

C A P U T I.

De Persecutionibus in Generali.

§. I.

Mirabilis in hoc Providentia Dei.

I. **M**irabile primò est, quòd Deus, qui misit Filium in Mundum ut salvetur Mundus per ipsum & ut omnia traheret ad se, non statim omnia traxerit, sed solis paucis electis, reliquos omnes turpissimis erroribus illaqueatos reliquerit. Admiratur hoc Lactantius L. 5. Divin. Inst. Tem. VI. A cap. 7.

cap.7. & ait: *Sed moveat fortasse aliquem, cur si hac sit justitia, non omni humano generi sit data, nec in ea multitudo univ[er]sa consenserit.* Cui respondet, voluisse Deum hanc bonorum & malorum distantiam, ut qualitatem boni ex malo, & mali ex bono sciamus: *Deus ergo, inquit, non exclusit malum, ut ratio virtutis constare posset. Quomodo enim patientia vim suam nomenque retineret, si nihil esset quod pati cogeretur? Quomodo laudem mereretur devota Deo suo fides, nisi esset aliquis, qui à Deo vellet avertire?* Nam & ideo potentiores esse injustos permisit, ut cogere ad malum possent; ideo plures, ut virtus esset pretiosa, quod rara est. . . . Alioquin si natura pares omnibus affectus dedisset, pietas nihil erat. Hoc quàm verum sit, docet necessitas ipsa rationis. Si enim virtus est malis ac vitiis fortiter repugnare, apparet, siue malo ac vitio nullam esse virtutem, quam Deus, ut absolutam perfectamque redderet, retinuit id quod erat ei contrarium, cum quo depugnare posset. Agitata enim malis quatientibus stabilitatem capit, & quantò frequentius impellitur, tantò firmius roboratur. Hac nimiràm causa effecit, ut quamvis sit hominibus missa justitia, tamen aureum Seculum non esse discatur, quia malum non sustulit, ut retineret diversitatem, quæ Sacramentum Divinæ Religionis continet sola. His Lactantius ostendit, mirabile consilium Divinæ Sapientiæ fuisse permittere Persecutores, & quidem plures, ut Confessorum Christi in Fide constantia magis appareret juxta commune eloquium: *Opposita juxta se posita magis elucescunt.* Et hic primus fuit Persecutionum fructus.

II. Confirmat hoc S. Augustinus L. 10. de Civit. Dei cap. 21. dicens: *Moderatis autem præfinitisque temporibus, etiam potestas permessa Dæmonibus, ut hominibus quos possident excitatis, inimitias adversus Dei Civitatem tyrannicè exerceant, sibi que Sacrificiis non solum ab offerentibus sumant & à volentibus expetant, verum etiam ab invitis persequendo violenter extorqueant; non solum perniciosum non est, sed etiam utilis invenitur Ecclesiæ, ut Martyrum numerus impleatur: quos Civitas Dei tantò clariores & honoratiores Cives habet, quantò fortius adversus impietatis peccatum etiam usque ad sanguinem certant.*

III. Alterum mirabile Divinæ Providentiæ consilium fuit, ut Veritas Religionis Christianæ sub velamine stultitiæ Mundi Sapientibus proponeretur, & quidem à vilibus & illiteratis hominibus, quod major esset confusio sapientiæ Mundi, dum ad ea, quam velut stultitiam aspernabatur, se victam agnosceret. De hoc gloriabatur Paulus 1. Cor. 1. v. 18.: *Verbum Crucis (ajebat) pereantibus stultitia est: iis autem, qui salvī fiunt, id est vobis Dei vir-*

virtus est. Et v. 21. &c. Nam quia in Dei sapientia non cognovit Mundus per sapientiam Deum, placuit Deo per stultitiam prädicationis salvos facere credentes. Quoniam & Judæi signa petunt, & Græci sapientiam quarunt. Nos autem prædicamus Christum Crucifixum: Judæis quidem scandalum, Gentibus autem stultitiam. Ipsi autem vocatis Judæis atque Græcis Christum Dei virtutem & Dei Sapientiam. Quia quod stultum est Dei sapientius est hominibus, & quod infirmum est Dei fortius est hominibus.... Quæ stulta sunt Mundi elegit Deus ut confundat Sapientes, & infirma Mundi elegit Deus ut confundat fortia &c. Porro quodnam majus scandalum, quænam major stultitia humanæ sapientiæ apparere poterat, quàm hominem prædicari ut Deum, & hunc non in Sina tonantem, non ut Jovem fulminantem, sed ut Cruci ignominiosè affixum; & hoc à paucis iisque contemtibilibus asseri? Sed hoc fuit consilium Sapientiæ Dei, ut Mundi sapientiam confunderet; quæ etiam infirma Mundi elegit, ut confunderet fortia: scirentque homines, mysterium hoc solis à Deo vocatis & electis posse penetrari.

IV. Hæc advertens Lactantius L. 5. citato cap. 13. videntque huic, quam supponebant stultitiam, plures etiam ex Gentibus nomen dare, sic discurret: *Cùm autem noster numerus semper Deorum Cultoribus augeatur, nunquam verò ne in ipsa quidem persecutione minuat... quis est tam demens tam excors tamque cæcus, qui non videat, in utra sit parte sapientia? Sed illi malitiâ & furore cæcantur, ne videant; stultosque arbitrantur esse, qui cùm habeant in sua potestate supplicia vitare, cruciari tamen & emori malunt, cùm possint ex eo ipso pervidere, non esse stultitiam, in quam tanta hominum millia per Orbem totum unâ & pari mente consentiunt. Et cap. 19. Sed idcirco virtutem ipsam Deus sub persona stultitiæ voluit esse celatam, ut mysterium Veritatis ac Religionis suæ esset arcuatum, ut has Religiones sapientiamque terrenam extollientem se aliis, sibi que multum placentem, vanitatis errorisque damnaret; ut propositâ denique difficultate per angustissimos tramites ad immortalitatis præmium perduceret.*

V. Quia tamen adhuc stultitiam esse contendebant vitam prodigere potius, quàm thus adolere: *Nam cruciari atque interfici malle, quàm ibura tribus digitis comprehensa in focum jactare, tam ineptum videtur, quàm in periculo vitæ alterius animam magis curare quàm suam: ideo citato cap. 19. eos ignorantia ita redarguit: Nesciunt enim quantum sit nefas adorare aliud, præterquam Deum, qui condidit Cælum ac terram, qui humanum genus finxit, inspiravit, luce donavit. Quid si servorum nequissimus habetur, qui*

Dominum suum fugā deserit, isque verberibus & vinculis & ergastulo & cruce & omni malo dignissimus judicatur: etsi filius eodem modo perditus atque impius existimatur, qui patrem suum derelinquit, ne illi obsequatur: ob eandemque causam dignus putatur, qui sit exbares, & cujus nomen de familia in perpetuum deleatur, quanto magis qui Deum deserit, in quem duo vocabula Domini & Patris aequè veneranda conveniunt? Nam ille qui servum comparat, quid in eum beneficii confert, praterquam alimenta, quæ illi utilitatis suæ gratiâ subministrat? Et qui filium generat, non habet potestatem, ut concipiatur, ut nascatur, ut vivat. Unde apparet, non esse illum patrem, sed tantummodò generandi ministrum. Quibus ergo suppliciiis dignus est desertor ejus, qui & Dominus & Pater est? His demonstrat Lactantius non stultitiam, sed fidelem veræ Religionis actum esse dare potius propriam vitam, quàm falsis Diis thus adolendo verum Deum deferere.

VI. Hinc invictum format argumentum S. Athanasius L. de Incarn. Verbi Dei num. 27. *Mortem enim dissolutam esse & cruce devictam, nec amplius vim ullam habere, sed verè mortuam esse, non tenuè argumentum, sed certissimum indicium est, quòd ab omnibus Christi Discipulis illa contemnatur, omnesque eidem insultent, nec jam ab illis timeatur, sed signo Crucis & fide Christi tanquam mortua concutitur. Olim siquidem ante Divinum Salvatoris adventum ipsis etiam Sanctis mors erat terribilis, cunctique eos qui moriebantur tanquam pereuntes desolebant. Jam autem postquam Salvator Corpus suum à mortuis excitavit, mors non amplius terribilis est, sed omnes qui Christo credunt, eam, tanquam quæ nihil sit, calcant, potiusque mori eligunt quàm Fidem Christi negare. Nimirum certò sciunt, se moriendo non perire sed vivere, & incorruptos per resurrectionem fieri. . . . Hinc ipsi etiam infantes mori festinant, seseque contra mortem non viri tantum, sed & mulieres exercent. Ita scilicet infirma facta est, ut & mulieres, quas priùs deceperat, nunc illi velut mortuæ & dissolutæ illudant. Quemadmodum enim si Tyrannus aliquis à vero Rege superatus manibus ac pedibus vincitur, nemo jam illuc transierit, quin illum irrideat verberet ac distrahat; ejus furorem ac sevitiâ ob victoriâ à Rege de illo reportatam non amplius extimescens: Ità devictâ morte, & à Salvatore in cruce velut in cippo manibus pedibusque ligatis expositâ, omnes qui in Christo transeunt, eam intrepidè calcant, & Christo dantes testimonium, mortem derident, & acriter objurgant; ea quæ supra scripta sunt dicentes, Ubi est Mors victoriâ tua? (1. Cor. 15. v. 55.) ubi tuus, inferne, stimulus, (Osæ 13. v. 14.) Ita Athanasius exponit causam contemptus mortis, quod in Christianis Ethnici reputabant stultitiam.*

§. II.

Exitus Persecutionum.

I. **Q**uod Divina Providentia sapienter disposuit, feliciter evenit, ut, quod mirabile fuit, persecutiones quæ ad delendum Christianum nomen fuerant institutæ, in ejus augmentum verterentur. Tantâ alacritate Fideles Spiritus Dei donaverat, ut hilares currerent ad supplicia, & qui adstant non solum non terrentur, sed ad eadem perferenda etiam Gentiles conceptâ fide excitarentur. In hoc quasi triumphans Lactantius L. 5. cap. 13. ait: *Cum videat vulgus dilacerari homines variis tormentorum generibus, & inter fatigatos Carnifices invictam tenere patientiam, existimant, id quod res est, nec consensum tantum multorum nec perseverantiam morientium vanam esse, nec ipsam patientiam sine Deo posse cruciatus tantos superare. Latrones & robusti corporis Viri ejusmodi lacerationes perferre nequeunt, exclamant & gemitus edunt, vincuntur enim dolore, quia deest illis inspirata patientia. Nostri autem (ut de viris taceam) pueri & mulierculæ tortores suos taciti vincunt, & exprimere illis gemitum nec ignis potest. Eant Romani, & Mutio glorientur aut Regulo, quorum alter necandum se hostibus tradidit, quoddam captivum puduit vivere, alter ab hostibus deprehensus, cum videret se mortem vitare non posse, manum foco injecit, ut pro facinore suo satisfaceret hosti, quem voluit occidere, eaque panâ veniam, quam non meruerat, accipit. Ecce sexus infirmus & fragilis atas dilacerari se toto corpore urique perpetitur, non necessitate, quia licet vitare siverent, sed voluntate, quia confidunt Deo.*

II. Insuperabilis hæc Fidelium in tormentis perferendis constantia, quâ Religionem, ad cujus destructionem conabantur, in dies etiam suorum numero augeri videbant, in ipsorum Tyrannorum & Carnificum rabiem vertebatur, quoddam illi nimium pati possent, quam possent ipsi torquere. Hominis potestatem habentis ea est præsumptio, ut quamvis infallibilis in suis decretis non sit, infallibilis tamen apparere velit: sic ut eis evulgatis non liceat an justa vel injusta sint perpendere, sed omnes parere teneantur; qui secus fecerit, reus habeatur. Cum ergo Imperatores, Principes, Proconsules, Edicta promulgassent, quibus Christiani sacrificare Idolis jubebantur, etsi injusta ac iniqua essent, honor tamen majestatis exigebat, ut omnes causâ non discussâ colla submitterent, & capitale piaculum esset eis

eis refragari. Videntes igitur, Christianos eorum Edicta aspernari, nec tormentis terreri, imò tortores ipsos irridendo provocare, quâ rabie quo furore discruciabantur? Dacianus, referente S. Augustino Serm. 276. aliàs 12. de Sanctis, videns S. Vincentium in craticula succenso igne positum ac ardentem ad ejus voluntatem non flecti, sed irridere potius, ac si in deliciis esset & violentiori igne interius ipse consumebatur, quàm Martyr exterius. Et de S. Laurentio in crate igne supposito distento, & his verbis Tyrannum subfannante *Assutum est, jam versa & manduca* idem S. August. Serm. 20. de Sanctis modò 205. in Append. dicit: *Hoc igitur igne (Spiritus Sancti) Laurentius accensus flammarum non sentit incendium, & dum Christi ardet desiderio, persecutoris pœnam non sentit. In quantum enim in illo Fidei ardor servet, in tantum supplicii flamma frigescit. Corporali enim Beatus Laurentius laborat incendio; sed Divinus Salvatoris ardor materiam Tyranni restinxit ardorem. Quamvis enim in favilla membra solvantur, Fidei tamen fortitudo non solvitur.*

III. Hæc igitur & alia videntes, ac nedum tormentis Christianorum numerum non absumi sed augeri, irascebantur, fremebant dentibus, tabescebant, & incassum se laborare deprehendebant. Implebatur in eis Davidis vaticinium Psalm. 111. v. 10. *Peccator videbit & irascetur, dentibus suis fremet & tabescet: desiderium peccatorum peribit.* Sed nesciebant vel potius nescire volebant, se non invadere opus hominis, sed opus virtutis Dei, contra quod homo non prævalebit; & stulta Mundi elegisse Deum ut confundat Sapientes, & infirma Mundi ut confundat Potentes. Et sicut in illis verificabatur dictum Psalmi 2. v. 2. *Astiterunt Reges terra, & Principes convenerunt in unum adversus Dominum & adversus Christum ejus:* ita impleri debebat promissum factum Christo ibidem v. 8. *Dabo tibi Gentes hereditatem tuam, & possessionem tuam terminos terra.* Quemadmodum ergo omnes Palæstinæ Reges, qui in unum contra Josue convenerant, non aliud quàm perniciem & confusionem consecuti fuere, sic teste Origene homil. 9. in Josue, Principes & Populi insurgentes adversus nomen illius, cujus Josue typum gerebat, impedire non potuerunt, quin ejus Religio toto Orbe ei in possessionem promissio diffunderetur. Et tandem contingere debebat Christianis quod Israelitis in Ægypto contigit, ut scilicet quò magis opprimerentur, eò magis crescerent, eorumque vires augerentur.

§. III.

Persecutionum diversitas.

I. **D**uplici Persecutionum genere voluit Deus Ecclesiam suam hinc in terris militantem exerceri, donec veniat tertium, post quod in æternum sit triumphatura. Primum persecutionis genus ab Idololatria adhuc nascens passa est, de quo modò. Secundum ab Hæresi variis temporibus. Tertium in fine ab Antichristo patietur. De hac re audiendus est S. Augustinus L. 18. de Civit. Dei cap. 50.: *Primum se ab Jerusalem diffudit Ecclesia, & cum in Judæa atque Samaria plurimi credidissent, & in alias Gentes itum est, eis annuntiantibus Evangelium, quos ipse, sicut luminaria, aptaverat verbo & accenderat Spiritu Sancto. Dixerat enim eis (Matth. 10. v. 18.) „ Nolite timere eos, qui corpus occidunt, animam autem non possunt occidere „. Qui ut frigidis timore non essent, igne caritatis ardebant. Denique per ipsos non solum qui eum & ante passionem & post resurrectionem viderant & audierant, verum etiam post obitum eorum per posteros eorum, inter horrendas persecutiones & varios cruciatus ac funera Martyrum prædicatum est toto Orbe Evangelium, contestante Deo signis & ostentis & variis virtutibus & Spiritus Sancti muneribus; ut Populi Gentium credentes in eum, qui pro eorum redemptione crucifixus est, Christiano amore venerarentur sanguinem Martyrum, quem diabolico furore fuderunt; ipsique Reges, quorum legibus vastabatur Ecclesia, ei nomini salubriter subderentur, quod de terra crudeliter auferre conati sunt; & falsos Deos inciperent persequi, quorum causâ cultores Dei veri fuerant antea persecuti.*

II. *Videns autem Diabolus (prosequitur S. Doctor ibidem cap. 51.) Tempora Demonum deferri, & in nomen liberantis Mediatoris currere genus humanum, Hæreticos movit, qui sub vocabulo Christiano doctrinæ resisterent Christianæ, quasi possent indifferenter sine ulla correptione haberi in Civitate Dei, sicut Civitas confusionis indifferenter habuit Philosophos, inter se diversa & adversa sentientes. (Nota hic Lector, quàm bene ista aptentur Hæreticis hominibus, qui licet adversa tum Ecclesiæ tum inter se sentientes, indifferenter volunt haberi in Civitate Dei, cum sint in Civitate confusionis). Qui ergo in Ecclesia Christi morbidum aliquid prævumque sapiunt (audiant Protestantes) si correpti, ut sanum rectumque sapiant, resistunt contumaciter, suæque pestifera & mortifera dogmata emendare nolunt, sed defensare persequuntur; Hæretici sunt,*

sunt, & foras exeuntes habentur in exercentibus inimicis. Etiam sic quippe veris illis Catholicis Membris Christi malo suo prosunt, dum Deus utitur & malis bene, & diligentibus eum omnia cooperantur in bonum. Inimici enim Ecclesiæ quolibet errore cacentur vel malitiâ depraventur, si accipiunt potestatem corporaliter affligendi, exercent ejus patientiam, si tantummodò malè sentiendo adversantur, exercent ejus sapientiam; ut autem etiam inimici diligantur, exercent ejus benevolentiam, aut etiam beneficentiam, sive suadibili doctrinâ cum eis agatur, sive terribili disciplinâ. Ac per hoc Diabolus princeps impiæ Civitatis adversus peregrinantem in hoc Mundo Civitatem Dei vasa propria commovendo, nihil ei nocere permittitur. His ostendit S. Augustinus, hæc duas persecutiones, unam ab Idololatria, alteram ab Hæresi, quas Diabolus excitavit in Ecclesiæ exitium, Deum vertisse in ejusdem profectum & incrementum.

III. Diverſo tamen modo in una ac in altera ex dictis persecutionibus se gessit auctor Diabolus. Nam in prima violentiam adhibuit, in secunda fraudulentiam, donec adveniat tertia; in qua tanquam extremo conatu utrumque exercent, violentiam scilicet & fraudulentiam. Ita idem S. Augustinus in Psalm. 9. his verbis: *Prima persecutio Ecclesiæ violenta fuit, cum proscriptionibus tormentis cadibus Christiani ad sacrificandum cogerentur: Altera persecutio fraudolenta est, quæ nunc per cujusmodi Hæreticos & falsos Fratres agitur: Tertia superest per Antichristum ventura, quæ nihil est periculosius, quoniam & violenta & fraudolenta erit. Nim habebit in imperio, dolum in miraculis.* De hac tertia persecutione, ejusque exitu fusè locutus sum tom. 16. Theolog. quæst. 1. de Antichristo. De secunda inferius dicam. Nunc de prima, quæ Ecclesiam adhuc nascentem & in suis exordiis terrificè aggressâ est, sermo mihi est, & in sequentibus erit. De hac tamen aliqua generaliter indicavi tomo 1. Verit. Relig. Christ. cap. 11. §. 7. huc revocanda. Ibi enim ostendi, non ab alio, quàm à vero Deo prodire potuisse, & non aliâ quàm Dei potentia fulciri Religionem illam, pro qua omnis ætas, omnis sexus etiam infirmior cum vitæ dispendio pugnavit & vicit: adeo ut vel ipsi persecutores tantam fortitudinem admirantes convicti, facti tandem fuerint ejus professores. Sed hæc Prolegomena quædam generalia sunt; singulas persecutiones percurrenti veritas hæc Sole clarior apparebit.

CAPUT II.

De Neronis in Christianos Persecutione .

§. I.

An & quomodo fuerit prima .

I. **Q**uidam referente S. Augustino L. 18. de Civit. Dei cap. 52. opinati fuerunt, Ecclesiam usque ad tempus Antichristi decem passuram persecutiones, primam à Nerone, secundam à Domitiano, à Trajano tertiam, quartam ab Antonino, à Severo quintam, sextam à Maximino, à Decio septimam, octavam à Valeriano, ab Aurellano nonam, decimam à Diocletiano & Maximiano. Et has ceasebant adumbratas fuisse à decem plagis Ægyptiorum antequam inde exire inciperet Populus Dei, ut novissima Antichristi persecutio similis esse videatur undecimæ plagæ, quâ Ægyptii dum hostiliter persequuntur Hebræos in Mari Rubro, Populo Dei per siccum transeunte, perierunt. Ita sensisse visus est Orosius L. 7. cap. 27.

II. Attamen S. Augustinus laudato loco in illis decem plagis Ecclesiæ persecutiones præsignificatas esse non arbitratur, sed mentis humanæ conjecturis comparatas cum illis esse autumat; eò vel maximè, quòd plures quàm decem usque ad sua tempora passa fuerat Ecclesia persecutiones: *Quid enim*, inquit, *qui hoc sentiunt, dicturi sunt de persecutione, quâ ipse Dominus Crucifixus est? in quo eam numero posaturi? Si autem hâc exceptâ existimant computandum, tanquam illa numeranda sint, quæ ad corpus pertinent, non quâ ipsum caput est appetitum & occisum; quid agent de illa, quæ posteaquam Christus ascendit in Cælum, Jerosolymis facta est, ubi Beatus Stephanus lapidatus est, ubi Jacobus frater Joannis gladio trucidatus, ubi Apostolus Petrus ut occideretur inclusus, & per Angelum liberatus, ubi fugati atque dispersi de Jerosolymis Fratres, ubi Saulus, qui postea Paulus Apostolus factus, vastabat Ecclesiam; ubi ipse quoque, jam Fidem quam persequabatur evangelizans, qualia faciebat, est passus, sive per Judæam, sive per alias Gentes, quocumque Christum ferventissimus prædicabat? Cur ergo eis à Nerone videtur ordiendum, cum ad Neronis tempora inter atrocissimas persecutiones, de quibus nimis longum est cuncta dicere, Ecclesia crescendo pervenerit? Quid si*

à Regibus factas persecutiones in numero existimant esse debere ; Rex fuit Herodes , qui etiam post ascensum Domini gravissimam fecit . Ita S. Augustinus . Qui deinde ostendit , Ecclesiæ persecutiones fuisse ultra decem , nec in Diocletiano & Maximiano finem habuisse ; nam post istos Ecclesiam persecuti sunt alii , ut Julianus apostata : nec defuere suis etiam temporibus Imperatores & Reges , qui Ecclesiam persecutione vexarent . Concludit ergo S. Doctor , de initio & fine persecutionum , quibus exercenda erit Ecclesia , nil certi statui posse , his verbis : *Itaque hoc in medio relinquimus , neutram partem quæstionis hujus adstruentes sive destruentes ; sed tantummodò ab affirmandi quodlibet horum audaci præsumptione revocantes .*

III. Si igitur persecutiones , quas Ecclesia passa fuit vel passura erit , numero denario præfigere generaliter quis contendat : si etiam velit , Neronem fuisse primum , qui absolute ex Regibus contra Christi Ecclesiam arma movit ; putarem & ego , quòd in audacem præsumptionem incideret , à qua revocare S. Augustinus intendit : nimis enim apertè vel ipso testimonio Martyrum , qui pro vera Christi Fide passi sunt sive à Judæis sive ab Ethnicis sive etiam ab Hæreticis , non solum tribus prioribus sed & posterioribus seculis , comprobatur , persecutiones quas Ecclesia sustinuit , numerum denarium excedere . Nec minus apertum est , eam etiam ante tempora Neronis pluries & à pluribus agitatam fuisse , ut S. Augustinus ostendit . Cæterum si persecutio Neronis non dicatur prima simpliciter , sed prima inter eas , quas Ethnici Imperatores adversus Ecclesiam publicis Edictis moverunt ; sic absque Augustini dissenso , crediderim posse appellari primam , etsi absolute sit tertia . Nam prima simpliciter auctorem habuit Saulum , in qua lapidatus est Stephanus , & Fideles dispersi anno à passione Christi primo . Secunda Herodem Agrippam anno à passione Christi 11. seu ab ejus ortu 44. in qua occisus est Jacobus , & in carcerem detrusus Petrus occidendus . Utraque tamen auctores habuit ex Judaismo . Tertia auctorem habuit Neronem , qui primus ex Ethnicis Imperatoribus anno Imperii 10. , & Christi 64. vel 66. adversus Christianos imperiali gladio insurrexit .

IV. In hoc sensu Auctores Ecclesiastici persecutionem Neronianam appellant primam . Sic Tertullianus Apologetic. cap. 5. : *Consulite , inquit , commentarios vestros : illic reperietis primum Neronem in hanc Sectam cum maxime Romæ orientem Casariano gladio ferocisse . Sed tali dedicatore damnationis nostræ etiam gloriamur . Qui enim scit illum , intelligere potest , nonnisi grande ali-*

aliquod bonum à Nerone damnatum. Et qui Neronem præcesserant Imperatores nihil adversus Christianos moliti fuerant. Tiberius ab eis persequendis adeo fuit alienus, quin potius usus suâ auctoritate fuit pro eorum tutela, imò ad Pilati relationem & famam de signis à Christo editis, ipsum Deorum numeroingere paratus erat, nisi Senatus obstitisset. De Cajo nihil legimus ab eo factum, quod Christianos respiciat. Claudius eorum aliquos quidem Româ expulit, sed tanquam Judæos, non tanquam Christianos. Imò nec ipse Nero in sui Imperii initiis, quibus boni Principis signa præferebat, quidquam adversus Christianos machinatus est. Tunc solum contra illos vexillum erexit, quando desuit esse homo, & in omnigenæ libidinis ac impietatis monstrum conversus, id solum cœpit eligere quod malum erat, & quod bonum erat persequi & reprobare.

V. Luxuria ergo & crudelitas, quæ in Nerone thronum erexerant, persecutionis in Christianos faciem iniecerunt. Unde S. Augustinus L. 5. de Civit. Dei cap. 19.: *Hujus, inquit, vitii summam & quasarcem quamdam Nero primus obtinuit; ejus fuit tanta luxuries, ut nihil ab eo putaretur virile metendum, tanta crudelitas, ut nihil molle habere crederetur, si nesciretur.* Adeoque execrabilis evasit, ut id, quod Paulus 2. Thessal. i. v. 7. Antichristum indicans dicit, *Jam enim mysterium iniquitatis operatur, de Nerone ipsum intellexisse aliqui existimarint, eodem S. Augustino teste L. 20. de Civit. Dei cap. 19.: Quidam putant, hoc de Imperio dictum fuisse Romano: & propterea Paulum Apostolum non id aperte scribere voluisse, ne calumniam videlicet incurreret, quod Romano Imperio male optaveris, cum speraretur æternum: ut hoc quod dixit, Jam enim mysterium iniquitatis operatur, Neronem voluerit intelligi, ejus jam facta velut Antichristi videbantur. Unde nonnulli ipsum resurrekturum & futuram Antichristum suspicantur. Alii verò nec occisum putant, sed subtractum potius, ut putaretur occisus; & vivum occultari in vigore ipsius ætatis, in qua fuit, cum crederetur extinctus, donec suo tempore reveletur & restituatur in Regnum.*

VI. At ne quispiam putet hæc de Nerone probra à Christianis odio fuisse excogitata, legat Historicos etiam Ethnicos, & ab illis discat, nullum crimen vel horrendum fuisse, quod in Nerone Sedem non obtineret. Imperium suscipiens vix annos 17. natus Senecæ præceptis ac monitis auscultans egregia quidem virtutis specimina initio Imperii dedit: sed postea libidine & crudelitate obcæcatus belluæ potius quam hominis mores imbuir. Agrippinam matrem occidi jussit, & Octaviam conjugem, indu-

clā Poppæā Othonis etiam num viventis uxore , quam & postea gravidam ictu calcis peremit . Senecam præceptorem , & Lucanum poetam morte affecit . Imperatoriâ majestâte dejectâ Histriomem, Cytharædum , & Aurigam publicè agebat . Ut ardentis Trojæ velut per ludicrum speciem exprimeret , Romam incendit . At ne effræni libidini aliquid deesset, viro publicè nupsit . His omnibus adeò hominibus exosus effectus fuit , ut Senatus ipse tantum monstrum ferre non valens, extrema in ipsum meditaretur . Quæ ut declinaret , ab omnibus derelictus , mortem sibi desperatè conscivit . Talis fuit qui primus in Christianos desecavit . Jure ergo cum Tertulliano repetam, gloriandum esse Christianæ Religionis , quòd talem habuerit , & quidem ex Ethnicis, primum , persecutorem . Quòd enim à perditissimo hominum malè visa fuerit , clarum est suæ veritatis & innocentie signum & argumentum . Unde Lactantius L. de mort. persec. cap. 2. post enarratam Neronis in Christianos crudelitatem , ait : *Respexit enim Deus vexationem Populi sui . Dejectus itaque sustigio Imperii ac devolutus à summo Tyrannus impotens , nusquam repente comparuit , ut ne sepultura quidem locus in terra tam mala bestia appareret . Unde illum quidam deliri credunt esse translatum ac vivum reservatum , Sybillâ dicente , Matricidam profugum à finibus esse venturum , ut quia primus persecutus est , idem etiam novissimus & Antichristi præcedat adventum &c.*

§. II.

Neronianæ Persecutionis initia & progressus .

I. **F**ama hujus novæ (Christianæ scilicet) Religionis , cujus jam per totum Orbem semina fundebantur , signis & prodigiis eam confirmantibus , Magistratum , Principum & aliorum qui Orbi præerant , animos commovere cœpit . Alii tamen aliis causis movebantur . Quidam ferre non poterant , quòd ipsis insciis , imò & invitis , nova Religio ; quæ antiquam destrueret , eorū dominia invaderet . Quidam eam odibilem habebant , quòd magicis artibus eam promoveri audirent (magia enim tribuebant signa quæ ab Apostolis edebantur) & quòd multa ab ejus cultoribus in secrèto patrari crimina spargerentur . Alii verò , qui Idolorum cultum , & generalem morum corruptionem probabant , videntes Idolis cultum eripi , & vitæ puritatem quam primi illi Fideles profitebantur , summo in Religionem talia præscribentem odio accensi, eam suscitare adhuc nascentem meditabantur .

II. Hæc

II. Hæc postrema causa ad persequendos Christianos Neronem maxime impulit. Qui enim, licet animo omnem Religionem aspernaretur, ut effræni suæ licentiæ indulgeret, exterius tamen Idolorum cultor erat; sed moribus corruptissimus, & omnium libidinum vile mancipium factus, cum audisset toto ferè Romano Imperio, imò & in Urbe ipsa Christum hominem à Judæis crucifixum tanquam Deum, & hunc solum prædicari, Deosque suos everti, morumque puritatem & castimoniam vitæ sensim induci, sanctamque hanc vivendi rationem sub oculis suis prædicatione Petri ac miraculis, quæ in dies patrabantur, non modicos progressus facere; toto furoris sui impetu Templum hoc, quod in cordibus hominum Divina Gratia erigebat, destruerè, & justitiam è terris eliminare aggreditur. (Lactantius de mortibus persecutorum cap. 2.)

III. Incendium; quo tota penè Roma absumta fuit, persecutionis in Christianos occasio & initium fuit. Videns enim Nerò, se tanti incendii auctorem (ut verè fuerat) à Populo traduci, nec communem hanc opinionem aliis mediis delere posse, crimen hoc in Christianos à se vertere cogitavit, eosque tanquam Romanæ Urbis incendiarios exquisitis cruciatibus torquere cœpit. Aliquos bestiarum pellibus supervestiri jubebat, ut sic à canibus vorarentur, aliquos affigi crucibus, aliquos flammis absumi, & quidè nocturno tempore, ut veluti à facibus transcurrentes lumen acciperent, imò ut diutius arderent eorum corpora chartâ, cerâ pice aliâve materiâ ardendo idoneâ illitâ supervestiri mandabat, posito subtus mentum eorum palo, ut sic recti ac vivi arderent, ac demum comburerentur. Ita Martyrologium 24. Junii. *Romæ commemoratio Sanctorum plurimorum Martyrum, qui sub Nerone Imperatore de Urbis incendio per calumniam accusati, diverso mortis genere ab eodem jussi sunt servissimè interfici: quorum alii ferarum tergis contecti laniatibus canum expositi sunt; alii crucibus affixi; aliique incendio traditi, ut ubi defecisset dies, in usum nocturni luminis deservirent: Erant hi omnes Apostolorum Discipuli, & primitiæ Martyrum, quas Romana Ecclesia fertilis ager Martyrum ante Apostolorum necem transmisit ad Dominum. Ita Tacitus Annal. 15., & pereuntibus addita ludibria, ut ferarum tergis contecti, laniatibus canum interirent; aut crucibus affixi, aut flammam; atque ubi defecisset dies, in usum nocturni luminis urerentur. Quis hæc audiens non exhorreat? Nilominus hæc imperare non solum, sed & propriis oculis spectare impio Tyranno deliciæ erant: Hortum habebat Nero, hunc commodavit, ut feris hisce spectaculis theatrum esset.*

Lu-

Ludos Circenses ibi eodem tempore repræsentabat, modò Rhedarii habitu per medium Populum ipse discurrens, modò ascenso curru infano impetu huc illucque irrumpens, Christianis interim inter tormenta morientibus; quod vel ab ipsis Ethnicis miserationem extorquebat: unde idem Tacitus Annal. 15. etfi erga Christum & Christianos malè affectus dicat, quòd erga ipsos, *quamquam adversus fontes & novissima supplicia meritos ageretur, misratio tamen oriebatur; tanquam non utilitate publicâ, sed in sevitiâ unius absumerentur.*

IV. Attamen miserandi vos potiùs, qui veritatem Dei stultitiam reputantes in nos deservitis! quid agatis ignorantes? dicebant hilares inter tormenta cum Lactantio L. 5. Divin. In. c. 12. Ethnicis Christiani: *Hæc est enim lex nostra, hoc opus, hæc religio. Si vobis sapientes videmur, imitamini; si stulti, contemnite, aut etiam videte, si libet. Nobis enim stultitia nostra prodest. Quid laceratis, quid affligitis? Non invidemus sapientiæ vestræ: Hanc stultitiam malamus, hanc amplectimur.... An boni nostri qualitas ex Populi potiùs pendeat erroribus, quàm ex conscientia nostra & judicio Dei? Aut aliqua nos illiciet unquam felicitas, ut non potiùs veram bonitatem cum omni malo, quàm falsam cum omni prosperitate malimus? Sua sibi habeant Regna Reges, suas divitias Divites.... suam verò prudentiam Prudentes; relinquunt nobis stultitiam nostram, quam vel ex hoc apparet esse sapientiam, quòd eam nobis invident. Quis enim stulto invideat, nisi qui ipse sit stultissimus? Illi autem non sunt adeò stulti, ut stultis invideant; sed ex eo quòd accuratè, quòd sollicitè persequuntur, stultos non esse concedunt. Cur enim tam crudeliter seviunt, nisi quia metuunt, ne in dies invalescente justitiâ, cum Diis suis cariosis relinquuntur? Si cultores Deorum sapientes sunt, nos stulti; quid metuunt, ne sapientes illiciantur à stultis? His vel similibus Martyres argutè respondebant Ethnicis, eos tanquam stultos traducentibus, quia cum possent Diis serviendo hilarem ac prosperam vitam ducere, mallet sequendo Christum cruciatibus vitam perdere.*

V. Etfi verò, ut ex Tacito dixi, persecutio Neroniana ex incendio Urbis Romæ occasionem & impulsum habuerit: reverà tamen odio Christianæ Religionis, quam, ceu suis corruptissimis moribus adversantem, ferre non poterat, directè movebatur: Nam etiam post Christianorum stragem sub titulo incendii Romæ factam, eos ubique insequi persecutus est. Leges propterea & edicta, quibus sub capitali pœna prohibebatur Christianæ Religionis nomen dare, non Romæ solùm, sed toto Romano Imperio evulgasse, colligitur ex Tertulliano in Apolog. cap. 5. ,

Eur.

Eusebio L.2. hist. cap.24. & L.4. cap.26. Scio , Doduvellum velle , ad solam urbem Romæ persecutionem suam Neronem restrinxisse , nec alios quàm ibi Martyres fecisse . Sed hoc propria auctoritate dicit , nec causam affert . Imò nec omnes Romæ Martyres sub prætextu incendii fecit . Nam Apostoli Petrus & Paulus sub Nerone Martyrium Romæ passi sunt : quibus tamen incendium Martyrii causa esse non potuit , sive quia tunc Romæ non aderant , sive quia saltem biennio post incendium , & inchoatam persecutionem nempe anno vel 66. vel 68. illud subiere . Benè ergo observat Baronius , quòd cum inter Imperatores , qui Ecclesiam persecuti sunt , recensetur (& quidem primus) Nero ; nec numero Persecutorum comprehenderint Tertullianus & alii , nisi eos , qui publicis edictis Christianos ubique infectati sunt ; credere par est , Neronem etiam legibus & edictis ad omnes Imperii Provincias in eos defævisse : quod ex sequentibus apparebit .

§. III.

Martyres in Neroniana Persecutione .

I. **V**eritas hæc non melius demonstrari potest , quàm recensendo eos , qui sub Neronis Imperio variis in partibus pro Confessione Christi Martyrium passi sunt . Passi fuerunt sub Nerone in Hetruria Pisis Paulinus Reipublicæ Lucensis Patronus & Episcopus , & Torpes seu Torpetes . Ravennæ Ursicinus , Vitalis , & Valeria . Mediolani Gervasius , Protasius , Nazarius & Celsus , qui omnes Martyrium SS. Petri & Pauli præcessisse creduntur . De singulis aliqua dicam .

De S. Paulino scribit Ughellius tom. 1. quòd à S. Petro Episcopus Lucensis ordinatus , sed ibi captus Pisas ductus fuit , ubi Anulinus Præses residebat , ibique variis pro Christo tormentis toleratis , ductus in montem situm inter Pisas & Lucam dirissimè flagellatus , vitam finivit cum aliis sociis . Concordat Martyrologium die 12. Julii his verbis : *Luca in Tuscia beati Paulini , qui à S. Petro primus ejusdem Civitatis Episcopus ordinatus , sub Nerone ad radices montis Pisani post multos agones Martyrium suum cum aliis sociis consummavit .* Acta S. Paulini ab Ecclesia Lucensi , cujus est principalis Patronus , se habuisse scribit Baronius ad diem 12. Julii .

H. De S. Torpete proferuntur Acta à Mombrizio & Bollando 17. Maii . De eo agunt Florus , Rabanus , Usuardus , Ado & Mar-

& Martyrologia, inter quæ Romanum his verbis 17. Maii: *Pis in Tuscia S. Torpetis Martyris, qui magnus in officio Neronis primum fuit, unusque ex his, de quibus Paulus Apostolus ab urbe Roma ad Philippenses scribit: Salutant vos omnes Sancti, maxima autem qui de Caesaris domo sunt. Sed postea pro Fide Christi iubente Satellico alapis caditur, verberibus durissime afficitur, ac bestiis devorandus traditur, sed minimè leditur; tandem Martyrium suum decollatione complevit tertio Kalend. Maii: Ejus tamen festivitas hac die recolitur ob sui corporis translationem.*

III. De SS. Ursicino & Vitali hæc apud Bollandum. 28. Aprilis habentur: Fidelis quidam nomine Ursicinus, qui multa propter Christum passus fuerat, tandem capitali sententiâ damnatus, cum jam instaret supplicium subito terrore adeò correptus fuit, ut Fidei abnegandæ proximus videretur. Aderat Vitalis Paulini Judicis Minister & amicus, qui Christianis secretò tamen favebat. Is videns Ursicinum trepidantem, se Christianum publicè prodens, tanto ardore illum animavit, ut excusâ trepidatione, alacer pro Christo caput obtulerit. Cumque Vitalis Martyris corpus sepulturæ tradidisset, detectus ac subinde detentus, Paulini jussu prius in equuleo suspensus, demum vivus sepultus in loco dicto *Palma* Martyr occubuit. De S. Vitale agit Fortunatus Pictaviensis sexti seculi auctor. SS. Gervasii & Prothasii pater fuisse creditur, unde in Martyrol. die 28. Aprilis legitur: *Ravennæ natalis S. Vitalis Martyris patris Sanctorum Gervasii & Prothasii, qui cum beati Ursicini corpus sublatum honestate debita sepelisset, tentus à Paulino Consulari, post equulei tormenta jussus est deponi in profundam foveam, & terrâ ac lapidibus obrui, talique Martyrio migravit ad Christum.* S. Valeria, quæ eodem colitur die, ejus uxor fuisse traditur. Hæc cum accepto nuntio de Vitalis conjugis morte Mediolano Ravennam venisset, & paulò post Mediolanum utriusque patriam remeans, cum in itinere in quosdam, qui suis Idolis festum celebrabant, incidisset, nec partem in eorum sacrilegis Solemnis habere voluisset, tot verberibus eam affecerunt, ut post triduum è vita excesserit. Hoc referunt Ado, Bollandus &c. S. Ursicini etiam memoria colitur in Martyrolog. 19. Junii: *Ravennæ S. Ursicini Martyris, qui sub Paulino Judice post plurima tormenta in Confessione Domini immobilis permanens, capitis abscissione Martyrium complevit.* Hinc colligere licet, tres præfatos Martyres sub Nerone passos fuisse: cum enim Vitalis & Valeria Gervasii & Prothasii parentes afferantur; & hi sub Nerone passi fuerint, ut statim dicam, sub eodem & illos par est credere Martyres fuisse effectos.

IV. Sub Nerone igitur & passos fuisse SS. Gervasium & Prothasium fratres, conjicio; primò quia sub eodem Martyres effecti creduntur, sub quo SS. Nazarius & Celsus, qui, Ennodio teste & aliis post ipsum, sub Nerone Martyres fuerunt. Secundò quia S. Ambrosius Epist. 54. dicit, eos tunc passos fuisse cùm Mediolanensis Ecclesiæ Martyribus adhuc sterilis esset; ex quo videtur colligi in prima persecutione accidisse: deinde in eadem Epistola loquens de dictorum SS. Corporum inventione, dicit, ea procera admodùm fuisse, *ut prisca ætas ferebat*; quibus indicasse videtur antiquitatem à sua ætate remotiorem. Vita S. Syri & S. Juvenci, Paulum Diaconum ferens auctorem, SS. Gervasium & Prothasium Nerone persequente Martyres factos refert. Idem sentiunt Græci 14. Octobris in Menologio Basilii. Baronius in vita S. Ambrosii dicit quidèm, eos initio nascentis Ecclesiæ fuisse coronatos; postea tamen dubius hæsit, an hoc sub Marco Aurelio potius venerit. Sed quia ad hoc movetur ex Epist. 53. S. Ambrosio affictâ, quæ tamen supposita creditur, ideò ratio dubitandi ruere videtur.

V. Horum SS. Martyrum Corpora, quæ ab Ecclesiæ Mediolanensis memoria penitus exciderant, seculo 4. præviâ revelatione reperta à S. Ambrosio pluribus miraculis coruscare cœperunt: de quo S. Ambrosius Epist. 54. & S. Augustinus L. 9. Confess. cap. 7. & L. 22. de Civit. Dei cap. 8., & S. Paulinus Epist. plura dicunt, quæ refert Tilmontius tom. 2., quem Lector adire poterit. Mihi satis est, eos sub Nerone Martyrio coronatos ostendisse. Non omitam tamen quæ de eis die 19. Junii habet Martyrol., nempe *Mediolani Sanctorum Martyrum Gervasii & Prothasii fratrum: ex quibus priorem tamdiu iussit Aflasius fudex plumbatis cadi, quousque spiritum exbalaret; sequentem vero sustibus casum capite truncari. Horum Corpora Domino revelante Beatus Ambrosius sanguine conspersa, & ita incorrupta reperit, ac si eo die fuissent interemti: in quorum translatione cæcus feretri tactu lumen recepit, & plurimi vexati à Daemonibus liberati sunt.* Ambros tamen capite fuisse truncatos indicat Epist. 54. dum ait, eorum Corpora in sua naturali situatione fuisse reperta, capitibus tamen à corpore sejunctis, in quo etiam Græcorum monumenta conveniunt.

VI. Coronatus fertur sub Nerone S. Ptolemæus S. Petri Discipulus, ab eo ordinatus Episcopus, & in Tusciam ad prædicandum missus cum Romano & aliis. Horum Acta desiderantur. Hunc Ptolemæum Episcopum Nepefinum in Tuscia censet Baronius anno 46. §. 2. & 19. Oct., Ferrarius tamen eum Episcopum

Pentapolis fuisse putat, Urbis adeo dirutæ, ut nullum ejus modò extet vestigium. Baronius tamen Acta Ecclesiæ Nepefinæ ad se transmissa profert, & S. Ptolemæum anno 69. Martyrium subisse §. 44. dicit. Sed hæc incerta ex utraque parte sunt.

VII. Post mortem S. Petri sub Nerone ponitur S. Hermagoræ primi Aquilejensis Episcopi unà cum Fortunato suo Diacono Martyrium: de quibus Martyrologium 12. Julii ait: *Aquilejæ natalis S. Hermagoræ Discipuli Beati Marci Evangeliste & primi ejusdem Civitatis Episcopi: qui inter miracula sanitatam & prædicationis instantiam ac Populorum conversionem plurima pœnarum genera expertus, tandem unà cum Fortunato Diacono suo capitali supplicio perpetuum meritis triumphum.*

VIII. Ecclesia Cæsaraugustana 13. Februarii (apud Bollandum) S. Polycetum Diaconum veneratur, qui sub Nerone passus fuit in loco vicino *Caraves* nuncupato. (Ferronius anno 69. §. 46.) Ferunt etiam, in Hispania antiquum repertum fuisse marmoreum monumentum, quo aguntur gratiæ Neroni, quòd Provinciam illam tum à prædonibus, tum à novæ Superstitionis inductoribus expurgaverit: quod clarum esset argumentum, Neronis tempore prædicatum fuisse in Hispaniis Evangelium, vel à S. Jacobo Majore, vel à S. Paulo, ut suo loco dixi; & ibi extitisse Christianos, qui à Nerone Martyrio fuerint coronati. Hoc verum censeo, multos alios Sanctos Martyres Deo notos, de quorum aliquibus etiam Martyrologia meminerunt, in persecutione Neronis fuisse passos. Quòd si Liber Pastoris ab Hermagoræ fuit, ut probabile est, ante Domitiani persecutionem conscriptus, ad Neronianam referendum est id quod ibi narratur, Deum nempe jam plures coronasse alios, qui potius mala multa tolerarunt, quàm Dei Legem desererent: alios qui Diabolum propriam dantes vitam vicerunt, propter Dei nomen carceres flagella cruces ac bestiarum dentes invictè superantes.

IX. Sic igitur Nero dum cogitabat Ecclesiam destruere, eam volens edificabat, & Martyres multiplicando, testimonia pro Fidei Christianæ Veritate multiplicabat. *Quia* (inquit Sanctus August. L. 22. de Civit. Dei cap. 9.) *& ipsi Martyres hujus Fidei Martyres, id est hujus Fidei testes fuerunt, huic Fidei testimonium perhibentes Mundum inimicissimum & crudelissimum pertulerunt, eumque non repugnando sed moriendo vicerunt.* Victus tandem ipse Nero miserrimè interit, & pœnam quam Christianis injustè intulit, ipse justissimè pertulit, ut Lactantius de mort. Persec. cap. 2. scribit.

CAPUT III.

De Persecutione Domitiani.

§. I.

Initia Persecutionis.

I. **N**eronē extincto, Ecclesia Christi à persecutionibus aliquandiu requievit. Sergius enim Galba, Silvius Otho, ac Vitellius, qui successerunt, & quorum perbreve fuit Imperium, nihil adversus Christianos, publicis saltem Edictis, tentasse leguntur. Vespasianus bello quidē Judæos infectus est, ac Jerosolymam destruxit, sed odio potius Gentis adversus Romanum Imperium continuò rebellantis, quàm Religionis: ideoque nec contra Christianos quidquam molitus fuit. Multò minùs Titus ejus filius genio mitissimus, de quo S. Hieronymus in cap. sextum ad Galat.: *Pontificatum, inquit, maximum ideo se professus accipere, ut puras servaret manus, præstis- set fidem: nec auctor post hæc cujusquam necis nec conscius; quamvis interdum ulciscendi causa non deesset: sed perituum se potius, quàm perditurum adjurans.*

II. Dissimilis tamen Tito fuit ejus frater Domitianus, qui sicut à suspitione veneni Tito propinati non abfuit: ita factus Imperator crudelitatis suæ exempla reliquit. Suscepto igitur anno Christi 83. Imperio, talem eum experiri cœperunt non solum Christiani, sed & Ethnici in damnatione Corneliæ Virginum Vestalium maximæ, quam absentem inauditamque damnavit incesti, & vivam defodi jussit, ut testatur Eusebius in Chronic. ad ann. 95., de quo Plinius Junior Epist. ad Minutianum, quæ est undecima libri 4. cum horrore scribit: & S. Augustinus L. 5. de Civit. Dei cap. 21. loquens de Deo, qui ut vult & quibus vult dispensat Imperia, ait: *Qui Vespasiani vel patri vel filio, suavissimis Imperatoribus, ipse & Domitiano crudelissimo.*

III. Domitianus ergo Neronianæ crudelitatis hæres eam exerere in Ecclesiam cœpit: unde *Portio Neronis* à Tertulliano in Apologet. cap. 5. appellatur his verbis: *Tentaverat & Domitianus Portio Neronis de crudelitate: sed quæ & homo facile ceptum repressit, restitutis etiam quos relegaverat. Tales semper nobis persecutores injusti impii turpes, quos & ipsi damnare consueverunt, à quibus damnatos restituere soliti essis;* Quibus indicat, Domitia-

num ante mortem persecutionem revocasse: ex quo bene arguit persecutiones Christianorum fuisse injustas, dum Ethnici, imò & ipsi Persecutores, eas injustas esse, dum lumine rationis uterentur, agnoverunt; quod pro Veritate Religionis Christianæ non leve est argumentum. De Domitiani persecutione videndus Lactant. de mort. Persecut. cap. 3., & Eusebius L. 2. cap. 17. & L. 4. cap. 26.

IV. Hæc tamen persecutio non statim à cædibus exordium sumsit, sed à rigorosa tributorum exactione, quâ, ut ait Suetonius in Domitiano, supra cæteros onerabantur illi, qui Judæorum viam Romæ amplexi fuerant; juxta stylum autem Auctorum illius temporis Judæorum nomine intelligebantur Christiani. Procedente tamen sui Imperii tempore crudelia Edicta ad internecionem, si fieri posset, universæ Christi Ecclesiæ toto Romano Orbe Domitianus promulgavit, teste Orosio L. 7. cap. 10. Quo autem anno in hoc eruperit, controvertitur. Cum enim 15. annis Domitianus imperaverit, aliqui, inter quos Baronius ad ann. 93 §. 3., censent Domitianum feram persecutionem movisse anno Imperii sui 10. Christi verò 91. vel 92., cui adhæret Alexandre tom. 1. hist. cap. 10.. Movetur Baronius, quia supponit, S. Cletum seu Anacletum, qui sub Domitiano passus fuit, hoc anno fuisse passum. Alii verò secuti Eusebium in Chron. & S. Hieronymum de Script. Eccles. cap. 9. volunt, inchoasse persecutionem anno Christi 95. & 14. ac penultimo sui Imperii, quibus favere videntur Juvenalis sat. 4. & Lactant. de mort. Perf. cap. 3., dum ajunt, quòd Christianorum persecutionem citò Domitiani mors secuta fuit.

V. Cum tamen varios gradus habuerit persecutio, credere posse præfatos Auctores componi dicendo, anno quidem 91. vel 92. inchoasse persecutionem Domitiani, non tamen generalem & levam; talem autem evasisse solum anno 95. seu anno 14. Imperii, & propè ipsius Domitiani interitum: hoc enim visus est indicare Dio L. 67. & Brutius apud Eusebium L. 3. cap. 18.: quorum uterque dicit, anno 15. Domitiani persecutionem maximè ferocisse, multosque Christianorum fuisse cæsos. Nec enim assentiri possum Doduvellio, qui in dissert. Cypr. cap. 16. contendit, hanc persecutionem ultra exilia se non extendisse; contrarium enim demonstrat Flavius Clemens, quem constans est fuisse occisum quia Christianum, & quem alii multi Dione teste eodem exitu secuti sunt, sed de his statim.

§. II.

Martyres sub Domitiano Flavius Clemens &c.

I. **C**hriftiana Religio Domitiani temporibus Martyrum fuorum triumphis aded illustris evaferat, ut vel ipfi Hiftorici Pagani, teste Eufebio L.3.cap.18., de perfecutione contra eam à Domitiano excitata locuti funt, & de Martyribus, qui pro ea tuenda decertarunt. Dio L.67. narrat ad annum 95. Confulis Clementis Flavii mortem, Domitillæ ejus uxoris & aliarum plurium, quæ damnatæ fuerunt, inquit ille, velut Athæ, ed quodd mores Judæorum amplexæ fuiffent (sub Judæorum enim appellatione tunc Chriftianos Ethnici confundebant). Alter etiam Paganus nomine Brutius, refert exilium S. Domitillæ Virginis ejufdem Confulis neptis; & Martyria vel faltem exilia plurium aliorum Chriftianorum.

II. Inter illos ergo, qui à Domitiano paffi funt, nemo Flavio Clemente & Flaviis Domitillis illuftrior. Erat hic Domitiani confobrinus Flavii Sabini unici Vefpafiani germani fratris filius, qui cum Romæ Præfectus efferet, imperante Vitellio occifus fuit. Flavius autem Sabinus ejus major natus filius Conful anno Chrifti 82. paulò post à Domitiano necatus interiit. Hæc ex Dione L. 67. Suetonio in Domitiano, Tacito L.3. hift. ex quibus Recentiores haufuerunt.

Flavius Clemens Flaviam Domitillam ei à Domitiano deſponſatam, cui conſanguinitate juncta erat, uxorem habuit. Hanc ipſius Domitiani ſororem fuiſſe Philoſtratus putat: ſed cum Domitilla unica Domitiani ſoror mortua efferet, antequam Vefpafianus parens Imperium aſſumeret, veriſimilius eſt, Flaviam Domitillam Clementis uxorem illius filiam fuiſſe ac Domitiani neptem. Ex ea Clemens duos ſuſcepit filios; quos ſibi in Imperio Succeſſores Domitianus deſtinaverat, priora eorum nomina mutans, ac unum Vefpafianum, Domitianum alterum appellari faciens, Quintiliano moribus ac litteris imbuendos tradiderat.

Clemens ordinariè Conſulatam geſſit anno Chrifti 95., quo vix expleto, ut ait Suetonius, à Domitiano levi veneno ſublatus fuit, fortè ut cauſam mortis occultaret: Dio tamen L.67. aperte dicit, Clementem accuſatum fuiſſe impietatis ſeu Atheiſmi; criminis, inquit Hiftoricus, quo à Domitiano tunc damnati fuere alii plures, qui mores Judæorum amplexi fuerant; hoc enim

enim charactere confundebatur tunc Christianismus cum Judaismo à Paganis , ut dixi, & Origenes testatur L. 1. contra Celsum: qui etiam eò cæcitatibus devenerunt , ut eos qui falsis Diis abjectis unum verum Deum colerent impios atque Atheos appellarent , ut ex Justino Apolog. 1. pag. 56. Quòdque omnia Mundi oblectamenta honores ac dignitates despicerent , & unice Dei gloriam quærerent , eos ut homines segnes pigros stultos , ideòque contemptibiles aspernabantur ; talemque describit Clementem Svetonius in Domit. cap. 15. Nescientes (inquit Lactantius L. 4. Divin. Inst. cap. 28. *Nullam aliam spem vitæ homini esse propositam, nisi ut abjctis vanitatibus & errore miserabili Deum cognoscat & Deo serviat, nisi huic temporali renuntiet vitæ, ac se rudimentis justitiæ ad cultum Religionis instituat. Hæc enim conditione gigni-mur, ut generanti nos Deo justa & debita obsequia præbeamus.*

III. Domitilla Flavii Clementis uxor eodem crimine impietatis , quo vir ejus, nempe quòd & ipsa veram pietatem ac Religionem profiteretur , accusata fuit. Vix elapso quadriduo à viri sui Clementis nece , Domitianus ad secundas nuptias contrahendas eam allicere tentavit : sed illa , quæ Jesu Christo ejusque honori omnia præferre statuerat , constanter resistit . Quare indignatus Domitianus eodem anno in insulam Pandatariam (modò S. Mariæ) propè Puteolos ipsam relegavit . Neque alteri Domitillæ Clementis nepti adhuc virgini impius Tyrannus pepercit. Hanc enim in Fidei & castitatis proposito constantem eodem anno ad insulam Pontiam propè Pandatariam exulem amandavit . Et hæc fuisse creditur Flavia Domitilla , de qua Eusebius L. 3. cap. 18. dicit relegatam fuisse in insulam Pontiam. Hauc Ecclesia die 7. Maii ut Virginem & Martyrem venerat , ejusque exitum in Martyrologio ita describit : *Tarracinæ in Campania natalis beata Flavia Domitilla Virginis & Martyris, quæ cum esset Flavii Clementis Consulis sororis filia, & à S. Clemente sacro velamine consecrata, in persecutione Domitiani ob testimonium Christi cum aliis plurimis in insulam Pontiam exilio deportata, longum ibi Martyrium duxit. Novissimè verò Tarracinam deducta, cum doctrinâ & miraculis plurimos ad Fidem Christi converterisset, jussu Judicis incenso cubiculo, in quo simul cum suis Virginibus Euphrosina & Theodora morabatur, cursum gloriosi Martyrii consummavit. Et die 12. Maii recolit agonem SS. Nerei & Achillei fratrum, qui primò cum Flavia Domitilla, cujus erant Eunuchi, in insula Pontia exules, tandem cum à Rufo Consulari equaleo & flammis ad immolandum compellerentur, dicerentque se à beato Petro Apostolo baptizatos Diis immolare non posse, capite cæsi sunt.*

IV. Ex his, quæ Domitianus contra Personas adeò illustres & sanguine sibi tam proximè junctas egit, arguat Lector, quæ adversus alios inferioris conditionis Viros ac Mulieres odio, quo contra Christum ferebatur, crudelis Domitianus egerit. Solum de duobus Flavii Clementis filiis quid evenit, Historiæ non produnt. Imaginari tamen possumus, quòd cum ob necem Patris ac ipsius Domitiani, qui eos Imperio destinarat, paulò post secutus, a Jure Imperii excidissent, Nerva in quem transiit sicut & Trajanus eis privatam vitam agere ex pietate indulserint. An verò exemplum parentum imitati Fidem Christi susceperint an in Paganismo manserint, prorsus ignoratur. Quis de Flavia Domitilla S. Clementis uxore & ad insulam Pandatarium relegatâ exitus fuerit, nec Historiæ nec Martyrologia, quæ de sola Flavia Domitilla virgine S. Clementis ex forore nepte sermonem habent, meminerunt. Piè tamen credendum est, eam vel in agone vel in pace sanctè obiisse.

V. Id tamen, quod mihi admirationem aliquam ingerit, est, de S. Flavio Clemente tam illustri Martyre in Martyrologiis, quæ habemus, nullam memoriam fieri. Baronius ad ann. 98. num 7. opinatur, accidere potuisse, quòd antiqua de Flavio Clemente monumenta, maxime in persecutione Diocletiani interierint: quo factum sit, ut secula posteriora id quod de Clemente Consule invenire potuerunt cum S. Clemente Papa, qui eodem tempore vivebat, confuderint. Quâ confusione fortè evenit, ut aliqui Auctores dixerint S. Clementem Papam de Familia Imperiali extitisse.

Si tamen antiqua Martyrologia consulimus, inveniemus in eo, quod S. Hieronymi nomen præfert & solos Martyres continet, duos SS. Clementes Romæ passios, unum (& hunc solum) 21. Novembris, alterum cum Sempronio 7. ejusdem mensis. Alterutrum autem horum esse Flavium Clementem Consulem nihil est quod impediât. Qui die 7. Novembris ponitur, notatur etiam in antiquo Calendario Romano Bucherii. Verùm permisso etiam, hodiernis temporibus nullo monumento probari, Ecclesiam antiquam Flavium Clementem tanquam Sanctum & Martyrem veneratam fuisse, id tamen evincunt ea, quæ supra ex Auctoribus etiam Ethnicis indicavi, nimirum unicam causam mortis ejus fuisse amorem erga Christum; quæ causa Martyres facit: ideòque vel Protestantes ipsi Martyrii titulo eum honorant, ut Pearsonius in opere Posthumo p. 25. Aequum enim erat, ut Christus, qui (ut ostenderet Ecclesiam suam esse à Deo, & ut potentiam suam manifestaret) ad eam fundandam paucos Pi-

Piscatores rudes ac viles elegerat ; eâ jam fundatâ , ne viderentur rejeâti , vocaret etiam Mundi Primates ac Principes , eorumque superbiam Evangelio subderet ac humiliaret , ut S. Gregorius L. 3. Moral. cap. 1.

VI. Hoc certum est , Flavium Clementem tanquam Martyrem hodierno tempore in honore haberi . Ejus enim Reliquias Romæ in Ecclesia sub S. Clementis nomine anno 1726. repertas præviâ solemnî earundem propriis humeris gestatione Benedictus XIII. sub Altari majori ejusdem Ecclesiæ honorificè reposuit ad publicam Fidelium venerationem anno 1727.

VII. Non tamen in solum Flavium Clementem ejusque Familiam Domitiani persecutio desæviit , sed ad alios multò magis ejus furor pertransiit . Eidem tribuunt multi Martyria Sanctorum Andreæ Apostoli , Dionysii Areopagitæ , Onesimi à Sancto Paulo conversi , & Nicomedis Romani Presbyteri ; cui adjungunt Ufuardus 31. Maii & Bollandus 12. Maii S. Feliculam , cujus corpus projectum in cloacam , cum Nicomedes inde sublatum in loco duabus vel tribus leucis Româ distante sepelisset ; id rescientes Persecutores , tot eum flagris cœcidere , donec efflaret animam . Porro S. Felicula Martyrium sub Domitiano ponit Ufuardus . Addi possent SS. Victorinus , Euthices , & Maro Flaviæ Domitillæ familiares , de quibus in Martyrol. 13. Aprilis : Hi tamen quamvis sub Domitiano in insulam Pontiam cum eâdem relegati , quia postea sub Nerva fuere liberati , sub Trajano Martyrium consummarunt . Ad Domitianum quidem referri potest passio S. Antipæ Pergami occisi pro Christo , cui Christus ipse testimonium perhibet Apocal. 2. v. 13. his verbis : *Antipas testis meus fidelis , qui occisus est apud vos , ubi Satanahabitat* , Verùm Sancti omnes , qui in Domitiani persecutione mortui fuere , eam non adeò celebrem effecerunt , quantum illustrata fuit miraculo , quod Romæ Deus operatus fuit præservando S. Joannem Evangelistam , quem Domitianus in ferventis olei dolium injecerat , & postea in Patmos insulam relegavit , de quo suo loco dixi .

VIII. Vidimus Domitianum in Christianos furem , eosque penitus delere conantem : at irriti omnes ejus conatus evaserunt . Quò magis enim eos extinguere tentabat , eò magis Deus constantiâ ad quæcumque perferenda jam credentes roborabat , & non credentes ad Fidem eorum exemplo pertrahebat , ut Ecclesia fremente Persecutore in dies augeretur . Ita S. Clemens Papa , qui propriis oculis hoc viderat , testatur Epist. ad Cor. cap. 6. „ Post hanc , inquit , persecutionem magnus electorum „ nu-

„ numerus apparuit , quos invidia multis indignitatibus ac tormentis cruciaverat , & qui aliorum exemplar facti fuerant , quemadmodum ipsi SS. Petri & Pauli exemplum fuerant secuti : adeo ut non soli Viri sed & Feminae crudeliora superarent tormenta , quibus suam Fidem hinc probantes tantò gloriosius reciperent præmium & coronam , quantò eorum sexus erat infirmior „ . Et inter istas quandam Danaem seu Daniam recenset , quæ credi potest sub Domitiano gloriosum Martyrium pertulisse .

IX. Deus *Patiens redditor*, ad exercendam suorum patientiam, & suam inde gloriam ostendendam , crudelem Domitianum aliquandiu quidem sãvire permisit , sed impunem quia justus non reliquit : dum enim extremo furore in membra Christi irrupit , Divinam ipse ultionem expertus occidit in proprio suo cubiculo 18. Septembris Anni 96. & sui Imperii 15. ; & sicut ipse Flavio Clementi proditoriẽ vitam ademerat , ita & ipse proditoriẽ occidit . Historici Ethnici Apollonius Thian. & Svetonius Domitiani necem ex nece Clementis ortam suspicantur , ejusque auctorem faciunt Stephanum Flaviæ Domitillæ olim famulum , sive ut de Clementis nece ultionem sumeret , sive tot aliorum cujuscumque conditionis , in quos crudeliùs tunc maximè Domitianus sæviebat . Hoc Juvenalis Satyrâ 4. visus est agnovisse , dum ait Domitianum in securitate vixisse , donec in Lamias & primæ qualitatis Personas desæviit , earumque sanguine contentus fuit ; tunc solùm periisse , cum viliorẽ sanguinem fundere cœpisset .

X. Hactenus dicta supponunt , Domitianum persecutionem usque ad mortem continuasse . Verum si Hegesippo apud Eusebium L. 3. cap. 20. , & Tertulliano Apol. cap. 5. credimus , Domitianus ante mortem persecutionem Ecclesiæ retraxerat , & exules ab exilio revocarat . Cum enim persequeretur non solos Christianos , sed omnes etiam , qui ex stirpe Davidica originem traherent , timens æquè ac antea Herodes prædictum Messia Regnum , duplici odio in Christianos sub Judæorum nomine ferebatur ; & odio adversus Religionem , quam ut impiam & Atheam execrabatur , & odio adversus Messiam , à quo metuebat , ne sibi Imperium eriperetur . Verum cum , ut alibi dixi , à Nepotibus Judæ qui de stirpe Davidica erant , indigentiam & paupertatem , quâ proprio labore manuum vivere tenebantur , intellexisset , omni timore seposito , pacem eis ac Christianis omnibus reddidit . Ceterum hoc admisso , & quoddam Edicta etiam contra Christianos revocarit , id nisi extremis diebus vitæ suæ fecisse dicendus

duerit, ut improvisâ nece præventus exequi non potuerit, ut ex Lactantio de mort. Persec. cap. 3. Certum enim est, nec S. Joannem à Patmos nec alios exules rediisse, nisi post Domitiani mortem; & Nervam fuisse illum, qui vetuit, ne quisquam quòd Judaico (idest Christiano) more viveret, imposterum accusaretur, ut testatur Dio L. 68.

XI. Quomocumque autem fuerit, firmum semper pro Veritate Religionis Christianæ, & iniustitia eam persequentium stat argumentum. Nam vel Domitianus ante mortem Edicta lata contra Christianos revocavit; & ita malè & injustè se gessisse cognovit, & factò ipso pœnituit: quare ex hoc Domitiani factò Tertullianus in Apolog. cap. 5. Gentiles ita arguebat: *Tales semper nobis infecutores, injusti, impii, turpes, quos & ipsi damnare consuevistis, à quibus damnatos restituere soliti estis.* Vel persecutionem usque ad mortem continuavit, & ita cum injustè & iniquè egisse improvisâ ejusdem nece Divina ultio manifestavit: ut enim ait Lactantius L. 5. Divin. Instit. cap. 24.: *Quidquid adversum nos mali Principes moliuntur, fieri (Deus) ipse permittit: Et tamen injustissimi Persecutores, quibus Dei nomen contumelie ac ludibrio fuit, non se putent impunè laturos, quia indignationis adversus nos ejus quasi Ministri fuerunt. Punientur enim judicio Dei, qui acceptâ potestate supra humanum modum fuerint abusi, & insultaverint etiam Deo superbiis, ejusque nomen æternum vexillis suis subjecerint, impiè nefarièque calcandum. Propterea vindicaturum se eos celeriter pollicetur, & exterminaturum bestias malas de terra.*

CAPUT IV.

De Persecutione sub Trajano.

§. I.

Qualis fuerit & quomodò peracta.

INter persecutiones, quas sub Romanis Imperatoribus passa est Ecclesia, tertium locum obtinet illa quam sub Trajano sustinuit. Trajanum tanquam mansuetudine, & comitate singularem proponunt Historici. Cognomen *Optimè* omnium consensu meruit, & post ejus mortem novo Principi fuit in Senatu publicè acclamatum *Felicioꝝ Augusto, melioꝝ Trajano*, ut refert Eutropius L. 8.: qui etiam notat illud egregium ejus-

ejusdem responsum, quo amicis eum ob nimiam comitatem culpantibus ait: *Talem se Imperatorem esse privatis, quales esse sibi Imperatores privatus optasset.* Cui aliud singulare addunt Xantippus & Dio Cassius, nempe quòd delecto à se Prætorianarum Cohortium Præfecto nudum gladium porrigens dixerit: *Accipe gladium, quem pro me, si bene atque ratione imperavero; distringes; sin minus, eo ad interitum meum utere.* Quis ergo extam miti & justo Principe summam Ecclesiæ Dei tranquillitatem & pacem non fuisset auspicatus? At res in contrarium cecidit. Nimia ejus complacentia de miti fecit crudelem, nimius falsæ justitiæ zelus de justo fecit injustum, ut videbimus.

II. Nova contra Christianos Edicta & Leges expressè Trajanus non tulit: sed Populis ubique modò hæc, modò illâ causâ contra Christianos tumultuantibus indulgens, animum ac vires, ut in eos ferocirent (Judæis maximè instigantibus & facem præferentibus) adjecit. Justitiæ & Religionis titulus etsi falsus accessit. Aderant Leges Imperiales, quibus severè vetabatur, nullum ut Deum venerari, qui à Senatu approbatus non fuisset: cumque hæc auctoritate Jesus Christus, quem Christiani ut Deum venerabantur, probatus non fuisset; imò, etsi postulante Tiberio, à numero Deorum apertè exclusus, hoc solum absque alia nova lege sat erat, ut Christi adoratores omnium insultibus ac violentiis impunè paterent, nec eis se defendendi aut causam suam tuendi locus daretur: eò præsertim quòd confessioni Christi ut Dei execratio omnium aliorum Deorum, in quos Romani præcipuè à pluribus seculis juraverant, conjungebatur. Quapropter, ut referunt Tertullianus in Apolog. cap. 5., & Eusebius L. 5. cap. 21., etiam sub Principibus in Christianos magis propensis, illos quidè accusare sub pœna etiam mortis interdicebatur, æquè tamen interdictum erat eos absolvere, si semel ad justitiæ tracti essent Tribunal, nisi priùs Fidei renuntiasent; nec ab hoc rigore ipsi Senatores Romani immunes erant. Cùm ergo Trajanus se religiosissimum ac vigilem Legum custodem profiteretur, fiebat, ut querelas contra Christianos undique ad ipsum deportatas libenter susceperet, & pro accusantium voto in eos ad sententiam procederet.

Quod autem in Christianos odium magis accendebat, erat sanctitas morum Paganorum corruptioni directè contraria. Puritas & vitæ castimonia, fuga omnium obscenitatum, quæ apud Paganos consuetudine seu veriùs corruptelâ invaluerant, & quas Christiani publicè damnabant, eos odibiles etiam Trajano reddebat. Is enim, quamvis aliquibus virtutibus appareret or-

natus, infano ac nefario, quo abripiebatur, puerorum amore omnes foedabat: adeò ut de eo post mortem inter Deos relato Julianus Apostata dixerit in persona Sileni: *Summam curam & diligentiam adhibendam fuisse à Jove, ut illi custodiretur Ganimedes.* Quia verò tam nefandum crimen, à quo natura ipsa abhorret, Christiani detestabantur, hæc etiam eos malè habendi Trajano occasio erat.

III. Trajanus ergo inflatus victoriis, quas ab anno 100. ad 105. de Dacis reportaverat, quos aliosque Populos Romano subjugarat Imperio, nil gloriosius, & pro sibi communi plausu aucupando aptius fore existimavit, quàm si omnes etiam Christianos ad cultum Deorum, seu veriùs Dæmonum, quorum ope de hostibus se triumphasse arbitrabatur, adigeret. Legem quidè de hoc non promulgavit; sed hanc ejus fuisse mentem abundè prodit responsum, quo Plinio Juniori eum super hoc consulenti rescripsit. Plinius ergo Junior, qui tunc ab anno 103. ad 105. Ponto & Bithyniæ præerat L. 10. Epist. 102. de modo, quo contra Christianos ibi existentes procedebat, Trajanum certiorè reddit, subinde petens, ut an benè se gereret, ipsum moneret. Primò exponit, delatos ad suum Tribunal ter interrogare, num Christiani essent; & se esse consentitibus, ter mortem minari, nisi ei Religioni renunciarent; qui ter in confessione persisterent, ad supplicium trahi jubere, eos enim extremo dignos supplicio se judicare: si non aliunde Christianismus crimen est, obstinatione saltem ac pertinaciâ, quâ Imperii Legibus se subdicere recusarent. Quoad Cives verò Romanos talis criminis delatos ratione eorum qualitatè se eos seposuisse Romam mittendos. Dubitare se tamen primò, an eodem rigore agendum sit cum pueris, adolescentibus, & provectioris ætatis vel infirmioris sexus. Secundò an pœnitentia prodesse possit ad veniam, an verò à Christianismo deficere inutile sit ei qui illum semel professus est. Tertio si vel nomen ipsum Christiani absque alio crimine puniendum sit, an verò propter crimina, quæ secum deferat. Quartò, cum numerus eorum, qui de hoc accusantur attentâ in eis perquirendis diligentiam, in dies augeatur, quorum aliqui libellis absque nomine auctoris dênuntiantur, dicit, plures à se interrogatos, protestatos fuisse, se non esse nec fuisse unquam, paratosque esse ad Idolis, & Imagini Cæsaris (quod Christianis nefas est) thus adolendum: alios verò protestatos esse Christo se jam renuntiasse, & hoc adorando Idola & Imagines confirmasse. Hos autem requisitos, quid in Christianorum cœtibus ageretur, ingenuè confessos esse, dicit, quòd statim

statis diebus ante ortum Solis insimul convenientes alternatim Christo ut Deo laudes canebant, suorum mysteriorum caeremonias peragebant, illque fidem dabant, non patrandi sed fugiendi crimina, furta, latrocinia, adulteria; & datam fidem, nec non depositum sibi traditum inviolabiliter custodiendi. Post hæc ad sua revertentes nihil criminofum aut extraordinarium admittebant. Hæc teste Plinio vel ipsi Apostatæ veritate cogente asseriebant: de hac tamen, ut certior fieret, addit, se duas Ministras seu Diaconissas in quæstionem vocasse: ab illis nil aliud didicisse, nisi hæc esse superstitionem valde ridiculam, & constantiam quæ ei adherent esse prodigiosam. Hæc Plinius, concludens, se propterea scribere, quia magnæ consequentiæ & præsentis & pro futuro res est ob magnum numerum eorum, qui eâ irretiti sunt, ætatis, conditionis, ac sexus, nec sit Civitas pagus aut ager, ubi venenum hujus superstitionis non ferpat: malum autem non eò processisse, ut remedio extingui non possit, imò, cœpisse jam Deorum Tempia iterum aperiri, & Sacrificiis frequentari, & ab hac deceptione homines exurgere.

IV. Hujus Epistolæ substantiam exponere volui, ut in Plinio uno ex præcipuis Paganismi luminibus, quisquis sis Lector, dignoscas, quàm cæco & injusto judicio Religionem Christianam Pagani fuerint persecuti, ac proinde non mireris, si Justitiâ Dei obsistente irriti omnes eorum conatus tandem evaserint. Dicit primò Plinius, quòd Christianos ad se delatos non examinans, an esse Christianum crimen sit, ob solum Christiani nomen, si ei non renuntiassent, extremo tradidit supplicio. Quis ordo justitiæ hic est? ob solum nomen, non instituto examine an nomini conjunctum sit crimen, extremo damnare supplicio? Debueras prius inquirere, an Christianum nomen secum afferat crimen, & hinc conficere judicium, an qui gerit Christiani nomen puniendus sit, an dimittendus. Scio, dices, absque alio crimine, eorum pertinaciam atque inflexibilitatem puniri debuisse. Sed examinare prius debueras, an illa, quam pertinaciam vocas & inflexibilitatem, esset in malo & injusta, an verò potius constantia in bono, & justa iniquis vestris Legibus renitentia. At tandem, inquis, examinavi, & quid sub Christiani nomine veniat didici. At à quibus didicisti? A desertoribus Christi & Apostatis. Sanè tale testimonium tibi Viro prudenti debuisset esse suspectum. Quid ergo fœdisfragi isti dixerunt? Christianos in laudibus canendis occupari, mysteria sua celebrare, furta latrocinia adulteria detestari, in suis etiam secretis cœtibus nihil cri-

criminosum admittere. Hoc dixerunt, qui ejurato Christo ad vestra Numina redierunt, & huic testimonio non credis, & Christianos in Christi Fide persistentes adhuc persequeris, & supplicio dignos quasi contumaces & criminosos existimas? Non mireris, si Deus, qui Justis patrocinator, illis presidio sit, adeo ut profana vestrorum delubra Deorum in sacra fuimet Tempia sit conversurus. Hanc Plinii Epistolam vivis coloribus describit Tertullianus in Apolog. cap.2.

V. Audiamus modò Trajani responsum (apud Plinium. L. 10. Epist. 103.) Laudat primò ordinem à Plinio servatum in discussione & examine eorum, qui Christiani esse accusabantur: non enim in materiis & circumstantiis adeò diversis fixa regula stabiliri potest. Deinde statuit contra Christianos non esse inquirendum; si tamen ad Tribunal justitiæ deferantur, & Christianos esse accusentur, puniendos esse; sic tamen, ut qui Christianos se esse negaverint, & hoc effectu comprobaverint, idest Diis sacrificando, tanquam innocentes habeantur. Et licet antea suspecti essent, eorum tamen poenitentia venia non denegatur. Quoad libellos autem nullius subscriptione firmatos, nullam eis, de quocumque crimine sint, fidem esse adhibendam. alioquin res esset pessimi exempli, & nimis suo seculo indigna: Hoc est Trajani Plinio responsum.

VI. Verum si attentè tamquæsitum, quàm responsum quis consideret, utrumque inveniet confusione & contradictione plenum. Quod justum est conscientia dicat, sed odium adversus Christianos jubet exequi quod est injustum. Quia sine crimine, non inquirentur: sed quia Christiani, etiam sine crimine, nisi Christo renuntient, extremo supplicio puniantur. Ita sancit Trajanus omnium Imperatorum in Paganorum opinione mitissimus. Verat, Christianos inquire, & hoc eos innocentes pronuntiat: delatos puniri jubet, & hoc eos criminosos declarat. Indulgentiam adhibet & rigorem, dissimulat & punit. Dicat nunc Tertullianus in Apolog. cap.2.: Imperiale decretum cur tecum pugnas? si jubes criminis punitionem, cur veras ejusdem inquisitionem? Si veras inquisitionem, cur non imperas absolutionem? Quia fures latrones publicæ pacis hostes, læsæ Majestatis rei culpabiles sunt, habes Satellites ac Ministros, qui illos ac complices, imò & amicos diligenter inquireant. Solos Christianos inquire prohibes, denuntiari tamen permittis, ac si inquisitio aliud quid ageret quàm denuntiatio. Quo fit, ut dum damnas denuntiatum, quem inquire non vis, locum credendi præbeas, hunc meruisse supplicium, non quia repertum culpabilem,

bilem, sed tantum quia repertum, etsi inquiri non debuisset. Ita peracutè Tertullianus exclamans: *O sententiam necessitate confusam! Negat inquirendos ut innocentes, & mandat puniendos ut nocentes. Parcit & sedit, dissimulat & animadvertit. Quid temetipsum censurâ circumvenis? Si damnas, cur non inquiris? Si non inquiris, cur non & absolvis? Latronibus vestigandis per universas Provincias militaris statio sortitur, in reos Majestatis, & publicos hostes omnis homo miles est, ad socios & consocios usque inquisitio extenditur. Solum Christianum inquiri non licet, offerri licet, quasi aliud esset actura inquisitio quàm oblatio. Damnavis ergo oblatum, quem nemo voluit requisitum, qui puto jam non idè meruit poenam, quia nocens est, sed quia non requirendus inventus est.*

VII. Permissio tamen ista Trajani satis fuit, ut persecutio non solum perduraret, sed violentius augetetur. Qui enim Christianos oderant, media illos denuntiandi faciliè inveniebant, nec deerant ex Populo & Magistratibus, qui eorum gesta observantes eis insidiarentur, eosque sive voce sive scripto traducerent; adeò ut licet aperta non esset persecutio, in quacumque tamen Provincia inhumaniter in eos ageretur, & fortè plures sub Trajano, quàm sub alio Imperatore Martyrium variis modis subierint. Quidam etiam ut magis odibile efficerent Evangelium, Diabolo instigante, calumnias contra Christianos unquam colligentes eas evulgabant: cumque homines magis propensi sint ad credendum de alio malo quàm bonum, factum fuit Christiani nomen adeò execrabile Paganis, ut multi nec cum Christiano loqui dignarentur, si contingeret Christianum de aliquo crimine convictum, quod faciliè eveniebat causâ Hæreticorum infamium, qui tunc temporis erant, & Christianorum nomen sibi arrogabant. Nam cum Pagani enormis de ipsis audirent, & factis comprobarent, tales esse Christianos omnes arbitrabantur, & idè omnes sine discrimine persequebantur.

§. II.

Martyres sub Trajano.

LEusebius in Chronico persecutionem hanc An. Christi 107. & Trajani decimo figere videtur; fortè quia cum Princeps iste tunc in Oriente versaretur, magis violenta fuit; vel quia S. Simeon Ierosolymitanus, & S. Ignatius Antiochenus, qui illustriores victimæ fuerunt, eo anno fuerunt Martyrio coronati. Caterùm si supra celebratam Plinii Epistolam attendimus,

mus, quæ supponitur scripta anno 104., & quo tempore persecutio in Provinciis, quibus præerat, invaluerat; & jam multi Martyrium subierant; dicere debemus, eam ante cœpisse, imò ab anno 100., quo S. Clemens Papa sub Trajanò passus fuit, & Flavia Domitilla, quæ ut supra à Domitiano in exilium deportata, sub Trajano tamen vitam finivit, circa idem tempus vitam cum aliis Martyrio coronasse creditur.

II. Persecutionem hanc generalem non fuisse multi autumant: cum enim non fuisset Lege speciali generaliter indicta, credi potest, Præsidum indulgentiâ, nec reclamantibus Populis, Christianos in aliquibus Provinciis aliquali pace frui, & libertate fuisse permisos. Ita Eusebius L. 3. cap. 32. & 33. Ut enim ex Actis S. Ignatii Martyris dicemus, Fideles in Asia Minori magnâ gaudebant libertate: non hâc tamen gavisos fuisse in Bithiniâ; cujus Præses erat Plinius Junior, qui in sua præcitata Epistola, plures se ibi Martyres fecisse scribit, quamvis cum eorum nomina nec numerum indicet, hoc soli Deo notum maneat. In Syria maximè sæviit persecutio, cum ibi Trajanus moraretur. Cum enim Antiochiam venisset 7. Jan. Anno 107. Christianos ibi existentes ad necessitatem redegit vel Dæmonibus immolandi vel moriendi. Tunc autem fuit, cum S. Ignatium Romam iussit traduci bestiis exponendum. De eo, quod tunc Antiochiæ contigit, loquitur Chrysostomus tom. 1. Orat. 42.: nimirum excitatum fuisse horribile bellum adversus Ecclesiam, adeo ut Fideles in mediis plateis & cœtibus ad cruciatus & supplicia raperentur: Specialiter tamen in Episcopos irrueretur, instigante Dæmone Persecutores, ut dispersis Pastoribus dissipare posset oves.

III. Nihilominus ad Servorum suorum preces respiciens Deus, circa mensem Augusti ejusdem anni 107. Ecclesiæ Antiochenæ pacem restituit, & Christi membra, quæ Trajani sævitia huc illucque fugere compulerat, iterum in unum collegit. Hoc lætum nuntium, dum Troade esset in itinere Romam, S. Ignatius accepit, quo tanto gaudio repletus fuit, ut quâcumque transibat, rogaret Ecclesias ne lætitiæ suæ testimonia ad Antiochenos mittere differrent, quod factum fuit. Videri de hoc possunt ejus Epistolæ ad Philadelphios, Smyrneneses, & ad Polycarpum, ubi de ista pace tanquam de speciali gratia suæ Ecclesiæ facta loquitur, & ut Acta sui Martyrii ferunt circa finem ejusdem anni moriturus pro pace generali Ecclesiæ Deum oravit.

IV. Sed adhuc in aliis partibus probare volebat Deus & examinare suorum constantiam. Restitutâ enim Ecclesiæ Antioche-
næ

næ pace aliò transiit Persecutio . Philippis in Macedonia Zozimus & Rufus, qui S. Ignatii in vinculis comites fuisse traduntur, Fidem Martyrio coronarunt 18. Decembris . Alter Zosimus Sozopoli Trajano imperante sub Domitiano Præfide post varios cruciatus capite plectitur, ut Martyrol. 19. Junii. In Palæstinam etiam Persecutio devenit, S. Simonem Jerosolymitanum Episcopum Martyrio coronans. In Syriam quoque, ubi Edeffæ 29. Januarii colitur Passio SS. Sarbelii & Barbeæ sororis ejus, qui à beato Barsimæo Episcopo baptizati in persecutione Trajani sub Lysia Præfide Christum morte confessi sunt; quos idem Barsimæus 30. Januarii secutus est. Romæ celebre fuit Martyrium Beati Quirini Tribuni, qui à S. Alexandro Papa sibi in custodiam dato cum omni domo sua baptizatus, & sub Trajano traditus Aureliano Judici, post abscissam linguam, equulei suspensionem, manuum ac pedum detractionem, gladio vitam finivit (ut 30. Martii habetur): quem 10. Aprilis plures alii ab eodem S. Alexandro Papa baptizati imitati sunt, dum ipso Aureliano jubente navi vetustæ impositi, & in altum mare deducti, illic ligatis ad colla lapidibus submersi sunt . Mitto Sanctos Sulpitium & Servilianum, qui beatæ Domitillæ prædicatione & miraculis Christi Fidem amplexi, sub Trajano à Præfecto Urbis Aniano capite cæsi, 20. Aprilis coluntur . S. Crescentem Beati Pauli Discipulum Galatis datum Episcopum, post multos etiam in Galliis ad Fidem conversos, sub Trajano Martyrem effectum die 27. Junii . Nimius essem, si Martyrologia percurrens vellem omnes, qui sub hoc Principe, quem Pagani mitissimum celebrant, atrocibus cruciatibus pro Christo necati sunt, sigillatim recensere .

V. Trajani igitur Persecutio usque ad finem anni 107. perduravit: imò majori violentiâ auctam esse, cum Trajanus bellum in Orientem intulit (quod paulò ante annum 115. evenit) dicere debemus, si suscipiamus (cum Surio 5. Septembris) Acta Sanctorum Eudoxii, Zenonis, & Macarii: quibus refertur, quòd cum Exercitus undecim mille Christianorum insignem victoriam in Oriente reportasset, Trajanus tantum abfuit, ut eos justâ compensatione donaret, quin omnes Melitinam in Armenia ibi puniendos relegarit, quòd, ut generaliter imperaverat, Idolis sacrificare recusassent . Qui exilium in pace quidem tolerarunt: sed Romulus Magnus Palatii Magister, cum de hac injustitia graviter conquestus esset, & Christianum se esse confessus fuisset, Trajani iram in se adeò concitavit, ut acriter verbis objugatum, flagris cædi & tandem capite plecti imperarit .

Menologium assert, hunc Romulum ipsum fuisse, qui Trajanum moverit, ut in Galatiam pergens præfatos milites ad immolandum adigeret, sed postea ad Christum conversum: quod aliis decidendum relinquo. Græci propterea de S. Romulo 6. Septemb., Baronius tamen in Martyrologio memoriam colit die 5. ejusdem mensis. Hosce multos mille milites (non undecim mille) fuisse tandem jussu Trajani sive Hadriani ejus Successoris in odium Fidei omnes interemtis, sentiunt Græci in suis Menæis die 6. Septembris. Propterea Baronius ad ann. 108. num. 2. probabile censet, eos fuisse illos decem mille Christianos, qui sub Hadriano in Ararath monte Armeniæ cruci affixi feruntur, quorum festum die 22. Junii Ecclesia Latina celebrat, de quo infra.

VI. Quæ tamen hætenus retuli magnam mihi ingerunt difficultatem. Primò: quia ea, quæ de S. Romulo dicuntur, in solo Menologio Basilii leguntur; ubi refertur, quòd Eudoxius Comes & dux multorum millium militum, relegatus Melitinam sub Trajano, Martyrium cum suis militibus subiit sub Maximiano. In hoc quis repugnantiam non videt? Nam quomodò illi undecim mille milites cum Eudoxio duce relegari poterant sub Trajano, nimirum initio secundi seculi, & postea sub Maximiano ineunte quarto seculo Martyrio affici? Secundò: alia Mæneæ 6. Septembris videntur S. Romuli & undecim mille militum tam exilium quàm Martyrium ponere sub Trajano. At S. Eudoxii historiam unà cum 1404. militibus, quibus præerat, & qui cum eo passi sunt, sub Diocletiano ponunt, nullà Romuli & undecim mille militum factâ mentione. His ex parte concordat Martyrologium, nam 5. Septembris hæc habet: *Melitine in Armenia passio Sanctorum militum Eudoxii, Zenonis, Macarii, & sociorum mille centum & quatuor, qui abjicientes militiæ cingulum, in persecutione Diocletiani pro confessione Christi necati sunt.* De S. Romulo autem & undecim mille militibus nec ibi nec alibi Martyrologium meminit. Nam 5. Septembris agit quidem de S. Romulo, sed de eo aliud non dicit, nisi quòd fuit Aulæ Trajani Præfectus, & cum sævitiam Imperatoris in Christianos detestaretur, cæsus virgis capite truncatus est.

VII. Baronius ad ann. 108. num. 2. censet, ut dixi, undecim mille milites, de quibus in Historia S. Romuli sermo est, esse decem mille Martyres sub Trajano vel Hadriano in Majori Armenia cruci affixos, quorum festum in Martyrol. die 22. Junii colitur. Sed difficultas oritur: quomodò enim undecim millia ad sola decem millia rediguntur? Utrique in Armenia passi di-

cuntur ; sed illi Melitine , quæ in Urbem à Trajano evecta fertur : isti in monte Ararath , quem licet in Armenia situm esse Baronius contendat (cui consentit Baudrand in Lexico dicens : Ararath mons Asiæ in Armenia , ubi stetit Arca post diluvium . Pars est montis Caspii propè Mediam , & inter Artaxatam & Arispam Paludem) alii tamen in Ægypto collocant . Illi vel sub Trajano vel sub Diocletiano & Maximiano passi dicuntur ; de istis quo tempore & sub quo passi sint non lego . Sunt qui utramque historiam tam de undecim mille , quàm de decem mille Martyribus in monte Ararath crucifixis Ecclesia suscipit , ac eorum festum colit , ac de iis mentionem faciunt Græcorum Menologia ; ideò quidquid sit de illorum undecim millium cum S. Romulo Martyrio , pro veritate tamen istorum decem millium cruci affixionis , standum est . Vide Baronium in Notis ad 22. Junii .

VIII. Alii etiam sub Trajano Martyres præcipuè à Baronio recensentur : nimirum Cæsarius Diaconus Terracinae , qui unà cum S. Juliano Presbytero diebus multis in custodia maceratus tandem in saccum missus in mare præcipitatur . Ejus memoriam Ecclesia colit in Martyrologio 1. Novembris , Græci autem 7. Octobris . Ejus nomen reperitur quoque in Martyrologiis S. Hieronymi , Bedæ , Rabani . Festum quoque notatur in antiquo Calendario Romano , & in Sacramentario S. Gregorii , qui etiam Lib. 16. Epist. Epist. 1. anno 603. loquitur de Ecclesia sub ejus nomine Romæ existente . Non est tamen æquè certum , quòd sub Trajano S. Cæsarius passus fuerit . Affirmat Baronius , quia in Actis SS. Nerei & Achillei dicitur , S. Cæsarium Diaconum sepelisse corpus S. Domitillæ , jussu cujusdam nomine Luxurii Martyrio affectæ . Acta tamen ejusdem S. Cæsarii (apud Surium 1. Novemb.) passum quidè S. Cæsarium sub Luxurio dicunt , sed Domitillæ mentionem non faciunt ; imò dicunt , tunc ejus passionem contigisse , cùm Claudius matrem Agrippinam ferro necavit , quod de Claudio Nerone dictum creditur . Græci etiam 7. Octobris hunc Martyrem ponunt sub Claudio , addentes istum Claudium matrem necasse , quòd esset Christiana . Quid ergo ? Dicam : Cæsarium fuisse Martyrem certum est , sub quo Martyr effectus fuerit , incertum .

IX. Inter Martyres sub Trajano ponitur S. Hyacinthus , de quo Martyrologium 26. Julii hæc habet : *In Portu Romano Sancti Hyacinthi Martyris , qui primùm in ignem injectus , deinde in profluentem præcipitatus illasus evasit . Post hæc à Leontio Con-*

lari sub Trajano Imperatore gladio percussus vitam finivit ; cuius corpus Julia Matrona in pradio suo juxta Urbem sepelivit . Fertur apud Surium 26. Julii , quòd Leontio comminanti diversa & atrocia supplicia Hyacinthus intrepidè responderit : non sunt hæc diversa supplicia quæ timeo , sed æterna : hæc causa est , cur nec tuas nec tui Principis minas expaveſcam . Ira tua eâdem die accenditur & extinguitur . Mortem mihi minitaris . At nec tu mortem evades . At post hæc quid de te erit ? Non desunt qui Ad hæc repudiant , vel saltem hunc inter Martyres sub Trajano ponendum non esse censeant propter ea , quæ Leontius dixisse fertur , nempe : *Domini nostri Imperatores jusserunt* : tempore enim Trajani unus ipse Imperator erat non plures , nec Trajanus jussérat Christianos torqueri . Sed quidquid de hoc sit ; cum de S. Hyacintho Martyre loquantur Martyrologia etiam Uſuardi & Adonis , præcisè ob illa verba *Domini Imperatores jusserunt* : (quod fortè mendum est ponens pluralem numerum pro singulari) recedendum non esse arbitror . Addo , verba illa *Domini Imperatores jusserunt* non esse referenda ad solum Imperatorem tunc regnantem , sed ad ipsum & alios Præcessores , qui (ut Nero & Domitianus) Legibus & Edictis Christianos ad sacrificandum compelli jusserant . Quin & Trajanus esto novas Leges de hoc non ediderit ; cum tamen , ut supra dixi , statuerit , ut qui delati esse Christianos Idolis sacrificare nolissent , ultimo supplicio traderentur : quid aliud egit , quam Prædecessorum Leges sequi , & Christianos ut sacrificarept jubere ?

X. Trajanus ergo suâ personatâ mansuetudine non minus in Christianos crudelis fuit , quàm sui Antecessores : cum enim licet non inquiri vellet , delatos tamen quòd Christiani essent , juberet puniri , fiebat , ut ubique odio Populorum Præsidibus traditi , ab his punirentur , & sic ubique Christianis sanguis fundetur . Furor iste hoc modo in Christianos saviendi usque ad finem Imperii & vitæ Trajani perduravit . Hoc ex eo probatur ; quia ut supra Martyria SS. Sarbeli & Barbeæ , de quibus 29. Januarii , & S. Barsimeï Eclesiæ Episcopi , de quo 30. ejusdem mensis , sub Trajano & Lysia Præside contigerunt . Hæc autem anno 116. , hoc est uno ante Trajani mortem anno contigisse creduntur . Tunc enim Eclesiæ Civitas capta ac diruta fuit . Sic cessavit cum Trajani vita Ecclesiæ ad modicum tempus Persecutio . At numquid cessavit Ecclesiæ ? minimè . Imò magis aucta & numero & Fide multiplicata oculis persequentium apparuit . Martyrum sanguis velut granum cadens in terram ac mortuum , quò plus spargebatur , eò copiosorem fructum Christo

asſe-

afferebat. *Sic* (inquit Augustinus L. 18. de Civ. Dei cap. 51.) *in hoc seculo, in his diebus malis, non solum à tempore corporalis præsentiæ Christi & Apostolorum ejus, sed ab ipso Abel, quem primum justum impius frater occidit, & deinceps usque in hujus seculi finem, inter persecutiones Mundi & consolationes Dei peregrinando procurrit Ecclesia.*

CAPUT V.

De Persecutione sub Hadriano .

§. I.

Afferitur Persecutio .

I. **T** Rajano defuncto Ælius Hadrianus in Imperio successit, Trajani consanguineus, apud ipsum educatus, Sabine neptis Trajani conjux, & tandem à Trajano sub vitæ finem favore Plotinæ uxoris adoptatus anno Christi 117., undecimo Augusti ad Imperium assumptus fuit. Hoc imperante scribit Sulpitius Severus, quarta Persecutio in Christianos numeratur L. 2. hist. cap. 46., & hanc fuisse gravissimam; sed Libro pro Christiana Religione à Quadrato edito, & Hadriano oblato sedatam scribit S. Hieronymus Epist. 83., aliàs 94. ad Magnum, his verbis: *Quadratus Apostolorum Discipulus & Atheniensis Pontifex Ecclesiæ nonne Hadriano Principi Eleusine Sacra invisenti librum pro nostra Religione tradidit? & tantæ admirationi omnibus fuit, ut persecutionem gravissimam illius excellens sedaret ingenium.* Non quasi Hadrianus ipse persecutionem novâ aliquâ Lege aut edicto excitasset (Legem enim adversus Christianos Hadrianum non tulisse censent Tertullianus alique, ut infra dicam) sed quia, ut ait Hieronymus L. de Script. Eccles. c. 19.; hi qui Christianos oderant putabant gratum Hadriano fore, si etiam absque ipsius præcepto Christianos vexassent.

II. Hisce stantibus non pauci existimant, sub Hadriano nullam Christianos passos fuisse persecutionem, inter quos Doduvellius Dissert. Cyprian. 11.: moventurque primò ex libro Melitonis apud Eusebium L. 4. hist. cap. 26., qui, ut Marcum Antoninum à persequendis Christianis avertat, assert. exemplum Hadriani avi sui, damnans enim eos qui calumniis vexabant Christianos, ait: *Verùm imperitiam illorum correxerunt piissimi parentes sui frequentibus rescriptis objurgantes eos, qui adversus*

*Religionis nostræ homines novi aliquid moliti essent; inter quos nemo
tunc Hadrianus.*

Quod confirmat Doduvellius ex Justino Martyre, qui in Apologia 2. pro Christianis pag. 99. similiter Hadriani exemplum Antonino proponit, ut pacem Christianis impetret, & Hadriani Epistolam affert. Igitur *quâ fronte*, inquit Doduvellius, *eo nomine usus fuisset, si ipsemet Hadrianus persecutus fuisset?*

Secundò hoc idem inferre conatur ex eo, quòd cum Hadrianus summo odio in Judæos ferretur, sit, ut in Christianos, quos Judæi infensos habebant, mitis esset.

III. Hæc tamen non probant intentum. Nam quòd ex Melitone, & Justino affertur, non probat Hadrianum nunquam persecutum fuisse Christianos, sed persecutionem aliquando sedasse: Antoninum quippe uterque adhortatur, ut agnitâ Christianorum innocentia ab eorum cæde cessare juberet, imò nec prorsus cessare, sed potius ad justitiæ formam eorum cædem redigere, nimirum non solis accusantium calumniis, sed accusatione legitimâ & processibus comprobatâ. Et ad hoc affert Hadriani exemplum, qui post varias Christianorum cædes, convictus tandem & Christianorum Apologiis & Præsidum Rescriptis, ab eorum vexationibus, nisi formato processu vincerentur, abstinere jussit. Patet hoc ex ejusdem Hadriani Rescripto ad Minucium Fundanum, quod Justinus Apologiæ suæ inseruit; in eo enim dicit, se hoc litteris Serenii Graniani decessoris Minucii statuere, *ne homines turbentur, neve calumniatoribus materia fraudulenter agendi præbeatur. Quid si provinciales persecutiones adversus Christianos processu legitimo, ut & illi pro Tribunali respondeant, obtinere possunt, hæc unâ insistant viâ, & non petitionibus atque vociferationibus solis. . . . Itaque si quis eos detulerit atque probaverit contra leges quidquam commisisse, in pro delicti qualitate ita sententiam adversus eos feres, ut, mehercule, qui calumnia causâ criment cuiquam intendisse compertus fuerit, pro maleficii gravitate, in eum modis omnibus animadvertendum cures.* Ex hoc Rescripto apparet, imperante Hadriano Persecutionem in Christianos viguisse, sed cum solis vociferationibus & accusationibus plerumque calumniosis ad eorum necem procederetur, præcepit Hadrianus, ut imposterum provinciales persecutiones adversus Christianos nonnisi processu legitimo instituant. Quare nec Persecutionem sustulit, sed ad formam justitiæ moderatus est, fortè corrigens Trajani decretum, qui, ut supra dixi, Christianos inquiri quidem vetuit, sed quomodocumque delatos puniri concessit.

cesserat. Dum tamen addit, quod si quidquam contra Leges commississe reperiantur puniendi sint, adhuc Christianos puniendos esse Hadrianus decernit, quia contra Christianam Religionem Leges Imperiales statutæ erant, ut dixi & iterum dicam.

IV. Quæ hæcenus observavi confirmat ex Justino Eusebius L.4. hist. cap.8., ubi de Serenio Graniano Procofulo: *Monebat, inquit, iniquum videri, Christianos nullo objecto crimine tumultuosis vulgi clamoribus gratificandi studio indictâ causâ occidere*, cui rescriptis Hadrianus, *Ne quis posthac sine objectu criminis & legitimâ accusatione condemnaretur*. Occidebantur ergo sub Hadriano Christiani, sed quia hoc fiebat solis tumultuosis vulgi clamoribus, præcepit ipse, non ne post hac occidantur, sed ne fiat sine legitima accusatione. Porro Martyres aliquos sub Hadriano clauisse, testis est idem Justinus Apolog. 1. pag. 50., ubi conversionis suæ (quam sub Hadriano contigisse extra dubium est) causam assignans, dicit se occasione Martyrum veritatem agnovisse: *Nam & ego ipse Platonis disciplina sectator, cum calumniosè audirem Christianos deferri, intrepidè autem ad mortem, & alia, quæ terribilia esse censentur omnia, adire conspicerem; statui ipse mecum, fieri haudquaquam posse, ut illi in vitiorum pravitate & voluptatum amore viverent. Quis etenim voluptatis consecrator. . . mortem libenter completi queat, ut bonis suis seipsum privet, ac non potius modis omnibus, ut hanc sibi continenter vitam agere, & celando Principes & Magistratus fallere liceat, operam navet, nedum per denuntiationem & indicium seipsum cedi offerat?* Vide Lector, quàm validum pro Veritate Religionis Christianæ intrepida Martyrum ultrò se neci offerentium constantia exhibeat argumentum, dum propter hanc Justinus ipse è Platonico se factum fuisse Christianum apertè testatur.

V. Neque ut Doduelli putat, odium quo Hadrianus Judæos rebellantes persequeretur amore erga Christianos illi inspirabat; imò tunc Fideles duplici persecutione exercebantur: unâ quidè à Barchoceba Judæorum duce, qui, ut ait Justinus Apologia 2. pag. 72., *solos Christianos ad gravia supplicia, nisi Christum abnegarent, & maledictis incescerent, protrahere jussit* (& ex eo Eusebius L.4. cap.8.) alterâ à Græcis Ethnicis. Unde idem Justinus citato loco Ethnicis loquens ait: *Sed (Judæi) pro inimicis vos & hostibus habentes, itidem uti vos, cum possunt, occidunt & excruciant*. Et Epist. ad Diognetum: *Adversus eos (Christianos) tanquam alienigenas Judæi bellum gerunt, & Græci eos persequuntur, & os eorum causam inimicitiarum dicere nequeunt*. Accedit, quòd tunc Ethnicis Judæos cum Christianis con-

confundebant , ac utrosque tanquam Idolorum suorum contemtores execrabantur .

VI. Hoc Hadrianus comprobavit in Jerosolymorum restauratione (quam Urbem Civium Romanorum Coloniam effectam nomine suo *Æliam* vocari iussit) tunc enim Judæis omnibus ad eam accedere vetitis , adeò ut nec à longè Jerosolymam olim sue Gentis Reginam prospicere possent , ut ex Aristone Pellæo refert Eusebius L.4. cap.6. in Christianæ Religionis odium sacrorum locorum memoriam erectis ibi Idolis abolere conatus est . Ita S. Paulinus Epist. 31. ad Severum : *Hadrianus* , inquit , *Imperator existimans se Fidem Christianam loci injuriâ peremturum , in loco Passionis simulacrum Jovis consecravit* (volunt alii Veneris) & *Bethlehem Adonidis Fano profanata est : ut quasi radix & fundamentum Ecclesiæ tolleretur , si in iis locis Idola colerentur , in quibus Christus natus est ut pateretur , passus est ut resurgeret , surrexit ut regnaret , judicatus ut judicaret .* Idem dicit Hieronymus Epist. 13. modò 49. ad Paulinum , & Sulpitius Severus L.2. hist. cap.45.

VII. Ut tamen omnem evadendi viam Doduvellio præcludam , præmonendum existimo Lectorem , ne putet , Persecutiones adversus Christianos ex solis Imperatorum Edictis , vel ex privatis Præsidum odiis , aut solis Populi clamoribus ortas fuisse , sed etiam & quidem maximè ex Romanarum Legum præscripto , quibus peregrina quælibet Religio vetabatur ex Cicerone L.2. de Legibus : Christiani autem non solum novam & peregrinam Religionem (ut Romanis videbatur) inducebant ; sed & quamlibet aliam ut falsam , & præsertim eam , quæ Idolis serviebat , repudiabant : idèque eam specialibus Legibus , quas nec ipsi Imperatores convellere poterant pleno consensu Senatus proscripterant : cujus rei testis est Origenes homil. 9. in Josue dicens : *Convenerunt Reges terræ Senatus Populusque & Principes Romani , ut expugnarent nomen Jesu & Israel simul . Deceverunt enim Legibus suis , ut non sint Christiani . Omnis Civitas , omnis Ordo Christianorum nomen impugnât .* Et Tertullianus Apologet. cap. 37. ad Gentiles sic ait : *Quoties in Christianos deservitis partim animis propriis , partim Legibus obsequentes ?* Non ergo mirum , si aliquando etiam sine ullo Imperatoris speciali Edicto Christiani persecutionem paterentur . Aderant enim Leges , quibus præcipiebatur , ne Christiani delati impunè dimitterentur . Hoc supra vidimus in Plinio Juniore , sub quo licèt ab Imperatore Trajano nulum emanasset Edictum , adhuc tamen à persequendis & puniendis Christianis ad se delatis abstinere ausus non fuit sine Trajani Rescripto : qui ei respondit , Christianos non esse quidem inqui-

ren-

rendos, delatos tamen esse puniendos. Quem imitatus Hadrianus rescripsit ut supra, Christianos delatos non quidem dimitti, sed nonnisi processu formato puniri.

VIII. Verum non tantum Legum servandarum zelo, sed & proprio animo adversus Christianos Hadrianus ferebatur: erat enim genio ad cædes propensissimo, cui Spartiano teste *savitia ingenua* erat, & qui apud Dionem *multas cædes* fecisse memoratur. Et quamquam nullas contra Christianos Leges imprefferit, erat tamen Tertulliano asserente Apolog. cap. 5. *curiositatum omnium explorator*; & Romanis superstitionibus summè additus, ut de eo idem Spartianus dicat: *Sacra Romana diligentissimè curavit, peregrina contempsit, & Pontificis Maximi officium peregit, atque Eleusina Sacra suscepit*. Cumque hæc Christiani detestarentur, fieri non poterat, quin eos odio haberet, vel saltem eos persequendi occasionem dederit. Unde cum Athenis hyemem exegisset, & (ut S. Hieronymus refert L. de Script. Eccles. cap. 19.) omnibus penè Sacris Græcis initiatus fuisset, occasionem dedit Gentilibus Christianos vexandi, quam persecutionem gravissimam fuisse, asserit idem Hieronymus Epist. 84. aliàs 83. ad Magnum supra relatâ, etsi postea oblato illi à Quadrato libello eam sedaverit. Erat insuper Astrologiæ Judiciaræ maximè deditus, cuiuscumque generis divinationibus, & Magiæ magis sacrilegæ, ut refert Dio L. 69. s. adeo ut vel ipsi Pagani teste Ammiano L. 25. superstitionem, quâ præfagia observabat, contemnerent ac irriderent. Quæ omnia cum Christiana Religio execretur, fieri non poterat, ut Hadriani odium in se non concitaret, & datâ occasione ejus persecutioni non applauderet, etsi suis Edictis eam non promoveret. Sed hanc controversiam finiamus, Martyres, qui eo imperante passi sunt, ex Martyrologiis recensendo.

§. I I.

Martyres, qui in ea passi sunt Roma.

I. **V** Arianus Hadriano imperante in diversis Orbis partibus pro Christo passi referuntur. Romæ anno 119. Alexander I. Papa cum Eventio & Theodulo passus describitur in Martyrol. die 3. Maii his verbis: *Roma viâ Numetanâ Passio Sanctorum Martyrum Alexandri Papæ, Eventii & Theoduli Presbyterorum: ex quibus Alexander sub Hadriano Principe, & Aureliano Iudice post vincula carceres equuleum ungulas & ignes punctis creberrimis*

per tota membra confossus ac peremptus est. Eventius verò & Theodolus post longos carceres ignibus examinati, ad ultimum decollati sunt: de quibus Beda & cæteri Latinorum.

II. Sub Hadriano passus etiam dicitur anno 129. Xixtus I. Papa, de quo Martyrol. 6. Aprilis: *Romæ natalis Beati Xixti Papæ & Martyris, qui tempore Hadriani Imperatoris, ut sibi Christum lucrificeret, libenter mortem sustinuit temporalem. Hunc decem annis rexisse Romanam Ecclesiam, scribit Eusebius L. 4. cap 6.*

III. Inter eos, qui sub Hadriano Romanam Ecclesiam Martyrio decorarunt, ponitur S. Eustachius seu potius Eustathius cum uxore Theopiste & duobus filiis Agapito & Theopisto, qui ab Hadriano damnati ad bestias, sed Dei ope ab iis nil læsi, in bovem æneum candentem inclusi Martyrium consummarunt. Ita ex Martyrol. Rom. die 20. Septembris, quo ejus festum celebratur. Initio Imperii Hadriani passi fuisse creduntur; nam Eustathius celebris ille Placidus fuisse creditur, qui à Trajano militiæ Præfectus insigni victoriâ de hostibus triumphavit, qui postea cum Diis sacrificare nollit, sub Hadriano Martyrium cum uxore & filiis intrepidè sustinuerit. Ejus historiam Græci quoque eadem die in Menologio Basilii sic celebrant: *Magnus Martyr Eustathius Dux Militiæ Romæ claruit Trajano Imperatore, eique prius nomen erat Placidus, uxori verò Tatiana. Ob ejus autem eleemosynam voluit Deus illius saluti consulere. Visus est enim venanti Eustathio Christus, specie cervi inter cornua Crucem Solis radios vincentem habentis, & in medio imaginem Christi: prodiiitque ex cervo vox, inquit: Placide, quid me persequeris? Ego sum Jesus Christus. Credens itaque in illum baptizatus est unâ cum uxore & filiis totaque domo. Aded autem à Diabolo oppugnatus fuit, ut non solum facultatum suarum jacturam faceret; sed & uxorem captivam duci, filiosque à feris rapi; seipsum autem nudum in terra aliena sibi que mercenariâ operâ victum parare coactum viderit. At Deus uxorem ei & filios & divitias restituit. Quæsitus enim ab Imperatore, in pristino dignitatis gradu collocatur. Sed postea cognitus Christianus esse, in æneum candentem bovem, unâ cum uxore & filiis injectus, decessit. Voluit Eustathium fuisse ex Octavia Imperiali Familia, sub Tito & Vespasiano contra Judæos gloriosè militasse: post conversionem secessisse in Ægyptum, quo in itinere, à Nauta rapta ei fuit uxor, dumque trans quandam fluvium unum è filiis deferret, à Leone sibi raptum vidit, alterum verò, qui in opposita ripa remanserat, à Lupa; ac vitam per quindecim annos in angustis duxit: quo spatio temporis & ultrâ contingere po-*

potuit, ut denuò militiæ Præfectus & à prælio reversus Trajano mortuo, sub Hadriano passus fuerit. Romæ extat celebris sub ejus nomine Ecclesia, ubi olim Eustathii ædes fuisse aliqui putant, alii tamen eas alibi fuisse autumant.

IV. Inter Martyres Romæ sub Hadriano recensentur tres S. Sophiæ viduæ filiæ, quarum nomina sunt *Fides Spes Caritas*, seu græcè *Pistis Elpis & Agapis*. Harum memoriam Ecclesia Latina colit separatim a memoria Sophiæ matris: nam de illis agit die 1. Augusti; de ista autem die 30. Septembris, & hanc Ufuardus cum aliis Martyrio obiisse fert, alii verò in pace paulò post quievissè. De his Menologium Basilii die 16. Septembris simul agit his verbis: *Martyr Christi Sophia cum tribus filiabus ex Regione Italiæ fuit. Cùm autem Christianam Fidem amplecti desideraret, assumtis tribus filiabus suis, Hadriano imperante, Romam profecta, ab ejusdem Urbis Episcopo occultè unà cum illis baptizata est. Post susceptum baptismum docebat alios, quam ipsæ didicerant, Christi Fidem, multosque ad Dominum convertebant. Quod ubi resistum est, correptæ ab Hadriano, tortæ fuerunt. Et primùm quidè sancta Fides duodecimo ætatis anno suspensa scalptaque obtruncatur. Secundo loco soror ejus Spes decimum annum agens, virgis cæsa & ipsa capite damnatur. Tertio Sancta Caritas nono ætatis anno in fornacem injicitur; sed educa illæsa gladio percutitur. At mater earum Sophia gratias Deo de omnibus agens, ad sepulcrum, in quod filias detulerat, advoluta, ploransque animam emisit.* S. Sophiæ nomen toto Oriente celebre fuit. Nam Chronicon Episcoporum Alexandr. de Eumene loquens, qui eam Ecclesiam rexit ab anno 133. usque ad 143. addit, suo tempore S. Sophiam cum tribus filiabus suis Martyrio coronatam fuisse. Sub S. Sophiæ nomine extat Romæ viâ Aureliâ Ecclesia. Illa autem S. Sophiæ, quæ olim fuit Constantinopolitana Cathedralis, à Sophia seu Sapientia Æterna nomen accepit.

V. Romæ quoque in Cœmeterio Calixti legitur Epitaphium cujusdam Marii Præfecti militum, qui sub Hadriano adhuc juvenis pro Christo occisus, ab amicis cum gaudio nec sine metu sepultus dicitur: quod indicat, persecutionem non fuisse levem, cum sine metu Martyrum corpora sepeliri non possent; sepultus fuit 8. vel 10. mensis, cujus nomen non exprimitur. De hoc tamen Mario Martyrologia silent.



§. III.

Martyres alii sub Hadriano passi.

I. **S** Eleutherii & Anthiæ matris apud Latinos & Græcos celeberrimum nomen est. Martyrol. Rom. 18. Aprilis hæc habet: *Messana natalis Sanctorum Martyrum Eleutherii Episcopi Illyrici & Anthiæ matris ejus: qui cum esset vitæ sanctimoniam & miraculorum virtute illustris, sub Hadriano Principe lectum ferreum ignitum craticulam & sartagine oleo pice ac resina ferventem superans, Leonibus quoque projectus, sed ab illis nil læsus, novissimè unà cum matre jugulatur.* Menologium autem Basilii die 15. Decembris, *Sacrosanctus, inquit, Martyr Eleutherius ex magna urbe Roma fuit; patre à pueritia orbatus, ab Anthiæ autem matre Fidem Christi edoctus, quam illa à magno Apostolo Paulo acceperat. Eum Anicetus Episcopus suscepit Christianorumque literis institutum Clericum fecit. Mox Diaconus & Presbyter ordinatur, deinde Illyrici Episcopus. Hadriano autem imperante comprehensus & gravissimè tortus, in ardentem furnum Præfetti jussu detruditur. Sed cum inde incolumem evasisse cerneret Præfectus, credidit & ipse; & in furnum ingressus, ex eo illæsus exiit. Tum verò Præfectus decollatur unà cum cæteris omnibus, qui in Christum crediderant. Sanctus autem Eleutherius à carnificibus gladio concisus spiritum reddidit.* Ita Menol.. Notat tamen Baronius in Not. ad 18. Aprilis, id quod dicitur S. Eleutherium ab Aniceto fuisse institutum, coherere non posse cum eo, quod dicitur sub Hadriano fuisse passum, nam Anicetus sedit post Hadriani obitum: ideoque mendum esse, & Anacletum pro Aniceto potius ponendum esse.

II. Sanctorum quoque Sabinæ & Serapiæ Virginis Martyrium sub Hadriano contigit in Umbria secundum aliquos, Romæ tamen secundum plures. Sabina nobilis Matrona Romana filia cujusdam nomine Herodis Romæ sub Vespasiano celebris, morte Valentini cui nupserrat, vidua absque liberis remansit. Anteà Fidem Christi amplexa fuisset dubitant aliqui. Volunt alii, eam ad Fidem fuisse adductam à S. Serapia Virgine Antiochena, quam summè diligebat, & apud se adhuc adolescentulam retinebat. Totam ergo Sabina se Christo dedit, bonisque operibus fidem suam in dies augebat. Exortà sub Hadriano persecutione anno 124. vel 125., Beryllus Præfes ad Sabinam misit, ut Virgines apud se commorantes ad se transmitteret. Initio recusavit Sabina, sed hortante & orante Serapia, quæ Spiritu Dei plena adhuc

adhuc puella nil pro Christo timebat, acquievit, & cum illa ivit ad Judicem. Hic honorificè ob nobilitatem generis Sabinam excipiens, eam increpuit, quòd suæ conditionis oblita vili Christianorum Sectæ se addixisset, & maximè infelicis Maleficæ (hoc nomine vocabat Serapiam) suasionibus. Cui Sabina: Vellem, ut tu quoque sanctam hanc Magiam amplectereris; & abjectis tuis Idolis, illum adorares, qui vitam æternam bonis, malis autem æterna supplicia reservavit. Quibus Judex nihil respondit, sed utramque dimisit.

III. Post tres autem dies missis satellitibus ad se Serapiam traxit, ut eam publicè interrogaret. Sabina eam secuta ac Judici iram Dei comminata, si quidquam in Virginem Deo sacratam attentaret, lacrymans recessit. Tunc Judex Serapiæ constantiam ad Idola adoranda flectere conatus, cùm nihil proficeret, imò sancta Virgo ei diceret, se Templum Dei esse, & qui Templum Dei violat, à Deo esse disperdendum, iratus eam in locum obscurum detrudi jussit à duobus Ægyptiis violandam. Mos enim erat Ethnicis virgines ante supplicium stuprandas tradere, ut referunt Svetonius in Tiberio cap. 61., Dio L. 56., Tacitus L. 5.: quod cùm etiam in Christianas Virgines exequi tentarent, eis improperat Tertullianus in Apolog. cap. 50.. Verùm, ut observat Baronius in Notis ad diem 3. Septembris, ejusmodi scelus antiquatum jam fuisse videtur: cùm reperiantur quamplurimæ virgines Romæ passæ Martyrium absque aliquo pudoris illato detrimento. Duo igitur juvenes Ægyptii cùm vespere cubiculum, in quo erat Serapia orans, ingredi tentarent, Juvenem splendentem viderunt, quo detenti tanto terrore percussi sunt, ut exanimés in terram lapsi totâ nocte in eo statu manerent, magnoque fragore ac terræ motu tota Urbs concuteretur, Serapiâ interim in precibus perseverante, ut corpus suum Deo dicatum à pollutione servaretur illa sum. Mane missi à Beryllo exploratores nuntiarunt, duos Ægyptios in terram prostratos jacere motu ac sensu carentes. Accedens Beryllus Virginem increpavit, quasi magicâ arte hoc fecisset. At illa respondit, non Magiâ Christianis vetitâ, sed potenti brachio Dei suæ castitatis custodis hoc factum esse; cùmque Judex eam urgeret, ut in sui dicti testimonium infelices illos sanitati restitueret, initio recusavit illa, ne hoc etiam magicæ arti tribueretur. Consensit tamen post multa, dummodò illi ad Tribunal coram multitudine deferrentur. Quòd cùm fuissent delati; Virgo extensis priùs ad Coelum manibus, duos Ægyptios tetigit, qui illicò surrexerunt sani, & quæ sibi acciderant coram omnibus declararunt.

IV. Tanto tamen miraculo adhuc cæcus Beryllus totum Magiæ adscribens, ait: dic mihi Serapia genus maleficiorum, quibus artibus hæc facis, & mox te dimittam, & ipsâ respondente, se omnesque Christianos omnia prorsus maleficia ad nihilum redigere: Videamus, inquit Præses, si valebit ars tua; & si non sacrificaveris, faciam tibi caput incidi: cùmque Serapia responderet, fac quod vis: ego non sacrifico Dæmoniis, quia Christiana sum, iussit Præses, ut ei duæ lampades ardentes applicarentur, quæ tamen statim extinctæ sunt. Tunc magis iratus Præses ait, *Biorbanata* (idest violentæ morti destinata, quo nomine ab Ethnicis Christiani vocabantur) & malefica, audi Imperiale præceptum, sacrificata Diis immortalibus & libera te de morte; & cùm Serapia responderet: vos potius Biothanati & malefici estis, qui negatis Deum vivum & Dæmonia adoratis cum ipsis pariter morituri; iussit eam fustibus cædi. Et tunc subito terræmotus factus est magnus, & quasi astula excisa de fustibus quibus cædebatur, in dextrum Præsidis oculum irruit, quem post triduum amisit. Tunc insano furore percitus Iudex sanctam Virginem velut Imperialibus Edictis contumacem, ac maleficam gladio percuti jubet, ac sententiâ protinûs impletâ caput ei abscissum fuit 29. Augusti. Tunc S. Sabina collectis S. Serapiæ Reliquiis in sepulcro suo honorificam ut licebat dedit sepulturam.

V. Post Serapiæ mortem totam se dedit Sabina pietatis operibus, elemosynas pauperibus tribuens, infirmos & carcere detentos visitans. Contigit autem, ut Præfectus nomine Heli-dius accederet, eique Præses Beryllus Sabinam & ea quæ gesta fuerant indicaret. Is homo sævus Sabinam ad se adductam severe objurgavit, cur suæ conditionis immemor sociaverit se Christianis, comminatus, ni sacrificaret Diis, se capite eam damnaturum. Cui Sabina respondit, se veri Dei famulam esse, nec alii quàm ipsi sacrificare velle. Tunc prolatâ in eam sententiâ caput ei amputari præcepit. Christiani verò corpus ejus sublatum in monumento, ubi ipsa Serapiam reposuerat, condiderunt. Hæc sumpta sunt ex Actis, quæ exhibet Baluzius tom. 2. Miscell., in hoc diversa, quod omnia, quæ de SS. Serapia & Sabina referunt, tanquam gesta in Umbria apud Oppidum Vendinensem (locum ignotum) proponunt; cùm Martyrologia eadem Romæ contigisse asserere, ut dicam, videantur.

VI. De S. Serapia Martyrol. Rom. 3. Sept. hæc habet: *Romæ S. Serapiæ Virgini, quæ sub Hadriano Principe cùm esset tradita duobus lascivis Juvenibus, & minime potuisset illudi, nec post-*

postmodum ardentibus facibus inflammari, jussu Berylli Judicis sustibus cesa, dehinc gladio decollata est. Passa est autem quarto Kalendarum Augusti, & à Beata Sabina in suo monumento juxta aream Vindiciani sepulta. Sed memoria ipsius Martyrii hâc die celebrior habetur, quando ambaram sarcophagum ibi compositam & ornatum fuit, & locus orationis condignè dicatus: ubi notat Baronius, nomine Area hic intelligi sepulturam Christianorum, hodie dictam cœmeterium.

De S. Sabina verò die 19. Augusti idem Martyrol. dicit: *Roma in monte Aventino natalis S. Sabinae Martyris, quæ sub Hadriano Imperatore gladio percussa Martyrii palmam adeptæ est.*

VII. Una ex illustrioribus victimis crudelitatis Hadriani fuit S. Symphorosa, quæ unâ cum Getulio viro suo & aliis ac septem filiis suis insigne testimonium pro Veritate Christianæ Religionis exhibuit. In Urbe Tiburtina circa XVIII. ab Urbe lapide distante Martyrium subiisse creduntur. Primi fuerunt Getulius (alio nomine Zoticus) & Amantius fratres ambo in Copiis Hadriani Tribuni, & Fide Christiani. Amantius Hadriani metu occultus manebat; Getulius verò, qui uxorem filios ac divitias multas Tiburi habebat, reliâs omnibus pro Christo, in Sabinis morabatur multos in Fide instruens & confirmans. Mittitur interim ab Hadriano Cerealis, qui Vicarius dicitur, ut utrumque comprehendat. Sed iste à Getulio & ab Amantio ad Christum conversus, Romam vadit, ut à Sixto Papa (qui Ecclesiam regebat ab anno Christi 119. usque ad 128) baptizetur. Non diù post omnes tres capti Getulius Amantius & Cerealis, unâ cum alio nomine Primitivo à Licinio Consulari, post verbera, post septiduum carceris Tiburi, eligentes mori potius quàm Idolis sacrificare, igni traditi sed illæsi, postremò gladio percussi vel sustibus illis capite Martyrium compleverunt: quorum corpora Symphorosa Getulii uxor in arenario prædii sui prope Tiburim honorificè sepelivit. Ita etiam Martyrolog. Romanum 10. Junii.

VIII. Extare adhuc Tiburi dicit Baronius ad diem 18. Julii cisternam siccam, in qua, durante carcere & passione Getulii viri sui & aliorum, Symphorosa cum filiis suis delituisse fertur, expectans, donec Deus & ipsam vocaret ad pugnam: quod non multò post contigit, ut ait Surius ad præfatam diem. Erexerat Hadrianus Templum, quod profanis Paganismi ritibus dedicare volebat. Consulens autem Sacrificiis Idola seu verius Dæmonia in eis habitantia, responsum accepit, se Symphorosæ & filiorum ejus continuis ad Deum suum precibus impediri. Faceret
Hadria-

Hadrianus, ut Symphorosa & filii ejus sacrificarent, & quidquid peteret, ab eis fore obtenturum.

Tunc Hadrianus Symphorosam ac septem filios ejus, quorum nomina sunt Crescens Julianus Nemosius Primitivus Justinus Staſſeus & Eugenius, comprehendi jussit: eos ab initio blandè adhortatus, ut Diis omnipotentibus thus adolerent: videns se nihil proficere, Symphorosam ad Templum Herculis trahi, ibique cædi & capillis suspendi mandavit. Sed cum nec terroribus nec suppliciis ejus constantia flecteretur, alligato ad collum ejus ingenti saxo in fluvium circa Tiberim præcipitem egit. Eugenius autem S. Martyris frater corpus ejus è fluvio retractum sepelivit. Sequenti autem die Hadrianus ad Herculis Templum regressus, & septem Symphorosa filios incassum tentatos, septem stipitibus ad trochleas extensos ac pugione transfixos in foveam projici præcepit. Refert hoc quoad substantiam Martyrolog. Rom. die 18 Julii.

IX. Eodem Martyrol. 18. Aprilis refertur: *Brixia S. Caloceri Martyris, qui à Sanctis Faustino & Jovita conversus ad Christum sub eodem Hadriano gloriosum confessionis certamen complevit.* Item 24. Maii: *Brixia S. Afræ Martyris, quæ sub Hadriano Imperatore passa est.* Apud Sardiniam in Sulcitana Insula die 13. Decembris S. Antiochi primi illius Martyris sub Hadriano passio celebratur: *Tarracina etiam 17. Junii memoria fit S. Montani militis, qui sub Hadriano Imperatore & Leontio Consulari post multa tormenta Martyrii coronam accepit.* Celebris quoque fuit in Fide constantia S. Mariæ Tertulli ancillæ, de qua 1. Novembris, quæ à Domino suo accusata, quòd esset Christiana, sub Hadriano diris verberibus afflicta, equulei extensione, & ungarum laceratione vexata, Martyrium complevit. Hujus Acta exhibet fusè Baluzius tom. 2. Miscell. pag. 115., in quibus præter multa hoc admirabile legitur: quòd post varia tormenta clamore commiserantis Populi relaxata, sub custodia tamen relicta, illa signo Crucis se munens oculosque ad Cælum attollens, vidit Angelos & Filium Dei sedentem ad dexteram Patris. Sed cum se à persequentibus circumdatam conspexit, iteratò orans vidit ante se ingens saxum, quod illicò apertum ac Virginem quasi amplexans intra se suscepit, & latera aperta statim conclusit, vestium vestigiis solum extra remanentibus. Cumque monitus Præses misisset multitudinem, ut saxum illicò scinderet, vix operi manum apposuit, cum repentino tonitru ac fragore terræ concussâ cuncta corruere viderentur, ac subinde duo Equites armis ac frænis radiantibus è Cœlo delapsi tanto multitudinem

terrore impleverunt, ut pars ad suorum Numinum Templum confugiens, ibi igne à Cœlo misso cum suis Idolis exusta sit, pars verò exclamarit : Magnus Deus Mariæ, Magnus Deus Christianorum ! & millia eorum crediderint . Quis hæc non admiretur ? Scio tamen ab aliquibus ut dubia haberi : at quidquid sit ; non huic soli , sed innumeris mirabilibus in argumentum suæ veritatis Christiana Fides innititur .

X. At non in solo Occidente Hadriani furor defævit ; ad Orientem quoque pervasit . Græci in Menologio Basilii die 4. Septembris Martyrium colunt Sanctæ Hermionis , S. Philippi Apostoli (seu veriùs Diaconi ut suo loco dixi) filiæ, his verbis : *Sancta Martyr Hermione filia Philippi Apostoli floruit Trajano Imperatore . Habuit autem sororem nomine Euthychen , cam qua Ephesum perrexit , ut Joannem Theologum adorarent : non tamen invenerunt eum ; translatus enim jam fuerat . Venit autem & Trajanus Imperator Ephesum ad Persicam expeditionem , audivitque nomen Hermiones percelebre ac venerandum , eò quòd prophético esset afflata Spiritu . Comprehensum igitur cùm à Christi cultu abducere non posset , jubet illi alapas incuti : cui Dominus apparens addidit animum confirmavitque , ut tormenta fortiter perferret ; sed paulò post à Trajano dimittitur , quòd ei prædixisset fore , ut de Persis triumpharet . Hadrianus verò gener & successor Trajani comprehensam iterùm cogit Christum abnegare Idolisque sacrificare : quod cùm illa facere renuisset , jussit amputari ejus caput . Crescentibus verò Carnificum manibus , ipsi etiam in Christum crediderunt , atque unà cum illa capite plexi sunt .*

XI. Celebrant etiam die 2. Maii Latini sub Hadriano agonem Sanctorum Exuperii & Zoes uxoris ejus , Cyriaci & Theoduli filiorum . Græci quoque in Menol. Basilii eadem die ajunt : *Sancti Martyres Hesperus & Zoes cum filiis , imperante Hadriano , erant ex Regione Italiæ servi cujusdam Divitis . Cùm autem Cyriacus & Theodolus à parentibus suis christianè educati essent ; die quâdam dixerunt eis : Quare servimus impiis istis , & non potiùs Christo , ne pereamus cum illis ? Audiens hæc mater ipsorum dixit : Resistite ei qui emit corpora nostra , & Martyrium pro Christo sustinebimus . Tunc abeuntes pueri domino suo dixerunt : Corpora quidèm nostra tuæ subjiciuntur potestati ; animarum veròstrarum Dominus est Jesus Christus , qui omnium dominatur . Amodo non tibi , sed illi serviemus . Obstupescens ad hæc Dominus illorum , tunc quidèm illos ad Hesperum patrem misit , in Tritonio Urbe versantem ; postea verò patrem matremque accersens , torqueri illos jussit , demùm in fornacem accensam injectis flammisque combussit .*

XII. Ex his & aliis, quæ prætereo, apparet, quàm falsò asserat Doduvellius, nullam in Christianos fuisse Persecutionem, & nullos Martyres sub Hadriano, nisi fortè Martyrologia, & Menologia falsitatis velit arguere. Inter Martyres Feminas sexu fragiles ac adolescentes recensui, ut Lector magis magisque in hac veritate firmetur, quòd Religio Christiana opus sit non humanum sed Divinum, & in ea tuenda Potentia Dei sola adversus humanæ potestatis conatus operata sit. Unde rectè concludit Augustinus Serm. 12. de Sanctis modò 276. cap. 1. : *Tot convicta miraculis persistebat impietas, tot vexata suppliciis non cedeat infirmitas: agnoscat ergo operata Divinitas; quando enim corruptibilis pulvis contra tam immania tormenta duraret, nisi in eo Dominus habitaret? In his enim omnibus ille agnoscendus, ille glorificandus, ille laudandus est, qui & in prima vocatione dedit fidem, & in suprema Passione virtutem.*

§. IV.

An Hadrianus à Persecutione cessaverit?

I. **Q**uamvis ex hætenus dictis manifestè appareat, Hadriano imperante, imò & promovente, etsi non Lege publicè latà, ut plerique volunt, animo tamen & Imperialium Legum observantiæ zelo, Persecutionibus Christianos fuisse vexatos; volunt tamen multi, Hadrianum Persecutionem aliquando sustulisse, & Christianos liberè Religionem suam profiteri permisisse: idèd hoc examinare æquum duxi. Nam hoc etiam admisso, magnum pro Veritate Religionis Christianæ exurget argumentum, ut infra dicam.

II. Occasionem sedandi in Christianos Persecutionem Hadriano dedisse Quadratum & Aristidem suis pro Christianis Apologiis ipsi oblatis, scribit S. Hieronymus Epist. 83. aliàs 84. ad Magnum his verbis: *Quadratus Apostolorum Discipulus & Atheniensis Pontifex Ecclesie nonne Hadriano Principi Eleusina Sacra invisenti librum pro nostra Religione tradidit? Et tamen admirationi omnium fuit, ut persecutionem gravissimam illius excellens sedaret ingenium. Aristides Philosophus vir eloquentissimus eidem Principi Apologeticum pro Christianis obtulit contextum Philosophorum sententiis: quem imitatus postea Justinius & ipse Philosophus Antonino Pio & filiis ejus Senatuique librum contra Gentiles tradidit, descendens ignominiam Crucis, ac Resurrectionem Christiani totà predicans libertate.* Idem dicit in L. de Script. Eccles. c. 19.

in

in Quadrato, & cap. 20. in Aristide . Eusebius quoque L. 3. hist. cap. 37. inter Viros celebres in edificio Ecclesiæ , cuius Apostoli jecerant fundamenta , Quadratum ponit, quem dicit etiam prophetico dono fuisse illustratum . Et L. 3. cap. 3. dicit , in Libro , quem Hadriano obtulit , sequentia contineri , nempe quòd *Servatoris nostri opera semper conspicua erant , quippe quæ vera essent : iis scilicet , qui morbo liberati , aut qui ex morte ad vitam revocati fuerant . Qui quidem non solum dum sanabantur , aut dum ad vitam revocabantur , conspecti sunt ab omnibus , sed secuto deinceps tempore , nec solum quamdiù in terris moratus est Servator noster , verum etiam post ejus discessum diù superstites fuerant : adeò ut nonnulli eorum ad nostra usque tempora pervenerint .* Quibus apparet , Quadratum vidisse etiam aliquos ex illis , qui à Christo sanati aut ad vitam revocati virtutem ejus testari experientiâ poterant .

III. Rationibus ergo & eloquentiâ Quadrati & Aristidis in suis Apologiis expositis , additâ insuper Epistolâ Serenii Grani-
ni Asiæ Proconsulis ad ipsum scriptâ (de qua supra §. 1.) à persequendis Christianis Hadrianus abstinuit , vel saltem temperavit . Porro quod maximè Hadrianum ad parcendum Christianis movisse puto , fuit quòd Magiam & omnem Dæmoniacam vim virtute Christi in dies everti conspiceret . Cùm , ut dixi , hisce præstigiis maximè deditus esset , videns ista contra Christianos nihil proficere , imò Christi nomine penitus evanescere , valdè credibile est , hoc inter cætera Hadriani animum ad indulgendum Christianis flexisse . Porro quanti faciendum sit hoc argumentum , demonstrat S. Athanasius L. de Incarn. Verbi Dei cap. 48. , ubi invitans omnes ad videndum artem Magicam , quæ ante Verbi adventum totum ferè Orbem occupaverat , Verbi potentiâ prorsus destructam : *Veniat , inquit , & quisquis ea quæ diximus experiri cupit , atque in mediis ipsis Dæmonum præstigiis & oraculorum fallacis ac Magiæ prodigiis signo Crucis , quæ apud ipsos ludibrio est , utatur , solumque Christum nominet : mox videbit quàm citò per ipsam fugentur Dæmones , cessent oracula , ars omnis Magica veneficiaque evanescant . Quis itaque quantusque ille est Christus , qui suo nomine ac suâ præsentia omnia usquequaque obscurat & delet , solusque cæteris omnibus fortior est , atque universum Orbem suâ doctrinâ replet ? Respondeant Gentiles , qui tam effrenatè impudentissimèque vident . Enim verò si homo ille est , qui fieri potest , ut unus homo omnium quos ipsi colunt Deorum potentiam superet , nihilque prorsus illos esse suâ propriâ virtute convincat ? Quid si Magum eam esse dicant : quæ sit ut à Mago ars omnis Magica*

destruatur & non potius confirmetur? Namque si dumtaxat homines Magos vicisset, vel uno tantum fuisset superior, non immeritò suspicarentur, eum arte quādam præstantiori aliorum fuisse victorem. Si verò de universa planè arte Magica, ejusque nomine Crux Christi triumphavit: perspicuum sanè inde fuerit, Salvatorem Magum non fuisse, utpotè quem Dæmones, quos alii Magi invocant, tanquam Dominum fugiunt. Quis itaque ille sit, dicant Gentiles, quibus nulla alia cura videtur esse, quàm ut cacinnentur. An Dæmonem eum, atque idcirco aliis valentiorē fuisse contendunt? Sed si id dixerint, risum haud dubiè concitabunt, prioribusque rationibus poterunt confutari. Quis enim fieri potest, ut ille sit Dæmon, qui ipse Dæmones expellit? Namque si aliquos Dæmones abigeret, rectè eum in Principe Dæmoniorum ceteris inferioribus fortiorē fuisse arbitrarentur; quod & eidem olim Judæi contumeliosè exprobrabant. Verùm si omnis Dæmonum furor ejus nomine retunditur ac repellitur; nemo certè non videt, hic illos etiam errare; nec Dominum nostrum & Salvatorem Christum aliquam, ut putant, virtutem dæmoniacam esse. Ex quibus ita concludit: Quocirca si Salvator nec merus homo, nec Magus, nec aliquis Dæmon est; sed tamen & Poetarum commenta, & Dæmonum fallacias, ac Gentilium sapientiam suā Divinitate evertit & obscuravit; an non evidens est, atque inter omnes constare debet, verè illum Dei Filium & Verbum Sapientiamque Patris esse? Hujus argumenti vim ac efficaciam perpendat Lector, insuperabilis enim est.

IV. Hâc victum dicere possem Hadrianum, & ex factis & mirabilibus à Christo patris sibi à Quadrato & Aristide in suis Apologiis expositis motum fuisse ad sedandam Persecutionem in Christianos, imò hujus veritatis testimonium etiam ab ipso Dæmone habuisse. Cum enim, ut supra dixi (de S. Symphorosa) Templum suis Diis Tiburi erexisset, eisque illud dicere vellet, responsum à Dæmonibus illud inhabitantibus tulit, se precibus Symphorosa & filiorum ejus torqueri, nec posse ejus votis quidquam concedere, nisi Symphorosam & filios sibi sacrificare compelleret. Quibus omnibus permotus Hadrianus, voluit aliqui, quòd prope finem vitæ suæ adeò favorabilis Christianis evaserit, ut Jesum Christum omnibus ut Deum adorandum proponere cogitaret, eique Tempa erigere, in cujus signum plura ædificaverit Tempa absque statuis, ac nullius Divinitatis nomini consecrata, quæ proinde solo ædificatoris nomine *Hadrianæa* appellata fuerunt, teste Lampridio in Alexandri Augusti vita. Et Epiphanius hæres. 20. cap. 12. dicit, in Urbe Tiberiade fuisse Templum maximum Hadrianum dictum, quia ab

ab Hadriano inchoatum; sed quia relictum imperfectum, ad usum balnei Cives illud convertere cogitabant: attamen sub Constantino Comes Joseph in Ecclesiam partem ejusdem erexit.

V. Verum admissio, quod Hadrianus plura Tempia erexerit, eaque sine Idolorum statuis, nec ullo falso Numini dicata reliquerit; assentiri tamen non possum; quod ea Jesu Christo dicare in animo habuerit. Nam estò erga Christianos clementior, & si velis etiam favorabilis factus fuerit, & ab eis persequendis cessaverit; cenfeo tamen eum Christianam Fidem amplectendi animum habuisse nunquam, sed in Idolorum cultu usque ad mortem perseverasse: quod sic ostendo. Habebat Hadrianus adolescentem amasium nomine Antinuum, quem insano & turpi amore prosequebatur. Hic dum unà cum Hadriano super Nilum navi veleretur delapsus in fluvium submersus interiit anno Christi 132. Hadriani verò 16.. Rem tamen aliter narrat Dio L. 69., nimirum quod Hadrianus Magiæ addictus, ut sibi protraheret vitam, hominem quærebat, qui pro ipso vitam suam Diis voluntariè immolaret: sed cum non inveniret, Antinous sese in amoris sui mutuam testeram spontè obtulit, ac se in fluvium deiecit. Amasii jacturam inconsolabilibus lacrymis deflevit Hadrianus, quas ut ex parte solaretur, voluit ut Græci Antinuum Divinitate donarent, adeò ut brevi tempore huic infami novo Deo erectæ statuæ passim viderentur, eique magnifico erecto Templo festum diem, ac solemnes ludos in ejus honorem statuerit; imò & Urbem dictam Antinopolim aliàs Hadrianopolim ædificavit (ut inter alios Chrysost. in 2. ad Cor. homil. 26.) Quæ insania vel ipsis Ethnicis scandalo fuit, adeò ut Dio L. 69., Spartianus, & alii Scriptores Pagani non sine stomacho eam referant.

VI. Meritò igitur hoc Ethnicis impropere Athanasius Orat. contra Gentes num 9., ubi ostendens Gentilium cæcitatem, qui etiam homines perpetuam infamiam notandos Divinitate donabant: *Talis, inquit, his etiam temporibus Antinous Hadriani Romanorum Imperatoris amasius, quem tametsi hominem fuisse & quidem hominem minime gravem & honestum sed impurissimum, non ignorant, eum tamen ob metum Imperantis venerantur. Cum enim Hadriano in Egypti Regione diversante, Antinous illius voluptatis minister à vita migrasset, eum Imperator coli jussit: quo utique facto, & se adolescentis etiam post ejus mortem amore flagrare ost testatus, & justæ reprehensionis argumentum in se ipsum præbuit; ac denique insigne adversus universam Idololatriam statuit monumentum: quo nempe pateret, illam non aliter ab hominibus inventam fuisse,*

fuisse, quàm vanâ comminiscantium cupiditate: quod & Dei sapientia his verbis declarat „ Initium fornicationis est exquisitio Idolorum, & adinventio illorum corruptio vitæ est „ (Sap. 14. v. 12.) His positis sic discurre. Hæc de Antiuoo ab Hadriano gesta contigerunt anno Christi 132., utique post sedatam Quadrati & Aristidis Apologiis in Christianos Persecutionem: quæ certè non indicant, Hadrianum erga Christum ejusque Legem, cui hæc abominabilia sunt, affectum fuisse; sed potius eum in idololatricis magicisque superstitionibus perseverasse. Accedit, quòd, ut aliqui sentiunt, etiam post datam pacem Christianis, non diu post ipso saltèm connivente Persecutio iterùm surrexit: & quòd ipse insanabili correptus morbo, post inutiliter tentata magicæ etiam artis remedia desperatus sæpius pugionem petiit, quo se transfigeret, impunitatem illum sibi porrigenti promittens: tandem omnibus ipsi etiam Senatui exosus, qui ob ejus innumeras crudelitates ejus Acta rescindere volebat, Baiis in Campania miserè interiit. Hæc quoad historiam.

VII. Verum quomodocumque res fuerit, semper viget pro Christianæ Religionis Veritate argumentum. Nam vel Hadrianus, Quadrati & Aristidis pro Christiana Religione Apologiis convictus, vetuit imposterùm Christianos persequi, & in hoc perseveravit, imò Tempia Christo ut Deo erigere cogitavit: & sic Veritas Christianæ Religionis triumphat, quæ vel ipsos Persecutores vincere potuit; & factum est, ut secundùm S. Augustini dictum L. 18. de Civit. Dei cap. 50.: *Ipsi Reges, quorum Legibus vastabatur Ecclesia, ei nomini salubriter subderentur, quòd de terra crudeliter auferre conati sunt; & falsos Deos inciperent persequi, quorum causâ Cultores Dei veri fuerant antea persecuti.*

Vel saltem quòd Religio Christiana, ut se diffunderet Hadriano non eguisset, cùm inter præcedentes Persecutiones jam inveniretur latè per totum Orbem diffusa. Unde Eusebius L. 4. Præparat. Evang. cap. 17.: *Quidni, inquit, tandem jure meritoque concludas, illos tum Populos improbis omnes Damonibus mancipatos fuisse, nec ante genus humanum tantorum acerbitate malorum vexari desisset, quàm Servatoris nostri doctrina passim illaxisset? Nam illa quidem ad Imperium Hadriani viguisse, ac sublata deinceps fuisse constat ex historia, quo nimirùm tempore salutaris hujus doctrinæ vis apud omnes jam latè Populos Gentisque regnaret.*



CAPUT VI.

De Persecutione sub Marco Aurelio Antonino.

§. I.

De Tito Antonino Pio.

I. **M**ortuo Hadriano ei in Imperio successit anno Christi 140. Titus Antoninus Pius, quem ille adoptaverat, vir genio placidus & clemens; & hac de causa ab initio Imperii dictus Pius, quod licet tunc essent multi rei, quorum nonnulli postularentur ad supplicium, neminem puniri voluit; quare omnibus laudabilis fuit, & animi tranquillitate Numæ Pompilio comparatus. Usque adeo ab humano sanguine fundendo alienus fuit, ut Julius Capitolinus in Antonino dicat: *Sub eo nullus percussus est Senator, ut etiam parricida confessus in Insula deserta poneretur, quia vivere illi natura legibus non licebat.*

II. Hanc animi lenitatem ostendit etiam erga Christianos, quibus pacem, quâ sub Hadriano gaudere inchoaverant, continuare concessit. Id probat ejusdem Epistola, quam S. Justinus; qui tunc Romæ florebat, exhibet Apolog. 2. *Populis Asiæ, videlicet: Imperator Caesar Titus Aelius Hadrianus Antoninus Augustus Pius... Populis Asiæ salutem. Equidem putarim, Diis quoque ipsis cura esse, ne hujusmodi homines lateant. Multo enim magis, illi siquidem possint, vindicaverint in eos, qui adorare ipsos nolunt; contra quos tumultum ipsi concitatis, & sententiam eorum velut impiorum & nullorum Deorum sugillatis: & alia quædam obijcitis crimina, qua probare non potestis. Commodius sapè illis fuerit, si ob id videantur, de quo accusantur, mortem oppetere. Et vincant illi vos, suos ipsorum animas potius projicientes, quàm ut obsequentes quod postulatus faciant. De terramotibus autem, qui vel ante fuere, vel adhuc fiunt, non iniquum nobis visum est vos admonere, qui animos cum fiunt despondetis, res illorum cum vestris comparantibus; quoniam longè illi sunt, quàm vos, erga Deum liberiores atque fidentiores. Ac vos quidem ignorare videmini per id tempus Deos; & Sacrorum obliviscimini, & cultum Dei non tenetis. Quicquid & illum potentibus emulatione invidetis, & ad mortem asque eos persequimini. De rebus ejusmodi & alii quidam Provinciarum Rectores Di-*

vinif.

vinissimo Patri meo scripserunt. Quibus ille rescripsit, nihil molestiae faciendum esse talibus Viris, nisi quid adversus Imperium Romanum moliti esse deprehenderentur. Quin & ad me multi de eis litteras dederunt; quibus de Patris mei, quem imitandum mihi esse duxi, sententiâ respondi. Si quis actionem adversus quempiam ejusmodi habens deferat illum dumtaxat ut hujuscemodi hominem; delatus quidem à crimine absolvatur, etiamsi talis esse appareat; ipse autem delator judicio pœnas pendat. Hæc pro Christianis scribit Imperator Ethnicus: non solum eos innocentes declarat, sed Ethnicis comparatos Deo fideiores pronuntiat. Numquid favorabilius scribere poterat Christianus Imperator? In his vim veritatis Christianus Lector agnoscat.

III. Quantum verò sub hoc Principe Religio Christiana profecerit, ostendunt primò idem Justinus in Dialogo cum Tryphone Judæo pag. 347., ubi sic ait: *Atqui ne unum quidem est genus mortalium, sive Barbarorum, sive Græcorum, seu etiam aliorum omnium quocumque appellentur nomine; vel Hamaxobiorum (Populi sunt Scythiæ Europæ circa Mæoticam Paludem) vel Nomadum domo carentium, vel in tentoriis viventium (Scentitarum) & pecoribus vitam tolerantium; inter quos per nomen Crucifixi Jesu supplicationes & gratiarum actiones Patri & Fabricatori rerum omnium non fiant.*

Secundò: S. Irenæus, qui eodem seculo floruit L. 1. advers. hæres. cap. 10. commendans unitatem in doctrina Ecclesiæ totò jam Orbe diffusæ: *Et si, inquit, in Mundo loquela dissimiles sunt, sed tamen virtus traditionis una & eadem est. Et neque hæc quæ in Germania sunt fundata Ecclesiæ aliter credunt, aut aliter tradunt: neque hæc quæ in Hiberis sunt, neque hæc quæ in Celtis; neque hæc quæ in Oriente, neque hæc quæ in Ægypto, neque hæc quæ in Lybia, neque hæc quæ in medio Mundi constituta: sed sicut Sol creatura Dei in universo Mundo unus & idem est, sic & lumen prædicationis Veritatis ubique lucet & illuminat omnes homines, qui volunt ad cognitionem venire.* Is erat tunc Ecclesiæ status, hæc amplitudo: vix uno seculo nata, omnibus Gentibus invisæ, totum Orbem jam occupaverat. Hoc argumentum tractat etiam Tertullianus ejusdem seculi auctor Apolog. adv. Gentes cap. 37., & L. adv. Judæos cap. 7. & 8., de quo inferius.

IV. Antoninum Pium Christianis faventem descripsi. Contrà hoc ob stare videtur primò, quòd ejus Imperii anno 3. S. Sixtus seu Xixtus I. Papa Martyrium subierit, ut ad annum 142. num. 3. notat Baronius. Secundò, quia, ut idem Baronius refert ad annum 143., sub pœna mortis Lessionem Sybillinorum ac Pro-

Prophetarum Librorum Antoninus prohibuit: quòd lectione illorum complures à patria superstitione deficerent, & ad Religionem Christianam transirent. De hoc conqueritur S. Iustinus Apolog. 2. pag. 82. his verbis: *Operâ autem & instinctu malorum Daemonum mortis supplicium adversus Librorum Hystaspis, aut Sybillæ, aut Prophetarum Lectores constitutum est: ut per timorem homines ab illis, quò minus scripta ea legentes rerum bonarum notitiam percipiant, sed in servitute eorum retineantur, absterreantur.*

V. Hæc tamen non obstant. Non primum; nam Sixtus I., ut ait Eusebius L. 4. hist. cap. 4. & 5., cùm Pontificatum suscepit anno 3. Hadriani, nimirum Christi 119., & Ecclesiam annis decem rexit, mortem Martyrio pertulit anno 119. & Hadriani 12.. Quare stare non potest, quòd sub Antonino Pio illud pertulerit, sed sub Hadriano: unde Martyrol. Rom. die 6. Aprilis de eo ait: *Romæ Natalis Beati Xisti Papæ & Martyris, qui tempore Hadriani Imperatoris, ut sibi Christum lucrificeret, mortem sustinuit temporalem.* Quibus conformis est Eusebius citato loco cap. 5. dicens: *Porrò annum Imperii sui duodecimum agente Hadriano, cùm Xistus Episcopatum Urbis Romæ decem annis obtinisset, septimum ab Apostolis Telesphorus in ejus locum successit: qui cùm undecim annis sedisset, anno primo Antonini Pii migravit è vita, teste eodem Eusebio cap. 10. dicente: Caterùm Hadriano vitâ persuncto, cùm unum & viginti annos imperasset, Antoninus cognomento Pius administrationem Imperii suscepit. Hujus anno primo cùm Telesphorus migrasset è vita anno sui Episcopatus undecimo, Pontificatum Romanæ Urbis sortitus est Hyginus (seu Hyginus) unde non Xistus I. sed Telesphorus sub Antonino Pio mortuus est.*

Verùm eadem difficultas emergit. Cùm enim etiam Telesphorus Papa Martyr obierit, unde in Martyrol. Rom. 5. Januarii legitur: *Romæ S. Telesphori Papæ, qui sub Antonino Pio post multos labores pro Christi confessione illustre Martyrium duxit: quod Beda Usuardus & Ado confirmant: quomodo Antoninus Pius Christianis favisse dicitur?* Quapropter aliâ viâ dico, Martyrium Telesphori & fortè aliorum, contigisse sub initio Imperii Antonini, nimirum anno primo, & ante promulgatum pro Christianis Edictum, de quo supra, & refertur etiam ab Eusebio L. 4. cap. 13. Porrò ante illud tempus, eodem imperante Antonino, à cædibus Christianorum non fuit omninò temperatum, non quidè Imperatoris mandato, sed sententiâ Præsidi & furore Gentilium ob eversionem Idolorum conclaman-

tium contra Christianos, ad quem furorem comprimendum Justinus Apologiam obtulit, & Antoninus Edictum promulgavit.

VI. Ad secundum eodem modo respondeo, Edictum, quo sub poena mortis vetabatur legi Libros Sybillinos & Propheticos, prodiisse ab Antonino anno Imperii sui 4. instigantibus Christiani nominis hostibus, qui ferre non poterant, quod Sybillæ quamvis Ethnicæ, adeò clarè pro Christo locutæ fuissent, sicut etiam Prophetæ, quorum clamoribus Antoninus & ipse Ethnicus censuit indulgendum. Caterùm hoc Edicto non obstante præfati Libri legebantur, nec contra legentes ad poenam mortis in eo statutam ventum est. Unde Justinus supra laudatus sic prosequitur: *Quod certè quidè efficere & ad finem suum perducere nequiverunt. Non enim absque timore tantùm hujusmodi scripta legimus, verùm etiam vobis ad inspiciendum, quæ in eis traduntur, ut videtis, offerimus, grata acceptaque omnibus fore scientes. Atque hoc etiam si paucis persuasimus, maximum tamen inde feremus lucrum. Nam ut boni agricolæ amplam à Domino capiemus mercedem.* Ex iis tamen, quæ Justinus in prælaudata Apologia dicit, apparet, non tantâ pace ante Edictum imperante Antonino fruitos fuisse Christianos, quin aliqui eorum sive à Præfatis sive à Populis persecutionem & Martyrium passi in Martyrologiis fuisse legantur.

§. II.

De Marco Aurelio ejusque Persecutionis origine.

I. **M**ortuo Tito Antonino Pio anno 161., vel 163. ut vult Baronius, Marcus Aurelius, quem ille ante adoptaverat, ideòque Antoninus dictus, Imperium assumpsit, in quo Lucium Verum generum suum sibi collegam elegit, cui Lucillam filiam collocaverat. Marcum Aurelium fuisse potius genio mitem & placidum, dicunt Eusebius in Chron., & Orosius L. 7. cap. 15.; sub eo tamen violenta Persecutio afflixit Ecclesiam, in qua multi Martyrio coronati fuere, ut dicam infra. Persecutionem hanc ordine quartam ponunt Eusebius, & Orosius; Sanctus Augustinus quoque L. 18. de Civit. Dei cap. 52. quartam dicit ab Antonino; Veteres namque Marcum Aurelium Antonini nomine indicabant, quia ab Antonino Pio adoptatum, ut notat Baronius ad annum 163. num. 5.: Sulpitius tamen Severus, qui L. 2. hist. n. 46. quartam Persecutionem sub Hadriano ponit, hanc vocat quintam dicens: *Sub Aurelio deinde Antonini filio Persecutio quinta agitata.*

II. Mar-

II. Marcus Aurelius Philosophiæ studio valdè deditus erat, unde cognomento *Philosophus* dictus, cui ut liberiùs vacaret, nec Imperii sollicitudinibus impediretur, Lucium Verum collegam adscivit, quem statim ad bellum Parthicum destinavit. Cùm ergo M. Aurelius Philosophis præferim Stoicis multum deferret, & hi à Christianis tanquam infciti traducerentur, Christianos tanquam suæ doctrinæ eversores detestabantur: ideòque una ex causis, quæ in eos etiam Marcum Aurelium concitavit, fuit Philosophorum indignatio. Ex hac sibi prædixit Martyrium (ut verè fuit) S. Justinus. Cùm enim Philosophos, & præcipuè quandam nomine Crescentem sapiùs validè confutasset, & Philosophi nomine indignum pronuntiasset, Apolog. i. ad Senatum pag. 40. dicit: *Et ego igitur expecto, ut ab aliquo eorum, qui nomine sunt Philosophi, insidiis appetar & ligno infigar, vel ab ipso etiam Crescente Philosopho & Philocompo, hoc est strepitus popularis & insolentis arrogantia amatore. Indignus namque est, qui Philosophus & sapientia amator dicatur, propterea quòd publicè de rebus, quas ignorat, videlicet quòd Christiani Athei prorsusque sine Deo & impii sint, asseverat; ad gratiam & libidinem eorum, qui ab eo sunt in errorem inducti, hoc faciens.*

III. Cùmque insuper Justinus ipse Scholam Religionis Christianæ erexisset, & liberrimè contra Moralem Antippi, Epicuri, & aliorum Gentilium Philosophorum declamaret, omnium eorum Sectas nedum contra se, sed adversùs Christianos concitaverat. Justino accedebat Tatianus Assyrius (olim Philosophus Ethnicus postea Sacrorum Librorum lectione conversus, deinde S. Justinus Discipulus, sed tandem Sectæ Encritarum infelix parens) qui in Oratione ad Græcos & ipse Philosophos exagitabat, eos tanquam indoctos & incapaces despicendo; ajebat enim pag. 157.: *Ceterùm vos cùm non possitis ingenio vestro hæc intelligere, discite ab intelligentibus: utcumque mortis contentum & animi tranquillitatem nihil extra se suamque sortem desiderantis exercere vos gloriemini. Atqui tantum ab hoc studio Philosophi vestri absunt, ut nonnulli sexcentos in annum aureos ab Imperatore Romano ad nullum utilem finem accipiant, ne scilicet vel barbam frustra prolixam alant. Crescens denique ille Megalopoli nidulatus maximè omnium puerorum incesto amoris deditus & pecunia studio addictissimus erat. Et post multa pag. 162.: Quid magnum, inquit, aut admirandum agunt Philosophi vestri? Incedunt enim altero ex humeris neglecto, capillitium demittunt copiosum, barbam alunt, ungues serinos gerunt, & cùm nihil se desiderare dicant, indigent tamen secundùm Proteum coriario propter peram, textore*

propter tunicam, lignario propter baculum, denique & coquo propter gulam; aliaque Justinus & Tatianus Philosophis exproabant, quasi oppositum iis quæ docebant facientibus, & summâ rerum Divinarum ignorantia laborantibus: cum è converso Christianorum gesta doctrinæ responderent, & sublimia de Deo sentirent. Hæc audientes Philosophi elatione ac superbiâ turgidi, colligat quisquis, quanto furore accenderentur. Cumque ea ad Marcum Aurelium suis aucta querelis deferrent, quantum ab eo ipsis maximè dedito auctoritatis in Christianos se ulciscendi acceperint, cogitet Lector.

IV. Altera causa fuit hæc: Marcus Aurelius, ut Julius Capitolinus refert, ab infantia Ritibus ac Cæremoniis Romanis deditus, summâ curâ vigilabat, ut in hoc vetus Religio exactè custodiretur, nec quidquam novi induceretur: antiquo enim jure vetitum erat, ne nova Religio invehleretur: & gravia supplicia statuta adversùs novorum Numinum à Senatu non probatorum cultores. Porro cum Christiani Romanos Ritus detestarentur, & Christum, quem Senatus inter Deos referre (etsi Tiberio hoc petente) recusaverat, ut Deum colerent: facile creditu est, Principem avitæ superstitionis observantissimum, *Qui, eodem Capitolino teste, octavo suæ ætatis anno ab Hadriano in Saliorum Collegium relatus est, & in Saliatu functus & Sacerdotio, & Præsul, & Vates, & Magister, & nonnullos inauguravit & exauguravit*, in Christianorum internecionem toto ardore conspirasse: maximè quia hi nedum veteres Ritus aspernabantur, & Christum ut Deum adorabant, sed insuper omnes Gentilium Deos contemnebant, quod apud ipsos immane sacrilegium erat, & læsæ Majestatis crimen excedens reputabatur, juxta Ulpianum L. i. ff. ad Leg. Jul. Majest. *Proximum sacrilegio crimen est, quod majestatis dicitur.*

V. Quare licèt assentiar, Marcum Aurelium nullam generalem Legem sive Edictum de persequendis Christianis edidisse; nihilominus undique contra Christianos conclamantibus Populis, & Provinciarum Præsidibus Idolorum cultum everti nuntiantibus, negari non potest, privatis rescriptis eum præcepisse, ut contra Christianos secundum Leges antea editas procederetur. Aderant autem Leges antiquæ quæcumque Religionem novam, nec à Senatu probatam damnantes. Aderat Trajani Lex omnes Christianorum associationes & cœtus vetans. Et ut refert S. Justinus Apolog. i. pag. 43. (& ex ejusdem Martyrio apparebit) hoc solum quod quis profiteretur se esse Christianum, sat erat, ut statim morti addiceretur. Hanc velut visibilem in-
inju-

injustitiam damnaverat quidem Antoninus Pius, expressè vetans, ut supra ostendi, ne quis ob solam Christiani nominis professio- nem puniretur: & delatori pœnam imponens; sed hujus justi decreti observantiam statim post ejus mortem exolevisse dicen- dum est, Populorum odio habentium veritatem instigatione: ut enim Eusebius ait in procemio L. 5. hist. tempore Antonini Veri: *Cùm in nonnullis terrarum partibus violentior adversus nostros Persecutio commota esset ex incurfione Populorum, innumerabiles propè Martyres per universum Orbem vituisse, ex iis quæ in unica Provin- cia (Gallia: de quo infra) contigerant, conjicere est.*

VI. Ut autem furori Populorum Marcus Aurelius obsecun- daret, maximam vim addebant Philosophi, ergà quos magno studio & amore, ut dixi, ferebatur: unde Julius Capitolinus prosequitur: *Tantum autem honoris Magistris fuit detulit, ut imagines eorum aureas in lavario haberet, & sepulcra eorum aditu hostiis & floribus semper honoraret.* Hi ergo, videntes se à Chri- stianis, & maximè à Justino & Tatiano, tanquam indoctos ac inscitios traduci, nec respondere valentes, Populos contra Chri- stianos accendebant, & Imperatorem, cujus lateri eorum aliqui semper aderant, ut Christianorum nece Populis satisfaceret, excitabant. Hinc Populi estræni animositate Christi Fideles tan- quam impios & atheos accusantes, sanguinem ipsorum clamoribus postulabant: Magistratus autem, quorum intererat hos sedi- tiosos pœnis coercere, eos suâ auctoritate palàm muniebant, & contra Christianos ut reos agebant, & Præsides, ut ait Justi- nus Apolog. 1. pag. 41. Dæmonum Ministri effecti, omnes, qui se Christianos esse profitebantur, extremo supplicio puniebant. *Aliaque, inquit, Dæmones insensu nobis, atque hujusmodi Judices sub ditione sua habentes sibi que sub Religionis nomine servientes, per eos ipsos tanquam Dæmoniis agitados Principes occidi nos procurant.* Porro, ut odium quo ferebantur aliquâ justitiæ specie te- gerent, Christianos variis criminibus onerabant, ad quæ extor- quenda eorum servos, pueros, mulierculas horrendis cruciati- bus subiciebant, ut eadem Apolog. 1. pag. 50. Justinus refert. Eis causam suam dicere ac se justificare non permittebatur, sed velut oves Ethnicorum furori victimæ non aperientes os suum immolabantur.

VII. Quis hæc audiens totale Ecclesiæ Christi exterminium non formidasset? & tamen hinc incrementum sumebat. Quo plures è Fidelibus necabantur, eò plures etiam ex Ethnicis ei inferebantur, ut meritò assimilari possit viti, quæ, dum putatio- ne palmites ei abscinduntur, eò plures regerminat. Ita fiducia

plenus loquebatur S. Justinus in Dial. cum Tryphone pag. 337. : *Nou esse qui exterreat & in servitutem redigat nos, qui Jesu nomina per Fidem dedimus, per terram omnem manifestum est. Quoddamque dum gladio percutimur, & in crucem agimur, & bestis obijcitur, & vinculis & igne & tormentis aliis omnibus plectimur & excruciamur, à professione nostra non discedamus, satis constat: & quantum magis ejusmodi quadam in nos expediuntur tormenta, tantum alii plures Fideles & vera Religionis per nomen Jesu fiant cultores. Quemadmodum enim si quis vitis excidat fructificantes partes, ut palmites, qui alios floridi & frugiferi protrudant ramos, illa proferat, facit: ita in nobis quoque accidit. Plantata namque est à Deo & Christo Servatore vitis, & vinea Populus ejus.*

His Justinus ostendebat, Religionem Christi esse veram & sanctam Tryphoni Judæo, nimirum illam vitem, de qua Psalm. 127. v. 3. Propheta dicit *Uxor tua sicut vitis abundans seu exuberans*; quia dum ab ea palmites suorum nece exciduntur, novos ac plures frugiferos palmites semper producit: & quamvis eam è toto terrarum Orbe Gentiles ac Judæi eradicare conentur, altiores tamen ubique jacit radices. Quia verò Judæi assererebant hæc de se ipsis dicta esse; nam & ipsi Patriâ ejecti angustis ubique premebantur; respondebat Justinus, hoc eos jure & in poenam pati: *Qui si bello superati & ejecti (è Patria) estis, sicut Scripturæ omnes attestantur, jure hoc perpeffi estis. At nos, qui nihil tale admisimus, posteaquam veritatem Dei cognovimus, testimonium à Deo habemus, nos unâ cum iustissimo & solo immaculato & à peccato immuni Christo, è medio tolli. Clamat enim Esaias (cap. 57. v. 1.) ,, Ecce quomodo perit Justus, & nemo percipit corde: & viri justi tolluntur, & nemo considerat. ,, His Justinus ex augmento Religionis Christianæ inter Persecutiones, à Marco Aurelio suo tempore excitatas; veritatis illius sumit argumentum. Quod ex dicendis Sole clarius apparebit.*

§. III.

SS. Glyceria, Felicitatis & filiorum ejus Martyria.

I. **Q**uamvis Eusebius in Chronico initia Persecutionis ad annum 167. protrahat, nempe Marci Aurelii Antonini septimum: Alii tamen persecutionis initium ad initia Imperii ejusdem referunt, nempe ad annum 161. aut 162. Ut enim ait Orosius L. 7. cap. 15., coepit Persecutio in Christianos tempore belli contra Parthos, quod duravit ab anno 161. usque ad 165. Au-

Anno igitur 161. vel 162. consignatur illustre certamen S. Glyceriæ, quod die 13. Maii utraque Ecclesia celebrat. Græca enim in Menol. Basilii illud sic describit: *Glyceria Christi Martyr fuit temporibus Antonini Imperatoris, & Sabini Præsidis in Trajanopoli Thraciæ Urbe. Cùm autem quiddam die Præses Idolis sacrificaret, ipsa venerando Crucis signo in fronte munita ad eum accessit, Christianam sese esse ac famulam Christi professâ. Tunc hortante Præsede, ut ipsa sacrificaret, Idolorum Fanum ingressa & precibus ad Christum fufis, simulacrum Jovis deiecit & contrivit. Quamobrem capillis suspensa, ferreisque ungulis dilaniata, in carcerem conjicitur, ubi ab Angelo pascitur. Tum è carcere educta in ardentem fornacem projicitur: sed extincto per rorem Divinum igne, illæsa evadit. Postea detractâ capitis pelle, denudè in carcerem detruditur, ubi ab Angelo sanata, Custodem carceris ad Christi Fidem convertit, qui illic capite obruitur. At Sancta feris objecta vitam finivit: & Reliquiæ ejus in Heraclea Thraciæ Urbe depositæ sunt. Hæc in Femina & per Feminam in testimonium suæ Veritatis Christi virtus operatur. Martyrologium Romanum eam ponit Heracleæ dicens: *Heracleæ S. Glyceriæ Martyris Romane, quæ sub Antonino Imperatore, & Sabino Præsede passa est. Sed faciliè pro loco Martyrii designat locum sepulcri, quod à Græcis celebratur propter oleum ex ipso manans. An S. Glyceria Virgo fuerit, ignoratur.**

II. Sub eodem Marco Antonino emicuit Sanctæ Felicitatis & septem Filiorum ejus Martyrium (anno 164.) Ejus constantiam multis laudibus extulerunt Patres: S. Gregorius hom. 3. in Evang.: (habita in Basilica sub ejus nomine Romæ in die Natalis ejusdem) *Adest, inquit, Beata Felicitas, cujus hodie natalis celebramus, quæ credendo extitit ancilla Christi, & prædicando facta est mater Christi. Septem quippè filios, sicut in Gestis ejus emendatioribus legitur, sic post se tenuit vivos in carne relinquere, sicut carnales parentes soleant metuere, ne mortuos præmittant. In Persecutionis labore deprehensa filiorum corda in amore supernæ Patriæ prædicando roboravit; & parturivit Spiritu quos carne pepererat, ut prædicatione pareret Deo quos carne pepererat Mundo. Et post multa: Non ergo hauc Feminam Martyrem, sed plus quàm Martyrem dixerim, quæ septem pignoribus ad Cælum præmissis, toties ante se mortua, ad pænas prima venit, sed pervenit octava. S. Petrus Chrysologus quoque Serm. 134.: *Discurrebat, inquit, letior inter confessu cadavera, quàm inter cunabula cara filiorum, quia internis oculis tot cernebat bravia quot vulnera, quot tormenta tot præmia, quot victimas tot coronas.**

III. Ejus

III. Ejus Festum tum antiqua Martyrologia tum S. Gregorii Sacramentarium ab ejus filiorum festo distinguunt : nam filiorum memoriam ad diem decimum Julii referunt , matris verò ad diem vigesimum tertium Novembris , ut etiam in Martyrologio Romano legere est . In quo tamen observo , quòd Martyrium filiorum ponit sub Antonino Pio , sic enim habet die 10. Julii : *Romæ Passio Sanctorum septem Fratrum filiorum Sanctæ Felicitatis Martyris , idest Januarii , Felicis , Philippi , Silvani , Alexandri , Vitalis , & Martialis , tempore Antonini Pii Imperatoris sub Præfecto Urbis Publico* : Martyrium verò Matris die 23. Novembris sub Marco Antonino : *Romæ Sanctæ Felicitatis matris septem filiorum Martyrum , quæ post eos juvante Marco Antonino Imperatore decollata est pro Christo* . Cum autem Martyrium S. Felicitatis statim vel paulò post filiorum Martyrium secutum sit , non est credibile sub diversis Imperatoribus ea contigisse , nempe istud sub Marco Aurelio , illud verò sub Antonino Pio , maximè quia iste , ut dixi , Christianos vetuit puniri . Quare Acta , quæ exhibet Pater Ruinart , ponunt quidè temporibus Antonini (hoc enim cognomine vocabatur etiam Marcus Aurelius) , sed non addunt *Titi* aut *Pii* . Ita sentit etiam Baronius ad annum 175. , cui adhæret Tilmontius ; licèt Ruinart oppositum teneat , qui hoc Martyrium ad annum 150. refert .

IV. Passio igitur ita in præfatis Actis describitur : Factâ seditione Pontificum Felicitas cum septem filiis tenta delata est , quòd Christiana esset ac Deos contemneret ; nec aliâ viâ eos placari posse , nisi ipsa cum filiis Diis immolare cogeretur . Tunc Imperator Publico Præfecto injunxit , ut matrem ac filios sacrificare compelleret . Publius ergo singulos fratres advocans , eis primò bona promisit si parerent , mala autem & mortem si renuerent minitatus est . Sed cum constantes singulos , maximè adhortante Matre , invenisset , omnia ad Imperatorem detulit . Imperator verò misit eos ad Judices , ut variis suppliciis afficerentur . E quibus unus Judex primum fratrem (Januarium) plumbatis occidit post verbera & carcerem : alter secundum & tertium (Felicem & Philippum) fustibus maculavit : alius quartum (Silvanum) præcipitio interemit : alius quintum sextum & septimum (Alexandrum Vitalem & Martialem) capitalem fecit subire sententiam : alius Matrem illorum (Felicitatem) capite truncari jussit . Et ita omnes diversis suppliciis interempti unà cum matre triumphantes ad præmia cœlestia convolarunt , præclarum pro Fidei Christianæ Veritate testimonium posteris relinquentes .

§. IV.

SS. Ptolemæi & aliorum Martyrium .

I. **D**E veritate Actorum S. Ptolemæi dubium esse non potest, cum ea de visu referat S. Justinus in Apolog. 1. pag. 43. . Dubitatur tamen ab aliquibus, sub quo Martyrium sit passus : an sub Antonino Pio, ut in Martyrol. Rom. die 19. Octobris ; an sub Marco Aurelio . Sub hoc passum fuisse censet Eusebius L. 4. hist. Eccles. cap. 17. & 18. : estò autem Valesius sese opponat, Hieronymus tamen de Script. Eccles. cap. 23. & Photius Cod. 125. Eusebio consentire videntur ; & Critici etiam recentiores : qui tamen putant, quòd Apologia S. Justinì, in qua refert Martyrium Ptolemæi, quæ vulgò ponitur prima, revera sit secunda, quia paulò ante suum Martyrium scripta, & hæc Marco Aurelio fuerit oblata ; quæ verò asseritur secunda sit prima, & hæc Antonino Pio ut præfert titulus præsentata fuerit. Videri de hoc possunt P. Ruinart. Act. Mart. p. 52. , ubi de S. Ptolemæo agit, & Alexandre tom. 1. hist. Eccles. secul. 2. cap. 4. art. 2. num. 8. : quos adire non pigeat, meum enim non est in præfens de his laborare .

II. S. Ptolemæi Martyrium, ut S. Justinus & Eusebius L. 4. cap. 17. narrant, & Martyrol. Rom. 19. Octobris describit, ita contigit. Cum enim Romæ Ptolemæus impudicam Mulierem ad Christi Fidem convertisset, & castitatem colere docuisset ; & hæc omnibus modis etiam Virum suum ab impuritate retrahere, & ad Christum adducere incassum tentasset, ab isto ad Præfectum Urbicum Ptolemæus adductus, quòd esset Christianus accusatur . Cumque post carcerem in Confessione Fidei Ptolemæus persisteret, iussus est duci ad mortem . Lucius quidam cum & ipse esset Christianus, & sententiam Urbici improbare, sese Christianum liberè confessus, similem sententiam accepit, quibus & alius tertius conjunctus est, qui eodem supplicio damnatus fuit .

III. Hæc non Romæ solum, sed & in omnibus Provinciis à Præsidibus, Populis (seu verius Dæmone) eos clamoribus inflammantibus agebantur ; & præcipue in Asia, ubi Persecutio atrociter fuit anno 166. ineunte . Nec pestis quæ anno 165. ab Oriente in Occidentem per omnes Imperii Provincias grassata fuerat, eos deterruerat, quin putantes irâ suorum Numinum ob toleratos Christianos hæc evenisse, majori odio accensi eos

undique exterminare conabantur, Statio Quadrato Proconsule. Sed furorem Paganorum vicit constantia Martyrum: ut enim narrat Eusebius L.4. cap.15. ex Epist. Ecclesiæ Smyrnenfis de Martyrio S. Polycarpi, quantam animi constantiam in doloribus perferendis Fideles ostenderint, hisce verbis celebrat: *Obstupescabant omnes, qui aderant, cum illos viderent, partim flagris ad ultimas usque venas & arterias laniatos; adeo ut corporis membra penitus recondita, & viscera ipsa conspectui paterent: partim Concharum, quæ buccina dicuntur, testis & præacutis quibusdam spiculis humi constratis superpositos, & omni suppliciorum ac tormentorum genere excruciatos; bestiis denique, ut ab iisdem laniarentur, obiectos.* Et dum qui aderant horrore commoti & compatiētes lacrymas super illos continere non poterant, ab ipsis tormentorum vis nec ejulatum nec lacrymas poterat extorquere. Aderat enim Christus, qui interioris eis loquebatur, quibus præsentia & voce fiebat, ut quamvis adhuc essent in corpore, ita gloriæ sibi imminētis gaudio perfunderentur, ut ac si extra corpus essent corporis ærumnas non sentirent.

IV. *Præcipue verò (pergit Eusebius) enituisse dicunt generosissimum Germanicum, qui Divinâ adjutus gratiâ mortis metum corpori à natura insitum superavit. Nam cum Proconsul verbis eum flectere vellet, admonensque illum ætatis, oraret ut memor adolescentiæ suæ sibi ipsi parceret, ille nihil cunctatus, ultro in se attraxisse bestiam dicitur, propemodum eam adigens ac stimulans, quod ab hoc impio injustoque seculo velocius abscederet.* Sed de hoc etiam dixi Tomo præcedente cap. 9. de Martyrio S. Polycarpi (qui sub eodem Marco Aurelio paulò post passus fuit) §.2. num.5. De hoc Germanico Martyrol. Rom. agit 19. Januarii his verbis: *Smyrnæ natalis Beati Germanici Martyris, qui cum primæ ætatis venustate floreret, sub Marco Antonino & Lucio Aurelio per gratiam virtutis Dei metum corporeæ fragilitatis excludens sponte præparatam sibi bestiam damnatus à Judice provocavit, cujus dentibus comminutus, vero panem Domino Jesu Christo, pro ipso moriens, mixuit incorporari.*

V. Smyrnenfium constantiam suo Martyrio non diù post coronavit S. Polycarpus illius Ecclesiæ Episcopus, quod supra loco citato pro dignitate expendi. Quo exsaturata crudelitas visa fuit à Persecutione desistere, in Asia tamen; nam sequenti anno 167. S. Justinus Romæ sanguinem pro Christo fudit, de quo infra loquar. Imò & in Asia Christiani sanguinis sitis non diu mansit sedata. Nam circa annum 170. S. Melito Sardensis in Lybia Episcopus Apologiam suam pro Christianis Marco Aurelio

lio obtulit, conquereus, quòd tunc in Asia publicis Magistratum Urbium Edictis (quod nunquam antea factum fuerat) Christiani inquirerentur ad necem : nec credens, ejus voluntate fieri, ut homines, qui nemini læsionem aut injuriam inferebant, die ac nocte tanquam rei traducerentur, ejus protectionem implorat. An hæc Apologiâ aliquid Melito consecutus fuerit, incertum est. Si quid tamen obtinuit quietis & pacis, hanc parùm durasse sequentia demonstrabunt.

VI. In Asia enim circa illa tempora durum sustinuerunt agonem S. Victor Miles unâ cum Corona (quam Græci Stephanidem vocant). Hunc Martyrol. Rom. 14. Maii ita describit. *In Syria Sanctorum Victoris, & Coronæ sub Antonino Imperatore: ex quibus Victor à Sebastiano Judice variis & horrendis affectus est cruciatibus; quem Corona uxor cujusdam Militis, cùm cœpisset Beatum prædicare ob Martyrii constantiam, vidit duas coronas de Cælo lapsas, unam Victori, alteram sibi missam: cùmque hoc audientibus cunctis testaretur, ipsa quidè inter arbores scissa, Victor verò decollatus est.* Græci verò in Menol. Basilii die 11. Novembris ajunt: *Sanctus Victor Antonino Imperatore & Sebastiano Italia Duce claruit. Comprehensus verò, Christamque ejurare compulsus, cùm nullâ ratione ad id induci posset, luxatis digitorum articulis, in fornacem projicitur: deinde lethali pharmaco, quod sibi à Mago porrectum fuerat, exhausto, nulloque prorsus damno affectus, Magum ad Christum convertit: eratis demum oculis, capite plectitur. Ea res inspeçantem Sanctam Stephanidem movit, ut summam Sancti felicitatem efferret ac prædicaret. Quamobrem comprehensa, atque ad duas palmas, quæ in unum consortio fuerant, alligata, præcisus repenti vinculis, in duas partes scinditur.* Ita Græci, qui aliqua addunt, aliqua tacent. Solùm dum dicunt, SS. Martyres sub Sebastiano Italiæ Judice fuisse passios, videntur indicare eorum Martyrium in Italia peractum fuisse; quod tamen esset falsum, cùm etiam Græci Acta eos Damasci passios asserant: & licèt alii velint, eos fuisse passios Alexandriæ, aut Lycopoli in Thebaide, communiùs tamen in Asia creditur; qua autem in Urbe tanquam non certum omittitur.

Id autem quod de S. Corona seu Stephanide dicitur, quòd fuerit inter arbores scissa, indicat speciale supplicii genus, quod ut notat Baronius in Notis ad 14. Januarii Plutarchus vocat *Diasphendonem*, cùm duarum arborum incurvatis cacuminibus alligatum hominis corpus ad pedes, eisque subito dimissis, per medium dissecaretur. Ab Aureliano Imperatore idipsum mortis genus esse adhibitum adversùs Militem, qui violaverat thorum

hospitis, auctor est Flavius Vopiscus in Aureliano dicens : *Solus denique omnium militem, qui adulterium cum hospitis uxore commiserat, ita punivit, ut duarum arborum capita infleckeret, quas ad pedes militis deligaret, easdemque subito dimitteret, ut scissus ille utrimque penderet. Hoc supplicio S. Corona, græcè Stephani-des, affecta fuit : quis ad tantam barbariem non exhorreat ?*

VII. Alterius similiter Militis Hermiæ nomine Comanis in Cappadocia insigne extitit Martyrium, quod exhibet Martyrol. Rom. die 31. Maii, & eadem die Menolog. Basilii ita describit : *Hermias Christi Martyr fuit ex Urbe Comanis, imperante Antonino vitam militarem agens, jamque atate provectus canosque capillos habens. Ob Christi autem Confessionem captus, Sebastiano Daci fititur, ab eoque compellitur Idolis sacrificare. Sed cum id facere recusaret, in maxillis lapidibus contunditur ; deinde detractâ totius vultus pelle, dentes eidem evelluntur. Mox in ardentem fornacem injectus, indeque sine noxa egressus, jubetur venenatis cibis vesci. Sed cum hos quoque citra damnum sumisset, ad Christi Fidem convertit eum qui illos præparaverat Magum, & capite plexum ad coronam Martyrii præmisit. Ipse autem succisis totius corporis nervis in ardentem lebetem immittitur, ex quo cum incolumis evassisset, effossis oculis, capite inverso suspensus, tandem decollatus fuit.*

VIII. Ad hæc Marci Aurelii tempora refertur etiam Martyrium S. Publii Athenarum Episcopi, cum S. Dionysius, qui Ecclesiam Corinthi anno 170. regebat, dicat apud Eusebium L.4. cap.13., in Persecutionibus antea excitatis Publium Martyrium obiisse, & eo tempore Ecclesiam à Fide quam amplexa erat propemodum excidisse, sed in eam zelo Quadrati ejus successoris restitutam. *Qua in re (Dionysius) negligentiam arguit Atheniensem, quippe qui à Fide propemodum descivissent, ex quo Publius ipsorum Episcopus in Persecutionibus tunc temporis excitatis Martyrium subierit. Meminit etiam Quadrati, qui post Martyrium Publii Episcopus Atheniensium est constitutus, ejusque labore & industriâ Civis denud in Ecclesiam convenisse, & redivivum Fidei ardorem in illis reparatum esse testatur.* Ita Eusebius citatus loquens de Epistola S. Dionysii ad Athenienses scripta. Dubitari tamen jure posse censeo, Publium non sub Marco Aurelio, sed ante passum fuisse : nam Dionysius dicit, eum passum in Persecutionibus tunc temporis excitatis, quæ indicant Persecutiones remotas. Unde S. Hieronymus L. de Script. Eccles. in Quadrato cap.19. Publii Martyrium videtur ponere sub Hadriano, quem sequitur P. Ruinart præfat. in Act. Mart. §.3. pag.39.

§. V.

S. Justinus Genus Gestæ & Martyrium.

I. **S** Justinus speciali titulo Martyris prærogativa jure debetur, quippe qui non sanguine solum, quod ipsi cum aliis commune est, sed etiam verbis & scriptis Veritati Religionis Christianæ testimonium perhibuit, eamque contra Gentilium Judæorum & Hæreticorum calumnias strenuè vindicavit, adeo ut Gentilium furorem saltem ad tempus mitigarit, ut dicitur. Propterea Tertullianus L. adversus Valentinianos cap. 5. laudans Viros *sanctitate & præstantiâ insignes*, qui ante ipsum contra Hæreticos decertarant, primo loco recenset *Justinum Philosophum & Martyrem*: & Eusebius L. 4. hist. cap. 11. *Eadem*, inquit, *tempestate præ cæteris omnibus florebat Justinus, sub habitu Philosophi Verbum Dei prædicans, & scriptis voluminibus pro Fide nostra propugnans*: & cap. 16. affert Tatiani verba, Justinum *virum omnium admiratione dignissimum* proclamantis: quod ejus opera clarè demonstrant.

II. Genus & Patriam suam prodit Justinus ipse in titulo Apologiæ secundæ, seu veriùs primæ: nimirum *Justinus Prisci Bacchi filius, Flaviæ quæ nova Civitas est Syria Palæstina ortus*: quæ Eusebius L. 4. cap. 12. exponit sic: *Justinus Prisci filius, Bacchi nepos, oriundus Flaviâ Neapoli, Urbæ Syriæ Palæstinæ*. Quibus apparet, Priscum fuisse Justinus patrem, Bacchium avum, Neapolim Syriæ Palæstinæ Urbem patriam, Flaviam dictam à Flavio Vespasiano, à quo in Coloniam Romanorum fuerat creata. Urbs hæc in Provincia Samariæ sita erat, celebris in Scripturis sub nomine *Sicheu* seu *Sicar* olim Josepho teste L. 11. Antiquit. cap. 8. Samariæ Metropolis tempore Alexandri Magni, propè fontem Jacob & Templum Schismaticum Garizim sita. Vocabatur ante *Mabartha* seu *Mamortha*, teste Plinio; à Recentioribus autem *Naplos* seu *Napoliza* dicitur: ex quibus colligitur, alienum à vero non fuisse S. Epiphanium, quando hæres. 46. de S. Justino dixit: *Qui ex Samaritis in Christum credidit*. Hic enim *Justinus Samarita erat genere*, Patriâ nempe non Religione.

III. Parentibus Gentilibus natus, in Græcorum Ritibus educatus fuit: sic enim ipse initio Orationis ad Græcos, *Ne existimate*, inquit, *Græci, nullâ me cum ratione, aut nullo cum judicio à vestris Ritibus defecisse*. In Dialogo autem cum Trypho-

phone pag. 219. refert, primò Stoicæ Philosophiæ se dedisse, in qua cum nihil de Deo audiret, ad Peripateticam, deinde ad Pythagoricam, tandem ad Platoniam defecisse. In hac cum sapè audiret loqui de notionibus & ideis incorporeis, sperans, se illicò perspecturum Deum, valdè delectabatur. Quod ut facilius assequeretur, elegit solitudine prolixiùs uti, & hominum consortia vitare. Itaque locum quendam Mari proximum elegit, ubi cum quâdam die circa littus Maris solus ambularet, occurrir ei vetulus quidam Senex aspectu minimè contemnendus, cum quo multa locutus, & ab eo Christianæ Religionis Veritatem edoctus fuit, eumque post ampliùs non vidit. Quare (inquit Iustinus) *revolvens ipse mecum disputationem illius, hanc ipsam solam comperi esse certam atque utilem Philosophiam.* Et ita Christianam Religionem amplexus est. Alteram conversionis suæ causam affert ipse in Apologia 1. fuisse constantiam Martyrum, quos cum videret nullis tormentis nec morte ipsâ à Fide Christiana dimoveri posse, intulit, eos in vera Religione esse. Ita enim apud Eusebium L. 4. cap. 8. ait: *Nam & ego qui Platonis doctrinam amplexus fueram, cùm Christianos calumniis appeti audirem, eosque adversùs mortem & cætera, quæ formidabilia habentur, fortes atque intrepidus viderem: sic apud me reputabam, fieri non posse, ut iidem vitiiis ac voluptatibus dediti essent. Quis enim voluptatibus deditus aut intemperans, & humanis carnibus vesci pro deliciis habens, mortem ipsam possit libenter amplecti, quæ suas ipsi cupiditates ereptura sit? Ac non potiùs omnibus modis contendat, ut in hac vita perpetuò degat, ac Magistratus ipsos lateat; nedum se ipsum necandum ultrò prodat ac deferat?* En intrepida Martyrum in obeunda etiam spontè morte constantia Iustino Philosopho argumentum fuit, Religionem Christianam esse veram.

IV. Christianus igitur Iustinus factus, quantâ dicendi libertate & contentu mortis cœperit in Ethnicam Superstitionem invehi, ejus scripta evidentè demonstrant. Apologia 2. pag. 54. Ethnicos arguens, quòd Christianos ex solo Christiani nomine ad supplicia traherent, ait: *Ex nomine ipso certè neque laus cuiquam neque pœna rectè debetur; nisi quid vel per virtutem vel per pravitatem factum esse ab eo probari potest. Ac vos quidam ex eis, qui sacra vestra colunt, accusatos omnes non priùs pœnâ, quàm rei peragantur, afficiitis; de nostris autem (Christianis) nomen ipsum tanquam criminis comperti argumentum arripitis, cùm quidè nominis causâ delatores potiùs multare deberetis. . . . Et contra si quis ex eis, qui inter reos relatus est, se voce Christianum esse neget, eum absoluitis, tanquam nihil in eo, quod delicti nomine reprehendatis, habentes.*

At ipse è contra contemnens omnia Apolog. 1. pag. 51. ait : *Ut Christianus inveniret, me & votis omnibus optasse, & omni contentione decertasse profiteor*. In quo animo adeò forti perstitit, ut in Dialogo cum Tryphone pag. 349. dicat : *nisi, ut vera loquar, neminem prorsus veriturus, quamvis è vestigio in partes à vobis discerpar*. Et in exemplum assert, se nec Popularium suorum Samaritanorum rationem habuisse, sed scripto Cæsarem compellasse, cum vidit eos in errorem seductos Simoni Gentis suæ Mago parere, eumque Deum esse fateri.

V. Quamvis S. Justinus relictâ Palæstinâ, in qua Mundo natus & Christo renatus fuit, Romam se contulerit, ibique sedem fixerit, ubi etiam gloriosè Martyrium consummavit; attamen non tollitur, quin alias etiam Regiones Veritatis effundendæ zelo percurrerit. Eum enim in Asia fuisse constat ex Dialogo, quem Ephesi habuit cum Tryphone Judæo. In Ægypto etiam, In Cohortat. ad Græcos pag. 14. dicit, se fuisse Alexandriæ, & *vestigia domuncularum* (singulis 70. Interpretibus assignatarum) apud Pharam adhuc reliqua vidisse. Cumis quoque in Campania fuisse, & ibi Basilicam ingentem uno fabrefaciâ saxo, ubi oracula Sybilla, Cumana dicta, Majorum traditione ediderat, se conspexisse, ibidem pag. 35. affirmat. Stabile tamen ac fixum domicilium habuit Romæ, ubi sub Philosophi habitu Verbum Dei ad se accedentibus prædicabat, & scriptis voluminibus pro Fide nostra propugnabat, ut ait Eusebins L. 4. cap. 11., & S. Hieronymus L. de Script. Eccles. cap. 23., ubi Libros ab ipso conscriptos recenset; quod facit etiam Photius Cod. 135.

VI. Verùm cum & verbo & scripto quendam Philosophum Cynicum nomine Crescentem continuò redargueret, & de doctrina & moribus eum increparet, ab isto coram Imperatore M. Aurelio accusatus, Martyrio tandem coronatus fuit. Hoc omnes prælaudati Patres concorditer asserunt, & Justinus ipse sibi fore prædixerat Apolog. 1. pag. 46. dicens : *Et ego igitur expecto, ut ab aliquo eorum, qui nomine sunt Philosophi, insidiis appetar, & ligno insigat, vel ab ipso etiam Crescente Philosopho & Philocompo, hoc est strepitus popularis & insolentis arrogantia amatore. Indignus namque est, qui Philosophus & sapientia amator dicatur; propterea quòd publicè de rebus quas ignorat, videlicet quòd Christiani athei prorsusque sine Deo & impii sint, asseverat &c.* Crescentis hujus vanitatem & sordidos mores describit Tatianus ipse. (tunc Justinus Discipulus & verus Catholicus) in Orat. contra Græcos, quæ extat inter S. Justinus Opera pag. 16.,

& ex Tatiano refert Eusebius L. 4. cap. 16. dicens: *Crescens quidem, qui in urbe Roma nidulum suum fixerat, sædis puerorum amoribus & avaritiæ super omnes mortales deditus fuit. Et qui alios hortabatur, ut mortem contemnerent, ipse tantopere eam formidabat, ut Justino tanquam gravissimum malum mortem comminaverit, ed quoddam Veritatem prædicans, Philosophos belluones & deceptores esse convinceret. Et hæc quidem Justino causa Martyrii fuit.*

VII. Contra Justinus quod verbo & scripto docuerat opere comprobavit. Scripserat ipse Apolog. 2. pag. 53.: *Qui verè Pii & Philosophi sunt, eos solam veritatem in pretio habere & colere debere, ratio dicit; Veterum opinionibus, si pravae sint, insistere detrectantes. Non enim solùm, ut ne eos qui injustè quidquam egerint aut statuerint sequamur, sana ratio suadet; verùm etiam modis omnibus prae sua quoque ipsius animæ veri amatorem quemque, vel si mors intentetur, ut quæ iusta sunt dicat & faciat, eligere oportet.* Quare audiens, se ad Judicem & ad mortem pro veritate vocari, adivit intrepidus, sciens, quodd occidere quidem poterat, at nocere non poterat, ut in eadem Apologia ipse docuerat.

VIII. Comprehenso ergo (ut ferunt Acta apud Baronium ad annum 165. num. 2., & Ruinart) Justinus, & qui cum illo erant, adducti sunt ad Romæ Præsidentem, Rusticum nomine. Quibus ante Tribunal constitutis, Rusticus Præfex dixit Justino: *Age, esto Diis ipsis obediens, & Imperatoris Edictis:* & respondente Justino: *Nemo anquam reprehendi aut condemnari poterit, qui Salvatoris nostri Jesu Christi præceptis obedierit.* Tunc interrogante Rustico, cujus eruditionis ac disciplinæ esset, respondit Justinus, se omnia disciplinarum genera addiscere conatum esse, sed postremò Christianæ disciplinæ adhæsisse. Tum Rusticus miserrimum ipsum appellans, quæsit, quale esset Christianum dogma. Cui Justinus: *Rectum, inquit, dogma, quod Christiani homines cum pietate servamus, hoc est, ut Deum unum existimemus Factorem atque Creatorem omnium, quæ videntur, quæque corporeis oculis non cernuntur; & Dominum Jesum Christum Dei Filium confitemur olim à Prophetis prænuntiatum, qui & humani generis Judex venturus est &c.* Ab his digressus Rusticus, à Justino quæsit, quo in loco Christiani convenirent: sed cum responderet Justinus, Christianum convenire quoddam vellet aut posset; nam Christianorum Deus loco non circumscribitur. Sed, cum invisibilis sit, Cælum ac terram implet, atque ubique à Fidelibus adoratur & ejus gloria collaudatur. Et urgente Præfæcto, quem in locum congregaret Discipulos suos, Justinus respondit: *Ego propè domum Martini cujusdam, ad balneum cognomino*

mento Timotium (seu Timothinum) *bactenùs mansi. Veni autem in urbem Romam secundò : neque alium quempiam locum, nisi quem dixi, cognosco. Ac si quis ad me venire voluit, communicavi cum illo, Veritatis doctrinam.* Ergo Christianus es tu : inquit Rusticus : at Justinus : *maximè, Christianus ego sum.*

IX. Tunc conversus Rusticus ad Justinì socios dixit : *Chariton : an & tu Christianus es ? Cui Chariton : Christianus ego sum, Deo adjuvante. Idem à Charitana muliere quæsit, quæ se quoque Deo dante Christianam esse respondit. Tunc Evelpisto dixit : Tu verò quisnam es ? qui ait : Servus quidè'm Cesaris sum : sed Christianus à Christo ipso libertate donatus, & illius beneficio atque gratiâ, ejusdem spei, cujus & isti sunt, quos vides, particeps factus. Post hæc Præfectus quæsit ab Hierace : an & ipse Christianus esset : cui Hierax, certè, inquit, Christianus & ego sum : eundem enim Deum colo atque adoro. An, subdidit Præfectus, Christianos vos fecit Justinus ? Ego, inquit Hierax, & sui & ero Christianus. Stans autem & Pæon dixit : ego quoque sum Christianus. Et quisnam, inquit Præfectus, te docuit ? respondit ille : A Parentibus bonam Confessionem ego accepi. Post hunc Evelpistus dixit : Et ego Justinì quidè'm sermones magna cum voluptate audiebam, sed à Parentibus tamen & ipse Christianus esse didici. Tunc Præfectus : & ubinam Parentes tui sunt ? In Cappadocia, inquit Evelpistus. Quæsit Præfectus & ab Hierace, ubinam Gentium essent ejus Parentes. Cui respondit Hierax : Verus Pater noster Christus est, & Mater Fides, quâ in ipsum credimus : terreni verò Parentes mei mortui sunt, caterùm ego ab Iconio Phrygia abstractus veni. Quæsit Præfectus à Liberiano : quisnam & ipse diceret, num & Christianus esset, atque in Deos impius. Et ego, inquit, Christianus sum : colo enim & adoro solum Deum verum.*

X. Tunc Præfectus ad Justinum conversus dixit : Audi tu, qui eloquens esse diceris, & putas te veram disciplinam tenere : si à capite per totum corpus flagellis cæsus fueris, persuasum ne habes, fore ut in Cælum ascendas ? Cui Justinus : Spero, inquit, me habiturum quod habent qui Christi dogmata servaverint, si hæc ipsa qua dicis perpeffus fuero. Scio enim omnibus qui sic vixerint Divinam gratiam conservari, quoad totus Mundus consummetur. Tunc Præfectus : ergo futurum opinaris, ut in Cælum ascendas, mercedem aliquam recepturus ? Non opinor, inquit Justinus, sed scio, & hoc tam certum habeo, ut nihil dubitem. Tunc Rusticus ait : Veniamus ad id quod propositum est, & nos urget. Convenite simul, & uno eodemque animo Diis sacrificate. Ad

hæc Justinus: Nemo, inquit, qui rectè sentiat, pietatem deserit, ut in errorem atque impietatem delahatur. Tunc Rusticus: nisi iustis nostris parere volueritis, cruciatus sine ulla misericordia patiemini. Justinus autem: Maxime nos in votis habemus, propter Dominum nostrum Jesum Christum cruciatus perpeti, ac salvari: Hoc enim nobis salutem & fiduciam conciliabit ante ejusdem Domini & Servatoris nostri terribile illud Tribunal, cui totus Mundus Divino jussu assistet. Idem & reliqui omnes Martyres dixerunt, hoc addentes: Fac citò quod vis; nos enim Christiani sumus, & Idolis non sacrificamus.

XI. *Hæc audiens Præfectus talem sententiam pronuntiavit: Qui Diis sacrificare, & Imperatoris Editto parere noluerunt, flagello cæsi, ad capitalem pœnam abducantur, quemadmodum Leges præcipiunt. Itaque Sancti Martyres Deum collaudantes, ad consuetum locum perducti, post verbera securi percussi sunt, & in Salvatoris Confessione Martyrium consummarunt. Post hæc quidè Fideles clam illorum corpora sustulerunt, & in loco idoneo illa condiderunt. Hæc Acta ab omnibus ut sincera reputata. De anno, quo S. Justinus passus fuit sub Marco Aurelio, varii inter se Auctores sunt. Ejus mortem ad annum 170. protrahit Papebrochius. Ad annum 165. antevertit Baronius. Alii ad ann. 167. referunt, Marci Aurelii sextum, ut in Chronico Alexandrino: cui favere videtur Eusebius L.4. cap.16., Justinum mortem Martyrio S. Polycarpi proximè conjungens his verbis: iisdem temporibus & Justinus &c. S. Polycarpus autem anno præcedente 166. passus fuerat.*

XII. De S. Justinum Martyrio memoriam colunt 13. Aprilis Latini, nullam tamen mentionem faciunt Sociorum: sic enim in Martyrologio Romano legitur: *In qua etiam Persecutione (Marci Antonini Veri, & Lucii Aurelii) Romæ passus est Vir mirabilis Justinus Philosophus, qui cum secundum Librum pro Religionis nostræ defensione præfatis Imperatoribus porrexisset, eamque ibidem disputando strenuè propugnasset, Crescentis Cynici, cujus vitam & mores nefarios redarguerat, insidiis accusatus, quod Christianus esset, remunerationem vitæ fidelis Martyrii munus accepit. Hinc factum est, ut Papebrochius contendat, duos fuisse Justinos: unum Justinum Philosophum & Martyrem Romæ celebrem, & hunc Crescentis insidiis veneno necatum; alterum verò paulò post suum Romam à Græcia adventum à Rustico Urbs Præfecto tentum, qui cum aliis Martyrium subiit: & de hoc, non de primo Acta prælaudata esse accipienda. Tum quia, inquit eruditus Auctor, Justinus, de quo præfata Acta, Rustico*
Præ-

Præfecto ignotus erat, cum ab eo inquirat, *in cuiusnam eruditionis ac disciplinæ genere versaretur*. Tum quia in præfatis Actis nihil legitur de libellis Imperatori oblatis, nec de disputationibus contra Philosophos, nec de Crescentis Cynici machinationibus. Quibus addi potest, quòd in Menolog. Basilii die 1. Junii duplicis Iustini separatim commemoratio fit: unius Philosophi, libelli Imperatori oblato Auctoris pro Christiana Religione Scriptoris, qui *insidiis Crescentis Philosophi petitus, ab eo interfectus est*: alterius verò qui cum Sociis ab Urbis Romæ Præfecto comprehensus post interrogationes ab eo ipsi factas, ut in Actis supra relatis, *unà cum Sociis capite plexus est*.

XIII. Communis tamen sententiâ est, unum fuisse Iustinum Martyrem, & hunc Philosophum, & de isto Acta prælaudata esse intelligenda. Ita sensere Veteres omnes. Tatianus ejusdem Iustini Discipulus apud Eusebium L.4. hist. cap.16., Irenæus L.1. contra Hæreses cap.31. modò 28., Tertullianus L. adver. Valentinianos cap. 5., Epiphanius hæresi 46., Hieronymus L. de Script. Eccles. cap.23.: qui omnes dicunt, Iustinum Martyrio obiisse, sanguinem fudisse, accusatum à Crescente Philosopho, quòd esset Christianus, non verò ab eo fuisse furtim veneno necatum. Confirmat Photius Biblioth. Cod.125. dicens de Iustino: *Romæ autem commoratus sermonibus ibidem ac vitâ pariter ut habitum Philosophum egit: itaque cùm esset ferventi pietatis amore ac studio incensus, Crescentem quemdam ex iis, qui Cynici vocitantur, adversarium habuit, cum ipsi tum vitâ ac Religioni ejus obnitentem: à quo tandem insidiosè accusatus, ita ut toto ipsius vitâ instituto dignum erat, insidias istas pertulis. Martyrii namque hâc auctoritatâ, splendide latoque animo pro Christo mortem appetiit*.

XIV. Nec obsunt quæ in contrarium allata sunt. Primò: nam etsi Romanum Martyrologium taceat Socios habuisse in Martyrio S. Iustinum, dicit tamen eum Crescentis invidiâ accusatum Martyrem obiisse Romæ, & quidè Iustinum Philosophum, qui librum Imperatoribus pro Christiana Religione obtulerat, & hic est de quo prælaudata Acta loquuntur. Non enim secundò obest, quòd Rusticus eum interrogavit: cujus eruditionis & disciplinarum esset. Hæc enim est juris formulâ, ut Judex accusatum, quamvis sibi aliàs notissimum, de nomine patria conditione ac professione interroget. Imò se benè nosse illum esse Iustinum, qui Romæ dudum commorabatur docendo, dum ab eo iteratò petiit, ubi congregaret Discipulos suos: dum ab aliis, qui coram ipso adstabant, quæsit, à quo conversi essent, an

à Justino. Rursus se esse illum, qui Romæ à multo tempore domicilium habebat, & ad quem accedebant qui volebant audire Veritatis doctrinam, Justinus ipse falsus est, ut Acta testantur. De quo ergo alio quàm de Justino Philosopho loquuntur? Crescentis Judex non meminit, sed solius Confessionis Fidei; nam in interrogatione rei expressio accusatoris non fit, sed criminis; ne videretur ex invidentia potius, quàm zelo justitiæ & Religionis illum damnare. Quod verò additur ex Menol. Basilii, solvitur dicendo, ibi de eodem Justino Philosopho sermonem esse, cujus primò genus, zelus pro Religione, & odium Crescentis ei exitum parantis, narrantur, deinde insidiarum exitus, Martyrii nempe quod sententiâ Rustici unà cum aliis sustinuit. Sed hæc satis: cum ipsemet Papebrochius agnitâ Veritate sententiam suam priorem retractet tom 1. Junii Bollandiani pag. 16. &c., ut refert Ruinart.

XV. Passum fuisse S. Justinum sub Marco Aurelio, omnes consentiunt. Quòd si Epiphanius hæres. 46. dicit eum passum fuisse sub Hadriano, ex lapsu evenisse credi debet, cum exploratum omnibus sit, eum ad Marci Aurelii tempora pervenisse, cui primam (verius secundam) pro Christianis obtulit Apologiam. Ejus corpus Romæ in Ecclesia S. Laurentii extra Urbem adhuc requiescere censent aliqui. Eistadii se illud habere PP. Societatis censent, ait Tilmontius. Bollandus tamen putat, neminem gloriari posse apud se hunc thesaurum possidere: reverà autem variis in locis etiam Romæ ejus Reliquiæ ostenduntur. Hoc certum est, eum in suis scriptis sui spiritus ac pietatis monumenta in Ecclesia reliquisse: quo gloriari debemus; & petere, ut apud Deum talem nobis spiritum intercedat, quo ejus zelum pro veritate Fidei imitari possimus; veræ enim Sanctorum Reliquiæ eorum imitatio est.

§. VI.

*De Victoria per Christianos obtenta, & Martyribus
Lugdunensibus.*

I. **E**T si Marcus Aurelius Christianorum hostis esset, ingentem tamen eorum numerum in suis Exercitibus habebat, qui ei inserviebant eâ fidelitate, quam omni Potestati, quæ à Deo est, Christianus debet. Insuper autem bonum pro malo ei reddentes, insigni miraculo precibus obtento anno 174. totum Exercitum à Germapis & Sarmatis, qui eum siti & armis obse-

sum

sum tenebant, liberarunt. Factum narrat Eusebius L. 5. hist. cap. 5. his verbis: *Cùm (Marcus Aurelius) adversus Germanos & Sarmatas pugnaturus aciem instrueret , & Exercitus ipsius siti premeretur , penè ad inopiam consilii redactum esse memorant . Tum verò Milites Legionis Melitinæ , quæ Fidei merito etiam nuuc manet , dum acies adversus hostes ordinatur , flexis in terram genibus , ut nostris orantibus mos est , preces ad Deum fuisse perhibentur . Cujus spectaculi novitate hostibus stupefactis , aliud quiddam longè majori dignum admiratione accidisse narrant : Hinc quidè fulminum jactus , quibus hostium copie in fugam versæ atque extinctæ sunt : Illinc verò imbrium vim , quibus Exercitus eorum , qui Deum precati fuerant , jamjam siti periturus , præter spem recreatus est . Atque ea res tum à Scriptoribus à Fide nostra penitus alienis , quibus cura fuit res eo tempore gestas memoriæ mandare , tum à nostris etiam hominibus refertur .*

Licet autem dicat : *Sed Gentilium Scriptores , utpotè à Religione nostra dissidentes , hoc quidè miraculum commemorarunt , non tamen id nostrorum precibus factum esse confessi sunt .* Nam Dio L. 71. Mago cuidam Ægyptio Arnulpho nomine , qui cum Imperatore tunc erat , illud tribuit . Suidas alteri Mago Chaldæo Juliano nomine : Romanæ Colonæ gloriam Jovi Fulminatori & imbrifero dederunt . Julius Capitolinus , Themistius , & Claudianus ipsius Imperatoris precibus hoc evenisse asseverarunt .

Nihilominus subjicit Eusebius : *Nostris verò utpotè Veritatis cultores simpliciter atque ingenuè rem ipsam litteris tradiderunt . Ex his est Apollinaris (Hierapoli Episcopus factio coævus) : qui Legionem ipsam , cujus precibus id miraculum perpetratum est , exinde congruo rei vocabulo fulmineam ab Imperatore cognominatam esse scribit . Sed & Tertullianus ejusdem rei idoneus testis est in Apologetico , quem pro Fidei nostra defensione ad Senatum Urbis Romæ latino sermone conscripsit , cujus etiam supra mentionem fecimus , abi hanc historiam validiore atque evidentiore argumento confirmat (cap. 5.) Scribit enim Marci gravissimi Imperatoris litteras adhuc suâ ætate extitisse , quibus testabatur Exercitum Romanum in Germania cùm aqua penuriâ jamjam periturus esset , Christianorum precibus esse servatum . Eundem quoque Principem capitis pœnam comminatum esse dicit accusatoribus Christianorum . Quibus ista subjungit : Quales ergo Leges ista , quas adversus nos soli exercent impij injusti truces vani dementes ? Quas Trajanus ex parte frustratus est , vetando inquiri Christianos . Quas nullus Hadrianus , quamquam curiositatum omnium explorator , nullus Vespasianus , quamquam Judæorum debellator , nullus Pius , nullus Verus impressit .* Hactenus Eusebius .

II. Non latet, Valesium aliosque Criticos, non admittere, Legionem illam dictam fuisse *Fulminatricem*, quia Legio sic dicta multò ante apud Romanos extabat. Sed hoc etiam dato: quis prohibet, hujusmodi nomen ob securum prodigium fuisse etiam Legioni illi Christianæ applicatum? Apollinaris auctor cœvus hoc dicit: ei ergo magis credendum est, quàm Recentioribus. Sed quidquid sit. Obtentu precum Legionis Christianæ prodigium illud accidisse, M. Aurelius testatus est, dum datis litteris sub pœna gravi vetuit Christianos quòd Christiani essent imposterum accusari, ut Tertullianus citatus affirmat: ubi postquam provocavit Gentiles ad edendum aliquem Christianorum Debellatorem, subjungit dicens: *Nos è contrario edimus Protectorem, si litteræ Marci Aurelii gravissimi Imperatoris requirantur, quibus illam Germanicam sitim Christianorum fortè Militum precationibus impetrato imbri discussum contestatur. Qui sicut palàm ab ejusmodi hominibus pœnam dimovit: ita alio modo palàm dispersit, adjecit etiam accusatoribus damnatione & quidè tetrore. Harum Marci Aurelii litterarum exemplum videat Lector apud Justinum Apolog. 2. in fine, indeque inferat, quanta sit vis Veritatis, quæ etiam ab inimico laudem & protectionem extorqueat.*

III. Accepti tamen memoria beneficii è Marci Aurelii animo odium adversùs Christianos sopivit, sed non extinxit: idèoque paulò post excidit, iterumque adversùs eos anno 177. excitata est Persecutio, & quidè violentior, quàm ante. Orta fuit anno decimo septimo Imperii M. Aurelii, ut scribit Eusebius in præmio L. 5. hist., eamque cap. 1. describit. In Gallia, & præcipuè Viennæ ac Lugduni summo furore desæviit, plurimosque Martyres Christo dedit. Popularibus excitati Gubernatores Christianos tanquam flagitii reos ubique inquiri jusserunt. Et quod mirabilius est, Imperator ipse, qui triennio Christianos inquiri sub gravi pœna vetuerat, per litteras monitus, præcepit, ut qui in Christiana Religione persisterent, extremo supplicio traderentur. Fideles apud Viennam & Lugdunum degentes in Epistola ad Fideles Asiæ & Phrygiæ, quam exhibet Eusebius citato cap. 1. ita narrant: *Gravitate quidè ipsam arumnarum & Gentilium adversùs Sanctos furorem & rabiem, quaque & quanta Beati Martyres perpeffi sunt, nec nos exprimere dicendo, nec quisquam scribendo completi accurate potest. Interdicti enim à balneis, à foro, à quocumque loco, à Populo universo angustati afflicti, injurias plagas raptationes, spoliationes bonorum, lapidum jactus, cuncta denique, quæ vulgus furore ac rabie concitatum adversùs hostes comminisci solet, patientissimè tolerarunt.* Dein-

Deinde ad Tribunalia raptis sat erat fateri , se Christianos esse , ut extremo supplicio addicerentur . Hæc tamen omnia invicto animo superabant ; scientes , quòd non sunt condignæ Passionis huius temporis , si comparentur ad gloriam , quæ in ipsis revelanda erat .

IV. Quod tunc eos cruciabat , gravissimus erat metus de incerto Confessionis eventu ; non quòd tormenta , quæ inferebantur , timerent , sed quoniam exitum rei animo prospicientes , ne quis corrueret , verebantur . Inter fortes aliqui etiam infirmi comprehendebantur , ex quibus decem circiter collapsi cæteris maximum luctum attulerunt . Capti fuere etiam quidam eorum servi , qui Gentiles erant : qui Dæmonis impulsu , cum tormenta reformidarent quæ Sanctos perpeti videbant , Militibus ad hoc eos incitantibus , Thyesteas quasdam cœnas & incestos Oedipi concubitus , & alia quæ nec proloqui nec cogitare fas est , adversus Christianos ementiti sunt . Quibus in vulgus sparsis , omnes continuò adversus Christianos adedè efferati sunt , ut si qui fortè cognationis causâ moderati erga eos extitissent , tunc acerbissimâ indignatione commoti adversus eos infremerent . Hec summatim ex prælaudata Epistola Lugdunensium .

V. Timorem tamen & luctum de aliquorum infirmitate conceptum , plurimorum fortitudo & constantia fugavit , & penitus absterisit . Præcipuè Vulgi Militum & Præsidis furor in Diaconum Viennensem nomine Sanctum , in Maturum neophytum quidè sed generosissimum pugilem Christi , in Attalum Patriâ Pergamenum qui Ecclesiæ illius columna erat , & in Blandinam sexu quidè infirmam sed constantiæ fervore fortissimam totus efferbuit . In hos omni tormentorum genere saxitum est : sed frustra ; nam ab eis in atrocioribus tormentis positus nil aliud poterat extorqueri , nisi : *Christianus sum* : inter tormenta ac si inter delicias essent , nedum animo sed corpore etiam magis vigentibus . Sed & Bibliades quædam , quæ ex eorum numero fuerat , qui metu Fidem abnegaverant , respiciens , & ad supplicium ducta , repetens , Christiana sum , inter Martyres relata est . Pothinus etiam Lugdunensis Ecclesiæ Episcopus ; licet nonagenario major & corpore infirmus raptus ad Tribunal , prosequentibus ipsum Magistratibus Civitatis & universâ Plebe contra ipsum , tanquam si Christus esset conclamantibus , innumeris plagis & contumeliis affectus egregium pro Christo moriens edidit testimonium . His omnibus tantum absuit , ut qui supererant territi à Christo deficerent , quin potius omnes , qui à prima statim comprehensione Fidem negaverant , Divinâ gra-

tiâ

tiâ taciti Christum iterum consistentes, & in carcerem coniecti; durum & ipsi Martyrium sustinuerint: quibus adjunctus fuit Alexander Medicus natione Phryx, qui in Tribunali assistens impavidus, ac cæteros adhortans, eandem cum eis subiit coronam.

VI. Tandem Sanctus, Maturus, Attalus, & Blandina in amphitheatrum ad publicum inhumanitatis spectaculum ducti fuere, ubi post horribilia tormenta Maturus & Sanctus gladio jugulati sunt; Blandina verò ad palum in Crucis speciem suspensa bestiis objecta est, alacriter interim Christum prædicans: sed cum ex bestiis nulla eam tetigisset, deposita ex stipite, rursus carceri traditur in aliud certamen reservata. Attalus verò vir celebris, cum per amphitheatrum circumduceretur præcedente tabellâ, in qua scriptum erat: *Hic est Attalus Christianus*: ingentibus clamoribus à Populo ad necem postulabatur. Sed Præfex, comperto eum esse Civem Romanum, reduci in carcerem iussit. Interea ad Imperatorem scribens, quid de his qui inclusi tenebantur, sibi agendum erat. Inter hæc tamen Ecclesia invicta stabat, & Martyrum tolerantiam nedum infirmos roborabat, sed, ut dixi, qui timore perculsi miserè Fidem abjecerant, alacriter etiam sanguine defectionem suam detestabantur. Attalus verò (fortè Imperatoris adveniente Rescripto) in ferrea Cathedra collocatus, cum undique torreretur, fortiter Populum allocutus, ambusto corpore & odorem exhalante, spiritum Deo reddidit.

VII. Post omnes ultimo suppliciorum die Blandina rursus illata est unâ cum Pontico adolescente quindecim annos nato: qui nec cruciatibus aliorum territi, sed Gentilium Deos fortiter contemnentes, tantum in multitudine furorem concitaverunt, ut nec ætatis pueri, nec sexus mulieris ullâ commiseratione habitâ, post atroces cruciatus Ponticum necarint; Blandinam verò post flagra, post bestias, post sartagine, reticulo inclusam, tauro objecerint: à quo diu in altum jactata nihil tamen læsa, tandem & ipsa victimæ instar jugulata est: ipsi etiam Gentilibus ingenuè fatentibus, nullam unquam apud se Feminam extitisse, quæ tot & tanta tam forti animo pertulerit. In Sanctorum corpora Martyrum adhuc sævitum est. Eorum enim corpora, qui in carcere suffocati perierunt, canibus objecerunt; sollicitè observantes nocte ac die, ne quis ea sepulturæ mandaret. Quidquid autem aut à bestiis aut ab igne reliquum fuerat, capita cum ipsis corporum truncis pariter insepulta, ac omnibus exposita reliquerunt, Gentilibus insultantibus ac irridentibus Christianos,

nos , ac dicentibus : ubi est Deus eorum ? Quid illis profuit hac Religio , cui vitam quoque suam postposuerunt ? Tandem omni contumeliarum genere traducta , & sub dio post sex dies exposita Martyrum corpora jacuerunt , cremata atque in cineres redacta in præfluentis Rhodani alveum projecta sunt ; quasi eis , quibus abstulerant vitam corporis , spem quoque resurrectionis auferre possent .

VIII. At quamvis naturali affectu unusquisque diligit , carnem sepulturæ tradi post mortem ; attamen (inquit Augustinus L. de Cura pro Mortuis cap. 8.) *Hunc affectum Martyres Christi pro Veritate certantes vicerunt ; nec mirum , quia contemserunt quod non fuerant peractâ morte sensuri , qui non potuerunt eis , quos viventes sentiebant , cruciatibus vinci . Poterat atque Deus , qui Leonem Prophetæ corpus quod ipse occiderat alterius non permisit attingere , & fecit de peremtore custodem ; poterat , inquam , à suorum interfectis corporibus canes , quibus fuerant projecta , prohibere ; poterat & ipsorum hominum innumerabilibus modis terrere sevitiam , ne cadavera incendere , ne cineres dispergere auderent : sed hoc quoque experimentum multiplici varietati tentationum deesse non debuit , ne fortitudo Confessionis , qua immanitati Persecutionis pro corporis salute non cederet , pro sepulcri honore trepidaret ; postremò ne fides resurrectionis consumptionem corporis formidaret . Debuerunt ergo & ista permitti , ut etiam post hac tanti horroris exempla Martyres in Christi Confessione ferentes huius quoque testes fierent Veritatis , in qua didicerant , eos , à quibus sua corpora interficerentur ; postea nihil habere quod facerent ; quoniam quidquid mortuis corporibus facerent utique nihil facerent , quando in carne omni vitâ carente nec aliquid sentire posset qui inde migravit , nec aliquid inde perdere qui creavit .*

Sed inter hæc quæ fiebant de corporibus occisorum , cùm Martyres ea non metuentes magnâ fortitudine paterentur , tamen inter Fratres ingens luctus erat , quodd nulla dabatur potestas Sanctorum funeribus iusta persolvere , nec occulte subtrahere aliquid , sicut eadem testatur historia , (Eusebii L. 5. cap. 1.) crudelium Custodum vigiliæ permittabant . Ita cùm illos qui occisi fuerant , in dilaceratione membrorum suorum , in conflagratione ossium , in dispersione cinerum miseria nulla contingeret ; istos tamen , qui nihil eorum sepelire poterant , magna misericordia cruciabat ; quia in nullo modo sentientibus , ipsi quoquo modo sentiebant , & ubi jam illorum nulla erat passio , erat istorum misera compassio . Ita S. Doctor exprimit Martyrum Lugdunensium fortitudinem , Gentilium barbariem etiam in eorum mortua corpora sevientium , & Fidelium erga

illos pietatem . Horum Passionem seu veriùs triumphum paucis commemorat Martyrol. Rom. die 2. Aprilis, his verbis : *Lugduni Sanctorum Martyrum Photini Episcopi, Sancti Diaconi, Vetii, Epagathi, Maturi, Pontici, Bibliidis, Attali, Alexandri, & Blandina cum aliis multis, quorum fortia & iserata certamina tempore Marci Aurelii Antonini & Lucii Veri Ecclesia Lugdunensis Epistola ad Ecclesias Asia & Phrygia scripta reconset. In his Sancta Blandina sexa infirmior, corpore imbecillior, conditione deterior, diuturniora & acerbiora certamina subiens & fortis adhuc permanens, gladio jugulata ceteros secuta est, quos hortabatur ad palmam.*

§. VII.

Alii Martyres sub Marco Aurelio.

I. **N** Arrato Martyrum Lugdunensium glorioso certamine, addit Eusebius L. 5. cap. 2. : *Hæc supradicti Imperatoris temporibus Christi Ecclesiis contigerunt, ex quibus ea quæ in reliquis Provinciis gesta sunt conjecturâ assequi licet. Et meritò quidem : nam ubiquè Christianus sanguis fundebatur. Ut enim ex Melitone ipse refert L. 4. cap. 26. : Quod numquam antea factum fuerat, Persecutionem nunc patitur piorum hominum genus novis per Asiam decretis exagitatum. Impudentissimi namque delatores & alienarum opum cupidi, ex Imperialibus Editis occasionem nacti, palàm diu noctuque grassantur &c. Hoc tempore Sagarim Laodiceæ Episcopum sub Servilio Paulo Præfide Martyrio coronatum fuisse scribit L. 4. cap. 26. : quem Pauli Apostoli fuisse Discipulum refert Martyrol. Rom. 6. Octobris his verbis : *Laodiceæ Beati Sagaris Episcopi & Martyris, qui fuit unus de antiquis Pauli Apostoli Discipulis.* Incredible tamen videtur, quempiam ex Pauli Discipulis usque ad illa tempora fuisse superstitem.*

II. Circa eadem tempora contigit Martyrium S. Concordii Presbyteri, de quo Martyrol. Rom. die 1. Januarii hæc habet : *Apud Spoletum Sancti Concordii Presbyteri & Martyris temporibus Antonini Imperatoris ; qui primò sustibus cæsus, deinceps equiteo suspensus, ac postea in carcere maceratus, ibique Angelicâ visitatione consolatus, demum gladio vitam finivit.* De hoc apud Surium & Bollandum habentur Acta, quæ (cujuscumque sint fidei) strictim referam. Romæ, ajunt, Marci Aurelii Antonini temporibus erat quidam Presbyter genere illustis Gordianus five Concordianus nomine, cujusdam Ecclesiæ Rector. Huic filius

filius erat Concordius, quem in Sacrarum Litterarum doctrina ab eo instructum S. Pio tunc Romæ Episcopo præsentavit, a quo Subdiaconus ordinatus fuit. Totum Patris & fidei studium in jejuniis eleemosynis & precibus versabatur, ut Deus eis gratiam largiretur, quâ tunc violentæ Persecutionis furorem declinaret, non quidem non patiendo, sed à Fide non declinando. Vivebat tunc vir sanctus nomine Eutyches in prædio suo prope Trebulam (fortè Urbem in Umbria prope Reatem) cum quo amicitia vinculo vinctus erat Concordius. Is Patrem rogavit, ut Eutychem adire ac sibi aliquandiù conversari liceret. Pater timens, ne Concordius hoc peteret animo effugiendi Martyrium Romæ, ab initio renuit; sed instante illo & protestante, se paratum esse ad Martyrium ubicumque Deus voluisset subeundum, existimavit Pater illi esse annuendum.

Concordius Eutychem conveniens, & ab eo cum gaudio & gratiarum actione susceptus, unâ cum ipso jejuniis & orationibus vacabat, quibus frequenter concedebat Deus, ut infirmi ad eos accedentes sanarentur. Provinciæ illi præerat tunc Torquatus, qui Spoleti morabatur: qui cùm hæc audisset, ad se accersitum Concordium interrogavit, quis esset? Cui ille respondit, Christianus sum. At Præses, de tuo, inquit, Christo non loquor; nomen tuum peto. Repetiit Concordius, jam dixi Christianus sum, Jesum Christum confiteor. Nec quidquam aliud ab eo obtinere potuit. Tunc Præses post promissiones ac minas, flagris cæsum in carcerem coniecit.

Sequenti nocte Eutyches & Anthimus Spoleti Episcopus Concordium adierunt; cùmque Anthimus esset Torquato acceptus, obtinuit, ut aliquot diebus Concordius apud se maneret, quem debito tempore Presbyterum ordinavit, & non modico tempore apud se detinuit. Sed instante Torquato Concordium ei tradere coactus fuit, qui cùm variis artibus à Fide eum seducere incassum tentasset, equuleo suspendi iussit, ac detrudi in carcerem capite & manibus ferreis catenis constrictum, quocumque ad eum accedere prohibito, ut sic vel fame interiret. Impedire tamen non potuit, quin noctu ingrediens Angelus eum in constantia firmaret. Quare post triduum Torquatus missis duobus Militibus, iussit, ut Concordium vel Diis cogerent sacrificare, vel capite truncarent. Unde cùm præsentatam sibi Jovis Imaginem cum contemptu rejecisset, illicò caput ei amputatum fuit. Corpus ejus à duobus Clericis aliisque piis Personis prope Urbem sepultum fuit, ubi multis fertur miraculis coruscasse. Ita ex Actis præfatis nomen ejus ab Usuardo & Adone lecebratur.

III. Apud Spoletum quoque circa idem tempus passus fuit S. Pontianus, de quo Martyrol. Rom. 19. Januarii hæc habet: *Apud Spoletum Passio Sancti Pontiani Martyris tempore Antonini Imperatoris; quem Fabianus Judex pro Christo vehementissime virgis casum jussit super carbones nudis pedibus ambulare: à quibus nil laesus, equuleo & uncinis ferreis jussus est suspendi, & sic in carcerem trudi, ubi Angelicâ visitatione meruit confortari: post quæ Leonibus expositus & plumbo ferventi persusus, tandem gladio percussus est.* Sub eodem Martyrio coronati feruntur Romæ S. Alexander Episcopus, cujus Sedes ignoratur; propè Romam tamen fuisse creditur. Soræ in Campania seu Atini S. Julianus. Tergestæ in Istria S. Diaconus Lazarus nomine. In Sardinia S. Potitus. Hi aliiq. plurimi, quos prætereo, sub Marco Aurelio passi sunt.

IV. Ex dictis colliget Lector, Marcum Aurelium non fuisse, qualem eum describit Doduvellius, placidum & in Christianos mitem. Dato enim, quoddam speciales contra ipsos Leges non tulerit, Leges tamen contra eos antea latas non abstulit, imò eis exequendis obsecundavit. Undè Populares à Christianis averſi scientes, se etiam genio Principis famulari, ubiq. contra eos tumultus excitabant, quibus, faventibus Provinciarum Præsidibus, toto Orbe ut dictum est Christianus sanguis fundebatur. Testis sit Theophilus, qui eo imperante Ecclesiam Antiochenam gubernabat. Is enim L. 3. ad Autolicum in fine sic loquitur: *Eos qui verum Deum venerantur hætenus persequuti sunt, nec adhuc hodie persequi cessant; imò iis, qui aperte Deum convitiuntur, præmia & honores decernunt; eorum verò qui festinant ad virtutem capeſſendam & sanctam vitam agunt, quosdam lapidibus obruere, quosdam interfecere, nec adhuc hodie cessant Christianos crudelissime & immanissime cruciatibus subjicere.* Ita Marco imperante in Christianos agebatur: quare meritò dicit Eusebius in proœmio L. 5. hist. ait: *Quo tempore cum in nonnullis terrarum partibus violentior adversus nostros Persecutio commota esset ex incurſione Popularium, innumerabiles propè Martyres per universum Orbem euituisse . . . , conjicere est.* Cùmque ibi loquatur de iis, quæ post annum 17. Imperii M. Aurelii contigerunt, apparet, eo imperante usque ad finem crevisse potiùs Persecutionem quàm defecisse.

V. Verùm tot Christianorum necibus Christi Fides numquid è terrarum Orbe deleta est? imò ubiq. aucta & multiplicata. Impletum est quod Christus dixerat Joann. 12. v. 24. *Nisi granum frumenti cadens in terram mortuum fuerit ipsum solum manet: si autem mortuum fuerit, multum fructum affert.* Christus

Atus Jēsus granum frumenti est à Cœlo missum per Incarnationem in Mūdum, per Mortem in terra sepultum, per Resurrectionem germinans multumque afferens fructum. Ipsum erat *granum mortificandum & multiplicandum, mortificandum infidelitate Judæorum, multiplicandum fide Populorum*, inquit S. Augustinus Tract. 51. in Joann. Sic Christiani membra ejus debebant mortificari, in Persecutionibus mortem pati; sed ex ipsa morte in ingentem numerum germinare, omnes Urbes ac Provincias implere: ut enim agebat Tertullianus in Apolog. cap. 50. ad Gentes: *Plures effimur, quoties metimur à vobis, semen est sanguis Christianorum*. Atque istud semen adeò multiplicaverat fructus, ut idem Tertullianus ibidem cap. 37. dixerit: *Externi (aliàs hesterni) sumus, ut vestra omnia implevimus, Urbes, Insulas, Castella . . . , sola vobis relinquimus Tempia*. Quis ergo hinc nonumat argumentum pro Veritate Religionis Christianæ, quæ inter Persecutiones & suorum clades brevi tempore adeò multiplicata est, ut totum Orbem implens Gentilium Deos exterminarit? Certè Dei potentiæ non humanæ, imò contra humanam hæc victoria fuit. Sed ad ulteriora procedamus.

CAPUT VII.

Persecutio sub Severo.

§. I.

Commodi Imperium.

I. **S**ub Commodō, qui M. Aurelio in Imperio successit, *Res quidē nostræ* (inquit Eusebius L. 5. cap. 21.) *in tranquilliore statu versabantur, pace per Dei gratiam cunctas Orbis terrarum Ecclesias complexā. Atque interim salutaris Dei sermo ex omni genere hominum quamplurimos ad religiosum Summi Numinis cultum pertrahēbat: adeò ut multi ex iis, qui in urbe Roma genere atque opibus eminebant, simul cum universa domo & familia salutem consecuturi accurrerent*. Hæc tamen Ecclesiæ tranquillitas non ex clementia aut pietate Commodi (ut observat Baronius in Notis ad diē 18. Aprilis) hominis Reipublicæ perincommodi; quem & publico Populi clamore appellatum esse Nerone crudeliorem, & Domitiano impuriorem scribit Lampridius ex Mario Maximo, processit, sed ex proprio sui comodo; quia ut idem Lampridius scribit, vendiderat suppli-

cio.

ciorum diversitates, sepulturas &c. ; unde Christiani erogato tributo pacem ab eo redimebant. Quam rem Tertullianus factus jam hæreticus Montanista L. de Fuga in Persecut. cap. 13. improbat dicens: *Mussaliter tota Ecclesia tributum sibi irrogaverunt. Nescio an dolendum an erubescendum sit &c.* His ad pacem Christianorum accessit, quod scribit Dio in Commodio, nimirum Martiam, quæ præ cæteris Commodio in deliciis erat, fuisse Christianorum studiosissimam, multaque in illos contulisse beneficia. Propterea Legem tulerat Commodus, ne quis Christianos deferret poenâ in delatores statutâ; non vetuit tamen, ne contra accusatum, si se Christianum esse fateretur, & Diis sacrificare renueret, contra eum secundum Leges Imperiales procederetur.

II. Factum hoc comprobatum fuit in S. Apollonio Senatore Romano; cum enim à servo accusatus esset, quod Christum sequeretur, servus quidem delator crurifragio interemtus fuit, ipse tamen delatâ in Senatum causâ, dum Christianam Religionem etiam scripto defendendam suscipit, ex Senatus-consulto sententiam mortis subiit: de quo in Martyrol. 18. Aprilis legitur: *Roma Beati Apollonii Senatoris, qui sub Commodio Principe & Perennio Prasæcto à Servo proditus quoddam Christianus esset, iussus ut rationem Fidei suæ redderet, insigne volumen composuit, quod in Senatu legit; & nihilominus sententiâ Senatus pro Christo capite truncatus est.*

Eusebius etiam L. 5. cap. 21. postquam dixit, quod Diabolus paci Ecclesiæ invidens, ut eam turbaret, multas machinas commentus est, subjicit: *Denique Romæ Apollonium quemdam è numero Fidelium, qui in humanioribus litteris & in Philosophia eximius habebatur, in iudicium adduxit, suscitato ei accusatore homine quodam perditissimo, qui ad huiusmodi flagitia idoneus inprimis minister Dæmonis videbatur. Sed miser intempestivè susceptâ accusatione, cum ex Imperatoris Edicto capitalis pena in eos qui talia detulissent, esset constituta, confestim fractis cruribus occiditur: Perenne ejusmodi adversus ipsum sententiam pronuntiante. Martyr verò Deo acceptissimas, cum Judex multis eum precibus obsecrasset, petiissetque ab illo, ut coram Senatu rationem Fidei suæ redderet, elegantissimâ Oratione pro defensione Fidei suæ coram omnibus pronuntiata, capitali supplicio à Senatu damnatus est. Quippè veteri apud eos Lege sancitum erat, ut Christiani, qui semel in jus vocati fuerant, nisi à proposito suo discederent, nequaquam dimitterentur.* Ita Eusebius, qui addit Apollonii Orationem coram Senatu & responsa se in Libro de Passionibus Martyrum (qui tamen ex-

III. Hæc

III. Hæc igitur erat pax, quam Ecclesiæ sub Commodo tributo redemerant, Pax erat, quia Christiani deferri & accusari sub poenis prohibebantur; non erat autem pax, quia accusati, si Christo non renuntiabant, capitali sententiâ damnabantur. In hoc statu ab anno 180. usque ad annum 192. perseveravit Ecclesia, quo anno Commodo interfecto, post ejus necem Pertinaci delatum fuit Imperium 1. Januarii 193. Sed hoc etiam die 28. Martii ejusdem anni occiso, Imperium à Militibus Prætorianis Didius Julianus accepit. Hic tamen solis duobus mensibus & diebus quinque imperavit. Nam cum eodem tempore tres Exercituum Duces, Severus in Pannonia, Pescennius Niger in Oriente, Albinus in Gallis Imperium arripissent, Ecclesia interim pace fruebatur: Pescennio tamen & Albino victis & occisis, in solo Severo Imperii summa remansit.

§. II.

Imperii Severi Initia.

I. **A** Banno 193., quo Imperium in Pannonia Severus arripuit usque ad annum 197. vel 198., quo solus imperare cœpit, nihil contra Christianos molitus fuit, fortè bellis civilibus distractus: Ecclesias enim tunc libertate aliquâ fuisse donatas, indicant Concilia tam in Oriente, quàm in Occidente super die celebrandi Paschatis coacta anno 195. vel 196. Adde initio Imperii favorabilem fuisse Christianis, testem esse Tertullianum L. ad Scapulam c. 4. dicentem: *Ipse etiam Severus pater Antonini Christianorum memor fuit. Nam & Proculum Christianum, qui Torpacion cognominabatur, Eubodeæ Procuratorem, qui eam per oleum aliquando curaverat, requisivit, & in palatio suo habuit usque ad mortem ejus, quem Antoninus (Caracalla filius) optimè noverat lacte Christiano educatus.* Fertur enim, Severum huic Proculo Caracallam filium educandum commisisse, qui eum Nutrici Christianæ ablactandum tradidit. Pergit insuper Tertullianus: *Sed & clarissimas Feminas & clarissimos Viros Severus scieus hujus Sectæ (Christianorum) esse, non modò non lesit, veràm & testimonio exornavit, & Populo farenti in os palàm restitit.*

II. Severum etiam ad Christianos propensum reddiderat eorum à bellicis factionibus temperantia. Sciebat enim, eos in Pescennii & Albini motibus sese non miscuisse; non quia ex eis aliqui in eis Regionibus, in quibus æquo jure dominabantur, existentes eis non paruerint, sed quia bellicis tumultibus non se im-

immiscentes, nec pro uno nec pro altero arma sumserant. Quare Tertullianus ad Scapulam cap. 2. : Sic, inquit, & circa Majestatem Imperatoris infamamur; tamen nunquam Albiniani nec Nigriani nec Cassiani inveniri potuerunt Christiani... Christianus nullius est hostis, nedum Imperatoris, quem sciens à Deo suo constitui, necesse est, ut & ipsum diligat & revereatur & bonoret & saluum velit cum toto Romano Imperio, quousque seculum stabit; tam diu enim stabit. Colimus ergo Imperatorem sic, quomodo & nobis licet, & ipsi expedit, ut hominem à Deo secundum, & quidquid est à Deo consecutum, & solo Deo minorem... Itaque sacrificamus pro salute Imperatoris, sed Deo nostro & ipsius &c.. Is erat animus Christianorum erga Imperatores; qui cum experienciâ probè notus esset Severo, eum à Christianis persequendis aliquandiu detinuit.

III. Christiani interea hâc libertate gaudentes in dies augebantur, Urbes replebant, & ad ministeria tum privata tum publica, ut cæteri, admittebantur, solis Templis ac theatris abstinabant; adeò ut Tertullianus in Apologetico, quod illo tempore nempe anno 197. scripsisse fertur, cap. 37. dicat: *Vestra omnia implevimus, Urbes, Insulas, Castella, Municipia, Conciliabula, Castra ipsa, Tribus, Decurias, Palatium, Senatum, Forum. Sola vobis relinquimus Tempia*: Et cap. 42. contra quendam, qui Christianos ut infructuosos aspernabatur: *Navigamus, inquit, & nos vobiscum & militamus & rusticamur & mercamur; proinde miscemus artes, opera nostra publicamus usui vestro. Quomodo infructuosi videamur negotiis vestris, cum quibus & de quibus vivimus, non sciri. Sed si caeremonias tuas non frequenter, attamen & illa die homo sum*. Hæc & alia Tertullianus: qui cap. 37. tantum dicit fuisse tunc numerum Christianorum in toto Imperio Romano, ut si discederent, Imperium redigeretur in solitudinem.

IV. Causæ autem, cur ex omni ordine statu & conditione Gentes venirent ad Christum, erant: primò: Puritas vitæ ac morum & Caritas erga omnes, quam in Christianis videbant, qui non violentiâ aut vi ad suam Religionem compellebant, sed verbo & suavitate eam volentibus insinuabant. Multos etiam movebat constantia, quâ videbant Christianos atrociora tormenta & mortem ipsam pro Christo contemnere: ex hoc enim arguebant, gratiâ Dei in eis operante, magnum quid sperare Christianos, propter quod mortem voluntariè subibant, quam solo verbo vitare poterant. *Quisque enim, inquit Tertullianus ad Scapulam cap. 5., tantam tolerantiam spectans, ut aliquo scrupulo percussus & inquirere accenditur, quid sit in causa, & ubi cognoverit,*

verit, Veritatem & ipse statim sequitur: & maximè dum videbant Christianos tantò magis augeri, quantò magis eos destruerenonabant; unde Tertullianus laudato loco ait: *Nec tamen deficiet hæc Secta, quam tunc magis adificari scias, cum cadi videtur.*

V. Movebantur secundò alii ex miraculis, quæ in ipsis & per ipsos fieri videbant. In ipsis; quia plerumque videbant eos è flammis exire illæsos, bestiis expositos ferocioribus eas ad pedes mansuetas habere. Per ipsos etiam; nam videbant eos cuscumque infirmitatis ægros solâ manus impositione sanare, Dæmonia ab Obiessis solo verbo ejicere, nec ob id quidquam auri vel argenti requirere. Et rursus quia Dæmones ipsi dum expellebantur, virtutem ac Divinitatem Christi vel inviti fatebantur, facti veritatis testes ipsi veritatis hostes. Hoc argumentum Gentiles urget Tertullianus in Apolog. cap. 23., ejuscâ efficiaciâ fretus rogat Magistratus Ethnicos, ut ipsos à Dæmonibus obsessos coram se adducant; et si à Christiano Spiritus ille interrogatus fateatur, se Dæmonem esse, non Deum, ipsi credant. *Edatur hîc aliquis sub Tribunalibus vestris, quem à Dæmone agi constet. Jussus à quolibet Christiano loqui Spiritus ille, tam se Dæmonem confitebitur de vero, quàm alibi Deum de falso.* Produci insuper rogat ipsosmet Deos: *Et nisi se Dæmones confessi fuerint Christiano mentiri non audentes,* ait, *ibidem illius Christiani procacissimi sanguinem fundite. Quid isto opere manifestius? Quid hæc probatione fidelius?* Post multa tandem concludit: *Credite illis (Dæmonibus ac Diis) cùm verum de se loquuntur, qui mentientibus creditis. Nemo ad suum dedecus mentitur, quin potius ad honorem. Magis fides prona est in adversus semetipsos confientes, quàm pro semetipsis negantes. Hæc denique testimonia Deorum vestrorum Christianos facere consueverunt &c.* Perpendat hunc discursum Lector, jugulum enim petit Gentilibus.

VI. Alii tertio ad Religionem Christianam amplectendam monebantur visionibus in somnis eis apparentibus, eosque ad Fidem vocantibus. Hoc modo circa hæc tempora conversum fuisse Basilidem, scribit Eusebius L. 6. cap. 5. Cùm enim iste fuisset unus ex Apparitoribus, qui S. Potamianam ad Martyrium duxit, eamque à contumeliis quibus à Vulgo impetebatur eripere studuisset, illa pollicita est se post obitum salutem ei impetraturam; unde tertio post Martyrium die Potamianam noctu sibi assistentem coronam sibi capiti suo imponentem vidit, ac sibi dicentem, *se ipsos causâ Dominum orasse, atque id quod petierat impetrasse; nec diu postea ad Superos migraturum. Post hæc signacu-*

lo Domini à Fratribus accepto, postmodum Christum gloriosè confessus, capite truncatus est. Plures quoque alii ex Alexandrinis Civibus eodem tempore ad Fidem Christi subito transisse memorantur, quos scilicet Potamiana in somnis apprensus ad id faciendum provocaverat Ita Eusebius. Multosque etiam suâ ætate secretis hujusmodi vocationibus tractos fuisse ad Fidem testatur Origenes L. 1. contra Celsum num. 46. , ubi, ut ostendat aliqua Spiritus Sancti qui apparuit, adhuc superesse vestigia, quamvis Celsus hoc sit irrisurus, ait: *Dicam nihilominus, multos ad Religionem Christianam accessisse velut invitos, spiritu quodam repente sive per visum sive per somnium in illorum animos agente atque ita illos immutante, ut quod in illam conceperant odium deponerent, & pro illa mortem optetere statuerent. Multa ejusmodi novimus, quæ si scriberemus, tamen illorum oculati testes fuerimus, benignam risus materiam præberemus incredulis.* Ita prioribus illis seculis disponebat Deus, ut multi absque prædicatione, sive patientiâ & constantiâ quam in Martyribus videbant, etiam ipsi apparitores & carnifices, vel alio repentino casu intrinsecus tacti ac repente mutati, Fidem susciperent & pro ea mori parati essent.

§. III.

Persecutio sub Severo.

I. **Q**uamvis Persecutio Generalis sub Severo referatur ad ejus Imperii annum decimum, & Christi 202. ; nihilominus non adeo generalem fuisse antea Christianorum pacem, quin alicubi hostes adessent, qui eos persequerentur, inter cætera demonstrant Martyres Scyllitani, qui anno 200. Carthagine in Africa sub Saturnino Proconsule passi fuerunt, de quibus Martyrol. Rom. die 17. Julii hæc narrat: *Carthagine natalis Sanctorum Martyrum Scyllitanorum, Sperati, Natali, Cythini, Beturii, Felicis, Aquili, Letarii, Januariæ, Generosa, Bessia, Donata, & Secunda, qui jussu Saturnini Prasæti post primam Christi confessionem in carcerem missi, & in ligno confixi, deinde gladio decollati sunt.* De his Bedæ, Usuardus, Ado & alii: unde Baronius in Notis ad 17. Julii: *Habemus, inquit, horum Sanctorum Martyrum Acta, prout excepta fuerunt à Notariis, & relata in Acta Proconsularia absque ullo aliquo furo vel additamento inde descripta.* Eisdem fuisse numero duodecim, octo viros & quatuor feminas, Acta præfata produnt. Martyres Scyllitani dicuntur, quia in Scyllitana Urbe, quæ ad Provinciam Proconsula-

rem

rem pertinebat, passi sunt, ut in Geograph. sacra pag. 64. . Primos fuisse Martyres, quos Africa Christo dedit, existimatur : & Tertullianus L. ad Scapulam cap. 3. , ubi referens aliquos Præsides , quos in fine pœnituit se persecutos fuisse Christianos , ait : *Vigellius Saturnius , qui primus hic gladium in nos egit , lumina amisit .*

II. Progressus , quibus Religio Christiana ubiquè in dies extendebatur , eorum corda , qui adhuc in duritie permanebant , tanto furore accenderant , ut hæc vera causa fuerit , quæ Persecutioni initium dedit , quamvis eam variis calumniis obtegerent . Dicebant enim , Christianos , quòd per genium Imperatoris (idest per Idola & Dæmones) jurare nollent , Imperio rebelles esse ; & hoc augebatur , quia obscœna & sacrilega Festa in honorem Imperatoris celebrare aut eis interesse volebant , sicut facies accendere & lauris domorum suarum portas ornare . Quæ omnia detestatur Tertullianus in Apolog. cap. 35. dicens : *Propterea igitur publici hostes Christiani , quia Imperatoribus neque vanos neque mentientes neque temerarios honores dicant , quia vera Religionis homines , etiam solemnia eorum conscientia potius quàm lasciviâ celebrant . Grande videlicet officium focos & iboros in publicum educere , vicatim epulari , Civitatem Tabernæ habitu abolefacere , vino lutum cogere , catervatim cursitare ad injurias ad impudicitias ad libidinis illecebras . Siccine exprimitur publicum gaudium & publicum dedecus ? Hæcine solennes dies Principum decent , quæ alios dies non decent ? Qui observant disciplinam de Cæsaris respectu , ii eam propter Cæsarem deserunt , & malorum morum licentia pietas est ; occasio luxuriæ Religio deputatur ? O nos merito damnandos ! Cur enim vota & gaudia Cæsarium casti & sobrii & probi expungimus ? Cur die lato non laureis postes obumbramus , nec lucernis diem infringimus ? Honestæ res est solemnitate publicè exigente induere domni tuæ habitum alicujus novi lupanaris .* His Tertullianus defendit Christianos , quòd ejusmodi Festa celebrare nollent ; qui tamen conscientia puritate eadem , pro salute Imperatoris Deum verum precantes , celebrabant .

III. Nihilominus discrimen hoc in celebrandis Cæsarium Festis , maximam Persecutionis in Christianos viam aperuit , & maxime anno 197. in solemnî ingressu Severi Romam post devictum Albinum . Cum enim nec tunc Christiani eorum Festis ob talem ingressum communicare voluissent , credibile est , ab eo tempore usque ad ann 203. , quo Romam reversus Severus Edictum contra Christianos promulgavit , ejus animum Ethnicos ad Christianorum cædes accendere tentasse . Eis tamen non statim

tim acquievit Severus; imò adhuc benignus & clemens licet audisset, plures Viros ac Feminas nobilis etiam generis & gradus Religionem Christianam fuisse amplexos, nihil tamen contra eos molitus est, quin potius testimonium honorificum eis exhibuit: ideoque ad hæc tempora referendum, quod ait Tertullianus ad Scapulam cap.4.: *Sed & clarissimas Feminas & clarissimos Viros Severus sciens hujus Sectæ esse, non modò non læsit, verùm & testimonio exornavit, & Populo furenti in os palam resistit.*

IV. Verùm cum eodem anno 197. Severus Româ in Orientem iter suscepisset, Persecutio in Christianos fervere cœpit. Etsi enim nulla lex contra ipsos à Severo prodiiisset, aderant ex sæpè dictis antiquæ Leges Imperiales, quibus severè quæcumque Religio, conventio, cœtus à Senatu non approbatus prohibebatur; perseverabat etiam Trajani Lex (de qua supra) quæ Christianos ad Judices delatos puniri jubebat: quæ satis erant, ut Pagani in Christianos suum odium exercerent. Inter omnes tamen odio in Christianos ardebat Populus; putans enim eos cujuslibet publici infortunii causam esse, modò instabant, ut Leonibus exponerentur; modò non expectarâ Magistratum auctoritate, diebus præsertim solemnibus, eos igne ac lapidibus insequerentur, & eorum etiam corpora è sepulchræ asylo extrahentes diffecabant & in partes distrahebant. Quod barbarum facinus exaggerat Tertullianus in Apolog. cap.37.; qui tamen addit, Evangelicâ patientiâ & mansuetudine hæc omnia à Christianis tolerata fuisse, quamvis ea ulcisci potuissent: *Sed absit, ut aut igni humano vindicetur Divina Secta, aut doleat pati, in quo probatur.*

V. Nec majori justitiæ ordine Magistratus ipsi procedebant: solum hominem interrogabant, an esset Christianus, acsi hoc crimen esset. Confessio, non permittebatur ostendere, quod nullum crimen sit esse Christianum: sed loco puniendi eum qui spontè id quod crimen reputabant fuerat confessus, conabantur (quod de nullo alio crimine fit) ut suam confessionem retraheret, & quod antea confessus voluntariè fuerat, negaret. Hoc eis improperat Tertullianus in Apolog. cap.2.: *Si certum est nos nocentissimos esse, cur à vobis ipsis aliter tractamur, quàm pares nostri idest ceteri nocentes? cum ejusdem noxæ eadem tractatio deberet intervenire? Quodcumque dicimur cum alii dicuntur, & proprio ore mercenariâ advocazione utuntur ad innocentia suâ commendationem. Respondendi, altercandi facultas patet, quando nec liceat indefensos & inauditos omninò damuare. Sed Christianis solis*
nihil

nihil permittitur loqui quod causam purget, quod veritatem defendat, quod Judicem non faciat injustum. Sed illud solum expectatur, quod odio publico necessarium est, confessio nominis, non examinatio criminis. Nihil tamen hisce injustitiis territi Christiani in Confessione Christi fortiores evadebant, & gratias Deo & ipsi Judicibus agebant.

VI. Videns Diabolus, hâc Persecutione Ecclesiam ardere quidem sed non consumi, imò è cineribus Martyrum reslorescere, aliam viam subdolè excogitavit, quâ Christianos præsertim debiles ac infirmos à Martyrio subeundo diverteret. Ad hoc Ministros adhibuit Gnosticos, Valentinianos, Cainitas aliosque illius temporis Hæreticos, qui dicerent, stultitiam esse putare quòd Deus velit hominem mortem pro se pati, Deus enim vult nos salvare, non perdere: satis est quòd Christus mortuus sit pro nobis, qui suum Sanguinem fudit, ut nos à fundendo nostrum eximeret: *Semel, aiebant, Christus pro nobis obiit, semel occisus est ut occideremur. Si vicem repetit: num & ille salutem de mea nece expectat? An Deus hominum sanguinem flagitat, maxime si tauro-rum & hircorum recusat?* Ita refert Tertullianus cap. 1. *Scorpiaci*, Libri ab eo contra præfatos Hæreticos compositi, cui titulum Scorpiaci præfixit, sive quia adversus *Scorpiantum* hâc hæresi infectum scribebat, sive quia hæretis hæc Scorpii in morem arcuato vulnere in Ecclesiæ corpus venena diffunderet. In eo igitur ostendit, bonum nobis esse Martyrium, quia pro vita temporali dat æternam. Esse præceptum vitam hanc potius dare, quàm Deum negando indignè agere, demonstrat Scripturis tum veteris tum novæ Legis & exemplis: quæ omitto, præsentis enim materiæ non sunt.

VII. Hactenus de Persecutione sub Severo quidem non tamen ab ipso, sed à Popularibus Magistratibus ac Provinciarum Præsidibus juxta antiquas Imperiales Leges excitata, actum est. Modò de Persecutione ab ipso suis Edictis promota sermo erit. Quæ autem causæ Severi spiritum antea erga Christianos mitem in ferum & crudelem converterint, ignoramus. Hoc scimus, Severum anno decimo sui Imperii, & Christi 202. movisse violentam Edicto suo in Christianos Persecutionem, ex Eusebio L. 6. cap. 1. & 2., Sulpicio Severo L. 2. cap. 46. & Orosio L. 7. c. 17. Hanc Eusebius & Orosius aliique cum S. Augustino L. 18. de Civit. Dei cap. 32. quintam vocant, Sulpitius verò sextam. Dum enim Severus in Palæstina moraretur Legem edidit, quâ sub gravissimis poenis vetitum erat, ne quis Judæus fieret aut Christianus: *Christianum fieri sub gravi pœna vetuit.* Ita Spartia-

nus. Licet ex terminis hujus Legis viderentur comprehendī foli illi, qui imposterum nomen Christo forent daturi, & forte illi, qui ad hoc inducerent, non verò illi, qui antea nomen Christo dedissent; Attamen factum evincit eā Lege omnes fuisse Christianos comprehensos: sive quia amplioribus terminis fuerit concepta, quàm referat Spartianus: sive quia successu temporis ampliora & crudeliora Edicta Severus tulerit.

VIII. Ut ut fuerit, Persecutionem fuisse atrocissimam, & in ea innumerabiles Martyrio coronatos, fatetur Eusebius L.6. cap.1. his verbis: *Porro cum Severus Persecutionem adversus Ecclesias excitasset, per omnes quidem ubique locorum Ecclesias ab Athleticis pro pietate certantibus illustra sunt confecta Martyria. Præcipue tamen Alexandria increbuerunt, cum ex universa Ægypto ac Thebaide leuissimi pugiles eò tanquam in amplissimum Dei stadium deducerentur, & cujusque modi tormenta mortesque invictò animo perpassi à Deo coronas acciperent. Inter quos Leonides, qui Origenis Pater fuisse dicitur, capite truncatus &c.. Et cap.2.: Severo, inquit, annum Imperii decimum agente Alexandria & totius Ægypti Præfecturam obtinente Lato.... cum Persecutionis ardentissimum flagraret incendium, atque innumerabiles Martyrio coronarentur, Origenis animum adhuc admodum pueri tanta cupido occupavit Martyrii, ut se periculis ipsis objiceret.* Et Orosius L.7. cap.11. ait, quòd Severus quintà post Neronem Persecutione Christianos excruciauit: plurimique Sanctorum per diversas Provincias Martyrio coronati sunt: adeoque furor Persecutionis auctus fuit, ut referente Eusebio L.6. cap.7., & S. Hieronymo L. de Script. Eccles. cap.52. Judas quidam Severi temporibus de 70. Danielis hebdomadibus scribens, cum ad annum decimum Severi supputationem perduxisset, Antichristi adventum imminere existimavit: Adeò commota tunc adversus nostros Persecutio multorum animos vehementer conturbaverat.

IX. Quapropter nescio, quomodò Doduvellius contendere possit, Severi Persecutionem paucos fecisse Martyres juxta Eusebium. Nam licet Eusebius paucos ibi nomine describat, quia ejus intentum singulorum referre nomina, non erat; sed eorum tantum, quos narratio de Origene, quam ibi instituit, postulabat; Attamen dum generaliter ait per omnes ubique Ecclesias innumerabiles Martyrio fuisse coronatos, & tantam fuisse Persecutionem, ut Antichristi adventum imminere aliqui existimarent, nescio quid ulterius desiderandum sit, ut concipiatur, multitudinem Martyrum & quidem maximam in Severi Persecutione extitisse. Quòd si Doduvellus alios testes requirit, audiat

diat Tertullianum, qui de hujus Persecutionis, cui coævus erat, acerbitate plura scripsit Opuscula: audiat, inquam in Apolog. cap. 12. dicentem: *Crucibus & stipitibus imponitis Christianos ungulis deraditis latera Christianorum cervices ponimus ad bestias impellimur ignibus urimur in Insulas relegamur*. Et cap. 37. Vulgus ipsum Christianos invasisse, nec eorum sepulcris pepercisse: sic enim ait ad Judices: *Quoties etiam prateritis vobis suo jure nos inimicum Vulgus invadit lapidibus & incendiis? Ipsis Bacchanalium furiis nec mortuis parens Christianis; quin illos de requie sepultura, de asylo quodam mortis jam alios nec totos avellant, dissecant, distrabant*, Quâ ergo fronte Doduvellus dicit, Vulgus ad cædes Christianorum nunquam processisse? quid crudelius, quàm in Mortuos deservire? Quare cap. 50. & ultimo concludit: *Sed hoc agite boni Praesides, meliores multò apud Populum, si illis Christianos immolaveritis. Cruciate torquete, damnaute, atterite nos; probatio est enim innocentiae nostrae iniquitas vestra*. Ita de Persecutione Severi, quæ suo tempore agebatur, loquitur Tertullianus. Cur autem Severus prius erga Christianos mitis in eos adeò exarserit, ratio ex Historicis petitur: quia nimirum naturâ crudelis erat, & in eo quòd semel animo conceperat prosequendo, immobili ferocitate perseverabat: unde ait de eo Spartianus, *infinita multorum cade crudelior habitus est. . . . solum vitium crudelitatis excusans. De quo Senatus ita judicavit, illum aut nasci non debuisse, aut non mori, quòd & nimis crudelis, & nimis utilis Reipublica videretur*.

X. Hæc de Persecutionis sævitia. Nunc de ejus diuturnitate agendum. Doduvellus eam ad biennium restringit, dicens, occasione ludorum secularium, qui anno 12. Severi celebrati sunt, Persecutionem fuisse sedatam, *ne tanta solemnitas cruore macularetur*. Sed hic immemor sui apparet Doduvellus, qui alias sæpè dicit occasiones Persecutionum fuisse ludos. Cum enim, ut supra dixi ex Tertulliano in Apolog. cap. 35., Christiani in publicis Imperatorum Festis nec faces accenderent, nec laureis postes adumbrarent, nec alia facerent quæ Pagani, sed tristes & modesti apparerent, quasi publicæ prosperitatis & Cæsarium fortunæ adversarii & hostes à Populo accusabantur. Fateor quidem, Persecutionem aliquando minùs sævisse pro Præsidium genio, vel Ministrorum indulgentiâ, à quibus etiam erogato pretio Ecclesiæ libertatem suam redimebant, alii fugâ elabi conabantur: hæc tamen induciæ erant, non pax. Nam post hæc inopinatò deprehensi, quòd Christiani essent, vel Fidem negare vel mortem subire cogebantur.

XI. Utroque modo & fugâ & argento Persecutionem evadere curavit S. Rutilius. Sed inopinatè detentus ac Judici cui-dam præsentatus, post atrociora tormenta fortiter tolerata, flammis consumtus interiit; benedicens Deum, quòd honore Martyrii ipsum decoravit, quod indignum se reputans effugere tentaverat. Humilitati enim ejus suæ infirmitatis conscii fugam Catholici tribuebant; in cujus præmium fortitudinem ad ferendum Martyrium à Deo accepit. Hoc exemplum necessarium erat eo tempore, quo Tertullianus & ceteri Montanistæ in oppositum errorem lapsi, Philosophiæ Stoicæ fastu, contententes, vetitum esse in Persecutione fugam arripere, plures infirmos periculo abnegandi Fidem exponebant. Cùmque eis objicebatur Christi permissum Matth. 10. v. 23. dicentis: *Cùm autem persequerentur vos in Civitate ista, fugite in aliam*, respondebant, hoc dictum esse solis Apostolis, & in persona eorum, ut videre est apud Tertullianum unum ex illis L. de Fuga in Persec. cap. 5. & 6., ubi licet damnet Rutilii factum, eum tamen Sanctum Martyrem appellat his verbis: *Rutilius Sanctissimus Martyr cùm toties fugisset Persecutionem de loco in locum, etiam periculum (ut putabat) nummis redemisset, post totam securitatem, quam sibi prospexerat, ex inopinato apprehensus & Præsidii oblatu tormentis dissipatus, credo pro fugæ castigatione, dehinc ignibus datus, passionem, quam vitarat, misericordiæ Dei retulit*. Ita Tertullianus factus Montanista subdens: *Quid aliud voluit Dominus nobis demonstrare hoc documento, quàm fugiendum non esse, quia nihil fuga profit, si Deus nolit?*

XII. Ecclesia tamen Catholica semper sensit, & adhuc sentit, licere fugere in Persecutione; nisi ex fuga, puta Pastoris, periclitarentur oves, & gloria Christi detrimentum pateretur. Primum docuere: Cyprianus tum Epist. 56., tum Libi. de lapsis, ubi post varia Scripturæ loca allegata ait: *Et ideo Dominus in Persecutione secedere & fugere mandavit, atque, ut id fieret, & docuit & fecit. Nam cùm corona de Dei dignatione descendat, nec possit accipi nisi fuerit hora sumendi, quisquis in Christo manens interim cedit, non Fidem denegat sed tempus expectat*: Athanasius, qui Apologiam edidit pro fuga sua: S. Augustinus Tract. 46. in Joann. 3 ubi advertens Christum Jo. 10. v. 13. dicere, *Mercenarius fugit, quia Mercenarius*, & videns Petrum & Paulum in Persecutione fugisse, qui tamen Pastores non Mercenarii erant, dicit: *Si ergo Pastores non Mercenarii erant, quare fugiebant, quando Persecutionem patiebantur? Expone nobis, o Domine. Vidi in Epistola fugientem Paulum; per murum in sporta submissus est,*

est, ut manus Persequentis evaderet. Non ergo illi fuit cura de ovibus, quas lupo veniente deferebat? Fuit planè; sed eas Pastori in Cælo sedenti orationibus commendabat: se autem utilitati eorum fugiendo servabat, sicut quodam loco (Philipp. I. v. 24.) ait, Manere in carne necessarium propter vos. Ab ipso namque Pastore omnes audierant: si vos persecuti fuerint in una Civitate, fugite in aliam. Alterum verò nempe Pastori non esse fugiendum, quando ex ejus fuga nascitur detrimentum ovium & gloria Dei, multis idem S. Augustinus ostendit Epist. 228. aliàs 180. ad Honoratum; fugiendum esse, quando vel non sunt oves, vel alii remanent, qui earum curam gerant, sicut fugit Paulus, fugit & Athanasius; non fugiendum autem quando periculum est, ne desertas oves lupo rapiat & disperdat: Cur enim, inquit, sibi putant, indifferenter obtemperandum esse præcepto, ubi legant de Civitate in Civitatem esse fugiendum; & Mercenarium non exhorrent, qui videt lupo venientem & fugit, quoniam non est ei cura de ovibus?

XIII. Cùm ergo fuga Rutilii secum non traxerit periculum ovium, quarum cura commissâ ei non legitur, licitè uti potuit Christi præcepto de una Civitate fugiendo in aliam, expectando tempus à Deo statutum pro corona; quod ubi advenit, illud generoso Martyrio acceptavit, non in fugæ poenam, ut vult Tertullianus, sed in coronam. Quare Ecclesia Catholica eam in Martyrol. die 2. Augusti celebrat dicens: *In Africa S. Rutilii Martyris, qui cùm sæpius de loco in locum Persecutionem fugisset, & periculum interdum etiam pecuniâ redemisset, ex inopinato aliquando deprehensus & Præsidi oblatus, tormentis plurimis cruciatur: demum ignibus traditus egregio Martyrio coronatur.* Ex his apparet, Rutilium in Africa passum eo tempore, quo Tertullianus ad Montanistas defecerat: quod cùm circa medium annum Christi 207. contigisse putet Tilmontius, idèò post passum fuisse Rutilium statim dicam: & sic ultra annum 204. Persecutio continuavit.

XIV. Imò quantum ex historiis conjicere licet, Severus in persequendis Christianis usque ad mortem perstitit, quæ 4. Februarii anni 211. evenit. Cùmque vix credi possit, Severi morte statim Persecutionem extinctam fuisse, sed potius probabile videatur, Caracallam & Getam filios, & in Imperio Successores, in honorem Patris Edicta ejus contra Christianos aliquantò temporis post exequi sustinuisse; si verum est, Tertullianum post mortem Severi scripisse Librum ad Scapulam, ut cap. 4. indicare videtur, dici debebit, Persecutionem in aliquibus saltem

Provinciis & maxime in Africa, ipso Scapulâ ibi Proconsule, continuasse. Generalem tamen Persecutionem Severi morte cessasse colligitur ex Sulpitio Severo L.2. hist. cap.48., qui triginta & octo annos pacis numerat inter Severianam & Decianam Persecutionem. Cum autem Decius ante annum 249. non imperaverit, necesse est, ut Severi Persecutio anno 211., qui fuit extremus Severi, saltem ut Edictis Imperialibus promota, finem habuerit.

§. IV.

S. Perpetua Felicitas &c. Martyres sub Severo.

I. **E**X dictis à Tertulliano & Eusebio colligere quis potuit §. præcedente, innumerabiles sub Severo factos fuisse Martyres: quibus addi potest Clemens Alexandr., qui, eodem Eusebio testante L.6. cap.6., imperante Severo scribebat. Is enim L.2. Stromatum pag.414. sic loquitur: *Nobis autem sunt quotidie redundantes Martyrum fontes, qui nostris spectantur oculis, qui torrentur torquentur & capite damnantur.* Quia tamen Doduvellus de more paucos fuisse dicit, quia Eusebius paucorum nomina refert; quamvis insulsum sit hoc argumentum; nihilominus pro gloria Christi & Ecclesiæ aliquos celebriores referam.

II. Præ cæteris Africam illustravit Martyrium SS. Perpetuæ, Felicitatis & sociorum, Revocati, Saturnini, & Secundoli. Perpetua adhuc juvenis (alio nomine dicta *Ubia* seu *Vibia*) adhuc catechumena nupta erat, nec ignobilis quin clari generis, filium pepererat, quem lachrabat: tota ejus domus Christo initiata erat, solus pater obstinatè in Gentilitate vivebat. Vir illius, licet aliqui Gentilem fuisse velint ac unâ cum Patre uxorem ad renuntiandum Christo sollicitantem, probabilius tamen creditur fuisse Christianus, & vel absens ut declinaret Persecutionem, vel jam defunctus. Duos Fratres adhuc viventes habuisse traditur, & insuper tertium nomine Dinocratem, qui septennis defunctus fuerat, de quo infra.

III. S. Felicitas inferioris conditionis erat, parentibus orbata, nupta, & à septem vel octo mensibus uterum gestans, adhuc juvenis: Revocati sororem aliqui faciunt. Utramque inter cæteros summis laudibus sæpè celebrat S. Augustinus, & præcipuè L. de tempore barbarico cap.5. sic: *Habetis Virorum fortium magna exempla. Vicerunt Martyres Mundum; inter quos Martyres etiam femina reperta sunt fortiores. Ante paucos dies nata-*

natalitia celebravimus Martyrum Perpetuæ & Felicitatis & Comitum. Et cum tot ibi sint Viri, quare illæ duæ præ omnibus nominantur, nisi quia infirmior sexus aut æquavit aut superavit Virorum fortitudinem? Una earum erat prægnans, alia lactans: Felicitas parturiebat, Perpetua lactabat. Sed tamdiu hæc Perpetua lactavit, quamdiu acciperet ab illo Pastore simul & Patre buccellam lactis: quæ accepta dulcedo felicitatis perpetuæ eam fecit contemnere filium, spernere Patrem, non hæreere Mundo, perdere animam pro Christo. Felicitas verò, quæ sociam habebat Perpetuam, parturiebat & dolebat, objecta bestiis gaudebat potius quàm timebat: quæ virtus in Feminis? Qualis est gratia, quæ cum se infundit, nullum indignum judicat sexum? Gratiæ Gratiæ; reparavit enim sexum muliebrem. In opprobrium magnum mulier remanserat, quia ab initio per mulierem peccatum, & propter hanc omnes morimur: Diabolus unam Evam dejecit, sed Christus natus ex Virgine multas Feminas exaltavit. Perpetua & Felicitas caput calcaverunt Serpentis, quod Eva ad cor suum intus admisit. Illam seduxit falsa promittendo; illas non valuit superare saviendo; illam decepit in Paradisi felicitate, has non potuit adire nec sub tantorum positas potestate &c. His & aliis Augustinus harum duarum mulierum celebrat fortitudinem. De iis etiam Serm. 280. 281. & 282. aliàs Serm. 103. 104. & 105. de diversis.

IV. Nunc ad Acta Passionis SS. Perpetuæ & Sociorum, quæ à Ruinart per extensum referuntur, procedam. Comprehensi igitur omnes aliquot diebus extra carcerem sub custodia Militum permanserunt. Hoc audito, Perpetuæ Pater, qui, ut dixi, in gentilitate obduratus permanebat, occurrit ad filiam, ab ea petens, quæ tanti infortunii & suæ familiæ dedecoris causa esset. Cui cum illa suavis at simul constantibus verbis respondisset, hoc sibi accidisse, quod Christiana esset, & talis esse vellet; tunc furore commotus Pater totus se in illam immisit, ut ei oculos erueret, quod tamen non perfecit, sed calcibus & pugnis vexatam, furens ac fremens filiam constantiorem reliquit; quæ Patre per aliquot dies non comparente, gratias agebat Deo, quod à tam gravi periculo eam eruisset. Hoc tempore Perpetua ceterique Catechumeni Baptismo initiati fuere. Quo actu Perpetua nil aliud rogavit Deum, quàm ut fortem ipsam servaret in perferendis suppliciis. Et quidem gratia Dei necessaria erat; cum enim paulò post ipsa & alii Minucio Proconsuli præsentati Diis sacrificare juberentur, at Saturus pro omnibus respondisset, id se numquam facturos, Christiani enim erant, omnes in tetrum carcerem detrusi sunt.

V. Horrore ac tenebris carceris se percussam fuisse ipsamet S. Perpetua fatetur; numquam enim tales tenebras experta fuerat ac tales ætus, ob ibi inclusorum multitudinem & Militum concussionem, & præcipuè ob sollicitudinem infantis, quo privata erat. Subvenit tamen Deus per Tertium & Pomponium Diaconos, qui eis ministrabant; hi enim obtinuerunt pretio, ut quolibet die emissi in meliorem carceris locum paucis horis refrigerarentur: quo tempore exeuntes de carcere suis commodis singuli vacabant. Infantem suum sibi concessum Perpetua lactabat, quem obtinuit, ut secum in carcere haberet. Tandem post multos mœroris dies, ad eò sortis ac hilaris evasit, ut carcer in palatium, & angustia in solatium ei verterentur.

VI. Eodem tempore fratre eam hortante, S. Perpetua rogavit Deum, ut quid de se & Sociis futurum esset, sibi manifestaret. Vidit ergo in somnis scalam aream à terra usque ad Cælum pertingentem & ita angustam, ut vix singuli per eam possent ascendere, & in lateribus scalæ fixi erant gladii, novaculae, lanceae, & omne genus similium, ut si quis negligenter aut non sursum attendens ascenderet, laniaretur, & carnes ejus inhaerent ferramentis. Sub ipsa autem scala erat Draco cubans miræ magnitudinis, qui ascendentibus insidias truebat. Ascendit autem Satorius prior (is cum illis comprehensus quidem non fuerat, sed postea se ultrò tradiderat) & perveniens in caput scalæ ad Perpetuam se convertit dicens, Perpetua, sustineo te; sed vide, ne te mordeat Draco ille. Cui Perpetua: *Non me*, inquit, *nocebit in nomine Jesu Christi*. Cum de sub ipsa scala Draco, quasi timens illam, lentè elevarisset caput, Perpetua primum gradum ascendens pede calcavit illius caput: ubi S. Augustinus Serm. 280. ait: *Calcatus est ergo Draco pede casto, & victore vestigio, cum erecta demonstrarentur scalæ, per quas Beata Perpetua iret ad Deum. Ita caput Serpentis antiqui, quod fuit precipitium Femine cadenti, gradus factum est ascendenti.*

Ascendens ergo Perpetua in altum scalæ vidit hortum valdè spatiosum, & in medio horti sedentem hominem canum in habitu Pastoris grandem oves mulgentem, & circumstantes candidatos millia multa: qui elevans caput & aspiciens Perpetuam ei dixit: Bene venisti filia; cumque eam ad se vocasset, de caseo, quod mulgebat, dedit ei quasi buccellam, & acceptum junctis manibus manducavit: & omnes circumstantes dixerunt Amen. Et ad sonum vocis expergescenda est, manducans adhuc ignotum sibi aliquid dulce. Huc spectavit S. Augustinus de Tempore Barbarico cap. 5. supra relatis verbis: *Sed tandùm hæc Perpetua*

tua lactavit, quamdiu acciperet ab illo Pastore simul & Patre bucellam lactis, quā acceptā dulcedo felicitatis Perpetuæ eam fecit contemnere filium, spernere Patrem, non habere Mundo, perdere animam pro Christo. Atque ita fuit. Nam cum retulisset Fratri suo visionem, ambo intellexerunt passionem esse futuram, & nullam jam spem in seculo habere coeperunt.

VII. Post paucos autem dies rumore sparso, quod Sancti Confessores judicialiter interrogandi essent, supervenit iterum ad carcerem Perpetuæ Pater mœrore plenus, eamque primò blandè, Miserere, inquit, filia canis meis, miserere Patri, si dignus sum à te Pater vocari. Aspice ad Fratres tuos, aspice ad Matrem tuam, ad materteram, ad Filium tuum, qui sine te vivere non potest. Hæc & alia illacrymans dicens osculabatur ei manus, & se ad pedes ejus jactans non jam filiam, sed dominam appellabat. Ad hæc Perpetua dolens quidè, sed pietati Religionem præferens respondit: Cum erimus in catasta (loco Judicii) fiet, quod Deus voluerit, Dei enim sumus. Cumque nil aliud obtinere posset, Pater tristis absceffit.

Altero die dum Sancti Confessores simul pranderent, subito omnes rapti sunt ad Forum, ut audirentur, & factus ibi est Populus immensus. Interrogati ceteri confessi sunt. Ventum est ad Perpetuam, & illicò coram ea apparuit Pater cum filio ejus lactente, & extrahens eam de gradu dixit supplicans: miserere infanti. Tunc Hilarianus Procurator, qui Minucii Proconsulis jam defuncti vices gerebat: Parce, inquit, Perpetua canis Patris tui, parce infantia pueri: fac Sacrum pro salute Imperatorum. Cui Perpetua respondit, *Non facio*. At Hilarianus, Christiana es? quæ inquit, *Christiana sum*. Tunc iratus Pater eam dejicere tentavit. Sed jussus est ab Hilariano dejici, & virgâ percussus est. Doluit Perpetua de casu Patris sui pro senectâ ejus, ac si ipsa percussâ esset. Pronunciatâ autem contra omnes sententiâ, quâ damnabantur ab bestias, hilares descendunt ad carcerem. Perpetua autem, à qua infans consueverat mammas excipere, misit Pomponium Diaconum postulans infantem, sed cum Pater dare nollet, Divinâ voluntate factum fuit, ut nec infans ulterius mammas desideraret, nec Perpetua sollicitudine infantis & mammarum dolore imposterum cruciaretur.

VIII. S. Augustinus Serm. 281. considerat Diaboli artem, qui tentare voluit S. Perpetuam per Patrem, non per maritum, & illius constantiam simul & pietatem, ait: *Merito ille vetus ac veteranus inimicus ne ullas præteriret insidias, qui per Feminam dece-*

deceperat Virum ; quia viriliter secum agentem Feminam sensit , per Virum eam superare tentavit . Nec maritum supposuit , ne illa quæ jam supernâ cogitatione habitabat in Cælis , suspicionem desiderii carnis erubescendo permaneret fortior ; sed Patrem verbis deceptionis instruxit , ut religiosus animus , qui non molliretur voluptatis instinctu , pietatis impetu frangeretur . Ubi Sancta Perpetua tantâ Patri moderatione respondit , ut nec præceptum violaret , quo debetur honor parentibus , nec dolis cederet , quibus altior agebat inimicus . Qui undique superatus , eundem Patrem ejus virgâ percuti fecit ; ut cujus verba contemserat , saltem verbera condoleret . Ibi verò doluit illa senis parentis injuriam , & cui non præbuit assensum servavit affectum &c.

IX. Paucis elapsis diebus dum Sancti Confessores jam ad bestias damnati , simul orantes tempus certaminis præstolarentur ; Perpetuæ dum oraret in mentem venit Dinocrates frater ejus , qui adhuc puer septennis jam obierat . cœpitque ingemiscens orare pro eo . Continuo ipsâ nocte in visione ostensus illi fuit Dinocrates exiens de loco tenebroso , ubi complures erant , æstuans & sitiens valdè , sordido vultu & colore pallido , & vulnus in facie ferens , quod cum moreretur habuit . Erat in loco illo piscina aquâ plena , sed habens marginem aded altum , at staturam pueri excedentem , ut Dinocrates , quamvis astringens ex ea aqua sitim levare conaretur , obtinere non posset . Doluit Perpetua , & maximè quod cum in loco valdè distanti esset , ad eum accedere non poterat . Experrecta tamen in precibus pro ipso continuavit , sperans illi eas profuturas . Interim translati omnes fuere ad carcerem Castrensem , inde ad Amphitheatrum deducendi & bestiis exponendi , occasione Ludorum , qui 7. Martii celebrari debebant in natali Getæ Sereni filii Cæsaris declarati . Die autem , quo erant in isto carcere , Dinocrates Perpetuæ apparuit hilari extrahens phialam de piscina , quæ summissa erat , ac de aqua ad satietatem bibens ac more puerorum ludens , ex quo intellexit Perpetua eum liberatum fuisse à poena .

X. Videtur iste egregius locus ad probandum , mortuos posse à poenis , quas patiuntur post mortem per vivorum preces liberari . Eo tamen , tempore S. Augustini , aliqui nimirum Pelagiani abutentes dicebant , posse etiam eos qui decesserant ante Baptismum orationibus adjuvari . His tamen se opponit S. Doctor L. 1. de Origine Animæ cap. 10. & L. 3. cap. 9. , quod licet Dinocrates non legatur fuisse ante mortem baptizatus , sicut de aliis multis non legitur , baptizatus tamen cum cæteris domus suæ fuisse credendus est : quia tamen ab impio Patre fortè deceptus

ptus aliquid Gentilitatis retinuit , sibi pro illa ætate ad æternam damnationem non imputabile , idèd pœnam subire temporalem coactus , ab hac precibus sororis liberatus fuit . Sic Augustinus L.3. citato cap.9. : *Dinocrates autem septennis puer , in quibus annis pueri cùm baptizantur , jam symbolum reddunt , & pro se ipsi ad interrogata respondent , cur non tibi visus fuerit baptizatus , potuisse ab impio Patre ad Gentilium sacrilegia revocari , & ob hoc fuisse in pœnis , de quibus sorore orante liberatus est , nescio : neque enim & ipsam vel nunquam fuisse Christianum , vel Catechumenam defunctum fuisse legisti ? quamquam ipsa lætiti non sit in eo Canone Scripturarum , unde in huiusmodi quæstionibus testimonia proferenda sunt .*

XI. Hisce postremis Augustini verbis moderni Hæretici Purgatorii hostes infensissimi abutuntur ; & dicunt , hoc merum somnium fuisse à Perpetua levioris genii femina pro visione suppositum , eamque proinde Discipulam Montani traducunt . Sed impudenter , ut de more , loquuntur , nec soli S. Perpetuæ injuriæ sunt , sed & Ecclesiæ universæ etiam veteri , quæ eam ejusque visiones honoravit . Augustinus autem eas non rejicit , sed solum dicit , eas non esse in eo Canone Scripturarum , unde in quæstionibus Fidei testimonium petendum sit . Cæterum hæc Dinocratis S. Perpetuæ apparitione in prælaudatis L. de Origine Animæ sæpe utitur , & L.4. cap.18. eam affert ad confirmandum , animam non esse corpus , nec posse mori cum corpore .

XII. Interea quidam Miles nomine Fudens inspector carceris , ex iis quæ in Sanctis Confessoribus videbat , cœpit intelligere , in eis esse virtutem Dei , multosque Fideles ad ipsos , ut mutuo consolarentur , admittere , donec & ipse tandem ad Christum conversus fuit . E converso S. Perpetuæ Pater in infidelitate obduratior , imminente passionis die mœrore consumtus accedens cœpit barbam suam eveilere , se in terram mittere & prosternere se in faciem , impropere annis suis & tanta dicere , quæ universam creaturam moverent . At Perpetua nihil commota , solum de Patris cæcitate doluit .

XIII. Pridiè quàm in agonem descenderet , sibi per visum apparuit , ad ostium carceris venisse Pomponium Diaconum & vehementer pulsare . Accessit ad eum , qui manu apprehensam Perpetuam cœpit ducere per loca aspera & flexuosa ; cùmque ad amphitheatrum pervenissent , eam in media arena relinquens , hortans , ut fortis esset ; & se cum ea laboraturum promittens abiit . Ipsa Populum ingentem adspiciens , sciensque se ad bestias damnatam , mirabatur , cur hæc contra illam non mit-

mitterentur. Sed bestiarum loco vidit contra se stare Ægyptium quemdam facie fœdum cum adjutoribus suis eam ad pugnam provocantem. Vidit insuper, Juvenes pulchros in sui adjutorium venientes, à quibus expoliata masculus facta fuit, ac subinde ab eis oleo, ut Athletis fieri solet, confricata. Statimque appares vir quidam magnus ramum viridem gestans, in quo erant mala aurea dixit: Hic Ægyptius, si hanc vicerit, occidet eam gladio: & ipsa, si hunc vicerit, accipiet ramum istum. Tunc Ægyptius & Perpetua accedentes ad invicem pugnare cœperunt, diùque luctando, tandem Perpetua apprehendit Ægyptii caput, eique in faciem cadenti caput calcavit. Quare Populus conclamare cœpit. Et Vir ille magnus exosculatus eam, ramum ei tradidit. Quo experrecta intellexit, se non tam contra bestias, quam contra Diabolum feliciter pugnaturam.

Ex hac visione S. Augustinus L.4. de Orig. An. cap.18. probat, Animam non esse corpus, dicens: *Santia Perpetua visa sibi est in somnis cum quodam Ægyptio in Virum conversa luctari. Quis autem dubitet, in illa similitudine corporis Animam ejus fuisse non corpus, quod utique in suo femineo sexu manens, sopitis sensibus jacebat in stratis, quando anima ejus in illa virilis corporis similitudine luctabatur?* Nec sola Perpetua sed Satorus quoque alià visione, quam ipse descripsit, donatus fuit, & legere est in Actis S. Perpetuæ apud Ruinart. In hac refert, se cum aliis Martyribus deportatum fuisse ab Angelis usque ad Thronum Dei, ibique vidisse, quæ loco citato Studiosus legere poterit.

XIV. Interea sancti Confessores in carcere hilares imminentem sui agonis diem sollicitabant. Solùm eos affligebat Sanctæ Felicitatis status, quæ utpotè solis octo mensibus effœta, nondum in statu parturiendi posita, timebant, ne illis focia esse posset, ad tempus dilato ejus Martyrio: Romanis enim Legibus, acceptis à Græcis; & à Græcis ab Ægyptiis, vetitum erat, Feminam prægnantem mortis pœna mulctare, ne cum reo sanguis innocens funderetur. Dum ergo conjuncto gemitu de hoc Deum orarent, ecce Felicitas subito doloribus partus corripitur. Cùmque in partu eam laborantem quidam ex Ministris ostii carceris custodibus (catractariis dictis) vidisset; ait: *Quæ sic modo dolens, quid facias objecta bestiis, quas contemisti, cùm sacrificare noluisti?* Cui Felicitas respondit: *Modò ego patior quod patior; illic autem alius erit in me, qui patietur pro me: quia & ego pro illo passura sum.* Ita enixa est puellam, quam sibi quædam Christiana soror adoptavit & educandam suscepit. De hoc Sanctus Augustinus Serm.281. hæc habet: *Felicitas verò etiam in car-*

carcere pręgnans fuit. In parturiendo femineam conditionem femineę voce testata est. Non aberat Evę pęna, sed aderat Marię gratia. Exigebatur quod mulier debebat, opitulabatur quem Virgo pepererat. Denique editus est partus immaturo mense maturus; actum est enim divinitus, ut non suo tempore onus uteri poneretur, ne suo tempore honor Martyrii differretur: actum est, inquam, divinitus, ut indebito die fętus ederetur, dum tamen tanto comitatu Felicitas redderetur, ne si defuisset, non solum socia Martyribus verum etiam ipsorum Martyrum pręmium defuisse videretur. Ita Sanctus Augustinus ad nomina Perpetuę & Felicitatis alludens: pręmium enim Martyrum sine perpetuitate & felicitate esse non potest.

XV. Nunc ad S. Perpetuam redeundo, aliud suę constantię & sublimitatis animi documentum Acta referunt. Cũ Tribunus: infigatione quorundam perditorum Martyres stricte tractaret, timens ne magicis artibus ę carcere elaberentur, Perpetua ei dixit: Cur non permittis hęc reis destinatis ad pugnam in natali Cęsaris sumere refrigerium? An non tua gloria est, si pinguiore ac vegetiore illuc perducamur? Erubuit ad hęc Tribunus, & iussit illos humanius haberi, & ut fratribus ejus & cęteris facultas fieret introeundi & refrigerandi cum eis. Quia verò qui erant cum bestiis pugnaturi, ut notat Tertullianus Apolog. cap. 44., pridie cęnabant lautissimę & palam, quam cęnabant ceu ultimam *liberam* vocabant, nostri Martyres profanę hujus cęnę libertatem in Agapum modestiam converterunt. Cũque ad eos multus Populus accurrisset, sic ei loquebantur, quasi ituri essent ad triumphum, suam contestantes felicitatem; simul tamen Dei judicium comminantes, dicente Saturo., Crastinus dies satis vobis non est, ut sanguinarios, vestros oculos saturetis: vos hodie tanquam amicos nos con-, venitis, cras ut inimicos oderitis. Notate tamen facies nostras diligenter, ut cognoscatis nos in die illo Judicii., Ita omnes inde attoniti discedebant: ex quibus multi crediderunt.

XVI. Illuxit tandem dies victorię eorum septima Martii, & processerunt de carcere in Amphiteatrum hilares, vultu decori, gaudium ostendentes non timorem. Deerat Secundulus; Deus enim ipsum ad se in carcere vocaverat, & a bestiarum dentibus pręservaverat vivum; quamquam ut indicare videntur Acta, ejus corpus in Amphiteatrum delatum ictibus expositum fuerit, quos anima sentire non poterat. Perpetua & Felicitas hilari sed modesto incessu sequebantur. Cũque omnes pervenissent ad portam & cogerentur habitum induere, Viri quidem

Sacerdotum Saturni, Feminae verò devotarum Cereri, constanter renuerunt. Unde injustitiam agnoscens Tribunus concessit, ut quomodo erant simpliciter inducerentur. Perpetua psallebat, Revocatus & Saturninus & Satorus Populo spectanti comminabantur. Ut ad conspectum Hilariani pervenerunt, gestu ac nutu voceque gravi coeperunt ei dicere: *Tu nos, te autem Deus judicabis*. Quibus Populus exasperatus, flagellis eos vexari pro ordine Venatorum postulavit (stabant enim Venatores cum flagris per ordinem dispositi, ante quos damnati transire coacti, à singulis transeuntes cædebantur) & utique illi gavisii sunt, quòd aliquid de Dominicis Passionibus essent consecuti.

XVII. Jam cum ad certamen ventum esset, concessit Deus, ut quisque ei quod optaverat certamini exponeretur. Saturninus & Revocatus, qui cum quacumque bestia certare optaverant, à Leopardo primum invasi, deinde ab Urso rapti, occisi tamen non sunt. Satorus autem Ursus exhorrens, uno Leopardi morsu se confici sperabat. Sed Apro in eum injecto, tortus quidem aliqualem fuit, sed Venator, qui illum immiserat, ab illo subfossus post aliquot dies interiit. Et cum Satorus ad Ursus expositus subtritusque esset in ponte, Ursus de cavea prodire noluit, unde Satorus secundo illæsus revocatur.

XVIII. Perpetuæ autem ac Felicitati ferocissimam Vaccam bestiam eorum sexui accommodatam Diabolus præparavit. Itaque despoliatæ, & reticulis indutæ producebantur. Horruit Populus alteram respiciens Puellam delicatam, alteram à partu recenti mammis stillantibus, ideòque aliquâ veste seu tunicâ coopertæ fuerunt: ita revocatæ separantur. Inducitur prior Perpetua, quæ jactata à bestia concidit in lumbos. At ubi conspexit tunicam à latere discissam, eam ad velamentum femorum attraxit pudoris potius memor, quam doloris. Videns etiam capillos sibi dispersos alligavit; non enim decebat Martyrem dispersis capillis pati, ne in suo triumpho plangere videretur. Ita surrexit, & cum elisam Felicitatem vidisset, accessit, manum ei tradidit & sublevavit illam. Ambæ igitur ita steterunt, & duritiâ Populi emollitâ, aliis bestiis denuò expositæ non fuere; ad portam revocatæ fuerunt, ut ibi usibus Gladiatorum vitam finirent. Tunc Catechumenus quidam Rusticus nomine ad Perpetuam accedens illam suscepit. Cui illa quasi à somno expergita, adedò enim in spiritu & extasi fuerat, oculos circumquaque vertens: *Et quando, inquit, ad vaccam illam producimur? & cum audisset, quod jam evenerat, non prius credit, quàm notas vexationis in corpore & veste suâ recognovisset*

set. Inde Catechumenum & fratrem suum allocuta dixit: *In Fide state, & invicem omnes diligite, & passionibus nostris ne scandalizemini.*

XIX. In hoc facto S. Augustinus potentiam Christi admirans Serm. modò 280. ait: *Martyres Christi pro nomine & iustitia Christi utrumque vicerunt: nec mori nec dolere timuerunt. Vicit in eis, qui vixit in eis: ut qui non sibi sed illi vixerunt, nec mortui morerentur. Ipse eis exhibebat spirituales delicias, ne sentirent corporales molestias. . . Nam ubi erat illa Femina, quando ad asperissimam vaccam se pugnare non sensit, & quando futurum esset quod jam fuerat inquisivit? Ubi erat? Quid videns ista non viderat? Quo fruens ista non senserat? Quo amore alienata, quo spectaculo avocata, quo poculo inebriata? Et adhuc habebat nexibus carnis, adhuc moribunda membra gestabat, adhuc corruptibili corpore gravabatur. Quid cum resoluta his vinculis anima Martyrum, post labores periculosi certaminis, triumphis Angelicis excepta atque refecta sunt, ubi non eis dicitur, Implete quod iussi, sed, Accipite quod promissi? &c. Talia pro suis Sectis adducant Ethnici Mahumetani, cæterique Infideles. Quod si non, ut certè non, sua Idola aut falsum suum Prophetam tantam suis sectatoribus nedum Feminis, sed & Viris virtutem dedisse unquam ostendent, credant Christi Religionem unicam esse veram, & à Deo auctore prodisse. Sed prosequamur.*

XX. Saturus, quem tangere urfus ausus non fuerat, in alia porta stans militi Pudenti, ut eum in Fide confirmaret, dixit: *Vides, quòd sicut promissi & pradixi, nullam usque adhuc bestiam sensi. Et nunc de toto corde credas. Ecce prodeò illò, & ab uno morsu leopardi consumor.* Atque ita fuit, Leopardo enim objectus de uno morsu ejus tanto perfusus est sanguine, ut Populi testimonio quasi novo Baptismo lotus fuerit. Tunc Sanctus Martyr eidem Pudenti: *Vale, inquit, & memor esto Fidei meæ; & hac te non conturbent sed confirment.* Simulque anulum de digito ejus petiit & vulneri suo merum ei restituit, tanquam pignus successionis, & monumentum Martyrii, quod & ipse passurus erat. Exinde Saturus jam exanimis prosternit se ad jugulationem solito loco. Pudens miles, de quo nuper, & qui humaniter egit cum hisce Martyribus, cuique Saturus agonis pignus tradidit, probabilius creditur fuisse ille, de quo agit Kalendarium Carthaginense 3. Kalend. Maii his verbis: *Martyris Pudensis.*

XXI. Ut tandem horum SS. Martyrum Acta glorioso exitu coronentur, sciendum; morem (quidem) fuisse, ut qui bestiarum dentibus vitam non integrè amisissent, ad locum

Amphiteatri Spoliarium dictum deportarentur ; ibi à tyronibus Gladiatorium finiendi : ibi enim tyrones Athletæ reos conficiebant ; ut sic ad pugnam assuescerent . Huc ergo omnes SS. Martyres tracti , cum super terram prostrati extremum ictum expectarent , conclamante Populo , ut in medium producerentur , & sic gladio penetrante eorum corpora testis & socius fieret homicidii ; Illi ultrò surrexerunt , & se quò volebat Populus transfulerunt , ante jam osculati invicem , ut Martyrium per solemniam pacis consummarent . Cæteri quidèmmobiles , & cum silentio ferrum exceperunt ; multò magis Saturated , qui & prior scalam ascenderat , prior reddidit spiritum , ut in summo scalæ Perpetuam expectaret , secundùm quod in visione apparuerat , ut supra dixi .

Postrema fuit Perpetua , quæ cum à juvenculo & imperito Gladiatore , ut aliquid doloris gustaret in ossè inter costas vulnerata clamorem edidit ; sed ipsa errantem Gladiatoris dexteram tenens gladium ad jugulum suum posuit : *Fortasse (ajunt Acta) tanta Femina aliter non potuisset occidi ; quia ab immundo Spiritu timebatur , nisi ipsa voluisset* . Nec dicat aliquis , Perpetuam in hoc peccasse , quia nemini licet ad suam mortem cooperari : nam hoc speciali Spiritus Sancti impulsu eam (sicut & alia) fecisse credendum est . Ita S. Thomas 2. 2. qu. 64. ar. 5. ad 4. his verbis : *Sicut Augustinus dicit in 1. de Civit. Dei cap. 21. . Nec Sampson aliter excusatur , quòd se ipsum cum hostibus ruinâ domus oppressit , nisi quòd latenter Spiritus Sanctus hoc jussèrat , qui per illum miracula faciebat . Et tandem rationem assignat de quibusdam Sanctis Feminis , quæ tempore Persecutionis se ipsas occiderunt , quarum memoria in Ecclesia celebratur* . De hoc egi Tom. 1. in 1. 2. qu. 3. Dub. 7. §. 3. num. 44. , & Tom. 2. in 2. 2. qu. 8. Dub. 2. §. 2. num. 9.

XXII. De tempore , quo hoc insigne Martyrium contigit , probabiliùs creditur fuisse anno Christi 202. vel 203. Nonis Martii , Severi Imperii decimo vel undecimo . De loco verò quæstio est . Martyrol. Rom. 7. Martii supponit fuisse passos Tuburbi in Mauritania , Menologium Basilii 2. Februarii , in Africa locum non determinans ; Carthaginem tamen fuisse probabiliùs judicatur : nam præterquam quòd Victor Vitenfis L. 1. de Persecut. Wandolica Sanctas Martyres Carthagine in Basilica Majori sepultas fuisse asserit , Martyrologia multa antiqua tum edita tum manuscripta has Sanctas Martyres Carthagine passas fuisse affirmant , & S. Prosper in Chronico de quinta Persecutione sub Severo loquens ait : *Quâ tempestate Perpetua & Felicitas*

pro

pro Christo passæ sunt Nonis Martii apud Carthaginem Africa in castris bestis deputatæ. Martyrolog. Romanum *Saturum* sive *Satyrum* omittit (qui tamen inter hos Martyres ex dictis præclarus fuit) fortè quia ut Acta dicunt , tunc cùm cæteri apprehensî fuerunt præsens non erat , sed postea pro eis ultrò se tradidit. Hactenus dicta, si Lector, quisquis fuerit æquo animo perpenderit, tanta videns humanam. virtutem maximè in Feminis superantia, non poterit, quin sententiam ferat, Christianam Religionem, quæ inter Persecutiones sic effloruit, à Deo esse, & proinde veram. At prosequamur.

§. V.

SS. Leonides Plutarchus &c. Potamiana, Irenæus, Andeolus sub Severo Martyres :

I. **I**nter plurimos Martyres, qui sub Severo pro Christo vitam dedere, Leonidam Origenis parentem ex Eusebio L. 6. cap. 1. supra §. 3. num. 17. indicavi; modò de eodem aliqua repetam, ut præsertim Origenis ejus filii ardens Martyrii desiderium exponam, qui Martyrum Magister effectus, vitam nedum Martyrio non coronavit, sed pluribus erroribus miserè fœdatam clausit, relinquens in se perenne cunctis exemplum, ne nobis ipsis fœdamus; juxta monitum Pauli ad Philipp. 2. v. 12. „ Cum „ metu & tremore salutem nostram operemur : Deus est enim „ qui operatur in nobis & velle & perficere pro bona voluntate.

II. Severo igitur annum Imperii decimum agente ac Læto Alexandria & totius Ægypti Prefecturam obtinente, cùm ardentissimum Persecutionis flagraret incensum, & innumerabiles Martyres coronarentur, Origenis animus adhuc admodum pueri sexum decimum annum agentis tanta Martyrii cupido occupavit, ut se periculis ipsis objiceret, & prosilire ultrò ad certamen gestiret : quod evenisset, nisi impetum ejus Mater cohibuisset. Multò autem magis impetus ejus ad Martyrium efferebatur, cùm Patrem comprehensum in vinculis detineri intellexit, adeout Mater aliâ viâ eum coercere non valens, absconditâ omni ejus veste, eum vel invitum domi manere coegerit. Epistolis tamen Patrem monebat, ut fortis maneret nec causâ sui sententiam mutaret. Ita refert Eusebius L. 6. cap. 2., qui addit, quòd post Leonidæ parentis Martyrium completo anno 17. opibus paternis in Fiscum relatis, unâ cum Matre & sex Fratribus natu minoribus in magna rerum egestate relictus est. Verùm Divinâ Pro-

Providentiâ quâdam Matrôna nobilitate conspicua & opibus potens eum humaniter excepit ; sed cùm hæc apud se Paulum quendam hæresi illius temporis infectum haberet , huic Origenes civiliter convivere cogeatur , numquam tamen adduci potuit , ut precibus unâ cum illo interesset . Annum tamen agens 18. Scholæ Christianæ Alexandrinæ Præfessus , inde habuit , ut suis necessitatibus abundè provideret . Hæc de Origenis in prima ætate persona & fortuna .

III. Nunc de Martyribus , qui ex ejus magisterio prodire , qui præsentis Operis scopus est , & de quibus agit Eusebius cap. 4. , videamus . Quamvis enim Schola illa Grammaticæ institutioni destinata esset , ipse zelo Christianæ Fidei quo ardebat pluries de ea miscebat prædicationes , adeout plures etiam ex Gentibus ad audiendum Verbum convenirent . Primi ergo , qui Origenis scholam illustrarunt , fuere Heracles & Plutarchus fratres , qui in Paganismo vixerunt , donec Deus ad decorandam Christi Fidem utrumque vocavit , primum quidem ad Sedem Alexandrinam post Demetrium gubernandam , alterum ad Fidem Christi Martyrio confirmandam . Contigit hoc anno 11. Severi , Christi autem 203. . Furente enim tunc Persecutione , terrore percussi fugerant quotquot instructionis curam gerebant : solus Origenes intrepidus instituendi Catechumenos onus suscepit . Quantum autem profecerit , & quanta ob id passus fuerit , narrat Eusebius L. 6. cap. 3. his verbis : *Tunc siquidem apud universos Fideles maximam nominis celebritatem adeptus est , ob sedula benevolentia atque humanitatis officia , quæ omniibus Sanctis Dei Martyribus notis pariter atque ignotis promptissimè exhibebat . Neque enim illis bastenùs comes dum in vinculis essent , aut dam ad extremam usque sententiam interrogarentur ; sed post latam quoque sententiam , cùm Sanctissimi Martyres ad supplicium abducerentur , ipse incredibili fiducia præditus & pericula ipsa provocans adstat ; adeout sæpenu- merò cùm audacter accederet , & Martyres summa cum libertate osculo salutaret , ab insana Gentilium multitudine circumstante , lapidibus jamjam obruendus videretur , nisi dextram Divini Numinis semel adjutricem nactus , præter opinionem omnium evasisset .* Hæc & alia Origenis pericula prosequitur Eusebius .

IV. Plutarchus civis Alexandrinus ex Discipulis Origenis primus , à Baptismo fluminis , quo paulò ante Christo renatus fuerat , ad Baptismum sanguinis sub Aquila Præside glorioso Martyrio primus transivit . Cui inquit Eusebius cap. 4. cùm Origenes , ut sibi moris erat , ad extremum usque vitæ terminum individuus comes adhæreret , parùm absuit , quin ab ejus occide-

retur Civibus, utpotè qui necis illius auctor fuisset. Verùm Divina Providentia tunc quoque illum conservavit. Heraclem quoque Plutarchi fratrem ad Ecclesiæ bonum præservavit. Is enim in scientiis nedum Græcis ac profanis sed & Sacris Scripturarum Sanctarum adeò utilis Evangelio factus fuit, ut Origenes ipse Româ reversus anno circiter 212., nec valens solus Catechesibus vacare, Heraclem adiutorem assumserit ei tradens primis principiis imbuendos, provectioribus sibi reservatis. De hoc testis est S. Hieronymus L. de Script. Eccles. cap. 54., qui supponit Heraclem tunc fuisse Presbyterum, postea verò (anno 231.) Demetrio mortuo, ad Thronum Alexandrinum eventum, ubi inter cætera sanctissimè statuit (apud Eusebium L. 7. cap. 7.) ut qui ab Hæreticis ad Ecclesiã veniebant, non prius ad communionem admitterentur, quàm quæcumque ab Adversariis audissent prius exposuissent ac ejurassent, non iterato tamen eis Baptismo. Hunc Dionysius Alexandrinus titulo *Papæ* exornavit dicens: *Hanc ego Regulam & formam à Beatissimo Papa nostro Heracla accepi*: Regulam nimirum, de qua supra, de non admittendis Hæreticis &c. Martyrol. Rom. 14. Julii eum his verbis celebrat: *Alexandriæ Sancti Heracla, ob cujus celeberrimam opinionem Africanus Historiographus memorat, se Alexandriam ad eum visendum properasse.*

V. Sed redeamus ad Martyres, qui è Schola Origenis prodire. Post Plutarchum, qui ex dictis primus fuit, inquit Eusebius L. 6. cap. 4., *secundus ex Origenis Discipulis Martyr fuit Serenus: qui Fidem, quam acceperat, igne examinatam ac probatam exhibuit. Tertius ex eadem Schola Martyr extitit Heraclides, ac deinde quartus Heron, ambo securi percussi: prior dum adhuc esset Catechumenus, alter verò Neophytus. Præter hos quintus ex eodem auditorio Christiana pietatis Athleta victor renuntiatus est Serenus priori illi cognominis, qui cum plurimos cruciatus fortissimè pertulisset, tandem capite truncatus fuisse dicitur. Sed & ex Mulierum numero Herais (seu Rhais) quædam adhuc Catechumena per ignem..., Baptismum adepta, ex hac luce migravit.* De his omnibus Martyrol. Rom. die 18. Junii infra referendum.

VI. Inter præfatos Martyres celebre fuit Alexandriæ, etiam post seculum, certamen S. Potamiænæ Virginis, quam Ruffinus è Schola Origenis fuisse dicit, Eusebius tamen L. 6. cap. 5. hoc fileat. Sancta igitur Potamiæna Matrem habuit Marcellam, & in Martyrio sociam. S. Potamiæna corpore pulcherrima, æquè erat virginitatis & Christianæ Fidei custodiendæ zelantissima, & propterea pro utraque tuenda multa generosè sustinuit. Cu-

jus-

jusdam intemperantis heri serva erat, qui cum & blanditiis & promissis eam ad turpia sæpius iucassum semper sollicitasset, furore percitus illam tradidit Aquilæ Præsidi, accusans, quod esset Christiana, & quod occasione tunc furentis Persecutionis Imperatori ac Regimini continuè imprecaretur, & pollicitus, se magnam pecuniam vim ei daturum, dixit: si ei persuaseris, ut meo desiderio assentiatur; eam custodi nullo affectam supplicio: quod si in ea quam initio ostendit austeritate manserit, supremo afficias supplicio.

VII. Producta ergo ante Tribunal vidit ibi contra se parata atrociora tormenta. Horum aspectus nec minimum movere potuit ejus pro Castitate & Fide constantiam; imò & toto corpore eisdem excruciat, nec gemitum nec doloris signum emisit. Quare iratus Judex atrocior tormentum imperat: jubet magnum lebetem pice repletum vehementissimo igne accendi: cumque ebulliret pix & valde arderet, conversus ad Sanctam Virginem impius Præses: *Abi, inquit, pare voluntati Domini tui; alioqui jubeo te devolvere in lebetem.* Illa verò respondit: *Absit, ut sis Judex adeò iniquus, qui me jubeat parere libidini & intemperantiæ.* Quibus Judex interminatus fuit, se Gladiatoribus violandam eam traditurum. At illa (inquit Eusebius) cum paulisper secum ipsa rem perpenderit, interrogata, quid consilii caperet, ejusmodi fertur dedisse responsum, quod impium esse Gentilibus videbatur. Hoc duplici responso furore accensus Præses jubet eam exui, & in lebetem injici. Illa verò pudoris sui jacturam, si coram omnibus nudaretur exhorrens, voce magnâ clamavit: *Oro te per Caput Imperatoris, quem tu times, si statuisti sic me supplicio afficere, ne jufferis me exui, sed jube me paulatim in picem ferventem demitti, ut videas, quantam mihi largitus est patientiam Christus, quem tu ignoras.* Sic igitur, Judice annuente, veste ut induta ab imis pedibus paulatim in lebetem pice ardentem demissa, cum spatium trium horarum pix ardens ad ejus collum pervenisset, emisit spiritum, duplici & Virginitatis & Fidei corona insignita. Cum ea etiam igne consumpta fuisse dicitur Marcella Mater.

VIII. Præfatorum illustrium Martyrum agonem Martyrol. Rom. 18. Junii ita describit: *Alexandria in eadem Severi Persecutione Sanctorum Martyrum Plutarchi, Sereni, Heraclidis Catechumeni, Herois Neophyti, & alterius Sereni, Rbaidis Catechumena, Potamiana & Marcellæ ejus Matris.* Inter quos præcipuè enituit Potamiana Virgo, quæ primò immensos innumerosque agones pro virginitate desudans, deinde etiam exquisita & inaudita tormenta pro Fide perpeffa, ad ultimum cum Matre ipsa igne consumpta est.

IX. His annumerandus est Basilides, de quo supra §.3. n.9., qui cum munus Apparitoris gerens duceret S. Potamiænam ad supplicium, eamque à Turba insultante defenderet, illa in grati animi tesseram promisit, se pro ejus salute Jesum Christum exoraturam: quod implevit ei post mortem apparens & coronam capiti ejus imponens: unde Basilides publicè Christum confessus triduo post Fidem sanguine testatus est. De eo Eusebius L.6. cap. 5. & Martyrol. Rom. die 10. Junii: *Alexandria passio Sancti Basilidis sub Severo Imperatore, qui cum Sanctam Potamiænam Virginem; quam ad supplicium ducebat, ab impudicorum hominum petulantia tutatus esset, religiosi officii mercedem ab ea recepit: nam ipsa post triduum illi apparens, & ejus capiti coronam imponens, non solum eum convertit ad Christum, sed brevi agone certantem suis precibus Martyrem gloriosum effecit.* Hunc Basilidem inter auditores Origenis recenset Eusebius L.6. cap. 5., ideòque in Christianos jam saltem propensum: actus tamen pietatis, quem erga S. Potamiænam exercuit, gratiam conversionis & Martyrii ei acquisivit. Contigisse hoc post annum 203., probabilis sententia est.

X. Severi Persecutio Martyrio coronavit etiam S. Irenæum in S. Polycarpi Schola educatum, quamvis Doduvellus aliique ex Protestantibus ejus Martyrium negare audent, incaustum tamen, ut infra. In Asia Inferiori natus nec procul à Smyrne. Quâ occasione & quo tempore in Gallias transierit, incompertum est; nisi quòd anno 177., quo maximè Lugduni efferbuit Persecutio adversus Christianos, ejus Urbis Ecclesiæ Presbyter esset: quod ex Epist. Ecclesiæ Lugdunensis ad Eleutherum Papam apud Eusebium L.5. cap.4. colligere licet, in qua Irenæum laudibus celebrat: ibique tantâ virtute emicuit, ut Pothino primo illius Urbis Episcopo defuncto ipse in ejus locum electus fuerit. Quantæ eruditionis ac doctrinæ fuerit, ejus Scripta adversus illius temporis Hæreses abundè testantur. Hicce ergo aliisque laboribus perfunctum vitam glorioso Martyrio coronasse, nedum Recentiores, ut Adversarii dicunt, sed & Veteres tradunt. Hieron. in cap. 64. Isaïæ eum vocat *Virum Apostolicum Episcopum & Martyrem*. Nec obest, quòd in L. de Script. Ecclesi. cap. 35. nihil de ejus Martyrio dicat; nam ibi Irenæi Gesta & Scripta perducit solum usque ad Imperium Commodi, sub quo adhuc in vivis erat, nec quidquam de ejus morte dicit. Martyrem eum vocat Auctor Quæst. & Responsi. ad Orthodoxos apud Justinum qu. 115.. Innumeros Martyres cum Irenæo interfectos fuisse testatur Gregorius Turon. L.1. hist. num. 29.; adeout

Christiani sanguinis rivi per loca publica effluerent ; & S. Irenæum coram Tyranno multis cruciatibus affectum tandem Martyrio vitam Jesu Christo consecrasse : & L. i. de Gloria Martyrum cap. 50. ejus corpus in crypta S. Joannis sub Altari fuisse sepultum , tradit inter S. Epiphodium & S. Alexandrum , qui sub M. Aurelio passifuerant .

XI. Occasio dubitandi de S. Irenæi Martyrio fuit ea , de qua S. Gregorius Magnus L. 11. Epist. Ep. 56. ad Etherium Lugdun. Episcopum ; conqueritur nempe , Acta ejus , quamvis sollicitè quæsitâ inveniri non valuisse . Baronius tamen ad annum 205. num. 28. & in Notis ad Martyrol. fragmentum quoddam à se repertum dicit , ubi habetur ; Milites jussu Severi Imperatoris Urbem Lugdunum circumdedit , statimque omnes Christianos qui in ea reperti sunt fuisse obtruncatos ; atque inrer alios Irenæum , quem post varios cruciatus occisum Zaccharias Presbyter sepelivit , P. Ruinart asserit , se quoque Acta S. Irenæi Manuscripta in Cisterciensi Monast. invenisse , at nescire , an eadem sint cum iis de quibus Baronius .

XII. Verùm quidquid sit , Traditio utriusque Ecclesiæ , cui refragari nefas esse arbitror , S. Irenæum inter Martyres collocat . Latina quidè in Martyrol. 28. Junii hæc habet : *Lugduni in Gallia Sancti Irenæi Episcopi & Martyris , qui , ut scribit Sanctus Hieronymus , Beati Polycarpi Smyrneusis Episcopi discipulus fuit , & Apostolicorum temporum vicinus . Is cum adversus Hæreticos verbis ac scriptis plurimum decertasset , in Persecutione Severi cum omni ferè Civitatis suæ Populo coronatus est glorioso Martyrio .* Consentiant Beda , Ufuardus , Ado & alii . Græca verò in Menol. Basilii 23. Augusti de S. Irenæo Episcopo Lugdunensi ait : *Celebris itaque virtute ac eruditione , postquam pro Christo certamen Potbius Episcopus consummavit , ipse præfatæ Urbis Episcopus designatur ; ac multos Infideles sermonibus & doctrinis abortationibusque abstrahens ab errore , atque illos Christo Martyres adjungens , tandem & ipse comprehensus à Persecutoribus , & gladio confectus ad Deum migravit , paratum sibi Regnum recipiens .* Contigit hoc anno 202. Christi , & decimo Severi secundum aliquos ; anno verò Christi 203. & ultra secundum alios : & quidè post Edictum . à Severo adversus Christianos latum . Sic in Irenæum sævierunt Infideles adhuc viventem : Calvinistæ tamen magis impiè sævierunt in mortuum ; Anno enim 1562. cum Lugdunensem Urbem occupassent , Corpus S. Irenæi è tumulo rapietes , ossa dissiparunt , & capitis cranium postquam diutius ludibrio habuerunt , in media platea turpiter projectum tamdiu jacuit ,

cuit, donec secretè à Catholico Viro collectum, modò Lugduni religiosè asservatur.

XIII. Martyrologia Adonis Ufuardi, & alia, sub Severo imò ipso præsentè contigisse referunt S. Andeoli Subdiaconi Martyrium in Dicecesi Vivariensi. Is à S. Polycarpo in Gallias missus, cùm Lugdunum pervenisset, ac Verbum Dei Carpentorati annuntiasset, atque alibi, expleto ministerio obvium in itinere habuit Severum euntem Valentiam in quodam vico propè Rhodanum, dicto Borgoate, cujus iussu gladio ligneo caput in quatuor partes ei scissum fuit, ejusque Corpus in loco dicto *Gentibus* reconditum fuit. Hujus memoriam Martyrol. Roman. 1. Maii ita celebrat: *In Galliis territorio Vivariensi Beati Andeoli Subdiaconi, quem Sanctus Polycarpus unà cum aliis ab Oriente misit in Galliam ad prædicandum Verbum Dei. Hic sub Severo Imperatore spinosis fustibus casus, demum ense ligneo capite in quatuor partes ad modum Crucis conscissus, Martyrium consummavit* (anno circa 208., quo Severus è Gallia in Angliam pertransivit.

§. VI.

Martyres alii sub Severo.

I. **P**æfatis, qui sub Severo gloriosè certarunt, sequentes ad Christianæ Religionis robur adjiciam. Primus sit Sanctus Charalampus cum Sociis apud Græcos celebris, de quo in Menologio Basilii 10. Februarii dicunt: *Charalampus Christi Martyr in Urbe Magnesia Christianorum Sacerdos, cùm viam Veritatis doceret, à Luciano Præfetto comprehensus, sacrâ Stola exuitur. Deinde detractâ toto corpore pelle, cùm videret eum Præfectus constanti animo isthac perferentem, irâ incensus propriis manibus conatus est Sanctum dilaniare. Sed statim manibus ejus avulsis, sanum eum & incolumem Sanctus precibus suis effecit. Quod ubi viderunt Porphyrius Licetor & Davetus, ejuratâ Idolorum superstitione in Christum credidere: similiter & tres Mulieres, quæ ibi adstabant, miraculo commotæ, Christumque confessæ, comprehenduntur, divisque tormentis excruciantur. Etsi enim Præfectus sanitati restitutus est, in sua tamen Infidelitate permanens crudelissimè omnes decollavit. Ita Græci. Quis hinc non admiretur Potentiam Dei in Servis suis?*

II. Altera sit S. Gundenis Virgo, de qua Baronius ad annum 205. num. 20. ait: „ Hoc anno iisdem Consulibus Plautia- „ no atque Geta in antiquis Ecclesiasticis Tabulis passâ ponitur

„ Carthagine sub Ruffino Proconsule S. Gundenis Virgo , quæ
 „ Fidei causâ equuleo diu torta , & ungulis lancinata , carceris-
 „ que pædore longo temporis spatio afflictata , constanti animo
 „ perstans in Fidei Confessione , demum gladio cæsa magnâ
 „ gloriâ Martyrium consecuta est „ . Sermo adest S. Augustini
 modò 254. habitus : *In Basilica Majorum in natali Martyris Guden-
 dentis* : quibus *Gudennem* hanc indicasse aliqui volunt ; alii *Guden-*
dentis seu *Gaudentis* vel *Gaudensii* Virum Martyrem a Gudenne
 diversum intellexisse putant .

III. Tertiò adjungi possunt SS. Castus & Æmilii , qui in
 Africa passi sub Severo creduntur . De his Martyr. Rom. 22.
 Maii ait : *In Africa Sanctorum Martyrum Casti & Æmilii , qui
 per ignem passionis Martyrium consummarunt . Hos ut S. Cyprianus
 scribit , in prima congressione devictos , Dominus victores in secundo
 pralio reddidit , ut fortiores ignibus fierent , qui ignibus ante cessis-*
sent . Ita S. Cyprianus L. de lapsis in Persona illius , qui forti quid-
 èm animò ad tormenta accessit , sed postea in dolore crucia-
 tum victus fuit : *Certare quidè , inquit , fortiter volui , & Sa-*
cramenti mei memor , devotionis ac Fidei arma suscepi : sed me in
congressione pugnante cruciamenta varia & supplicia longa vice-
runt . Stetis meus stabilis & fides fortis , & cum torquentibus pænis
immobilis diù anima luctata est : sed cùm durissimi Judicis recrud-
escente sevitia , jam fatigatum jam lapsum corpus nunc flagella scin-
derent , nunc contunderent fustes , nunc equuleus extenderet , nunc
ungula effoderet , nunc flamma torreret , caro me in colluctatione de-
serviit , infirmitas viscerum cessit , nec animus sed corpus in dolore
defecit . Huic ergo sic lapso sperari posse non defuturam Dei mi-
 sericordiam , ostendit Cyprianus Casti & Æmilii exemplo dicens :
Sic sic Casto & Æmilio aliquandò Dominus ignovit : sic in prima con-
gressione devictos , victores in secundo pralio reddidit , ut fortiores
ignibus fierent , qui ignibus ante cessissent , & unde superati essent ,
inde superarent .

De his S. Augustinus Sermonem habuit , qui modò est 185. ,
 ubi comparans illos cum Petro , qui de se præsumens priùs Chri-
 stum negavit , postea humilis factus ad passionem pervenit : *Tale*
aliquid , inquit , factum esse arbitror in his Martyribus Sanctis Ca-
sto & Æmilio , quorum diem hodie celebramus . Fortasse & ipsi de
suis viribus antea præsumserunt , & idè defecerunt . Ostendit eis
qui essent ipsi , qui ipse . Repressit præsumentes & vocavit credentes ,
adjuvit pugnantes coronavit vincentes &c.

IV. Ad tempora Severi referri possunt Martyres in Africa
 similiter coronati , nimirum Celerina avia S. Celerini celebris Con-

Confessoris sub Decio, & Laurentini ac Ignatii ejusdem Patruī & avunculi, de quibus Mart. Roman. 3. Februarii, & S. Cyprianus Epist. 34. mentionem facit; ubi celebrans gloriosum S. Celerini suā ætate secutum certamen, ait: *Nec rudis iste aut novus est in Celerino carissimo nostro titulus gloriarum, per vestigia cognitionis suæ graditur, Parentibus ac propinquis suis honore consimili Divina dignationis aquatur. Avia ejus Celerina jam pridem Martyrio coronata est: item patruus & avunculus Laurentinus & Ignatius in castris & ipsi quondam secularibus militantes: sed veri & spirituales Dei Milites, dum Diabolum Christi confessione prosterunt, palmas à Domino & coronas illustri passione meruerunt. Sacrificia pro eis semper, ut meministis, offerimus, quoties Martyrum passiones anniversariâ commemoratione celebramus.*

V. Circa hæc ultima S. Cypriani verba duo notanda sunt: Unum, quòd dum dicit *Sacrificia pro eis offerimus*, mens ejus non est, quòd *pro eis*, idest ad expiationem delictorum Sacrificia offerrentur; aperte enim hic dicit, quòd Martyres præfati *palmas à Domino & coronas illustri passione meruerunt*; & Epist. 16. de Martyribus dicit, quòd *confecto itinere virtutis ac Fidei, ad complexum & osculum Domini Domino ipso gaudente venerunt*; sed *pro eis*, idest pro commemoratione eorum victoriæ: *Ideoque* (inquit S. Augustinus Serm. 17. de verbis Apost. modò Ser. 159. cap. 1.) *babet Ecclesiastica disciplina, quòd Fideles noverunt, cum Martyres recitantur ad Altare Dei, ubi non pro ipsis oratur: pro cæteris autem commemoratis defunctis oratur. Injuria est enim pro Martyre orare, cuius nos debemus Orationibus commendari.* Fiebant ergo in antiqua Ecclesia memoriæ Martyrum ad Altare in Sacrificio, non ut oraretur pro ipsis, sed ut ipsi suis orationibus Fideles juvarent. Quid ad hæc Protestantes?

VI. Alterum; quòd dicendo, *quoties Martyrum passiones anniversariâ commemoratione celebramus*, aperte offendit Cyprianus suā ætate celebrata fuisse nedum Anniversaria solemnia commemorationis Nativitatis & aliorum mysteriorum Christi, quæ ab Ecclesiæ incunabulis celebrata fuisse nemo, puto, negabit; sed & Apostolorum & eorum, qui pro Christo mortem perpeffi essent. Quare Epist. 37. dies Martyrii singulorum adnotari præcipit sic: *Dies eorum, quibus excedunt annotate, ut Commemorationes eorum inter memorias Martyrum celebrare possimus. . . . & celebrentur hic à nobis oblationes & Sacrificia ob commemorationes eorum, quæ citò vobiscum Domino protegente celebrabimus.* Sed hæc ad eruditionem obiter dicta sint.

VII. Quamvis autem Christiani in illa Persecutione patienter

ter omnia ferrent, nec quisquam eorum contra Persecutores vel verbum profferret, imò omnes pro eorum salute Deum deprecarentur; Deus tamen, cujus causam Sancti Martyres agebant, injurias sibi in eis illatas identidem ulcisciebantur. Ita Tertullianus ad Scapulam tunc Africæ Proconsulem & crudelem Christianorum hostem cap.3.: *Absit, inquit, ut indignè feramus, ea nos pati quæ optamus, aut ultionem à nobis aliquam machinemur, quam à Deo expectamus. Tamen (sicut supra diximus) doleamus necesse est, quòd nulla Civitas impunè latura sit sanguinis nostri effusione. Sicut & sub Hilariano Præside cùm de areis sepulturarum nostrarum adclamaissent: Areæ non sūt (idest Christianorum corpora jaceant insepulta) Areæ ipsorum non fuerunt: Messes enim suas non egerunt.* (Alludit ad sterilitatem, quæ tunc Africam afflixit.) *Ceterum & imbre anni præteriti, quid commuerit genus humanum apparuit, cataclysmum scilicet (diluvium) & retrò fuisse propter incredulitates & iniquitates hominum; & ignes, qui super mœnia Carthaginis proximè pependere per noctem, quid minati sint, sciunt qui viderunt; & pristina tonitrua quid sonaverint, sciunt qui obdurnerunt. Omnia hæc signa sunt imminentis iræ Dei, quam necesse est, quoquomodo possumus, ut & annuntiemus & prædicemus, & deprecemur interim localem esse. Universalem enim & supremam suo tempore sentient, qui exempla ejus aliter interpretantur. Nam & Sol ille in Conventu Ubicensi extincto penè lumine adeò portentum fuit, ut non potuerit ex ordinario deliquio hoc pati positus in suo bypsomate (altitudine) & domicilio. Habetis Astrologos.*

Possumus aquè & exitus quorundam Præsidum tibi proponere, qui in fine vitæ suæ recordati sunt deliquisse, quòd vexassent Christianos. Vigellius Saturninus, qui primus hic gladium in nos egit, lumina amisit. Claudius Herminianus in Cappadocia, cùm indignè ferens uxorem suam ad hanc Sectam transisse, Christianos crudeliter traxisset, solusque in Prætorio vastatus peste cùm vivus vermicibus ebullisset, Nemo sciat, agebat, ne spe gaudeant Christiani. Postea cognito errore suo, quòd tormentis quosdam à proposito suo excidere fecisset, penè Christianus decessit. His aliisque exemplis conatur Tertullianus Scapulam à cæde Christianorum avertere. Tandem ei proponens mala, quæ ob ejus sævitiem Carthagini imminebant, concludit cap.5.: Parce ergo tibi, si non nobis. Parce Carthagini, si non tibi. Parce Provinciæ, quæ visâ intentione tuâ obnoxia facta est concussionibus & Militum & inimicorum suorum cujusque. Magistrum neminem habemus, nisi Deum solum. Hic ante te est, nec abscondi potest, sed cui nihil facere possis. Ceterum quos putas tibi
Ma-

Magistros, homines sunt & ipsi morituri quandoque. Nec tamen deficiet hac Secta, quam tunc magis edificari scias, cùm cedi videtur. Quisque enim tantam tolerantiam spectans, ut aliquo scrupulo percussus, & inquirere accenditur quid sit in causa; & ubi cognoverit Veritatem, ipse statim sequitur. Ita ad rem nostram Librum claudit Tertullianus ad Scapulam. Adeoque verum erat, quòd cædibus edificabatur Christiana Religio, ut idem Tertullianus paulò ante allato exemplo Arrii Antonini in Asia, qui cùm persequeretur Christianos, omnes illius Civitatis Christiani ante Tribunal ejus manu facta se præsentarunt, conversus ad Scapulam dicat: Hoc si placuerit & hic fieri, quid facies de tantis millibus hominum, tot Viris ac Feminis, omnis sexus omnis ætatis omnis dignitatis offerentibus se tibi? Quantis ignibus, quantis gladiis opus erit?

CAPUT VIII.

De Persecutione sub Maximino I.

§. I.

Sors Christianorum usque ad Maximinum.

I. **E**Xtincto anno 211. Severo, & succedente Caracallâ ejus filio (unâ cum Geta fratre) extincta tamen non fuit illi-cò Persecutio, sed in aliquibus saltem Provinciis odio Populorum ac Præsidentum aliquandiu continuavit. Et hoc maximè, si supponamus, Librum Tertulliani ad Scapulam scriptum fuisse post Severi mortem, ut non paucis placet: tunc enim Scapula in Africa atrocius quàm alii in aliis Provinciis in Christianos sæviebat. Scapula enim vivos Christianos comburebat, in aliis autem Provinciis gladio tenus puniebantur. Unde Tertullianus cap.4. ait: *Pro tanta innocentia, pro tanta probitate, pro justitia, pro pudicitia, pro Fide, pro veritate, pro Deo vivo cremamur: quod nec sacrilegi, nec hostes publici veri, nec tot Majestatis rei pati solent. Nam & nunc à Præside Legionis & à Præside Mauritanie vexatur, sed gladio tenus, sicut & primordio mandatum est animadverti in hujusmodi.* Nec miretur quis, Antoninum Caracallam, quem Tertullianus ibi cap.4. dicit *Christiano lacte educatum* (idest à Nutrice Christiana) adversus Christianos sævisse. Hæc enim absque speciali Caracallæ mandato fieri potuerunt, ratione Edicti à Severo Patre jam promulgati; imò & Caracal-

lam

Iam virum vitiis deditum, & à Christianorum moribus alienissimum, Christianis intuitu Religionis multum favisse, nemo facile persuadebit :

II. Quare sub Caracallæ Imperio ponunt aliqui agones Sanctorum Felicis, Fortunati, & Achillei in Gallia: de quibus Martyrol. Rom. 23. Aprilis: *Valentia in Gallia passio Sanctorum Martyrum Felicis Presbyteri, Fortunati & Achillei Diaconorum, qui à B. Irenæo Lugdunensi Episcopo ad prædicandum Dei Verbum missi, cum maximam partem illius Civitatis ad Fidem Christi convertissent, à Cornelio Duce in carcerem trusi sunt, deinde diutissime verberati, cruribusque confractis, circa rotarum vertiginem stricti, fumum quoque in æquei suspensione perpeffi, ad extremum gladio consummati sunt*: Quid autem esset tormentum Rotæ, exponit Baronius in Notis ibi. Et similiter SS. Ferreoli, & Ferrutionis, de quibus idem Martyrol. die 16. Junii: *Vesoutione in Galliis Sanctorum Martyrum Ferreoli & Ferrutionis Diaconi, qui à Beato Irenæo Episcopo ad prædicandum Verbum Dei missi, postea sub Claudio Iudice diversis pænis excrucii gladio feriuntur*.

III. Hujus tamen Persecutionis reliquiæ ferè statim extinctæ sunt, nec ultra annum 211. perdurarunt; non quia Caracalla erga Christianos affectus esset, sed quia aliis vitiis & crudelitatibus detentus, Christianorum obliviscebatur. Truculentus adeo fuit, ut fratrem Getam vix primo elapso anno Imperii in Matris ipsius gremio interfecerit, uxorem Plautillam occiderit, & viginti hominum millia ac mulierum, quia Getæ studuerunt; quin & ipsum Papinianum Jurisconsultum celebrem, quod ejus gesta impia excusare Legibus nolle, necari jussit; & Alexandria ingentem Civium stragem ediderit, quod ipsum ob cædem fratris vituperassent. Adeo etiam libidine obcæcatus, ut Juliam novercam in uxorem non horruerit: uno verbo: omnes ipsi defuere virtutes, vitium pene nullum. Demum à Macrino Prefecto Prætorio per Martialem Centurionem inter Edeffam & Carras interfectus est, exactis à Patris obitu Imperii annis sex & mensibus duobus, ætatis verò 29.. Constant hæc ex Dione, Xiphilino & Spartiano in Severo. Occiso Antonino Caracallâ Macrinus Imperium invasit, consortem Imperii assumens Diadumenum filium. Sed cum post annum ac menses duos unâ cum filio occisus fuerit, sævitiam exercendi in Christianos tempus non habuit.

IV. Macrino successit Heliogabalus. Hunc virum omnium mortalium foedissimum, adeo ut se in Feminam transformaret, & quamcumque libidinem corpore suo nedum exerceret, sed etiam

etiam pateretur, narrant ipsi Ethnici Scriptores. Cum antea Sacerdos Solis in Phœnicia fuisset, omnium Deorum cultum Romæ extinguere & illuc transferre conatus est, quin & omnem Religionem etiam Christianam eò deducere tentavit: reverà tamen, ut nullibi alius Deus, quàm Heliogabalus coleretur. Sic teste Lampridio id agebat, *Ne quis Romæ Deus, nisi Heliogabalus coleretur; dicebatque . . . & Christianam devotionem illuc esse transferendam*. Hinc Doduvellus putat, Heliogabalum Christianos pro suis habuisse. At quomodò hæc, nisi Christiani se Solem, imò ipsum Heliogabalum relicto Christo adorare professi fuissent? Non enim iste, inquit Lampridius, *Romanas tantum veluit extinguere Religiones, sed per Orbem terræ unum studuit, ut Heliogabalus Deus unus ubique coleretur*. Christianos ergo persecutus fuisse quidè non legitur, sed eos pro suis idest cultoribus habuisse, somnium est. Solis 4. annis, idest ab anno Christi 220. ad 224., vel ab anno 219. ad 222. secundum alios imperavit: anno enim ætatis suæ 18. fuit occisus.

V. Alexander (dictus etiam Aurelius Severus) suscepit Imperium anno 224., ut vult Baronius, vel 222. ut alii. Princeps omnium civilium virtutum amantissimus, & simul rerum bellicarum peritiâ celebris, nec non in distribuendis Reipublicæ officiis Personarum merita unicè adspiciens. Cum aliquando Præfectum Prætorio constituisset eum, qui fingerat ne ea dignitate ornaretur, dixisse fertur, *Invitos non ambientes in Rempublicam collocandos*: quod multò magis in Ecclesiasticis Officiis dispensandis monet S. Bernardus L. 4. de Considerat. ad Eugenium cap. 4. dicens: *Non volentes neque currentes assumiso: sed cunctantes, sed renuentes: etiam coge illos & compelle intrare*.

VI. In Christianos Alexander fertur fuisse propensissimus, adeout ejus Familia Christianis plena esset, & ipse in larario suo Christum coleret, eique Templum ceu Numini erigere medigaretur. Obstare tamen videtur, quòd ipso imperante aliqui Martyrium passi fuisse referantur, ut S. Callixtus Papa anno 226.: de quo Rom. Martyrol. 14. Octobris hæc habet: *Romæ viâ Aureliâ natalis Beati Callixti Papæ & Martyris, qui Alexandri Imperatoris jussu diutius fame in carcere cruciatus, & quotidie fustibus casus, tandem è fenestra domus in qua custodiebatur precipitatus, atque in puteum demersus victoria triumphum promeruit*. Extat adhuc ejus domus in Ecclesiam sub ejus nomine conversâ, in qua cernitur & puteus, in quem dejectus est. Imò Acta ejus Martyrii ferunt, ab Alexandro Edicta contra Christianos promulgata fuisse.

Item S. Calepodius & alii, de quibus Martyrol. Rom. 10. Maii: *Romæ Beati Calepodii Presbyteri & Martyris, quem Alexander Imperator gladio fecit occidi, & corpus ejus per Civitatem trahi atque in Tiberim jactari; quod inventum Callixtus Papa sepelivit. Decollatus est etiam Palmatus Consul cum uxore & filiis & aliis promiscui sexus quadraginta duobus de domo sua: Simplicius quoque Senator cum uxore & sexaginta octo de Familia sua: item & Felix cum uxore sua Blanda; quorum capita suspensa sunt per diversas portas Urbis ad exemplum Christianorum.* Numquid iste in Christianos erat propensus, qui in eos tam publicè & quidè Romæ deserviebat? His accedunt S. Privatus Martyr, de quo 28. Octobris legitur: *quod ulceribus plenus à Beato Callixto Papa sanatus: inde ob Christi Fidem sub Alexandro Imperatore plumbatis casus est usque ad mortem.* S. Asterius, de quo 21. Octobris legitur: *Apud ostia Tiberina S. Asterii Presbyteri & Martyris, qui ut in passione beati Callixti Papa legitur sub Alexandro Imperatore passus est.* Qui omnes prælaudati Martyres afferuntur à S. Callixto Papa fuisse ad Fidem conversi. Hos sequitur Sancta Tatiana Martyr, de qua 12. Januarii habetur: *Romæ S. Tatiane Martyris, quæ sub Alexandro Imperatore uncis atque pectinibus laniata, bestiis exposita & in ignem projecta, sed nil læsa, gladio demum percussa migravit ad Cælum: & expressius Græci in Menol. Basilii eadem die his verbis: Tatiana Martyr temporibus Alexandri Imperatoris ex antiqua Roma fuit, patre dote ac nobili, ac tertium Præfesto nata: Cùm autem Diaconissa esset, Fidem Christi Populum docendo, multos ab Idolis avocabat. Quare ad Imperatorem delata, missis satellitibus comprehensa coram ipso sistitur: qui illam secum in Fanum Idolorum adductam adorare Idola compellebat. Sancta verò orans Idola ad terram dejecit comminuitque. Quamobrem in facie caditur, oculisque effosis in equalem aëra dilaniatur, & ad cutem capite foudetur. Tum in ignem projecta sed nihil læsa, bestiis exponitur, à quibus erepta, capite demum Imperatoris jussu plectitur.* Sanctum quoque Pontianum Papam unà cum Philippo Presbytero sub Alexandro fuisse in Sardiniam relegatum, habetur in Martyrol. Rom. 19. Novembris.

VII. Hæc omnia difficilia creditu efficiunt, quæ de Alexandri in Christianos propensione supra enuntiavimus. Omnia tamen componi & conciliari possunt, si attendatur, quod cum diximus, Alexandrum in Christianos propensum fuisse, non intendimus, eum ejuratis Idolis Christianam Fidem amplexum fuisse, sed potius voluisse Christi cultum cum cultu Idolorum conjungere, Christum quidè cultu dignum judicando, sed non

solum. Idedque Christianos quidem esse patiebatur, nec ut cæteri Imperatores exterminare in animo habebat; sed quia Ethnicus, suum honorem etiam Idolis servari volebat. Et ideo in suo Iarario non solum Christum colebat ut Deum, sed & Apollonium, Abraham, & Orpheum. Ita Lampridius in Alexandro: *Mauritinis horis in Iarario suo, in quo & Divos Principes & optimos electos, & Animas sanctiores, in quibus & Apollonium (Thianæum) & Christum & Abraham & Orpheum: & hujusmodi Deos habebat, ad Majorum effigies rem Divinam faciebat.* Et post multa subdit: *Christo Templum facere voluit; eumque inter Deos recipere: quod & Hadrianus cogitasse fertur.* Qui ergo alios Deos præter Christum colebat, non mirum, si in Christianos, qui aliorum Deorum cultum publicè detestabantur, animadvertit: sicut Hadrianus licet Templum Christo erigere cogitaret, adhuc tamen Christianorum sanguinem fudit, non quia Christum colerent, sed quia aliorum Deorum cultum negarent.

VIII. Accedit, quod, ut notat Baronius ad ann. 226. num. 4., præfatæ Martyrum clades non ab Imperatoris genio prodierunt, sed earum artifices fuerunt Jurisconsulti illi, quibus curam Urbis demandaverat, & quorum justitiæ plus nimio confidebat. Hi enim odio, quo in Christianos ferebantur, ad eorum necem procedebant, Imperatoris jussu se id facere jactantes. Inter hos præcipuus fuisse creditur Domitius Ulpianus Præfectus; nam in die natali quorundam Martyrum nomen ejus ut Persecutoris insigniter notatur, ut videre est in S. Quiriaci 23. Augusti, ubi legitur: *Ad hostia Tiberina Sanctorum Martyrum Quiriaci Episcopi, Maximi Presbyteri, Archelai Diaconi & Sociorum, qui sub Ulpiano Præfecto tempore Alexandri passi sunt.* Iste igitur cæteri que Jurisconsulti cladum præfatarum architecti erant, sive Christianos coram Imperatore falsis criminibus onerantes; sive etiam ejus auctoritate abutentes, spargebant jussu ejusdem fieri, quæ eo non mandante & fortè nec sciente, ipsi faciebant. Cæterum quomodocumque fuerit, Alexandro imperante, etiam non aperta Persecutio, integra tamen pax præsertim Romæ Christianis non fuit. Post tresdecim Imperii annos & dies novem, ætatis verò 29. occisus conspiratione Militum Alexander obiit anno Christi 237. secundum Baronium, at 235. secundum alios.



§. II.

Initia & exitus Persecutionis.

I. **O**cciso igitur, ut dictum est, Alexandro, Julius Maximinus Thrax genere, humili loco, barbaris parentibus, quorum unus erat ex Gothia, alter ex Alanis, qui etiam necis Alexandri auctor fuisse traditur, favore Militum Imperium invasit, quod tenuit annos tres. Homo truculentus Imperii initia cædibus scævavit, & præcipuè eorum qui Alexandri Ministri & de Familia fuerant, inter quos multi Christiani erant. Ita Eusebius L. 6. hist. cap. 27., ubi de Maximino ad Imperium assumpto, *Qui, inquit, gravi odio succensus adversus Familiam Alexandri, in qua plerique erant Christiani, persecutione excitatus, solos Ecclesiarum Antistites, utpote Evangelicæ prædicationis auctores, interfici jussit.* Porro omnes Alexandri Ministros à Maximino variè occisos esse testatur Julius Capitolinus dicens: *Ceteros etiam sine judicio, sine accusatione, sine delatore, sine defensione omnes interemit, omnium bona sustulit, & plusquam quatuor millibus hominum occisis, se satiare non potuit.*

II. Idèò autem Persecutionem in Pastores Ecclesiarum præcipuè movit Maximinus, quia cum videret Religionem Christianam longè latèque toto Imperio, imò toto Orbe diffusam, convelli impossibile & Romano Imperio damnosum esse, excoGITAVIT priùs tollere Pastores, sperans, iis tanquam ingentis molis fundamentis convulsis, totam machinam illicò collapsuram. Sed nesciebat impius ille, Christianæ Religionis fundamentum non esse Ministros seu Pastores homines, sed unicum esse Jesum Christum, contrà quem nec ipse nec omnes inferorum portæ essent prævalituræ.

III. Aliæ autem causæ subortæ fuerunt, quæ Persecutionem ad omnes Christianos extenderunt. Una fuit in Occidente & Romæ. Cum enim ex liberalitate præcedentium Imperatorum concessum esset, ut in Solemnis ipsorum Milites laureâ coronâ capite redimiti incederent, quidam Miles se præsentavit Tribuno coronam manu gestans, cum ceteri eam gestarent in capite: interrogatus autem, cur ita faceret, respondit se esse Christianum, nec licere sibi tali coronâ coronatum incedere. Quo audito Miles ille suo sanguine rubricatus rapitur in carcerem. Excitata autem controversiâ etiam inter Christianos, an reverà non liceret Christiano sic coronatum incedere, Tertullianus par-

partes Militis suscipiens, Librum de Corona Militis conscripsit. Si hoc factum, ut aliqui volunt, initio Imperii Maximini contigit, valde credibile est, illius odium aliis in animo conceptum adversus Christianos accendisse.

IV. Alteram causam Persecutionis Oriens ministravit. Gravissimi terræmotus Orientis oras exagitarunt: quæ mala Gentiles soliti erant adscribere Christianis; putantes quod cum isti Deos suos non colerent sed contemnerent, Divi irati his vel aliis cladibus Orbem sæpè concuterent. Ita censuit Origenes Lib. 3. contra Celsum dicens: *Qui nostram omnibus modis doctrinam calumniantur, existant, causam tantæ, quæ nunc est, veram perturbationis eam esse, quod Fidelium numerus increverit, nec eos profligandos curent Præsides, ut superioribus temporibus factitatum.*

V. Apertiùs autem ad rem præsentem Firmilianus Cæsareæ in Cappadocia Episcopus olim Origenis Discipulus Epist. 75. inter Ep. Cypriani: *Aute, inquit, viginti & duos fere annos, temporibus post Alexandrum Imperatorem, multa isthic consuetudines & pressuræ acciderunt, vel in commune omnibus hominibus, vel privatim Christianis: terræ etiam motus plurimi & frequentes extiterunt, ut per Cappadociam & per Pontum multa subruerent: quedam etiam Civitates in profundum receptæ dirupto soli biatu devorarentur, ut ex hoc Persecutio quoque gravis adversum nos Christiani nominis fieret. Quæ post longam retrò ætatis pacem repente oborta, de inopinato & insueto malo ad turbandum Populum nostrum terribilior effecta est.* Quibus apparet, eum loqui de Persecutione oborta post pacem sub Alexandro, & proinde de ea, quæ sub Maximino Fideles afflixit.

VI. Hanc Persecutionem sextam appellant Eusebius in Chron., S. Augustinus L. 18. de Civit. cap. 52., & Orosius L. 7. cap. 19.: Sulpitius tamen Severus L. 2. hist. cap. 46. eam Persecutionum numero non accenset, sed solum dicit Maximinum aliquarum Ecclesiarum Clericos vexasse. Postquam enim de Persecutione sub Severo locutus fuit, ait: *Interjectis deinde annis octo & triginta pax Christianis fuit, nisi quod medio tempore Maximinus nonnullarum Ecclesiarum Clericos vexavit.* Est enim Persecutio hæc ad sola Ecclesiarum Capita immediatè fuisset directæ, omnes tamen alios inferiores Ministros, qui docebant Verbum vel in eo partem habebant comprehendebat; imò & in aliquibus Provinciis omnes indiscriminatim Christiani ad necem quærebantur Proconsulum crudelitate & Populorum odio. Id præcipuè in Cappadocia contigisse sub Sereniano Præside, te-

his est Firmilianus Ep. 75. supra citatâ, ubi ait : *Severianus tunc fuit in nostra Provincia Præses acerrimus & dictus Persecutor : in hac autem Persecutione constitutis Fidelibus, & hac atque illuc Persecutionis metu fugientibus & Patrias suas relinquentibus atque in alias partes Regionum transeuntibus &c. . Omnes ergo Fideles ibi Persecutori suberant, quamvis non generaliter : ideòque dabatur locus ad alias Regionem transeundi, ut Firmilianus ibi subjungit.*

VII. Porro est à Maximino excitata Persecutio nec generalis nec diuturna fuerit, quia solum triennalis, eam tamen fuisse sævissimam ex barbari hominis natura, poterit quisque colligere : *Tam crudelis fuit* (inquit Julius Capitolinus in Maximino) *ut illum alii Cyclopem, alii Busiridem, alii Scironem, nonnulli Phalarim, multi Typhonem vel Gygem vocarent. Senatus eum tantum timuit, ut vota in Templis publice privatimque mulieres etiam cum suis liberis facerent, ne ille unquam Urbem Romam videret. Audiebat enim alios in crucem sublatos, alios animalibus nuper occisis inclusos, alios feris objectos, alios fustibus elisos : atque omnia hac suæ delectu dignitatis &c. Et infra. Sed cum Romani ejus crudelitatem ferre non possent, quòd delatores evocaret, accusatores immitteret, crimina fingeret, innocentes occideret, damnavet omnes quicumque in judicium venissent, ex ditissimis hominibus pauperimos faceret, nec aliunde nisi malo alieno pecuniam quærerent : deinde sine delicto Consulares Viros & Duces multos interimeret, alios Scythicis vehiculis exhiberet, alios in custodia detineret, nihil denique prætermitteret, quod ad crudelitatem videretur operari : contra eum defectionem paravit. Talem Capitolinus Maximinum describit erga suos, ac suæ superstitionis cultores : qualem ergo putabimus eum fuisse, & quantâ severità egisse in Christianos ?*

VIII. Deus tamen, qui sic disposuerat, ut alternis vicibus Ecclesia aliquandù in pace quiesceret, aliquandù bello exerce-
retur, ne, ut ait Origenes lib. 3. contra Celsum Fideles in pace soluto essent animo aut mollitiæ se traderent : neque Mundo bellum eis indicente desponderent animum, & à Deo in Jesu Christo diligendo deficerent : sicut post 24. & ultra annos, quibus post Severum eam pace frui concesserat, Maximinum adversus eam armavit : ita ablato post triennium persecutore, quietem ei benignus indulgit. Generali enim totius Orbis adversus sævum tyrannum commotione excitatâ, dum Aquilejam obsidione incastum tentaret, ipse cum filio Maximino à propriis militibus interemptus fuit anno 239. vel 238., ut alii volunt.

§. III.

Martyres sub Maximino.

I. IN hac persecutione non multi numerantur Martyres; siue quia vix triennio duravit; siue quia (ut notat Baronius ad ann. 237. num. 14.) magna pars eorum, qui sub Julio Maximino passi sunt, errore Scriptorum sub Galerio Maximino vel Maximiano successoribus passi ponuntur. Celebriores subijciemus.

Primus sit S. Pontianus Papa. Hujus Pontificatus initia creduntur fuisse pacifica, quia sub Alexandro Imperatore: licet ut §. precedente notavi, Martyrologium Rom. 19. Novembris supponat eum cum Philippo (Hyppolito alii) Presbytero fuisse sub Alexandro missum exulem in Sardiniam, aliquā potius calumniā circumventum quam Christianæ Religionis causā, ut putat Pagi in Brev. Rom. Pont.: probabilius tamen censetur ab aliis, relegatum fuisse sub Maximino anno 235. vel 237., eodemque anno defunctum. Cum enim Maximini furor præcipue in Ecclesiæ Pastores defaveret, credibile est eum in Caput Ecclesiæ primò irruisse. Quo autem mortis genere obierit, non est certum. Fustibus fuisse mactatum, censeat Mart. Rom., & ex eo Baronius & Pagi citatus, Liber Pontificalis Bucherij dicit, quòd obiit *discinctus*; sed quid sibi velit hoc nomen *discinctus*, non satis constat: alius Liber Pontificalis habet *maceratus* & *fustibus afflictus defunctus est*: quidquid tamen sit, Martyr obiit, postquam sedisset annos quinque menses tres & dies septem: cujus postea corpus navigio è Sardinia deportatum, à Fabiano Papa Romæ in cœmeterio Callixti conditum fuit. Ei in Pontificatu successit Anterus natione Græcus, qui cum mensem unum & tredecim dies sedisset anno 236. 3. Januarii sub Maximino coronam martyrii accepit; quòd nimirum gesta Martyrum diligenter à Notariis exquisivisset, & in Ecclesia recondidisset, reverà tamen quia Christianorum Pastor erat: hos enim ex dictis Julius Maximinus sibi specialiter proposuerat exterminandos. De eo agit Mart. Rom. 3. Januarii.

II. Sub eodem Maximino passj quoque seruntur Transaquis SS. Cæsydius & Socii, de quibus Martyrol. Rom. 31. Augusti *Transaquis in Maris ad Lacum Fucinum Natalis Sanctorum Martyrum Cæsidi Presbyteri & Sociorum, qui in persecutione Maximini martyrio coronati sunt*: Transaquæ oppidum est Aprutii propè Lacum

cum Fucinum (vulgò di Celano). Baronius in Notis ad Mart. hinc maternum genus se trahere dicit, & horum Martyrum Reliquias in dies miraculis coruscare testatur. Reate quoque in Umbria passus fuit S. Ruffinus Marforum Episcopus cum sociis, de quibus die 11. Augusti. Ruffinum hunc patrem fuisse S. Gessidii, idem Baronius ex antiquis Monumentis se collegisse dicit, sociosque ejus in martyrio, quo capite cæsi sunt Reate, fuisse Sionem, & Alexandrum.

III. Martyribus sub Maximino inferi solet S. Barbara Virgo, de qua utraque Ecclesia 4. Decembris Festum celebrat: Græca tamen in Menol. eam sub Maximiano collocat. Circa locum passionis non una sententia est. Nam quidam in Tuscia, quidam Heliopoli, plures Nicomediæ passam fuisse autumant. Et hanc sententiam, sicut & quòd sub Julio Maximino Martyr obierit, utpotè communioem libentiùs amplector, etiam quia Martyrol. Romano conformem; ubi dicitur 4. Decembr. *Nicomedia passio S. Barbaræ Virginis & Martyris, quæ in persecutione Maximini post diram carceris macerationem, lampadarum adustionem, mamillarum præcisionem, atque alia tormenta, gladio martyrium consummacit.* Multa eaque varia tam circa locum quàm circa tempus martyrii, tam apud Latinos quàm apud Græcos Acta circumferuntur. Ejus historia legitur in Orat. de S. Barbara Jo: Damasceno tributa, quæ extat tom. 2. Novæ Edit.: sed hæc narrat, eam sub Maximiano, & Heliopoli passam fuisse. Baronius tamen in Notis ad Mart. 4. Decemb. dicit, se habere Acta fideliora, quorum est exordium: *Post Imperatorem Alexandrum Maximinum &c., & subinde sub Maximino Alexandri successore eam passam fuisse testantur.*

Hoc maximè confirmant, dum ajunt, eam ab Origene sacris litteris fuisse imbutam. Hoc enim posito, sub Maximiano passam fuisse S. Barbaram admitti non potest: quia cùm Origenes mortuus fuerit circa annum 254., & Maximianus imperio potitus non fuerit nisi anno 284.; si eo imperante passa fuisset, non potuisset ab Origene sacris litteris imbuta fuisse, cùm adhuc juvenula passa fuerit. Credibile igitur est, Origenem eam sacris litteris imbuisse circa ann. 230., dum adhuc esset Catholicus, sicque anno 236. Maximino imperante delatam à patre (ut ajunt) quòd esset Christiana, gladio percussa fuerit coronata. Porro quòd Origenes quàmplures mulieres in Fide Christiana instituerit, testatur Eusebius L. 6. Hist. cap. 4., ubi in Mulierum numero ponitur Herais; & cap. 4., ubi dicitur, quòd Origenes ætate juvenis non solum viris sed etiam feminis divina Fidei præcepta tradebat.

IV. Inter eos, qui in Maximini persecutione celebres confessione Fidei extiterunt, singularis fuit Ambrosius, vir divitiis & genere clarus, magnæ in aula Imperatorum æstimationis, & qui fortè primas in ea dignitates & officia gesserat. Uxorem habebat nobilem feminam nomine Marcellam, quam Origenes Epist. ad Africanum vocat fidelissimam, ex qua plures filios suscepit. Cùmque fratres ac sorores etiam haberet, sororem nomine Tatianam ei tribuit Origenes Tract. de Oratione: feminam ornatissimam & fortissimam appellat; nisi fortè, ut aliqui dubitant, hæc eadem fuerit ac Marcella ejus uxor.

Vir erat Ambrosius scientiarum ac veritatis amantissimus, & in Christi Fidem valdè propensus, sed quia non humili ac simplici corde sed elato eam quarebat, & plus sapere quàm oportet audebat, non inveniens apud Catholicos Scripturarum quæ sibi placerent Commentaria, in Acatolica oculos animumque convertit, factusque est hæreticus amplectens errorem sive Marcionis sive Noeti sive potius Valentini, ut putat Eusebius L.6. cap.18. Verum de Veritate à Veritate ipsa convictus, quæ Origenis ministerio ad plures ab errore revocandos utebatur, ei ut Magistro adhæsit, suâ liberalitate etiam à rerum inopia quâ premebatur eum sublevans: *Per idem tempus* (inquit Eusebius citato loco) *Ambrosius, qui Valentini hæresim sectabatur, veritatis quam predicabat Origenes virtute convictus, & quasi lumine quodam menti irradiante collustratus, ad rectæ fidei quæ in Ecclesia predicatur professionem transiit.* Hoc contigisse creditur anno circiter 222., Alexandro imperante. Veritatis agnoscendæ adeò cupidus fuit Ambrosius, ut ipso excitante plures conscripserit libros Origenes; ad quem utpotè Orationis amantissimum Libellum de Oratione dedit.

V. Hoc duplici Veritatis & Orationis præsidio munitus Ambrosius totum se in pietatis opera effundebat: & quamvis in honore ac divitiis positus, omnia tamen propter Deum contemnebat, adeò ut famâ virtutum ejus evulgatâ ad Diaconatus Ministerium in Ecclesia Alexandrina promotus fuerit, & ipsum Origenes vocet virum sanctum, & Deo verè dicatum. Ab eo excitatus & largis subsidiis adjutus Commentarios in S. Scripturas edidit; unde Eusebius L.6. cap.23. *Ex eo tempore, inquit, etiam Origenes in divinas Scripturas commentarios cœpit conscribere; Ambrosio innumeris stimulis eum incitante, nec solam verbis atque hortationibus, sed etiam largissimis rerum necessariarum præbitionibus. Quippe septem & amplius notarii dictanti illi præsidē aderant, qui præstituto tempore sibi per vices succedebant: nec pauciores*

Antiquarii simul cum puellis elegantius scribere assuetis: quibus omnibus necessarios sumtus copiose subministrabat Ambrosius.

VI. Ambrosium Athenas ivisse supponit S. Hieronymus Epist. 18. modò 45. ad Marcellam, & inde ad Origenem litteras dedisse circa annum 228.: imò & Nicomediae cum ipso fuisse, quando ad Julium Africanum Epistolam de Susannæ Historia dedit, colligitur, quia in eadem Africanum Origenes salutat nomine Ambrosii, Marcellæ uxoris & filiorum: *Salutat te*, inquit, *qui diſtandæ Epistolæ ſuis adjutor, quique integram recenſens, quæ voluit correxit, Dominus meus & frater Sanctus Ambrosius. Salutat te quoque fidelissima ejus conjux Marcella unâ cum liberis*: quibus apparet quanti faceret Ambrosium Origenes, dum Scripta sua ei tradebat corrigenda. Imò cùm Alexandriam reverſus Origenes super Evangelium Joannis laborare cœpiſſet, Opus hoc Ambrosio inſcripſit ac dedicavit, testatus ſe precibus ejus & mandato illud aſſuſiſſe.

VII. Hactenùs Ambrosii pietas & Christianæ Veritatis zelus in pace floruerat: ejus firmitas & constantia igne persecutionis examinanda erat. Interfecto Imperatore Alexandro, qui tredecim annis regnaverat, Maximinus ejus ſucceſſor, ut ſcribit Eusebius L. 6. cap. 28. in Alexandri familiares, quorum maximâ parte Christiani erant, & in eos qui Verbum Christi voce vel ſcripto docebant, ſævam persecutionem excitavit. Præ cæteris quærebat Origenem teſte Oroſio L. 7. cap. 19.: ſed Deus, qui pro ipſo Martyrii coronam non paraverat, ſeſe occultandi Cæsareæ in Cappadocia per biennium viam aperuit. Captus quidem fuit Ambrosius unâ cum Proteſteto Cæsareæ in Palæſtina preſbytero: quo comperto Origenes Librum de Exhortatione ad Martyrium compoſuit, ad eosque direxit, quò in persecutione fortiores perſisterent. Ita Eusebius citato loco his verbis: *Quo tempore (Persecutionis Maximini) Origenes librum de Martyrio compoſuit, quem Ambrosio & Proteſteto Caſariensis Eccleſiæ preſbytero dedicavit; eò quòd uterque in ea persecutione non mediocriter diſcrimen ſubierat. Unde & maximam gloriam ob confeſſionem Nominis Christi ambo retuliſſe perhibentur, cùm Maximinus non plus quàm triennii ſpatium perduraſſet.*

VIII. In utramque Maximinus deſeviit, ſed in Ambrosium præſertim divitiis aſſluentem, & generis nobilitate ubique ſpectatiſſimum. Bona utriusque diripuit, & Fiſco adjudicavit: omni ignominia genere depreſſit, ſecum quaſi villa mancipia in modum victoriæ & triumpho trahens per Provincias & Urbes, ad quas ipſe ibat, ut coram Magiſtratibus tanquam rei traducti pu-
dore

dore suffunderentur. Sed generosi athletæ nedum non erubescabant, sed gloriabantur, quoniam digni habiti sunt pro Nomine Jesu contumeliam pati. Ut enim ait Origenes laudato libro Exhort. ad Martyr. num. 36. *Nec eo tantum certandum est, ne negemus, sed ne omnino erubescamus, cum Dei hostes turpia pati nos existimant; & maxime si cum tu sacer Ambrosii plurimis civitatibus honorifice habitus & exceptus sis, nunc in pompa ceu victima ducaris portans Crucem Jesu, eumque sequens, qui te ad Præsides & Reges precedat, ut tecum ipse incedens, ipse os tibi det & sapientiam: tibi quoque certaminis ejusdem socio Proteſteto &c.* His Origenes Ambrosii robur confirmat.

IX. Multò autem emicuit Ambrosii fortitudo, quâ propter Christum uxorem filiosque contemserit, eosque suo exemplo ad similia pro Christo patienda provocavit. In hoc secutus etiam Origenis seu veriùs Christi monitum ibidem num. 37. dicentis: *Sicut autem ut in vitam æternam custodiatur anima, odio nobis habenda est; sic uxorem & liberos & fratres & sorores odio habeto tu qui hæc habes, ut iis quos oderis utilis sis, eo ipso quòd odio illos habueris, acceptâ eis bene faciendi potestate, Dei scilicet amicus factus.* Subindè num. 38. ad ejus filios conversus: *Scio, inquit, quia filii Ambrosii estis, & si filii Ambrosii estis, opera Ambrosii facite: & fortassis facient, plus à te post hujusmodi discessum adjuvati, quàm si cum illis remanisses.*

X. Deus tamen Ambrosium & Proteſtetur Fidem suam confessione sui nominis, & tolerantia manifestasse contentus, ab extremo ipsis imminente vitæ periculo eripuit, siue tyranni crudelitatem compeſcendo, siue generali tunc insurgente Populi seditione, siue aliâ viâ nobis ignotâ, unde voluit eos Martyres animo & voluntate, non tamen opere. Quare Philippo imperante adhuc vixisse fertur Ambrosius, & cum tunc Libros adversus Celsum Origenes conscripserit (ut Eusebius L. 6. cap. 36.) probabile est, Ambrosium ei materiam ministrasse; & fortè etiam Librum ipsum Celsi contra Christianos, rogando ut eum confutaret, suppeditasse. Post hæc parùm vixit Ambrosius. Origeni præmortuum putat S. Hieronymus L. de Script. Eccles. cap. 56.: unde cum Origenes anno 253. sub Gallo obierit, fit, ut Ambrosius vivere desierit sub Decio anno 250., S. Hieronymus dicit citato loco eum à multis fuisse reprehensum, quòd vir locuples amici sui senis & pauperis (Origenis) moriens recordatus non sit. Quamvis hoc potius amoris, quo erga paupertatem Origenes afficiebatur, quàm Ambrosii oblivioni deputandum videatur.

XI. Hujus Ambrosii nomen in Martyrologio quidem Romano non recitatur, legitur tamen in multis Martyrologiis antiquis, ad diem 17. Martii Alexandriae, ut videre est apud Bollandum 17. Martii; ubi ponitur tanquam illius Ecclesiae Diaconus, & Confessione Nominis Jesu Christi illustris; & in uno eorum qualitate Martyris notatur. S. Hieronymus hunc Ambrosium ponit inter Scriptores Ecclesiasticos c. 56. quia licet nonnisi quasdam Epistolas ad Origenem conscripserit, hujus tamen *industriam sumtu & instantia, & ad hunc Origenes infinita dictavit volumina*. Fuit etiam elegantis ingenii; unde Origenes ipse scripta sua ejus judicio, & correctioni subijciebat. De eo agit etiam Cave in hist. Litteraria.

CAPUT IX.

De Persecutione Decii.

§. I.

Status Ecclesiae initio Imperii Decii.

I. **A**ssumfit Decius Imperium tempore, quo, ut ex Sulpitio Severo dictum est L. 2. hist. cap. 45., triginta & octo annis, nimirum à morte Severi anno 211. usque ad exitum Philippi Imperatoris anno 249. à generali saltem Persecutione fuerat immunis. Estò enim sub Maximino ex di-
 ctis Ecclesiae pax turbata fuerit; brevis tamen fuit, nec generalis, siue quoad loca siue quoad personas fuit turbatio, quam præcesserat quies sub Alexandro, & perfectior secuta fuerat sub Gordiano, & maximè sub Philippo Decii prædecessore. Is enim, nedum Christianis propitius fuit, sed si aliquibus Eusebio duce credimus, Christianae Fidei nomen dedit. Is namque L. 6. hist. cap. 34. ita scribit: *Interea cum Gordianus sex totis annis Romanum Imperium administrasset, Philippus unà cum Philippo filio in ejus locum successit. Hunc utpotè Christianum, fama est, in postrema Paschæ vigilia precationum in Ecclesia participem simul cum reliquo Populo fieri voluisse, sed Episcopum qui tunc Ecclesiae præerat, non prius illi aditum permisisse, quam confessione n scelerum fecisset, iisque qui humanitatis lapsi fuerant, & in poenitentium ordine stabant, sese adjunxisset. Quippe ob multa quæ commiserat crimina, nunquam omnino ab Episcopo admissus fuisset, nisi id prius fecisset. Et Imperator quidem libenter obtinuisse dicitur, sincerumque ac*
reli-

religiosum affectum timoris Dei operibus ipsis declarasse. Episcopus iste fuit Babylas Antiochenus . Et factum hoc narrat Chronicon Alexandr. , & Chrysost. Orat. in S. Babylam . Ubi vide Lector, & severam illorum temporum disciplinam non admittentem in Ecclesiam vel Imperatorem ipsum , nisi exactâ publicè poenitentia , & Imperatoris obedientiam Episcopo id præcipienti humiliter obtemperantis .

II. Scio ab aliquibus, & factum negari, & insuper Philippum Imperatorem fuisse Christianum : sed horum Recentiorum auctoritas Veterum testimonio prævalere non debet, cui ex Modernis accedunt plures, inter quos Baronius ad annum 246., Alexandre hist. Eccles. secul. 3. cap. ultimo num. 10. asserens, ex Origenis Epistolis ad præfatum Principem ejusque Uxorem datis Eusebium hoc accepisse : quas in laudem Origenis usurpat etiam Vincentius Lirinensis Commen. 1. num. 17. dicens : *Sed & ejusdem Epistolæ testimonium perhibent, quas ad Philippum Imperatorem, qui primus Romanorum Principum Christianus fuit, Christiani magisterii auctoritate conscripsit.* Quibus ad stipulantur Orosius L. 7. cap. 13., Cathodorus in Chron., S. Prosper in Chron., Abbas Uspergensis &c., Martyrologia Usuardi, Adonis, & Romanum die 14. Maii ubi de S. Pontio Martyrè in Galliis dicunt : *Cujus prædicatione & industria, postquam duo Philippi Cæsares ad Fidem Christi conversi sunt, ipse sub Valeriano & Gallieno principibus Martyrii palmam adeptus est.*

III. Neque ob stare potest, quòd profanorum Scriptorum nemo Religionis mutationem in Philippo criminetur : quòd Idolorum Tempia diruissè, Ecclesias erexissè, Leges pro Christianis tulissè, ut fecit postea Constantinus, non legatur : & quòd post mortem inter Divos cum filio relatus est . Nam hæc solum probant, quòd non publicè sed occultè dumtaxat Christianam Religionem professus sit, ut Christiani scirent quidem eum esse Christianum, Ethnici tamen eum adhuc esse Gentilem præsumerent, quòd eorum Sacra ritusque pateretur . Nec aliter illorum temporum conditio fieri permittebat . Nam si cœpisset aliquid contra Ethnicos ritus moliri, Senatus Exercitus Populus Romanus insurrexissent, & adversus ipsum & Christianos atrocem Persecutionem excitassent . Sic ergo Ecclesiæ rebus utilior erat . Addo, quòd Ethnicorum silentium probat illum Gentilitatis superstitionibus nuntium remisissè . Cum enim annum conditæ Urbis millesimum solemnibus ludis ab eo celebratum referunt, non memorant Sacrificia ab eo falsis Diis oblata, nec aditum ex veteri more Capitolium . Quod animadvertens Orosius

L.7. cap.13.: *Ità, inquit, ludis magnificis angustissimus omnium prætorum hic natalis annus à Christiano Imperatore celebratus est. Nec dubium est, quin Philippus hujus tantæ devotionis gratiam & honorem ad Christum & ad Ecclesiam reportarit: quoniam vel accensum fuisse ab eo Capitolium immolatasque ex more hostias, nullus Auctor ostendit. Porro cum teste Eusebio L.6. cap.39. Philippus septem annis imperaverit, incertum est, quo anno Imperii Christianam Fidem amplexus. Hæc pro eruditione dicta sint.*

IV. Verùm ad rem nostram revertendo, hæc pax ex parte quidè Christianis profuit: nam in diversis Provinciis erectæ fuerant Ecclesiæ, & alicubi Idolorum Altaria ac Tempa cœperant everti, ac Fides toto Orbe crescebat, cujuscumque conditionis hominibus eam amplectentibus. Nec deerant Viri zelo sanctitate & doctrina illustres, qui pace ad gloriam nominis Christi promovendam uterentur. Aderat Cyprianus, aderant Dionysius Alexandrinus Gregorius Thaumaturgus Alexander Hierosolymitanus & Firmilianus Cæsareæ in Cappadocia Episcopi: in Ordine Presbyteratus aderat Origenes Cæsareæ in Palæstina adhuc vivens, Pionius Smyrnensis, alique Spiritu Apostolico repleti, Prophetico lumine & miraculorum gratiâ exornati.

V. Nihilominus inter hæc lumina umbræ ac tenebræ permixtæ erant. Pacis tranquillitas Evangelicum rigorem in multis laxaverat, qui quærebant quæ sua sunt, non quæ Jesu Christi. Hanc fuisse causam, quæ Deum movit ad purgandam Persecutione Ecclesiam, scribit S. Cyprianus L.de Lapsis: *Dominus probari Familiam suam voluit: & quia traditam nobis divinitus disciplinam pax longa corruperat (quæ à Severo ad Decium 38. annis duraverat) jacentem Fidem & penè dixerim dormientem, censura cælestis erexit: cùmque nos peccatis nostris amplius pati mereremur, clementissimus Dominus sic cuncta moderatus est, ut hoc omne quod gestum est (in Persecutione Decii quæ tunc cessaverat) exploratio potius quàm Persecutio videretur. Studebant autem patrimonio singuli, & oblitii quid credentes, aut sub Apostolis ante fecissent, aut semper facere deberent, insatiabili cupiditatis ardore ampliandis facultatibus incubabant. Non in Sacerdotibus Religio devota, non Ministris fides integra, non in operibus misericordia, non in moribus disciplina. Et infra: Episcopi plurimi, quos exhortamento esse oportet cæteris & exemplo, derelictâ Cathedrâ, Plebe desertâ, per alienas Provincias oberrantes negotiationis quæsuosæ nundinas nuncupari. Hæc & alia, quæ ibi S. Martyr deplorat, & quæ purgatione indigebant, pax longæva in Ecclesiam seu verius Dæmon invexerat.*

VI. Por-

VI. Porro hanc Ecclesiæ vexationem prænuntiata in visione (& fortè ipsi Cypriano) antea fuissè, refert Epist. 8. his verbis : *Nec venissent Fratribus hæc mala, si in unum fraternitas fuisset animata . Nam & illud offensus est , quòd sederet Pater familias sedente sibi ad dexteram Juvene , qui Juvenis anxius & cum quadam indignatione subtristis , maxillam manu tenens mæsto vultu sedebat . Alius verò in sinistra parte consistens rete portabat , quòd se mittere , ut circumstantem Populum caperet , minabatur ; & cum miraretur quid hoc esset ille qui vidit, dictum est ei , Juvenem qui ad dexteram sic sederet , contristari & dolere , quòd præcepta sua non observarentur ; illum verò in sinistra exultare , quòd sibi daretur occasio , ut à Patre familias potestatem sumeret sæviendi . Hoc prius longè offensus est , quàm tempestas vastitatis hujus oriretur . Et videmus impletum quòd fuerat offensus , ut dum Domini præcepta contemnimus , dum datæ Legis mandata salutaria non tenemus , facultatem nocendi inimicus acciperet ; minùs armatos & ad repugnandum minùs cautos jactu retis operiret . Oremus instanter & assiduè precibus ingemiscamus &c. .* Hæc Cyprianus de suo tempore laxatâ disciplinâ : quæ an ad nostra tempora referri possint , & ad mala quæ undique nos circumstant, judicet quisque : Excutiamus itaque (dicit Cyprianus) somni vincula , & instanter ac vigilanter oremus .

§. II.

De Initiiis Persecutionis , de Lapsis & Libellaticis .

I. Volens igitur Deus & Christianorum relaxationes corrigere & Servorum suorum constantiam in Fide probare , permisit , ut occiso Veronæ Philippo & ejus filio Romæ, Decius invaderet Imperium , & accenso quo ferebatur odio adversus Philippum ; & maximè quia videbat eo imperante Romanas superstitiones neglectas , & Religionem Christianam miris progressibus propagaram , sevam Persecutionem intulit Ecclesiæ , Edictis contra Christianos toto Orbe evulgatis .

II. Observandum tamen censeo ex Dionysio apud Eusebium L. 6. cap. 41. , auno integro ante Decium , imperante adhuc Philippo Principe benignissimo , ideòque absque ejus Edicto , cœptam fuissè Alexandriæ Persecutionem . Eam excitavit quidam Vates seu Hariolus adversus Christianos Gentiliam turbas accendens : *Ab hoc igitur homine stimulati omnesque ad patranda scelera licentiam nati (inquit Dionysius) banc solam pietatem culturaque Dæmoniorum suorum existimabant , fixædibus adversus*

nostros scirent. *Primum itaque senem quemdam Metram nomine correptum, impia verba proferre jubent. Quod cum ille abnueret, fustibus hominem verberantes, & acutis arundinibus vultum ejus oculoque pungentes deductum in suburbium lapidibus obruerunt.*

Post hæc Fidelem quamdam Mulierem Quintam nomine ad Idoli Templum perductam adorare illud coegerunt. Quod cum illa aversaretur atque execraretur, constrictis pedibus eam per totius Civitatis vicos aspero silice constratos rapientes, saxis illisam molaribus, flagris insuper verberantes, ad suburbium ibidem abducunt, ibique lapidibus interficiunt.

Omnes deinde uno impetu in domos Christianorum irruere cæperunt: & quos quisque sibi vicinos noverat, eos illicd properantes agebant spoliabant ac diripiebant; ea quidem quæ maximè pretiosa essent in sinum suum congerentes; viliora autem & lignea quæque disjiciebant ac per vias concremabant; captæ ab hostibus Urbis speciem atque imaginem exhibentes. Fratres verò declinabant & subducebant se fugâ, ac direptionem bonorum suorum perinde ac illi, de quibus Paulus testificatus est, cum gaudio exceperunt. Nec eorum quisquam, quod equidem sciam, nisi fortasse unus aliquis in illorum manus incidens hætenùs quidem Deum negavit.

III. *Sed & admirandam illam provectæ jam ætatis virginem Apolloniam tunc comprehenderunt: & maxillas quidem ejus verberantes, cunctos ei dentes excusserunt. Accenso autem extra Urbem rogo, minabantur vivam se illam combusturos, nisi anà cum ipsis impia verba pronuntiaret. At illa veniam deprecari paulisper visa atque interim dimissa, celeriter in ignem insiliit & conflagravit.*

IV. *Præterea Serapionem quemdam cum in adibus suis deprehendissent, acerbissimis tormentis excruciarunt, & membris omnibus confractum ex cænaculo præcipitem dejecerunt. Porro nusquam non per viam publicam non per angiportum incedere aut noctu aut interdià nobis licebat; cum omnes ubique & assidue clamitarent, quicumque impia illa verba proferre abnuisset, eum illicd tradendum esse & flammis ultricibus absumendum. Hætenùs Dionysius, qui horum spectator fuit. Ex quibus apparet, SS. Apolloniam & Serapionem non sub Decio Martyrium obiisse, ut supponit Martyrol. Rom. 9. Februarii & 14. Novembris, sed in extremis diebus Imperii Philippi, Decio nondum Imperium adepto.*

V. *Cessatâ autem occasione Belli civilis Persecutione, & Christianis parumper respirantibus, occiso Philippo Decii furor eos iterum invasit. Rem Dionysius ita prosequitur. Sed continuò Imperii illius erga nos benignissimi (Philippi) mutatio nobis nuntiata est: & gravissima nobis minarum terror intentabat. Jamque*
ade-

aderat Edictum Imperatoris (Decii), illud ipsum ferè quod à Domino nostro prædictum est, horrificum ac terribile exhibens, adeo ut ipsi etiam electi si fieri posset scandalum paterentur. Omnes certè mirum in modum exterriti sunt. De hoc Edicto par est credere, Origenem, qui multa tunc passus fuit, locutum fuisse homil. 9. in Josue circa finem, ubi ait: *Convenerunt Reges terræ Senatus Populusque & Principes Romani, ut expugnarent nomen Jesu & Israel simul. Deceverunt enim Legibus suis, ut non sint Christiani. Omnis Civitas omnis Ordo Christianorum nomen impugnat. Sed sicut tunc omnes illi Reges convenientes contra Jesum nihil facere potuerunt: ita vel Principes vel Potestates ista contrariæ, ut non Christianorum genus latius ac profusius propagetur, obtinere non valerunt. Scriptum namque est (Exod. i. v. 12.) quia, „quantò magis eos humiliabant, tantò magis plures fiebant & invalescebant valdè,,: Confidimus autem, quia non solum non nos poterunt obtinere visibiles inimici & adversarii nostri, verùm etiam velociter Jesu Domino nostro vincente conteretur Sathanas sub pedibus servorum ejus.*

VI. Hæc Origenes & exemplo suo comprobavit. Nam ut refert Eusebius L. 6. cap. 39.: *Quæ & quanta Origeni in ea Persecutione acciderint, & quis horum omnium exitus fuerit, dum pessimus Dæmon omnes adversus illum copias instantiis movet, cunctisque machinis ac viribus eum impugnat, & in hunc præ reliquis omnibus, qui tunc temporis appetiti sunt, præcipuè irruit. Quæ item & quanta propter doctrinam Christi vir ille pertulerit, vincula scilicet & corporis cruciatus, & in intimo carceris recessu ferrei torquis ærumnas, ut multorum dierum spatio pedes in nervo ad quatuor usque foraminum interstitia distenti fuerint: ad hæc ignium minas & quæcumque alia ab inimicis illata fortiter sustinuit. Mortem tamen non pertulit, iudice omni virium nisi ambitiosè contendente, ne illum interficeret. Multa similiter passus cum sociis fuit Dionysius Alexandrinus, quæ ipse narrat apud Eusebium L. 6. cap. 40.*

VII. Non tamen in omnibus eadem constantia fuit. Decii Edictum contra Christianos in Prætorio promulgatum & in Capitolio affixum tumultu ac pavore totam Urbem replevit. Transmissum ad omnes Provincias Præsidibus & Magistratibus sub gravissimis pœnis injungebatur, ut Christianos undique conquisitos vel Idola adorare cogerent vel atrociter cruciatis interficerent. Hinc ubicumque ad terrorem parata ac erecta supplicia, gladii, unci, crates igne ardentes, equulei, cruces, bestię, & quidquid barbara crudelitas meditari potest, ut hæc oculis Christianorum objecta, vel solo visu eos deciderent, eorum-

que constantiam frangerent. Omnes junctis animis in Christianos conspirabant. Quidam eos denuntiabant, Pater filium, filius patrem, frater fratrem, maritus uxorem; quidam eos qui se absconderant inquirebant, alii fugientes insequerentur, alii eorum bona occupabant. Ne spe mortis allicerentur, poenas & cruciatu protrahebant: carcere diu detentos ad diversa supplicia trahebant, quæ tamen vitam non eriperent, ut lassatâ sensum patientiâ Martyres vincerentur, & si fieri posset, ut vitantes temporalia corporis, in æterna animæ supplicia incidere non formidarent. *Voti tunc Christianis erat* (inquit Hieronymus in Vita Pauli) *pro Christi nomine gladio percusi. Verùm hostis callidus tarda ad mortem supplicia conquirens, animas cupiebat jugulare non corpora, & ut ipse qui ab ipso passus est, Cyprianus ait, volentibus mori, non permittebatur occidi.*

VIII. Hujus præter exemplum, quod supra dedi in Origene, duo alia subjicit S. Hieronymus ibidem his verbis: *Perseverantem igitur in Fide Martyrem, & inter equuleos laminaeque victorem jussit melle perungi, & sub ardentissimo Sole, ligatis manibus post tergum resupinari, scilicet ut muscarum aculeis cederet, qui ignitas sartagine ante superasset. Alium juvenili ætate florentem in amœnissimos hortulos præcepit adduci. Ibique inter lilia candentia & rubentes rosas, quum leni juxta murmure aquarum serperet rivus, & molli sibilo arborum folia ventus perfringeret, super extructum plumis lectum resupinari, & ne se inde posset excutere, blandis serpentorum nexibus irretitum relinqui. Quo cum recedentibus cunctis meretrix speciosa venisset, cæpit delicatis stringere colla amplexibus. Et, quod dictu quoque scelus est, manibus contrèctare virilia: ut corpore in libidinem concitato, se victrix impudica superjaceret; Quid ageret Miles Christi & quò se vertere nesciebat. Quem tormenta non vicerant, superabat voluptas. Tandem cælitus inspiratus præcisam morsibus linguam in osculantis se faciem expuit; ac sic libidinis sensum succedens doloris magnitudo superavit. Hoc factum tamen sub Diocletiano evenisse, vel aliud simile, refert Nicephorus L. 7. hist. cap. 13.*

IX. Ex dictis colliges, Persecutionem hanc omnium fuisse sævissimam, quia animas magis quàm corpora perdere conabatur. Duplicem hanc victoriam celebrat Martyrol. Rom. die 28. Julii his verbis: *Thebaide in Ægypto commemoratio plurimorum Sanctorum Martyrum, qui in Persecutione Decii & Valeriani passi sunt, quando Christianis optantibus pro Christi nomine gladio percusi, callidus hostis tarda ad mortem supplicia conquirens, animas cupiebat jugulare non corpora: ex quorum numero post equuleos, la-*
mi-

minas ac sartagines superatas, melle perunctis, ligatis manibus post tergum, sub ardentissimo Sole facorum ac muscarum aculeis expositus fuit: alius inter flores molliter victus, cum ad eum impudicissimum scortum venisset, ut in libidinem concitaret, præcisam morsu linguam in blandientis faciem expuit.

X. Hosce tamen multorum triumphos aliquorum defectio functavit, qui antea cuncta pace in mollitiem versi, territi suppliciorum atrocitate, ne temporalia amitterent, æterna contemserunt. Tales Alexandria fuerunt illi, de quibus Dionysius apud Eusebium L.6. cap.41., ubi describens confusionem & pavorem Edicti atrocitate conceptum: *Multi quidem, inquit, ex illustrioribus statim præ metu accurrerunt. Alii, qui rem publicam administrabant, ipsa actuum suorum necessitate pertracti veniebant. Alii nobis & familiaribus adducebantur: & nominatim citati ad impura & profana sacrificia accedebant: nonnulli quidem pallidi ac tremebundi, quasi non sacrificaturi, sed ipsi potius victimarum loco Idolis immolandi essent. Adeo à circumstante multitudine deriderentur; quippe qui palam omnibus ostenderent, se tum ad moriendum, tum ad sacrificandum pusillo animo esse. Alii verò promtius ad aras accurrebant audacter affirmantes, nunquam se antea Christianos fuisse. De quibus verissime prædixit olim Dominus, ejusmodi homines agrè salutem consecuturos. Ceteri autem partim alterutros eorum quos diximus sequebantur; partim se in fugam dabant: partim comprehendebantur. Ex quibus nonnulli cum usque ad vincula & custodiam progressi essent; quidam etiam plusculos dies in carcere perstitissent, prius tamen quam in judicium inducerentur, Fidem ejurarunt. Nonnulli verò cum aliquandiū tormenta fortiter sustinissent, ad reliqua, quæ intentabatur supplicia, animos desponderunt. His deplorat Dionysius lapsus suorum qui Alexandria defecerunt.*

XI. Nec minùs deplorabilis fuit multorum similis casus in Africa. Propterea S. Cyprianus scripsit Librum de Lapsis, ubi reddita jam Ecclesiæ pace laudat stantium in Fide constantiam, & deinde summo dolore Lapforum ruinas deslet, quarum causam fuisse dicit disciplinæ neglectum, & peccata Fidelium, & graviter increpat Lapfos, quòd ad prima statim verba minantis inimici Idolis sacrificarint, & non potius propriæ imbecillitatis conficii juxta Christi præceptum secesserint. Imò quòd aliqui non expectaverunt saltem ut interrogati negarent, ut thus accenderent apprehensi. Ante aciem multi victi, siue congressione prostrati; nec hoc sibi reliquerunt, ut sacrificare Idolis viderentur in viis. Ultrò ad forum currere & ad mortem spontè properare, quasi hoc olim cape-

rent, quasi amplecterentur occasionem datam, quam semper optä-
sent . . . Nonne quando ad Capitolium spontè ventum est, quando
ultrò ad obsequium diri facinoris accessum est, labavit gressus, cali-
gavit aspectus, tremuerunt viscera, brachia conciderunt? Nonne
sensus obstupuit, lingua hæsit, sermo defecit? Stare illic potuit Dei
Servus & loqui & renuntiare Christo, qui jam Diabolo renuntiabat
& seculo? Nonne Ara illa, quo moriturus accessit, rogus illi fuit?
Nonne Diaboli Altare, quod fœtore tetro fumare ac reólere conspe-
xerat, velut funus & bustum vitæ suæ horrere ac fugere debebat?
Quid hostiam tecum miser, quid victimam supplicaturus imponis?
Ipse ad Aras hostia, víctima ipse venisti. Immolasti illic salutem
tuam, spem tuam, fidem tuam funestis illis ignibus concremasti.
Hisce zelo ac dolore percussus miseris illis desertionem suam ex-
probrat S. Cyprianus.

XII. Multorum desertionem toto ferè Orbe luxit Ecclesia.
Inter quos medii fuere quidam, qui Christum ejusque Fidem
profiteri, & propter Ipsum tormenta & mortem pati metuentes,
ex alia autem parte Idolis sacrificare repugnantes, secretò per
se vel per alium magistratus adibant, eisque significabant, se
Christianos esse, nec sibi permitti ad Altaria Idolorum sacrifi-
catus accedere, eosque rogabant, ut acceptâ pecuniâ digna-
rentur ipsos eximere ab opere sibi illicito perpetrando. Qui sub-
inde à Magistratu Libellum obtinebant, quo declarabatur, eos
renuntiassè Jesu Christo; quamvis hoc reverà non fecissent, qui
Libellus publicè legebatur. Et qui hæc inter Christianos facie-
bant, *Libellatici* vocabantur, seque ac suos hisce libellis à Satel-
litum audacia & furore tuebantur. Quibus apparet, Libellaticos
non purè pretium erogassè, ut à vexatione & periculo exime-
rentur; sic enim crimine rei ab Ecclesia non reputabantur, sicut
nec illi qui fugâ elabebantur, ut decernit S. Petrus Alexandri-
nus Can. 12., licèt Alexandre secul. 3. dist. 5. contrarium sen-
tiat; sed ulterius vel Magistratibus obtulisse ut aliqui volunt,
vel ut veriùs existimo accepisse à Magistratibus libellos,
quibus declarabantur mandatis Cæsaris sacrificando paruisse,
licèt hoc non fecissent, imò se facere non posse declarassent: hi
enim non sinè gravi scandalo & injuria Christi publicè appare-
bant Fidem ejus negasse, quamvis eam corde retinuissent & re-
tinerent: ideòque ab Ecclesia ut criminis, licèt non tam gravis
ac illorum qui sacrificaverant, rei agnoscebantur, nec sinè pu-
blica pœnitentia admittebantur.

XIII. Ita S. Cyprianus, quo nemo tutior testis quia coæ-
vus, Epist. 52. ad Antonianum, ubi arguens quosdam, qui Li-
bel-

bellaticos cum Sacrificatis æquari oportere dicebant , postquam inter eos etiam qui sacrificaverunt diversos gravitatis gradus distinxit : *Cùm ergo*, inquit, *inter ipsos qui sacrificarint multa sit diversitas , quæ inclementia est & quam acerba duritia Libellaticos cum iis qui sacrificaverint jungere ? Quando is , cui libellus acceptus est , dicat : Ego prius legeram & Episcopo tractante cognoveram non sacrificandum Idolis , nec simulacra Servum Dei adorare debere : & idcirco ne hoc facerem , quod non licebat (cùm occasio libelli fuisset oblata , quem nec ipsum acciperem nisi ostensa fuisset occasio) ad Magistratum vel veni vel mandavi : Christianum me esse , sacrificare mihi non licere , ad Aras Diaboli me venire non posse , dare me ob hoc præmium , ne quod non liget , faciam . Crimen enim Libellatici hoc erat (saltem regulariter) non quòd Christum negaret , sed quòd acceptaret libellum , quo publicè declarabatur , eum renuntiassè Christo , etsi reverà non renuntiassèt . Quia ut Clerus Romanus in Epist. 31. , quæ est apud Cyprianum , scribit : *Non est Romanus à scelere , qui ut fieret imperavit , nec est alienus à crimine , cujus consensu , licèt non à se admissum crimen , tamen publicè legitur . . . & qui vult videri propositis adversùs Evangelium vel Edictis vel Legibus satisfecisse , hoc ipso jam paruit , quòd videri paruisse se voluit .* Hinc fit , quòd puri Libellatici antequam libellum acciperent , coram Magistratu Christum non negaverint , sed solum consenserint , ut eos negasse in libello scriberetur ; licèt aliter sentiat Baronius ad ann. 253. num. 21. ; & propterea minùs gravi penitentià ab Ecclesià recipiebantur .*

§. III.

Quorundam Lapsorum Punizio .

I. **E**X narratis plurium Christianorum in Persecutione lapsibus , cuiquam fortè in mentem venerit , infirmari argumentum , quod in præsens tractamus de Veritate Religionis Christianæ ex sui augmento , & suorum in Persecutionibus constantia : sciat tamen , quisquis sit iste , in Religione Christiana dum adhuc versatur in terris non omnes esse aurum , sed aliquos fœnum , sicut autem ignis aurum quidè purgat & probat , fœnum autem comburit & consumit ; ita in Ecclesiæ Persecutione accidere . Ubi verò pauci , qui fœnum erant , igne Persecutionis pavore combusti in cineres abierunt , multò plures , de quibus infra , impavidi cum S. Augustino in Psalm. 127. dicebant : *Quid enim mihi facere potuerunt , quia expugnaverunt me a ju-*
ven-

ventute mea,, ? *Exercuerunt me, non oppreſſerunt. Valuerunt mihi ſicut ignis ad aurum, non ſicut ignis ad ſænum. Ignis enim accedens ad aurum ſordem tollit: accedens ad ſænam in cinerem vertit.* „Etenim non potuerunt mihi, quia non conſenſi, quia non me fecerunt quales ſunt ipſi. . . . Fecerunt, quod tolerem, & non fecerunt cui conſentirem. Sciat etiam ex eodem S. Auguſtino Enarrat. 2. in Pſalm. 29. quòd Perſecutio occultâ diſpenſatione Providentiæ Dei in alium permittitur ad pœnam, in alium permittitur ad probationem, in alium permittitur ad coronam. Ad pœnam, quomodo permiſſi ſunt allophyli ideſt alienigenæ capere Populum Iſrael, quia peccaverunt in Deum: ad probationem autem permiſſus eſt Diabolus in Job; probatus eſt Job, conſuſus eſt Diabolus: ad coronam vero permiſſi ſunt Perſecutores in Martyres; occiſi ſunt Martyres, quaſi viciſſe ſe arbitrati ſunt Perſecutores: illi in manifeſto falſò triumpharunt, illi in occulto verè coronati ſunt.

II. Iis ergo, qui in Perſecutione Martyrium quidè non paſſi, ſed exilio mulſati bonis omnibus ſpoliati, fortes in Fide permanſerunt, Perſecutio permiſſa fuit ad probationem ſicut Job. Iis qui tormenta ac mortem pro Chriſto ſtrenuè ſubierunt, permiſſa fuit ad coronam. Iis verò, qui terrena ac vitam ne perderent lapſi fuerunt Fidem abnegantes, permiſſa fuit in pœnam, quia Fidei quam profitebantur opere non reſpondebant. Aliquorum tamen miſertus Deus fecit, ut ſi ſecuti fuerant Petrum negantem, ſequerentur etiam pœnitentem; & hos debitâ ſatisfactione perſolutâ Eccleſia benignè ſuſcipiebat, & de his ſcripſit S. Cyprianus L. de Lapſis, & Canones loquuntur. Qui verò ſemel in Apoſtaſiam lapſi in ea perſiſtebant, præter æternas pœnas, quibus addiſcerant, ſenſibilibus etiam pœnis ad aliorum terrorem Divinam indignationem in ſe interdum experiebantur.

III. Iſtiusmodi terrifica exempla aliqua ipſiusmet Cypriani verbis Lib. de Lapſis producam: *Unus ex his, qui ſpontè Capitolium negaturus aſcendit, poſtquam Chriſtum negavit, obmutuit. Pœna inde cepit, unde cepit & crimen; ut nec rogare jam poſſet, qui verba ad precandam miſericordiam non haberet.*

Alia in balneis conſtituta . . . illic ab immundo ſpiritu imman-da correpta cecidit, laniavit dentibus linguam, quâ fuerat vel paſta impie vel locuta. Poſtquam ſcleratus cibus ſumtus eſt, in perniciem ſuam rabies oris armata eſt. Ipſa ſui carniſex extitit, nec diù ſupereſſe poſtmodum potuit, doloribus ventris & viſcerum cruciata deſecit.

Præſente ac teſte me ipſo, accipite quid evenerit. Parentes fortè fugientes, dum trepidi minùs ſibi conſalunt, ſub nutricis alimen-

to parvulam filiam reliquerunt ; relictam Nutrix detulit ad Magistratus . Illi ei apud Idolum quod Populus consuebat , quoddam carnem necdum posset edere per atatem , panem mero mixtum , quod tamen & ipsum de immolatione pereuntium supererat , tradiderunt . Recepit filiam postmodum Mater ; sed facinus puella commissum tam loqui & indicare non potuit , quam nec intelligere prius potuit nec arcere . Ignoratiōe igitur obreptum est , ut sacrificantibus nobis eam secum mater inferret . Sed enim puella mixta cum Sanctis , precis nostrae & orationis impatiens , nunc ploratu concuti , nunc mentis aestu capitis fluctuabunda jactari , & velut torture cogente , quibus poterat indicibus conscientiam facti in simplicibus adhuc annis rudis anima patebatur . Ubi verò solemnibus adimpletis calicem Diaconus offerre praesentibus cepit , & accipientibus ceteris locus ejus advenit , faciem suam parvula instinctu Divinae Majestatis avertere , os labiis obturantibus premere , calicem recusare . Perstitit tamen Diaconus , & reluctanti licet de Sacramento calicis insudit . Tunc sequitur singultus & vomitus . In corpore atque ore violato Eucharistia permanere non potuit . Sanctificatus in Domini Sanguine potus de pollutis visceribus erupit : tanta est potestas Domini , tanta majestas . Secreta tenebrarum sub ejus luce detecta sunt , Sacerdotem Dei nec occulta crimina sefellerunt . Hoc circa infantem , quae ad eloquendum alienum circa se crimen necdum habuit atatem . Ex hac narratione colligitur , veterem Ecclesiae consuetudinem fuisse , ut completo Sacrificio Calix per Diaconos omnibus praesentibus etiam pueris & infantibus , in Africa saltem , dispensaretur . Prosequitur Cyprianus .

At verò ea , quae atate provectā & in annis adultioribus constituta , sacrificantibus nobis lateenter obrepit , non cibum , sed gladium sibi sumens , & velut quadam venena letbalia inter fauces & pectus sanguinem admittens , angi & animā exaestuante concludi postmodum cepit . Et pressuram non jam Persecutionis , sed delicti sui passa , palpitans & tremens concidit .

Et cum quadam arcam suam , in qua Domini Sanctum fuit , manibus indignis tentasset aperire , igne inde surgente deterrita est , ne auderet attingere . His indicatur alia veteris Ecclesiae consuetudo , quā liberum erat unicuique Corpus Dominicum in Ecclesia consumere , aut domum asportare . Et alius , qui & ipse maculatus , Sacrificio à Sacerdote celebrato , partem cum ceteris ausus est lateenter accipere , Sanctum Domini edere & contrectare non potuit : cinerem ferre se apertis manibus invenit . Documento unius ostensum est , Dominum recedere cum negatur ; nec inmerentibus ad salutem prodesse quod sumitur , quando gratia salutaris in cinerem

rem sanctitate fugiente mutetur . Hactenus Cyprianus .

IV. Quia verò aliqui ad hæc & similia nihil territi dicere poterant : Et nos renuntiavimus Christo , Idolis sacrificavimus , libellos accepimus ; quid autem nobis accidit triste ? Propterea ad hos conversus Cyprianus ait : *Unusquisque consideret , non quid aliud passus sit , sed quid pati & ipse mereatur . Nec evasisse se credat , si eum interim pœna distulerit ; cum timere plus debeat , quem sibi Dei iudicis censura notavit . Nec sibi quo minus agant penitentiam blandiantur , qui etsi vesandis Sacrificiis manus non contaminaverunt , libellis tamen conscientiam polluerunt : & illa professio denegantis contestatio est Christiani , quod fuerat , abnuentis , fecisse se dixit , quidquid aliud faciendo commisit .*

§. IV.

Martyres Alexandria .

V. **F** Levinus perditionem aliquorum , qui tanquam fœnum combusti Persecutionem ut pœnam experti sunt . Modò celebrandus est triumphus eorum , qui in Persecutione tanquam aurum probati sunt , & quibus Persecutio cessit in coronam . Sequar ergo Dionysium , qui recensitis miseris illis , qui Christum abnegavere (apud Euseb. L.6. cap.41.) subjungit : *Verùm Beati illi ac stabiles columnæ Domini , ab ipso confirmati , & Fidei suæ robori congruentem & ex aquo respondentem vim atque constantiam nati , admirabiles Regni illius testes effecti sunt .*

- VI. Et primò quidè exhibet Julianum senem , qui podagræ doloribus adeò constrictus erat , ut nec stare posset , nec incedere . Is unà cum duobus , qui ipsum portabant , adductus est . Quorum unus statim negavit ; alter verò nomine *Cremon* cognomine *Eunus* & ipse Julianus Christum confessi , camelis insidentes , ac flagris verberati per totam Alexandriam circumducti , tandem ardentissimo igne circumfusi totius Populi multitudine consumti sunt . Interea Miles quidam nomine *Befas* , qui ipsis dum ad supplicium ducerentur adstabat , & insultantes Martyribus cohibebat , conclamante adversus eum Populo in jus adductus est , ubi pro Christo strenuè se gerens securi percussus . Horum certamen colit Martyrol. Rom. die 27. Februarii , & de eo agunt Beda , Usuardus , Ado , Nicephorus L.5. cap.30. & alii .

VII. Secundò exhibet alium oriundum ex Lybia & vocabulo *Macar* seu *Macarium* , qui à Judice sollicitatus , ut Christum ne-

ga :

garet , cùm numquam flecti potuiffet , vivus comburitur . Is forte idem Macarius eft , quem cum Coronione , Juliano & aliis tredecim , Alexandria ſub Decio paſſum Martyrol. Rom. die 30. Octobris commemorat .

VIII. Tertiò exhibet Epimachum & Alexandrum , qui poſt diuturnum carcerem ferreas ungues flagra ac alia tormenta vivæ calcis incendio conſumti ſunt . His adjungit quatuor mulieres *Ammonariam* , *Mercuriam* , *Dionyſiam* & alteram *Ammonariam* . Prima earum princeps & antefignana Virgo præclara , diutiſſimè torta propterea quòd palàm prædixerat , nihil eorum , quæ Judex juſſerat , prolaturam ſe eſſe , cùm in promiſſione conſtans maneret , ad ſupplicium ducta eſt : cùmque puderet Judicem ſe à Femina victum fuiſſe , timens , ne ſibi idem accideret , ſi reliquas tres tentaret , omnes gladio cædi imperat . De his Martyrol. Rom. die 12. Decembris ita loquitur : *Alexandria Sanctorum Martyrum Epimachi & Alexandri , qui ſub Decio Imperatore , cùm fuiſſent multo tempore in vinculis , & diverſis ſuppliciis affecti perduraſſent in Fide , ignibus tandem conſumti ſunt . Ibidem Sanctarum mulierum Ammonariæ Virginis , Mercuriæ , Dionyſiæ , & alterius Ammonariæ ; quarum prima in eadem Decii Perſecutione inauditis tormentorum generibus ſuperatis , ferro cadente beatum vitæ finem percepit : tres verò alie , cùm Judex à Feminis ſuperari erubeſceret , ac dubitaret , ne eadem in illas exercens cruciamenta , earum etiam conſtantiâ vinceretur , ſtatim juſſæ ſunt decollari . Vide Lector tantâ etiam Feminas à Deo in Fide conſtantiâ roborari , ut ipſi Perſecutores ſe ab illis vinci erubeſcant .*

IX. Quartò , idem Dionyſius ſubjicit *Heronem* & *Atrum* (ſeu *Arsenium*) & *Iſidorum* Egyptios , & cum illis *Dioſcorum* circa quindecim annos natum , qui omnes Judici oblati ſunt . Et cùm Judex primum ante alios adoleſcentem *Dioſcorum* partim ſermonibus ut flexibilem decipere , partim tormentis ut mollem ac tenerum cogere tentaviſſet : ille nec perſuaſionibus ceſſit nec tormentis . Reliqui crudeliſſimè verberati , cùm cruciatus fortiter ſuſtiniſſent , igni etiam ipſi ſunt traditi . *Dioſcorum* verò qui in omnium conſpectu inclaruerat , & qui ad interrogata ſapientiſſimè reſponderat , admiratus Judex dimiſit , ſpatium ſe illi ad pœnitentiam concedere affirmans ob ætatis infirmitatem . Et nunc nobiſcum verſatur divinus *Dioſcorus* in majus ac diuturnius certamen reſervatus . Ità Dionyſius ; ex quo iſdem ferè verbis Martyrol. Rom. 14. Decembris : ubi tamen , qui à Dionyſio dicitur *Ater* vocatur *Arsenius* .

X. Quintò addit Dionyſius : ſed & *Nemeſion* quidam etiam

ipse Ægyptius, primum quidem falsò accusatus fuerat tanquam socius & contubernalis latronum; postea verò cum apud Centurionem hanc calumniam à se utique alienissimam depulisset, delatus, quòd Christianus esset, ad Præfectum vinculus adducitur. At ille iniquissimus Judex, postquam eum duplò gravioribus, quàm reliquos latrones, tormentis ac verberibus affecisset, inter latrones iussit incendi. Et sic vir beatissimus similitudine Christi (qui unà cum latronibus pertulit crucem) honoratus est. Eadem ferè habet Martyrol. Rom. 19. Decembris.

XI. Quod sexto loco adducit gloriosius est, ait enim: *Porro universus simul Militum manipulus, Ammon scilicet, Zeno, Ptolemaeus, & Ingenuus, cumque illis senex Theophilus, ante Prætorium stabant. Et cum quidam ob Christianam Religionem in iudicium inductus, jam jamque negaturus Christum videretur, illi adstantes dentibus stridere, vultu innuere, manus extendere, ac totius simul corporis motus gestusque edere ceperunt. Cumque omnium in se oculos convertissent, priusquam ab aliquo comprehenderentur, ipsi ad subsellium accurrentes, Christianos se esse professi sunt. Quo facto Præfectus & Assessores, qui in consilio aderant, metu perterriti sunt. Ac rei quidè ipsi ad ea quæ perpeffuri erant promissimi & confidentissimi cernebantur. Iudices autem ipsi contremiscebant. Isti igitur ex Prætorio orantes processerunt, exultantes ob Fidei confessionem, cum Deus per ipsos gloriosè triumpharet. Quis hic Divinum quid non admiretur, quo concussi Iudices ipsi ad tantam horum Martyrum constantiam expavescunt? Hoc celebrat Martyrol. Rom. 20. Decembris.*

XII. Hic tamen victoriarum Christi finis non fuit (pergit Dionysius cap. 42.) *Sed & alii plures per Oppida & vicus à Gentilibus discepti sunt, ex quibus unum exempli gratià commemorabo. Ischyryon mercede conductus procurator erat cuiusdam Magistratum gerentei. Hic ab eo, cuius rem procurabat, iussus Idolis immolare, cùm minimè obtemperaret, primum injurià affectus est: postea cùm in eadem sententia perstaret, variis ab eodem vexatus est contumeliis. Quæ omnia cùm patienter sustineret, ille prægrandi fide correptà, transfixum per media viscera hominem interfecit. Jam quid opus est commemorare multitudinem eorum, qui in montibus, ac per solitudinem oberrantes, fame & siti, frigore ac morbis, latronum aut bestiarum incurfu oppressi interiere. Ex quibus hi qui supersueverunt incolumes testes sunt electionis illorum atque victoriæ. Quicum dumtaxat facinus ad declarandam rei veritatem hic adjiciam. Claremon erat quidam grandævus Nili Urbis Episcopus. Hic unà cum conjuge in Arabicum montem fugà delatus, non ulterius recessus est.*

est . Et Fratres quamvis accuratè omnia perscrutati , nec ipsos posthac nec eorum cadavera reperire potuerunt . De Ischyrlone & Charenone eadem habet Martyrol . Rom. 22. Decembris : de Charenone addens sequentia : In Ægypto Sanctorum Charemonis Episcopi Nilopolis & aliorum plurimorum Martyrum , quorum alii sæviente Decii Persecutione fugâ dispersi , in solitudinibus errantes , à bēstīs interempti sunt : alii fame , frigore ac labore , alii à barbaris & latronibus necati Martyrii gloria coronati sunt . Quibus colligit omnia , quæ Dionysius narrat .

XIII. Ex his omnibus apparet , quàm superabundanter plurimorum Alexandrinorum constantiâ compensaverit Deus infirmitatem aliquorum , qui ibidem metu Persecutionis conterriti Fidem quam Christo dederant non servaverunt . Imò ex his etiam plures Divinâ excitante Gratiâ ad Ecclesiam accurrentes humili pœnitentia substrati lapsum suum descentes ab ea suscipi postulabant . Cui indulgentiæ , licèt aliqui rigidiores præsertim Montanistæ refragarentur , Ecclesia tamen Catholica Deum imitata , servatâ disciplinæ ratione libenter annuebat .

XIV. Non pigeat iterùm audire Dionysium ita concludentem . *Ceterùm hi Divini Martyres , qui nunc assessores sunt Christi & Regni illius consortes ac Judicii participes undè cum ipso judicaturi* (nota , quòd licèt tunc aliqui Justorum gloriam ad diem Judicii differri autumarent ; Martyres tamen simul atque corporis vinculis soluti essent , ad Deum migrare & illius beatâ visione frui Christiani semper crediderunt . Ut ex Tertulliano L. de Resurr. Carnis cap. 43. , & L. de Anima cap. 55.) *Dum hic apud nos essent , quosdam è fratribus lapsos & Idolis sacrificasse convictos susceperunt : & conversionem illorum ac pœnitentiam cernentes , cum judicassent eam placere illi qui Peccatoris pœnitentiam mavult quàm mortem , eos admiserunt & collegerunt , atque in cætum suum receperunt ; & in orationibus ac cibo cum iisdem communicarunt . Quid ergo vobis , fratres , de his suadetis ? Quid nos agere debemus ? Virum sententiæ Martyrum accedemus , & rem ab aliis judicatam , seu potiùs gratiam concessam tuebimur : & cum iis , quos illi miseratione consecuti sunt benignè agemus ? An contra iudicium illorum irritum faciemus , nosque ipsi sententiæ illorum discussores ac iudices constituemus : clementiam dolore afficiemus : ordinem constitutum evertemus , Dei ipsius indignationem provocabimus ?* His Dionysius ostendit , Lapsos à Martyribus in communionem saltem privatam pœnitentiâ admissos , non esse rationabiliter ab aliis rejiciendos .

§. V.

Martyres in Africa.

XV. **Q**uemadmodum ut homines discerent sinè Dei Gratia nihil posse, permisit Deus, ut plures suis viribus nimium fidentes inter tormenta miserè laberentur: ita ut noscent, se Deo ipsos gratiâ suâ confortante omnia posse, alios plurimos in eum unicè sperantes tanto robore munivit, ut inter atrociora tormenta intrepidi triumpharent. Hoc Africa etiam experta fuit, & Cyprianus qui L. de Lapsis plurimum ruinas mortis deploravit, jubilo plenus aliorum fortitudinem celebrat Epist. 9. his verbis: *Exultolætus & gratulor, fortissimi ac beatissimi Fratres, cognitâ Fide ac virtute vestrâ, in quibus Mater Ecclesia gloriatur & nuper quidè cum confessione perstante suscepta pœna est, quæ Confectores Christi fecit extorres: confessio tamen præsens quando in passione fortior, tantò major & clarior in honore est. Crevit pugna, crevit & pugnantium gloria. Nec retardati estis ab acie tormentorum metu, sed ipsis tormentis magis estis ad aciem provocati: fortes & stabiles ad maximi certaminis prælium promptâ devotione proditis. Ex quibus quosdam jam comperi coronatos, quosdam verò ad coronam victoriæ proximos, universos autem quos agmine glorioso carcer includit pari ac simili calore virtutis ad gerendum certamen animatos, sicut esse oportet in Divinis castris Milites Christi; ut incorruptam Fidei firmitatem non blanditiis decipiant, non minâ terreant, non cruciatus ac tormenta devincant, quia major est qui in vobis est, quàm qui est in hoc Mundo. Et post multa loquens de jam coronatis ait: Quàm laetus illic Christus fuit, quàm libens in talibus Servis suis & pugnavit & vicit Protector Fidei, datus credentibus tantum, quantum se credit capere qui sumit: certamini suo adfuit, præliatores atque assertores sui nominis erexit, corroboravit, animavit; & qui pro nobis mortem semel vicit, semper vincit in nobis.*

XVI. Inter Martyres Cyprianus ibi Mappalicum celebrat, qui infracto animo inter tormenta Proconsuli dixit: *Videbis cras agnoscere.* Et quod ille dixit, Dominus implevit; nam sequenti die in promissi agonis certamine coronatus est. Nec pro se tantum Mappalicus hoc dixit, sed pro aliis in agone collegis suis: nec fefellit in promisso suo vox fidelis; pugnam quam spondit exhibuit, & palmam quam meruit cum aliis accepit. De eo Martyrol. Rom. 17. Aprilis sic: *In Africa natalis beati Mappalici*
Martyris.

Martyris, qui, ut scribit Sanctus Cyprianus in Epistola ad Martyres & Confessores cum aliis pluribus Martyrio coronatus est. Porro qui fuerint hi Mappalici in agone collegæ, cui potest ex Luciani Epistola inter Cyprianicas 22., in qua recenset sequentium nomina: Bassi in Peirario, Mappalici in questione, Pauli à questione (idest à tormentis quæ in questione pertulerat) Fortuna, Victorini, Victoris, Hereni, Credula, Herena, Donati, Firmi, Vennusti, Fructi, Julia, Martialis, & Aristonis, qui Deo volente in carcere fame necati sunt. Non tamen omnes eadem die cum Mappalico fuisse necatos, probabile est ex eodem S. Cypriano, qui citatâ Epist. 9., ubi asserit quosdam jam fuisse coronatos, quosdam verò ad coronam victoriæ proximos, ubi de Mappalico ut jam coronato loquitur. Nec est credibile, ex iis qui in carcere fame necati sunt, omnes eadem die obiisse.

XVII. Aliorum etiam in Africa Martyrum meminit S. Cyprianus Epist. 35. occasione Numidici Presbyteri, quem ob id maximè laudat his verbis: *Qui hortatu suo copiosum Martyrum numerum lapidibus & flammis necatum ante se misit, quique axorem adhaerentem lateri suo concrematam simul cum ceteris (vel conservatam magis dixerim) latus aspexit. Ipse semistulatus & lapidibus obrutus & pro mortuo derelictus, dum postmodum filia sollicito pietatis obsequio cadaver Patris inquireret, semianimis inventus & extractus & resocillatus à comitibus, quos ipse præmiserat, remansit invictus (sic disponente Deo in bonum Ecclesiæ.) Adjungi possunt Castus & Æmilius, quos, ut ipse ait L. de Lapsis, in prima congressione devictos, victores in secundo pralio reddidit, ut fortiores ignibus fierent, qui ignibus ante cessissent, & unde superati essent, inde superarent. De his Martyrol. Rom. 22. Maii, & Sanctus Augustinus sermonem habuit qui modò est 285. Alios prætereo, quos idem Cyprianus indicat, nempe Rogatianum Seniore & Felicissimum, qui primi omnium in carcerem trusi sunt, & quos sicut & aliquas Sanctas Feminas proponit in exemplum Epist. 81. edit. Pamelii; pluresque alios Cleri & Populi Carthaginensis Martyres, quos passim laudat, quales sunt Saturninus, Aurelius, Celerinus & alii. Hujus Celerini Avia Celerina, patruus & avunculus Laurentius & Ignatius jam antea gloriosum Martyrium consummarunt. Ita Epist. 34. dicens: *Nec rudis aut novus est in Celerino carissimo nostro titulus gloriarum; per vestigia cognationis suæ graditur, parentibus ac propinquis suis honore consimili Divinæ dignationis aquatur. Avia ejus Celerina jam pridem Martyrio coronata est. Item patruus ejus & avunculus Laurentius & Ignatius in castris & ipsi quondam seculari-**

ribus militantes ; sed veri & spirituales Christi Milites , dum Diabolum Christi confessione prosternunt , palmas à Domino & coronas illustri passione meruerunt .

XVIII. Omnes etiam Africa Regiones Persecutionem invasisse, testis est idem Cyprianus Epist. 77. ad Martyres in Metallo constitutos, ubi inter alios novem Episcopos recenset, multos Presbyteros Diaconos & alios cujuscumque sexus & ætatis, qui suorum Pastorum exempla imitati in confessione Fidei fortes persistebant : unde ad præfatos Episcopos conversus : *Exemplum, inquit, vestrum secuta multiplex Plebis portio confessa est vobiscum pariter, & pariter coronata est, connexa vobis vinculo fortissimæ caritatis, & à Præpositis suis nec carcere nec metallo separata . Cujus numero nec Virgines desunt , quibus ad sexagenarium fructum centenus accessit, quasque ad celestem coronam gloria geminata provexit . In pueris quoque virtus major ætate annos suos confessionis laude transcendit ; ut Martyrii vestri beatum gregem & sexus & ætas omnis ornaret .* Quin & in Epistola 69., quam ante conscripserat ad Pupianum, alios ex suis collegis fuisse proscriptos, alios in exilium asportatos, alios tandem fuisse animadversos refert : ibi enim post depulsas calumnias, quibus Pupianus quasi scrupulo fedè verè superbiam motus, cum eo communicare recusabat : *Quare in hunc scrupulum, inquit, non inciderunt tot Coepiscopi collegæ mei, qui vel cùm de medio recederent, proscripti sunt vel apprehensi in carcere & catenis fuerunt, aut qui in exilium relegati illustri itinere ad Dominum profecti sunt, aut qui quibusdam locis animadversi, coronas de Domini clarificatione sumserunt ?*

§. VI.

Martyres in Italia & Gallia .

I. Am ex Africa transeamus ad alias Orbis partes, in quas Decianæ Persecutionis gladius defævit . Primos igitur ictus sensit anno 250. Romana Ecclesia in suo Pontifice Fabiano. Is Romanus patriâ, parente Fabio non sine Divini afflatu Numinis ad Romanam Sedem post Anterum fuit evectus . Nam ut narrat Eusebius L. 6. cap. 29. : *Cùm Fratres omnes Successoris ordinandi causâ in Ecclesia essent congregati, ac plerique jam illustres aliquos & nobiles Viros eligendos esse conjicerent, de Fabiano quidè qui tum (ex agro enim venerat) præsens aderat, nemo ne tantisper quidè cogitabat . Columbam tamen repenti è sublimi delapsam capiti illius insedissee varrant, quæ Spiritus Sancti, qui olim sub*

sub columbæ specie in Servatorem descenderat, imaginem referre videbatur. Quo spectaculo permotus Populus, ac Divino Spiritu incitatus, summa cum alacritate uno consensu simul exclamare cepit, dignum esse: statimque comprehensum Sacerdotali Cathedra imposuit. Hic ex quatuordecim Romæ Regionibus duas septem Diaconis distribuit, ut singuli pauperum in eis existentium curam haberent, ac septem Subdiaconos statuit, super septem Notariis conscribendis Actis Martyrum destinatis; multaque alia præclare gessit. Tandem post 14. annos menses 10. dies undecim, quibus in Pontificatu vixit, inter primas Deciani furoris victimas Martyrio coronatus fuit; cum antea imperante Philippo Ecclesiam pacificè gubernasset. Ejus festum colitur 20. Januarii. Gladio fuisse cæsum aliqui putant.

II. Post Fabiani exitum Moyses & Maximus ejus Presbyteri, & Nicostratus Diaconus comprehensi in carcerem conjunguntur. Ita Damascus in Vita S. Fabiani dicens: *Post possessionem verò ejus Moyses & Maximus Presbyteri & Nicostratus Diaconus comprehensifunt & in carcerem missi.* Ad hos in carcere detentos Sanctus Cyprianus Epistolâ dedit, nempe 16. & 25. Quibus apparet mendacium Doduvelli, qui ut Decii mansuetudinem laudet, & paucitatem sub ipso Martyrum tueatur, asserit præcipuè Moysen carceris potiùs incommodis quàm novâ aliâ fœvitâ obiisse. Nam Cyprianus præfatis duabus Epistolis ad Moysen, Maximum & cæteros Confessores scriptis, & præcipuè decimasextâ, ubi de ipsis & aliis, qui in agonem consummaverant, ait: *Vos de Domini vinea pingues racemi, & jam maturis fructibus botri pressura secularis infestatione calcati, torcular vestrum carcere torquente sentitis. Vini vice sanguinem funditis. ad passionis tolerantiam furtes, Martyrii poculum libenter bauritis. . . . Beati satis qui ex vobis per hæc gloriarum vestigia commeantes jam de seculo recesserunt &c.. & infra: Quò longior vestra pugna, hæc corona sublimior. Agon unus sed multiplici prætorum numerositate congestus. Famem vivitis & sitim spernitis, & squallorem carceris ac receptaculi pænalis horrorem roboris vigore calcatis. Pæna illic subigitur, cruciatus obteritur, nec mors metuitur sed optatur &c.* Hæc Cyprianus.

De Moysæ Cornelius Papa veracior testis quàm Doduvellus, quia de visu in Epist. ad Fabium Antiochenum apud Eusebium Lib.6. cap.43. ait: *Moyses Beatissimus Martyr, qui nuper apud nos egregio & admirando Martyrio persunctus est.* De Maximo verò Urbano & aliis idem Cornelius ibi: *Maximus, inquit, Ecclesiæ nostræ Presbyter & Urbanus ambo ex Fidei confessione* egre-

egregiam jam secundò laudem adepti: Sidonius etiam & Celerinus; vir, qui cuncta tormentorum genera per Dei misericordiam fortissimè sustinuit, ut qui Fidei suæ constantiâ infirmitatem corporis sui roborans adversarium penitus debellavit. Hi fuisse creduntur Confessores, ad quos Epistolam decimam sextam dedit Cyprianus.

III. Romæ quoque sub Decio ponitur Martyrium SS. Abdon & Sennen Perfarum, qui (ut in Martyrol. Rom. 30. Julii) *sub Decio catenis alligati Romam adducti, pro Christi Fide primam plumbatis cæsi, deinde gladio interfecti sunt, anno 250. si tamen eorum Martyrium contigit præsentè Decio, ut aliqui volunt. Corpora horum in domo Subdiaconi nomine Quirini Romæ tumulata, ibi jacuerunt, donec eorumdem Martyrum revelatione sub Constantino in Cæmeterium Pontiani ad Ursam Pileatum extra Portam Portuensem translata sunt, ubi in pila in qua jacuerunt adhuc sculpta visitur imago Christi, Martyres coronantis (Bosius Rom. Subterr.).*

IV. Item Romæ sub eodem passâ fuit circa an. 253. S. Victoria Virgo, quæ (ut in Martyrol. 23. Decembris) *cùm esset desponsata Eugenio Pagano, & nec nubere vellet nec sacrificare, post multa facta miracula, quibus plurimas Deo Virgines aggregaverat, à Carnifice percussa est gladio in corde rogatu sui Sponsi. Anatolia pariter Virgo Romana, quam Victoriæ sororem aliqui censent, unâ cum Audace coronata legitur 9. Julii his verbis: In Civitate Thora apud Lacum Velinum (Diocesis Reatinæ prope Sabinos) passio Sanctorum Anatolia & Audacis sub Decio Imperatore, quorum Anatolia Christi Virgo, postquam plurimos per totam Picenî Provinciam variis languoribus affectos curasset, & in Christum credentes fecisset, jubente Faustiniانو judice diversis pœnarum generibus vexata, cùm ab immisso serpente liberata Audacem convertisset ad Fidem, novissimè extensis manibus orans gladio transverberata est. Audax quoque in custodiam datus sinè mora capitali sententiâ coronatur.*

Baronius ad ann. 253. num. 29. sentit, utrumque Thoram ad Lacum Velinum abductum ibi Martyrio fuisse affectum. His adjungit SS. Calocerum & Parthenium, quorum prior cùm esset Præfectus cubiculi uxoris Decii, alter verò alterius muneris primicerius (idest eo in munere primus) nolentes Idolis sacrificare, jussi sunt à Decio occidi. De his 19. Maii. Sed & Secundianus Valeriani Præfecti Assessor, necnon Marcellinus ac Verianus ab Urbe ad Centum-Cellas amandati, à Quadrato (seu Promoto) Consulari post alia tormenta gladio probati sunt die 9. Augusti. Fertur, hos fuisse ex præcipuis Persecutionis Mi-
ni-

nistris ; sed admirantes Christianorum constantiam , qui mallent immania pro Christo tormenta & mortem ipsam pati , quàm in deliciis superstites vivere , tacti à Deo intrinsecus & cogitantes aliquod altius bonum à Christiana Fide promitti , eam amplexos fuisse ac fortiter sustinuisse . Hos Ecclesiæ Centum-Cellarum , Toscanellæ & Corneti ut Patronos venerantur .

V. Tuscia quoque suos Martyres sub Decio obtulit Fidei : Florentia S. Miniatem , qui ex Milite Decii factus Miles Christi pro ipso gloriose certavit & vicit . Ita 25. Oct. legitur : *Florentiæ passio Beati Miniatis Militis , qui sub Decio Principe pro Fide Christi egregie certans nobili Martyrio coronatur* . Aretium quoque suos dedit Pergentinum & Laurentinum fratres , de quibus 3. Junii Martyrol. legit : *Aretii in Tuscia Sanctorum Martyrum Pergentini & Laurentini fratrum , qui in Persecutione Decii sub Tiburtio Præside , cum essent pueri post dira supplicia tolerata & magna miracula offensa gladio cæsi sunt* . Perusina Ecclesia pariter Felinum & Martinianum exhibuit : quos Martyrol. 1. Junii celebrat dicens : *Perusiæ Sanctorum Martyrum Felini & Martiniani Militum , qui sub Decio variis tormentis cruciati , Martyrii palmam gloriosâ morte perceperunt* . Et insuper sequentes , de quibus 5. Junii : *Perusiæ Sanctorum Martyrum Florentii , Juliani , Cyriaci , Marcellini & Faustini , qui in Persecutione Decii capite cæsi sunt* .

VI. Anagniniensis quoque Ecclesiæ Acta exhibent Magnum illius Episcopum , de quo 19. Augusti Martyrol. habet : *Anagninæ Sancti Magni Episcopi & Martyris , qui in Persecutione Decii necatus est* : item Sanctam Secundinam Virginem & Martyrem sub Decio passam , de qua 15. Januarii . Fulginatenenses exhibent Sanctam Messalinam & Sanctum Felicianum ibi sub Decio passos . De priori Martyrol. Rom. fileat ; de altero verò 24. Januarii hæc habet : *Fulginei Sancti Feliciani , qui à Victore Papa ejusdem Civitatis Episcopus ordinatus , post multos labores in ultima senectute sub Decio Martyrio coronatur* . Ravennatenenses etiam Tabulæ proferunt SS. Fuscam Virginem & Mauram ejus nutricem . Fusca igitur Virgo nobilis virtutem Jesu Christi in Martyrium alacritate dignoscens , quindecim annos ætatis agens ejus Fidem suscepit , ad eamque Mauram ejus nutricem traxit . Hoc cum Pater ejus rescivisset , domesticâ sed violentâ persecutione filiam à proposito detertere conatus fuit , sed frustra . Tandem ambæ ad Tribunal delatæ , Decio imperante , multa sub Quintiano Præside perpeßæ , demum gladio transfixæ Martyrium consummarunt : die 13. Februarii earum festum agitur .

VII. Illustrem Siciliam reddidit celebris S. Agathæ Catanæ passio, quam Martyrol. Rom. die 5. Februarii ita commendat : *Catanæ in Sicilia natalis S. Agathæ Virginis & Martyris, quæ temporibus Decii Imperatoris sub Quiniliano Iudice post alapas & carcerem, post equuleum & torsiones, post mamillarum abscissionem, post volutationem in testulis & carbonibus, tandem in carcere Deum precando consummata est.* Sub Decio quoque censent Recentiores aliqui, passos fuisse SS. Alphæum Philadelphum & Cyrinum in Sicilia : de his Martyrol. Rom. 10. Maii, & Græci eâdem die in Menol. Basilii his verbis : *Alpheus Philadelphus & Cyrinus Christi Martyres erant oriundi ex Regione Italiæ nobiles ac divites, filii Vitalis ejusdem Regionis Præfecti. Cum verò à quodam Onesimo Christiano pietatem didicissent & baptizati fuissent, Christum prædicabant.* Eo autem tempore Præfecto cum Imperatoriis litteris ab Urbe Roma in istam Italiæ Regionem amandato, ut Christianos omnes occidendos curaret ; ad ejus notitiam isti delati & comprehensi ac vinculis constricti, Romam missi sunt unà cum Onesimo & Erasmo aliisque Viris quatuordecim ad Licinium, à quo traditi Diomedis Præfecto Puteolos adducuntur. Et Onesimus quidem maximo ad pectus superimposito lapide spiritum emisit ; Erasmus verò cum reliquis quatuordecim capite plexus fuit. At prædicti tres in Siciliam missi ibidem interfeciti sunt. Scio hanc historiam Criticis quibusdam suspectam esse ; sed præfatos Martyres reverà extitisse, puto non negabitur.

VIII. Gallia quoque sub Decio Jesu Christo immolavit Sanctum Saturninum Tholosæ Episcopum, qui, ut Martyrol. Rom. 29. Novembris, temporibus Decii in Capitolio ejusdem Urbis (Tholosæ) à Paganis tentus atque à summa Capitolii arce per omnes gradus præcipitatus, capite collisi excussoque cerebro & toto corpore dilaniato dignam Christo animam reddidit. Notat hic Baronius, quòd non tantum Romæ erat Capitolium, sed & in aliis Urbibus ; Svetonius in Tiberio cap. 40. & in Cajo cap. 57. meminit de Capitolio Capuano ; S. Cyprianus Epist. 55. ad Cornelium Papam de Capitolio Carthaginensi, de quo etiam L. de Lapis ; S. Hieronymus L. de loc. Hebr. arcem Babylonix Capitolium appellat ; Conc. Eliberitanum Can. 5. prohibet, ne quis Christianus ad Idolum Capitolii sacrificandi causâ ascendat quæ non de Romano, sed de quolibet alio in Hispania constituto Capitolio intelligi debere nemo ambigit. Locum itaque in unaquaque Civitate præcipuum, ubi potissimum Gentilium superstitione colebatur, eandemque murorum ambitu permunitum, Capitolium dici consueville, ex dictis apparet.

Amaranthum etiam Gallia exhibuit, qui apud Albigensem Urbem fidelem pro Christo agonem consummavit, ut in Martyrol. 7. Novembris, de quo Beda, Ufuardus, Ado, & Gregorius Turonensis de Glor. Martyr. cap. 57. Bassum quoque Episcopum Nicæ apud Varum in Provincia, de quo Martyrol. 5. Decembris dicit: *Nicæ apud Varum fluvium Sancti Bassi Episcopi, qui in Persecutione Decii & Valeriani à Perennio Praside ob Christi Fidem equuleo tortus, laminis candentibus ustus, fustibus & scorpionibus cæsus, in ignem injectus, cum evasisset illæsus, duobus clavis confixus illustre Martyrium consummavit.* De S. Basilio Episcopo & Martyre adeest Sermo S. Jo: Chrysostomo tributus (Tom. 2. noviss. Edit. inter dubios) sed an de isto Episcopo Nicæ in Provincia, an de alio Nicæ in Bithynia Episcopo loquatur, incertum remanet.

§. VII.

Aliqui Martyres In Oriente.

1. **H**Ac Decii Persecutione quasi universali terræ motu tota per Romanum Orbem Ecclesia concussa est, adeout multi minùs stabiles terrore corruerint, ut supra dixi, alii verò multò plures in Fide Christi perstiterint; quorum triumphos prosequi in præfens curabo. Præter ergo jam recensitos ex Occidente, alios & quidè præclaros obtulit Oriens. Primus sit Babylas Episcopus Antiochenus, ille qui, ut supra §. 1. dixi, Philippum Decii præcessorem ingressu Ecclesia prohibuit, nisi prius pœnitentiâ peccata dilueret. Is ergo post gloriosam Christi confessionem (Eusebius L. 6. cap. 39.) in carcerem catenis oneratus detrusus, & ibi moriens, sic ut erat catenis vinctus sepeliri voluit. Cum eo quoquè mortui feruntur tres pueri ejus instructioni concrediti. Ita Martyrol. Rom. 24. Januarii. De S. Babyla sermonem habuit S. Jo: Chrysost., qui est tom. 2. novæ Editionis, ubi facit ipsum obtruncatum, aitque: *Cædi proximus vir Beatus cum ferro corpus suum sepeliri mandavit, docens, ea quæ ignominiosa videntur, cum propter Christum fiunt, honorifica & splendida esse.* Et infra: *Ne quis ergo Gentilium putaret, certamina per vim ac necessitatem committi, ipsa certaminum symbola cum corpore suo sepeliri jussit, ostendens ea sibi admodum grata & amabilia esse, quod totus penderet à caritate Christi.* Et jacent etiam nunc cum cineribus compedes, ut moneant omnes Ecclesiarum Præfatos, etsi vincula cadem & qualibet alia pati oporteat,

omnia alacriter & cum voluptate multa sustinenda esse.

II. Alter sit Alexander Episcopus Jerosolymitanus, de quo Eusebius L.6. cap.39. hæc refert: *In Palestina autem Alexander Jerosolymorum Episcopus rursus propter Christum ad Præsidis tribunal adductus est (quadraginta enim annis ante jam Episcopus sub Severo Christum fuerat confessus) cum ex secunda hac confessione magnam gloriam retulisset, Cæsareæ in carcerem conjectus est; vir decorâ senectute & venerandâ canitie conspicuus. Qui cum post præclaram atque illustrem Fidei confessionem in præsidiali Judicio editam tandem in custodia animam exalasset, Mazabanes in ejus locum Episcopus Jerosolymitanus renuntiatus est. Nota tamen; hunc Alexandrum ante fuisse in Cappadocia Episcopum, qui ad visenda Loca Sancta Jerosolymam veniens, cum Narcissus ejusdem Urbis Episcopus Ecclesiam valdè senex regeret, Narcisso & multis Clericorum ejus revelatum est, alterâ die mane intrare Episcopum, qui adjutor Sacerdotalis Cathedræ esse deberet. Itaque re ita completâ, ut prædicta fuerat, cunctis in Palestina Episcopis in unum congregatis, adveniente ipso vel maxime Narcisso Jerosolymitanæ Ecclesiæ cum eo gubernaculum suscepit (Narcissus autem, ipso Alexandro teste, 116. annos tunc agebat) Ita S. Hieron. L. de Script. Eccles. cap.62., qui addit: *Septimâ autem Persecutione sub Decio, quo tempore Babylas Antiochiæ passus est, ductus Cæsaream & clausus in carcere, ob confessionem Christi Martyrio coronatur (anno ut creditur 251.): Eadem ferè habet Martyrol. Rom. 18. Martii. De alio Alexandro longævâ atate venerabili & iteratâ confessione claro, inter Carnificum tormenta pariter sub Decio coronato, mentionem faciunt Martyrologia Bedæ Adonis & Rom. 30. Januarii, qui tamen à præcedente diversus est.**

III. Tertio loco succedunt SS. Galation seu Galaction & Epistemes ejus conjux Emesæ in Phœnicia sub Decio passi. De his Latini 5. Novembris & Græci eâdem die, qui in Menol. Basilii ita narrant: *Savctus Galaction ex Urbe Emesæ fuit, Onuphrii Monachi prædicatione natus, à quo & parentes ejus baptizati fuerant. Cum autem post Matris obitum despondisset illi Pater uxorem nomine Epistemen formosissimam sed adhuc infidelem, nuptiis celebratis, adiit quidam Galaction uxorem; sed nullâ ratione adduci potuit, ut ad osculum eam admitteret: cujus rei causam ab ea rogatus: Quia, inquit, Christiana non es. Quare statim Christianam se futuram pollicetur. Sed cum nulla Presbyteri facultas propter Persecutionem daretur, ab ipso Galactione baptizata est. Deinde ex composito distributis in pauperes facultatibus, uterque in montem secessit atque in Monasterium separatim se recepit. Commota autem in Christi-*
stia-

stianos Persecutione, ad Regionis Præfectum delati sunt. Dum igitur Galaction comprehensus ad Præfectum trahitur, Episteme affecta eum est & simul cum illo retenta. Deinde ambo præcis manibus ac pedibus decollati fuere.

IV. Melitina Armeniæ Urbs Martyrum feracissima exhibet quarto loco S. Polyucti sub Decio certamen. De hoc agit Martyrol. Rom. 13. Februarii, Græci autem 9. Januarii, die verò 10., ut ex Actis ejus. Is in Romanis copiis, quæ Melitinæ stationem habebant, Miles erat; uxorem nomine Paulinam cujusdam Felicis filiam habebat, ex qua unicum filium susceperat. Intimus ejus amicus Nearcus erat, professione & ipse Miles, sed Religione Christianus, ubi Polyuctus adhuc infidelis erat. Cum ergo motæ à Decio Persecutionis rumor illuc advenisset, Nearcus paratus quidem pro Christo mori, sed anxius de salute æterna Polyucti amici, ipsum lacrymans adiit de mutua imminente separatione monens ac simul dolens, quod in statu æternæ perditionis eum relinqueret. Polyuctus qui ex familiari cum Nearco conversatione multa audierat de Christo, nec ab eo multum alienus erat, hâc visione devictus fuit: Apparuit illi Jesus in somnis pretiosum tagum illi offerens: quod cum Nearco narrasset, mutuo se pro Christo vitam duros promiserunt. Polyuctus igitur illico se Christianum publicè professus, propterea comprehenditur & diris tormentis subicitur. Carnifices ipsi, socer, uxor unicum filium ei præsentans, eum à Fide deterere modis omnibus conabantur; incassum tamen. Quare morti addictus, animo adeò intrepido supplicii locum adivit, ut omnes mirarentur, & multi conversi sint: inde Nearco valedicens, & ad se sequendum exhortans gladio coronatur. Cumque Martyrium, Metaphraste teste, quatrimum post ejus conversionem contigerit, credibile fit, eum solo Baptismo sanguinis baptizatum in Domino obiisse.

Græci tamen in Menol. Basilii 9. Januarii aliter factum narrant: dicunt enim: Cum autem sæva adversus Christianos Persecutio mota esset, iique in dies caderentur, qui Christum negare detrectabant; eâ re compertâ S. Polyuctus, Christum quidem palam & publicè Deum professus est, Idolorum autem Fanum ingressus omnia Idola comminuit. Comprehenus ergo Præfecti jussu cadebatur: cumque Præfectus socer ejus esset, eum hortabatur, ut Christo abjurato, salutem suam consulere. At ille compellans Nearcum amicum suum: Vidi, inquit, in somnis Christum meum venientem & pretiosum mihi Sagum afferentem. Verumtamen memento mei, amice. Aderat ejus uxor cumque monebat, ut in Fide Christi constans esset.

set. Quare gratias agens decollatus est. Quibus Polyeuctus antea Christianus describitur, Præfatus focer illius, & uxor Christiana supponitur. Quid reverà fuerit, meum non est hîc discutere. Quomodocumque exprimatur Sancti Polyeucti Martyrium gloriosum fuit.

V. Sanctum Mercurium quinto loco subjicio, apud Latinos 25. Novembris, & apud Græcos eâdem die celebrem. Fuit iste in Oriente sub Decio Miles. Custodientis se Angeli patrocinio, fortiter in prælio se gerens Dux Militum à Decio declaratur: sed cum eum esse Christianum rescivisset, *comprehensum ad quatuor palos humi alligari jussit & gladiis membratim concidi, ignemque accensum ei supponi, qui ex nimio sanguine extinctus est.* Post hæc alligato ad collum ingenti saxo, in equuleum inverso capite rapitur, detractâque aeneâ forcipe cute, *vinctus Casaream Cappadociæ ducitur: ubi abscisso capite sepultus quiescit, curationes Fidelibus omnibus ad hanc usque diem præbens.* Ita Græci in Menol. Basilii 25. Novembris. De hoc Sancto Martyre refert Damascenus Orat. 1. de Imagin., quod cum S. Basilii coram imagine, in qua picta erat B. Virgo & S. Mercurius Martyr, oraret ut Apostata Julianus de medio tolleretur, confectum vidit, Martyrem exiguum ad tempus ab oculis suis evanescentem, ac non multo post cruentam hastam tenentem: quo viso Julianum fuisse necatum sinè mora fama tulit. Et hoc ex Vita Basilii ab Heliadio ejus Discipulo scriptâ se didicisse Damascenus testatur. Idem in Vita S. Basilii, quæ sub nomine Amphilochoii fertur. Utut tamen sit, certum est, impium Julianum Divinâ ultione fuisse peremptum. De quo vide Sozomenum L.6. hist. cap.2., ubi relatis variis, quæ de hoc suo tempore ferebantur mirabilia, concludit: *Neque enim adborret à vero, quin alia etiam his admirabiliora contigerint, quibus ostenderetur, Christianam Religionem non humanâ vi aut industriâ stabilitam esse.* Quæ verba mirè confirmant hujus mei Operis argumentum.

VI. Sexto Martyrium ponitur SS. Luciani, Martiani, Florii, Heraclis, Titi, & alterius Florii, qui sub Decio Imperatore & Proconsule Sabino combusti feruntur Nicomediæ. Horum meminerunt Martyrologia etiam antiquiora 26. Octobris. Horum Acta exhibet Ruinart Act. Mart., in quibus tamen Luciani & Martiani tantum fit mentio. Dicunt ergo, quod isti, præter Gentilitatis errorem, quo summo zelo antea tenebantur, Magiâ & maleficiis omnis generis ita celebres erant, ut quotquot velent voluntates suas impias perficere, ad eos accurrerent. Deus tamen, qui, ut ostendat potentiam suam, identidem etiam magis re-

rebelles trahere solet ac sibi subdere voluntates, id in istis implevit. Erat quædam puella Deo devota & virginitatis adeo amans, ut quascumque nuptias contemneret. Hanc Lucianus & Marcianus insano amore deperire cœperunt; sed cum nihil proficerent, ad Dæmones Magicis ut consueverant artibus conversi sunt. Virgo in vigiliis & oratione perstans constantior omnes eorum artes eludebat. Quod illi videntes, novis Magicis phantasmatibus Dæmones sollicitabant, ut eis responderent, cur qui in tot aliis præstò fuerant, hac in re eos desererent. Quibus Dæmones dixerunt: „ Quascumque animas non cognoscen-
 „ tes Deum, qui est in Cœlo, voluistis subvertere, invocantes
 „ nos, facillimum nobis fuit vobis præstare. Sed quia ad hanc
 „ castissimam animam certamen nobis est; multa quidè feci-
 „ mus, sed nihil potuimus proficere adversus eam. Hæc verò
 „ virginitem illibatam servat Jesu Christo Domino suo & Deo
 „ omnium, qui crucifixus est pro salute omnium: ipse eam cu-
 „ stodit & nos affligit. Idèd nihil contra eam facere possumus,
 „ nec in aliquo superare. „ En à Dæmone mendacii auctore & jurato Christi hoste, pro Veritate Christianæ Religionis ineluctabile testimonium.

Cum hæc publicè agerentur, Lucianus & Marcianus conterriti ceciderunt in faciem velut mortui. Post paululùm Divinâ gratiâ excitati, Dæmones omniaque Magica detestati, ad Christum, contra quem se non prævalere Dæmones ipsi confessi fuerant, converti statuerunt. Subinde in media Civitate magicis Libris combustis, baptizati, omnibus derelictis loca secreta petierunt, ubi macerantes se & delicta sua castigationibus detestabantur, Christum sibi propitium invocantes: inde majori zelo accensi, Christum stupentibus omnibus publicè prædicare cœperunt. Quapropter accusati ad Proconsulem Sabinum, qui tunc Decii nomine regebat, adducti fuerunt. Proconsul ergo eos primò improperavit, cur veros Deos relinquentes, ad mortuum & crucifixum Jesum, qui nec se ipsum salvum facere potuit, transfugissent, cui Marcianus respondit: *Ille nobis donavit, qui & Sancto Paulo, qui cum esset Ecclesiarum persecutor, postea ejus gratiâ factus est prædicator.* Cumque urgeret Proconsul, ne Christum sequerentur, qui ipsos nec è manu sua nec à morte posset eripere. Et respondentibus ipsis: hanc gloriam Christianorum ex Christi promissio esse, ut qui fideliter certaverit cum Diabolo, minas & quæ sunt caduca contemserit, perpetuam ac futuram vitam consequatur; Sabinus partim irridens partim indignatus, videus se nullâ ratione ac minis eos flectere posse,

ut flammis exurerent sententiam tulit: quæ 7. Kalend. Novembris impleta fuit anno 250., Sanctique Martyres ad Christum advolarunt.

VII. Eodem anno 250. contigisse fertur illustris passio Sanctorum Tryphonis & Respicii, quam septimo loco propono. Hos secundum veriore lectionem cum Baronio in Notis ad 10. Novembris & Ruinart in Act. Mart. censeo fuisse Phryges; Apamæ Phrygiæ tentos, & Nicæam ubi passi sunt perductos, & sub Aquilino Præside imperante Decio agonem suum consummasse. Hi ergo honestis natalibus orti adhuc juvenes Jesu Christo omni virtutum studio sese dederunt. Cumque occulti manere non possent assumto ad Imperium Decio, ad Aquilinum Bithyniæ Gubernatorem delati, catenis constricti Nicæam perducti sunt; sed Præside tunc aliis distracto negotiis, in carcerem conjiciuntur. Iussi post aliquot dies coram Præside steterunt, à quo quinquam essent interrogati, responderunt se Christianos esse, & hunc esse eorum statum & unicam fortunam. Cumque ad hæc Pompejanus primiscripius respondisset: *Tales nempe Christianos. jussit Imperator vivos incendi, nisi sacrificaverint Diis*: Respicus dixit, hoc esse quod anxie optarent, & proinde quod sibi præceptum erat, implere satageret. Addente autem Aquilino, ut ætatem habentes & sanum intellectum, cogitarent quid facerent, alacres responderunt: propterea quia perfectum intellectum habemus, nil aliud magis optamus, quam agonem consummare pro Christo.

His auditis, Aquilinus jussit illos torqueri, ni consentirent. At illi depositis vestibus ultrò se obtulerunt quæstioni. Cumque per tres horas torquerentur, nullam doloris vocem ediderunt, imò de Deo & pœna colentium Idola alacres cum Præsecto disceptabant. Qui nihil se proficere videns, eis graviora comminatus, in carcerem detrudi jussit. Interea ad alias Civitates profectus, deinde Nicæam reversus, eosque constantiores inveniens, pedes eorum clavis configi jussit, & in asperitate hyemis per mediam Civitatem trahi. Eorum hilaritatem admiratus Judex? *Quid est?* inquit, *non sentitis tormenta?* Illi autem responderunt: *Non: quia clavi non sunt fixi in pedibus nostris, sed quasi in calceamentis.*

Hæc irrisione indignatus Aquilinus, eos manibus post tergum ligatis, nudos cædi jussit. Sed cum acerrimè caderentur, quæstionarii deficiebant. Quare irâ repletus ungulas & lampades eorum lateribus applicari imperavit. At dum lampades applicarent, astitit Angelus Domini coronas habens in manibus gem-

gemmis & floribus ornatas, quas capitibus Martyrum imposuit, eosque in agone firmavit: quod cum viderent Ministri, cadentes in terram facti sunt veluti mortui. Aquilinus furore insaniens tormenta tormentis adjecit; sed cum vidisset, eos ita se gerere ac si nihil sentirent, tandem capitali sententiâ illos damnavit, sicque gladio jugulati Martyrii coronam accipere, dumque vitam hanc temporalem contemserunt, à Christo donati fuerunt aternâ. Hæc ex eorum Actis quæ exhibet Ruinart.

VIII. Græci autem in Menol. Basilii 1. Februarii de solo S. Tryphone loquentes hæc habent in multis diversa: *Tryphon Martyr in Phrygia Gordiano Imperatore natus, adhuc puer auferes pascebat, sed simul virtutibus comparandis operam dabat, Deique mandata diligenter exequabatur. Unde curationum donum accepit, ut nullum esset morbi genus, quod non curaret. Sanavit autem & Imperatoris filiam à Dæmone oppressam, ipsumque Dæmonem in specie nigerrimi canis ostensum compulit, ut suas præstigias & dolos patefaceret; quares multos ad Christi Fidem traduxit. Post hæc Decio imperante, captus ab Aquilino Præfeto Nicæam vincitibus perducitur; ubi ad equos indomitos alligatus per invia hyberno tempore raptatur, deinde nudus super acutos clavos volutatur, demum facibus circa latera ustulatus, capite plectitur. Ita Græci aliqua addentes aliqua omittentes; omnia tamen Christi gloriam in suis Sanctis testificantia.*

IX. Octavò. Apolloniæ in Bithynia ponitur sub Decio passio SS. Thyrsi, Leucii & Callinici, de qua Martyrol. Rom. 28. Januarii dicitur: *Apollonia Sanctorum Martyrum Thyrsi Leucii & Callinici, qui tempore Decii Imperatoris variis tormentorum generibus cruciati, primus & ultimus abscissione capitis, medius cælesti voce evocatus spiritum reddens, Martyrium consummarunt. Græci pariter in Menol. Basilii 14. Decembris, de solis tamen Thyrsi & Lucio loquentes, ajunt: Decio imperante cum Combricius Præfectus magnâ adversus Christianos motâ persecutione, in partibus Nicomediæ sanguinem Christianorum in dies velut aquam effunderet, agrè id serens Leucius vir Christianus Deumque timens, adiit Præfectum, & Canis inexplabilis, inquit, usquequò hominum sanguinem velut aquam effundes, compellens illos adorare lapides & ligna animo sensuque carentia? Ad hæc excanduit Præfectus, raptumque in equuleum & excarnificatum decollari jussit. Thyrsus verò obviam factus eidem Præfeto, exprobravit, quodd multo mortalium sanguine exhausto, nondum tamen animum suum expleisset. Quare & hunc comprehensum, manibus pedibusque revinctis, oculis transfixis cruribusque contusis, mandavit serrâ medium*

secari . Sed antequam scinderetur atque in duas partes divideretur , animam reddidit . Quid ad hæc Doduvellus ? Si Christianorum sanguis sub Decio vel in una Provincia veluti aqua effundebatur , quid diceretur de toto Romano Orbe , per quem grassata æquæ fuit Persecutio ?

X. Nono loco ponam S. Menignum , de quo Martyrol. Rom. 15. Maii , & Græci in Menol. Basilii die 17. , qui ei adiungunt S. Romanum his verbis : *Sanctus Menignus vixit imperante Decio oriundus ex Civitate Paro (seu Pario in Helleponto) arte sullo & labore manuum sibi victum comparans , ministrabat Christianis ob persecutionem in carceres coniectis . Desiderabat autem & ipse pro Christo Martyrium subire , idque precibus efflagitabat . Quare audivit vocem sibi dicentem : Menigne , veni ad me & invenies gratiam coram me . Accessit ergo ad Iudicem & Christianum se esse confessus est . Quamobrem verberibus exceptus , gladioque digitis manuum ac pedum abscissis , capite plexus fuit . Veneranda autem ejus Reliquiæ in Urbe sepulta præbent sanitatem omnibus Fidelibus usque in hodiernum diem . Romanus autem cum Ecclesiæ Cæsareæ Palastina Diaconus esset , Christi que Fidem Populum doceret , comprehensus multisque tormentis excruciatas eodem die gladio cæsus finem accepit .*

XI. His accedunt SS. Petrus , Andreas , Paulus & Dionysia Lampfaci in Helleponto passi , ut in Martyrol. Rom. 15. Maii & in Menol. Basilii eadem die , ubi tamen loco Dionysia ponitur Dionysius , & additur Christina his verbis : *Petrus Christi Martyr ex Lampfaco Urbe fuit . Comprehensus autem ab Idolorum Cultoribus , Præsidi Abydi traditur . Cumque Idolis sacrificare detrectaret , contrito lignis corpore , spiritum tradidit . Paulus autem & Andreas , qui sub eodem Abydi Præside Milites erant , una cum illo Athenas venientes , Dionysiam & Christinam comprehensos & in carcerem detentos jussi sunt custodire . Sed à S. Christina edociti , patrio Idolorum errore quem à Majoribus acceperant derelicto , ad Christum accessere . Deprehensi itaque quod Christiani essent , ipsi , i. quæ , & Dionysius , primum quidem plurimis suppliciis , quod impuris Damonibus sacrificare nollent , subiciantur , ac demum lapidibus obruuntur . Sancta verò Christina accurrens ad illos & plorans capite plexa est .*

XII. Aliter tamen in multis ferunt Acta à Ruinart exhibita . Dicunt , Petrum adhuc juvenem in locis Lampfaci comprehensum oblatumque Proconsuli , cum constanter confiteretur , se non obstantibus decretis Principum velle magis Deo vero obedire & Christianum esse : undè tensum in rotis ligneis , in circui-

tu possitis vinculis ferreis, toto corpore constrictum & confractum, sed magis constantem gratiasque Deo agentem, tandem gladio fuisse percussum. Dicunt, Proconsuli Troadem iter paranti oblatos fuisse Andream, Paulum & Nicomachum, quos cum interrogasset, cujus essent Religionis, Nicomachus impatiens prior dixit, Christianus sum, quod Andreas & Paulus interrogati dixerunt. Sed Nicomachus sacrificare repugnans & appensus, cum nimium vexaretur ac propè esset spiritum emissurus, negans se fuisse Christianum depositus fuit, & Diis sacrificavit. Verùm Divinâ ultione statim percussus fuit: nam correptus à Dæmone & in terram allisus linguam suam comedens emisit spiritum. Ex spectantibus autem turbis quædam puella & virgo annos habens sexdecim nomine Dionysia exclamavit dicens: *Miser & infelicissime homo, cur propter unius horæ spatium acquisivisti tibi perpetuam & inenarrabilem pœnam?*

XIII. Hoc audito Proconsul accersitam interrogavit, an esset Christiana: cui illa, Christiana, inquit, sum, & propterea infelicem istum plango, quòd momentaneam pœnam non tolerarit, ut perpetuam requiem inveniret: & respondens Proconsul Venerem & Dianam eum rapere dignatas esse, ne propter vanam Christi Religionem impropria sustineret; addidit: Sacrifica & tu Diis, ne turpiter te illusam vivam incendam. At irridens Dionysia ait: Deus meus major est quàm tu, ideòque minas tuas non timeo; potens enim est dare mihi in omnibus tolerantiam. Tunc Proconsul tradidit eam duobus Juvenibus corumpendam; Andream verò & Paulum jussit in custodiam recludi. Juvenes ergo acceptam castissimam Dei puellam duxerunt ad suum hospitium. Cumque usque ad mediam noctem insisterent; ut ei vim turpitudinis inferrent, post mediam noctem quidam splendidus Juvenis eis apparens totam domum luce perfudit. Quo conterriti duo illi Juvenes ad pedes puellæ provoluti ceciderunt. At puella erexit eos dicens, nolite timere: hic enim est Custos meus & tutor. Interim illi rogabant eam, ne quid mali eis contingeret.

Mane autem factis excitantibus Dianæ Sacerdotibus omnis Turba conclamare cœpit, ut Andreas & Paulus sibi traderentur. Qui jussu Proconsulis adducti cum coram omnibus constanter negassent se Dianæ sacrificaturos, flagellis caesos tradidit Populo lapidandos. Cumque extra Civitatem ligatis pedibus traherentur, Dionysia clamans & plorans è custodia elapsa cucurrit ad locum ubi erant, & jactans se super ipsos dixit: Ut vobiscum possim vivere in Cœlis, volo vobiscum hic mori in terris. Pro-

consul certior factus de eo quod acciderat duobus Juvenibus, & quod è custodia fugiens jactasset se super corpora Andreæ & Pauli, ut cum ipsis lapidibus occideretur, jussit ut separaretur & gladio plecteretur; quod factum est. Igitur SS. Martyres, Petrus diversis pœnis, Andreas & Paulus lapidibus, Dionysia gladio coronati sunt apud Lampſacum, Decio imperante, Optimo Proconsule Idibus Maii anno Christi 250. Quis tantam animi fortitudinem maximè in puella non admiretur?

XIV. Idem annus celebris fuit Martyrio S. Maximi. Decio enim nomen Christianum delere conante, Maximus in Asia (& Ephesi ut quidam volunt) coram Optimo Proconsule se Christianum palàm manifestavit. Erat is conditione plebejus negotium suum exercens. A Proconsule sacrificare Dianæ jussus & ita pœnas ab Imperatore latas evadere, cùm respondisset, hoc se optare, nimirum pro Christo pati, & propterea se manifestasse, ut tandem carens miserâ hâc temporaneâ vitâ æternam reciperet; Proconsul jussit eum fustibus cædi, ipsum interea monens ut resipisceret ac Dianæ sacrificaret; sed videns se nihil proficere, sententiam tulit, ut lapidibus obrueretur; sicque athleta Christi ereptus à Ministris Diaboli, triumphî palmam Cœlo intulit. Celebrant autem hujus memoriam Latini quidem 30. Aprilis, Græci verò 14. Maii; qui pluribus Martyris constantiam circumstantiis ornant.

§. VIII.

SS. Carpus &c. Pionius & Achatius.

1. **U**ltra præfatos, qui pro Christo invictè triumpharunt, plures alii supersunt. Ex his SS. Carpus Episcopus Thyatiræ (in Lidia) Papyrus Diaconus, Agathonica soror ejus, & Agathodorus eorum famulus alique multi. Scio, horum agonem ad tempora Antonini Veri & Aurelii Commodi, non verò Decii ab aliquibus referri, & maximè à Martyrol. Rom. 13. Aprilis, quibus consentire videtur Eusebius Lib. 4. hist. cap. 15.. Alii tamen ut Tillemontius, Ruinart, Græci, & Valesius in dictum Eusebii Caput probabilius referendos esse ad tempora Decii existimant. Quo autem tempore passi sint, præsentî meo argumento non officit, cui satis est istos reverà aliquando pro Veritate Religionis Christianæ fuisse passos. Hi igitur Sancti Martyres propter Fidem capti & ad Valerium seu Valerianum Proconsulem Optimi successorem an. 251, dela-

delati ac Christum generosè confessi catenis onerati per totam Thyatiræ Urbem ducti sunt ; qui iterum postea interrogati , antequam responderent , elatis ad Cœlum oculis , signo Crucis corpora munientes Christum denuò confessi sunt . Tunc Valerius rudibus equis per ludibrium impositos Sardiam vel Sarden (tunc Lydiæ Urbem) quò erat ipse iturus adduci iussit , ubi teritiò Christum confessi , carceri addicti sunt : interim tamen Agathodorus famulus nervis bubulis adeò crudeliter distractus fuit , ut vitam temporalem in æternam felix permutaret . Hoc tamen nihil territi alii iussi sunt pedestres catenis gravati Pergamum transire : quò cùm pervenissent , Episcopus Carpus virgis & spinis contextis cæsus fuit , facies lateribus ejus accensæ fuere , plagis etiam sale aspersis . Papyrus etiam iisdem cruciatibus affectus fuit , sed uterque hilari vultu tormentis superatis in carcerem trahitur . Post paucos autem dies super ferrea acumina nudum utrumque extendi jubet atque costas distrahi , tandemque in ignem injici , in quo è temporali vita ad æternam transierunt . Vicens Agathonica Papyli soror tantam fratris in tormentis pro Christo constantiam sanctâ æmulatione accensâ , depositis vestibus , spontè in ignem profiliens cum ipso consumpta ad gloriam evolavit æternam .

II. Hisce prænarratis ferè in omnibus concordant Græci in Menol. Basilii 13. Octobris dum ajunt : *Sancti Martyres Carpus & Papyrus Decio Imperatore floruerunt . Et Sanctus quidè Carpus Episcopus Thyatirorum fuit , Papyrus autem Diaconus . Comprehensi autem ab Asia Præfecto interrogatique , Christi Domini nomen in conspectu omnium confessi sunt : iussique Idolis immolare , imperata facere recusarunt . Quare alligatos ad equos usque ad Sardes Urbem præ se egit & raptavit Præfectus , ibique in equuleum actos excarnificari mandavit . Agathodorus autem Sanctorum servus illos persecutus tandiù torquetur donec expiravit . Carpus verò cùm in equuleum subrideret , rogatus à Præfecto , cujus causâ id faceret , respondit , se exilaratum esse , quòd gloriam Dei vidisset . Igitur de equuleo depositi in ignem conjiciuntur . Agathonica autem Papyli soror , quæ tum aderat , in rogum ardentem suâ sponte gaudens insiliit , & ambo animas Domino tradidere .*

III. Ecclesia Smyrnenfis in Jonio , quæ secundo seculo in S. Polycarpo Episcopum verè Apostolicum & Martytem Christo dedit , tertio seculo in S. Pionio ejus Presbytero dignum Polycarpi virtutum protulit hæredem , ac ruinæ , quam in Eudemone suo Episcopo ac pluribus suis passâ fuerat , reparatorem . Ejus virtutes zelum constantiam in Martyrio velut in compendio exhi-

exhibet Eusebius L. 4. hist. cap. 15. his verbis : *Celeberrimus quoque inter reliquos ejus temporis Martyres fuit Pionius , cujus singulas confessiones ac libertatem in dicendo ; utque coram Populis ac Præsidibus pro Fidei nostræ defensione peroraverit ; conciones item de institutione Fidei , præterea cobortationes atque invitationes ad eos , qui Persecutionis tempore lapsi fuerant : allocutiones etiam & consolationes , quas in carcere positus aduentibus ipsum fratribus adhibuit : quæ super his tormenta quantosque dolores sustinuerit , clavorum insuper confixione , & mirabilem in medio rogo constantiam , mortem denique ipsam ; quæ cuncta illa miracula subsequuta est , si qui volent cognoscere , eos ad Epistolam de illius Martyrio uberimè conscriptam amandamus , quam nos in Opere de priscis Martyribus , quorum passiones collegimus ordine suo inseruimus . Hoc tamen Opus de priscis Martyribus , quod à se elaboratum Eusebius indicat , intercidit .*

IV. Controversiæ tamen locum hic aperuit Eusebius de tempore , quo S. Pionius Martyrium subiit . Cum enim citato loco postquam S. Polycarpi enarravit Martyrium , statim subjiciat S. Pionii certamen dicens , *Per idem tempus , eisdem temporibus : & Polycarpus Marci Aurelii temporibus passus sit , ad hæc eadem tempora , non autem Decii , passionem S. Pionii visus est retulisse . Et ita sentiunt Petavius , Scaliger & Pearsonius , quibus adhæret Martyrol. Rom. 1. Februarii . Baronius tamen ad ann. 254. num. 2. , Ussérius Armachanus , Valesius in Notis , Bollandus , Tillemontius , Fleury aliique Recentiores unanimes conveniunt , Pionium sub Decio fuisse passum ; quibus consentiunt Græci in Menol. Basil. die 11. Martii : atque hoc tenendum esse arbitror , quia ita dicunt Acta ejus Martyrii , ut videre est apud Baronium citatum , & Ruinart Act. Mart. in Pionio . Ideoque ait Valesius , Eusebium excusari minime posse : *Quippe ex Actis Pionii & ex Actis Carpi & Papyli constat , illos regnante Decio subisse Martyrium . Causam erroris Eusebio præbuit , quod Acta illa Pionii & Carpi simul cum Actis passionis Sancti Polycarpi in uno Codice compacta legebantur . Ex quo suspicatus est Eusebius , illos uno eodemque tempore passos fuisse .* Mitior tamen Baronius Eusebium interpretari conatur , nempe quod nomine ejusdem temporis , non intellexerit annum , sed mensem vel diem , quasi Pionius & Carpus eodem mense aut die , quo Polycarpus passi fuerint , non tamen eodem anno . Statuto igitur , Pionii mortem ad Persecutionem Decii referendam esse , Actorum ejusdem epilogum texemus . Qui enim ea per extensum excurrere optaverit , adire poterit Baronium ad ann. 254. , Ruinart , Tillemontius , Fleury , aliosque .*

V. Post

V. Post miserandum Eudemonis Smyrnenſis Epifcopi lapſum, quem plurium illius Urbis Fidelium ruina ſubſecuta eſt, Pionius illius Eccleſiæ Preſbyter unâ cum Sabina & Afclepiade in pervigilio Sabbati, qui ſolemnis erat anniverſario S. Polycarpi, jejunaus, in ſomnis monitus, ſe die ſequenti à Gentilibus capiendum fore, in Fidei teſtimonium ſua & Sabinae & Afclepiadis colla iuicem connexis catenis circumdedit, ut ſe voluntariè capiendos offerre Perſecutoribus appareret. Atque ita contigit, factâ enim Oratione, & Sabbato adveniente, cùm Sanctum Panem deguſtaſſent & Aquam, adſtitit Polæmon Idolorum cuſtos cum Turba imponens eis, ut juſſa Principis imple- rent. At reſpondentibus illis, ſe ſoli Deo Omnipotenti obtemperare, juſſit eos ad forum duci. Cùmque ducerentur, vincula cervicibus eorum connexa Vulgus aſpexit. Unde Turba Populi, ut aſſolet, ad rei novitatem facta eſt, tum Virorum tum Feminarum, etiam ex Judæis, cùm eſſet Sabbatum. Tum Pionius occaſionem naſtus, alacriter pro Chriſto ejuſque Religione ad mortem uſque conſtantiam publico ſermone manifeſtavit. Multis ſubinde tentati tum promiſſis tum minis, cùm hæc omnia iriderent, comitante multitudine in carcerem detrufi ſunt.

VI. Porrò in carcere variis modis tentatis, ſed incaſſum; ſaltem inquit Polæmon Pionio, ſi ſacrificare non vis, Templum ingredere: cui ille neque hoc ſe facturum reſpondit. Dum hæc aliaque multa, quæ Acta narrant, ad ſeſtendos Sanctorum animos in carcere gererentur, poſt paucos dies Smyrnam Proconſul regreſſus eſt, ac oblatum ſibi Pionium repetitis interrogationibus ac ſuaſionibus urgere coepit ut ſacrificaret, ſed cùm nihil obtineret, juſſit eum appendi, & quod verbis non poterat voluit extorqueri tormentis. Sed cùm nec tormentis vincere ejus conſtantiam poſſet, talem in eum ſententiam protulit: *Pionium ſacrilegæ virum mentis, qui ſe Chriſtianam eſſe confeſſus eſt, ultracibus flammis jubemus incendi, ut & hominibus metum faciat, & Diis tribuat ultionem.*

VII. Ibat igitur Vir Sanctus ad ſupplicii locum: nec, ut ituris ad mortem, lababant veſtigia, titubabant genua, membra torpebant, ſed alacer ac hilaris ibat, ac ſi iret ad triumphum. Cùmque ad ſtadium perveniſſet, ſpontè corpus ſuum ipſe nudavit ac ſua integra & illibata membra reſpiciens gratias egit Deo, qui ſua pietate ipſum ita ſervaſſet: ac deinde ſuper lignum ſe ipſum extendit, ut à Milite clavis in eo configeretur. Populus autem videns eum confixum clamabat: Pœniteat te, Pioni, & tolluntur clavi ſi facturum te ſpondeas quod juberis. At ille,

ſen-

sentio, inquit, clavos & me fixum intelligo. Et paulò post: ad eum propero, qui à morte me excitavit. Post hæc Pionium, & Metrodorum quemdam (ex Secta Marcionitarum) clavis itidem affixum erexerunt; evenitque ut Pionius ad dexteram, Metrodorus staret ad lavam, ambo tamen ad Orientem conversi. Nec miretur aliquis quòd Metrodorus, estò Marcionita & hæreticus, velut Christianus configi se passus fuerit: hujus enim Sectæ homines Martyrii cupidissimi erant, quòd à Malo Principio carnem esse dicerent, ideòque in eam sæviendum. Sed *Veros Martyres non facit pœna, sed causa*, ut ait S. August. contra Donatistas passim, & præcipuè Epist. 189. aliàs 167.

Interim cùm allatis lignis ac subditis nutritientis vires ignis acciperet, & per ardentem pyram populatrix flamma crepitaret, clausis Pionius oculis, tacitâ præmissâ oratione & vultu læto ignem aspiciens, dicto *Amen*, puram animam Deo reddidit. Cùm autem qui aderant sive pietate sive curiositate moti subitò accurrissent, extractum è flammis corpus integrum invenerunt, erectas aures, intactos crines, barbam florentem atque omni membro ita compositum, facie hilari & serenâ, ut juvenis videretur. Acta sunt hæc Julio Asiæ Proconsule, Proclo & Quintiliano Magistratum gerentibus Trajano Decio Augusto ante 4. Idus Martii, die Sabbati horâ decimâ anno Christi 250.

VIII. Quid Sabinæ & Asclepiadi Pionii in carcere sociis eveniret, Acta præfata tacent. Martyrol. Rom. die 1. Februarii dicit, quòd cum eo alii quindecim passi sint, sed qui fuerint non exprimit. Græci in Menol. Basil. die 11. Martii solius Pionii certamen describunt. Ea quæ hîc vocatur *Sabina*, proprio nomine erat *Theodota*, quæ cùm antea cuidam paganæ Dominae serviret, & quæ, ut Fidem Christi ejuraret, multis modis sollicitaverat, nec obtinere potuisset, eam in montem desertum ejecit, ut ibi fame periret: sed ibi pietate Fidelium relevata, tandem Pionio adhæsit; verùm ne detegeretur nomen Sabinæ induit. Hanc ergo & Asclepiadem una cum Pionio comprehensos, in carcerem cum eo detrufos, ac pluries se Christianos esse confessos ac Diis sacrificare constanter negantes, credibile est eandem cum illo sortem Martyrio subiisse, & fortè alios. Sed cùm inter istos quidam, ut Acta referunt, essent Christiani quidè non tamen Catholici; sed aliqui hæretici vel Marcionitæ vel Montanistæ: idèd hi etsi morte affecti, inter Martyres tamen, ut dixi, computandi non sunt.

IX. Gloriosa S. Achatii confessio, licèt sine sanguine, prætereunda non est. Hujus Acta exhibent Ruinart & Tilmontius.

Is igitur Episcopus fuisse creditur cujusdam Urbis in Antiochena Regione sitæ diversus ab Acacio, quem Græci sub Episcopi Melitinæ in Minori Armenia titulo celebrant. „, Martianus ergo Consularis à Decio Imperatore Præfectus Christianæ Legis inimicus Achatium ad se iussit adduci, quem scutum, quoddam ac refugium Antiochena Regionis audierat, & in eo introducto ad se, dixit: Debes amare Principes nostros, homo Romanis Legibus vivens. Respondit Achatius: *Et cui magis cordi est, vel à quo sic diligitur Imperator, quemadmodum ab hominibus Christianis? Assidua enim nobis est pro eo ac iugis Oratio, ut prolixum ævum in hac luce consciat, ac justâ Populos potestate moderetur, & pacatum maximè Imperii sui tempus accipiat. Deinde pro salute Militum, & pro statu Mundi & orbis.* Martianus ait: Hæc & ipse collaudo, sed ut obsequium tuum plenius Imperator agnoscat, Sacrificium illi solve nobiscum. Achatius dixit: *Ego Dominum meum, qui est verus & magnus, pro salute Regis obtestor: Sacrificium verò nec ille exigere, nec nos debemus exsolvere. Quis enim homini sacra persolvat?* Martianus ait, cui Deo precem fundis? ut etiam nos sacra reddamus. Achatius dixit: *Ego Deum meum opto te scire quòd prosit, & Deum qui est verus agnoscere.* Martianus ait: Nomen ejus mihi enuntia. Achatius dixit: *Deus Abraham, Deus Isaac, & Deus Jacob.* Martianus ait, quis est iste? respondit Achatius: *Altissimus Adonai sedens super Cherubin & Seraphin.* Martianus ait, quid est Seraphin? Cui Achatius: *Altissimi Dei Minister, & excelsa Sedis Antistes.*

Tunc Martianus: quæ te, inquit, Philosophiæ disputatio, vana decepit? Sperne invisibilia; potiùs Deos veros quos, aspicias recognosce. Respondit Achatius: *Qui sunt Dii quibus sacrificare me præcipis?* Martianus ait: Apollini Servatori nostro, famis & pestilentia depulsori, per quem omnis Mundus servatur & regitur. Respondit Achatius: *Illi verè, ut putatis, interemto; qui infelix cum puella amore flagraret, currebat attonitus, ignarus perditurum se optatissimam prædam? Apertum est itaque, quia nec Divinus fuit qui ista nescivit; nec Deus, quem puella decepit. Nec hic solam dolores excepit, sed crudeliori illum damno mox fortuna multavit: nam ut erat turpis in pueros, formâ Hyacinthi cujusdam captus, ut bene nostis, incaluit: & miser atque ignarus futuri, disce illum quem optabas videre occidit. Ipsi, qui cum Neptuno aliquandò servavit: ipsi, qui aliena pecora servavit, huic sacrificare me præcipis? An Æsculapio fulminato, an adultera Veneri & portensis cæteris*

„ *Sacrificium impendam? Vel ob hujus vitæ exitum adorabo eos,*
 „ *quos non dignor imitari? quos contemno, quos accuso, quos hor-*
 „ *reo, quorum facta nunc si quis admittat, num severitatem Legis*
 „ *vestra poterit effugere? Et modò in aliis colitis, quæ in aliis vin-*
 „ *dicatis?* His toti Idololatriæ jugulum petit Achatius. Quæ
 „ tamen declinare (non impugnare valens) conatus Martianus:
 „ Christianorum, inquit, consuetudo est, multa in Deos no-
 „ stros maledicta confingere. Propterea te venire mecum ad
 „ Jovem Junonemque præcipio; ut simul celebrantes dulce
 „ convivium, Numinibus quæ sunt digna reddamus. Respon-
 „ dit Achatius: *Quomodò hic sacrificabo illi, cujus sepulcrum esse*
 „ *constat in Creta? numquid resurrexit à Mortuis?* „ Similibus
 argumentis L. de Vanitate Idolorum, Idola non esse Deos Cy-
 prianus demonstrat.

X. Ad hæc tamen nihil motus Martianus ait: Aut sacrifi-
 ca, aut morere. Cui Achatius: „ *Hæc, inquit, & Dalmata fa-*
 „ *ciunt latrocinandi arte collentes: ubi angustias viarum & secretu*
 „ *itineris loca obsederunt ad nocendum, venantur singulos tran-*
 „ *scuentes; & ubi quisque viator illuc pedem tulerit, hac pactione*
 „ *constringitur, ut aut pecuniam relinquat, aut vitam. Nemo*
 „ *itaque ibi quid sit rationis interrogat, sed quid possit ille qui co-*
 „ *git. Similis est tua sententia, qui aut injusta impleri præcipis,*
 „ *aut minaris exitium. Nihil formido, nihil timeo. Jus publi-*
 „ *cum punit scortatorem, adulterum, furem, corruptorem sexus*
 „ *virilis, maleficum, & homicidam. Horum si reus sum, autem vo-*
 „ *cem tuam jam me ipse condemno: sin verò ed, quidd Deum qui est*
 „ *verus colo, ducor ad pœnam, non legis sed judicis voluntate*
 „ *condemnor.* Ita infracto animo Achatius. Respondente au-
 „ tem Martino: ego non sum missus judicare, sed cogere;
 „ undè si contemseris, certus esto de pœna: subjunxit: *Et mi-*
 „ *hi præceptum est, ne Deum meum negem. Si tu servis homini*
 „ *fragili atque carnali, citò ab hoc seculo recessituro, quem mox à*
 „ *vermibus scis edendum, quantò magis ego potentissimo Deo obe-*
 „ *dire debeo, cujus virtus constat in secula? Et cujus est illud di-*
 „ *ctum,* „ Qui me negaverit coram hominibus, & negabo eum
 „ coram Patre meo, qui est in cœlis? „

XI. Audiens ista Martianus dixit: quod discere semper
 „ optavi repentè confessus es errorem vestræ persuasionis &
 „ legis. Habet ergo, ut dicis, Filium Deus. Habet respondit
 „ Achatius. Quis est Filius Dei, ait Martianus. Cui Acha-
 „ tius: *Verbum veritatis & gratiæ.* Hoc habet nomen Pinquit
 „ Martianus. At Achatius: *Non de nomine interrogaveras,*
 „ *sed*

„ *sed ipsa Filii potestate. Vis ergo scire? Nomen est Iesus Chri-*
 „ *stus. Tunc Martianus: ex qua uxore conceptus est? At re-*
 „ *ponente Achatio, Deum non hominum more ex contactu*
 „ *puellæ mortalis filium genuisse; sed qui primo homini ex lu-*
 „ *to corpore formato animam spiritumque efflavit, sic Filium*
 „ *Verbum veritatis ex corde suo produxisse, ideò scriptum est:*
 „ *Eructavit cor meum verbum bonum. Quis autem sit, ipse solus*
 „ *agnoscit, nos verò non cognoscimus invisibilem formam sed vir-*
 „ *tem potentiamque veveramur. Hæc aliaque sublimia protu-*
 „ *lit Achatius. Sed Martianus sermonem divertens: Aspice,*
 „ *inquit, Cataphryges homines Religionis antiquæ ad mea*
 „ *sacra conversos reliquisse quæ fuerant, & nobis cum diis*
 „ *vota persolvere: & tu similiter parare festina. Omnes Ca-*
 „ *tholicæ legis collige Christianos, & cum his religionem no-*
 „ *stri Imperatoris imitare. Veniat tecum omnis Populus, qui*
 „ *ex tuo pendet arbitrio. Respondit Achatius: Illi omnes non*
 „ *meo nutu, sed Dei præcepto reguntur. Audiant me itaque si ju-*
 „ *sta persuadeam, sin verò perversa & nocitura, contemnant.*

„ Martianus tamen insistens, trade mihi, inquit, nomina.
 „ Cui Achatius ait: *Nomina eorum cælesti Libro & Divinis*
 „ *paginis sunt annotata. Quomodo ergo oculi mortales aspicient,*
 „ *quod immortalis virtus Dei & invisibilis annotavit? Sed Mar-*
 „ *tianus non acquievit, & adhuc petiit, ubi sunt Magi socii*
 „ *artis tuæ? Asserente autem Achatio Christianos sectam ma-*
 „ *gicæ artis horrere, reposuit Martianus: Ideò Magi estis, quia*
 „ *novum nescio quod genus Religionis inducitis. Tunc Acha-*
 „ *tius: Illos, inquit, destruimus quos vos priùs facitis, & à vobis*
 „ *factos ipsi timetis. Deficient enim vobis Dii, si artifex saxo,*
 „ *aut saxum non abundaret Artifici. Timemus enim nos illum,*
 „ *non quem fabricamus, sed à quo fabricati sumus, qui nos creavit*
 „ *ut Dominus, amavit ut pater, & aeternæ mortis quasi bonus pa-*
 „ *tronus eripuit. Sed quia Martianus adhuc urgebat dicens:*
 „ *da nomina ne poenæ ipse succumbas: respondit Achatius:*
 „ *Ante tribunal ipse assisto, & nomen inquiris? An speras, quòd*
 „ *multos valeas vincere, quem ego solus extinguo? Si cordi tuo*
 „ *nomina sunt, Achatius dicor: & si proprium nomen meum explo-*
 „ *ras vocor Agathos-Angelus & Piso Trojanorum Episcopus &*
 „ *Menander presbyter: fac jam quod placet.*

„ **XII.** Igitur is exitus Disputationis fuit, quam in argumen-
 „ tum sapientiæ & fortitudinis Achatii exscribere volui. De facto
 „ enim quid ultra opponeret Martianus nesciens: „ Recipieris,
 „ inquit, in carcerem, ut Imperator gesta cognoscat: & ejus

„ nutu , quid de te agi debeat , decernatur . Misit ergo Actia :
 „ & lectis omnibus gestis Decius Imperator , altercationem
 „ jam redditæ responsionis admirans , versus in risum est , &
 „ Martino Præfecturam Pamphyliæ mox dedit ; Achatium
 „ verò vehementer admirans , æstimationi propriæ & Legi suæ
 „ reddidit . Hæc facta sunt à Martino Consulari , Imperatore
 „ Decio , 4. Kal. Aprilis anno Christi ut puto 251. , quo Decius
 „ Christiani sanguinis jam satur ac mitior factus plures Chri-
 „ stianorum è carceribus jussit dimitti .

XIII. De hoc Achatio (sub nomine *Acacii*) existimo loqui
 Græcos in Menol. Bas. 29. Martii, ubi ajunt : *Sanctus Pater na-*
ster Acacius Confessor Christi vixit iniquo Decio imperante . Cum
autem Christum predicaret , ab idololatriæ est comprehensus , vin-
ctusque ad Marcianum regionis præfectum adductus fuit , cui ad-
stans nomen Domini confessus est : differuitque de Divinitate , de-
que Christi dispensatione , & de Cherubim , atque Seraphim ; Gra-
corum autem risit Deos , eorumque errorem arguit . Quare gravissi-
mè tortus in carcerem est conjectus . Commentaria interim de eo ad
Decium Imperatorem Marcianus transmisit , qui mandavit , ut san-
ctus absque injuria & cruciatu dimitteretur . Hunc in modum di-
missus , Christi stigmata in carne sua circumferens , pluresque illu-
minans , & ad Christi gregem deducens , miraculis & doctrinis op-
pido clarus in pace requievit . Quibus Græci in his solum ab
 Actis prelaudatis dissident , quòd eum Episcopum non vocant ,
 & quòd dicunt , eum fuisse gravissimè tortum .

XIV. Hic observandum censeo , *Confessoris* nomen diverso
 modo fuisse olim usurpatum , ac modò . Nunc enim illi , qui
 sancta ac laudabili vita vixerunt , & demum sancto ac laudato
 fine eam clauferunt , etiamsi fidem coram tyranno confessi non
 sint , Confessores appellantur . Olim verò Confessores voca-
 bantur illi , qui Christi Fidem interpellati coram Christi hoste
 confessi essent , licet pro ea nec tormenta nec mortem subissent.
 Qui verò pro Christi confessione aliqua tormenta passi fuerant ,
 Martyres dicebantur . Sed si etiam torti in Fide perseverassent ,
 mortem in tormentis , aut ex tormentis animam Deo reddidif-
 sent , Martyres consummati aut coronati nuncupabantur : si
 verò post tormenta superstites vitam in pace clausissent , Marty-
 res purè appellabantur . De hoc videndus S. Cyprianus Epist. 9. ,
 Pamelius in Notis ad illam , Baronius in Martyrol. ad diem
 2. Januarii , & alii .

§. IX.

Martyres in Græcia .

I. **P**ergæ Pamphylia Deciani furoris victimæ fuerunt Papias, Diodorus, Conon, Claudianus, & post eos Nestor ejusdem civitatis Episcopus, de quibus Martyr. Rom. 26. Februarii ita loquitur : *Pergæ in Pamphylia Natalis Beati Nestoris Episcopi, qui in Persecutione Decii cum diu nocturne orationi insisteret, postulans, ut grex Christi custodiretur, comprehensus, ac Nomen Domini mirâ libertate & alacritate confessus, jussu præfidis Pollionis equuleo crudelissimè tortus est, ac demum cum se Christo semper adhasurum constanter profiteretur, crucis suspendio victor migravit in cælum . Ibidem passio Sanctorum Papiæ, Diodori, Cononis, & Claudiani, qui Sanctum Nestorem Martyrio præcesserunt .* De S. Nestore agunt & Græci 28. Febr., eum tamen Episcopum tacent, ac Præfectum non Pollionem, sed Publium appellant .

II. S. Nestoris gesta ex Bollandi ita refert Tilmontius : Irruente Decii Persecutione S. Nestor exemplo S. Gregorii Thaumaturgi Populum suum ad eam declinandam hortatur : omnes tamen exemplum ejus imitati, edictis Imperatoris parere recusant . Quare Infideles videntes, se non posse gregem illum dispergere, nisi percuterent, ac de medio tollerent Pastorem, Irenarchus (idest pacis ac disciplinæ publicæ custos) & Consiliarii miserunt, qui eum captum traherent . Tunc S. Præsul cum suis domi preces compleverat dicendo, Amen ; cum pulsato ostio, & rogati quid vellent, eum demissâ fronte salutantes, dixerunt, se nomine publici Consilii eum accersere . Hoc audito signans se Nomine Jesu Christi cum illis abiit . Cumque ad plateam pervenisset, Consiliarios vidit ex suis sedibus omnes assurgentes, eumque rogantes, ut sedi sibi paratæ unâ & ipse assideret . At ille se excusans petiit, quam ob causam illum advocassent . Tunc Irenarchus ei dixit, sibi notum esse Imperatoris mandatum ; idè eum rogare, ut spontè obediret, ne cogeretur adversus eum agere secundum rigorem justitiæ . Cui infracto animo Beatus Nestor respondit : ego obedire teneor mandatis Imperatoris Cœli, nec possum adorare Dæmones, quales vestros Deos esse, & rationibus & factis ostendam . Cumque Irenarchus comminaretur ei tormenta, Nestor respondit se non timere tormenta, nisi ea, quæ Deus suus comminabatur .

III. Tra-

III. Traditus igitur duobus militibus fuit, ut Pergen ubi tunc Pollio Proconsul erat duceretur, ad quem Consiliarii Magydda litteras dedere, quibus accusabatur, quod Deos adorare nollit, & alios ab eis adorandis retraheret. Harum litterarum exemplum affert Baronius ad ann. 254. num. 23. Pollio igitur ab Irenarcho certior factus Nestorem accersivit, & prius blandè monuit, ut Diis sacrificando tormenta, quæ illi parata erant, evaderet. At Nestor elatis ad cælum oculis dixit: quamvis adversus me omnia mundi supplicia, bestias, ignem, gladios, aliaque paraveris, numquam dum erit in me spiritus vitæ Jesu Christo meo renuntiabo. Tunc furore percitus Judex cum equuleo imponi jussit, ferreis unguis lacerari, fustibus etiam cædi: sed videns eum in his omnibus hilarem ac Deum benedicientem, stupens ait: Adeone fides in homine supplicio Crucis affecto? At Nestor: hæc, inquit, mea gloria est pro Christo pati & pro Christo mori. Tunc Judex ait. Quandoquidem cum tuo Christo magis quam nobiscum vis esse. Crucem etiam cum ipso ascende. Executioni protinus demandatâ sententiâ Sanctus Prasul Cruci fuit appensus, ubi post adhortatos Fideles ad constantiam, tandem spiritum emisit. Contigisse hoc fertur 26. vel 28. Februarii anno 250.

IV. Alterius Nestoris unâ cum Tribimæo Pergæ similiter sub Decio passi memoriam colunt Græci in Menol. Basil. die 1. Martii his verbis: *Imperante impio Decio, Sancti Martyres Nestor & Tribimæus ex Urbe Perge Regionis Cibarraotarum, eo quod Christiani essent, & Christum libere audacterque predicarent; apud Præsidentem Regionis delati fuerunt. Hic verò confestim missâ Militum multitudine victos eos adduci jussit, & coram Tribunali suo sisti, omniaque tormentorum instrumenta in eorum conspectu exhiberi. Sed cum illos conspiceret & suas minas contemnere & Christum magnâ voce confiteri, præcepit, eos denudari, excruciatos boum nervis crudeliter cædi, ac deinde suspensos lacerari, quousque eorum viscera apparerent. Caterùm videns, illos suum erga Dominum nostrum Jesum Christum animum habere immutabilem, à ligno depositos licetoribus tradidit, à quibus veneranda illorum capita gladiis abscissa fuerunt, atque ita Martyrio cum gratiarum actione consumtos Dominus suscepit.*

V. Sanctus Conon à Græcis in Menol. Basilii die 6. Martii celebratur his verbis: *Hic Decio imperante ex Nazareth Galilææ oriundus erat. In Regionem verò Pamphyliæ profectus exiguum terra locum excolens & in hortum convertens, explantatis ibi oleribus victum sibi ac hospitibus pauperibus parabat. Erat autem moribus sim-*

simplex, adeò ut cùm adessent, qui ipsum comprehenderent, & ad Præsidentem adducerent, ut tormentis subiceretur, quodd Christianus esset, eumque cum ludibrio salutarerent, ipse salutationem rependerit: cùmque dicerent, quodd Præsides vocasset eum, responderit: quid enim opus est illi operâ meâ, præsertim cùm Christianus sim? Vincit autem & ad Præsidentem adductus, cùm compelleretur, ut Idolis sacrificaret, altum ingemuit & Præsidi ait: Utinam, ò Præsides, & tu Idola abnegares & ad Christum accederes. Ergo spondyliis (pedum nervis) perforatis clavisque ferreis confixus, ante currum compulsum currere, vitam consumnavit. Similia habet Martyrol. Rom. eâdem die. An iste S. Conon sit idem, de quo supra ex Martyrol. Rom. 26. Februarii cum aliis mentionem feci, incertum est; diversum putarim.

VI. S. Isidori nomen, qui sub Decio in Insula Chio Arcipelagi celeberrimâ passus fuit, illustre est in Ecclesia: Martyrologium tamen Romanum agit de S. Isidoro Martyre sub Decio die 5. Februarii, quem dicit Alexandria à Numeriano Duce Exercitus capite plexum. Et iterum 15. Maii de S. Isidoro commemorat, quem dicit passum fuisse in Insula Chio, in cuius Basilica extat puteus, in quem fertur fuisse injectus, de cuius aqua infirmi sepius potati sanantur; at sub quo fuerit passus silet. Ex hoc mihi oritur dubium, an de uno & eodem, an de duplici Isidoro loquatur.

Dubium tamen videntur tollere Græci, qui de uno tantum Isidoro loquentes hunc dicunt Alexandria quidem natum, sed in Insula Chio fuisse sub Decio capite plexum; at de puteo nihil dicunt. Ita ergo in Menol. Basilii 14. Maii dicunt: *Isidorus Christi Martyr Decio imperante fuit ex Urbe Alexandria. Cùm verò Optionis (idest Decurionis Militum adjutoris) munere in Militia fungeretur, in Insulam Chium profectus cum classe navium, quibus Numerius præerat, apud hunc à Julio Centurione delatus est, quodd Christianus esset. Comprebensus igitur & coram ipso adductus atque interrogatus, an Christum profiteretur: Profiteor, inquit, Christum esse Cæli, terræ, marisque Factorem, & credo in ipsum tanquam in verum Deum ac Dei filium, pro hominum salute ex Sancta Virgine Maria natum, hominemque factum sine semine & corruptione. Quibus doctrinis ac sermonibus illum obstupesciens, diversis primùm tormentis excruciatu fuit. Cùm verò immutabilem animum ergo Christum haberet & supplicia generosè perferret, capite demum plexus Martyrii coronam accepit.*

VII. Creta quoque Maris Mediterranei Insula eisdem Decii temporibus suos Christo obtulit Martyres. Hos decem fuisse me-

memorat Martyrol. Rom. 23. Decembris, nimirum Theodulum, Saturninum, Euporum, Gelasium, Eunicianum, Zeticum, Cleomenem, Agathopum, Basilidem, & Evaristum, qui omnes capite cæsi sunt. Horum agonem & singulorum patriam recensent Græci in Menol. Basilii eâdem die his verbis: *Isti, Decio imperante, ex Insula Creta suere, non tamen ex eadem Civitate, sed ex diversis ejusdem Regionis locis. Et ex Metropoli quidam Gortyna quinque ortum duxere, Theodolus, Saturninus, Euporus, Gelasius, Eunicianus; ex Gnosso verò Zoticus; ex Epinio Leomenes Pontius; ex Panormo Agathopus; ex Cydonia Basilides; & ex Heraclea Ewarestus: qui comprehensi ab Infidelibus Præfecto Insula traduntur: at ille Populo imperavit, ut viñctos ad Aras Idolorum circumducerent, & nisi immolarent, gravissimè eos, ut cuique libuisset, torquerent. Triginta itaque dierum spatio circumducuntur, illudantur, verberantur, lapidantur, per stercora raptantur: demum Præfecto pro Tribunali sedente coram eo decollantur, ad extremum spiritum gratias Deo agentes. Quis tantam in carne fragili constantiam, & tantis tempore ac poenis probatam, ut opus supra humanum & planè Divinum non demiretur?*

„ Celeberrimi habiti sunt hi decem Cretenses Martyres
 „ (notat Baronius ad diem 9. Julii) vel ex ea causa, quòd illo-
 „ rum meritis ea Insula custodiens semper Catholicam Fidem,
 „ illæsa permanserit ab omni hæresum labe, prout Martyrius
 „ Episcopus Gortynæ in Creta unà cum collegis Episcopis scri-
 „ bens ad Leonem Magnum Imperatorem recenset his verbis: „
Dicimus Tranquillitati tuæ, quia ab initio totius hæretica blasphemie in experta est vestra Creta, decem Martyribus passionis tempore deprecantibus, ut libera à tentationibus hæreticis, semper ab æstu eorum Provincia servaretur. Quam Epist. dicit Baronius extare tom. 2. Conc. edit. 2. Colon. pag. 275. & 276., modò autem edit. Harduini tom. 1. pag. 767.

VIII. Porro præfatorum Cretensium Martyrum in Fide constantiam fructum fuisse instructionis S. Cyrilli Gortynæ Episcopi, qui sub Decio pariter passus est, probabiliter censet Surius & Baronius ad ann. 154. num. 16.. Ejus Acta, quæ Baronius reputat sincera, ferunt, Cyrillum ab infantia fiduciâ in Deum fuisse repletum, sic ut interdum parentes ipsos deserens ad Servos Dei ubicumque eos inveniebat accederet, quò ab eis Fidem edoceretur, in eaque magis confirmaretur. Cùm ergo ejus pietas ætate crevisset, vix trigesimum quartum annum attingens Episcopus eligitur. Quo in munere boni Pastoris partes exercens gregem sibi commissum aluit & simul auxit, Infidelium multos
 ad

ad ipsum trahendo . Quinquaginta annos indefessâ vigilantia laborans ad octuagesimum quartum ætatis pervenerat omnibus amabilis , & vel ipsis Christi hostibus admirabilis , cùm Decii Persecutione irruente à Lucio Præfecto captus Diis sacrificare jubetur . Lucius cœpit eum adhortari , ut suæ senectutis misertus ad obediendum Decii mandatis flecteretur . At Cyrillus , mea , inquit , senectus nihil est ; Deus enim mihi promittit , me sicut Aquilam renovandum fore : alteri quàm ipsi sacrificare non possum , ut tu jubes ; quia qui aliis Diis immolaverit , exterminabitur à terra . Respondente autem Lucio : tu qui sapiens haberis , talem te esse ostende , salutis tuæ obedientia consulendo : reposuit Cyrillus : imò insipiens essem , si postquam totâ vitâ meâ alio s docui , ne Idolis immolando parerem , ipse hoc faciendo dignus reprobatione evaderem . Mea ergo salus est , ut eorum , quæ filios meos docui , ipse me exemplum præbeam .

IX. Videns Judex constantiam sancti Viri , ejusque responsis confusus , vivum eum comburi imperavit , statimque laudes Deo canens in ignem injectus fuit . Porro cùm qui aderant Fideles corporis ejus reliquias colligere exoptarent , apparuit in medio ignis stans manusque ad Cælum tendens illæsus , ut sicut tres Pueri è fornace Babylonica , ita & ipse è rogo illæsus exierit . Hoc prodigio obstupesciti Infideles , rem Judici nuntiaverunt : qui sanctum Virum ad se vocatum , videns eum à flammis prorsus innoxium exiisse , non potuit , quin Deo Christianorum gloriam daret , ideoque Cyrillum ad suos liberum dimisit . Accurrerunt proinde omnes , & felicem se quisque existimabat si eum vel tangere vel ad eum accedere sibi licuisset . Hinc multi erroribus relictis Fidem Christi amplectebantur . Inter adeò gloriosos eventus solus Cyrillus tristabatur , quòd dignus habitus non esset mortem pro Christo pati . At Deus hæc gloriâ eum privare noluit : videns enim Lucius ex hoc prodigio tot ad Christum transire & idola deferere , pœnitentiâ ductus , quòd erga ipsum humaniter se gessisset , finalem sententiam protulit , quâ S. Cyrillum decollari jussit . Sicque die 9. Junii (ut apud Latinos) glorioso Martyrio vitam coronavit .

X. Ita ad eandem diem Martyrol. Rom. his verbis : *Gortyna in Creta S. Cyrilli Episcopi , qui in persecutione Decii sub Lucio Praside flammis injectus , cùm incensis vinculis evassisset illæsus ac stupore tanti miraculi à Judice dimissus esset , rursus pro instanti & alacri Fidei prædicatione factâ de Christo , ab eodem capite plexus est .* Græci autem in Menol. Basilii eâdem die clariùs sic habent : *Sacrâ Martyr Cyrillus Christianâ Fide Divinisque autus virtuti-*

bus, Cretensis Ecclesia Pontifex constitutus fuit. Cùmque gregem benè gubernasset, atque Domini plebem doctrinâ & adhortationibus auxisset, commotâ Persecutione, ab Idololâtris comprehensus & ligatus Præsidi sistitur: atque in ignem projectus, indeque illâsus egressus, vinculis quibus vinciebatur concrematis, & unâ cum lignis quibus flamma alebatur in cinerem redactis, à Præsidi dimissus fuit factum mirante; & tunc quidem res ita se habuit. Postmodum verò Præsides cernens complures Christi Fidem amplexari, Imperatoris indignationem veritus, Sanctum comprehensum, etiam invitus capite damnavit: & per hunc modum vitam immortalem perpetuamque Regni celestis beatitudinem eidem comparavit.

XI. Corinthis quoque illustrium agonom Decio imperante theatrum fuit. Primus qui à Latinis die 10. Martii celebratur extitit SS. Codrati, Dionysii, Cypriani, Anecli, Pauli & Crescentis, qui Corinthi sub Jafone Præsidi cæsi gladio fuere. De his fusiis Græci in Menol. Basilii eâdem die hæc habent: *Imperante Decio cùm Persecutio mota fuisset, Christiani omnes aut capiti mactabantur, aut fugientes in montibus ad tempus abscondebantur. Tunc etiam mater Codrati ex Urbe Corinthiorum oriunda, fugâ elapsa venit in montem & in latebra degit: & quia prægnans erat, peperit filium, quem Codratum nominavit, nec diu postea vixit velis- to filio adhuc infante mortua. Nutriebatur autem ille à nubibus supra ipsum coeuntibus & aquam adferentibus potumque ei præbentibus. Procedente verò tempore cùm ætatem juvenilem attigisset, cognoverunt eum aliqui, & ad eum accesserunt, ex quibus erant Cyprianus, Dionysius, Aneclus, Paulus & Crescens, quos omnes regebat Sanctus Codratus & veritatem docebat. Post aliquod dein tempus ab Idolorum cultoribus traditi sunt Præsidi & vincli Corinthum adducti, ac dein tormentis subiecti, cùm usque ad suum Christum predicarent, capite plexi sunt. Ita Græci qui deinde Martyrium S. Dionysii separatim enarrant. Ea tamen quæ de S. Codrato dicunt, quod scilicet mortuâ matre infans nutritus fuerit nubium aquâ vel rore nutritus, aliquibus absque fundamento dici putatur: & similiter si sub Decio natus asseritur, sub eodem adulescere & pati non potuit, cùm Decius duobus vix annis Imperium tenuerit. Sed hic de circumstantiis non curo: satis enim mihi est, hosce Martyres verè pro Christo fuisse passos.*

XII. His adjungunt Græci 31. Januarii in Menol. Basil. Victorinum, Victorem, Nicephorum, Claudianum, Diodorum, Serapionem, & Papiam Corinthi similiter sub Decio passos & singulorum agones ita describunt. *Decio Imperatore fuerunt isti ex Urbe Corintho: comprehensam & Tertio Proconsuli traditi gra-*
vissi-

vissimè torti sunt. *Victorinus* enim eruto oculo dextro, manibusque & pedibus abscissis, in ingenti mortario marmoreo contusus decessit. *Victor* præcisâ linguâ eâdem ratione in mortario contunditur. *Nicephorus* tamdiù premitur, donec sanguis è naribus erumperet, deinde per capillos suspensus, tandem in eodem mortario conciditur, quoad animam efflaret. *Claudianus* mutilatis manibus ac pedibus & suspensus ex hac vita discessit. *Diodorus* igne consumtus est. *Serapion* inverso capite suspensus decollatur. *Papias* denique manibus pedibusque amputatis, saxo alligatus in profundum dejicitur. De eisdem agunt Latini 14. Februarii, sed supponunt, eos fuisse passos in Ægypto sub Numeriano Imperatore & Duce Sabino, ut ait Ado cum aliis. Sed si hoc dicatur, sub Decio, non sub Numeriano passi fuerunt; *Sabinus* enim, qui alio nomine *Tertius* fortè vocabatur, Ægypto præsidebat anno 250., quo Decius imperabat. Quòd verò Græci eos passos fuisse dicant *Corinthis*, Latini verò in Ægypto componi posset dicendo *Corinthis* quidèmfuisse, sed in Ægyptum ad Martyrium traductos, vel *Corinthis* fuisse passos, sed eorum corpora fuisse postea in Ægyptum translata.

XIII. *Corinthis* quoque iisdem temporibus sub Præside *Venusto* Tertii successore, & proinde sub Decio, *S. Leonidem* & plures sanctas Mulieres vitam pro Christo dedisse, sentiunt *Bollandistæ* 10. Maii: Græci 16. Aprilis in *Menol. Basil.* hæc habent: *Hi Sancti Martyres ex Græciæ Regione fuerunt. Ac Leonides quidèmf cum in Festo Resurrectionis Domini nostri Jesu Christi coram frequenti Populo in Ecclesia psalleret Festumque ageret, comprehensus fuit ab Idololatriæ & vinctus Corinthum adductus. Reliqui verò Viri ac Mulieres, qui ex diversis locis erant, Provinciæ Præsidi oblatis fuerunt. Qui simul vinculis constricti & Sancto Leonidi adjuvanti, in carcerem detrusi sunt. Deinde è carcere educti, iterùm Corinthi Præsidi sistuntur. Cùmque ab eo impellerentur Christum negare, & Idolis sacrificare, nec ad id adduci possent, Leonides quidèmf ligno suspensus crudeliter depexus (laceratus) est, facibusque in lateribus ustulatus, deinde è ligno depositus, unâ cum Sociis Sanctis suis in profundum maris demersus fuit. Hos eisdem Martyres (omisso tamen Leonide & additis Callisto & Chavifio cum aliis septem) indicare videtur Martyrol. Rom. 16. Aprilis dicens: Corinthi natalis Sanctarum Martyrum Callisti & Charifii cum aliis septem, qui omnes in mare demersi sunt.*



§. X.

De Septem Dormientibus, Christophoro & Themistocle.

I. **H**Orum Martyrum, qui communiter *Septem Dormientes* nuncupantur, nomina ex Martyrol. Rom. 27. Augusti sunt Maximianus, Malchus, Martinianus, Dionysius, Joannes, Serapion, & Constantinus, qui Ephesi ponuntur. Aliter tamen eorum nomina referunt Græci in Menol. Basilii 23. Octobris, ubi commemorantes manifestationem eorum & narrantes historiam ajunt: *Hi Sancti Maximilianus, Samblicus, Martinianus, Dionysius, Joannes, Constantinus, & Antoninus, imperante Decio Ephefi claruere. Ob Christi autem confessionem comprehensi & ad Imperatorem producti, cum tempus ad deliberandum petissent, idque impetrassent, in montem quendam profugientes, in speluncam sese abdidere, ibique obdormierunt, obstruso speluncæ aditu. Trecentesimo septuagesimo secundo post anno Theodosio Juniore imperante, cum Hæretici dogma movissent, negando Resurrectionem; eaque res Imperatorem maximè sollicitum haberet, Deus, ut in omnium animis certam Resurrectionis fidem confirmaret, apertâ speluncâ, voluit eos vivos excitare: ex quibus Samblicus sumto Decii nummo descendit in Urbem ad coemendos cibos, ut qui besternâ die dormisset: sed cognitus adductusque ad Episcopum, rem omnem, uti se habuerat, exposuit. Igitur cum restatam Resurrectionem fecissent, iterùm mortui in speluncam illati sunt.*

II. Hanc historiam refert etiam Photius Bibl. Cod. 253. pag. 1309., aliquâ tamen varietate: nam vult hos septem Juvenes, cum Decius aliò transmigrasset (post Fidei coram ipso editam confessionem) securitate inventâ in speluncam in monte juxta Ephefum fugisse, & servitum ipsis in iis, quæ corporalis necessitas postularet, ab uno eorum, qui Samblicus fuisse perhibetur. Paulò post Imperator, fugâ & loco ubi essent, & vivendi ratione exploratâ, irâ plenus, obstrui speluncæ os jussit, ut fame Martyres enecarentur. Hoc tamen coherere non potest, quod & ipse dicit, nimirum eos in spelunca mansisse 372. annis, & inde exisse, dum Theodosius annos 38. Imperii sui ageret: nam cum annus 38. Imperii Theodosii incidat in annum Christi 445., fit, ut si hi Martyres sub Decio speluncam ingressi sint, hoc fuerit anno Christi 250. & sic nec dum ducentis in ea annis, antequam apparerent, mansisse.

III. An verò dicantur *Dormientes*, quia toto illo tempore vivi

vivi somno sopiti fuerint : an verò revera mortui Theodosii temporibus fuerint è morte excitati , controvertitur . Eos à temporibus Decii usque ad extrema Theodosii Junioris tempora , ferè nimirum ducentis annis intra specum somno captos reverà dormisse , senserunt ex Græcis Metaphrastes , qui hujus rei historiam texuit , quam recitat Surius tom.4. 27. Julii , Nicephorus lib.14. cap.45. , Cedrenus in Compend. anni 23. Theodosii ; ex Latinis Greg. Turon. , Sigebertus Chron. ann. 447. Ab opposito autem eos fuisse verè mortuos , & à morte excitatos Theodosii tempore apparuisse , ac *Dormientes* dictos consueta Divinæ Scripturæ phrasi , quæ eos , qui piè religiosèque vitâ functi *Dormientes* consuevit appellare , probabilius videtur ; & ita sentiunt Græci in Menologio supra relato , & Photius ipse . Et meritò , Nam si ipse cum aliis Græcis vult ; hoc miraculum fuisse à Deo factum ad confirmandam fidem Resurrectionis , quæ tunc impugnabatur ; hæc veritas certè non probaretur , si non à morte , sed à somno tantum , quo toto illo tempore fuerant oppressi , excitati fuissent .

IV. Nutare tamen hujus mirabilis facti quomodocumque expositi & causam & modum & factum ipsum sequentia argumenta ostendunt : Causam quidem ; nam dicunt , hoc miraculum fuisse à Deo patratum , ut fides Resurrectionis , quæ tunc impetebatur , confirmaretur : at nulla temporibus Theodosii Junioris legitur exorta hæresis , quæ veritatem Resurrectionis negaret . Scio , hoc asserere Photium citato Cod. 253. , ubi ait : *Theodorus quidam , utinam ita non fuisset , Episcopus Aegæorum erat . Hic , nescio , quâ ratione , luto infidelitatis absorptus , graveolentes evomit voces , mortuorum resurrectionem negans , & multos cum suis sectariis eodem errore involvens . Hoc miraculo clarum resurrectionis testimonium in omnem terram divulgante , ipsi , & quicumque Gentiles reliqui erant , partim rubore confusi obmutuerunt , partim certam firmamque resurrectionis spem conceperunt .* Hæc Photius . Sed de hoc Theodoro fidem resurrectionis Theodosii tempore negante nulla fit in historiis mentio , imo nec tunc de resurrectione quæstionem exortam ex eo probatur , quòd nec in Concilio Ephesino sub eodem Theodosio celebrato , nec in Synodo Chalcedonenſi post illud proximè coactâ ulla unquam de hujusmodi hæresi mentio facta invenitur , quæ prima omnium Patrum sententiâ damnari debuisset .

V. Nec magis certus videtur modus ; quo ista vel dormientium expergefactio vel jam mortuorum suscitatio facta fuit . Ut enim ex Menologio dictum est , & clariùs exprimit

Pho-

Photius ibidem, *Adolius, ad quem tunc inquit ille pertinebat, in quo spelunca excisa erat, pecorum stabulam ferroo rogit extruere, resque intra biduum confecta est: domusque adificata translatis lapidibus, qui os spelunce obstruxerant. & manserant: sique aperta spelunca est. Martyres qui illis jacebant inaudito Dei judicio rediviui emittunt famelicum, qui solitus erat olim ipsis ministrare, cibos, emptum, atque ullatum. Qui ingressus urbem Ephesum comprehenditur, ubi eos quos proferebat humos, tanquam thesaurum antiquum aruisset. Exindeque Martyrum miraculum ad omnium aures penetravit, ac veluti res miranda proposita fuit. Ita Photius, qui antea descripserat, quo modo ad tanti prodigii famam Imperator ipse & Marus tunc Ephesi Episcopus accesserint ad speluncam, & Martyres allocuti ab eis didicerint omnia, quæ ipsis acciderant: quo facto in conspectu Imperatoris & Episcopi in ipso antro Sancti Martyres in Domino iterum quieverint: *Up omnibus (inquit) eorum mors clarè patuerit, & incognita prius ipsorum ex hac vita communi migratio.**

VI. Prodigium reverà mirabile & inauditum, & quoad factum, & quoad modum quo factum est: Sed optandum esset, ut solidioribus fundamentis esset innixum, & maximè testimonio eorum, qui vel coævi vel propinquiotes illius temporis gesta accuratè scripsere. Factum enim adeò publicum & solemne & ante inauditum silentio omitti non debuisset. Et certè Prosper in Chronico, Marcellinus, & Evagrius, qui omnia sub Theodosio Juniore gesta studiosè enarrant, hoc adeò singulare posteris tradere non neglexissent. Cum ergo de hoc nec verbum faciant, non leve fundamentum dubitandi viro prudenti præbent. Accedit, quòd Ephesinus Episcopus, sub quo hoc contigisse narrat Photius, non erat Marus, ut ipse scribit, sed Stephanus, qui in eam sedem vi armorum fuit intrusus, imò communione Dioscori & Euthychetis pollutus, ut habent Acta, quæ recitantur in Synodo Chalcedonensi Act. 1. & 11. Unde non est credibile, septem Dormientes ejus communione inquirari voluisse.

Quid verò in hac causâ decernendum sit, meliori judicio relinquo. Hoc mihi satis est, hos Sanctos Martyres gravia sub Decio passos esse, ac in spelunca reclusos in Domino obiisse, & si velis, etiam eorum corpora Theodosii Junioris tempore in specie fuisse reperta. Atque ideò ab Ecclesiâ anniversariâ solemnitate meritò celebrari. An verò toto illo tempore somno sopiti manserint non mortui, vel si mortui fuerint postea adeò mirabiliter excitati, ac iterum mortui, cum Baronio nec prorsus nego, neque affirmo.

VII. Sancti Christophori celebris quoque memoria est tum apud Latinos tum apud Græcos. Hoc tamen non obstante, quidam præsertim ex Modernis totam Christophori historiam allegoricam esse, nec unquam fuisse hominem, qui tali nomine vocaretur, sed esse nomen merè appellativum, quod cuique Christum corde ferenti attribui possit, pertinaciter de more contendunt; irridentes Ecclesiam, quòd eum ceu singularem Martyrem colat. At si hoc dicere licet, licebit etiam dicere S. Ignatium Martyrem, qui ut suo loco dixi, *Theophorus*, idest Deifer vocabatur, non fuisse singularem hominem, ac verum, sed allegoricè efformatum, nec Romæ à Leonibus discerptum: quod tamen dicere, puto, contra totam antiquitatem non audebunt.

VIII. Nec desuere ex Catholicis, qui idem sentire visi sunt, inter quos citatur Laurentius de Villa Vincentio de Ratione studii Theol. L.3. cap. 6. & 7., ubi vult quod Pictura Christophori *adumbrat Evangelii præconem, qui dum Christum extollis & circumfert visendum cognoscendumque omnibus, periclitatur in procellis & fluctibus hujus mundi, atque à malis hominibus tanquam monstribus ac belluis marinis undique infestatur: sed tamen indefessè respectans ad lucernam Verbi Dei, quam Sancti Patres, Prophetae & Apostoli de Ecclesia prodeuntes accensam ostendunt ac protrudunt; nixus præterea spe jucundissimorum fructuum imposterum, vel post hanc vitam recipiendorum (quos baculus supernè virens & florens promittit) & contentus tenui sorte, victu nimirum & vestitu (testantur id in pera panis & pisciculus vili parabilis: item vestis curta & minimè laciniosa) tandem ad litus & stationem contendit, ubi quiete & gloriâ aternâ cum Christo, quem gestavit, fruatur.* Hæc vir iste Catholicus: Quæ, si admittâ S. Christophori historiâ ad solum quo pingitur modum, quasi allegoricè adumbrantem ejus constantiam in portando suâ prædicatione Christum, restringeret, admitti possent. Sed totam Christophori historiam allegoricam ponere novam & veritati contrarium est. Unde Molanus L.3. cap. 27. de Imaginibus, ait: *Quæ jam inculcata sunt pertinent ad Martyrem Christophorum; nec tolerandum arbitror, quòd ab Hæreticis trahantur ad adumbrandum Evangelii præconem, quasi tota historia Martyris Christophori velut fabula & fæmentum sit rejicienda.*

IX. Igitur cum Ecclesia sulca Traditione, & Patres satis antiqui, ut Gregorius L.8. Epist. 32., modò L.10. Ep. 33., ubi Monasterii S. Christophori meminit; Eulogius L.2. cap. 4., & Martyrologia S. Hieronymi, & cætera à 9. seculo, ut Ufuardi Bedæ, Adonis, Romanum, & Græcorum Menologia concordi-

diter S. Christophorum veluti singularem personam patriâ Lyciensem & Martyrem sub Decio agnoscant, absque temeritatis nota puto non esse recedendum. Censuerim tamen, nonnulla in eo representando per allegoriam in picturis, seu imaginibus exprimi, denotantia ejus præcipuas dotes, ut quod formâ procerâ & quasi giganteâ pingatur ad ejus constantiâ magnitudinem exprimendam, cui annectuntur Christus sub forma pueri ejus humeris insidens, fluvius quem tranat ipse baculum tenens manibus & Christum humeris, aliaque hujus generis. Quæ omnia allegoricè sequentibus carminibus egregiæ exponit Hieronym. Vidas Albæ Episcopus.

*Christophore, infixum quod eum asque in corde gerebas,
Pictores Christum dant tibi ferre humeris,
Quem gestans quoniam multa es perpeffus amara,
Te pedibus faciunt ire per alta mari.
Id quia non poteras, nisi vasti corporis usu,
Dant membra immanis quanta gigantis erant;
Ut te non capiant quamvis ingentia templa;
Cogeris & rigidas sub jove ferre hyemes.
Omnia quod victor superasti dura, virentem
Dant manibus palmam, qua regis altus iter.
Quod potis ars tibi dat, nequeat cum fingere vera,
Accipe cuncta bono Tu bonus ista animo.*

Hiscæ pius poeta exponit, quid exprimere Pictores velint, dum S. Christophorum pingunt, nimirum in ejus humeris Christum ponunt, quia eum corde gestabat. Formant ipsum giganteæ staturæ, & mare transeuntem, vel fluvium, ut exprimant magnitudinem animi in superandis hujus seculi fluctibus, ac deum in signum victoriæ dant ei palmam in manu.

X. Porro Veteres consuevisse insignium virorum Imaginibus aliquod symbolicum inferere, colligitur ex eo quod narrat Eusebius L. 3. de Vita Constantini cap. 3. nimirum quod pius iste Imperator *In sublimi quadam tabula ante vestibulum Palatii posita cunctis spectandum proposuit salutare quidem signum capiti suo superpositum: infra verò hostem illum & inimicum generis humani, qui impiorum tyrannorum operâ Ecclesiam Dei oppugnaverat, sub Draconis forma in præceptis ruentem. Quippe Divina oracula tu Prophetarum libris draconem illum & sinuosum serpentem appellaverunt: ideòque Imperator draconem telis per medium ventrem confixum & in profundos maris gurgites projectum sub suis suorumque liberorum pedibus cerâ igne resolutâ depingi proponique omnibus voluit: hoc videlicet modo designans, occultum humani generis hostem, quem*

quem salutaris illius tropæi, quod capiti ipsius superpositum erat, vi ac potentiâ in exitii barathrum detrusum esse significabat: Simili ratione (notat Baron. ad 23. Aprilis) consuevit pingi S. Georgius ut eques armatus; qui hastâ cuspide draconem interficit, juxta quem ponitur Virgo supplices manus tendens: quæ secundum historiam nequeunt intelligi, sed solum secundum symbolicam significationem. Idem de Imaginibus S. Christophori ex dictis judicium ferendum est.

XI. Statuto, Christophorum, de quo agimus, esse nomen proprium singularis Martyris, & non nomen officii & merè appellativum, optandum esset, ut de ejus conditione, gestis, & martyrio haberemus Acta sincera; licet enim varia circumferantur, depravata tamen vel magnâ correctione indigentia existimantur. Baronius in Notis ad diem 25. Julii dicit, S. Christophorum sub Decio esse passum unâ cum cæteris Christianis commilitonibus, colligi ex veteri hymno, qui legitur in Breviario Toletano S. Isidori, quo etiam ejusdem Martyris Acta describuntur, quæ sibi magis arrident. Ex præfato Hymno refert præfatos versus.

*Elegansque staturâ, mente elegantior,
Visu fulgens, corde vibrans, & capillis rutilans,
Ore Christum, corde Christum Christophorus insonat.*

Et in Capitulo: *De minimo grandis, ut ex milite Dux feret fidelium Populorum &c.* In eodem etiam Toletano Breviario dicitur, ibi assertari ejusdem Martyris Reliquias; frequentem fuisse in Hispania ejus cultum; & Cordubæ sub S. Christophori nomine extitisse Ecclesiam & Monasterium, cujus meminit S. Eulogius.

XII. Romanum Martyrologium die 25. Julii ejus agonem ita celebrat: *In Lycia Sancti Christophori Martyris, qui sub Decio virgis ferreis attritus, & à flammæ æstuantis incendio Christi virtute servatus, ad ultimum sagittarum ictibus confossus, Martyrium capitis obruncatione complevit.* Menologium autem Basilii die 9. Maii hæc habet: *De hoc Sancto quædam mirabilia atque stupenda apud nonnullos perhibentur, quod scilicet faciem canis primùm habuerit, hominesque devoraverit, ac tandem cum in Christum credidisset, formam mutaverit. Verùm non ita res se habuit: sed sic illum aliqui fuisse suspicati sunt, quod Ethnicus esset & ferrox ac terribilis. Fuit tamen Decio imperante, & à Comite in prælio comprehensus, cum græcè loqui nesciret, Deum rogavit: & missus ei fuit Angelus, inquit: confortare: tangensque labia ejus fecit ut græcè loqueretur. Urbem itaque ingressus Christum præ-*

dicabat. *Missi autem satellites comprehenderunt eum. Sed cum virga ipsius germinasset, crediderunt in Christum, & unà cum ipso baptizati sunt Antiochia à S. Babyla, ubi & Christophorus appellatus fuit. Postea ad Imperatorem adductus, primum quidem plurimis cruciatibus subicitur, ac tandem capite obruturatur. An hæc omnia vera sint, aequus Lector judicet. Mihi sat est, quòd utraque Ecclesia Latina & Græca S. Christophorum inter veros Martyres veneratur.*

XIII. Græci similiter ac Latini die 21. Decembris S. Themistoclis agonem celebrant. De eo Martyrol. Rom. hæc habet: *In Lycia Sancti Themistoclis Martyris, qui sub Decio Imperatore pro Sancto Dioscuro, qui quarebatur ad necem, se offerens, equuleo tortus, raptatus, ac subtilibus casus Martyrii coronam adeptus est. Fusiùs autem Græci in Menol. Basil. ajunt: Sanctus iste Themistocles, Decio Imperatore, ex regione Lyciæ oves pascebat in eo monte, ubi Persecutionis vitanda causâ Sanctus Dioscorides latebat. Cùmque milites missi à regionis Præsente ad comprehendendum Sanctum Dioscoridem, hunc non invenissent, inciderunt in Themistoclem oves pascentem, eumque de Dioscoride interrogarunt. At ille, qui probè noverat, ubi is lateret, non tamen voluit illum prodere, sed se ipsum pro eo tradidit, confessus se Christianum esse. Quare vinculis contrictus ad Præsente adducitur: Christumque coram ipso professus supinus bumi sternitur, ac tandè in ventre caditur, dum in duas partes scinderetur, & intestina d'ssuerent. Deinde in equuleum actus, & postea depositus, super ferreis tribulis raptatur, atque ita spiritum Domino tradidit. Conferat hæc Lector: unus latet ne comprehendatur, alter ut loco ejus comprehendatur, non quæsitus se Christianum prodit, & atrocia tormenta ac mortem alacriter superat: & in uno humanam imbecillitatem excusabit, in isto autem Divinam Gratiâ supra naturam agentem inveniet.*

§. XI.

Persecutionis Decii exitus: & Cornelii electio.

I. **C**Um ex dictis & aliis, quæ omitto, quia in Martyrologiis quisque legere poterit, Decii Persecutio tot per totum Orbem Martyres Christo dederit, ut visa sit Christianum sanguine totum mundum inundare, cuiquam in mentem venire poterit, tantâ strage ad extremam desolationem fuisse Ecclesiam redactam, & Christi Nomine toto ferè Orbe deleta, idola eorumque

que cultum triumphum reportasse. At si quis ita cogitet, nescit, humanos conatus contra Dei potentiam inanes esse: nescit, quod qui dixit, contra Ecclesiam quam fundabat, *Porta inferi non prævalebunt*, potens est implere quod dixit; & quam sanguine suo in Cruce fuso genuit, suorum sanguine velut semine voluit per univcrsum orbem extendi ac propagari: nescit deum à Deo statutum esse, ut Christus qui per humilitatem & ignominiam passionis usque ad mortem Crucis ad gloriam Resurrectionis pervenit, similiter per passiones & mortes Suorum in coelis atque in terris exaltaretur, Paulo teste Philipp.2. v.8. *Humiliavit semetipsum factus obediens usque ad mortem, mortem autem Crucis. Propter quod & Deus exaltavit illum, & donavit illi nomen, quod est super omne nomen; ut in Nomine Jesu omne genuflectatur, cælestium terrestrium & infernorum; & omnis lingua confiteatur, quia Dominus Jesus Christus in gloria est Dei Patris.* Atque ita evenit. A Christi passione usque ad Decium duo ultra secula effluxerant: hi, qui Christi nomen profitebantur, ab omnibus cæu sacrilegi habiti, quod summis Diis neglectis hominem crucis ignominia affectum ut Deum adorarent, nedum contemptui habebantur, sed decretis Principum ac Populorum furore cruciatibus ac suppliciis ubique exterminabantur. Sed quò magis Jesu Nomen delere ejusque cultores è medio tollere nitebantur, eò gloriosius illud efficiebant, ut tandem ei colla subjicere, & istos ut testes veritatis honorare coacti sint.

Hoc S. Cyrillus Jerosol. Catechesi 18. expressit, ubi de Christi Ecclesia: *Primum, inquit, in persecutionibus & angustiis Sanctos Martyres diversis & multiplici flore nexis patientia coronis redimivit; nunc verd in pacis temporibus, Dei gratia debitos honores recipit à Regibus, & viris dignitatum sublimitate conspicuis, & omni denique hominum genere ac specie. Nunquam Reges distributarum diversis locis gentium sua potestatis limites babeant, sola est Sancta Catholica Ecclesia, quæ per Orbem totum indeterminata gaudet potestate.* Hinc S. Augustinus serm.363. ait: *Prius surrexit ira gentium ad perdendum nomen Christianum; ubi autem ira nihil potuit, conversa est in dolorem, & magis magisque fide crescente atque occupante omnia dolor conversus sit in timorem; ut & superbi hujus seculi, tanquam volatilia cæli, sub umbra oleris illius, quod ex minutissimo grano sinapis multum crevit, refugium protectionemque conquirant.*

II. Nunc specialiter redeundo ad Persecutionem Decii, ad eam præcipuè respexisse existimari eundem S. Augustin. in Psalm.90., ubi ait: *Qualis fuit illa Persecutio aliquando, Fratres,*

commemorem, unde Dominus liberavit Ecclesiam suam, dignetur attendere caritas vestra. Primò quòd Imperatores & Reges seculi putaverunt, se persequendo tollere posse de terra Nomen Christi & nomen Christianorum, jusserunt, ut quisquis se censfiteretur Christianum feriretur. Quicumque noluit feriri negavit se Christianum. . . . Quicumque autem non curavit presentem vitam, sed certus speravit futuram. . . confessus est se Christianum, percussus carne, liberatus est spiritu &c. Et post pauca: Audite, inquit, quid secutum sit. Cùm vidissent inimici, quòd multi festinarent ad Martyrium, & tantò plures crederent in Christum, quantò plures patiebantur, dixerunt apud se, nos occisuri sumus genus humanum; tot millia, quæ credunt in hoc Nomine: si occiderimus omnes, propè nullus in terra remanebit. En ex ipsorum confessione, quò plures Christiani occidebantur, eò plures pullulabant, adeò ut timerent, ne si in iis occidendis perseverarent, totum genus humanum in terris extingueretur. Quid ergo decreverunt? Imposterùm non esse Christianos occidendos, sed torquendos, donec negarent, & sic diuturnitate ac atrocitate tormentorum vincerentur. Non pauci defecerunt, ii scilicet, qui de viribus suis præsumserunt, sed multò plures, ii scilicet, qui in Domino speravere, constanter tormenta vicerunt, adeò ut in tanta fortitudine quid Divinum admirati Infideles ipsi etiam Carnifices, ad Christum impavidè accederent, & lapsum jaçturam majori numero compensarent.

III. Hoc & Decii consilium fuit, Martyres diuturnitate tormentorum vincere potius quàm occidere: diabolicum sanè & crudelius, quia non vitam corporis, sed animæ tentabat eripere. Hoc infortunium evenisse in Africa Nino, Clementiano & Floro; scribit S. Cyprianus Epist. 53., qui in Persecutione apprehensi prius fuerant, & Nomen Domini confessi violentiam Magistratus, & Populi frementis impetum vicerant: postmodum cùm apud Proconsulem pœnis gravibus excruciaerentur, vi tormentorum subacti de gradu gloriæ, ad quam plenâ fidei virtute tendebant, diutinis cruciatibus exciderunt; quos tamen, cùm poenitentiam de suo lapsu per triennium egissent, censet ad communionem esse recipiendos. Plures alii, ut dixi, vi tormentorum subacti deficiebant, sed multò plures ea usque ad finem superabant: & ex his qui defecerant, plures poenitentia ad Christum revertebantur: unde ab Ecclesia de modo, quo recipiendi essent discutebatur, de quo S. Cyprianus Librum de Lapsis, & varias Epistolas scripsit, & præcipuè 54.

IV. Persecutio hæc quamvis, ut ostensum est, stragibus Christiana-

fianorum totum Orbem impleverit, vix uno anno summâ violentiâ defevit, sive quia Decius Christiani sanguine satur sævitiam pristinam emollierit, sive (quod veritatem magis attingit) quia videret conatus suos nomen Christi è terris delendi irritos esse, maximèque aliis curis distractus à sanguine Christianorum visus est temperasse, contentus, ut in carcere detinerentur, sicque etsi non pacem, inducias tamen aliquas Ecclesiæ visus est concessisse. Colligitur ex Epist. S. Cypriani 36. scriptâ anno 251., dum adhuc esset in secessu; in qua se differre suum reditum dicit, ne Gentilium suâ præsentia provocet furorem: videtur tamen brevi res componendas sperare; Epist. etiam 37. loquitur de Confessoribus, qui in carcere sine tormentis decessere, quos velut Martyres haberi vult. Nam *qui se tormentis & mortii sub oculis Dei obtulit, passus est quidquid pati voluit. Non enim ipse tormentis, sed tormenta ipsi defuerunt.* Et Epist. 40., quæ supponitur scripta anno 251. ante Pascha videtur indicare Persecutionem à Gentilibus quasi cessasse, & posse Episcoporum Concilia congregari: loquens enim de schismate à quinque Presbyteris factionis Felicissimi excitato, ait: *Persecutionis istius novissima hæc est, & extrema tentatio, quæ & ipsa citò Domino protegente transibit, ut repræsenter vobis post Paschæ diem cum Collegis meis; quibus præsentibus secundum arbitrium quoque vestrum, & omnium nostrum commune consilium, sicut semel placuit ea, quæ agenda sunt, dispoere pariter & limare poterimus &c.* Si autem Persecutionis furor adhuc durasset, non fuisset locus conveniendi ad Concilium.

Hinc Baronius ad ann. 254. num. 40. putat, desinente primo Deciani Imperii & Persecutionis anno, aliquam pacis lucem in Africa affulsisse, ut Epist. 36. S. Cyprianus prædixerat. Causa autem, cur Decius de Africano Populo benè mereri videri vellet, forte fuit, inquit Baronius, quòd cum ea Provincia Barbarorum pateret incurfibus, bellum, quo Gentiles adversus Christianos hactenus dimicaverant, necessitate compellente debuerit in Barbaros convertere, ideòque Afros sibi non malè affectos habere. Istæ tamen induciæ, quia nec satis tutæ, nec sine invidia esse poterant, detinuerunt S. Cyprianum, ne statim à secessu ad suam Ecclesiam rediret, ut scribit Epist. 36.

V. Romæ quoque furorem Persecutionis eo anno emolli-
tum fuisse, ex eo colligitur, quòd cum post Fabiani Martyrium, quod initio Imperii Decii contigit, Romana Sedes vacaverit, non enim audebant Episcopi & Clerus (imo nec per-
mittebatur) ad electionem convenire, elapso primo anno & se-
cun-

cundo jam inchoato, multisque Confessoribus è Romanis carceribus liberatis, ad electionem illius urbis Episcopi, quæ in Cornelium Romanum civem ex patre Castino cecidit, unanimiter ventum est. Huic libertati contulisse creditur absentiam Decii, qui Romam relinquere coactus fuit, & in Illyricum & Thraciam pergere, ut sese opponeret Barbarorum invasionibus, & Lucio prisco, qui in Macedonia Imperatoris titulum sibi usurpaverat: quod etiam Romæ Julius Valens fortè machinabatur. Quæ cum post Decii Româ discessum evenerint, ad electionem Cornelii aditum aperuisse creduntur.

VI. Qualis autem fuerit, & quo modo in Romanum Pontificem electus fuerit Cornelius, describit S. Cyprianus Epist. 52. ad Antonianum his verbis: *Venio jam nunc, Frater carissime, ad personam Cornelii collegæ nostri, ut Cornelium nobiscum veriùs noveris, non de malignorum & detrahentium mendacio, sed de Domini Dei judicio, qui Episcopum fecit, & Coepiscoporum testimonio, quorum numerus universus per totum Mundum concordî unanimitate consensit. Nam quod Cornelium carissimum nostrum Deo & Christo & Ecclesiæ ejus, item Consacerdotibus cunctis laudabili prædicatione commendat: non iste ad Episcopatum subito pervenit, sed per omnia Ecclesiastica officia promotus, & in Divinis administrationibus Dominum sæpè promeritus, ad Sacerdotii sublime fastigium cunctis Religionis gradibus ascendit.*

*Tum deinde Episcopatum ipsum nec postulavit, nec voluit, nec ut ceteri, quos arrogantia & superbia sua tumor iustat, invasit; sed quietus & modestus, & quales esse consueverunt, qui ad hunc locum divinitus eliguntur, pro pudore virginalis conscientia suæ, & pro humilitate ingentia sibi & custodita verecundia, non ut quidam vim fecit ut Episcopus fieret (qualis fuit Novatianus) sed ipse vim passus est, ut Episcopatum coactus exciperet. Et factus est Episcopus à pluribus collegis nostris, qui tunc in Urbe Roma aderant (aderant autem tunc sexdecim, ut eadem Epist. 52., qui in electione tunc jus habebant ferendi suffragium, ubi Plebs solum de qualitate eligendi ferebat testimonium) qui ad nos litteras honorificas & laudabiles & testimonio suæ prædicationis illustres de ejus Ordinatione miserunt &c. His S. Cyprianus in electione Cornelii ostendit, qualis debeat esse persona eligenda, & quo spiritu electio facienda sit: unde subdit: *Factus est autem Cornelius de Dei & Christi ejus judicio, de Clericorum penè omnium testimonio, de Plebis quæ tunc affuit suffragio, & de Sacerdotum antiquorum & bonorum Virorum collegio: cum nemo ante se factus esset, cum Fabiani locus, idest cum locus Petri, & Cathedra Sacerdotalis vacaret,**

ret, quo occupato de Dei voluntate, atque omnium nostrum consensione firmato, quisquis jam Episcopus fieri voluerit, foris fiat necessesse est, nec habeat Ecclesiasticam Ordinationem, qui Ecclesiæ non tenet unitatem. Hæc de electione Cornelii Cyprianus, quæ licet rem præsentem non tangerent, pluribustamen inservire possunt. Quæ contra hanc electionem Novatus & Novatianus machinati sint, dicam Cap. sequenti §.1.

VII. Ex his tamen colligitur, Cornelii electionem factam fuisse adhuc vivente Decio, & Christianis infenso; unde idem Cyprianus paulò post addit, quòd Cornelius multò patientius audiret levari adversus se æmulum Principem (idest Decium) quam constitui Romæ æmulum Sacerdotem (idest Novatianum Schismatis auctorem). Si tamen admittamus, Acta S. Acacii; de quibus supra, spiritum Decii aliquantum circa Christianos emollitum fuisse fatebimur: nam ad ipsum delatis S. Acacii interrogatoriis die 29. Martii anni 251., & ab ipso cum risu & delectatione lectis, ferunt præcepisse, ut Acacius dimitteretur liber. Ut ut sit, S. Cyprianus ibi testatur, Decium malo animo tulisse, quòd Romæ electus fuisset Episcopus, & S. Cornelium post suam electionem terribiles minas, quæ generaliter omnes Episcopos infestabatur, expavisse.

VIII. Propterea probabilius creditur, Decii Persecutionem plus minùsque usque ad finem vitæ ejus durasse, nimirum anno uno, & tribus aut quatuor mensibus, quibus Imperium rexit. Is quamvis apud Gentiles optimi Principis specimen dederit, ideòque *Trajani* nomine appellaretur, & omnibus carus esset; Christiani tamen sanguinis ubique terrarum, ut vidimus, effusi reus, ulciscente Deo, non diù in Imperio vivere meruit, sed sanguine suo meritas pœnas luit. Dum enim adversus Gothos Mœsiam & Thraciam infestantes decertat, à Treboniano Gallo Limitanei Exercitus in Mœsia agentis Duce proditus, extincto filio, ipse equo salutem captans, sed in profundam paludem incidens ab ea confestim absorptus, nusquam ampliùs visus est. Is exitus immanissimo Christi Persecutori debebatur. Quare meritò Constantinus Imperator Oratione ad Sanctorum cœtum cap. 24. ita eum perstringit: *Te nunc interrogo, Deci, qui iustorum laboribus olim insultabas; qui Ecclesiam odio prosequeris; qui Viros summæ vitæ sanctitate præditos supplicio affecisti: quid rerum nunc agis post hanc vitam? quavis & quàm dissilibus ærumnis premeris? Tuam certè infelicitatem satis superque declaravit illud temporis spatium, quod inter vitam ac mortem intercessit; cùm tu in campis Scythicis unà cum omni exercitu prostratus, Imperium Romanum ta utoperè ubique celebratum Gothorum contentui ac ludibrio exposuisti.* Hæc pius Imperator.

CAPUT X.

De Gallo & Volufiano.

§. I.

De horum Imperii initiis. Novato & Novatiano.

I. **D**ecio extincto, in solamen Fidelium, Deo sic disponente, aliquis pacis radius Ecclesiæ affulsit. Imperium suscepit Vibius Tribonianus Gallus, qui necis Decii confcius & particeps fuerat. Ut tamen hoc facinus pro viribus tegeret, nedum honorificè de Decio loquebatur, sed Hostilianum Decii minorem filium superstitem adoptavit, Augusti titulo insignivit, & pro anno 253. Consulem designavit: Volufianum verò filium Casarem, & Imperii consortem fecit, quæ omnia Senatus approbavit. Pace initâ cum Gothis, Christianos quoque Imperii sui initiis in pace quiescere permisit.

II. Hæc pacis voce in Ecclesia personante, quotquot in Persecutione Decii lapsi fuerant, ad Ecclesiam, ut ab ea reciperentur, catervatim confluebant. Hæc occasio fuit Cypriano scribendi Librum *de Lapsis*: in cujus exordio de pace reddita, & gratiis Deo agendis sic habet: *Pax ecce, dilectissimi Fratres, Ecclesia reddita est: & quod difficile nuper incredulis, ac perfidis impossibile videbatur, ope atque ultione divinâ securitas nostra reparata est. In latitiam mentes redeunt, & tempestate pressuræ ac nube & caligine discussâ tranquillitas ac serenitas refulserunt. Dandæ laudes Deo, & beneficia ejus ac munera cum gratiarum actione celebranda, quamvis agere gratias nostra vox nec in Persecutione cessaverit. Neque enim tantum inimico licere potest, ut non qui Dominum toto corde & animâ & virtute diligimus, benedictiones ejus & laudes semper & ubique cum gloria prædicemus. Exoptatus votis omnium dies venit, & post longâ noctis horribilem tetramque caliginem Domini luce radiatus mundus eluxit.*

Deinde celebrans encomiis Martyrum gloriosos triumphos, nec non Confessorum constantiam, qui infracto animo Persecutionis urgentis ferociam fregerunt, parati ad patientiam carceris, & ad tolerantiam mortis, deplorat lapsorum miserabilem ruinam, qui nimio terrenorum amore obcecati, ad prima statim verba minantis inimici idolis sacrificarint, & non potius juxta Christi consilium secesserint. Eos subinde increpat, quòd sacrificiis maculati contra Evangelii legem ante expiata delicta,

an-

ante exomologesim criminis factam vim inferrent Corpori & Sanguini Domini, & communionem ac pacem à quibusdam Presbyteris sine licentiâ extorquerent. Deinde deterritos aliquorum lapsorum exemplis, qui ob id Divinâ vindictâ percussi fuerant, & animatos facto eorum, qui quamvis nullo sacrificii aut Libelli facinore constricti, quoniam tamen de hoc vel cogitaverunt, hoc ipsum apud Sacerdotes Dei dolenter & simpliciter consistentes, exomologesim faciebant, ad confessionem delicti ad pœnitentiam publicam ad satisfactionem, multis eos hortatur. Quæ verò cuilibet lapso pro qualitate delicti specialis pœna infligenda esset, in proxima Synodo Episcoporum omnium consensu æquâ lance librata statuta est.

III. Restitutus post Decii necem suæ Carthaginensi Ecclesiæ Cyprianus, quod ut jam dixi litteris pollicitus fuerat, credendus est Commemorationes Sanctorum Martyrum oblatione Sacrificii incruenti unâ cum suis solemniter celebrasse, aliosque Sacræ Disciplinæ Ritus, qui Persecutionis furore videbantur intermissi, restituisse. Cum enim Epist. 37. adhuc in secessu manens iussisset: *Dies eorum, quibus exceßerunt annotare, ut commemorationes eorum inter memorias Martyrum celebrare possimus*: laudetque Tertullum, quod ipsi significet & scribat dies, quibus exceßerunt, & propterea dicat: *Et celebrentur hic à nobis oblationes & Sacrificia ob commemorationes eorum, quæ citò vobiscum Domino protegente celebrabimus*: credendum est, eum suæ Sedi restitutum hoc implevisse. Ut autem videant Protestantes, qui Martyrum memorias contemnunt, unius Ecclesiæ Catholicæ eandem, quæ in Occidente, in Oriente quoque consuetudinem viguisse: quod Cyprianus in Africa, idipsum erga Sanctos Martyres præstiterit Episcopi in Oriente, & inter alios S. Gregorius Thaumaturgus Episcopus Neocæsariensis in Ponto; qui & ipse perinde ac fecerat Cyprianus, hâc urgente Persecutione in solitudinem secesserat, redditâ post Decii mortem Ecclesiæ pace, rediens Neocæsaream eadem de Martyribus curavit, quæ Cyprianus Carthagine.

IV. Licet autem Gallo & Volusiano ad Imperium assumptis, Ecclesiæ ab externis hostibus pacem sortita sit; unde qui Romæ Confessores detinebantur in carcere, vinculis soluti liberi abire permisi sunt; ad bonorum tamen constantiam probandam, Deo ita permittente intestino bello vexata est, nempe Novati & Novatiani schismate adversus Cornelium ejusque Electionem jam excitato perseverante; cui, quod deplorabilius est, ipsi Viri Sancti nuper è carceribus dimissi à Novatiano decepti vim maxi-

mam addiderunt (tanta esse potest in Viris ceteroquin Sanctis , nisi Dei gratia firmentur , inconstantia) Id colligo ex Epist. 51. S. Cypriani , ubi gratulans eis de eorum ex schismate reditu ait : *Posteaquam nos de carcere prodeuntes schismaticus & hæreticus error excepit , sic res erat , quasi vestra gloria in carcere remansisset . Illic enim resedisse vestri nominis dignitas videbatur , quando milites Christi non ad Ecclesiam de carcere redirent , in quem prius cum Ecclesie laude & gratulatione venissent .* De Novatiano schismate feu verius hæresi dicam , cum de Victoria Christianæ Religionis contra Hæreses , si Deus dederit , agam .

V. Nunc de Novato & Novatiano , qui fuerint , sciendum est . Non pauci ex antiquis Novatum & Novatianum , ac si eadem persona esset , visi sunt confudisse (notat Baronius ad ann. 254. num. 62.) ; duos tamen & personâ & patriâ diversos communis sententia est ex Cypriano Epist. 49. & alibi . Novatus ergo patriâ Carthaginensis & proinde Africanus erat . Baronius putat (loco citato num. 49.) eum fuisse Episcopum , cuius tamen Urbis non dicit , eò quòd S. Cyprianus Epist. 49. dicat , ab eo fuisse Felicissimum ordinatum Diaconum : communiter tamen tenetur , eum fuisse simplicem Presbyterum ; dicere autem Cyprianum , Felicissimum ab eo Diaconum constitutum , non quia ipse suis manibus ordinaverit , sed quia suâ operâ & arte , infcio nec permittente Cypriano Episcopo tunc absente , ab aliquo alio Episcopo furtim ordinari fecerat : unde ibidem ait de Novato : *Ipse est , qui Felicissimum Satellitem suum Diaconum , nec permittente me nec sciente , suâ factione & ambitione constituit .* Hanc autem esse S. Cypriani mentem ex verbis ipsius colligitur ; subdit enim : *Qui illic (Carthagine) adversus Ecclesiam Diaconum fecerat , illic (Romæ) Episcopum fecit ,* idest Novatianum : sed hunc Romanum Pseudo-Episcopum non fecit eum suis manibus ordinando , sed subdolâ arte alios ad eum contra Cornelium schismaticè eligendum excitando : ergo similiter Felicissimum non suis manibus ordinando Diaconum fecit , sed ut Diaconus ordinaretur arte suâ promovit .

VI. Quàm prave indolis autem & quot criminum reus fuerit Novatus , in eadem Epist. S. Cyprianus describit : *Rerum , inquit , novarum semper cupidus , avaritia inexplebili rapacitate furibundus , arrogantia & stupore superbi tumoris inflatus , semper istis Episcopis malè cognitus , quasi Hæreticus semper & perfidus omnium Sacerdotum voce damnatus ; curiosus semper ut prodar , ad hoc adulatur ut fallat , numquam fidelis ut diligit , fax & ignis ad conflanda seditionis incendia , turbo & tempestas ad fidei faciendâ*
na-

naufragia, hostis quietis, tranquillitatis adversarius, pacis inimicus. Et post multa ejus crimina recensens, addit: Spoliati ab illo pupilli, fraudata vidua, pecunia quoque Ecclesia denegata, has de illo exigunt penas, quas in ejus furore conspiciamus. Pater etiam ejus in vico fame mortuus, & ab eo in morte postmodum nec sepultus. Uterus uxoris calce percussus, & abortione properante in parricidio partus expressus. Hæc autem, quæ de patris morte & de uxore prægnante calce percussâ narrat, contingere potuerunt priusquam Presbyter fieret.

VII. Conscientiâ tot & tantorum criminum urgente, videns contra se armari Ecclesiæ judicium, sibi que depositionis & excommunicationis pœnam imminere, fugâ sententiam prævenit, & Romam ad peiores turbas ibi excitandas, ut dicemus, navigavit. Ita S. Cyprianus laudato loco: *Hanc conscientiam criminum jam pridem timebat, propter hoc se non de Presbyterio excitari tantum, sed communicatione prohiberi pro certo tenebat, & argentibus fratribus imminere cognitionis dies, quo apud nos causa ejus ageretur, nisi persecutio ante venisset: quam iste voto quodam evadenda & lucranda damnationis excipiens, hæc omnia commisit & miscuit, ut qui ejici de Ecclesia & excludi habebat, judicium Sacerdotum voluntariâ discessione præcederet, quasi evasisse sit pœnam prævenisse sententiam.* Ex his colligitur, commissa fuisse à Novato hæc crimina antequam persecutio irrueret, & proinde antequam S. Cyprianus Carthagine discederet. Porro quod iste sit Novatus, qui declinans Africanorum sententiam Romam se contulit, apertè declarat S. Martyr in ejusdem medio Epistolæ his verbis: *Idem est Novatus, qui apud nos primum discordia & schismatis incendium seminavit, qui quosdam istic ex fratribus ab Episcopo segregavit, qui in ipsa persecutione ad evertendas fratrum mentes alia quædam persecutio nostris fuit. Ipse est, qui Felicissimum Satellitem suum Diaconum, nec permittente me nec sciente, suâ factione & ambitione constituit: & cum sua tempestate Romam quoque ad evertendam Ecclesiam navigans similia illic & paria molitus est, à Clero portionem plebis avellens, fraternitatis benè sibi coherentis & se invicem diligentis concordiam scindens. Planè quoniam pro magnitudine sua debeat Carthaginem Roma præcedere, illic majora & graviora commisit. Qui istic adversus Ecclesiam Diaconum fecerat, illic Episcopum fecit. Is Novati perditissimi hominis character est. Nunc quis & qualis fuerit Novatianus videamus.*

VIII. Novatianus primum paganæ, & præsertim stoicæ Philosophiæ non obscuri nominis professor Romæ fuisse fertur, deinde

de à Dæmone correptus ac dirè vexatus, cùm ab Exorcistis Christianis liberatus esset, Christo nomen dare constituit. Sed adhuc catechumenus, cùm in lethalem morbum incidisset, in lecto decumbens baptizatus per aquæ infusionem fuit. Sed cùm è morbo convaluisset, nec cæremonias baptismatis in se suppleri curavit, nec Sacramentum Confirmationis, quod ex Ecclesiæ disciplina statim post Baptisma conferebatur, suscepit. Quia autem Baptisma ita collatum apud aliquos Romæ dubium erat, ut infra ex Cornelio dicam, fortè quoddam præsumi posset fidem sic baptizati potiùs fuisse extortam necessitate aut metu mortis, quàm spontaneâ cordis conversione, & præsertim neglectâ Confirmatione, credebatur non plenam recepisse Spiritus Sancti gratiam, propterea sic baptizati ad Sacros Ordines accedere prohibebantur. De quo extat Canon 12. Conc. Neocæsariensis ann. 314. quo statuitur: *Si quis in ægritudine constitutus fuerit baptizatus, Presbyter ordinari non debet. Non enim fides illius voluntaria, sed ex necessitate est: nisi fortè postea ipse studium & fides probabilis fuerit, aut hominum raritas cogat.*

Nihilominùs post Baptismum ita susceptum, Confirmatione etiam neglectâ, Novatianus Presbyter factus est, Episcopo quodam de Regulâ Ecclesiasticâ prohibente, promoveri baptizatos in lecto, dispensante: cui dispensationi Clerus universus, multique de Populo refragabantur, qui ægrè tandem ejus Ordinationi consenserunt.

IX. Modum præfatum conversionis & ordinationis Novatiani refert S. Cornelius Epist. ad Fabium Antiochenum apud Euseb. L.6. hist. cap.43., ubi exponens Novatiani merita in Ecclesiam: *Agedum, inquit, exponamus deinceps, quibus operibus & cujusmodi conversatione confisus ad Episcopalem locum aspiraverit. An idèd fortasse quoddam ab initio in Ecclesia versatus est, & multa pro ejus defensione certamina subivit, multisque & gravissimis periculis Religionis causâ conflictatus est? Minimè id quidèd. Quippè cui causam atque initium credendi præbuit Satanas in ipsum ingressus, atque in ipso aliquandiu commoratus. Cùmque ab Exorcistis foveretur, in morbum gravissimum collapsus, dum jam jamque moriturus creditur, in ipso in quo jacebat lectulo persusus Baptismum suscepit, sitamen hujusmodi Baptismum suscepisse dicendus est. Sed neque postquam liberatus est morbo reliqua percepit, quæ juxta Ecclesiasticam Regulam percipi debent, neque ab Episcopo consignatus est. Hoc autem signaculo minimè percepto, quo tandem modo Spiritum Sanctum potuit accipere?*

Deinde post aliqua de Novatiani Ordinatione hæc habet:

Nam

Nam cum egregius ille Vir (Novatianus) Ecclesiam Dei reliquisset, in qua post susceptum Baptismum Presbyteri gradum fuerat consecutus, idque per gratiam Episcopi, qui manus illi imponens eum ad Presbyterorum Ordinem evehit. Cui cum universus Clerus multique ex Populo refragarentur, eo quod non liceret, quemquam ex iis, qui urgente vi morbi in lectulo perinde ac ille perfusi fuissent, in Clerum assumi; postulavit ab iis Episcopus, ut hunc solum ordinari ab eo paterentur. Hæc Cornelius apud Eusebium, ubi advertendum est, quod licet hæc de Novato potius quam de Novatiano dicere videatur, vitio tamen Exscriptorum vel Librariorum tribuendum est.

X. Factus Presbyter, quam indignus esset tali honore & gradu statim se ostendit, ut idem Cornelius refert: *Persecutionis tempore præ metu ac nimia vivendi cupiditate Presbyterum se esse negavit. Admonitus enim & rogatus à Diaconis, ut ex cubiculo in quo se ipsum incluserat egressus, Fratribus auxilio indigentibus succurreret, tantum absuit, ut hortantibus Diaconis morem gereret, quin potius ira & indignatione percitus abiit ac discessit. Neque enim Presbyterum se amplius velle esse respondit, sed alterius Philosophiæ desiderio teneri.*

XI. His initiis ut lupus potius, quam ovis Ecclesiam Christi Novatianus ingressus est, & lupi more gregem Christi discindentem ac dispergere conantem infra videbimus. Qui ne onera Presbyterii ferret, Presbyterio se renuntiare asseruit; ut ambitioni satisfaceret, Episcopatum Cornelio rapere tentavit, ac primum in Ecclesia schisma molitus est. At dum se in Caput Ecclesiæ erigere conatur, ab Ecclesia extorris evasit: adeo ut dici potuerit, quod sicut ejus qualiscumque in Ecclesiam ingressus Diabolus occasio fuit, ita superbâ presumptione Diabolus eum ab Ecclesia ejecerit.

Res ergo ita fuit. Dum ageretur de electione Romani Pontificis, qui Fabiano succederet, Novatus ex Africa Romam advenit vivente adhuc Decio. Is à S. Cypriano meritò comparatus nubi, quæ quodcumque tempestates & discordias desert, sicut fecerat in Africa, sic Romæ vix appulsus scissiones in Clero & Populo antea caritate unitis machinari cœpit. Nec defuerunt sibi similes tumultuum amatores. Inter istos Novatianum detexit Pontificatus honorem superbo actu ambientem. Huic ergo se jungens artificiosè cœtum aliquorum adversus Cornelium formavit; frustra tamen; Cornelius enim à majori & saniori parte electus fuit. Vix tamen secutâ electione, & fortè etiam antequam electus consecraretur, Novatianus cum Nova-

to & suis crimina in personam Cornelii iactare cœperunt, quasi Libellaticum & peccantibus nimium indulgentem. Sed hæc & alia cum nihil adversus Cornelium efficerent, cui major & sanior Cleri ac Populi pars ceu legitimo Pontifici adhærebat, Novatianus ab initio anceps visus fuit & publicè confessus est, ambitione Episcopatus se non teneri. Verùm linguæ cor non respondebat; nam hortatore & consiliario Novato inopinatè Episcopatum invasit, & sacrilegâ consecratione seu veriùs execratione ordinatus apparuit.

XII. Factum narrat Eusebius L.6. cap.43. ex Epist. citatâ ad Fabium, ubi de Novatiano hæc habentur: *Egregius ille Vir, qui tremendis quibusdam Sacramentis affirmaverat, se Episcopatum non concupiscere, repentè tanquam ex machina quadam in modum projectus, Episcopus apparuit. Et is qui se doctorem & Ecclesiasticæ disciplinæ propugnatores ferebat, cùm Episcopatum sibi à Deo minime concessum rapere ac vindicare conaretur, duos deploratæ salutis homines sibi socios adjunxit, ut eos in exiguam ac vilissimam Italiæ partem mitteret, atque illinc accitos tres Episcopos, homines planè rudes ac simplices, fraudulentâ quâdam molitione deciperet: constantissimè affirmans, ipsos quamprimum Romam proficisci oportere, ut omnis undecumque orta dissensio ipsorum unâ cum aliis Episcopis interventu atque arbitrio sedaretur. Qui cùm advenissent, homines, ut jam diximus, simplicioris ingenii, nec in his perditorum hominum artibus ac fallaciis satis triti; eos ille à quibusdam sui similibus, quos ad id comparaverat, inclusos horâ decimâ, temulentos & crapulâ oppressos adumbratâ quâdam & inani manuum impositione, Episcopatum per vim tradere sibi cogit, eumque nullo sibi jure competentem per fraudem atque insidias vindicat. Hæc de violenta & subdola Novatiani Ordinatione Cornelius, qui addit: Nec multò post unus ex illis Episcopis ad Ecclesiam rediit, delictam suam cum lamentis ac fletibus confitens. Quem nos, cùm universus Populus pro illo intercessisset, ad communionem laicam suscepimus. Reliquis etiam duobus Episcopis Successores ordinavimus, illosque in loca illorum direximus. Quibus, ut notat Valesius, indicat Cornelius, Episcopum illum, qui cum aliis duobus Collegis Novatianum ordinaverat (quem ex Epist. S. Cypriani ad Antonianum putat fuisse Trophimum) à se depositum esse, & in Laicorum Ordinem redactum. Cùm enim excommunicare illum vellet, utpote nefarii schismatis auctorem, à Populo rogatus laicam ei communionem indulgit, idest ut inter Laicos communicaret permitit: reliqui verò duo Episcopi non solum depositi, verùm etiam à communionem totius Ecclesiæ separati sunt.*

XIII. Id verò magis lugendum est, quòd Novatianus in schisma non solum multos de Populo attraxit; verum etiam ex Confessoribus aliqui, qui è carceribus in quibus pro Christo detenti fuerant dimissi, fraudulentè Novati artibus seducti ac decepti schismatici adhærentes, Confessionis gloriam iniquarunt: attamen errore cognito resipuerunt & ad Ecclesiam reversi sunt. Inter ipsos quatuor Epist. laudatâ ad Fabium, recenset Cornelius, Maximum scilicet, Urbanum, Sidonium, & Celerinum his verbis: *Maximus Ecclesiæ nostræ Presbyter & Urbanus, ambo ex Fidei confessione egregiam jam secundò laudem adepti: Sidonius etiam & Celerinus, vir qui cuncta tormentorum genera per Dei misericordiam fortissimè sustinuit Hi omnes cum illum tandem cognovissent, & fraudem ejus ac versutiam, perjuriam quoque atque mendaciam, & abhorrentem ab omni societate feritatem & lupinam quamdam in eo amicitiam deprehendissent, ad Sanctam Ecclesiam reversi sunt: cunctasque illius præstigias ac nequitiam, quam jampridem intra se occultans sese interim submittebat, præsentibus aliquot Episcopis ac Presbyteris & Laicis compluribus evulgarunt; ingemiscientes ac dolentes, quòd à fraudulenta malignaque bestia industi aliquanto temporis spatio ab Ecclesia recessissent.*

XIV. Novatianus ergo suâ sacrilegâ Ordinatione inflatus ac tumens, de ea ad omnes Orbis partes Nuntios misit, misit & de sua Cornelius, contrario tamen eventu: ubi enim Ordinatione Cornelii ab omnibus ferè, præsertim Africanis, fuit approbata, electio tamen Novatiani tamquam schismatica fuit universaliter rejecta: neque illi profuerunt calumniæ, quibus tum per Nuntios, tum per Epistolas suas Cornelii famam obscurare conabatur; electionis enim legitimæ & Cornelii probitatis communis fama prævaluit. Nec tamen animum tuendi schismatis Novatianus depofuit; quin ut suos in fide sibi datâ etiam Sacramento confirmaret, ad hoc exercendum facinus processit, ut dum eis Sacram Eucharistiam porrigeret, unumquemque jurare cogeret per Corpus & Sanguinem Domini, se nunquam suas partes deserturum & ad Cornelium transiturum. Ita ex prælaudata Epistola ad Fabium Eusebius L.6. cap.43.: *Post hac facinus quoddam subjungit omnium, quæ ab illo commissæ sunt, longè gravissimam ita scribens. Etenim Oblatione factâ, portionem singulis dividens, dum eam tradit, miseros homines benedictionis loco jurare cogit, manus ejus qui portionem accepit ambabus suis manibus comprehensas retineus, nec prius dimittens, quam jurati ista dixerint: ipsis enim utar illius verbis: Jura mihi per Corpus & Sanguinem Domini nostri Jesu Christi, te nunquam meas partes deserturum, nec ad*

Cor-

Cornelium esse rediturum. Ita miser ille non prius gustare sinitur, quam sibi ipse malum imprecatus sit. Et cum panem illum accipiens dicere debuisset, Amen, ejus loco dicit: non revertar deinceps ad Cornelium.

XV. Inanes tamen hujuscemodi conatus evaserunt; nam in dicta Epist. Cornelius sic prosequitur: *Scias porro, illum jam nudatum ac penè solum remansisse, Fratribus quotidie eum deferentibus & ad Ecclesiam redeuntibus. Quem etiam Moyses beatissimus Martyr, qui nuper apud nos egregio & admirando Martyrio persanctus est, dum adhuc in vivis esset, audaciam ejus ac furorem perspectam habens, se communionem suam se separavit unà cum quinque Presbyteris, qui se pariter cum illo ab Ecclesia corpore abruperant.* Et subinde recenset numerum Episcoporum, qui in Urbem Romam convenientes amentiam ejus condemnaverant, & nomina illorum, & quam quisque regebat Ecclesiam; eorum etiam, qui etsi Romæ non adfuissent, superiorum tamen Episcoporum sententiam litteris approbaverunt. Hisce tamen non obstantibus Novatianus, instigante fortè Novato, in schismate persistit; cui & hæresim adjunxit suo nomine dictam Novatianorum alias Catharorum; de cujus erroribus progressu & exitu suo loco dante Deo sermo erit.

§. II.

Galli & Volusiani Persecutio.

I. **I**nterim dum Ecclesia diro Novatiani schismate laceraretur, à Gentilibus sub Galli & Volusiani exordiis in pace relinquebatur. Verùm sic disponente Deo in exercitium Fidelium hujusmodi pax diuturna non fuit; vix enim elapso Imperii anno, in Christianos Persecutionem intermissam Gallus renovavit; in suimet tamen perniciem: nam ut scribit Dionysius apud Eusebium L.7. cap.1.: *Neque Gallus culpam Decii intellexit nec prospexit quid tandem illum pessumdedisset; quin potiùs ad eundem lapidem ante oculos suos positum impegit. Qui, cum Imperium ipsius in prospero statu esset, cunctaque ex animi sententia succederent, Viros Sanctos, qui pro pace & incolumitate ipsius preces ad Deum allegabant, insectatus est. Cum illis ergo orationes pro ipso fieri solitas simul fugavit.*

II. Hanc Persecutionem, potiùs quàm novam, fuisse Decianæ instaurationem colligo; quia nec Augustinus L.18. de Civit. Dei cap.52. nec Sulpitius Severus L.2. cap.46. eam inter Persecu-

secutiones enumerant. Variis ostentis prænuntiata fuit; quibus moti Episcopi Africani cùm prius in Concilio quodam statuis-
sent, ut Lapsi nonnisi diù pœnitentiâ actâ admitterentur ad pa-
cem, nisi fortè periculum infirmitatis lethalis urgeret, hâc no-
vâ Persecutione instante decreverunt, omnibus qui pœnitentiam
egissent pacem dandam, ut ad passionis tolerantiam fortiores
essent. Hoc Decretum nuntiant Cornelio Papæ per Cyprianum
Epist. 54., ubi relato priori Decreto, subjungitur: *Sed enim cùm
videamus diem rursûs aliterius infestationis appropinquare cœpisse,
& crebris atque assiduâ ostensionibus admoneamur, ut ad certamen,
quod nobis hostis indicit, armati & parati simus; Plebem etiâ no-
bis de Divina dignatione commissam exhortationibus nostris paremus
& omnes omnino Milites Christi, qui arma desiderant & prælium
flagitant, intra Castra Domini colligamus: necessitate cogente cen-
suimus, eis qui de Ecclesia Domini non recesserunt, sed pœnitentiam
agere & lamentari ac Dominum deprecari à primo lapsus sui die non
desisterunt, pacem dandam esse, & eos ad prælium quod imminet
armari & insruui oportere. Obtemperandum est namque ostensio-
nibus atque admonitionibus justis, ut à Pastoribus oves in periculo non de-
ferantur, sed grex omnis in unum congregetur & Exercitus Domini
ad certamen Militiæ cœlestis armetur.*

Et post multa concluditur: *Placuit nobis Sancto Spiritu sugge-
rente, & Domino per visiones multas & manifestas admonente, quia
hostis nobis imminere prænuntiatur & ostenditur, colligere in castra
& Milites Christi, & examinatis singulorum causis, pacem Lapsis dare,
imò pugnaturis arma suggerere: quod credimus vobis quoque paternæ
misericordiæ contemplatione placiturum.*

III. Occasio hujus Persecutionis creditur fuisse pestis, quæ
Gallo imperante per totum ferè Orbem grassata est. Hæc enim
& similia mala Deorum suorum indignationi, quod eorum cul-
tus à Christianis contemneretur, Ethnici tribuebant. Cùmque
eâ in dies crescente Hostilianus quoque Decii filius, quem Gal-
lus adoptaverat & Augustum fecerat, sublatus esset (quamvis
aliqui putent ab eo secretò fuisse necatum, ut se à timore libera-
ret, ne supremam auctoritatem sibi aliquando vindicaret) acce-
dentibus insuper ariditate fame & bellorum motibus, Gallus
& Volusianus Deorum opem imploraturi generalibus per omnes
Provincias Edictis Deos suos Sacrificiis expiari imperarunt,
quod anno 2. eorum Imperii, Christi verò 253., contigisse pu-
tatur.

IV. Hinc orta est Persecutio. Nam cùm Christiani toto
Orbe diffusi ejusmodi Sacrificia execrarentur, in eos sævire cœ-

ptum est. Et quia S. Cyprianus Fideles suos Carthagine ab eis faciendis consueto pastorali zelo publicè deterrebat, clamore Popularem ad Leonem in Circo denuò postulat fuit: quod tamen Dei protectus auxilio ad alia tempora reservatus evasit. Imperterritus tamen Christi Miles scripsit tunc Librum de *Exhortatione Martyrii*: imò nec veritus est Demetrianum Proconsulem scripto Libro durius increpare, & latius comprobare, quòd bella illa, quibus Decii interfecti sunt, & quæ Gallo & Volusiano imperantibus perdurarunt, ac lues illa, quæ totum tunc Orbem pervagata est per annos 15., non Christianis sed Ethnicis sive Gentilibus imputanda veniant, eò quòd Christo bellum indicerent. Postquam enim dixerat Mundi senio omnia deteriora fieri, & appropinquante Mundi fine multiplicari mala & adversa variari (tunc enim proximus Mundi interitus fortè timebatur) ad Demetriani objecta deveniens, ait: *Non enim sicut tua falsa quærimonia & imperitia veritatis ignara jactat & clamat, ista accidunt, quòd Dii vestri à nobis non colantur, sed quòd à vobis non colatur Deus. Nam cum ipse sit Mundi Dominus & Rector, & cuncta arbitrio ejus & nutu gerantur, nec quidquam fieri possit, nisi quod aut fecerit aut fieri ipse permiserit, utique quando ea fiunt, quæ iram Dei indignantis ostendant, non propter nos fiunt, à quibus Deus colitur, sed delictis & meritis vestris irrogantur, à quibus Deus omnino nec queritur nec timetur, nec relictis vanis superstitionibus Religio vera cognoscitur, ut qui Deus unus est omnibus, unus colatur ab omnibus & rogetur. Ipsum denique audi loquentem, ipsum voce Divinâ instructum, nos pariter ac monentem,, Dominum Deum tuum adorabis, inquit, & illi soli servies,,. Lucæ 4. Et iterum,, Non erunt tibi Dii alii absque me,,. Exod. 20. His & aliis pro sui zeli libertate monet Proconsulem Cyprianus.*

V. Persecutio hæc primo impetu Fideles Romæ existentes aggressa est, terroribus ac minis ad Diis sacrificandum omnes compellans; putans fortè, ut sub Decio obtinuerat, multos metu perterritos miserabiliter lapsuros; sed deceptam se vidit; omnes Christi Milites pari vi & constantiâ resistentes invenit. Putans se gregem dispergere posse, in Cornelium Pastorem toto furore insiliit; sed fefellit eventus: omnes enim gloriosâ Jesu Christi confessione accurrentes, paratos se ad omnia pro eo sustinenda declararunt, eos & verbis & exemplo Cornelio ipso adhortante. Inter istos multi, qui in Decii Persecutione lapsi fuerant, præcedentes suas ruinas reparaturi sese pleni spiritu exercebant, nihilque curantes morti se & extremis suppliciis addicendos, fidem generosè consitebantur.

VI. Exultavit ad hæc ex Africa S. Cyprianus, & gaudium suum Epist. 57. Cornelio testatus est; ubi inter alia hæc scribit: *Profligator Adversarius terrore violento Christi castra turbare: sed quo impetu venerat, eodem impetu pulsus est, & quantum formidinis & terroris attulit, tantum fortitudinis invenit & roboris. Supplantare se iterum posse crediderat Dei Servos, & velut tyrones & rudes, quasi minus paratos & minus cautos solito suo more concutere. Unum primò aggressus, ut lupus ovem secernere à grege, ut accipiter columbam ab agmine volantium separare tentaverat: nam cui non est adversus omnes satis virium, circumvenire quærit solitudinem singulorum. Sed retusus adunati Exercitus fide pariter & vigore, intellexit, Milites Christi vigilare jam sobrios & armatos ad prælium stare, vinci non posse, mori posse, & hoc ipso invictos esse, quia mori non timent. . . . Quale illud fuit sub oculis Dei spectaculum gloriosum? Quale in conspectu Christi Ecclesie suæ gaudium; ad pugnam, quam tentaverat hostis inferre, non singulos Milites, sed tota simul castra prodisse? Omnes enim constat venturos fuisse, si audire potuissent, quando accurrerit properanter & venerit quisquis audivit.*

Quot illic lapsi gloriosâ confessione sunt restituti? Steterunt fortes, & ipso dolore pœnitentiæ facti ad prælium fortiores, ut appareat nuper subitatos esse, & novæ atque inaudite rei pavore trepidasse; rediisse ad se postmodum, Fidem veram & vires suas de Dei timore collectas, ad omnem patientiam constanter & firmiter roborasse, nec jam stare ad criminis veniam, sed ad passionis coronam. His & artes Persecutorum & concorde Fidelium robur, eorum etiam qui sub Decio lapsi fuerant, eleganter celebrat S. Cyprianus.

VII. Persequentium tamen furor Novatianis pepercit, Dæmone hoc declarante, quos ut inimicos oppugnaret, quos verò ut sua mancipia contemneret. Quamquam etsi eorum aliquis mortem subiisset, ei tamen utpote extra Ecclesiam & caritatem posito nihil ad coronam & gloriam profuisset. Audiamus Sanctum Cyprianum ita prosequentem: *Quid ad hoc Novatianus, Frater carissime? Utrumne jam deponit errorem? An verò (qui demeritum mos est) ipsis bonis & prosperis nostris plus adactus est ad furem? & quò magis ac magis dilectionis ac fidei crescit hic gloria, illic dissensionis & zeli recrudescit insania: nec vulnus suum miser curat, sed adhuc gravius & se & suos vulnerat? . . . Agnoscit ne jam quis sit Sacerdos Dei? quæ sit Ecclesia & domus Christi? qui sint Dei Servi, quos Diabolus infestet? Qui sint Christiani, quos Antichristus impugnet? Neque enim quærit illos, quos jam*

subegit aut gessit evertere, quos suos jam fecit. Inimicus & hostis Ecclesiæ, quos alienavit ab Ecclesiæ & foras duxit, ut captivos & viuentos contemnit & præterit; eos pergit laceffere, in quibus Christum cernit habitare. Quamquam etsi aliquis ex talibus fuerit apprehensus, non est quoddam sibi quasi in confessione nominis blandiatur, cum constet, si occisi ejusmodi extra Ecclesiam fuerint, Fidei coronam non esse, sed pœnam potiùs esse perfidiæ; nec in domo Dei inter unanimis habitaturos esse, quos videmus de pacifica & Divina domo furore discordiæ recessisse.

VIII. His ostendit S. Cyprianus, quod si quis in schismate vel hæresi pro Christo occidatur, non erit ea mors pro Martyrio & corona reputanda, benè tamen si priùs à schismate vel hæresi recedens Ecclesiæ fuerit reunitus. Ita contigisse Hippolyto Antiocheno Presbytero, qui priùs Novatiano adhærens, raptus ad Martyrium, Novatiano ejurato, Catholicæ Ecclesiæ fidem professus est: hujus memoriam recolit Martyrol. Roman. die 30. Januarii his verbis: *Antiochiæ passio Beati Hippolyti Presbyteri, qui Novati schismate aliquantulum deceptus, sed operante Gratiâ Christi correctus, ad unitatem Ecclesiæ rediit, pro qua & in qua postea illustre Martyrium consummavit. Hic rogatus à suis, quænam Secta verior esset, execratus dogma Novati, eam Fidem dicens esse servandam, quam Petri Cathedra custodiret, jugulum præbuit.* Hic notat Baronius, tres fuisse Martyres nomine Hippolytos: unum Presbyterum, de quo hic; alterum Militem, de quo 13. Augusti; tertium Episcopum Portuensem, de quo 22. ejusdem mensis: quos licet aliqui pro uno acceperint vel saltem acceperint visi sint, distincti tamen sunt, tum ratione conditionis, tum temporis, tum qualitate Martyrii. De hoc hymnum habet Prudentius, quem recitat Baronius ad ann. 255. num. 34.

IX. Quot Martyres Romæ hæc Persecutio Christo dederit, quos ignoramus. Hoc scimus, totum ejus furorem in Cornelium exarsisse. Cum enim iste boni Pastoris partes exercens, nedum vitam dare pro ovibus paratus esset, sed eas in Fide colligere & firmare continuò studeret, exilio ad Centum-cellas relegatus est. Ad ipsum in exilio dedit Epistolam 57. S. Cyprianus, quâ inter cætera eum celebrat, quod dux confessionis fratribus extiterit, & confessione ducis fratrum confessio creverit. Quid postea Cornelio acciderit, an scilicet Martyrii supplicio, an exilii ærumnis vitam coronaverit disceptatur. Acta, quæ refert Baronius ad ann. 255. num. 59., ferunt, quod cum Cornelius unâ, cum Presbyteris & Diaconibus Romanæ Ecclesiæ Centum-cellas missus exularet, Volusianus Augustus audiens frequen-

,, quen-

„ quentem ad eum concursum, quòdque multi ad eum scribe-
 „ rent, & præsertim ex Africa Cyprianus, iussit eum ad se ad-
 „ duci: exhibitumque ei noctu acriter reprehendit, quod nec
 „ Deos coleret, nec Principum minas timeret, & contra
 „ Rempublicam litteras reciperet ac dirigeret. Cui cum re-
 „ spondisset Cornelius, se nec verbo, nec scripto quidquam
 „ contra Principes molitum esse: iratus Imperator eum à suo
 „ conspectu amoveri iussit, utque ejus os plumbatis caderetur,
 „ & Sacrificium Marti cogeretur offerre; & si facere recusasset,
 „ capite plecteretur. Sed illo repugnante hoc facere, lata est
 „ sententia ut duceretur.

„ Tunc Cerealis, cujus curâ Cornelius custodiebatur,
 „ rogavit Cornelium, ut veniret in domum suam ac visitaret
 „ uxorem nomine Sallustiam à quindecim annis paralyticam.
 „ Ingressus est Cornelius cum duobus Presbyteris & uno Cle-
 „ rico Cerealis domum; ac præmissâ super agram oratione te-
 „ nens ejus manum præcepit ei in Nomine Jesu ut surgeret.
 „ Quæ protinus surgens clamavit & dixit: Verè Christus est
 „ Deus & Dei filius, & conversa ad Cornelium: Conjuro te,
 „ inquit, & per Christum, baptiza me, & currens implevit vas
 „ aquâ & attulit ei. Viso tanto miraculo, Milites quoque, qui
 „ erant cum Cereali omnes se ad Cornelii pedes posuerunt pe-
 „ tentes se quoque baptizari. Cornelius videns Dei manum in
 „ his omnibus baptizavit eos & obtulit pro eis Sacrificium lau-
 „ dis: & sic participati sunt omnes Corpore & Sanguine Domi-
 „ ni nostri Jesu Christi.

„ Audivit hæc omnia Imperator, & mittens tenuit omnes,
 „ qui erant ex domo Cerealis credentes cum Militibus baptiza-
 „ tis: qui simul cum Beato Cornelio ducti sunt ad sacrifican-
 „ dum. Ducti sunt autem foras muros Portæ Appiæ ad Tem-
 „ plum Martis ut sacrificarent. Sed illi facere nolentes atque
 „ expuentes in Templum decollati sunt unâ cum Beatissimo
 „ Papa numero viginti unus, & cum eis Cerealis quoque cum
 „ uxore sua Sallustia decimo octavo Kalendas Octobris „. In
 Martyrol. Rom. eâdem die similia leguntur.

X. Nihilominus severiores Critici Acta præfata velut mi-
 nus sincera & dubia non acceptant. Licet enim S. Cornelium
 inter Martyres admittant: volunt tamen eum naturali non
 violentâ morte in exilio, non Romæ sed Centum-cellis vitam
 clausisse: Martyres enim, inquiunt, agnovit semper Ecclesia
 etiam eos, qui in carcere vel exilio propter Christum mortui
 sunt. Tutius tamen existimo Acta præfata auctoritate Martyro-
 logii probata sequi; eò vel maximè quòd S. Hieronymus L. de
 Script.

Script. Eccles. cap. 66. dicit, quòd sub Gallo & Volusiano Martyrio coronatus fuit : & in Vita Pauli addit, quòd *Cornelius Roma & Cyprianus Carthagine felici cruore Martyrium pertulerunt*. Conveniunt tamen omnes, non sub Decio aut Valeriano, sed sub Gallo obisse S. Cornelium. Decio quidè adhuc vivente Pontificatum assumpsit anno 251., quem, eo paulò post extincto, aliquandiù in pace (ab Ethnicis saltem) rexit ; sed à Gallo repente excitatà Persecutione Cornelius una ex primis victimis fuit: quare nec duobus integris annis Ecclesiæ Romanæ præfuit. Cornelio in Sede Romana successit Lucius, qui tamen sub Gallo & Volusiano capite plexus (ut probabilius cum Baronio ad ann. 257. num. 2., non sub Valeriano, ut in Notis Martyrol. 4. Martij dixerat) breviori tempore eam occupavit.

XI. Porrò Gallus & Volusianus Imperatores Divinam ultionem, quam fuso Christiano sanguine provocarant, patratà nuper Lucii nece vehementiorem in se concitando accelerarunt. Siquidem rebellantes Milites, & Æmiliano faventes, eosdem Imperatores adversùs Æmilianum proficiscentes, apud Interamnem necaverunt circa mensem Maii anno 253., postquam solo biennio imperassent : brevi quidè Imperio, sed Christianorum nece terribili ; nam Doduvellus ipse probat, hanc Persecutionem fuisse Decianà longè sæviorem. Si ergo, ut probavi, multi sub Decio fuerunt coronati, multò plures sub Gallo passos fuisse credendum erit præsertim in Africa. Cùm enim Africani Patres Divinis visionibus admoniti censuerint lapsos ad receptionem Eucharistiæ esse admittendos, ne hoc cibo destituti ad Martyrium essent invalidi ; patet, hanc Persecutionem fuisse cruentissimam. De factò enim Cyprianus Tract. ad Demetrianum Africæ tunc Proconsulem scribit : *Innoxios justos Deo caros domo privas, patrimonio spoliatis, catenis premis, carcere includis, bestis gladio ignibus punis . . . admoves laniandis corporibus longa tormenta, multiplicas lacerandis visceribus numerosa supplicia, nec feritas atque immanitas tua usitatis potest contenta esse tormentis, excogitat novas penas ingeniosa crudelitas*.

XII. At quid hinc lucrata est vesana barbaries? Velut repentinus turbo adversùs Christianos & præcipuè Cornelium ejusque Clerum insurrexit : numquid eos extinxit aut saltem metu perculsos dissipavit? Minimè. Sed quo impetu venerat turbo, eodem impetu fugatus est : omnes enim Christiani quasi agmine facto sese ad Martyrium obtulerunt. Interea Persecutores victi & Deo vindice interempti cadunt ; Ecclesia verò Christi stat, & è Sanguine Christi nata ita suorum sanguine nutritur & cre-
cit, ut inferius ostendam.

CAPUT XI.

De Valeriani Persecutione .

§. I.

Initia Imperii & causa Persecutionis .

I. **G**allo & Volusiano extinctis, Æmilianus à Militibus Imperator salutatur : sed Licinio Valeriano, qui ab Exercitu in Galliis & Germania fuerat & ipse Imperator acclamatus, in Italiam properante ; videntes Milites Æmilianum simplicis Militis potius partes agere, quàm Ducis, ideòque ad regnandum ineptum post quatuor menses exactos Imperii eum juxta Spoletum occiderunt, atque ita Valerianus Imperator à toto Orbe agnitus fuit, & Gallienus ejus filius Romæ à Senatu Cæsar declaratus .

II. Si hujus initia Imperii spectentur, nemo in Christianos propensior antea fuit Imperator ; nec Philippus ipse, quem supra dixi, Christianum fuisse fama erat. Amorem suum & estimationem erga illos publicè testabatur ; ingentem Servorum Dei in suo Palatio numerum habebat, adeout Ecclesià potius videretur . Ita ex Dionysio in Epist. ad Hermam exponit Eusebius L. 7. hist. cap. 10. ubi cujusmodi Valerianus ante Persecutionem fuerit enarrans, ait : *Mansuetus quidè ac benignus erat erga famulos Dei . Neque enim ullus superiorum Principum, ne illi quidè ipsi, qui palàm Christiani fuisse dicuntur (ut Philippus & Alexander Severus, qui, teste Lampridio, Imaginem Christi habuit in latrio suo) tanta humanitate ac benevolentia nostros complexus est, quantam ille præserebat initio Principatus sui . Totaque ejus Familia piis hominibus abundabat, ac Dei Ecclesià esse videbatur .* Notat autem hic Valesius, quòd cum Valerianus septem fere annis regnaverit, priore quidè Principatus triennio, vel secundum alios fere quadriennio, Christianos benignè complexus est, posteriore triennio autem & ultra Persecutionem intulit Ecclesiæ . Porro cum initium Principatus Valeriani cœperit anno 253. circa mensem Augusti, fit ut Persecutio inchoaverit anno 257. . Cum enim Dionysius apud Eusebium loco citato applicet Valeriano illud Joannis in Apoc. 13. v. 5. : *Et datum est illi os loquens magna & impia, & data est illi potestas & menses quatuoraginta duo*, qui conficiunt annos tres cum dimidio, fit ut totò hoc tempore Persecutio ejus duraverit .

III. Porro quamvis hæc Persecutio generalibus Edictis promulgata solum anno 257. incœperit, initia tamen præsertim Romæ versùs finem anni 256. referri possunt: tunc enim Valeriani animum circa Christianos mutatum fuisse, indicant Acta SS. Marcelli Eusebii Hippolyti & Sociorum, relata à Baronio ad ann. 259. num. 7. & 9., quibus apparet, Christianos ab eo tempore expositos fuisse jacturæ bonorum & etiam vitæ: eos præcipuè, qui Dæmonibus relictis nomen Jesu Christo dabant. Persecutio hæc pro octava numeratur à S. Augustino L. 18. de Civit. Dei cap. 52. & aliis. Summè violentam fuisse testantur Dionysius apud Eusebium L. 7. cap. 11. & Optatus L. 3. cap. 8., qui eam assimilat leoni dicens: *Primus fuit ut leo: hæc erat Persecutio sub Decio & Valeriano*. Et S. Cyprianus Epist. 56. exhortans Plebem Thibaritanam ad Martyrium crediderit occasum seculi in proximo esse: *Scire debetis & pro certo credere ac tenere pressuræ diem super caput esse cœpissè, & occasum sæculi atque Antichristi tempus appropinquasse &c.*

IV. Quid verò in causâ fuerit, ut Valeriani amor in odium adeò ferum adversùs Christianos verteretur, refert Dionysius apud Euseb. L. 7. cap. 10., fuisse Macrianum Archisynagogum Magorum Ægypti. Is magicis artibus & Dæmone adjuvante ad rerum summam adspirans & ad familiaritatem Valeriani assumptus, ei suadere cœpit, gratum non esse Diis, quòd tanto amore Christianos eorum hostes ipse prosequeretur: quin potius ad eos placandos Christianos ubique insectaretur; promittens ei felicissimum ac diuturnum Imperium. Hæc spe deceptus repente mutatus Valerianus Christianis atrox bellum indixit, eoque instigante etiam ad crudelia & nefanda Sacrificia Dæmonibus offerenda devenit; atque ita viam ad exitium sibi paravit. Audiatur Dionysius citato loco: *Verùm Magister & Archisynagogus Magorum Ægypti ei tandem persuasit, ut ab hoc instituto descisceret: jubens, ut castos quidè & sanctos Viros prosequeretur atque occideret; quippe qui scelestis ac detestandis incantationibus adversarentur atque obstarent. Erant enim & sunt etiamnum ejusmodi, qui vel præsentia vel aspectu suo, & insistentes dumtaxat ac vocem edentes Dæmonum prastigias disturbare possunt. Initiationes autem impuras & abominanda maleficia & Sacrificia execranda peragere eum jussit, miseros infantes mactare, immolare liberos infelicium parentum, recens natorum rimari viscera, Dei figmenta atque opera discerpere ac detrancare, quasi hoc factò ad summam felicitatem esset perventurus. Hæc Dionysius Alexandrinus. Quibus Macrianus vel nolens potentiam Christianorum fatetur, qui vel statu vel voce vel solâ præsentia magicas Dæmonum artes poterant disturbare.*

§. II.

*Initia Persecutionis Romæ & S. Stephani aliorumque
Martyrium.*

I. **V**alerianus ergo Macriano instigante ex Proteſtore factus Christianorum Persecutor, ad eorum cædes saltem Romæ statim prorupit. Primi ejus furorem experti fuerunt Maximus, Eusebius Presbyter, Marcellus Diaconus, Adrias, Paulina, & Neon, Maria, Martana, & Aurelia, de quibus Martyrol. 2. Decembris. Horum Acta ex veteri Codice S. Mariæ ad Martyres Romæ tanquam legitima exhibet Baronius ad an. 259. à num. 8., quæ compendio referam. Valerio & Acilio Consulibus Hippolytus Civis Romanus Christianam vitam solitarius agebat in cryptis, ad quem quamplures Gentilium conſuebant, & ad Christum conversos ad Stephanum Papam ducebat ut baptizarentur. Cùmque hoc crebrius fieret, ad notitiam Præfecti Urbis pervenit, qui rem Valeriano detulit. Id cùm Hippolytus rescivisset, Stephano Papæ nuntiavit, qui collectâ multitudine Christianorum eos adhortatus est ad fortiter tollendam Crucem; addens, si quis eorum propinquum haberet adhuc Gentilem, eum adduceret ad se, ut baptizaretur.

Tunc Hippolytus ad pedes Stephani provolutus: Habeo, inquit, Nepotem decennem & germanam ejus annorum tredecim adhuc Gentiles. Horum mater Paulina & Adrias pater adhuc Gentiles, filios tamen aliquando ad me mittunt. Tunc Stephanus ei suavit, ut cùm iterum mitterentur, eos apud se teneret, ut eâ occasione etiam parentes veniant, & omnes simul lucraretur Christo. Transacto biduo prædicti pueri cibaria quædam ferentes ad Hippolytum venerunt, quos ille detinuit, & Beato Stephano nuntiavit, qui accurrens eos amplexatus est. Accurrerunt parentes solliciti pro filiis, quos Stephanus loquens de horrore futuri Judicii & Gloriâ Beatorum, eos unâ cum Hippolyto Idola relinquere hortatus est. Respondit Abdias, se spoliari bonis & cædi gladio, quæ Christianorum pœna erat, timere. Idipsum inculcavit soror Hippolyti Paulina, invehens in eum, qui hæc suaderet; erat enim à Religione Christiana abhorrens. Sic re infectâ non tamen desperatâ recesserunt.

II. Quare B. Stephanus vocans ad se Eusebium Presbyterum, & Marcellum Diaconum misit eos ad Adriam & Paulinam, qui vocati in Arenarium, ubi erat Hippolytus, advenien-

tes, ab Eusebio his verbis salutati sunt : Expectat vos Christus, ut cum ipso introeatis in Regnum Cœlorum. Paulinâ autem contradicente & objiciente gloriam Mundi hujus, pluribus ei insinuavit veram gloriam non esse aliam quàm Regni cœlestis, & hanc sine Fide & Baptismo non esse assecuturos. Quibus commota Paulina distulit responsum in sequentem diem. Contigit autem, ut eâdem nocte parentes quidam Fideles ducerent ad Eusebium Pontianum filium suum paralyticum, petentes, ut baptizaret eum, qui ab eodem baptizatus statim sanatus est, & soluto etiam vinculo linguæ laudabat Deum. Tunc Eusebius obtulit Sacrificium & omnes Corpore & Sanguine Christi roborati sunt. Quod cum Stephanus cognovisset, venit ad eos, & omnes simul gavisi sunt.

Mane autem facto redierunt Adrias & Paulina, qui cùm accepissent de sanitate pueri, admirati & corde compuncti, prosternentes se petierunt & ipsi baptizari. Hoc audiens Hippolytus & gratias agens Deo rogavit B. Stephanum, ut eos baptizaret. Qui interrogatis eis, an verè credant, & an omnem dubitationem depoverint, indixit jejunium & catechismum, & eos benè instructos & stabiles inveniens, baptizavit omnes, & posito signaculo Christi vocavit puerum Neonem, puellam Marianam & obtulit pro eis Sacrificium, quo participati sunt omnes. Tunc B. Stephanus discessit, & omnes recens baptizati in eodem Arenario cum Hippolyto, Eusebio, & Marcello habitare cœperunt : bona autem quæ habebant in Urbe erogare pauperibus. Hæc initia Gratiæ Christi : fortiora sunt quæ sequentur.

„ III. Facto hoc evulgato & ad Valerianum delato, eos
 „ inquiri jussit, dimidium bonorum ipsorum spondens ei qui
 „ ipsos inveniret. Maximus Commentariensis (qui scilicet car-
 „ ceribus detentorum nomina & dies adnotabat) hâc spe ille-
 „ citus, ut eos invenire posset, finxit se Christianum ac stipe
 „ egentem, & veniens in Cælium Montem, mansit ibi mendi-
 „ cans. Cùm autem transiens cum sociis Adrias elemosynas
 „ erogaret, Maximus volens experiri, an ille esset quem quæ-
 „ reret, ait : Per Christum quem credo, rogo ut facias miseri-
 „ cordiam super egestatem meam. Tunc Adrias misertus illius,
 „ jussit se illum sequi. At dum intraret domum, Maximus
 „ corripitur à Dæmone & clamavit : Viri Dei, ego divulgator
 „ sum vestri : video super me ignem densissimum : orate pro
 „ me, quia crucior igne. Mox illis orantibus & sternentibus se,
 „ Maximus curatus est. Cùmque elevarent eum de terra cla-
 „ mare cœpit : Pereant Deorum cultores : ego Baptismum peto.
 „ Du-

„ Duxerunt illum ad B. Stephanum, qui illum erudiens de-
 „ mum baptizavit, factusque Christianus habitare voluit una
 „ cum Stephano Episcopo aliquot diebus .

„ Post multos autem dies requisitus Maximus Commenta-
 „ riensis & non inventus, nuntiatur Valeriano, ipsum factum
 „ esse Christianum ; qui missi aliis ex Scrinio in domum ejus,
 „ invenerunt eum prostratum orantem : tenentesque duxerunt
 „ ad Valerianum . Cui ille : sic, inquit, cæcatus es pecuniis,
 „ ut promissionibus tuis me falleres ? At Maximus : Hactenus,
 „ inquit, cæcus fui, modò illuminatus video . Quo lumine ?
 „ inquit ille . Respondet Maximus : in Fide Domini nostri Jesu
 „ Christi . Tunc iratus Valerianus jussit eum præcipitari per
 „ pontem . Postea autem corpus inventum Eusebius sepelivit in
 „ cœmeterio Callixti viâ Appiâ decimo tertio Kalendas Fe-
 „ bruarias . Sic qui ad Fidem venit novissimus, accepit coro-
 „ nam primus .

IV. Post hæc Valerianus misit septuaginta Milites, qui in-
 ventos adduxerunt Eusebium, Adriam, Hippolytum, Pauli-
 nam & filios; Marcellus verò Diaconus eis occurrens exprobra-
 vit Valeriano, quòd amici veritatis jussi sint teneri . Omnes er-
 go Judici præsentati ac singuli interrogati & constantes reperti,
 in carcerem simul conjecti sunt . Post triduum Secundianus Ju-
 dex omnia genera tormentorum parari jussit, ac omnibus cum
 Adria introductis, Palladi sacrificare jussi sunt . Qui omnes in Ido-
 lum expuñtes jussi sunt expoliari nudi extendi ac fustibus cædi .
 Cùmque Paulina acriùs caderetur, reddidit Deo spiritum . Hoc
 videns Judex sententiam capitis dixit in Eusebium & Marcel-
 lum, qui ducti ad locum Pastoris ibi decollati sunt . Post hæc
 Adrias cum Hippolyto adductus, & tortis Neone & Mariâ
 filiis, cùm hortante Patre fortes clamarent, Christe adjuva
 nos, coram ipso gladio necati sunt . Tandem Adrias & Hippo-
 lytus ante tribunal positi ac jussi Idolis thus offerre, cùm intre-
 pidè negarent, ac proinde tormentis affecti ac diutissimè cæsi,
 tandem gloriosum Martyrium morte consummarunt . Hæc di-
 stinctiùs in præfatis Actis leguntur . Judicet qui legerit, an ista
 humanis viribus sint tribuenda, an potiùs Divinæ potentia, tan-
 ta vel in Femina & pueris supra conditionem naturæ operanti .

Addunt Acta prælaudata apud Baron. ann. 259. num. 19.,
 quòd post menses novem Romam venerunt è Græcia Marthana
 seu Martha & Aurelia ejus filia ambæ Christianæ, & Adria
 ac Paulinæ sanguine junctæ: cùmque eos quærerent nec inveni-
 rent, audientes Martyrio coronatos esse, gavisæ sunt . Et inqui-

rentes de corporibus illorum, & inventis, ibidem diebus ac noctibus vigilantes in Orationibus permanferunt ufque ad annos tredecim, poft quos in pace quieverunt. Quare immerito Martyrol. Rom. die 2. Decembris eas cum aliis, qui fub Valeriano paffi funt, nempe cum Adria Paulina &c. conjungit.

V. Hoc eodem an. 256. vel 257. Stephanus cum rexiffet Ecclefiam annos quatuor & fere ſex menſes (ſive ut Baronius ad an. 260. num. 2. annos tres, menſes tres & dies viginti duos, vel biennio tantum ut Eufebius L. 7. hiſt. cap. 5.) ac fui zeli pro Fide Chriſti & in controverſia cum S. Cypriano de Baptiſmo Hæreticorum egregia teſtimonia dediſſet, Martyrio & ipſe coronatus fuit. Hujus Acta per extenſum exhibet Baronius citatus num. 3. &c. Ferunt ergo, Valerianum in deterius ruentem juſſiſſe, ut Stephanus & quotquot Romanæ Eccleſiæ Clerici inveniri poſſent capti pœnis afficerentur. Accidit ut ex iſtis duodecim comprehenderentur, nimirum Bonus, Fauſtus, Maurus, Primitivus, Calumnioſus, Joannes, Exuperantius, Cyrillus, Theodorus, Baſilius, Caſtulus, & Honoratus; qui abſque audientia ſtatim viâ Latinâ decollati funt. De his Martyrol. 1. Auguſti. Horum corpora Tertullinus quidam fortè adhuc Gentilis collegit ac ſepelivit. Hunc ad ſe vocatum B. Stephanus de Regno Dei ac Vita Æterna erudiens baptizavit & Presbyterio conſignavit. Biduo poſt Baptiſmum Tertullinus ductus ad Valerianum, cum ad interrogata conſtans perſiſteret, prius ſuſtibus caſus, dein lateribus facibus aduſtis, tandem decollatur. Ejus memoria in Martyrol. Rom. colitur die 4. Auguſti.

VI. Poſt hæc Valerianus miſit Milites, qui S. Stephanum & eos qui cum eo erant Clericos tenerent. Capti ad Valerianum ducti funt, qui Stephanum tantum ad ſe perductum increpare cœpit, quod ipſe eſſet qui Rempublicam conaretur evertere, & ſuaſionibus ſuis Populum ab Idolorum cultu ſepararet. Cui cum reſpondiſſet Stephanus, ſe Rempublicam non evertere ſed firmare, Populum ducendo ad veri Dei cognitionem; juſſit Valerianus eum ad Templum Martis adduci. Quò cum perveniſſet, Deum precatus eſt, ut locum illum deſtrueret, in quo Diabolus ſuperſtitione Populum decipiebat. Quo diſto, factoque tonitruo & fulgure percuſſum Templum ex parte corruit, Militeſque fugientes reliquerunt Stephanum ſolum, qui cum ſuis perrexit ad Cœmeterium Lucinæ, ibique ſuos exhortatus ad tolerantiâ Martyrii, Sacrificium Deo omnipotenti offerre decrevit.

Audiens hæc Valerianus miſit ad eum capiendum Milites, qui

qui eum Sacrificium offerentem invenerunt. Ibi intrepidè Sacra prosequens Myſteria ante Altare in ſua Sede decollatus eſt. Porro planctum magnum, quòd tanto Paſtore eſſent orbatì, Chriſtiani fecerunt, ac ſepelierunt corpus ejus cum ipſa Sede ſanguine ejus aſperſa in loco qui dicitur Cœmeterium Callixti ubi aſſervatur.

VII. Non latet, aliquos S. Stephani Martyrium revocare in dubium ex ſilentio Auguſtini, Eufeſbii, ac Lirinensis, qui de ejus Martyrio nihil dicunt. Verùm omnes, qui de ejus morte loquuntur, eum Martyrio coronatum & quidèſ capitis obtruncatione fatentur, inter quos Anaſtaſius Bibliothecarius. Quibus accedit Eccleſia Latina Martyrol. 2. Auguſti, & Græca in Menol. Baſilii eàdem die, ubi totam hiftoriam referens ait: *Stephanus ſacer Martyr fuit Valeriano Imperatore ex Urbe Roma. Cùm autem propter perſecutionem ſub domuncula latitaret, eos qui ad ipſum ex Gentibus accedebant baptizabat; Diaconos & Presbyteros conſecrabat, Deumque precabatur pro Mundi ſalute. Sanitati verò per ipſum reſtituta filia Emefii Tribuni Plebis, non modò illum, ſed Virorum etiam Mulierumque multitudinem induxit, ut baptizarentur; qui variis conſumti ſunt cruciatibus. Horum autem Reliquias colligens Pontifex Stephanus honorificè ſepelivit. Exin Templum Martis coactus introire & adorare, ingreſſus Deumque precatus proſtravit Idolum. Poſt hæc dum Sacris ipſe ſungeretur, capite obtruncatur, ac depositus fuit in ipſa Cathedra ſimul cum ſuo Diſcipulo, qui manu ſanctum Fidei Symbolum tenebat.*

VIII. Poſtremis hiſce verbis indicari videtur, quod præfata S. Stephani Acta in fine referunt, & eiſdem ferè recitat Martyrol. Rom. 15. Auguſti de S. Tharſicio Acolytho, quem Pagani cùm inveniſſent Corporis Chriſti Sacramenta portantem, ceperunt diſquirere quid gereret: at ille indignum judicans porcis prodere margaritas, tamdiù ab illis mactatus eſt ſuſtibus & lapidibus, donec exhalarèt ſpiritum: & involuto ejus corpore ſacrilegi diſcuſſores, nihil Sacramentorum Chriſti in manibus aut in veſtibus invenerunt. Is ergo ille eſt, cujus corpus in eodem Cœmeterio unà cum S. Stephano depositum fuiſſe Græci tradunt.

IX. Nec eſt quòd mireris (inquit Baronius in Notis ibi) cùm audis Acolythum Chriſti Corporis Sacramenta portantem. Olim etenim ingruentibus Perſecutionibus, cùm non eſſet liberum Chriſtianis quando vellent ad Eccleſiam convenire ac Synaxim celebrare, permittebatur etiam Laicis domum ferre Euchariftiam certis diebus ſumendam; quod habetur ex Tertulliano L. 2. ad Uxorem cap. 5., Cypriano L. de Lapiſis, Clement.

Ale-

Alexandr. L. I. Stomat. pag. 271. . Imò redditâ etiam Ecclesiæ pace sub Christianis atque Orthodoxis Imperatoribus idem usus aliquandiù perseveravit , donec tandem fuit sublatus . De hoc egi Tomo 14. Theolog. Traçt. de Eucharist. qu. 4. Dub. 1. §. 3. , ubi Studiosus plenam de hac re notitiam acquirere poterit .

X. Eodem anno , & fortè ante Stephanum Romæ sub Junio Donato Præfecto passæ sunt SS. Virgines Ruffina & Secunda sorores . Erant istæ ex Familia Senatoria Asterii filiæ (Viri non tam nobilitate generis quàm pietate illustris , ut infra dicam) & Christianam Religionem professæ , quæ sponcione promissæ erant Armentario & Verino professione similiter tunc Christianis . Verùm cum hi Valeriani persecutione irruente Christo ejusque Fidei renuntiassent , ad sui exemplum imitandum Virgines sibi desponsatas seducere modis omnibus conati sunt . At illæ nuptiis potius , quàm Christo renuntiantes , imò Christo Virginitatem voventes , Româ abscedere statuerunt . Hoc cum rescivissent Sponsi eas , dum jam quatuor aut quinque leucis ab Urbe abessent , detineri & ad Donatum Præfectum adduci curarunt : coram quo cum constantes in Christi Fide perseverassent , extra Urbem ductæ & variis tormentis cruciatæ , capite plexæ sunt . De his Martyrol. Rom. 10. Julii hæc habet : *Romæ Sanctarum Virginum & Martyrum Ruffinæ & Secundæ sororum , quæ in Persecutione Valeriani & Galliæni tormentis subactæ , ad ultimum altera gladio capite illiso , altera casâ cervice migravit in Cælum . Quarum corpora in Basilica Lateranensi propè Baptisterium debito honore servantur .*

§. III.

Ecclesiæ Ministros præcipuè insequitur .

I. **P**orrò quamvis hæc Persecutio in suis initiis fuerit violenta Romæ , ut ex dictis apparet , quia fortè vel Ministri ibi sæviores erant , dum viderent Idolorum cultum in dies extinguï , Gentilibus ad cœmeteria & Fidelium cœtus turmatim confluentibus & nomen Christo dantibus : in aliis tamen Imperii Proviucis initio mitiorem fuisse colligitur ex Actis Authenticis S. Cypriani , ubi habetur , anno 257. ab Imperatoribus Valeriano & Galliæno ad Aspasium Paternum Africæ Proconsulem datas fuisse litteras , quibus jubebantur Romanas Cæremonias observare etiam ii , qui Romanorum Religionem minimè servabant , nullâ de Christo ejurando factâ mentione , solâ exilii pœnâ illis in-

indictâ, qui parere recusassent, eis inhibendo ne impofterum conventus facerent .

II. Totum hoc probat factum Æmiliani cum S. Dionysio Alexandrino, qui ab isto non postulavit, ut Christum desereret; sed ut Romanorum quoque Deos coleret: quòd cum S. Dionysius hoc facere recusasset, exilio ipsum multavit. Audiamus Dionysium ipsum apud Eusebium L.7. cap.11. ita ex Actis publicis scribentem: *Inducto Dionysio, Fausto, Maximo, Marcello, & Charenone, Æmilianus Præfectus dixit: Non solum scripto, sed etiam vivâ voce vobiscum differui de humanitate Principum nostrorum, quâ illi erga vos utuntur. Vobis enim potestatem fecerunt salutis vestræ retinendæ, dummodò ad id quod naturæ consentaneum est ferri, Deosque Imperii illorum custodes adorare, & eorum quæ naturæ ipsi repugnant oblivisci velletis. Quid ergo ad hæc dicitis? Neque enim vos ingrato animo fore spero adversus eorum clementiam; quippè cum ad meliora vos traducere conentur. Dionysius respondit: Non omnes ab omnibus coluntur Dii; sed eos singuli colunt, quos arbitrantur Deos. Nos quidem unum Deum omnium rerum opificem, qui Valeriano & Gallieno sacratissimis Augustis Imperium tradidit, colimus & adoramus. Huic continuas preces offerimus pro Imperio illorum, ut stabile & inconcussum permaneat: Æmilianus Præfectus iterum dixit: Quis verò vos prohibet, quo minus & hunc, si quidem Deus est, cum iis qui naturâ Dii sunt adoratis? Deos enim colere iussi estis, eosque quos cuncti norunt Deos. Dionysius respondit: Nos nullum alium adoramus. Æmilianus Præfectus dixit: Video vos ingratos esse simul ac stupidos, qui clementiam Augustorum minimè sentiat. Quamobrem non manebitis in hac Urbe, sed mittimini in partes Lybiæ ad locum qui dicitur Cephro. Hunc enim locum jussu Augustorum nostrorum elegi. Nullatenus autem licebit vobis, nec quibuscumque aliis, conventus agere, aut ea quæ vocantur Cæmeteria adire. Quod si quis ad eum quem iussi locum minimè profectus deprehendetur, aut in conventu aliquo fuerit inventus, is sibi ipse periculum arcesset; non enim decrit congrua animadversio. Abscedite igitur quòd iussi estis. Tantâque festinatione executioni demandatum fuit, ut Dionysius ipse addat: Statimque me, tametsi agrotantem, proficisci compulsi, ne diei quidem unius dilatione concessa.*

III. Sed quis contra Deum prævalebit? Abierunt quidem Dionysius & focii, sed Conventus agere Deo adjuvante non destiterunt: subdit enim Dionysius: *Verum eos qui in Urbe erant, perinde ac si adessent, majore studio congregavi in Ecclesiam, absens quidem corpore, ut jam dixi, animo autem præsens. (Quibus pa-*
tet

tet solos Ecclesiæ Ministros exilio fuisse multatos) *Apud Cephro* verò nobiscum magna Fidelium affuit multitudo , partim eorum , qui nos ab Urbe secuti fuerant , partim aliorum qui ex reliqua Ægypto confluebant . Ibi quoque januam nobis patefecit Deus ad prædicationem Verbi sui . Et initio quidem persecutionem passi , & lapidibus impetiti sumus ; postmodum verò non pauci ex Gentilibus relictis simulacris ad Deum conversi sunt : tunc enim primum apud illos Verbi Divini per nos sparsa sunt semina , cum illud antea non suscepissent . Ac prorsus quasi Deus ejus rei causâ nos ad illos perduxisset , postquam illud ministerium implevissem iterum nos aliud transtulit , nimirum ad Regionem , quam Dionysius vocat *Colluthionis* , ut eis adimeret occasionem Fidei disseminandæ , sed contrarium evenit . Sicque dum Christi hostes omnia moliebantur , ut ejus Fidem extinguerent , nescientes ac nolentes ad eam propagandam ejus Ministros mittebant , ut in eis impleretur illud Psalm. 20. v. 12. *Cogitaverunt consilia quæ non potuerunt stabilire ; quia (Psalm. 32. v. 10.) Dominus dissipat consilia Gentium : reprobat autem cogitationes Populorum & reprobat consilia Principum . Consilium autem Domini in æternum manet .*

IV. Verum ad tantam rei evidentiam voluit Gentilitas cæcutire . Anno 258. circa medium , cum Valerianus iter in Orientem contra Persas direxisset , Rescriptum ad Senatam dedit , quo præcipiebat , ut Episcopi , Presbyteri , & Diaconi absque dilatione è medio tollerentur : Senatores , Viri conditione illustres , Equites Romani statim dignitate & bonis privarentur ; et si in confessione Christi persistenterent , capite plecterentur . Mulieres genere nobiles bonis omnibus spoliatae in exilium mitterentur , & Cæsariani , nempe de domo Cæsaris , qui Christum jam confessi essent vel imposterum confiterentur , eorum bonis Fisco addictis , catenis vincti in terras domini disperserentur . Ita ex Cypriani Epist. 82. , cujus verba infra §. 4. num. 4. subjiciam . Terribile sanè mandatum , quo tamen Christiani , qui de Populo erant , comprehensi non leguntur . Et quidem dum S. Cyprianus Carthagine iret ad Martyrium copiosa Fidelium multitudo eum impune sequebatur . Idem S. Fructuoso Tarraconeusi Episcopo contigit ; aliisque Sanctis Martyribus fidelis Populus , Gentilibus ipsis videntibus , præstabat caritatis officia . Non ibo tamen inficias , alios etiam Viros simplices de Populo ac nullâ Ecclesiasticâ seu civili dignitate præditos Martyrium subiisse , ut Catechumenos Laicos & Feminas : quo fit , ut multi etiam ex Laicis pro Christo sanguinem fuderint , maximè si specialiter de Fide interrogati eam constantes profiterentur . Negari tamen non

non potest, præfatum Valeriani Edictum Ecclesiæ Ministros, aliosque in dignitate aliqua Laicali constitutos directè ac expressè respexisse; cum enim maxima Populi pars in omnibus Provinciis Christum jam esset amplexa, fortè timuit, ne si omnes communiter ad necem tentaret, vel commotiones insurgerent, vel Mundum hominibus desolatam relinqueret.

§. IV.

SS. Sixti II. & Laurentii Martyrium.

I. **I**N Episcopos igitur, Presbyteros, Diaconos aliosque Ecclesiæ Ministros, ut his destituta faciliùs rueret, sæviebatur. Inter primos, in quos Persecutionis impetum Valerianus immisit, fuit Sixtus Romanæ Ecclesiæ Episcopus & Laurentius ejusdem Diaconus seu Archidiaconus. Stephano Papâ, ut dixi, Martyrio coronato 2. Augusti 257., in ejus locum Sixtus seu Xistus ordine II. (ut creditur 24. Augusti) electus fuit, origine Atheniensis, ut volunt aliqui, imò & professione Philosophus, falsò tamen ut puto. Hunc fuisse Diaconum Sixtum, qui cum S. Stephano carceri mancipatus fuit, & cui sex diebus ante Martyrium è carcere dimisso omnia vasa & argenta Ecclesiæ Stephanus concedidit, censet Anastasius cap. 24.: vix tamen credi potest, Sixtum Stephani in carcere socium è carcere fuisse dimissum.

II. Sixtum rexisse Ecclesiam annos duos menses undecim dies sex, scribit Anastasius cap. 25.: alii autem ut Baronius, & communiter, vix anno uno. Brevi tamen spatio explevit tempora multa; nam zelo conjungens animum pacis amantem, nedum in hostes Ecclesiam exterius invadentes fortem sese ostendit, sed vigilans etiam super iis, qui eam interius lacerabant, dissensionem de Baptismo Hæreticorum, quæ Stephanum inter ac Cyprianum exarserat, vel extinxit vel caritate sopivit. De hoc tres ad eum dedit Epistolæ S. Dionysius, ut apud Eusebium L. 7. cap. 5. & 9. Sapientiam itidem manifestavit, dum in Romanæ Ecclesiæ Archidiaconum elegit S. Laurentium, de quo statim sermo erit.

III. Verùm cum anno 258. Persecutio in dies augetur vi Rescripti supra ex S. Cypriano relati, quod Valerianus ad Senatum direxerat: tunc enim quotquot Romæ erant Judices, conspiratione factâ, Christianos omnes præcipuè Ecclesiæ Ministros, qui in eorum manus inciderant, morti tradebant. Ex his una ex primis victimis eorum crudelitati immolatis Sixtus fuit, primus

Ecclesiæ Pastor, cujus zelo cæteri ad Martyrium accendebantur. Comprehensus itaque Sixtus confestim capite truncatus fuit. Ita Anastasius cap. 25. & Martyrol. Rom. die 6. Augusti, ubi ei in Martyrio focii asseruntur Felicissimus & Agapitus Diaconi, & Januarius, Magnus, Innocentius, & Stephanus Subdiaconi. His tamen omisiss, unum solum cum eo passum nomine Quartum scribit S. Cyprianus Epist. 82. ad Successum his verbis: *Xixtum autem in Cœmeterio animadversum sciatis octavo Iduum Augustarum, & cum eodem Quartum*. Horum tamen omisissio, ait Baronius ad ann. 261. n. 4., contingere potuit, quia cum solus Quartus passus sit in eodem loco quo S. Sixtus, nempe in Cœmeterio Callisti viâ Appiâ, alii verò sex in Cœmeterio Prætextati, & fortè aliis in locis, licèt eâdem die; nuntii festinanter ad Cyprianum redeuntes, de solo Sixto & Quarto retulerunt, cæteros eâdem die in Urbe passos, ut sibi non compertos omiserunt. Cæterum Martyrol. Rom. cum præfatis sex Martyribus jungit etiam Quartum octavo Idus Augusti dicens: *Passus est etiam cum eis Beatus Quartus, ut scribit S. Cyprianus*.

Dixi B. Sixtum fuisse capite plexum. Unus Prudentius Hymno 2. eum Cruci affixum tradit his versibus:

*Sic Sixtus affixus Cruci,
Laurentium flentem videns
Crucis sub ipso stipite &c.*

Sed nullus est præter ipsum, qui hoc asserat. Probabilius ergo est, quòd cum Valeriani Edicto vetitum esset Christianis sub pœna capitis Cœmeteria ingredi, inventum in Cœmeterio Callisti Xistum, Judex ceu Legis transgressorem ibi capite truncari illico jussit.

IV. Post triduum à Sixti Martyrio, nempe quarto Idus Augusti primarius Diaconorum Laurentius illustre Martyrium perpassus est. Hinc audiendi non sunt, qui volunt, S. Laurentium sub Decio coronatum Martyrio fuisse, inter quos est Eusebius in Chronico. Nam certum est, Laurentium Sixti II. Papæ Diaconum fuisse, & post passionem Sixti passum fuisse: sub Decio autem Romana Sedes plus quàm anno vacavit, deinde electus fuit Cornelius, postea Lucius, deinde Stephanus, qui sub Valeriano capite truncatus successorem habuit Sixtum. Hunc eodem Valeriano imperante Martyrio coronatum post triduum S. Laurentius ejus Diaconus secutus est. Ex his patet, nullum sub Decio Romanam Sedem occupasse Sixtum, & proinde Sixtum Papam, non sub Decio, sed sub Valeriano, sub quo sedit, obiisse. Nemo autem deceptionem hanc clariùs tollere potest, quàm San-

Sanctus Cyprianus, qui dum B. Sixtus passus fuit adhuc vivens, hoc sub Valeriano Imperatore contigisse tanquam rem certam tradit Epist. 82. ad Successum his verbis: *Multa enim varia & incerta opinionibus ventilantur; quæ autem sunt in vero ita se habent. Rescripsisse Valerianum ad Senatum, ut Episcopi & Presbyteri & Diacones incontinenti animadvertantur: Senatores verò & Viri egregii & Equites Romani, dignitate amisâ, etiam bonis spolientur, & si ademptis facultatibus Christiani esse perseveraverint, capite quoque mulcentur: Matronæ ademptis bonis in exilium releguntur: Casariani quicumque vel prius confessi fuerant vel nunc confessi fuerint confiscantur, & vincti in Casarianas Possessiones descripti mittantur. (En ferale Edictum): deinde profequitur: Subjecit etiam Valerianus Imperator orationis suæ exemplum litterarum, quas ad Præsides Provinciarum de nobis fecit: quas litteras quotidie speramus venire, stantes secundum Fidei firmitatem ad passionis tolerantiam, & expectantes de ope & indulgentia Domini vitæ æternæ coronam. (Vide Cypriani fortitudinem Martyrium sperantis ac desiderantis, non timentis). Deinde subdit: *Xistum autem in Cæmeterio animadversum sciatis octavo Iduum Augustarum die, & cum eodem Quartum. Quid ergo clarius, ut asseramus, S. Sixtum sub Valeriano coronatum, & consequenter etiam S. Laurentium triduo post eandem coronâ insignitum?**

V. Adeò celebris inter Sanctos Martyres fuit apud veteres Patres Laurentius, ut in ejus laudes certatim conspirarint. Præter Prudentium Hymno 2., quem integrum exhibet P. Ruinart. pag. 189., eum laudarunt S. Ambrosius infra referendus, S. Augustinus Serm. 302., & tribus sequentibus, & præcipuè Serm. 303. ubi ait: *Quàm non potest abscondi Roma, tam non potest abscondi Laurentii corona.* Petrus Chrysologus Serm. 135. affirmat, egregia hujus Martyris merita nullam partem Orbis Romani ignorare. S. Leo Serm. 83.: *Ita (inquit, Dominus) per universum Mundum clarificavit gloriam suam, ut à Solis ortu usque ad occasum, Leviticorum luminum cerniscente fulgore, quàm clarificata est Jerosolyma Stephano, tam illustris fieret Roma Laurentio.* Sanctus Maximus Taurinensis de eo tres homilias habuit, quæ extant in Biblioth. PP.. His adjungi possunt Damasus Papa Carminibus 18. 19. 20. 37. & 38., Gregorius Magnus pluribus in locis, Gregorius Turonensis L. de Glor. Mart. cap. 42. L. 1. hist. cap. 30., & alii ferè innumeri.

VI. Verùm etiam si tot SS. PP. testimonia ad nos non pervenissent, Laurentii gloriæ præcones haberemus lapides ipsos tot Ecclesiarum, quæ primis Ecclesiæ pacis temporibus in hujus

Martyris memoriam erectæ fuerunt. Unam Ravennæ extructam, in qua quidam meritis Laurentii sanatus fuit, memorat S. Augustinus Serm. 372. : alias fuisse in Galliis, referunt Gregorius Turonensis loco citato, & Fortunatus L. 9. poemat. 14. , omnibus illustriores sunt tum quæ extra Urbis Romæ muros inter septem Ecclesias locum obtinet, tum quæ Romæ titulo S. Laurentii in Damaso, quia ab hoc Pontifice vel constructa vel restaurata nuncupatur, ibidem etiam S. Laurentii in Lucina, & aliæ summo in honore habentur. Certè jam tempore S. Augustini inter præcipuos Romæ Patronos recensbatur S. Laurentius, ut patet ex ejus Sermone 296. , ubi agens de Sanctorum Reliquiis, quæ Romæ asservabantur, unicum Laurentium cum Apostolis Petro & Paulo exprimit. Item Gregorius Magnus L. 4. Epist. 30. ad Constantinam Augustam scribit, quòd cum inconsideratè quidam S. Laurentii sepulcrum aperuissent, omnes intra decem dies defuncti sunt. Et L. 3. Epist. 33. ad Dynamium transmittit unà cum Cruce de Catenis S. Petri etiam partem *de Beati Laurentii Craticula, in qua perustus est . . . , ut hoc ubi corpus illius pro Veritate crematum est, vestram mentem ad amorem Domini accendat*. Prætereo insignem Basilicam in ejus honorem à Pulcheria Augusta Constantinopoli erectam, & à Justiniano Imperatore ampliatam, & alias : Hæc enim ad præsens satis sunt, ut videas in hoc potentem manum Dei, quæ dum Persecutores Fidelium nece eos extinguere, & ab omnium memoria delere conabantur, effecit, ut toto Orbe insignes evaderent, & eorum memoria immortalis fieret & ab omnibus celebraretur.

VII. Nunc de Persona & Martyrio S. Laurentii agendum est. Eum fuisse gente Hispanum, & à Sixto II. dum esset in Hispania Legatus Romam adductum, sentiunt aliqui, ejusque Parentes fuisse Orientium & Patientiam Oiscæ Martyrio coronatos, de quibus Martyrol. Rom. 1. Maii : quod ex veteribus Ecclesiæ Oiscensis monumentis se colligere autumant. Verùm recentioribus Criticis suspecta hæc redduntur, eò vel maximè, quòd Prudentius & ipse Hispanus, alioquin in gloriam suæ Gentis non omitturus, nihil de hoc dicit. S. Petrus Chrysologus Serm. 135. eum aequè facit cœlestibus bonis divitem ac fortunæ pauperem. S. Sixti Discipulus fuit : unde electus in Pontificem, quamvis adhuc ætate juvenem, quia tamen probatæ virtutis & præcipuæ castitatis Virum, ad Diaconatum eum elevavit eique commisit Sanguinis Domini dispensationem, & Ecclesiæ thesauri pauperibus dispensationem. Quare S. Leo Serm. 83. dicit, quòd non solum in ministerio Sacramentorum, sed etiam dispen-

spon-

spensatione Ecclesiastica substantiæ præminebat. Eum proinde vocat Prudentius Hymno 2. septem Diaconorum Romæ primum (tunc enim solum septem Diaconi exemplo Apostolorum Romæ erant). SS. Augustinus Serm. 302. & 303. Petrus Chrysologus Serm. 135. Archidiaconum eum appellant, cui dignitati bonorum Ecclesiæ administrationem & distributionem affigunt.

VIII. Furente igitur Valeriani Persecutione præcipue in Ecclesiæ Ministros, una ex primis victimis, ut dixi, S. Sixtus fuit: cum ergo ad Martyrium duceretur, sequebatur eum Laurentius plorans, quod solus sine patre relinqueretur, nec sibi daretur cum illo mori, quem tamen Sixtus consolatus fuit, prædicens ei se post triduum eum secuturum. Totum hoc eleganter exponit S. Ambrosius L. 1. de Officiis cap. 41., ubi de S. Laurentio ait: *Qui cum videret Sixtum Episcopum suum ad Martyrium duci, flere cepit non passionem illius sed suam remanitionem. Itaque his verbis appellare cepit: Quid progredieris sine filio pater? Quid Sacerdos Sancte sine Diacono properas? Nunquam Sacrificium sine Ministro offerre consueveras, Quid in me ergo displicuit, pater? Num degenerem probasti? Experire certè, utrum idoneum Ministrum elegeris, cui commisisti Domini Sanguinis consecrationem (aliàs dispensationem, Diaconi enim ministerium erat Pontifici consecranti assistere & Populo Sacra distribuere, ut ex August. Serm. 304.) Cui consummandorum consortium Sacramentorum, huic consortium sanguinis tui negas? Vide ne periclitetur iudicium tuum, dum fortitudo laudatur. Abjectio Discipuli detrimentum est Magistri. Quid? Quod illustres & præstantes Viri Discipulorum certaminibus quam suis vinct? Denique Abraham filium obtulit, Petrus Stephanum præmisit; & tu Pater ostende in filio virtutem tuam, offer quem erudisti, ut securus iudicii tui comitatu nobili pervenias ad coronam.* His de Sixto Laurentius conqueritur, quod cum non adhibeat socium Martyrii, quasi eum non vellet socium triumphi. Hic robur supra humanum quis non videt?

Tunc Sixtus: Non ego te fili relinquo ac desero, sed majora tibi debent certamina. Nos quasi senes levioris pugnae cursum recipimus, te quasi juvenem manet gloriosior de Tyranno triumphus. Mox venies; flere desiste: post triduum me sequeris; inter Sacerdotem & Levitam hic medius numerus decet. Non erat tuum sub Magistro vincere, quasi adiutorem quærens. Quid consortium passionis mea exoptas? Etiam tibi hereditatem ejus dimitto. Quid præsentiam meam requiris? Infirmi Discipuli Magistrum præceant, fortes sequantur: ut vincant sine Magistro, qui jam non indigent magisterio. Sic & Elias Eliseum reliquit. Tibi ergo commendo nostræ virtutis successionem.

Talis

Talis erat contentio, digna sanè, de qua certarent Sacerdos & Minister, quis prior pateretur pro Christi Nomine. In fabulis ferunt tragicis excitatos theatri magnos esse plausus, cum se Pyladem Orestes diceret, Orestes ut erat Orestem se esse asseveraret: ille ut pro Oreste necaretur, Orestes ne Pyladem pro se pateretur necari. Sed illis non licebat vivere, quod uterque esset parricidii reus, alter qui fecisset, alter qui adjuvisset. Hic Laurentium Sanctum ad hoc nullus urgebat, nisi amor devotionis; tamen & ipse post triduum, cum illuso Tyranno super craticulam exareretur: Assum est, inquit, versa & manduca. Ita animi virtute vincebat ignis naturam. Ita in Laurentii encomium Ambrosius.

IX. Promissis igitur sui Pastoris confidens Laurentius Sixto jam coronato Martyrio, accersitis undique pauperibus, eis totum Ecclesiæ argentum, cujus utpotè Archidiaconus custodiam gerebat, distribuit, quin & sacra ministerii vasa ne in manus impiorum inciderent statim vendidit, ac pretium in caritatis opera erogavit. Tot eleemosynarum fama pervulgata ad Laurentium capiendum, S. Maximo teste Serm. 56., excitavit Tyrannum. *Armatur itaque (inquit S. Leo Serm. 83.) geminâ face homo pecuniæ cupidus & veritatis inimicus; avaritiâ ut rapiat aurum, impietate ut auferat Christum, Postulat sibi ab immaculata Sacrarîi Prasule opes Ecclesiasticas, quibus avidissimus inhiabat inferri.* Copiosas Ecclesiâ possidere divitias respondit Laurentius, easque se post triduum (juxta Prudentium & Chrysologum) veriùs tamen (juxta Ambrosium L. 2. de Offic. cap. 28.) die sequenti ostensurum Tyranno promissit. A quo dimissus, in inquirendis pauperibus omnem Urbis partem percurrit, iis præsertim, qui Ecclesiæ pecuniis alebantur, & numero supra mille erant, quibus & Virgines Deo Sacras & Viduas Ecclesiæ subsidio viventes adjunxit. Hos omnes statâ die propè Ecclesiâ longo catalogo descriptos congregari fecit. Quâ occasione multis cæcis signo Crucis visum restituisse, aliqui Veteres senserunt. August. in Append. Serm. 316. & Fulgentius.

X. Cum pervenisset dies, congregatâ pauperum multitudine Laurentius Judicem adivit, eumque ad opes Ecclesiæ, quas concesserat, videndas invitavit. Ivit ille, se auro & argento summè ditandum sibi adulatus. Sed videns tot mendicorum copias, admirans quæsit: ubi essent Ecclesiæ opes quas promiserat. Tunc Laurentius, has esse Ecclesiæ divitias, hos ejus thesauros intrepidè respondit. Hoc enarrans S. Ambrosius L. 2. de Offic. cap. 28.: *Tale, inquit, aurum Sanctus Martyr Laurentius Domino reservavit: à quo cum quærentur thesauri Ecclesiæ,*

sia, promisit demonstraturum se. Sequenti die pauperes duxit. Interrogatus, ubi essent thesauri, quos promiserat, ostendit pauperes dicens: Hi sunt thesauri Ecclesiae. Et verè thesauri, in quibus Christus est, in quibus Christi Fides est.

XI. Hâc aequè ingeniosâ ac innocenti fraude videns se decetum Tyrannus infrenduit, & cum à Laurentio aurum extorquere non posset, ab eo Christi Fidem rapere toto furore conatur. Ita S. Leo Serm. 83.: *Fremet ergo prado frustratus, & in odium Religionis, quæ talem divitiarum usum instituisse, ardescens, direptionem thesauri potioris aggreditur; apud quem nullam denariorum substantiam reperisset: ut illud depositum quo sacratius erat dives auferret. Renuntiare Christo Laurentium jubet, & solidissimam illam Leviticis animi fortitudinem diris parat urgere suppliciiis. Quorum ubi prima nihil obtinent, vehementiora succedant. Laceros artus, & multâ verberum sectione conscissos subjecto præcipit igne torreri, ut per cratem ferream, quæ jam de fervore continuo vim in se haberet urendi, converforum alternâ mutatione membrorum, fieret cruciatus vehementior & pœna productior.*

XII. His indicat S. Leo varietatem cruciatuum, quibus illusione sibi factâ exasperatus Tyrannus in Sanctum Martyrem defecit. Primò ergo nudatum fustibus cædi, & ut ex Martyrologio habetur, scorpionibus, plumbatis cædi ac discerpi, & laminas ardentes lateribus apponi mandavit. Videns autem, nihil magis appetere, quàm pro Christo mori, omnem artem adhibuit, ut pœna productior corpus ac ut sperabat spiritum defatigaret, demum in craticula positum lento igne iussit ejus membra cremari. Ita loquentem Tyrannum Prudentius Hymno 2. inducit.

*Dicis: Libenter oppetam:
Votiva mors est Martyri:
Est ista vobis, novimus,
Persuasionis vanitas.
Sed non volenti impertiam,
Præstetur ut mortis citæ
Compendiosus exitus:
Perire raptim non dabo.
Vitam tenebo & differam
Pœnis morarum jugibus
Et mors inextricabilis
Longos dolores protrahat.
Prunas tepentes sternite
Ne fervor ignitus nimis*

*Os contumacis occupet
 Et cordis intret abdita.
 Vapor senescens langueat:
 Qui fusus afflatu levi
 Tormenta sensim temperet
 Semi-ustulati corporis
 Benè est quod ipse ex omnibus
 Mysteriorum arches (loquens de Mysteriis) incidit.
 Hic solus exemplum dabit,
 Quid mox timere debeant.
 Conscende constratum rogam:
 Decumbe digno lectulo:
 Tunc si libebit disputa,
 Nil esse Vulcanum meum.
 Hac fante Praefecto truces
 Hinc inde tortores parant
 Nudare amictu Martyrem,
 Vincire membra & tendere.*

Hæc Tyrannus. Laurentius autem in craticula ignita velut in molli culcitra jacens hilari vultu coram adstantibus apparebat: imò, ut pergit Prudentius, ex ejus ore Fidelium oculis fulgor quidam micabat similis illi, qui è facie Moysis de Sina descendentis Judæorum oculos perfringebat; & dum carnes sensim assarentur, eorum nares suavi odore recreabat. Porro cum alterum latus igne jam decoctum esset, compellans judicem Laurentius: *assatum est*, inquit, *versa*: cumque Præses verti illum jussisset, subdidit:

*Coctum est, devora:
 Et experimentum cape,
 Sit crudum an assum suavius.*

Hæc quasi ludens dixerat: deinde Cælum suspiciens Romæ miserum statum ingemuit, & pro Ecclesiæ prosperitate ac Gentium conversione fufus ad Deum precibus, è carnis hujus vinculis solutus spiritus, volans ad æterna gaudia gloriosus assumtus fuit. Ita Laurentius de Tyranno invictissime triumphavit, ut immortalem sui nominis gloriam & illustre pro Christo testimonium reliquerit.

XIII. Hinc ejus constantiam in tormentis multi ex Gentilibus admirati ad Christum conversi sunt, inter quos Hippolytus miles, cujus custodia S. Martyr traditus fuerat, cui Martyrium quoque prædixit. Ita Serm. 316. olim S. Augustino tributo, modò in Appendice, ubi sic dicitur de S. Laurentio: *Magnum con-*

consilium cogitasti, cæleste negotium egisti, thesauros Ecclesiæ suscipiens Christianis pauperibus erogasti, & thesauros cælestes accipere meruisti.... Implesti præceptum Domini, & dedit tibi præmium Regni sui. Qualiter te honorem? quo te laudem præconio? qui in ipso prælio confessionis positus, cum adhuc sub custodia Hippolyti ageres, virtutem Domini semper ostendens, Crucem Christi super cæcorum oculos faciebas, cæcos illuminabas, & Hippolytum ad Fidem Christi mirabiliter convertebas. Et infra. Lapidabatur Stephanus & orabat; assabatur Laurentius & hilari facie congaudebat. Orabat Stephanus pro Saulo lapidatore suo; & Laurentius Christianum fecit Hippolytum custodem suum. Magna mirabilia fecerunt Archidiaconi isti: à quibus patiebantur supplicia, ipsis prærogabant Divina beneficia. Hippolyto autem prædixisse Martyrium, habetur Serm.60. sub S. Fulgentii nomine.

Demortui Corpus Viri conspicui ab ipso ad Christum conversi propriis sublato humeris sepulcro tradiderunt, inquit Prudentius.

*Vexere corpus subditis
Cervicibus quidam Patres,
Quos mira libertas viri
Ambire Christum suaserat.*

Hos fuisse Hippolytum præfatum & Justinum, censent Acta & Ado. De Hippolyto consentiunt Græci in Menol. Basilii 10. Augusti, ubi ajunt: *Sanctus verò Hippolytus eorum assumens Reliquias atque sepeliens, captus fuit: & alligatus ad indomitos equos raptatus consummatur.* Hic ille censetur fuisse Hippolytus triduo post Laurentium Martyrio cum aliis affectus, de quo 13. Augusti Martyrol. Rom. hæc recenset: *Romæ Beati Hippolyti Martyris, qui pro confessionis gloria sub Valeriano Imperatore, post alia tormenta, ligatis pedibus ad colla indomitæ equorum per carduetum & tribulos crudeliter tractus toto corpore laceratus emisit spiritum. Passi sunt etiam eodem die Beata Concordia ejus nutrix, quæ ante ipsum plumbatis cascâ migravit ad Dominum; & alii decem & novem de domo sua, qui extra Portam Tiburtinam decollati sunt, & una cum eo in Agro Verano sepulti.*

XIV. Laurentii gloriosa mors verus fuit Dæmonum ac Idolorum interitus: tunc eorum Tempia deferi cœperunt, & Ecclesias frequentari. Ita Prudentius.

*Mors illa Sancti Martyris
Mors vera Templorum fuit:
Tunc Vesta palladios lares
Impune sensit deferi &c.*

Hinc gloriosa Laurentii victoria per Orbem evulgata ubique celebrari à Patribus : & Ecclesiæ , ut dixi , in ejus honorem passim erigi cœperunt . Unde Ambrosius Serm. 1. Edit. Basileæ illum grano sinapis comparans ait : *Igitur Sanctum Laurentium grano sinapis possumus comparare, qui diversis attritus passionibus per totum Orbem gratiam meruit sui fragrare Martyrii: qui antea constitutus in corpore erat humilis ignotus & vilis, posteaquam vexatus lacertatus exustus est, universis per totum Mundum Ecclesiis odorem suæ nobilitatis infudit: & hoc quia granum sinapis (ut ante dixerat) prima fronte specie sui est parvum vile despectum non saporem præstans non odorem circumferens non indicans suavitatem; at ubi teri cœperit, statim odorem suum acrimoniam exhibet, cibum flammæ saporis exhalat, & tanto fervoris calore succenditur; ut mirum sit, in tam frivolis granis tantum ignem fuisse conclusum.* Idem legitur Serm. olim 31. de Sanctis, nunc verò 87. in Append. Operum S. Augustini. In hoc egregio inter Martyres Athletâ paululum immorari pro dignitate censui.

§. V.

Martyres Massa Candida nuncupati.

INter Martyres, quos S. Cyprianus suis exhortationibus sui mox secuturi agonis nuntios præmisit ad Cælum, celebres illi sunt, qui *Massa Candida* nuncupantur. *Massa* (inquit S. August. Serm. 306., quem in eorum natali habuit) *ob numeri multitudinem, Candida ob causæ fulgorem.* Quoad numerum plures quàm centum & quinquaginta fuisse, idem Augustinus in Psalm. 49. asseverat: Trecentos verò fuisse, plures cum Prudentio Hymno 13. asserunt; & hos ex omni Natione sexu ætate Viris Feminis senioribus adolescentulis coaluisse censet Auctor Serm. 317. positi in Appendice S. Augustini.

Ideo autem vocari *Candidam*, nedum ob causæ fulgorem, ut sentit S. August., quia gladio animadversis fuerint, sed quia in fornace ardentis calcis Martyrium consummarint, unde eorum exusta corpora candida apparuerint. Ita ex Prudentio communiter. Gubernator enim ingentem foveam faxis plenam iussit accendi, ut ex eis igne recoctis calcem formaret, & erecto ibi Altari advocavit quotquot ibi erant Christianos, præcipiens eis, ut vel micam salis vel jecur suis in eo adolerent, aut in foveam ardentem sese injicerent. Quo audito nihil cunctantes in ardentem foveam omnes simul se projecerunt: atque ideo *Massa* Can-

Candida dicti, quia eorum cineres calci permixti candidi sicut calx apparuere. Rem ita describit Prudentius.

*Fama refert, foveam campi in medio patere jussam,
Calce vaporiferâ summos propè margines refertam.
Saxa recocta vomunt ignem, niveusque pulvis ardet,
Vere tacta potens; & mortifer ex odore flatus.
Appositam memrant Aram foveâ stetit summâ,
Lege sub hac, salis aut micam jecur aut suis livarent,
Christicola, aut media spontè irruerent in ima fossâ.
Prosiluere alacres cursu rapido simul trecenti.
Gurgite pulvereo mersos liquor aridus voravit,
Præcipitemque globum fundo tenus implicavit imo.
Corpora candor habet, candor vehit ad superna, mentes
Candida Massa debinc dici meruit per omne seculum.*

II. Horum Martyrum triumphum Martyrologia celebrant: Carthaginense Kalendis Septembris; cætera verò 24. Augusti, seu nono Kalend. Septembris: inter quæ Romanum hæc habet: *Carthagine Sanctorum trecentorum Martyrum tempore Valeriani & Gallieni, qui inter alia supplicia, cum Præses fornacem calcariam accendi jussisset, & in præsentia ejus prunas cum thure exhiberi, atque illis dixisset: Eligite è duobus unum, aut thura super his carbonibus offerre Jovi, aut in calcem demergimini: Fide armati Christum Dei Filium confitentes ita rapidissimo se injecerunt in ignem, & inter vaporem calcis in pulverem sunt redacti: ex quo candidatus ille Beatorum Exercitus Massa Candida meruit appellari.*

His, præfatorum Martyrum passio Carthagine contigisse, videtur. Attamen S. Augustinus eos Uticæ fuisse passos, indicat Serm. 311., qui tertius est in natali S. Cypriani; ubi eos *Uticensem Massam Candidam* appellat: & ejus tempore fuisse Uticæ Basilicam in eorum memoriam erectam, constat ex ejusdem Enar. in Psalm. 144., quam ad ejus Civitatis Plebem habuit Uticæ in *Basilica Massa Candida*. Et hoc probabilius videtur; in ea enim Urbe Proconsulem de Martyrum causis cognovisse certum est: siquidem Beatus Cyprianus paulò ante passionem suam quæsitus, ut illuc ad Proconsulem perduceretur, se abscondit, ne extra Civitatem longè à Plebe sibi commissâ Martyrium suum expleret, ut testatur ipse Epist. 83. Illic ergo Proconsul manens, cum ex variis Africæ partibus & Carthagine etiam plures ad se Christianos adduci jussisset, eos qui Massa Candida dicti sunt, Martyrio affecit 24. Augusti, ut dictum est: quos paucos post dies passio Sancti Cypriani eodem anno 259. secuta est; de qua statim.

§. VI.

S. Cyprianus ejusque Passio.

I. **S** Ancti igitur Cypriani, zelo doctrinæ & Fidei confessione omnium Patrum ore celebratissimi, nostri non est Vitam ac Gesta per extensum referre, sed solum in argumentum Christianæ Veritatis ejus usque ad Martyrium constantiam exhibere; pauca tamen ex ejus ortu, conversione, & subinde ab eo gestis, intento præsentis inservientia colligemus. Cyprianus ergo Natione fuit Afer, & fortè etiam Carthagine natus, dicente Prudentio Hym. 13., quòd ibi fuit passus ubi natus. Thascius etiam dicebatur & Cæcilius; hoc tamen à Cæcilio Presbytero, qui ejus conversionis auctor fuit, postea assumpsit. Gregorius Nazianzenus Orat. 18. eum describit genere nobilem, imò Senatorii ordinis, divitiis affluentem, potentiâ conspicuum; Oratoriæ ac bonarum artium studiis à juventute deditum facit Pontius in vita ipsius: religione tamen ab initio Paganus; & ut aliqui putant, Magiæ deditus fuit: quod tamen infra rejiciam.

II. Verum Gratia Dei, quæ eum à vanitate ad Fidem, & ab erroribus ad veritatem trahere destinarat, operâ Cæcili Presbyteri viri iusti & ætate venerabilis usa est, à quo Christianæ Fidei mysteriis imbutus baptizatus est anno ut putatur à Christo nato 246. Post Baptismum, imò & adhuc Catechumenus, humanâ sapientiâ statim rejectâ, totum Divinarum Scripturarum studio se dedit, professus insuper continentiam, & distractis rebus suis omnem substantiam in pauperes erogans, idque teste Pontio adhuc Catechumenus; ut ante penè cœperit perfectus esse, quàm disceret. Huic multùm contulit prælaudatus Cæcilius, de quo in Martyrol. 3. Junii, quem Baronius ibi existimat fuisse Cæcilium clarum Oratorem, Magistrum olim Diadumeni Cæsaris pueri laudatissimi, de quo Ælius Lampridius in Diadumeno: fuit enim Afer, rhetor, & optimis moribus imbutus.

III. Tantam in se mutationem admirans Cyprianus ipse fusè exaggerat Epist. 2. ad Donatum, ubi expositis erroribus & seculi vanitatibus, quibus antea tenebatur, subjungit: *Hæc egomet sæpe mecum: nam ut ipse quamplurimis vitæ prioris erroribus implicatus tenebar, quibus exui me posse non crederem; sic vitiis adhærentibus obsecundans eram, & desperatione meliorum malis meis veluti jam propriis ac vernaculis adfovebam. Sed postquam undæ genitalis auxilio superioris avi labe detergâ in expiatum pectus ac purum desuper*

per se lumen infudit, postquam cœlitus spiritu hausto in novum me hominem nativitas secunda reparavit; mirum in modum protinus confirmare se dubia, patere clausa, lucere teuebroso; facultatem dare quod prius difficile videbatur; geri posse quod impossibile putabatur: ut esset agnoscere terrenum fuisse, quod prius carnaliter tantum delictis obnoxium viveret, Dei esse cœpisse, quod jam Spiritus Sanctus animaret. Scis ipse profectò & mecum pariter recognoscis, quid detraxerit nobis, quidve contulerit mors ista criminum, vita virtutum . . . Dei est, inquam, Dei omne quod possumus: inde vivimus, inde pollemus; inde sumto & vigore concepto, hic adhuc positis futurorum indicia prœoscimus &c.

IV. Ad quantum doctrinæ & Christianæ virtutis gradum brevi Cyprianus ascenderit, illud argumento est, quod adhuc Neophytus, & in Fide tempore novitius, iudicio Dei & Populi postulatione ad munus Presbyteri, & subinde ad Episcopatus dignitatem evehctus fuit anno Christi 148., nimirum à sua conversione vix elapso biennio, dum morte Donati Carthaginensis Sedes vacaret. Quantum verò humilitas ejus restiterit, narrat Pontius in ejus Vita: *Cùm, inquit, in delectationem ejus & honorem totus Populus aspirante Domino profliret, humiliter ille secessit: antiquioribus cedens, & indignum se titulo tanti honoris existimans, ut dignus magis fieret, magis enim dignus efficitur, qui quod meretur excusat. . . . Obsederat foras domus copiosa fraternitas, & per omnes aditus sollicita caritas circuibat. . . . Erat videre cæteros omnes suspensos anxio spiritu expectare venturum, cum gaudio nimio excipere venientem. Hoc modo nolens, sed Deo obediens Episcopatum suscepit: & quod observatione dignum est, paucos, qui ejus electioni se opposuerunt, nedum malo animo non excepit, sed etiam postea amicissimos habuit, & inter familiares suos, mirantibus multis, computavit.*

V. Qualis verò in Episcopatu fuerit, prosequitur Pontius his verbis: *Exinde quemadmodum se gesserit, quis referre sufficiat? quæ illi pietas? qui vigor? misericordia quanta? censura quam sobria? Tantum sanctitatis & gratiæ ex ejus ore lucebat, ut confunderet intuentium mentes. Gravis vultus & latus, nec severitas tristis, nec comitas nimia, sed admixta utrimque temperies, ut esset ambigere, vereri plus an diligere mereretur: nisi quod & vereri & diligere merebatur. Sed nec vultus dispar fuit à vultu: temperatus & ipse de medio: non illum superbia secularis inflaverat, nec tamen prorsus affectata penuria sordidarat; quia & hoc vestitus genus à jactantia minùs non est, quàm ostentata taliter ambitiosa frugalitas. Quid autem circa pauperes Episcopus faceret, quos Catechumenus dilige-*
bat?

bat ? . . . Cyprianum de suo talem accepit Cathedra, non fecit. His boni Episcopi & Pastoris effigiem in Cypriano compendiosè indicat Pontius.

VI. Vix biennio durante pace rexerat Ecclesiam suam, cum excitatâ anno 250. à Decio Persecutione, Domino sic disponente eique inspirante, Ecclesiam suam corpore sed non curâ relinquere coactus est; licet enim absens, zelo tamen & vigilantia gregi suo semper præsens fuit: quod ostendunt Epistolæ ab eo in suo secessu scriptæ. Pagani, ut eum comprehenderent, omnem diligentiam adhibuerunt, sed cum invenire non possent, eum publicè proscripserunt. Dixi Cyprianum tunc secessisse, non quia animus ad Martyrium ei deesset, sed Deo ita volente, ut ad aliâ multa, ad quæ illum elegerat agenda, reservaretur. Ita Pontius in ejus Vita: *Potuisset quidem tunc pro velocitate, quæ semper omnia consecutus est, etiam Martyrii circa eam debita corona properare; maxime cum ex suffragiis sæpè repetitis ad leonem postularetur; nisi per omnes ordines gloriarum transcendendum illi esset, & sic ad summa veniendum; & nisi imminens ruina ope tam secundi pectoris indigeret. Finge enim tunc illum Martyrii dignatione translatus; quis emolumentam gratia per Fidem proficientis ostenderet? quis Virgines ad congruentem pudicitia disciplinam & habitum sanctimoniâ dignum velut franis quibusdam Lætionis Dominica coereret? Quis doceret pœnitentiam Lapsos, veritatem Hæreticos, Schismaticos unitatem, filios Dei pacem & Evangelicæ precis legem? Per quem Gentiles blasphemii percussu in se iis, quæ nobis ingerunt, vincerentur? A quo Christiani mollioris affectus circa amissionem suorum, aut quod magis est, fidei parvioris, consolarentur spe futurorum? Unde sic misericordiam, unde patientiam disceremus? Quis livorem de venenata invidia malignitate venientem dulcedine remedii salutaris inhiberet? Quis Martyres tantos exhortatione Divini sermonis erigeret? Quis denique tot Confessores frontium notatarum secundâ inscriptione signatos, & ad exemplum Martyrii superstites reservados incentivo tubæ celestis animaret? Bonè benè tunc & verè spiritualiter contigit, quod Vir, necessarius tam multis & tam bonis rebus, à Martyrii consummatione dilatus est. Hæc sunt, propter quæ Deus Cypriani Martyrium ad aliud tempus distulit, quæ postea egregiè peregit, ut ejus Libros ac Epistolas legenti constabit; quæ si Martyrio præventus fuisset, non egresset.*

VII. Anno igitur 251., redditâ aliqualliter à Paganis Ecclesiæ pace, ut diù optaverat, S. Cyprianus Carthaginem post Pascha reversus oves suas, quas antea litteris, præsentia verbis & fa-

& factis consolatus est. Et opportunè quidè, nam Ecclesiam illam Felicissimi & Novati schismate discissam, & insuper circa pacem Lapsis dandam discordem invenit. Coactò igitur Episcoporum Concilio disciplinam de Lapsis recipiendis statuit, & pro unitate aded strenuè certavit; ut tandem extincto schismate, Novato Felicissimo & Novatiano ejuratis, solum Cornelium verum & legitimum Episcopum Romanum Africa recognoverit.

VIII. Anno 252. iterum excitata fuit Persecutio, occasione cujus generalis indulgentia Lapsis à S. Cypriano concessa est. Sequenti autem anno 263. toto ferè Imperio grassari pestis cœpit: quâ frage Carthaginem invadente, quo caritatis ardore periclitantibus non solum Fidelibus sed etiam Ethnicis Cyprianus subveniret, enarrat Pontius dicens: *Erupit postmodum lues dira, & detestabilis morbi vastitas nimia, innumeros per diem Populos à sua quemque Sede abrupto impetu rapiens, continuatas per ordinem domos Vulgi trementis invasit. Horrere omnes, fugere, vitare contagium; exponere suos impiè: quasi cum illo peste morituro, etiam mortem ipsam aliquis posset excludere. Facebant interim in tota Civitate non jam corpora sed cadavera plurimorum, & misericordiam in se transeuntium contemplatione sortis mutua flagitabant. Nemo respexit aliud, præterquam lucra crudelia; nemo recollectione similis eventus trepidavit; nemo fecit alteri, quod sibi fieri voluit.*

Inde subjiciens, quid in tanta rerum calamitate egerit Sancti Pontificis pietas: *Aggregatam, inquit, primò in uno loco Plebem de misericordiæ bonis instituit, docens Divinæ Lectionis exemplis, quantum ad promerendum Deum profint officia pietatis. Tunc deinde subjungit, non esse mirabile, si nostros tantum debito caritatis obsequio fovemus: eum persecutum posse fieri, qui plus aliquid Publicano vel Ethnicò seceris. Alia multa ex ardore caritatis protulit; de quibus hoc tantum dixisse satis est (ait Pontius), quod si illa Gentiles pro nostris audire potuissent, forsitan statim crederent. . . . Distributa sunt ergo continuò pro qualitate hominum atque ordinum ministeria: multi qui angustia paupertatis beneficia sumtus exhibere non poterant, plus sumtibus exhibebant; compensantes proprio labore mercedem divitiis omnibus caviorem: & hoc, erga omnes, non solum ad domesticos Fideis in hoc Tobia pietatem superantes, qui necatos & projectos sui tantum generis colligebat; hi autem non suæ Fidei tantum hominibus, sed & Infidelibus ac inimicis eadem pietatis officia adhortante Cypriano præstabant. Qui proinde hoc tempore Librum de Mortalitate creditur conscripisse.*

IX. Verùm tot egregia S. Cypriani omnigenæ virtutis opera cuiquam videri poterit aliquatenus obscurasse Controversia circa annum 256. exorta de Hæreticis baptizandis; in qua pro parte affirmante plus æquo visus est Cyprianus excessisse adversus Stephanum Romanum Pontificem pro negativa statuentem: sed præter ea quæ dixi in Cypriani excusationem tom. 13. Theolog. Tract. de Bapt. qu. 4. dub. 3., non inficiabor, Cyprianum & Stephanum de hoc servidè invicem pugnassee, pugna tamen intellectuū & opinionum fuit, non voluntatum, quæ caritatis unitatem servavit. Tria Africana Concilia pro se Cyprianus opponebat, & Sacram Scripturam pro se stare existimabat: Stephanus autem Traditionem consuetudine roboratam reponebat. Cyprianus Stephani personæ acrius in eum ac suæ opinionis fautores invehenti, quàm suæ Cathedræ auctoritati resistebat, à qua numquam se sejunxit: errorem tuebatur quidè, sed quem talem nondum agnoscebat, nec idè caritatem amisit.

X. Cæterum saltem mortuo Stephano disputationis fervor sopitus fuit: cui multum profuit S. Dionysius Alexandrinus, qui etiam vivente Stephano pro pace Ecclesiæ egregiam navavit operam. De factò enim Sixtus Stephani successor nullam de hac quæstione litem movit, & cum eo Cyprianum fuisse caritate conjunctum, ostendit ipse Epist. 82., ubi ejus Martyrium celebrat; aitque à nuntiis, quos Romam miserat ut exploratam veritatem haberet, de gravissima Persecutione ibi furente & Sixti Papæ Martyrio se factum fuisse certiores: quæ sanè omnia probant, inter utramque Ecclesiam Romanam & Africanam tunc magnam communicationem intercessisse. Quod confirmat Pacianus Barcinonensis Antistes Epist. 2. ad Sympronianum, ubi Beati Cypriani mortem laudans: *Cyprianus, inquit, in concordia omnium, in pace communi, in Confessorum grege passus est.* Et S. Augustinus Serm. 312. ait: *Merito in Ecclesia Catholica tanti honoris celsitudinem meruit* (Cyprianus), *cujus concordissimum vinculum tantâ humilitate servavit.* Scio quidè, eundem S. Augustinum aliquando fluctuassee (L. 2. de Bapt. cap. 4.) an Cyprianus errorem suum retractarit: sed humilitas, quæ ipsum in concordia vinculo perpetuò servavit, indicat, cum sicut & cæteros Africanos Episcopos huic veritati, de qua nullam ampliùs moverunt quæstionem, sensim acquievissee, & solos postea Donatistas in eam insurrexissee.

XI. Nunc ad S. Cypriani exordia passionis procedamus. Annus igitur 257. ad diem 30. Augusti perductus fuerat; cum Valeriano quartò & Gallieno tertio Consulibus, coram Aspasio Pa-

Paterno Africæ Proconsule Carthagine adductus Cyprianus, Proconsule sibi dicente, se litteras Imperatorum tenere, quibus qui Romanam Religionem non colunt ad Romanas cæremonias transire jubentur, respondit: *Christianus sum & Episcopus. Nullos alios Deos novi, nisi unum & verum Deum, qui fecit Cælum & terram, mare, & quæ sunt in eis omnia. Huic Deo nos Christiani deseruimus; hunc deprecamur diebus ac noctibus pro nobis & pro omnibus hominibus, & pro incolumitate ipsorum Imperatorum.* Cùmque in hac confessione perseveraret, Paternus ei dixit: *Poteris ergo secundùm præceptum Valeriani & Gallieni exul ad Urbem Curubitanam proficisci: cui Cyprianus: Proficiscor,* inquit, quia verò Paternus ab ipso scire volebat, quinam in ea Civitate essent Presbyteri, Cyprianus constanter respondit, sibi non licere quemquam offerre, sicut nec cuique offerre seipsum; ipse perquireret, & perquisitos inveniret. A me ergo invenientur, ait Proconsul: & adiecit: præceperunt etiam, ne in aliquibus locis conciliabula fiant, nec cœmeteria ingrediantur, & si quis non observaverit, capite plectetur: cui Cyprianus, *fac, inquit, quod tibi præceptum est.*

XII. Missus est igitur S. Episcopus Curubin in exilium, locum in Peninsula Minoris Africæ Septemtrionali, aeris quidem non injucundi, desertum tamen & solitudini aptum (teste Pontio ejus Diacono, qui ei comes in exilio fuit) ubi tamen nil ei deerat, caritate Fidelium ibi existente, & Carthaginiensium quoque eum frequenter invisentium. Pervenit Curubin die 12. vel 14. Septembris anno nimirum ante Martyrium, de quo primâ nocte hâc visione certior à Deo factus fuit. Hanc ex ejus ore auditam ita refert Pontius: *Eo die quo primum in exilii loco mansimus (nam & me inter domesticos comites dignatio caritatis ejus delegerat exulem voluntarium, quòd utinam & in passione licuisset!) Apparuit mihi, inquit, nondum somni quiete sopito Juvenis ultra modum enormis; qui cùm me quasi ad Prætorium duceret, videbar mihi Tribunali sedentis tum Proconsulis admoveri. Is ut in me respexit, annotare statim cœpit in tabula sententiam, quam non sciebam; nihil enim de me solitâ interrogatione quaesierat: sed enim Juvenis, qui à tergo ejus stabat, admittam curiosus legit quidquid fuerat adnotatum. Et quia inde verbis proferre non poterat, nutu declarante monstravit, quid in litteris tabulæ illius haberetur; manu enim expansâ & complanatâ ad spatæ modum, ictum solitæ animadversionis imitatus: quod volebat intelligi, adinstar liquidi sermonis expressit. Intellexi sententiam passionis futuram: rogare tamen cæpi & petere continuò, ut dilatio mihi vel anius diei prorogaretur, do-*

nec res meas legitimâ ordinatione dispouerem. Et cùm preces frequenter iterassem, rursus in tabula cæperat nescio quid aduocare. Sensi tamen de vultus serenitate iudicis mentem quasi justâ petitione commotam: sed & ille iuuenis, qui jamdudum de passionis iudicio gestu potius quàm sermone prodiderat, clandestino itidem nutu concessam dilationem, quæ in crastinam petebatur, contortis post inuicem digitis significare properavit. Hucusque ex ore Cypriani Pontius. Qui tamen addit, quòd hic dies, quem pro dilatione petebat, significabat annum, quo ille post visionem acturus in seculo fuerat; nam eo die post exactum annum coronatus est, quo hoc illi ante annum fuerat ostensum: cùm sæpè in promissionibus futurorum dies pro anno usurpetur. Dilatio autem, quam Vir Sanctus petebat, non alium finem respiciebat, quàm ut posset de rebus Ecclesiæ suæ & pauperum curâ disponere.

XIII. Et sanè eo anno multa contigerunt, quæ ejus providentiâ & zelo indiguerunt. Eo enim anno per omnes Africæ partes recruduit Persecutio; publica autem confessio, quam ipse coram Proconsule fecerat, veluti tuba non solos Episcopos Presbyteros & Diaconos sed etiam Laicorum multitudinem ad præliandum fortiter pro Christo excitavit: quos proinde suis Epistolis animabat. Ex Episcopis emicuerunt Nemesianus, Felix, Lucius, alter Felix, Litteus, Polyanus, Victor, Jader, & Dativus. Quarum autem Urbium fuerint Episcopi, colligi potest ex Actis Concilii Carthaginensis sub Cypriano cui interfuissent: & licèt unâ cum ipso in sententiam de Hæreticorum Baptismate adversus Stephanum iverint, tamen sicut ille, ita & isti nunquam se à Catholica unitate & caritate diviserunt. Hi ergo carceri traditi, ac deinde fustibus cæsi, ad metalla damnati fuerunt: quos magna Populi multitudo ad carceres & metalla secuta est, nesciens à suis Pastoribus separari.

Horum memoriam celebrat die 10. Septembris Martyrol. Rom. his verbis: *In Africa natalis Sanctorum Episcoporum Nemessani, Felicis, Lucii, alterius item Felicis, Littei, Polyani, Victoris, Jaderis, Dativi, & aliorum, qui sub Valeriano & Gallieno, exurgente Persecutionis rabie, ad primam confessionis Christi constantiam graviter fustibus cæsi, deinde conapedibus vincti, & ad fodienda metalla deputati, gloriosæ confessionis agonem consummarunt.* Ad hos S. Cyprianus è suo exilio scripsit Epistolam 77., quâ comprehendit etiam alios Presbyteros Diaconos & Fratres cæteros in metallo constitutos Martyres Dei Patris Omnipotentis & Jesu Christi Domini & Dei. In ea exprimit desiderium suum veniendi ad eos amplectendos, sed cùm corpore venire non

non detur, se tamen dilectione & spiritu præsentem fieri contestatur. Gratulatur, multos ex eis Martyrio jam fuisse coronatos, & eorum qui supererant in perferendis vinculis aliisque laboribus constantiam laudat, promittens eos citò à pœnis ad cœlestia gaudia venturos. Nec solum verbis eos corroborat, sed elemosynis per Herennianum Subdiaconum & Lucanum & Maximum fratres, eorum indigentis subvenit, de quo Epist. 80. ei gratias agunt.

XIV. Cypriano rescripserunt Nemesianus, Dativus, Felix, & Victor Epist. 78., & Lucius nomine omnium Epist. 79. Scripsit etiam Cyprianus ad Rogatianum Juniorem & ceteros Confessores in carcere constitutos Epist. 81.; quâ Rogatianum & ceteros collegas consolatur, & exemplo Rogatiani senioris, & Felicissimi Martyris animos illis addit. Hunc Felicissimum quietum & sobrium appellat ad distinctionem alterius Felicissimi inquieti & schismatici Novati partes secuti, de quo Epist. 38. 39. 40. 42. & 55.. Hoc ultimo sui exilii & vitæ anno Librum de Exhortatione ad Martyrium perfecisse S. Cyprianus creditur. Id tamen certum est, eum in nullo defuisse, quod zelus & caritas erga omnes ab eo postulare.

XV. Interea dum S. Cyprianus Curubi moraretur, & annus dilationis promissæ jam ad finem inclinaret, Galerius Maximus Paterno in Proconsulatu successerat anno 258., & S. Cypriano ab exilio Carthaginem reversus in hortis suis, fortè ibi relegatus, detinebatur. Mense igitur ejusdem anni Augusti propinquante, ferociore litteræ contra Christianos Romæ ab Imperatoribus in Africam pervenerunt, de quibus certior factus fuit Cyprianus, sicut & de Martyrio Sixti, ut ex Epistola 82. ejusdem ad Successum apparet. Has Galerius Proconsul cum Uticæ maneret accepit, in quarum executionem tercenti Martyres dicti *Massa Candida*, de quibus supra, post medium Augusti ibidem coronati sunt. Post hæc Proconsul de Cypriano sollicitus, sperans eo sublato ceteros faciliè subigendos, satellites misit, qui eum Uticam ad se perducerent: quod cum Cyprianus præcivisset, amicorum hortatu ab hortis secedens, in abditiore loco se occultavit, donec Proconsul Carthaginem veniret.

XVI. Ne tamen quis suspicetur, Virum, qui tot adhortationibus alios ad Martyrium excitaverat, modò formidine aut metu latebras quævisse; noverit, Cyprianum id egisse, non ut illud declinaret, quod imò summis votis exoptabat; sed ut illud gloriosius & solemnius consummaret Carthagine toto grege suo spectante. Ita ipsemet Epist. 83. protestatur his verbis: *Cum*

perlatum ad nos fuisset, Fratres carissimi, frumentarios esse missos, qui me Uticam perducerent, & consilio carissimorum persuasum esset, ut de hortis nostris interim secederemus, iustā interveniente causā consensu; eo quod congruat Episcopum in ea Civitate, in qua Ecclesie Dominica præest, illic Dominum confiteri; & Plebem universam Præpositi presentis confessione clarificari; quodcumque enim sub illo confessionis momento confessor Episcopus loquitur aspirante Dco, ore omnium loquitur. Caterum mutilabitur honor Ecclesie nostræ tam gloriose, si ego Episcopus alterius Ecclesie præpositus, acceptā apud Uticam super confessione sententiā, exinde Martyr ad Dominum proficiscar; quandoquidem ego & pro me & pro vobis apud vos confiteri, & ibi pati & exinde ad Dominum proficisci orationibus continuis deprecari, & votis omnibus exoptem & debeam. Expectamus ergo hic in fessu abdito constituti adventum Proconsulis Carthaginem redeuntis, audituri ab eo, quid Imperatores super Christianorum laicorum & Episcoporum nomine mandaverint, & dicturi quiddam horum Dominus dici voluerit. Hæc Cypriani de suo postremo secessu ad suam Ecclesiam ratio.

XVII. Cū igitur Proconsul Carthaginem venisset, Cyprianus statim ad suos hortos regressus est; quō illustriores Urbis ac digniores Personæ eum convenerunt, ei loca securiora pro ejus incolumitate offerentes; quæ omnia ille respuit: & nil aliud quàm Martyrium exoptans, circumstantes ad similibus faciendum hortabatur. At duo Commissarii cum Militibus ad hortos pervenientes 13. Septembris anni 258., Tusco & Ballo Consulibus, sanctum Virum super currum in medio eorum velut Christum in medio Latronum ascendere fecerunt, & quasi de capta præda diu requisita latantes, ad Sextum locum sexto militario Carthagine distante, ubi tunc valetudinis causā Proconsul degebat, eum duxerunt. Rumore subito per totam Carthaginem sparso, quōd captus & Sextum ductus esset Cyprianus, concurrebant omnes ad spectaculum. Manebat ille in domo Principis unā nocte sub discreta custodia detentus; ita ut familiares ipsum adire & cum eo conversari possent: Plebs tamen tota sollicita, ne per noctem aliquid sine conscientia sui fieret, apertæ fores Principis excubabat. Nec sine speciali Dei providentia hæc dilatio facta est donec crastinus dies, qui dies passionis futurus ante annum (ut dixi) prædictus fuerat, adveniret.

XVIII. Illuxit denique dies alius ante Kalendas Octobris decimus octavus, dies signatus, dies pro passione prædictus. Egressus est Cyprianus domum Principis, eum propemodum infirmā Turbā comitante. Eundi autem interfuit transitus stadii, do-

donec ad Prætorium perveniret: quò cum ventum fuit, Proconsule nondum procedente, secretior locus datus est. Ibi cum S. Martyr præ itinere sudore maderet, quidam antea Christianus obtulit illi vestes, ut suas jam humefactas siccis permutaret, quod ille recusavit.

XIX. Interim Galerius Maximus Proconsul venit in Prætorium, qui Cyprianum sibi offerri præcepit sedenti in atrio Saucio (in quo interficiendi judicabantur). Cumque illi oblatus fuisset, Galerius dixit: *Tu es Thascius Cyprianus?* Respondit Cyprianus: *Ego sum.* Iterum Galerius: *Tu, inquit, Papam te sacrilegæ mentis hominibus præbuisi?* Respondit Cyprianus: *Ego.* Tunc Galerius ait. *Fusserunt te sacratissimi Imperatores cavemonari.* Cui Cyprianus: *Non facio.* Galerius subjunxit: *Consule tibi.* At Cyprianus: *Fac, inquit, quod tibi præceptum est. In re tam justa nulla est consultatio.* Tunc Galerius conlocutus cum Concilio, sententiam his verbis protulit. Diu sacrilegâ mente vixisti, & plures tibi nefariæ conspirationis homines aggregasti, & inimicum te Diis Romanis & sacris legibus constituisti, nec te pii & sacratissimi Principes Valerianus & Gallienus Augusti, & Valerianus nobilissimus Cæsar ad Sectam caeremoniarum suarum revocare potuerunt. Et ideo cum sis nequissimorum criminum auctor & signifer deprehensus, eris ipse documento his, quos scelere tuo tecum aggregasti. Sanguine tuo sancietur disciplina. Et his dictis, decretum ex tabella recitavit: *Thascium Cyprianum gladio animadverto placet.* Cyprianus Episcopus dixit: *Deo gratias.*

XX. Audita hæc sententiâ Fratres nedum non territi sed alacriores effecti dicebant: Et nos cum illo decollemur. Propter hoc tumultus Fratrum exortus est, & multa Turba eum est prosecuta. Cyprianus ergo in agrum Sexti perductus, ibi se lacerâ byrro (vestis erat more Cappæ) expoliavit, & genu in terra flexo in orationem Deo se prostravit. Et cum se Dalmatica expoliasset & Diaconibus tradidisset, in linea stetit & coepit spiculatorum sustinere: cui cum venisset, iussit suis, ut viginti quinque aureos darent. Linteamina verò & manualia à fratribus ante eum mittebantur: postea verò Beatus Cyprianus manu suâ oculos sibi textit. Qui cum lacinias manuales ligare sibi non potuisset, Julianus Presbyter & Julianus Subdiaconus ei ligaverunt. Postea tremente carnificis dextrâ securi percussus spectantibus innumeris celebri Martyrio vitam coronavit. Ejus corpus propter Gentilium curiositatem in proximo positum est: inde per noctem sublatum cum cereis & scholacibus (faces erant ad arcen-

arcendas noctis tenebras) ad areas Macrobbii Candidiani Procuratoris, quæ sunt in via Mappaliensi juxta piscinas cum voto & triumpho magno deductum est. Post paucos autem dies Galerius Maximus Proconsul decessit. Ita ex Actis Proconsularibus, quorum aliqua etiam ex Pontio defumsi.

XXI. Sic Beatus Cyprianus vivens ac moriens unus pro mille illustre testimonium Christo ejusque Religioni reliquit. Quem summis encomiis meritò celebrarunt Patres: inter quos Pacianus Epist. 1. ad Sympronianum: *Cyprianus*, inquit, *in concordia omnium, in pace communi, in Confessorum grege passus est; & sepe confessus, iteratis persecutionibus & multalaceratione vexatus, & novissimè salutari calice propinatus est*. Suis adhortationibus, & præsertim suæ exemplo fortitudinis, aded ardens in collegis suis ac fratribus cæteris Martyrii desiderium inspiravit; ut nil aliud quàm pro Christo pati in votis haberent. Testantur Epist. 78. Nemesianus, Dativus, Felix, & Victor, & Epist. 79. Lucius, & alii ad metalla damnati, qui ei gratias agentes ajunt: *Tuis vocibus & quæ minùs in nobis instructa erant exornasti, & confirmasti ad sustentationem earundem passionum, quas patienter serimus securi de præmio celesti & de corona Martyrii & de Regno Dei*. Hinc ait Maximus Taurinensis homil. 2.: *Nec immeritò tanto cum honore Cypriani nominis memoria per amplissima Mundi spatia celebratur, quia per universum Orbem ad firmamentum Fidei nostræ & passio ejus & doctrina profecit*.

XXII. Duplicem Basilicam sub Cypriani nomine ædificatam propè Carthaginem fuisse, testis est Victor Vitenfis L. 1. de Persecutione Vandolica: unam quidè, ubi sanguinem fudit; alteram verò, ubi ejus Corpus sepultum est, in loco scilicet, qui *Mappalia* vocabatur. In priori erat celebris illa *Mensa*, ad quam toties Augustinus Sermonem ad Populum habuit, de qua Serm. 310. sic loquitur: *In eodem loco mensa Deo constructa est; & tamen mensa dicitur Cypriani, non quia ibi unquam Cyprianus est epulatus, sed quia ibi est immolatus: & quia ipsa immolatione suâ paravit hanc mensam, non in qua pascat sive pascatur, sed in qua Sacrificium Deo, cui & ipse oblatus est, offeratur*. Alteram verò Basilicam in Decimo sitam & à Vandalis violatam, miro modo fuisse sub Justiniani Imperio restitutam, refert Procopius L. 2. de Bello Vandalico. Sacrum verò ejus Corpus, quod devastatà à Barbaris Africà incultum prorsus jacebat, Caroli Magni Imperatoris Legati ab Aarone Persarum Rege per Africam transpositum obtinuerunt: quod Arelate primùm, deinde Lugduni depositum, Carolus Calvus Imperator in Monasterium Compen-

dii (Compiegne) in suo Palatio erectum transferri curavit . Pameliuſ tamen vult , quòd ab ejus Monaſterii Abbate S. Martyris Reliquias Rothnacenſes in Belgio acceperint . Is locus ſitus eſt inter Tornacum & veteres Nervios , ubi adeſt Collegiata inſignis . Hoc tamen an verum ſit , diſcutere noſtrum non eſt .

§. VII.

SS. Fructuoſi & Sociorum Martyrum .

I. **A**ntiquior inter Martyres Hiſpanos , quorum certa notitia ad nos pervenit , creditur eſſe S. Fructuoſus Tarraconenſis Epiſcopus , qui unà cum Augurio & Eulogio Diaconibus anno 259. Martyrium paſſus fuit . De ejus geſtis ante Martyrium nihil aliud dicere poſſumus , niſi quòd omnibus dotibus ornatus erat , & omnia ea implebat , quæ in Epiſcopo Sanctus Paulus requirit ; ac propterea nedum Fidelium ſed Infidelium etiam amorem ſibi conciliaverat , ut in ejus morte apparuit . Viſitur adhuc Tarraconæ domus , in qua S. Fructuoſum habitaſſe , fert Traditio .

II. Igitur Valeriano & Gallieno Imperatoribus & Æmiliano Conſulibus , 17. Kalend. Februarii ideſt 16. Januarii die Dominico , Fructuoſus comprehenſus fuit anno 259. ut dixi . Domi ſuæ tunc morabatur cum Augurio & Eulogio Diaconibus , & ecce beneficiarii (ideſt Milites veterani & exempti) miſſi ad domum ejus pervenientes , pedibus ſeu ut alii virgâ liſtoriâ ad foràs pulſare cœperunt . Audito ſonitu Fructuoſus ſtatim ſurgens prodiit foràs ad eos in ſoleis : cui Milites dixerunt : Veni , Præſes te accerſit cum Diaconibus tuis . Quibus Fructuoſus dixit : Eamus , aut ſi vultis , calceo me . Cui Milites dixerunt : Calcea te ad animum tuum . Venientes ergo Fructuoſus & Diacones in carcerem recepti ſunt . Fructuoſus autem certus & gaudens de corona Domini , ad quam vocatus erat , ſine ceſſatione orabat . Fideles interim carceri aſſiſtebant refrigeria præbentes , & ut illos in mente haberet rogantes , & ſequenti die in carcere baptizavit Catechumenum quendam nomine Rogatianum .

III. Sex diebus in carcere detenti ſunt , & produci ſunt 12. Kalend. Februarii ideſt 21. Januarii feriâ ſextâ , ut à Præſide audirentur . Statim verò Æmilianus Præſes , Fructuoſo Augurio & Eulogio introductis , Fructuoſo dixit : Audiſti quid Impera-

peratores præceperunt? Respondit Fructuosus: *Nescio quid præceperunt. Ego verò Christianus sum.* Æmilianus dixit: Præceperunt, Deos coli. Tunc Fructuosus: *Ego*, inquit, *unum Deum colo, qui fecit celum & terram mare & omnia.* Æmilianus dixit: Scis esse Deos? Cui Fructuosus: *Nescio*, respondit. Æmilianus verò ait: Scies postea. Fructuosus autem respiciens ad Dominum orare cœpit intra se. Tum addidit Æmilianus: Qui ergo audiuntur, qui timentur, qui adorantur, si Dii non coluntur, nec Imperatorum effigies adoratur? Inde ad Augurium conversus, dixit ei: Noli verbis Fructuosi anscultare: Augurius autem: *Ego*, inquit, *Deum omnipotentem colo.* Postea ad Eulogium Æmilianus ait: Nunquid & tu Fructuosum colis? cui Eulogius respondit: *Ego Fructuosum non colo; sed & ipsum colo, quem & Fructuosus.* Post hæc Æmilianus à Fructuoso petiit: Episcopus es? & Fructuoso respondente *sum*, Æmilianus dixit: *Fuisti.* Et iussit eos suâ sententiâ vivos ardere.

IV. Dum ergo Fructuosus Episcopus cum Diaconibus suis ad amphitheatrum duceretur, universus Populus tam ex Fidelibus quàm ex ipsis Ethnicis, qui eum velut communem patrem speciali amore prosequabatur, condolere cœpit. Qui tamen ad quantam gloriam pergeret, sciebant, gaudebant potius, quàm dolebant. Cùmque multi ex fraterna caritate poculum liquore permixtum ei offerrent, ait: *Nondum est hora solvendi jejunii*, sextæ scilicet feriæ, quod in carcere inchoaverat, sperans se illud completurum cum Martyribus & Prophetis in Regno Cœlorum. Jamque ad amphitheatrum pervenerat, cùm quidam Augustalis nomine unus ex Lectoribus cum fletu eum deprecabatur, ut se excalceari permitteret, sed Beatus Martyr respondit: *Missum fac, fili, ego me excalceo, fortis & gaudens & certus Dominicæ promissionis.* Qui cùm se excalceasset, accessit ad eum Miles Christianus nomine Felix, qui apprehendens dexteram ejus, ut sui memor esset, rogavit. Cui Sanctus Episcopus audientibus omnibus dixit: *In mente mea habere necesse est Ecclesiam Catholicam ab Oriente usque ad Occidentem diffusam.* Quibus verbis S. Augustinus Serm. 273. num. 2. addit. *Tu sis vis, ut pro te orem, noli recedere ab illa pro qua oro.*

V. Jam in porta amphitheatri constitutus proximè coronandus dolentes de sua amissione fratres, his verbis, audientibus etiam beneficiariis, eos consolatus est: *Jam non deerit vobis Pastor, nec deficere poterit caritas & repromissio Domini, tam hæc, quàm in futurum. Hoc enim quod cernitis, unius horæ videtur infirmitas.* Inde palis ligati tres fuere, & accensus ignis quo combure-

burerentur. Sed quemadmodum Ananias Azarias & Misael missi in fornacem Babyloniam illæsi in medio ignis ambulaverunt; sic Fructuosi Augurii & Eulogii corpora flamma non læsit, solùmque fasciolas quibus manus eorum fuerant alligatæ exussit: unde manus jam liberæ ad cælum elevantes, solitæ consuetudinis memores, positis genibus, de resurrectione securi gaudentes Dominum deprecabantur, donec simul animas corporibus exutas ei reddiderunt.

VI. Ita gloriosi Martyres triumpharunt. Sed eorum triumpho cœlestia signa non defuere; statim enim apertum est Cælum videntibus Babylâ, & Migdonio Christianis de familia Æmiliani Præfetti, qui etiam filia Æmiliani eorum Domina signum ostenderunt, nimirum Fructuosum Episcopum cum Diaconibus, adhuc stipitibus quibus ligati fuerant permanentibus, in Cælum ascendentes coronatos. Cùmque Æmilianum vocarent dicentes: Veni & vide quos hodie damnasti, quemadmodum Cœlo secundum spem suam restituti sunt: venit Æmilianus; sed videre eos dignus non fuit. Nocte autem fratres de amissione sui Pastoris dolentes, ad amphitheatrum cum vino venerunt, quo semiusta corpora perfunderent, unoquoque eorum partem sibi asservandam usurpante. Sed hoc Deo non probari ostendit Fructuosus ipse, qui fratribus apprensus monuit, ut quod unusquisque per caritatem de ossibus de cineribus distraxerat restituerent sine mora, & uno in loco simul recondendum curarent. Fertur etiam Æmiliano, qui eos damnarat, Fructuosum cum Diaconibus suis ostendisse se, eumque increpasse, nihil illi profuisse, quos frustra exutos à corpore in terra crederet, quos cerneret gloriosos. Hæc omnia sumta sunt ex Actis sinceris, quæ inter alia recenset P. Ruinart: eademque fuisse ac illa, quæ olim in Ecclesia Africana legebantur, apparet ex Sermonem modò 273., quem S. Augustinus in eorundem Sanctorum natali habuit, & ex Prudentio, qui Hymnum 6. de eisdem texuit.

Passi sunt ergo, ut dixi, præfati Martyres apud Tarracanam celebrem olim Hispaniæ citerioris Metropolim in hodierna Catalonia anno 259. feriâ sextâ vigesimâ primâ die Januarii, quâ die in veteribus Martyrologiis eorum memoria recolitur & præcipuè in Romano his verbis: *Tarracona in Hispania Sanctorum Martyrum Fructuosi Episcopi, Augurii & Eulogii Diaconorum, qui tempore Gallieni primò in carcerem trusi deinde flammis injecti, exussis vinculis, manibus in modum crucis expansis orantes Martyrium compleverunt: in quorum die natali Sanctus Augustinus sermonem ad Populum habuit.* Paulò post S. Fructuosi & Socio-

rum mortem Tarraconensis Civitas poenas luit ; imperante enim Gallieno , à Gallis direpta & devastata fuit .

§. VIII.

SS. Lucius , Montanus , Flavianus &c. Martyres .

I. **H**ispaniâ relicâ , in Africam , unde digressi sumus , revertamur ; in ea enim sub Valeriani extremis annis atrocissimam fuisse Persecutionem , præter ea quæ de Beato Cypriano dixi , alia antiqua Monumenta produnt : Paulò post , & fortè paucis diebus post S. Cypriani mortem , Solon qui vices Maximi Proconsulis defuncti tanquam Procurator , donec Româ novus Consul adveniret , Provinciam gubernabat , circa mensem Octobris 258. octo Christianos majori ex parte Ecclesiasticos comprehendendi jussit , nimirum Lucium , Montanum , Flavianum , Julianum , Victoricum , Primolum , Renum , & Donatianum , qui omnes creduntur fuisse S. Cypriani Discipuli ; eum enim *nostrum Episcopum* Flavianus vocat . Flavianus Diaconus erat ; Primolus tamen & Donatianus Catechumeni . Donatianus in carcere baptizatus obiit : Primolus similiter obiit , non alio tamen Baptismate præventus quàm flaminis , confessione scilicet Fidei , quam ante aliquot menses ediderat .

II. Statim ac capti à custode carceris intellexerunt , Procuratoris animum esse sequenti die vivos eos comburere . At illi fufus ad Deum precibus , ut eos à tali supplicio liberaret , voti compotes facti sunt : quare Solon animo mutatus in carcerem tenebrosum & valde incommodum eos detrudi mandavit . Interea Reno uno ex illis in somno ostensum est , singulos ex eis produci , quibus prodeuntibus lucernæ singulæ præferebantur , cuius autem lucerna non præcesserat nec ipse procedebat . Cùmque expergefactus narrasset , omnes qui ibi secum in carcere erant processisse , lætati sunt , fidentes se Christum , qui lucerna est pedibus nostris , habere ducem . Cùm igitur dies affluisset , subito catenis gravati rapti sunt ad Procuratorem , qui tunc defuncti Proconsulis partes administrabat . Incerti autem Milites , ubi nam eos audire vellet , catenis oneratos per totum forum circumduxerunt , donec ad secretum ejus cubiculum vocatos , & coram eo Christum liberè confessos remisit ad carcerem , ubi aliâ arte constantiam eorum frangere se putans , fame ac siti extremâ multis diebus eos tentavit , adeout vel ipsis ægrotantibus aqua denegaretur . Diaconus tamen Flavianus rigidè adeò jejunium fer-

servabat , ut nec minimum illud quod expensis Fisci ei ministrabatur acciperet .

III. Presbyter quidam nomine Victor in eodem carcere propter Christum detentus hanc sibi ostensam visionem narravit : Videbam , inquit , puerum vultu decorum & perlucidum hunc carcerem introisse , qui nos deducebat per omnia loca ut exiremus , egredi tamen non potuimus : & ait mihi : Adhuc modicum laboratis , quia detinemini ; sed confidite , quia ego vobiscum sum : & adjecit : Dic illis quia coronam magis gloriosam habebitis . Quarenti autem mihi , ubi est paradisus ? respondit puer : Extra Mundum est . Ostende ergo illum mihi , ego subjeci : at ille : Ubi ergo erit Fides ? Cumque ego adhuc infirmus repeterem , dic mihi signum quod eis dicam : dic , ait , illis signum Jacob . Hæc narravit Victor , qui statim post hanc visionem passus est .

IV. Eodem carcere quædam mulier Christiana nomine Quartillosa detinebatur , cujus & maritus & filius ante triduum passi erant , quos & ipsa paulò post intrepidè secuta est . Prius tamen hoc sibi in visione ostensum narravit : Vidi , inquit , filium meum qui passus est venisse huc ad carcerem , qui sedens super labrum aquarum ait : Vidit Deus pressuram vestram . Et post hunc introivit Juvenis miræ magnitudinis portans phialas duas singulis in manibus lacte plenas , & ait : Bono animo estote , memoratus est vestri Deus omnipotens . Et ex phialis , quas ferebat dedit omnibus bibere , quæ phialæ non deficiebant . Et subito ablatus est lapis , qui fenestram dividit medius ; unde fenestræ liberam Cœli faciem admiserunt : indè Juvenis positis phialis unâ ad dexteram , ad sinistram alterâ , ait : Ecce satiati estis & abundat , & tertia adhuc phiala superveniet vobis ; & abiit .

V. Cum præcedente die Martyres nihil cibi sumissent , nec sequenti aliquid quo reficerentur haberent , Lucianus tunc Presbyter , postea Carthagenensis Episcopus , omnia obstantia superans , per Herennium Subdiaconum & Januarium Catechumenum cibos largiter eis ministravit , fortè per duas phialas , ut supra , indicatos : quibus captivi Martyres , & præcipuè , qui ob Solonis feritatem & aquam nimis frigidam in morbum inciderent , magnum levamen ab ægritudine reportarunt . Herennius iste idem fuisse existimatur , per quem Cyprianus miserat subsidia ad Confessores ad metalla damnatos (ut Epist. 78. & 80.) Ex eo autem quod in Actis dicitur , Lucianum misisse ad Sanctos Martyres *alimentum indeficiens* , inferunt aliqui , unâ cum cibis usualibus misisse etiam Sacram Eucharistiam .

VI. Accidit interea , ut quædam mulier à communione

Fidelium separata ex improvise ad eorum communionem obreperet, quam Montanus acriter objurgavit; cumque Julianus eam excusaret, facta est inter illos contentio, adeo ut refriguisse caritas videretur. Ut hanc maculam Montanus elueret, fecit Deus, ut sequenti nocte in somno sibi videretur cum aliis Confessoribus in amœnam vastam planitiem pervenisse, ubi obvius habuere Sanctos Cyprianum & Lucium (unum fortè ex Martyribus antea coronatis) caro omnium alba apparebat & adeo perlucida, ut quidquid intra corpus esset oculis penetraretur. Montanus ergo ad suum cor respiciens in eo quasdam sordes vidit. Inde expergefactus (ut falsò putabat) occurrit sibi Luciano dixit: Scis unde istæ sordes in corde meo? Ah! Video eas me contraxisse, quia non statim cum Juliano reconciliatus sum. Et statim verè evigilans Julianum corde complexus est. Hactenus dicta Martyres ipsi in carcere scripserunt. Sequentia monente Flaviano ab iis qui præsentés erant memoriæ tradita sunt.

VII. Postquam igitur Beati Martyres pluribus usque ad octo mensibus carcerem famem sitim aliæque incommoda pro Christo invictè sustinuerant, ad Judicem (cujus nomen tacetur) adducti sunt; coràm quo Christum omnes confessi sunt, & insuper singuli, quem gradum in Ecclesiastico ministerio obtinerent, exposuerunt; specialiter enim Ecclesiæ Ministri quærebantur ad necem, ut sapè dixi. Porro cùm Flavianus palàm se esse Diaconum pronuntiasset, quidam ejus falsi amici, ut ejus vitam temporalem servarent, conclamare cœperunt, hoc falsum esse, & Flavianum in hoc fuisse mentitum. Quare Judex Flaviano in carcerem remissò, ceteros quatuor-Lucium, Montanum, Julianum, & Victoricum capitali sententiâ damnavit; Primolus enim & Donatianus in carcere mortui fuerant, & probabiliter etiam Renus, cùm de eo nulla habeatur ampliùs mentio.

VIII. Hi ergo quatuor Martyres ad locum supplicii ducebantur: unde cùm multitudo tum Fidelium tum Gentilium convenisset, hilares vultu S. Cypriani exemplum imitantes ad similia perferenda omnes adhortabantur. Lucius genio mitis, quamvis gravi pressus infirmitate, paucis eum comitantibus, præcedebat sollicitus, ne à fundendo pro Christo sanguine vi morbi impediretur. Non cessabat, ut poterat, eos qui comitabantur alloqui; & dicentibus ei fratribus: Memento nostri: *Vos, inquit, mei mementote*, tanta erat Martyris humilitas, ut de se nec sub ipsa passione præsumeret. Julianus quoque & Victoricus, insinuatà diù fratribus pace & commendatis omnibus Clericis, maxime eis qui famem carceris passi erant, ad passionis

nis locum cum gaudio & sine pavore venerunt, ubi Martyrii gloriâ coronati fuere.

IX. Montanus verò corpore & spiritu fortis Martyrio proximè se fortiorem ostendit. Cœpit igitur altâ voce exclamare : *Qui immolat Diis, & non Domino soli, exterminabitur* : quod pluriès repetiit . Hæreticorum quoque superbiam & impiam contumaciam retundens dicebat : *Discite saltem ex multitudine Martyrum, quæ sit vera Ecclesia, dignoscere* . Lapsos ad non festinandum sed ad permanendum in pœnitentia hortabatur; cæteros Fideles ad constantiam, Virgines quoque ad tuendam castitatem, cæteros omnes ad honore prosequendos Episcopos, & Episcopos ad concordiam admonebat : asserens nihil esse tutius ad Populum in pace & unitate Fidei continendum. Cùmque jam Carnificis gladius super caput ejus immineret, manus ad Deum extendens altâ voce, audientibus etiam Paganis, rogavit, ut Flavianus qui Populi suffragio remanserat, tertiâ die sequeretur. Et ut precis suæ fidem faceret, sudarium, quo sibi oculos texerant, in duas partes discidit & iussit alteram reservari, quâ tertiâ die Flaviani oculi ligarentur, ac in super locum in suo sepulcro relinquit, ut ibi etiam eum socium haberet. Post hæc submittens gladio caput glorioso exitu vitam coronavit.

X. Interim Flavianus in carcere manebat, tristis quidè, quod à fratrum societate & gloria sejunctus fuisset : sed sese totum Dei voluntati submittens, quid de se statuisset expectabat. Pia mater ejus, quæ ab eo divelli non poterat, de hac dilatione æquè dolebat . At ille eam consolabatur dicens, hanc esse dilationem coronæ, non privationem . Cùmque ad eum fama pervenisset de Montani prædicatione, quod tertiâ die cæteros & ipse foret secuturus, anxius hanc diem expectabat . Venit ergo tertia dies, nec Judex omisit quod prædictum erat implere. Misit ad carcerem qui eum ad se traherent. Vox ista evulgata accivit omnes tam Fideles quàm Ethnicos, quorum pars maxima ejus salutem perorabat . Ipse autem constantiâ ac fiduciâ repletus cum gaudio protestabatur, se nec clamoribus nec blanditiis cessurum, quin socios suos in agone sequeretur ; Fidelibus coram eo plorantibus annuntians pacem . Pagani etiam quorum multi ejus condiscipuli fuerant, eum hortabantur cum lacrymis, ut tunc Diis immolaret, facturus postea quod voluisset . Quibus ille gratias agens reposuit, multò melius esse sibi pro vero Deo mori, quàm lapides adorare : vivere nos etiam cùm occidimur, & à mortali ad immortalem vitam transire ; si hoc & ipsi facerent, immortalitatis fore participes .

XI. Vocatus coram Iudice sistitur, qui eum interrogans; cur, inquit, cum Diaconus non sis, Diaconum te esse mentiris? Iudicis vocem totius Populi clamor subsecutus est Flavianum Diaconum esse negantis, pro quo scripta etiam nota allata est. At subridens Flavianus ait: Si mentirer, quid hoc mendacio lucraber? imò Valeriani Edicto hanc confessione ducor ad mortem. Tunc Populus conclamare cœpit, ut pro exquirenda veritate quæstioni subjiceretur, ut victus dolore tormentorum quæ dixerat, retractaret. Sed Deus qui ejus fidem & præparationem cordis noverat, fecit ut Iudex statim prolata sententiâ morti eum addiderit.

XII. Lætus Flavianus, quod Montani impleta fuit prædictio, ducitur ad supplicium multitudine Populi comitante, velut duceretur ad triumphum, Matre ejus ut olim Machabæorum Mater, præ cæteris exultante, quod visura esset filium suum pro Fidei confessione Martyrem fieri: & verè tripliciter Martyrem; nam ut Flavianus ipse sibi in visione ostensum narravit, primò, cum Christum secretò fuit confessus; secundò, cum publicè & reclamante Populo jussus fuit recludi; & tertio, cum post confessiones duas tertiâ passionem perfecit. Sic enim in visu ei dictum fuerat: *Contristaris? Bis Confessor es, tertio Martyr eris per gladium*. Contigit autem, ut dum pergeret, imber largus & lenis temperato rore descenderet, nec sine mysterio. Primò, ut Gentiles perneciter curiosi interventu pluvie secederent: secundò, ut ad hospitium divertendi occasio, & extremis sanctæ pacis inter Fideles amplexibus nullus profanus arbiter interesset: tertio, quod Flavianus ipse dixit: *adhuc pluebat, ut Dominicæ passionis exemplo, aqua sanguini jungeretur*. Inde ad locum Martyrii perductus, habitâ Fidelibus brevi ad pacem hortatione, medietatem sudarii sibi à Montano relictam ante oculos aptavit, & fixis ad preces genibus cum oratione passionem gladii icu finivit. Ita ex Actis horum SS. Martyrum apud Ruinart.

XIII. Vide Lector in tanta alacritate, quâ Sancti Viri properabant ad mortem, omnipotentem manum Dei supra humanas vires operantem: & hinc infer Religionem Christianam Deum habere auctorem ac propugnatorem. Ecclesia Carthaginensis Flaviani memoriam colit 25. Maii biduo post Montani & aliorum: Romanum tamen Martyrologium & alia aliqua 24. Februarii omnes simul commemorant cum sociis Primulo Donatiano & Reno in carcere defunctis.

§. IX.

SS. Jacobus, Marianus, & alii Africani Martyres.

I. **J**acobus Diaconus erat, Marianus verò Lector: hic matrem habebat pietate celebrem nomine Mariam, teste S. Augustino Serm. 284.; Jacobus verò vir constans titulo Confessoris in altera Persecutione, puta Decii, decoratus fuerat. Cujus Ecclesiæ aut Patriæ essent, ignoratur; ex Numidia certè non erant, ubi Deo placuit eos coronare. Quæ eorum itineris causa fuerit, qui eorum mandato historiam scripsit, eorumque comes in itinere erat, non dicit; sed solum quòd in itinere Jacobus visionem habuit, quâ sibi & Mariano Martyrium prænuntiabatur.

II. Cùm ergo pervenissent Muguas locum vicinum Cirthæ Urbi Episcopali Numidiæ, postea Constantinæ dictæ, in qua Persecutio barbarè tunc sæviebat (inquirebantur enim ad necem illi quoque, qui antea solo exilio fuerant mulcati) contigit, ut duo Sancti Episcopi Agapius & Secundinus, qui ab exilio revocabantur ad gloriam Martyrii, Muguas adventantes ad idem hospitium, in quo Jacobus & Marianus erant, Deo sic disponente diverterent, quorum sermonibus confortati magis ad Martyrium subeundum accensi fuere. Biduo post Agapii & Secundini discessum Paganorum multitudo Muguas quasi ad asylum Christianorum convolvavit. Unde Jacobus & Marianus comprehensi Cirtham ducti fuere. Sequebantur eos Fidelium non pauci, non quidè lugentes, sed ad Martyrium excitantes, qui interrogati an essent Christiani, liberè affirmantes, comprehensi & in carcerem ducti, Jacobum & Marianum Martyrio præcesserunt.

III. Cirtham deducti diris cruciatibus ambo tentati fuere, quibus eorum constantia superior emicuit. Jacobus, qui se non Christianum tantùm sed & Diaconum confessus fuerat, & Marianus qui Lectorem se affirmaverat, suspensi non manibus sed pollicibus, appensis etiam ad pedes ponderibus, ut discordantibus pœnis utrimque distracta, & viscerum convulsione resoluta, de nervis suis totius corporis compago penderet, victores tandem ac de suo triumpho lætantes, in carcerem cum reliquis fratribus iterùm recluduntur. In eodem carcere fortè detinebantur Agapius & Secundinus Episcopi. Hoc certum est, jam ante Jacobum & Marianum Martyrio sacrificium fidei suæ consummasse,

masse, cum Agapius postea Jacobo apparuerit, coelesti gloria rutilans, eumque una cum Mariano invitans ad convivium ipsis preparatum. De Agapio fertur, eum duas Virgines Tertullam & Antoniam sancta dilectione persecutum fuisse, ac sibi socias in passione à Deo postulasse, sed pro una tantum gratiam obtinuisse. Martyrologia tamen & Romanum præcipue die 29. Aprilis utramque Martyrem facit cum Agapio Secundino & Æmiliano (de quo statim) sic enim habet: *Cirthe in Numidia natalis Sanctorum Martyrum Agapii & Secundini Episcoporum, qui post longum apud præfatam Urbem exilium, in Persecutione Valeriani, in qua tunc maxime Gentilium rabies ad tentandam justorum Fidem inhiabat, ex illustri Sacerdotio effecti sunt Martyres gloriosi. Passi sunt in earum Collegio Æmilianus miles, Tertulla & Antonia sacre Virgines, & quædam mulier cum suis geminis.*

IV. Aliquot dies inter tenebras & squallorem Cirthani carceris, fame etiam ac siti laborantes Jacobus & Marianus transegerant, cum visione quadam eos consolari Deus dignatus est. Mariano igitur S. Cyprianus apparuit ad dexteram cuiusdam magni Judicis sedens, ad quem Confessorum singula classes admovebantur & ab eo mittebantur ad gladium. Cyprianus autem Marianum conspiciens dixit ei: Veni, sede mecum: & cum ascendisset, surrexit Judex eum per amoena prata, & viridantes campos cunctis Confessoribus comitantibus duxit; & statim disparuit. Tunc Cyprianus implens de aqua cuiusdam fontis phialam, prior de illa ipse hausit, deinde iterum impletam Mariano porrexit, qui & ipse lætus bibit, & hoc sibi Martyrium prænuntiaturum intellexit.

Hæc narrante Mariano, Jacobus alterius visionis, quam dum Cirtham veherentur habuit, memoriam fecit, nimirum quod dum sopore gravaretur, apparuit ei Juvenis fatis amplæ magnitudinis, vestem habens discissam, tantoque fulgore micans, ut oculi in eum non possent intendere: is cum transcurreret, unam stolam purpuream in Marianum, alteram in se (idest Jacobum) jaculatus ait, *sequimini me cito*. Quo utriusque brevi secuturum Martyrium indicabatur.

Aliâ quoque visione suam de eorum omnium ibi existentium gloriosâ passione voluntatem Deus manifestavit. Erat cum illis in eodem carcere dudum detentus Æmilianus vir equestris Ordinis, qui tamen nedum fidem, sed ad quinquagesimum prope annum continentiam servarat, & jejuniis ac orationibus ad Sacramentum (idest ad Martyrium) quod sequenti die suscepturus erat, se præferebat: huic ergo in somnum mediâ die reclinato, ostend-

ostensus fuit frater carnalis ejus gentilis, qui in Christianos insultans ab eo quærebat, quid post tot pœnas se habituros præmii sperarent, cum eis si obstinatè perstiterint pœna capitalis immineat; addens se velle scire, an omnibus, qui vitam contemnant, discreta an æqualia præmia in Cœlo rependantur. Cui Æmilianus, Non sum, inquit, idoneus tantæ rei proferre sententiam; attolle tamen paulisper ad Cœlum oculos & vide innumerabilem stellarum multitudinem, numquid stellæ omnes pari luminis honore refulgent, & tamen omnibus lumen est? At ille curiosus: si quæ, inquit, discretio est, qui vestrum erunt in lumine potiores? Cumque Æmiliano respondente, eos futuros gloriosiores quorum nomina Deus novit, ille molestius instaret, tandem dixit: hi sunt, quò difficilius & rarius vincunt, gloriosius coronantur. Quo audito ille evanuit.

V. His animati ac læti visionibus ac pauculis diebus in carcere commorati, producuntur Jacobus & Marianus, & coram Magistratu Cirthæ sistuntur. Ibi unus Fidelium qui adstabat, zelo qui in facie ejus micabat, omnium in se oculos attraxit. Interrogatus an ipse ejusdem Sectæ esset, confessus est, ac statim aliis Martyribus junctus cum aliis ad Gubernatorem remissus fuit, ad quem longo ac difficili emenso itinere perducti in carcerem omnes coniecti sunt. Interim per dies plurimos ejus sævitie in fundendo Christianorum Laicorum sanguine occupabatur. Nam ita inter se nostræ Religionis gradus artifex sævitia diviserat, ut Laicos à Clericis separatos tentationibus seculi & terroribus suis putaret esse cessuros. Hæc separatione, quia eorum victoriam differebat, Clerici torquebantur. Dum in carcere somnum caperet Jacobus, apparuit ei Episcopus Agapius recens coronatus magna lætitiæ signa edens, ac se unâ cum Mariano ad solemne convivium seu Agapen iuvitans, quò cum raperentur adcurrit ei obviu puer, quem constabat esse alterum ex geminis ante triduum cum matre passis, coronâ roseâ collo circumdatus, & in manu dextera palmam viridissimam præferens, qui ait illis: *Quid properatis? gaudete & exultate; cras enim nobiscum & ipsi cœnabitis.*

VI. Hisce visionibus Divinâ dignatione de futura gloria præmuniti, judicet Lector, quantâ anxietate illum diem, qui futurus erat dies æterni triumphi, sollicitarent. Crastina tandem exoptata illuxit dies, quâ promissis Dei sententia Præsidis serviens Jacobum Marianum & cæteros Clericos capitis animadversione ad Cœlos emisit. Perducti ergo sunt ad coronæ locum, qui collibus hinc inde circumseptus mediâ fluminis valle subse-

derat, quæ tamen altitudine aggerum idonea erat spectaculo. Alveus ipse medio sinu fluorem beati sanguinis hauriebat. Nec proinde deerat utriusque Sacramenti genus, cum & baptizarentur suo sanguine & lavarentur in flumine. Quia verò numerus Martyrum cadendorum ingens erat, hoc excogitavit artificiosa barbaries, ut omnibus ordine collocatis, pertransiens Carnificis gladius singulorum capita detruncaret. Nam si in uno loco percussurus ipse consisteret, tot caforum corpora nimium cumulum coacervarent, nec spatium alvei fluminis ea posset continere.

Tunc singulorum oculis de more velatis, splendor Divinæ lucis eis afflulit; nam plerique proximis atque adstantibus videre se quædam mira loquebantur, equos nimirum nive candidiores, quibus candidati Juvenes insiderent. Nec defuerunt ex eorumdem Martyrum numero, qui à se auditos equorum fremitus ac sonitum attestarentur. Ibi verò Marianus prophetico spiritu jam repletus fidenter ac fortiter prædicabat proximam iusti sanguinis ultionem, plagas nimirum, quæ postea totum ferè Orbem afflixere, ut lues, captivitas, fames, terræmotus, Imperii scissiones, quæ omnia sigillatim evenere: inter quæ ipsius Valeriani captivitas, & bella quibus triginta Tyranni postea exorti Imperium & præcipuè Africam afflixerunt, & quæ Persecutioni adversus Christianos excitatæ adscribit Constantius Magnus in Orat. ad Sanctorum Coetum cap. 24., & in Epist. ad Saporem Regem Persarum apud Sozomen. L. 2. hist. cap. 15., de quo Lactantius de Mort. Persec. num. 4.

VII. Ita Sanctis Martyribus anno 259. Cirthæ seu veriùs Lambesæ, quò ducti fuerant, coronatis, Mariani mater, quæ præsens aderat, gaudio exultans & jam secunda de filio, ejus corpus tanquam suorum viscerum gloriam complectebatur, & in ipsa cervicis vulnera frequentia oscula religiosâ pietate figebat. Festum SS. Jacobi & Mariani plura Martyrologia antiqua & Romanum etiam diei 30. Aprilis consignant; verum tamen eorum Martyrii diem fuisse sextam Maii, ex Calendario Carthaginensi colligitur. Acta, ex quibus hæc omnia sumi, scripta à Viro, qui huic Martyrio adfuit, indicant cum Jacobo & Mariano innumeram Fidelium multitudinem fuisse coronatam, & pro Christo ejusque Fide Gentilibus frementibus illustre testimonium sanguine suo dedisse.

VIII. Neque hic desuit victimas Christo in Africa immolare Valeriani sæva barbaries. Præfatos Martyres supponuntur præcessisse Paulus, Gerontius, Januarius, Saturninus, Successus, Julius, Catus, & duæ mulieres Pia & Germana, de quibus

bus Martyrol. 19. Januarii . Successus iste ille fuisse existimatur , ad quem S. Cyprianus dedit Epist. 82. , quâ ipsum de sævo Valeriani Edicto , & de Sixti Papæ morte certiolem facit , & idem , qui anno 256. Magno Concilio Carthaginensi interfuit , ubi num. 16. appellatur Episcopus Abbis Germaniciæ in Africa Proconsulari . Paulus etiam , qui cum Successu passus fuit , fortè fuit Episcopus , qui in eodem Concilio num. 47. dicitur Paulus à Bobba in Provincia Mauritanix . Successus post Martyrium S. Flaviano rutilanti facie apparens dixit , se missum , ut ei suum pro Christo agonem nuntiaret . Kalendarium Carthaginense huic Luciano jungit 25. Maii quandam Luciano Septimiam . S. Flavianus jam moriturus de quodam Luciano Presbytero encomium facit , ac si prophetico spiritu Episcopum eum designaret , quo putat Baron. ad ann. 262. num. 29. hunc fuisse S. Cypriano successorem , octavo tamen mense post ejus mortem electum : diuturnam hanc Ecclesiæ Carthaginensis adeò celebris viduitatem , non aliunde obtigisse par est credere , quàm ex Persecutionis violentia , quâ liberum non erat Clericis conventus facere . Sic etiam post Sixti mortem Romana Ecclesia uno anno sine Pastore fuit .

IX. His adjungi possunt Sanctæ Virgines Maxima Donatilla & Secunda , quæ sub Anolino Galerii Maximi Proconsulis successore anno 259. passionem invictè Tuburbi sustinuerunt . Harum in cruciatibus constantiam Martyrol. Rom. die 30. Julii his verbis celebrat : *Tuburbi Lucernaria in Africa Sanctarum Virginum & Martyrum Maxima Donatilla & Secunda : quarum duæ prima in Persecutione Valeriani aceto & felle potata , deinde plagis acerrimis casa & equulei extensione cruciata & cratibus etiam exusta & calce perfricata , postmodum cum Secunda Virgine duodecim annorum ad bestias simul projectæ , sed ab his intactæ , novissimè gladio jugulatæ sunt .*

X. Pagani ergo , & quicumque modò sint Infideles , Lactantio Lib. 5. Instit. cap. 13. ita arguenti si possunt respondeant : ibi enim probans , non esse stultitiam , in quam tanta hominum millia per Orbem totum unâ & pari mente consentiunt , sic discurret : *Si enim Femina sexus imbecillitate labuntur . . . Viri certè sapiunt ; si pueri , si adolescentes improvidi sunt per ætatem , maturi certè ac senes habent stabile judicium ; si una Civitas desipit , ceteræ utique innumerabiles stultæ esse non possunt ; si una Provincia , una Natio providentiâ caret , ceteras omnes habere intelligentiam rectè necesse est . Cum verò ab ortu Solis usque ad occasum Lex Divina suscepta sit , & omnis sexus omnis ætas & Genus & Regio unitis ac pa-*

ribus animis Deo serviant, eadem sit ubique patientia, idem contemptus mortis, intelligere debuerant, aliquid in ea re esse rationis, quod non sine causa usque ad mortem defendatur: aliquid fundamenti & soliditatis, quod eam Religionem non tantum injuriis ac vexatione non solvat, sed augeat semper & faciat firmiorem. Hæc pro præfenti argumento bene consideranda Lactantius.

§. X.

SS. Virgines Romæ & Pontius in Gallia Martyres.

I. **Q**uia ex hæcenus à Lactantio dictis non una Provincia tantum, sed totus Orbis pro Christiana Religione mortem contempsit; propterea Africâ relicta alias Orbis partes percurramus. Roma ergo nobis occurrit exhibens plures Sanctas Virgines, quæ sub Valeriano, aut si velis, sub Gallieno passæ feruntur. Una est Eugenia nobilis Virgo, de qua Martyrol. 25. Decembris ait: *Romæ in Cæmeterio Apronianii Sanctæ Eugeniæ Virginis, quæ tempore Gallieni Imperatoris post plurima virtutum insignia, post sacros Virginum choros Christo aggregatos; sub Nicetio Urbis Præfecto diu agonizans, novissimè gladio jugulata est.* Hujus feruntur fuisse Eunuchi SS. Prothus & Hyacinthus, qui sub Valeriano Martyrii coronam accepere, de quibus Martyrol. Rom. 11. Septembris: *Romæ viâ Salaria veteri in Cæmeterio Basilæ natalis Sanctorum Martyrum Prothi & Hyacinthi Eunuchorum Beatæ Eugeniæ, qui sub Gallieno Imperatore deprehenso quod essent Christiani, sacrificare coguntur; sed non consentientes, primò durissimè verberati sunt, ac tandem pariter decollati.* Horum memoriam unâ cum S. Eugenia Græci celebrant 24. Decembris.

II. Altera est S. Basilla Virgo, quæ (ut Martyrol. Rom. 20. Maii) cum esset ex Regio genere & illustrissimum Sponsum haberet illumque dimisisset, accusata ab eo, quod esset Christiana, decretum est à Gallieno Augusto, ut aut Sponsum reciperet, aut gladio interiret; quæ conventa de hoc, cum respondisset Regem Regum se habere sponsum, gladio transverberata est. De hac simul cum S. Eugenia agunt Lippom. tom. 5. & Surius tom. 6., quæ summam habet Petrus de Natal. in catal. L. 5. cap. 23. teste Baronio in Notis. Duas tamen Basillas seu Basillas distinguit Papebrochius, unam die 11. Maii, alteram 11. Junii in Actis Sanctorum.

III. Tercio loco sunt Sanctæ Digna & Emerita & Lucilla & Flo-

& Flora, omnes sub Valeriano gloriosè coronatæ. De duabus primis agit Martyrol. 22. Septembris his verbis: *Romæ passio Sanctarum Virginum & Martyrum Dignæ & Emeritæ sub Valeriano & Gallieno: quarum Reliquiæ in Ecclesia S. Marcelli aservantur*. Passas fuisse sub Gajo Judice, & eorum Corpora sepulta in Cœmeterio Commodillæ viâ Ostiensi ad Sanctos Felicem & Adauctum, earum Acta testantur, quæ apud se habere Baronius dicit ibi in Notis. Duæ verò posteriores Lucilla & Flora describuntur cum aliis pluribus in Martyrol. 29. Julii sic: *Romæ Sanctorum Martyrum Lucilla & Floræ Virginum, Eugenii, Antonini, Theodori & sociorum decem & octo, qui sub Gallieno Imperatore illustre Martyrium obierunt*. De his, notat Baronius, sermonem habuit Petrus Damiani, dolendum tamen Actis sinceris nos carere, cum ea quæ ab aliquibus feruntur fabulosa videantur.

IV. Sub Valeriano quoque S. Agrippinam Virginem & Martyrem Roma exhibet, de qua Martyrol. 23. Junii, & Græci in Menologio eadem die hoc elogio: „ Sanctæ Martyris Agrippinæ, quæ in illustri Urbe Roma orta & educata, virginitate „ & fortitudine decorata & Deo ipsi desponsata, forti & alacri „ animo ad Martyrii palmam cucurrit, & propter amorem „ & caritatem Sponsi sui Christi multis cruciatibus seipsam „ tradidit. Itaque virgis cæsa, vinculis carceribus & torturis „ afflicta, in tormentis ipsis animam Deo commendans Martyr „ excessit. Ejus Corpus Bassa, Paula, & Agathonices clam „ susceptum ex Urbe Roma in Siciliam transferentes reposuerunt. Cum primum verò Sicilia illud accepit, tenebricosis „ Dæmonum erroribus liberata est. Cumque Agareni ausi „ fuissent Castrum diripere, in quo Beatæ Martyris Corpus „ fervebatur, repentino interitu perierunt „. Hæc in dicto Menologio: additurque quoddam ad hanc usque diem leprosi alique infirmi ad ejus sepulcrum accedentes Beatæ Martyris intercessione liberantur.

V. Accedit S. Anastasia Senior (sic dicta respectu alterius, quæ sub Diocletiano passa est) unâ cum Cyrillo. De his Martyrol. 28. Octobris ita loquitur: *Romæ Sanctæ Anastasiæ Senioris Virginis & Cyrilli Martyrum*. Illa in Persecutione Valeriani sub Probo Præsfecto vinculis constricta, colaphis cæsa, igne & verberibus cruciata, cum in confessione Christi immobilis permaneret, abscissis mammillis, evulsis unguibus, dentibus comminatis, manibus pedibusque præcisiss, truncata capite, tot passionum monilibus ornata migravit ad Sponsum. Cyrillus autem ei petenti aquam propinans, Mar-

Martyrium pro mercede accepit. De his agunt Græci etiam in Menologio die sequenti. Hactenus suarum Virginum sub Valeriano pro Christo pugnantium fortitudinem verè mirabilem Roma exhibuit.

VI. His temporibus S. Pontius Cemelæ Urbe tunc illustri (cujus tamen modò in monte propè Niciam ad radices Alpium vestigia vix apparent) Martyr effectus fuit. De hoc Martyrol. Rom. 14. Maii hæc habet: *In Gallia Sancti Pontii Martyris, cujus prædicatione & industriâ, postquam duo Philippi Cæsares ad Fidem Christi conversi sunt, ipse sub Valeriano & Gallieno Principibus Martyrii palmam adeptus est.* De duobus Philippis Cæsaribus ad Fidem conversis, quorum hic mentio fit, aliqua dixi supra Cap. 9. §. 1.

Ad sepulcrum hujus Martyris Dæmones fugati, multa miracula patrata feruntur. Cemelæ visitur lapis, supra quem Sanctum Pontium capite truncatum tradunt. Corpus Martyris Niciæ seu Nicææ in Provincia, veriùs tamen in Monasterio propè illam erecto asservatur. Aliqui tamen putant illud in Occitania in Abbatiam in ejus honorem extructam anno 636. fuisse inde translatum, & quæ modò est Sedes Episcopalis vulgò dicta *de S. Pons.* Gallia Christiana tom. 3., & ex ea Ughellius tom. 4. putant, S. Pontium Cemelæ Episcopum fuisse, sed hujus rei nulum veterem Scriptorem testem afferunt. Cave tamen, ne Pontium istum Martyrem cum Pontio Diacono S. Cypriani Discipulo ac Vitæ ipsius Scriptore confundas.

§. XI.

SS. Priscus Malchus &c. Nicephorus Martyres.

I. **U**T tandem pateat, Valeriani furorem toto Orbe Christum eliminare conatum fuisse, ab Occidente in Orientem parumper divertamus. Hic Eusebius L. 7. cap. 12. ostendit nobis SS. Priscum, Malchum, & Alexandrum, qui Martyrii coronam sub Valeriano Cæsare in Palæstina reportarunt. Hi furente Persecutione, ut evaderent, in Agrum suburbanum secesserant: verùm postea Divino fervore accensi, & quasi sibi segnitiam improperantes, quasi sibi ad confitendam Fidem & subeundam pro Christo passionem animus deesset, ultrò Cæsaream profecti Judici se præsentarunt, à quo statim damnati & à bestiis discepti voti sui compotes effecti fuere. Ecclesia tamen, quæ in aliis zelum sese ultrò offerendi Tyrannis notâ præsumtionis solet. inu-

inurere, in istis sicut & in aliquibus aliis speciale Martyres honorat 28. Martii in Martyrol. Rom. his verbis: *Cæsareæ in Palaestina natalis Sanctorum Martyrum Prisci, Malchi, & Alexandri, qui in Persecutione Valeriani cum in suburbano agello supradictæ Urbis habitarent, atque in ea cælestes Martyrii proponerentur coronæ, Divino Fidei calore succensi, ultrò Judicem adeuntes, cur tantum in sanguinem piorum deserviret, objurgant, quos ille continuo pro Christi nomine bestiis tradidit devorandos.*

II. Eusebii verba citato loco placet subjicere; ait ergo: *Porro in hac Valeriani persecutione tres Viri post insigne Christi confessionem apud Cæsaream Palaestina ad bestias damnati Divino Martyrio coronati sunt. Horum unus dicebatur Priscus, alter Malchus, tertius autem Alexander. Qui cum in Agro degerent, primum quidem se ipsos insimulasse dicuntur, tanquam ignavos ac desides: quòd cum occasio ipsa cælesti amore flagrantibus præmia distribueret, ipsi cessarent, nec coronam Martyrii præriperent. Inito deinde inter se consilio, Cæsaream profecti, Judicem ipsum adorti sunt, eamque quam diximus sententiam exceperunt. Eadem habet Rufinus L. 7. cap. 11. ; cum istis passim quoque fuisse quandam Mulierem idem Eusebius refert; cum ipsis tamen coronata non fuit, erat enim de Marcionis Secta. Qui enim extra Ecclesiam & Catholicam Fidem est, Martyr esse non potest, juxta celebre S. Augustini dictum, Martyrem non facit pæna, sed causa, arguentis Donatistas, qui cum essent ab Ecclesia & Fide Catholica separati, plures se habere Martyres jactabant:*

III. Quod verò regulariter Martyris non sit ultrò se offerre & provocare Persecutorem, sed ab eo interrogatum confiteri & propter Christum pati, præter ea quæ agens de Baptismo sanguinis dixi, apertè monet S. Cyprianus Epist. 83. paulò ante suam passionem scriptâ, dicens: *Ne quisquam vestrum aliquem tumultum de fratribus moveat aut ultrò se Gentilibus offerat: apprehensus enim & traditus loqui debet: siquidem in nobis Dominus positus illâ borâ loquatur, qui nos confiteri magis voluit quam profiteri.* Et Lib. de Mortalitate causam affert, quia non est in nostra potestate Martyrium, sed in Dei dignatione, qui tamen videns paratam apud se fuisse virtutem, reddit pro virtute mercedem. Sed hæc rei præsentis non sunt.

IV. S. Nicephori Martyris historia, quam hic subteximus, quàm necessaria sit fraternæ caritatis dilectio nobis ostendet, sine qua nec Martyrium nec amor Dei constare potest, Joanne teste in Ep. 1. c. 4. v. 20. : *Si quis dixerit, quoniam diligo Deum, &*
fra-

fratrem suum oderit, mendax est: quod in sequentibus heu nimis apparebit. Erat quidam Laicus nomine Nicephorus (locus ignoratur) adeò arctè amicitiae vinculo junctus cum quodam Presbytero, cui nomen Sapritius, ut fratres germani esse communiter putarentur. Cum verò longo tempore hanc mutuam dilectione conjuncti vixissent, Diabolus insensus humanae pacis inimicus eis invidens, talem inter eos peperit dissensionem, ut se invicem fugerent, nec in platea quidem vellent sibi occurrere, tantum erat dæmoniacum odium, quod inter se mutuò conceperant.

V. Cum autem longo satis tempore ita fuissent affecti, ad se rediens Nicephorus nexum hunc diabolicum rumpere conatus est. Rogavit ergo aliquos sui & Sapritii communes amicos, ut ab eo veniam impetrarent, & culpam ei condonans, ut ante exciperet. At Sapritius, qui utpotè Presbyter eum praevenire aut saltem praevenitum excusare debuisset, ei veniam dare recusavit. Nicephorus tamen alios & iterum alios misit; sed Sapritius eos rejectit, nec pro venia deprecantes audire voluit. Tandem Nicephorus ipse ad aedes Sapritii currens, ad pedes ejus humiliter se projiciens: *Con dona*, inquit, *mibi propter Dominum*. At ille nihil motus, suae animae magis inimicus quam Nicephori, ei reconciliari obstinatè recusavit.

VI. Irruente, dum hac fierent, Persecutione, Sapritius apprehenditur & traditur Praefidi, à quo interrogatus confessus est, se Christianum esse & Presbyterum. Cumque Praefes opponeret, esse Edictum Imperatorum Valeriani & Galliendi, ut qui se dicunt esse Christianos sacrificent Diis, alioquin si quis respuat, gravissimis cruciatibus & morte etiam esse plectendum, Sapritius respondit, Christianos adorare Christum Jesum solum verum Deum, qui omnia fecit, non Deos Gentium aut Simulacra ab hominibus facta, quae non possunt alicui opem ferre. Quare iratus Praefes Sapritium torqueri jussit; sed cum in tormentis positus & diu vexatus fortem in confessione se ostenderet, Praefes sententiam capitis in eum tulit: & jam ad supplicium ducebatur.

VII. Nicephorus, qui hoc audivit, currens obvium ei se fecit, & se ad pedes ejus projiciens ait: *Martyr Christi, ignosce mibi, quia peccavi in te*. Ille autem nihil ei respondit. Nicephorus autem per aliam viam praeveniens iterum Sapritium rogavit, ut ei veniam daret: ille autem odio habens cor obcæcatum, nec dedit ei veniam nec verbum voluit respondere. Hoc videntes Lictores Nicephoro dixerunt: stulte, vadit ipse ad supplicium capi-

capitis , & tu petis veniam ab eo qui jam est moriturus ? Quibus Nicephorus : *Vos* , inquit , *quid petam nescitis* , *Deus autem scit* . Jam ergo pervenerunt ad locum , in quo interimendus erat Sapritius , cum Nicephorus ad eum tertio provolutus , enixius ut ei parceret rogavit . Sed quis non horreat ? et si supra cervicem jam gladium habens flecti noluit , sed ut alpis surda deprecantem audire noluit .

VIII. Quid ergo , mi Lector , expectas ? videre Martyrem , non habentem imò nolentem admittere caritatem , à Deo coronari ? falleris : ait enim S. Paulus 1. Cor. 13. v. 3. : *Si tradidero corpus meum ita ut ardeam , caritatem autem non habuero , nihil mihi prodest* . Mors ista ut olim quorundam Philosophorum esset Martyrium pro fastu non pro Christo , coram hominibus non coram Deo . Sed neque hoc Deus permisit . Audi ergo quid evenierit , & contremisce . Jam supra caput obdurati Sapritii gladius Carnificis imminabat , jam illi dicebatur : flecte genua , ut istum excipias ; cum Sapritius , quare hoc ? inquit : dicunt ei Lictores : quia noluit Diis sacrificare & contempsisti Edictum Imperatorum propter hominem , qui dicitur Christus . Tunc infelix Sapritius à Deo in poenam derelictus respondit : nolite me ferire , mandata Imperatorum facio & Diis sacrifico . Sic qui in tormentis positus fortiter confessus fuerat Christum , quia fratri Caritatem negavit , jam moriturus miserrimè negavit & Christo fidem .

IX. Hoc audito Nicephorus , dolore simul & caritate erga infelicem tractus , nil curans se in medio Persecutorum positum , ad miserum Sapritium accessit , eumque adhortari coepit , ne coronam sibi proximam infelici pravaricatione amitteret . Sed qui Deum audire noluerat , minùs paratus erat audire hominem . Nicephorus ergo iacturam Sapritii reparare volens Divino Spiritu excitatus Licitoribus dixit : *Ego sum Christianus & credo in nomen Domini nostri Jesu Christi , quem iste negavit : me ergo jam pro ipso ferite* . Mirati sunt omnes , quòd ita se ad mortem tradiderit . Lictores tamen ausi non sunt eum ferire absque iussu Præsidis . Nicephorus verò liberè repetebat : Christianus sum & Diis vestris non sacrifico .

X. Unus ergo ex Licitoribus currens renunciavit Præsidi , dicens : Sapritius quidè pollicetur , se Diis sacrificaturum ; est verò illic quidam alius , qui vult mori propter eum , qui dicitur Christus , clamans & dicens liberè : Christianus sum & Diis vestris non sacrifico , nec obedio Edictis Imperatorum . Postquam hæc audivit Præses , in eum tulit sententiam dicens : Si non sa-

crificat Diis immortalibus, prout iusserunt Imperatores, gladio moriatur. Tunc accipientes Sanctum Nicephorum, eum capite truncarunt. Sic iste coronam Martyrii, quam sibi jam imminentem Sapritius, quia sine caritate, indignus fuit accipere, Nicephorus caritate plenus capiti suo gloriosus imposuit: ideoque inter Martyres 9. Februarii celebratur, ubi ejus passio ponitur Antiochiæ Syriæ secuta ex Metaphraste, quamvis ut dixi Acta locum non indicent: secuta fuisse videtur anno 260. . Quid de Sapritio factum fuerit, eadem Acta omittunt, quasi de Apostata indignum esset in eis amplius sermonem facere: eum tamen fuisse dimissum sentiunt multi & quidè probabilius, cessaverat enim in eo causa supplicii temporalis; sed non perditionis æternæ.

§. XII.

S. Felix Nolanus & S. Cyrillus puer.

I. **L**icet certus non sit annus, quo hi duo exitum suum coronarunt, circa tamen hæc tempora contigisse omnes consentiunt. Felix ergo Nolanus dictus, origine Orientalis fuit, Nolæ tamen in Campania natus: Pater enim ipsius Hermias nomine Militiam dudum & fortè etiam Paganismum professus, relicta Syriâ ubi morabatur, in Italiam venit ac domicilium Nolæ fixit. Hic duos filios suscepit, quos tandem valde divites reliquit. Unus patrio nomine Hermias vocabatur, & hic in seculo mansit; Felix alter, & hic (de quo sermo erit) totum se Deo dedit. Primò ordinatus in Lectorem fuit, deinde in Exorcistam, tandem in Presbyterum sub Maximo Nolano Episcopo, qui diu eam Ecclesiam sanctissimè rexit, & Felicem ceu filium diligebat ac sibi successorem peroptabat.

II. Interim insurrexit Persecutio, fortè Decii anno 250., quæ Viros pietate insigniores maximè insectabatur. Unde Maximus Episcopus sciens se à Persecutoribus inquiri, non timore mortis, sed suæ Ecclesiæ se conservandi studio, in locum adeò desertum secessit, ut ibi omni alimento destitutus, in periculo fame pereundi proximè fuerit, nisi coelitus, ut dicam, subventum ei fuisset. Persecutores ergo quæsito diu Maximo sed non invento, Felicem, quem cæteris Fidelibus dignitate non solum sed fervore fidei eminere conspexerant, comprehensum & catenis oneratum in carcerem detrudunt, ubi manibus & collo ligatis pedibusque trabi affixis, ne quietem capere posset, acutis testulis totum pavimentum spargunt.

III. Ma-

III. Maximus in deserto omni subsidio destitutus ad extrema redigebatur : cui potuisset quidè Deum sicut olim Eliæ aliis viis subvenire, maluit tamen ut Felix hoc merito ornaretur. Mediâ itaque nocte Felici, ut olim Petro, astitit Angelus dicens, ut eum sequeretur. Ille putans somnium esse : quomodò, inquit, catenis vinctus, pedibus ligatis trahi, clausis januis, custodibus vigilantibus te sequi possum ? At Angelo præcipiente ut surgeret, illicò ceciderunt de manibus & collo catenæ, pedes extraxit è trabe, portæ apertæ sunt, & custodibus somno merfis egressus, per vias incognitas Angelo duce ad deserti locum, ibi invenit senem Maximum semianimem & in extremis laborantem. Statim ergo in amplexus & oscula ruit, sed illum jam prorsus frigidum sine voce, sine pulsu, sine motu, aliquàlter tamen respirantem invenit. Sollicitus aliquo alimento eum reficere, ac videns supra caput ejus pendentem uvæ racemum, sumtum labiis Senis applicat, exprimit, ac per dentes quasi jam clausos succum in guttur penetrare facit.

IV. Tunc infirmus reviviscere incipit ac verbum proferre : Felicem apertis oculis intuetur eique dicit : serò nimis venisti : diù quidè promittente Deo te expectavi ; jam vides mei corporis extremum laborem ; ad meum ergo ovile, oro te, me reporta. Itaque Felix humeris suis susceptum Senem ad pauperem ejus domum desert : quò appulsus ad ostium pulsavit. Audito sonitu, Vetula rei domesticæ custos statim evigilans accurrit, & cum timore ostium aperiens Dominum suum læta recipit. Maximus autem Felicis liberatoris sui capiti dextram imponens, ei bona omnia à Deo precatus est.

V. Redditâ Ecclesiæ pace (fortè ob mortem Decii circa finem anni 251.) Felix in publicum prodiit, omnes ad eum, ut Virum Dei confluabant, quos ille suis sermonibus & maxime suo exemplo ad omnia pro Christi nomine ferenda adhortabatur. Interea Persecutio revixit, vel sub Gallo ut putat Tilmontius, vel sub Valeriano ut Fleury. Primi Persecutorum conatus in Felicem directi sunt. Ad ejus domum se conferunt : sed ille jam abierat in agrum cum familiaribus suis eos de more instruens. Illuc ergo transeunt ; & pervenientes, singulos & Felicem ipsum strictis gladiis interrogant, ubi & quis esset Felix, interrogant. Sed Deo vel eos obsecante, vel faciem Viri Dei imitante, quis esset cognoscere non potuerunt. Unde ad aliam partem digressi, & ubi esset Felix continuè quærentes, moniti fortè illum ipsum fuisse, quem antea fuerant allocuti, ad eundem locum pedes direxerunt. Verùm admonitus Felix intra diruti parietis

ibi existentis foramen illicò se abscondit , sed qui eum perquirebant omnia rimantes profectò deprehendissent , ni eodem momento aranei tela foramen illud clausisset , ut neminem illuc intrasse evidenter appareret . Ideòque re desperatâ abeuntes ab eo perquirendo cessarunt .

VI. Nocte igitur superveniente è pariete egressus , locum magis secretum ac remotum Deo duce inquirens , veterem reperit cisternam aridam , in qua se abscondit . Ibi sex mensibus novo miraculo nutritus delituit (idest usque ad annum 253. , quo Gallus obiit , ut Tilmontius autumat) . Propè igitur cisternam illam domus erat cuiusdam piæ ac Deo sacratæ Mulieris : hæc prorsus ignara , quòd ibi Felix vel quisquam alius lateret , partem panis & ciborum , quos pro se paraverat , ad os cisternæ singulis diebus appositam ibi relinquebat , nesciens tamen quid faceret , imò putans se ea domi suæ reposuisse , penitusque oblita , quò seu ad quid ivisset aut rediisset . Hæc miraculosâ Dei providentiâ Felix in cisterna sex mensibus alitus fuit . Vicinus puteus sitim explebat : quòd si interdum arefcebat , illicò nubes aderat , quæ pluviam abundanter supplebat . Ita toto illo tempore Felix ab hominum consortio sejunctus , solius Dei colloquiis (ut ferunt) fruebatur . Post hæc , Persecutione cessante , Felix mandante Deo in patriam reversus est . De his , quæ hæcenus dixi , videri potest S. Paulinus Pœmate quod de S. Felice inscriptum .

VII. Circa hæc tempora S. Maximus Episcopus decessit , cuius obitus die 15. Januarii in Romano Martyrologio adnotatur . Nolanus Populus de Successore eligendo sollicitus Felicem omnibus votis postulabat , quem Fidei confessionis doctrinæ ac sanctæ vitæ meritum ejus dignitatis dignum prædicabat . At ille magis meritis , quàm dignitate crescere optans , alium Presbyterum nomine Quintum eligi curavit . Interea de totali Mundi hujus abdicatione unicè sollicitus , post tormenta superata & timorem mortis devictum , post amorem dignitatum calcatum ; voluit etiam divitiarum ac terrenorum affectum exuere . Dives natus erat , sed omnia in Persecutione ei fuerant ablata ; poterat pace redditâ (à Gallieno post ann. 260. Valeriano capto , ut infra) ea recuperare , sed paupertatis amore contempsit : imò cum quædam nobilis Mulier & dives , Archelaides nuncupata , elemosynis largiter ei subveniret , timens ne amitteret ea , quæ à Christo promissâ fuerant iis , qui omnia propter ipsum relinquunt , exiguam agri partem sibi ab ea oblatam elegit , ex qua in hortum redactâ , propriis manibus cultâ , quod sibi ad victum satis

satis erat comparabat ; quòd si interdum duas vestes haberet , meliorem pauperibus retentâ pro se viliori dispensabat , & dum nisi unam haberet , hanc pauperi erogabat & veste pauperis lacerâ se induebat .

VIII. Hâc verè Evangelicâ formâ cum merita simul & annos cumulasset , advenit tempus , quo vitam hanc temporalem in æternam transferret . Auditâ ejus morte universus Nolanus Populus cum lacrymis accurrit , certatim ejus Corpus tangere & osculari desiderans ; quod in loco ferè mille passibus ab Urbe distante primò humatum fuit , postea tamen Nolam translatum . Dies mortis ejus .14. Januarii notatur , quo anno determinatè ignoratur . Ipsum dictâ die Martyrol. Rom. his verbis celebrat : *Nola in Campania natalis Sancti Felicis Presbyteri , qui , ut Sanctus Paulinus Episcopus scribit ; cum à Persecutoribus post tormenta in carcerem mitteretur , & coehleis ac testulis vinctus superpositus jaceret , nocte ab Angelo solutus atque eductus fuit : postmodum verò cessante Persecutione , cum vita exemplo ac doctrinâ multos ad Fidem Christi convertisset , miraculis clarus in pace quievit .* S. Paulinus frequenter eum *Confessorem* nominat : quo titulo ornabatur , qui publicè Christi nomen confessi carcerem aut exilium passi fuerant ; interdum verò eum Martyrem appellat voluntate ac desiderio , licet non opere .

IX. Deus , qui vitam S. Felicis miraculis supra narratis celebrem reddidit , æquè & magis celebre efficere voluit ejus sepulcrum , ut ab extremis Orbis finibus ad illud Fideles accurrerent , & quod optaverant impetrarent . Obstupuit S. Augustinus , & pluribus in locis hoc testatur : præcipuè autem Epist. modò 78. (aliàs 137.) ad Clerum & Plebem Hipponensem n.3. ubi ait : *Multis esse notam sanctitatem loci , ubi Beati Felicis Nolanensis Corpus conditum est , ad quem locum misit Bonifacium Presbyterum , ut coram hujus Beati Viri sepulcro se à crimine ; quod ei imputabatur , juramento purgaret .* Eiusdem Beati Felicis meminit in Libro oct. Quæst. ad Dulcitium qu. 2. & in L. de Cura pro Mortuis cap.1. , quem Librum scripsit à Beato Paulino interrogatus , *utrum pro sit cuique post mortem , quòd corpus ejus apud Sancti alicujus memoriam sepeliatur .* Cui occasionem præbuerat Viduâ quædam , quæ materno ac pio affectu desideraverat , ut ejus filii defuncti cadaver in *Beatissimi Felicis Confessoris Basilica* poneretur . Et ejusdem Libri cap.16. ex Beati Felicis miraculo probat , mortuos vivos adeste his verbis : *Hinc solvitur illa quaestio , quomodò Martyres ipsis beneficiis , quæ dantur orantibus , indicant se interesse rebus humanis , si nesciunt mortui quid agant vi-*

vi. Non enim solis beneficiorum effectibus, verum etiam ipsis hominum aspectibus Confessorem apparuisse Felicem, cujus iniquitatum pie diligis, cum à Barbaris Nola oppugnaretur, audivimus non incertis rumoribus, sed testibus certis (notent hæc Protestantes); Plura ad intercessionem ejusdem Sancti operata miracula habentur passim in S. Paulini operibus, & Gregor. Turon. L. 1. de Gloria Mart. cap. 104., quæ apud Bollandum 14. Januarii reperire licet.

X. Valeriani temporibus proximum judico S. Cyrilli pueri gloriosum certamen. Puer iste Cæsareæ in Cappadocia natus celeberrimum etiam adultis constantiæ reliquit exemplum. Is continuè Jesu Christi nomen in ore habens, nec minis nec verberibus deterreri poterat, quin se Christianum fateretur. Plures propterea suæ ætatis pueri eum oderant ac se inimicos ejus declaraverant. Quin & pater ipsius domo eum ejecerat & alimenta ei denegabat. Cum hæc publica essent, Judex contra Cyrillum accensus irâ, ad se illum per Milites adduci jussit, & coram se positum acerbè increpare cœpit, putans se metum puero incutere. At illum intrepidum reperit & nihil pro confessione Fidei formidantem. Tunc placido vultu, mi fili, inquit Judex, culpam tuam tibi condono, Pater tuus apud se peramanter te recipiet, illius bonis frui poteris; sis ergo sapiens & temetipsum recogita. Ad hæc animo plus quàm virili puer Cyrillus ait: Gaudeo pro his increpari & probra pati: Deus me recipiet: me domo meâ expulsum delector; habeo enim majorem & meliorem: spontè sio pauper, ut divitiis fruâr æternis: mortem non timeo, quia vitam meliorem mihi provideo.

XI. Hæc alacri animo loquentem Judex publicè vinciri jussit, quasi ad mortem esset deducendus, secretò tamen monuit Milites, ne ultra terrorem procederent. Cum autem ei renuntiassent, Cyrillum ad aspectum ignis ardentis, ad minas eum in flammis illicè injiciendi; aut gladio caput illi amputandi, nec commotum fuisse, nec signa ulla pavoris dedisse; ipsum iteratò ad se vocatum ita allocutus fuit: Fili vidisti ignem, vidisti gladium; es-tò sapiens, redi ad te ipsum, ne patris domum ac fortunam tuam amittas. Cui Cyrillus: „Noquisti, inquit, „o Tyranne, nocuisti me revocans, & mecum pessimè gessisti. „Frustrà succendisti ignem, frustrà gladium acquisti. Multò „major est domus, quam habitare festino, multò divitiæ præstantiores: has accipere à Domino accelero; celerius me „consume, ut celerius fruâr. Et hæc audientes qui adstabant, lacrymabantur. Quibus Cyrillus ait, debetis ridere, debetis „de-

„ delectari , debetis me producere gaudentes ad mortem : ne-
 „ scitis , quam Civitatem inhabitabo : nescitis qualem fiduciam
 „ habeo : concedite sic expendere vitam „ . Hæc dicens ibat ad
 mortem seu veriùs ad æternam vitam . Et sic vultu spectabilis
 & jucundus supplicio se tradens , admirationi fuit omnibus , qui
 Cæsareæ habitabant . Hæc sumta sunt ex Epistola , à S. Firmiliano
 Cæsareæ Cappadociæ Episcopo , ut creditur , conscriptâ . Tan-
 tam in puero vix ab infantia egresso , nullâ spe humanæ gloriæ
 usque ad mortem promotam constantiam exhibeant Ethnicis si
 possunt .

§. XIII.

Valeriani exitus infelix & Macriani .

I. **M**oriebantur , ut vidimus , in patientia Martyres , & inter-
 rim Tyranni de Christo se triumphare putabant ; sed
 nesciebant , viam sibi sternere ad exitium & Divinam ultionem
 super eos inopinatè venturam . Hoc monito detertere conabatur
 Demetrianum Proconsulem à Christianis ultrà persequendis S.
 Cyprianus Libro ad ipsum scripto dicens : *Ladere Servos Dei &
 Christi persecutionibus tuis desine , quos læsos ultio Divina defendit .*
Indè est enim quodd nemo nostrum , quando apprehenditur , reluctat-
ur : nec se adversus injustam violentiam vestram , quamvis nimius
& copiosus noster sit Populus , alaciscitur . Patientes facit de securâ
ultione securitas . Innocentes nocentibus cedunt . Insoutes pœnis
& cruciatibus acquiescunt , certi & fidentes quodd inultum non rema-
neat quodcumque perpetimur , quantòque major fuerit persecutionis
injuria , tantò & justior fiat & gravior pro persecutione vindicta .
Nec unquam impiorum scelere in nostrum nomen exsurgitur , ut non
statim divinitus vindicta comitetur . Ut memorias taceamus antiquas ,
& ultiones pro cultoribus Dei repetitas nullo vocis præconio revol-
vamus ; documentum recentis rei satis est , quod sic celeriter , quodque
in tanta celeritate sic granditer nuper secuta defensio est , ruinis Re-
gum , jacturis opum , dispendio Militum , diminutione castrorum .
Nec hoc casu accidisse aliquis existimet aut fuisse fortuitum putet ,
cùm jam pridem Scriptura Divina posuerit & dixerit : „ Mihi vin-
dictam , & ego retribuam , dicit Dominus &c. „ . Loquitur hîc
 Cyprianus de Interfectione Gordianorum , Philipporum ,
 Deciorum Imperatorum (quam etiã Orosius L.7. cap.31. perfec-
 tionem imputat Christianorum) & aliis malis quæ hominibus
 & toti Imperio antea recens obvenerant .

II. Sed non leviora Valeriano saevo Persecutori vindicta Divina in futurum paraverat, quæ postea evenisse sequentia demonstrabant. Valerianus igitur cum Gallieno filio sex annos jam impleverat, cum in Persidem cum Exercitu transiens Macriano duce, post varios belli eventus videns Exercitum præteritis cadibus & maximè pestilentiam in dies diminui, Macriano etiam fraudulenter suadente, statuit omnibus modis cum Sapore Persarum tunc Rege pacem inire. Primò igitur oblatâ magnâ quantitate auri pacem redimere tentavit; sed Sapor victoriis elatus nec Valeriani legatos admittere voluit, dicens, se cum Valeriano ipso rem agere velle, & statim eos cum Exercitu suo secutus fuit. Valerianus se ad resistendum impotentem agnoscens Macriani perfidi proditoris hortatu congressui cum Sapore consensit, & ad locum ubi conventum erat, paucis stipatus Militibus incautè se contulit, quò cum pervenisset illicò detentus & captivus ductus fuit anno 260. Hoc factò Divina Justitia evidenter apparuit: quæ voluit ut Macrianus, qui persequendi Christianos Valeriano auctor fuerat, suâ proditione auctor esset etiam vindictæ, & undè venerat delictum, indè vindicta procederet.

III. Hæc tamen Divinæ ultionis initia fuere. Pudori quocertè suffundebatur, dum se Romanum Imperatorem videbat factum proditoriè captivum, alterius Regis & quidè hostis accedebat sævitie, quâ Sapor & verbis & factis in eum superbè agebat tanquam in vile mancipium. Non solùm enim quòcumque iret, faciebat eum præcedere catenis oneratum, & ad ignominie augmentum purpurâ & aliis Imperialibus insigniis indutum; sed quotiescumque equum vel currum ascendere volebat, faciens illum in terra super ventrem prosternere, ac super dorsum aut collum pedem imponens eo veluti scamno ad ascensum utebatur. Pluribus, & ut aliqui volunt, novem annis aut decem in hoc ignominioso ac infelici statu miser Valerianus vixit, nec quibuscumque vicinorum Regum precibus Sapor flecti voluit. Tandem mortuus adhuc in ludibrium mansit; pellem enim ejus de corpore detractam, sale conditam ac rubro colore tinctam in Templo appendi Sapor jussit: ut tanquam Romanæ ignominie monumentum Legatis Romanis futuris temporibus illò advenientibus ostenderetur. In hoc exitu, quo nemo Principum infeliciorem habuit, Dionysius Alexandrinus, Lactantius, Imperator Constantinus, Orosius & alii adorant terribilem Providentiæ Divinæ dispositionem, quæ Saporis injustam crudelitatem in sanguinis Servorum suorum justam vertit ultionem.

IV. In hoc etiam Divina Justitia misero Valeriano auxit supplicium ; quòd cùm totus ferè Orbis infelicem ejus casum lugeret , ac Principes ipsi cum Sapore amicitia ac viribus conjuncti eum enixè hortarentur , ut moderatius uteretur victoriâ , & captivum Imperatorem honestis conditionibus dimitteret , nec Romanos ad ultionem suo tempore sumendam provocaret : soli Valeriani filii , nempe Gallienus jam Imperator , & alii duo Cæsares , nedum de Patris ulciscenda injuria non cogitarint , sed nec filiali pietate moti pro ejus libertate operam ullam impenderint : imò accepto de Valeriani captivitate nuntio gavisus potiùs fuisse Gallienus fertur , quòd auctoritate Patris nimis gravis & severi liber evasisset : & solùm agens Philosophum dixisse : „ Nunc scio Patrem meum esse mortalem , & in hac re so- „ lamen habeo , quòd cecidit studio virtutis deceptus „ . Hanc Gallieni indifferetiam & pro patre insensibilitatem Viri prudentes ac pii damnabant , & eò magis quòd Exercitus Duces & totus Populus de infelici sorte Valeriani tristabantur , & plures aliæ Nationes Ducibus Romanis auxilia ad liberandum à captivitate Valerianum spontè obtulerunt . Sed permisit Deus , ut qui ab ipso ad Imperium assumptus ei ingratus fuerat Servos suos occidendo , filii sui , quem Imperii socium exexerat , ingratitudine puniretur .

V. At Macriani horum omnium malorum artificis quis fuit exitus ? nec ipsi Divina ultio defuit . Is qui omnia ambitione Imperii patraverat , prodito in manus Saporis Valeriano , illud invadit in Oriente anno 261 . ; sed cùm jam esset senex & altero crure impeditus , Fulvio Macriano filio Imperatoris titulum cedit . Sic post Valerianum parentem proditione captum , Exercitum contra Gallienum filium commovet , à quo ipse sociis filiis Imperator acclamatur . Usurpato Imperio in Oriente , illud ad Occidentem quoque extendere meditatur . Relicto itaque Quietto minori filio unà cum Ballisto Duce , ut Regionem contra Persas defenderet , ipse cum quadraginta quinque hominum millibus adversus Gallienum & Aureolum Illyrii Regem procedit ; sed inito in Illyrio prælio Macriani Exercitus non sine proditione cæditur : quare desperatus se unà cum filio , ne in hostium potestatem veniret , interfici jussit ; quamvis utrumque in ipso furore prælii necatum alii existiment . Nec multò post Quieti alterius filii mors secuta est ; cùm enim occiso Macriano & Quinto filio , Aureolus misisset , qui etiam Quietum occiderent , & iste ut militarem seditionem evaderet , Emesam se recepisset , ibi obsidione ab Aureolo cinctus ab Odenato Gallieni

Duce inrerfectus fuit, & corpus seu caput ejus è muris dejectum. Sic intra unius anni spatium Macriani evanuit Imperium, seu verius Tyrannis, & punitus ipse etiam in filiis debitas à Divina vindicta pœnas luit anno 262.

§. XIV.

Pax sub Gallieno. SS. Marinus & Asterius.

I. **S**anguine Christianorum à Valeriano, instigatore Macriano, per totum Orbem fuso, per utriusque exitium Divinâ Justitiâ vindicato, aliqualis pax Ecclesiæ afflulsit. Gallienus enim sive funesto Patris exemplo, sive quia pacato animo ac deliciis deditus esset, auditâ Patris captivitate, feralia ejus Edicta adversus Christianos datis litteris revocavit, indulgens eis, ut liberè conventus agere possent, & Episcopi suas Ecclesias administrarent, imò & bona sive Ecclesiis sive particularibus Personis erepta & Fisco applicata, eis petentibus restitui jussit. Eusebius L.7. cap.13. hujus Principis litteras indicat, quibus Episcopis permittit locorum quæ Cœmeteria appellabant possessionem resumere. Plures tamen ex Fidelibus Evangelicæ paupertatis amatores bona sua repetendo hâc gratiâ uti non curarunt; indecorum esse cogitantes, ut qui exemplo Christi omnia temporalia propter cœlestia contemnebant, pro iis recuperandis semel amissis vel facerent verbum. Tantus erat in Christianis & præsertim Ecclesiasticis illius temporis amor paupertatis: adhuc enim corde retinebant S. Cypriani monita L. de Lapsis, qui causam, cur post pacem plures insurgente Persecutione sub Valeriano etiam ex Episcopis lapsi fuerint, non aliam fuisse, quam nimiam temporalium rerum cupiditatem, asserbat: ibi enim post multa dicit: *Diffimulanda, Fratres, veritas non est, nec vulneris nostri materia & causa reticenda. Decepit multos patrimonii sui amor cæcus; nec ad recedendum parati aut expediti esse potuerunt, quos facultates suæ velut compedes ligaverunt. Illa fuerunt remanentibus vincula, illa catenæ, quibus & virtus retardata est & Fides pressa & mens vinclæ & anima præclusa; ut serpenti terram secundum Dei sententiam devoranti præda & cibus fierent, qui terrestribus cupiditatibus inhaerere &c..* Ex horum numero certè non fuit S. Felix Nolanus Presbyter, qui ut supra dixi, cum bona sua, quibus abundabat, recuperare posset, ea contempsit; imò & piæ mulieris larga subsidia recusavit, & suo labore dietim vivere elegit: ut nec vinci à seculo posset, qui unde vin-

cere-

ceretur à seculo non haberet : sequeretur Christum solutus & liber, ut Apostoli & sub Apostolis multi & nonnulli sepe fuerunt, qui & rebus suis & parentibus derelictis, individuis Christi nexibus adhaeserant. Hæc iterum Cyprianus.

II. Omnes igitur Ecclesiæ, saltem Occidentis, fruebantur pace: quia tamen Macriano Christianorum adhuc Orientem tenente, nimirum anno 261. vel 262. nondum pax illuc pervenerat, Cæsarea Palæstinæ illustrem Martyrem dedit Sanctum Marinum Militem, de quo Eusebius L. 7. hist. cap. 15. „ Fuit „ Marinus militari dignitate decoratus, ad hæc splendore generis atque opibus clarus & Christo nomen dederat. Cum ergo gradus Centurionis vacasset, Marinus ordine gradus sui ad eam promotionem vocabatur. Verum cum honore illo jamjam potiturus esset, quidam ad Tribunal accedens, Marinum accusare coepit dicens, illi utpotè Christiano homini & Imperatoribus sacrificare renuenti Romanam dignitatem capeßere Legibus non licere; sibi verò gradum illum competere. Eâ re commotus Judex Achæus nomine, primum quidam Marinum interrogavit, cujusnam esset sententiæ; cognito deinde quòd Christianum se esse constantissime profiteretur, trium horarum ad deliberandum ei concessit spatium.

„ Vix è Prætorio egressus erat Marinus, cum obvium habuit Theotecnum Urbis Episcopum, qui eorum quæ gerebantur fortè conscius prehensâ manu sermocinando ad Ecclesiam illum perducit: cumque interius ad ipsum Altare eum statuisset, reducâ tantisper ejus clamyde, gladium illi, quo præcinctus erat ostendens, mox Sacrorum Evangeliorum Codicem ex adverso locat jubens, ut ex duobus utrùm mallet eligeret. Marinus nihil cunctatus, protensâ dextrâ Codicem cum apprehendisset, his eum verbis Theotecnus compellavit: Adhære igitur adhære Deo, ejusque virtute roboratus consequere quod elegisti: vade in pace. Post hæc regredientem illum ab Ecclesia Præco pro foribus Prætorii evocare coepit. Jam enim præstitutum tempus effluxerat. Admotus igitur Tribunali, cum majorem quàm antea alacritatem Fidei ostendisset, statim ita ut erat ad supplicium abductus Martyrio capitis coronatus est.

Illius Martyrio præsens adfuit Asturius seu Asterius Senator Romanus Imperatoribus unicè carus, & tum ob splendorem generis tum propter divitias omnibus notus. Illustrior tamen pietate & Fidei alacritate apparuit; nam illicò Martytis Corpus, ut erat Senatoriâ veste indutus, suscepit, humeris suis

imposuit, & magnifico cultu ornatum decenti tradidit sepulturæ. Hæc Eusebius refert, qui addit cap. 16.

III. *De hoc Viro innumera quoque alia referri ab ejusdem familiaribus, qui ad nostram usque ætatem supervixerunt.* Unum quidè extraordinarium narrat cap. 17., quo ejus fiducia resplenduit. Ad fontes fluvii Jordanis non procul Cæsareâ singulis annis Pagani miraculum patrari contendebant. In unum ex istis fontibus victimam quandam projiciebant, quæ vix tetigerat aquam, Dæmone operante disparebat: quod tanquam insigne prodigium apud omnes celebrabatur. Asterius cùm semel interfuisset, super horum infeliciam cæcitatem pietate commotus, elatis ad Cælum oculis cum fiducia Deum oravit, ut hanc amoveret illusionem, quâ eos Diabolus decipiebat; & statim super aquas prodire victima visa est; nec ampliùs vanum illud portentum eo in loco visum est: & sic unius Fidelis preces Dæmonis præstigias, quibus tot Populos deceperat, evanescere perpetuò fecerunt.

IV. Quod de hoc S. viro Asterio seu Asturio controvertitur est, an fuerit Martyrio coronatus. Sententiæ neganti videntur adharere recentiores Critici, præcipuè moti ex silentio Eusebii, qui utpotè illis temporibus vicinus, & cum Asterii familiaribus qui adhuc supersistentes erant conversatus fuit, sicut alia ejus merita exactè describit, Martyrium si illud sustinuisset non omisisset. Affirmantem tamen sententiam primus prodidit Rufinus L. 7. hist. cap. 13., ubi de Asturio, *Honorem*, inquit, *quem Martyri detulit continuò ipsum Martyrem affectum esse*: quibus indicare videtur, eum statim post pietatis officia Marino perfoluta, captum & Martyrio fuisse coronatum. Quanquam difficile creditu videatur, simplicem Urbis Gubernatorem propriâ auctoritate ausum fuisse Virum Senatoriâ dignitate ornatum, quæ in omnibus Imperii Romani Provinciis in honore habebatur, ad mortem damnasse. Si enim, ut in Actibus Apost. legitur cap. 22. & 25., nec Tribunus, nec Felix Præfès, audito quòd Paulus Civis esset Romanus, ausi non sunt de eo judicium ferre, multò minùs credendum est, id ausum fuisse Achæum Judicem in Asturium Romanum Senatorem.

Nihilominùs sub Martyris titulo celebratur à Græcis die 7. Augusti, & à Latinis cum Marino conjungitur die 3. Martii sub nomine Asterii in Martyrol. Rom., ubi hæc habentur: *Cæsareæ in Palestina Sanctorum Martyrum Marini Militis & Asterii Senatoris in persecutione Valeriani: quorum prior accusatus à Commilitonibus, quòd esset Christianus, & interrogatus*
à Ju-

à Jūdice, Christianum se esse voce clarissimā testaretur, Martyrii coronam capitis abscissione suscepit: cūque Asterius Corpus Martyris capite truncatum, subjectis humeris & substratā veste, quā induebatur, exciperet, honorem quem Martyri detulit continuò ipse Martyr accepit. Consentiunt Beda, Ufuardus, Ado, & alii. Quare quid certò tenendum sit, alterius judicio lubens permitto.

§. X V.

Generalis Divina Ultio .

I. **V**aleriani Persecutoris, & Macriani Persecutionis Christianorum artificis punitio quantumvis sæva, ad explendam tamen Divinæ Justitiæ ultionem satis non erat ad mortem tot Justorum vindicandam. Innocens eorum sanguis per totum Orbem effusus generalem totius Orbis punitionem efflagitabat. *Anima intersectorum propter Verbum Dei, & propter testimonium quod habebant, subtus Altare clamabant voce magnā dicentes: Usquequò Domine Sanctus & verus non judicas & vindicas sanguinem nostrum de iis, qui habitant in terra?* (Apoc. 6. v. 10.) Omnes Provinciæ Sanctos fuerant persecuti, & æquum erat, ut omnes pœnam sentirent. Persecutionis auctor non solus culpabilis erat: ejus crimen involverat omnes suæ feritatis executores, delatores, accusatores, Magistratus, Gubernatores, Præsides, Judices, & quotquot tanto facinori manum vel animum apposuerant, quorum numerus erat propemodum infinitus, sicut culpæ rei sic & pœnæ obnoxii esse debebant.

II. Nec defuit illis quod promeriti fuerant, ut Cyprianus Demetriano ante prædixerat. Pestis generalis, quæ Persecutionem Decii ulcisci cœperat adeò recrudit, Romæ præsertim & in Achajæ Urbibus, ut unâ die in eadem Civitate quinque milia hominum putrida tabes necaverit. Sed quia hæc mala indurati homines causis naturalibus potius, quàm Deo ultori tribuebant; terra ipsa horribilibus concussâ motibus iram Dei testata est. Anno Christi 262. integrâ die terra motu contremuit, Cœlum tenebris obscuratum fuit, & subterranei vagitus auditi fuere, ut plures exterriti mortui fuerint. Hoc flagello concussæ fuerunt maximè plures Asiæ Urbes, Roma quoque, & Lybia. Pluribus in locis terra aperta horridas voragines aquâ salinâ repletas exhibuit; fluvii & mare ipsum plures Urbes inundarunt. Ubique luctus ubique clamor & plurima mortis imago: & ita implebatur in eis quod dictum est in Scripturis: *Lætantur impii cū male*

malè fecerint, & statim eis repentinus supervenit interitus.

III. Nec tamen sola elementa ac res insensibiles in ultionem Servorum suorum armavit Deus, sed & homines ipsos adversùs homines, Infideles contra Infideles bellis etiam civilibus concitavit, ut qui consortes fuerant in crimine, fierent mutuò ministri & poenæ. Hinc omnes barbaræ Nationes in Romanum Imperium insurrexerunt, & Provincias etiam remotiores armis invaserunt. Per totum Orientem se extenderunt Persæ; Scythæ & Gothi penetrarunt Asiam, Thraciam, & Græciam, Sarmatæ Illyrium; Germani in Gallias, & superatis Alpibus Rhetiâ pertransitâ in Italiam excurrerunt, inde retrocedentes ad Hispaniam processerunt; Franci quoque Africam depopulati sunt: adeout Aurelius Victor etsi Paganus (in Gallieno) hanc Barbarorum omni ex parte irruptionem assimilet tempestati, quâ venti omni ex parte furentes quidquid eis resistit prosternunt aut mergunt. Et Orosius L.7. cap.22. testatur, post 150. annos in aliquibus Provinciis extasse adhuc hujus stragis funestas reliquias, & magnas Urbes ad pauca vilia tuguria fuisse redactas.

IV. Porro ne aliqua Imperii Romani pars ab hac Generali ultione esset immunis, plura civilia bella inter Romanos exarserunt, atque tantus Tyrannorum numerus subito apparuit, ut Historici usque ad triginta ascendisse referant, omnes Gallieni inimicos, quamvis invicem discordes. Inter alias Alexandria Urbem, etsi exteris hostibus non expositam, intestinis tamen bellis miserè laceratam refert ejus Episcopus Dionysius apud Euseb. L.7. cap.21. & 22.. Ita Romanus sanguis, qui sanguine Christiano se inebriaverat, & ab hostibus & à Romanis ipsis ubique fundebatur: & superbum hoc Imperium, qui toto Orbi dominabatur, omnes suas Provincias brevi tempore ab hostibus vel usurpatoribus occupatas & desolatas demissâ fronte videre coactum fuit. Roma ipsa sibi timens, ut se à quocumque periculo præmuniret, muros suos reparare curavit.

V. Hisce pressuris ulciscabatur Deus offensas sibi in suis Fidelibus irrogatas, sed etiam suæ Ecclesiæ incrementum disponebat, ut etiam ultra terminos Romani Imperii protenderetur. Cùm Scythæ, Gothi, aliaque incredibilis barbararum Nationum multitudo Asiam aliasque Imperii partes invasionem percurrisset, pluresque captivos secum adduxisset, contigit, ut inter istos plures etiam ex Christianis & maxime ex Presbyteris & Episcopis aliquos asportarint. Hi cùm ad eorum Regiones pervenissent, in nomine Jesu Christi sanare infirmos, Dæmonia ejicere, suis sermonibus & exemplo virtutem docere ac promovere cœperunt.

runt . Quare Gentes illæ signis ac prodigiis , doctrinis & exemplo eorum permoti , interius gratiâ Dei in illis operante , existimarunt , nil sapientius & quod in eos magis cœlestem benedictionem attraheret , facere se posse , quàm si eorum monita & exempla secuti eundem quem ipsi Deum adorarent . Atque ita eos tanquam Doctores susceperunt , ac in Fide Christi instructi ab eis Baptisma suscipientes , antiquâ feritate in vitam magis rationabilem & humanam conversâ , Ecclesias ibi efformarunt .

VI. Extraordinariâ hâc viâ Divina Providentia barbaras Nationes ad se primò traxit , ut dum Christi Fides ab eis captiva raperetur , ipsos sibi captivos efficeret , & suave Christi jugum suscipere eos doceret . Quare Sozomenus L.2. hist. cap.6. refert , quòd cum Constantinus toti Imperio dominaretur , Gothi aliæque barbaræ Gentes , quæ tunc Danubii ripas incolebant , jamdiù Fidem Christi susceperant ; & quod bella , quæ Romani cum exteris Gallieno imperante & Successoribus gesserant , earum conversioni occasionem præbuerant . Hoc Philostorgius L.2. hist. cap. 5. confirmat asserens , Scytharum seu Gothorum rapinas , quas sub Valeriano & Gallieno (anno 264) in Asia Galatia & Cappadocia exercuerant , & quibus plures Christianos captivos duxerant , Fidem Christi in eas Regiones invexisse . Inter hos captivos è Cappadocia abductos fuisse Eutychem , indicat S. Basilii Epist. 338. , ubi ait , semina Religionis Christianæ apud Gothos è Cappadocia venisse , ea jaciente Eutyche , Viro eminentis virtutis , qui potentiâ S. Spiritus & Charismatum donis , quibus repletus erat , Barbarorum corda emollivit .

Ita ad litteram impletum fuit quod vaticinatus fuerat Isaias cap.14. v.2. : *Et tenebunt eos Populi , & adducent eos in locum suum : Et possidebit eos domus Israel super terram Domini in servos & ancillas : & erunt capientes eos qui se ceperant , & subjicient exactores suos . Et erit in die illa , cum requiem dederit tibi Deus à labore tuo & à concussione tua & à servitute dura , quâ ante servisti ; sumes parabolam istam contra Regem Babylonis & dices : Quomodo cessavit exactor , quievit tributum ? contrivit Dominus baculum impiorum , virgam dominantium &c. .* Hæc & sequentia , quibus Regi Babylonis suæ superbiæ ruinam Isaias prædixit , repetere Christiani possunt impleta in Persecutoribus suis , & in eos qui ipsos ut captivos tenebant .



CAPUT XII.

Persecutio Aureliani.

§. I.

Ejus Gesta & Exitus.

I. **G**Allienus postquam quindecim annis rexit Imperium, septem nimirum cum Valeriano patre, & octo solus, patre in captivitate Regis Persarum usque ad mortem redacto, ut dictum est; quo tempore Imperium bellis Barbarorum incurfionibus & aliis innumeris malis, de quibus supra, jactatum fuit; tandem anno 268., dum Mediolanum obsidione cingeret, à conjuratis vel gladio vel sagitta confixus interiit, & post ipsum occisi fuerunt Romæ Senatus decreto Gallienus filius quem Cæsarem destinaverat, & Valerianus frater quem Augustum declaraverat,

Imperium igitur assumpsit Marcus Aurelius Claudius II. universali acclamatione & probatione Senatus; erat quippè tum in guberniis tum in militia clarissimus: vix tamen tribus annis imperavit: nam anno 270. vivere desiit circa mensem Novembris, omnibus ejus mortem lugentibus. In statu deplorabili reperit Imperium undique Barbarorum invasione inundante, & bellis civilibus laceratum: quare sub ipso nil contra Christianos actum legitur, gravioribus enim curis distractum, credibile est eos in pace reliquissè.

II. Circa finem anni 270. Claudio II. Aurelianus in Imperio successit in Pannonia obscuris parentibus natus, qui Militiam semper secutus in ea celebris evaserat. Vir justus sed æquè severus erat. Sui Imperii initiis favorem aut saltem æquum erga Christianos se exhibuit: & in hoc animo perstitisse usque ad finem anni 272., demonstrat id quod egit pro Ecclesia contra Paulum Samosatenum. Cum enim iste non obstante decreto Concilii, quo propter suam hæresim Episcopatu privatus fuerat, adhuc violenter, nixus patrocinio Zenobiæ Palmirenorum Reginae, Ecclesiam Antiochenam & domum Episcopalem occuparet; Zenobiâ per Aurelianum devictâ, Episcopi Orientis eum deprecati sunt, ut Paulum vel ab Ecclesia vel saltem ab Episcopali domo auctoritate suâ ejiceret. Quibus Aurelianus humaniter annuens Paulum Antiochiâ expulit, ac insuper mandavit, ut Sedes

des illi adjudicaretur, ad quem Episcopi Italiae & Romae litteras direxissent : adeò notorium erat etiam apud Paganos, quòd nota virorum Christianorum erat communio cum Romana Ecclesia, cujus etiam auctoritas ad Orientales Episcopatus extendebatur .

III. In hac tamen bona voluntate non semper perstitit . Pro-
pensionem in Christianos vertit in odium excitans adversus eos
persecutionem ; & hoc sive perfidis quorumdam instigationibus,
sive propriâ impietate motus . Quomodò enim Valerianus homo
superbus & ferus pati poterat in suo Imperio adorari ut Deum
illum, qui omnes alios Deos eorumque superstitiones è cultu,
quo fruebantur, deiciebat ? Fama igitur ubique divulgabatur in
Religionem Christianam exterminium iteratò parari ; sed Deus
de imminente sui ruinâ Aurelianum prae-monere voluit, nam
cùm firmando contra Christianos Edictò calamum manu
sisset, improvise gladii propè ipsum vibrati fragore manum ejus
detinuit ; quare tremens Edictum firmare ausus non fuit . Hoc
fortè contigit non multò ante ejus mortem, puta anno 274.,
cùm occisus fuerit anno 275. ; & hâc ratione, ut infra dicam,
ejus Persecutio parùm duravit .

IV. Ex hoc Doduvellus, cujus studium est Martyres Chri-
stianae Religioni pro viribus eripere, nullos omninò Martyres
sub Aureliano admittit, quòd, inquit, Persecutio ab eo *intenta-
ta tantum fuerit, non executioni demandata* . Probare autem co-
natur ex Eusebio, qui L. 7. cap. 30. dicit, Aurelianum erga Chri-
stianos benè affectum processu temporis aliter sensisse ; & à con-
siliariis nonnullis adversus eos fuisse excitatum, sed a Deo re-
preffum his verbis : *Fam ea de re multus ubique rumor spargebatur,
sed eum paratum jam, & compositis contra nos Edictis, ut ita dixe-
rim, subscribentem, alta est Divina Justitia, quasi constricto cubi-
to conatum ejus reprimens* &c. : ex Lactantio etiam L. de Mort.
Perf. cap. 6. dicente, Aureliano non licuisse quæ cogitaverat
perficere, sed protinùs inter furoris sui initia esse extinctum .
Ideòque Sulpitius Severus Aurelianum numero Persecutorum
non accenset .

V. Verùm ex relatis locis inferri quidèm potest, Aureliani
Persecutionem fuisse brevissimam, non tamen nullos omninò
Martyres fecisse . Dicit quidèm Eusebius, Deum ejus conatum
constricto cubito dum manum Edictò apponeret repressisse . Sed
cùm effectus timoris parùm durent, cohibent enim manum sed
voluntatem non mutant ; valde credibile est, eum mox pravæ
suae voluntati à Deo derelictum, firmasse & publicasse contra
Christianos Edictum . Unde in Chronico Eusebiano dicitur,

cùm adversus nos Persecutionem movisset, occiditur. Et Lactantius ipse asserit, Aurelianum contra nos scripta cruenta & carnivora edidisse: dicit tamen, cum non potuisse implere quæ cogitaverat, non quia nullum prorsus habuerit effectum, sed quia non perfecit quæ cogitaverat. Cogitaverat enim Christianam Religionem delere, quod & Nero & alii subsequentes crudeliores Tyranni ante ipsum cogitaverant: sed sicut illi morte seu verius Justitiâ Dei præventi perficere non potuerunt, ita nec Aurelianus, paulò post occisus. Negari tamen non potest, ferale illud Edictum in Provinciis, ad quas eo vivente pervenerat, barbaro ipsius genio promovente crudeliter sævisse, & post ejus obitum etiam perseverasse, cum vacante per sex menses Imperio, Judices quos Senatus aut Valerianus elegerat, Christianis infensi in Officio continuarint, & proinde in magis remotis locis, ad quæ solum post Aureliani mortem Edicta pervenerant, Persecutionem adhuc viguisse.

VI. Sed quidquid sit, SS. Hieronymus in Chron., Augustinus L. 18. de Civit. Dei cap. 52., & Orosius L. 7. cap. 23. inter persecutiones Ecclesiæ ordine nonam Persecutionem Aureliani recensent, & hanc designare voluit S. Leo Magnus Serm. 2. in Festo Pentecostes (ut eruditi Viri censent quam tamen ponit octavam) his verbis: *Manes. . . eo tempore damnandus invocuit, quo post Resurrectionem Domini annus ducentissimus & sexagesimus impletus est, Probo Imperatore Paulinoque Consulibus, cum octava jam in Christianos Persecutio ebulliret, & innumera Martyrum millia ipsis suis victoriis probavissent, impletum esse quod Dominus promiserat dicens: Cùm autem tradent vos &c.* Porro cum Probus Imperator & Paulinus Consules fuerint anno aëræ vulgaris 276. vel 277., quo Persecutionis æstus sedatus jam fuerat, putat P. Ruinart loco *ebulliret*, legendum esse *ebullisset*; nam Probo imperante nulla fuit Persecutio, & Martyres jam sub Persecutione dederant testimonium pro Christo: nisi fortè dicatur, Persecutionem ab Aureliano excitatam post ejus mortem anno 275. etiam anno sequenti crudelitate Judicum continuasse. Caterum Martyrio plures fuisse sub Aureliano coronatos inferius ostendam.

VII. Dixi, Aurelianum Persecutionem, quâ Christianum nomen delere cogitaverat, perficere non potuisse; nam priusquam in Provincias saltem remotas ejus Edicta de Christianorum cæde pervenirent, Divinâ Justitiâ morte punitus fuit. Hoc ita contigit. Erat in Thracia Aurelianus cum potenti Exercitu contra Persas; suspicione conceptâ contra Muestem, qui illi
à se-

à secretioribus erat, minis eum increpuit. Is probè sciens Aureliani minas absque effectu pœnæ non manere, Litteras Aureliani manu falsò conscriptas formavit, quibus proprio notabantur nomine Ministri omnes, etiam præcipui Exercitus Duces, nec se ipsum omitendo, ac si erga omnes Aurelianus malè affectus esset; quas singulis in eis notatis secretè communicavit. Timore igitur & simul indignatione commoti, secretâ conspiratione ipso etiam Mnesteo excitante, Aureliani nece in tuto sese ponere decreverunt. Quare inter Bizantium & Heracleam in loco dicto Cenofrurium dum paucis stipatus iter ageret, ipsum aggressi gladio necarunt anno 275. mense Aprilis, seu Januarii ut alii putant, cum quatuor annis & solis aliquot mensibus rexisset Imperium. Hanc ejus necem fuisse sanguinis innocentis ab ipso fusi justam punitionem, vel ipsi Ethnici Scriptores, inter quos Julius Cæsar, arbitrati sunt.

§. II.

Martyres in Galliis.

I. **M**Odò detegenda est Doduvelli deceptio, dum ausus est asserere, sub Aureliano nullos extitisse Martyres: quod præstebimus ex pluribus aliquos referendo. Si vetera Martyrologia consulimus plurimos præsertim in Galliis reperiemus. Aurelianus bis in Gallias profectus fuisse fertur: semel quidè anno Christi 272. contra Tetricum: iterùm anno 274. In altero ex his adventibus passa fuit Senonis B. Columba Virgo, cujus nomen tamquam Martyris sub Aureliano notatur in Martyrologiis B. Hieronymi, Bedæ, Usuardi, & aliorum, & in Romano die 31. Decembris his verbis: *Senonis S. Columba Virginis Martyris, quæ igne superato in Persecutione Aureliani Imperatoris gladio cæsa est.* De ea, ut notat Baronius ibi, in Breviario Toletano legitur sacer Hymnus, quo ejus Martyrium canitur, Acta tamen sincera desiderantur. Dum Aurelianus esset in Galliis passus fuisse creditur S. Sabinianus, de quo 29. Januarii hæc leguntur: *In territorio Tricastino Sancti Sabiniani Martyris, qui jubente Aureliano Imperatore pro Fide Christi decollatus est.* Sabinianus iste diversus fuisse creditur ab altero, qui 31. Decembris Senonis cum Pontiano passus his verbis: *Apud Senones Beatorum Sabiniani Episcopi & Potentiani, qui à Pontifice Romano illuc ad prædicandum directi eandem Metropolim Martyrio suo illustrant:* iste enim Episcopus fuisse dicitur, ille autem non, & sub

Aureliano Trecis passus : isti verò Senonis, nec sub quo passi sunt indicatur.

II. Trecis quoque sub Aureliano Martyr effectus traditur 21. Januarii S. Patroclus, de quo his verbis : *Trecis Sancti Patrocli Martyris, qui sub Aureliano Imperatore Martyris coronam promeruit*. Hunc celebrant Beda & alii cum Gregorio Turon. de Glor. Martyr. cap. 64. Trecis quoque ponitur Martyrium S. Julix Virginis, ac simul Sanctorum Claudii, Justi, Jucundini, & aliorum quinque, quos Martyrol. Rom. 21. Julii memorat : *Trecis Sancta Julia Virginis & Martyris*. *Ibidem passio Sanctorum Claudii, Justi, Jucundini, & sociorum quinque sub Aureliano Imperatore*. Ibidem quoque coronatus ponitur sub Aureliano 14. Novembris S. Venerandus, & 1. Junii S. Reverianus Episcopus cum sociis Agustoduni passis his verbis : *Agustoduni Sancti Reveriani Episcopi, & Pauli Presbyteri cum aliis decem, qui sub Aureliano Principe Martyrio coronati sunt*. Antifiodori etiam cum S. Prisco ingens Christianorum multitudo pro Fide causa asserit 26. Maii hoc compendio : *In territorio Antifiodorensi passio Sancti Prisci Martyris cum ingenti multitudine Christi Fidelium*. Locus sepulcri horum Martyrum revelatus fuisse fertur S. Germano Antifiodorensi, qui in eorum honorem Monasterium erexit, quod usque ad Hunnorum rapinas substitit. Insuper cum caput S. Prisci eidem Germano miraculosè innotuisset, Ecclesiam sub ejus nomine non procul ab Urbe Antifiodorensi edificavit, ex quo nomen locus ille accepit vulgò dictus *Saint Prix*. Ferunt quoque ejus Acta, quòd postquam S. Priscus decollatus fuit, Christianus quidam nomine Cottus sublato ejus capite aufugit ad triginta stadia, idest quatuor ferè milliaria, sed cum Persecutores eum insecuti essent, deprehensum capite truncarunt. Istum eundem fuisse locum crediderim, in quo ut dixi sacrum caput à S. Germano fuit repertum.

§. III.

Martyres Romæ & Italia. S. Felix Papa, Agapitus, & Restituta.

I. **M**artyrum, qui Romæ sub Aureliano passi sunt, agmen ducit S. Felix Romanus Pontifex, qui alios ad Martyrium hortatus & ipse secutus est. Romanus patriâ, filius cujusdam Constantii fuisse fertur. Mortuo Dionysio anno 269., qui per decennium Romanam Ecclesiam rexerat, post quinque dies

28. Decembris electus & ordinatus fuit. Vix electus Felix litteras ad Prædecessorem directas à Concilio Antiocheno contra Paulum Samosatenum accepit, quarum occasione scripsit Epistolam ad Maximum Episcopum & Clerum Alexandriæ, cujus fragmentum habemus, in qua disertis ac perspicuis verbis, quid de Christi Divinitate & Humanitate credendum sit, ita declarat: *De Verbi autem Incarnatione & Fide, credimus in Dominum nostrum Jesum Christum ex Virgine Maria natum, quia ipse est sempiternus Dei Filius & Verbum: non autem homo à Deo assumptus, ut alius sit ab illo. Neque enim hominem assumpsit Dei Filius, ut alius ab ipso existat. Sed cum perfectus Deus esset, factus est simul homo perfectus ex Virgine incarnatus.* Hæc Felix anno Christi 270. quibus nedum Samosateni errorem confixit, sed & Nestorium antequam oriretur, ejusque hæresim præfocavit. Quare istud fragmentum Petrus Presbyter Alexandrinus inter alia legit in Concilio Ephesino, illudque laudant S. Cyrillus in Apologia sua adversus Orientales in ejusdem Concilii Actis inserta, & Vincentius Lirinensis in Commonitorio adv. Hæreses.

II. Quamvis ejus Pontificatus initia pacifica fuerint; nam sub ipso Aurelianus adhuc Christianis propitius dedit litteras ad Episcopum Romæ & Italiæ (de quibus supra) ut loco Pauli Samosateni, ut mos erat, aliud destinarent, unde Dominus electus fuit: attamen sub ejus Pontificatu anno 273. & 274. Aurelianus persequi cœpit Christianos. Inter alios ergo, quos Persecutio coronavit, honorantur 15. Julii SS. Eutropius, Bonosa, & Zosima sorores in Portu Romano Martyres. A Sancto Felice ad fortiter tolerandum pro Christo animatos fuisse, censet Baronius ex Actis: ex quibus habetur etiam, istos paucis diebus præventos fuisse Martyrio quinquaginta Militum, qui à Sancta Bonosa exemplo & adhortationibus fuerant conversi, & à S. Felice baptizati, quorum memoriam celebrat 8. Julii Martyrol. Rom. his verbis: *In Portu Romano Sanctorum quinquaginta Militum Martyrum, qui in confessione Sanctæ Bonosæ ad Fidem adducti, & à Beato Felice Papa baptizati, in Persecutione Aureliani occisi sunt.*

III. Martyrologia Bedæ, Ussardi, Adonis, & Romanum referunt diē 10. Junii SS. Basilidem, Tripodem, Mandalem, & alios viginti sub Aureliano Martyres Romæ sic: *Romæ viâ Aureliâ natalis Sanctorum Basilidis, Tripolis, Mandalis, & aliorum viginti Martyrum sub Aureliano Imperatore & Platone Urbis Præfecto.* Item 12. Decembris S. Sinesium: *Romæ Sancti Sinesii Martyris, qui tempore Beati Xisti Papæ Lector ordinatus, cum*

multos convertisset ad Christum, apud Aurelianum Imperatorem accusatus gladio percussus Martyrii coronam accepit. De isto agunt hâc die etiam Græci in Menologio. Hermannus Contractus memorat de ejus translatione in Insulam Augiensem facta an. 830., ita Baronius in Notis ibi. Passum etiam Romæ S. Sabam cum aliis septuaginta Martyr. Rom. 24. Aprilis ita describit: Romæ Sancti Sabæ ductoris Militum, qui accusatus quòd Christianos in carcere detentos visitaret coram Judice Christum liberè confessus est, à quo facibus adustus & in lebetem picis ferventis injectus, cum evassisset illæsus, eo miraculo septuaginta Viros ad Christum convertit, qui omnes in confessione Fidei constanter permanentes gladio cæsi sunt: ipse autem demersus in flumen Martyrium consummavit. De hoc (inquit Baronius in Notis) agunt hâc die etiam Græci in Menol., & Romæ passum tradunt temporibus Aureliani Imperatoris. Hic ad intentum notandum velim, quòd qui videbant Sabam propter Christum facibus uri & in lebetem picis ardentis injici, naturali horrore debuissent à Christo confitendo retrahi. Sed videntes eum exire illæsum, & omnipotentem Dei manum Christianis adesse agnoscentes, liberè pro Christo statim se tradiderunt. His quæ in passionibus Martyrum non rarò accidebant, nimirum, quòd videntes eos in tormentis propter Christum, Christum confitebantur, & pro eo iisdem & atrocioribus tormentis se subiciebant, quisque si sanus est, convinci debet, aliquod supra humanum, & Divinum extitisse. Quis enim videns aliquem propter furtum suspendi, ad furandum accenditur, & non potius à furando naturaliter deterretur?

IV. Sanctus Pontifex Felix, qui alios ad fortiter pugnandum pro Christo accendebat, pugnam & ipse aggressus gloriosè coronatur. Martyrem eum appellant Ephesinum Concilium, Cyrillus Alexandrinus, & Vincentius Lirinensis, ubi supra, & sub eodem titulo celebrat Martyrol. Rom. 30. Maii dicens: *Romæ viâ Aureliæ natalis Sancti Felicis Papæ & Martyris, qui sub Aureliano Principe Martyrio coronatus est.* Dubitatur tamen, an verè Martyr, idest violentiâ tormentorum, an verò Confessor, idest juxta idiomata illorum temporum, post multa pro Christo tolerata, in carcere seu alia naturali morte obierit: Nicephori enim Chronicon titulo Confessoris ipsum ornat. Cum tamen Concilium Ephesinum, Cyrillus, & Lirinensis, & Ecclesia illum absolutè Martyrem vocent, vi cruciatuum obiiisse tutius crederem. De die etiam mortis dubium est; nam antiqua Martyrologia obitum ejus consignat diei 22. Decembris anno 274.: cumque Pontificatum asumeret anno 269. 28. Decembris, fiet

fiet ut quinque annis nondum expletis illum administraverit, & hoc verosimilius iudico. Quòd verò ejus Festum die 30. Maii in Romano & aliis Martyrologiis notetur, diem Translationis potius, quàm à Cœmeterio Callixti anno 354. in Ecclesiam eadem in via sitam Corpus ejus delatum fuit, designari putarim; de facto enim Porta & Ecclesia, quæ modò S. Pancratii dicitur, olim Porta & Ecclesia S. Felicis vocabatur.

V. Præneste Urbe propè Romam celebre fuit sub Aureliano S. Agapiti Martyrium, quod, præter Bedam Ushardum Adonem, Martyrol. Rom. 18. Augusti ita describit: *Præneste natalis Sancti Agapiti Martyris, qui cum esset annorum quindecim & amore Christi ferveret, jussu Aureliani Imperatoris tentus est, ac primò nervis crudis diutissimè casus, deinde sub Antiocho Præfecto graviora supplicia passus, exinde cum ex præcepto Imperatoris leonibus objiceretur, & minimè lusus esset, gladio Ministrorum coronandus percutitur.* Quibus conciliantur duo Manuscripta, quorum unum hunc Martyrem passum fuisse dicit sub *impiissimo Aureliano*, alterum verò sub Rege *Antiocho Pagano*: utrumque enim verum est; nam sub Aureliano Imperatore, Antiocho, quem *Regem* vocat, Præfecto Martyrium subiit. Ejus Festum in Sacramentario S. Gregorii, in Calendario P. Frontonis, & in Thomasi Misali adnotatur.

VI. Sora quoque (Urbs in Terra Laboris sita) S. Restitutam cum aliis Christo Martyrem obtulit. De hac Martyrol. Rom. 27. Maii sic loquitur: *Soræ Sancta Restituta Virginis & Martyris, quæ sub Aureliano Imperatore, & Agathio Proconsule Fidei certamine suscepto, Daemonum impetus, parentum blanditias, & tortorum sevities superavit: demum cum aliis Christianis capite truncata, Martyrio coronata est.* Asservari ejus Acta in Ecclesia Sorana, dicit Baronius in Notis ibi, quæ fuisse conscripta autumat à Gregorio Monacho Cassin. postea Tarracinae Episcopo, motus auctoritate Petri Chartularii cap. 32., qui ejus Gregorii scripta recensens ait: *Scriptis passionem S. Virginis Restitutæ.* Notat etiam idem Baronius, quòd extat adhuc memoria in Insula Fibreni fluminis, ubi Martyrio coronata est cum sociis. Et quia locus erat, in quo carnicina Sanctorum Martyrum exercebatur, ideò fluvius ille antea Fibrenus dictus, postea vocari coepit Carnellus, quasi Carnarius seu carniū Vorator. Unde in Actis S. Placidi Martyris à Gordiano conscriptis idem fluvius appellatur Carnellus, ut scias, non esse recentem nomenclaturam. Ita ex Baronio.

§. IV.

SS. Felix Presbyter , Ireneus , Mustiola , Narcissus &c.

I. **H**orum Martyrum Acta ferunt, quòd, cùm Aurelianus motâ Persecutione rescivisset Sutrii in Etruria ingentem Christianorum esse numerum, illuc misit Turcium ut eos morte puniret. Inter omnes autem Fideles, qui Sutrii morabantur, eminebat quidam Presbyter nomine Felix, qui toto ardore pro Populi in agris degentis conversione laborabat, eisque bonis etiam, quibus abundabat, subveniebat. Cùm autem certior factus esset, Turcium advenisse, congregatâ Fidelium multitudine eos adhortari cœpit ad fortiter permanendum in Fide, & ne hâc tempestate concuterentur, quæ brevè esset transitura, & nil aliud operari poterat, quàm ipsos ab hujus seculi proceillis transferre ad portum felicitatis æternæ.

II. Quæ dixerat, exemplo confirmavit; nam captus & in carcerem conjectus, sequenti die coram Judice sistitur, qui ab eo petiit, cur tantâ insaniret audaciâ, ut Populos ad contemnendum Religionem Romanorum & mandata Principum instigaret: cui Felix respondens: Tota, inquit, nostra gloria, tota nostra felicitas in prædicando Jesum Christum, & vitam æternam Populis persuadendo & procurando consistit. Cùmque Judex reponeret: quanam est ista vita? hæc est, ait Felix, timere & adorare Deum Patrem, Dominum nostrum Jesum Christum, & Sanctum Spiritum. Post alias interrogationes videns Turcius eum flecti non posse, præcepit ut ei saxo os contunderetur; & ita in eo puniretur, quo Populum verbis præceperat: & in hoc cruciatu Sanctus Martyr emisit spiritum. Gloriosum ejus exitum Ecclesia celebrat 23. Junii in Martyrol. his verbis: *Sutrii in Tuscia Sancti Felicis Presbyteri, cujus os tamdiu jussit Turcius Praefectus lapide contundi, donec emitteret spiritum.*

III. Porro cùm Sancti Martyris corpus Ireneus Diaconus sepultura tradidisset, Turcius eum comprehendit, ac se Clusium proficiscentem, ante currum catenis oneratum ac pedibus nudis præcedere jussit; cùmque Clusium pervenisset, carceri mancipavit: deinde conquistos per dies plures Christianos omnes in carcerem conjecit. Illuc mulier quædam nobilis Mustiola Claudio Imperatori, qui ante Aurelianum regnaverat, cognatione juncta, noctu & interdium quoque accedens, omnigenâ assistentiâ eos confortabat & in Fide confirmabat. Monitus Turcius eam
ad

ad se adduci fecit : cùmque esset pulchra nimis , statim ac eam vidit , reduci cum honore iussit . Subinde ad eam invisendam amore captus & desiderio eam sibi desponsandi ipsemet processit , & de genere ac nobilitate sua magno studio ab ea perquisivit . Verùm illa fervore Sancti Spiritus plena respondit , se non aliam scire nobilitatem , quàm sanctam Christianorum humilitatem : cùmque Turcius plura dixisset , ut ad renuntiandum Christo eam induceret , omnia tanquam stultitias & blasphemias ipsa rejecit .

IV. Quare tantâ constantiâ Turcius irritatus , illicò Christianos omnes quos habebat detentos capite truncari imperavit , unico reservato Irenæo , quem coram Mustiola in equaleo extendi , costas ferreis ungulis lacerari , eisque flammis admoveri iussit ; nec eum desistit sic torquere , nisi quando ille gratias agens Deo , quòd dignaretur eum admittere in conspectum suum , desistit vivere . Cùmque eum increparet Mustiola , quòd Sanctos Dei adeò indignè tractaret , Turcius furore percitus sententiam protulit , quâ nudata flagellis plumbo armatis tamdiù caderetur , donec efflaret spiritum : sicque Mustiola Martyrii coronam accepit die 3. Julii . Ejus Corpus quidam Servus Dei nomine Marcus prope muros Clusii sepelivit . S. Mustiolam Virginem fuisse quidam putant , & ut Virgo alicubi colitur ; sed eam jam fuisse nuptam & tunc Viduam , ostendit titulus *Matronæ* , quo ornatur in Martyrol. Rom. die 3. Julii , ubi de ipsa & S. Irenæo hæc leguntur : *Clusii in Etruria Sanctorum Martyrum Irenæi Diaconi , & Mustiolæ Matronæ , qui sub Aureliano Imperatore diversis atrocibusque suppliciis cruciati coronam Martyrii meruerunt* . Hæc die Ecclesiæ Clusina & Senensis , & aliquæ aliæ S. Mustiolæ Festum celebrant .

V. Priusquam in Orientem transeamus , omittendum non est certamen SS. Narcissi Augustæ Episcopi , & Felicis Diaconi , qui sub Aureliano Gerundæ pro Christo fortiter pugnarunt : de quibus Martyrol. Rom. 18. Martii ita loquitur : *Augustæ Sancti Narcissi Episcopi , qui primus in Rhætia Evangelium prædicavit , deinde in Hispaniam profectus , cùm Gerundæ multos ad Christi Fidem convertisset , ibidem in Persecutione Aureliani cum Felice Diacono Martyrii palmam accepit* . Hunc Narcissum non pauci confundunt cum Narcisso Jerosolymitano Episcopo , de quo 29. Octobris : cum aliis tamen diversum esse censeo ; tum quia unus Episcopus Jerosolymitanus ponitur , alter Augustanus ; tum quia hic Gerundæ Martyrio coronatus dicitur , ille autem in ætate decrepita Jerosolymis quievisse narrat Martyrol. 28. Octobris sic : *Jerosolymis natalis Beati Narcissi Episcopi , sanctitate pa-*

tientia ac fide laudabilis, qui centum & sexdecim annorum migravit ad Dominum. Nec obstat quòd Augustæ de S. Narcisso eâdem die 29. Octobris Festum agatur; nam hoc contingere potuit, vel quia eâ die ejus Ecclesia fuit dedicata, vel quia ejus ibi facta fuit in Episcopum Ordinatio: & demum quia Narcissus iste Augustanus multis annis posterior fuit Narcisso Jerosolymitano.

VI. Difficultas non levis mihi oritur, quomodò S. Narcissus Augustanus poni possit Gerundæ sub Aureliano passus; nam cum idem Martyrol. 5. Augusti dicat, S. Afram cum esset Pagana à S. Narcisso fuisse Augustæ conversam, & cum tota domo sua baptizatam & tandem igni traditam; & S. Afræ Martyrium ad annum Christi 304., ut infra dicam cap. 13. §. 27. num 1. &c., protrahatur, quo tempore Diocletianus vel Maximianus regnabat, non videtur componi posse cum Martyrio S. Narcissi; quod si sub Aureliano ponatur; anno 274. jam contigerat: nisi forte dicatur, S. Afram adhuc adolescentulam à S. Narcisso Augustæ baptizatam, plus triginta annis superstitem fuisse, & tandem Martyrio coronatam. Sed quidquid sit; argumentum præsentis operis non est de anno & tempore, quo quisque Martyrum pro Christo testimonium dederit; sed solum statuere veritatem Martyrii pro confessione Fidei, præscindendo à tempore & anno, quo illud subiit.

Redeundo igitur ad S. Narcissum Augustæ Episcopum, præterire nolo quod refert Baronius in Notis ad 18. Martii, nempe quòd tumulus ejus multis miraculis illustratur: quorum illud est celeberrimum sub Petro Aragonum Rege, quando captâ Gerundâ per Carolum Siciliae & Philippum Francorum Reges, ex sepulcro S. Narcissi, quod violare attentarunt Milites, muscarum examen egressum in exercitum infecto agmine irruens, ingentem cladem intulit & in fugam egit à coëptisque desistere coegit. Contigerunt hæc 8. Septembris anno Domini 1286. unde apud eos in proverbium abierunt Muscæ S. Narcissi.

§. V.

S. Conon cum Filio & alii in Oriente.

I. **A**B Occidente in Orientem transeuntibus, etsi ibi minùs violenta fuisse Persecutio videatur, non pauci tamen iique celebres Martyres occurrunt. Anno 274. Iconium in Isauria quidam Præfes nomine Domitianus missus fuerat, in mandatis habens ut omnes ad sacrificandum Idolis obligaret, & recu-
san-

santes diversis & atrocibus suppliciis puniret. Erat Iconii quidam fidelis Christi Servus nomine Conon, qui ex uxore Christiana filium susceperat: sed uxore paulò post defunctâ, ipse cum filio in locum particularem se recepit; ibique tali pietate vivebat, ut sacius esset Deo & Angelis amabilis & Dæmonibus terribilis; ut dominio supra totam naturam donatus esse videretur. Aquæ cujusdam rivi parvo ejus solitario hospitio vicini adeò excreverant, ut multis illuc adventantibus transitum impedirent: Conon ad eorum preces aquarum cursum ad tempus solo verbo suspendit, donec illi iter persequerentur; sed cum inundatio postea augetur & diversa loca pervaderet, Conon iterum præcepit aquis, ut recederent; & illæ paruerunt. Quamvis autem adhuc regnaret ibi Paganismus, erat tamen in Oriente magnus Christianorum numerus; & Pagani ipsi hominem tantæ virtutis admirati ad eum pro talibus gratiis obtinendis accedere poterant.

II. In hoc vivendi genere ad ætatem valde provectam perseveravit, se ut indignum peccatorem respiciens, & præ humilitate in statu Laici manens, & satis sibi honoris esse reputans Christianæ Religionis spiritum imbuisse; statum Ecclesiasticum venerabatur, sed ad illum ascendere ceu nimis elevatum non audebat. Non destitit tamen filium suum offerre Ecclesiæ, qui ætatem habens duodecim annorum in Lectorem admissus fuit; & successivè omnibus secularibus officiis abdicatis, ad ætatem debitam perveniens ad Diaconatum elevatus fuit. Hunc aliqui appellant Conellum diminutivo nomine, quasi parvum Cononem; Monumenta vetera tamen illius nomen tacent.

III. Cononis & filii singularis virtus absque remuneratione per coronam Martyrii esse non poterat. Domitianus ergo ad persequendum Christianos (ut supra) missus, cum pervenisset Iconium, Cononem cum filio fortè jam detentum ad se adduci jubet. Eum intuitus Domitianus veluti pietate motus super ejus venerabili senectute, ab eo petiit, cur vitam duceret adeò austeram & tristem, eo maximè tempore, quo totus Mundus in gaudiis exultaret (fortè propter Barbaros è Vindeliæ ab Aureliano ejectos anno 274., seu alias victorias tunc reportatas) cui Conon ait: Qui secundum hominem vivunt, hic in gaudiis choræis ludis & pompis sunt: at illi qui vivunt secundum Deum, ita vivere non possunt; oportet enim per multas tribulationes intrare in Regnum Dei: ac proinde potiùs opto cum poenis & Cruce Jesu Christi partem habere, quam deliciis peccati parvo tempore frui. Hanc ergo gratiam à te peto: ne mihi momenta-

neo ac brevi supplicio vitam adimas, sed cruciatibus cruciatus, eosque atrociores, succedere facias, ut sic majus gaudium experiar. Hæc Conon.

IV. Quid ergo dicent hic Ethnici? Invenientne evolutis suis Annalibus, ab aliquo Virorum, quos fortissimos prædicant, similes voces unquam prodiisse? Non certe: quia cruciatus & mortem natura pavet & refugit; contemtum verò cruciatuum & mortis pro Religione tuenda sola Sancti Spiritus efficacia, quam ignorabant, inspirat: & propterea videntes nostros nedum cruciatus non fugere, sed ultrò eis occurrere, stultos eos putabant, ut supra dixi: quos ex Lactantio L. 5. Inst. cap. 13. confutavi. Hoc igitur Divino Spiritu repletus Conon loquebatur: nec solus ipse, sed alii multi ex omni ætate ac sexu: sic Potamiæna Virgo rogavit tortores, ut se paulatim demitterent in lebetem igne ac pice ardentem, ut diutius patientia ejus pro Christi nomine exerceretur: sic Flavianus Martyr celebris Africa longo Martyrio vitam claudere exoptabat, ut ejus dulcedinem gustaret: sic Laurentius è craticula in uno latere assatus petebat, ut assaretur in altero: sic alii.

V. Domitianus itaque generosum hunc loquendi modum admiratus ait Cononi: num ergo paratus es mori? cui Conon, ego, inquit, paratus sum desinere vitam agere cum hominibus, ut in æternum cum Jesu Christo vivam. Cùmque Præfes de diversis super ejus statu & conditione eum interrogasset, quasivit an filios haberet: cui Conon, se unicum habere filium respondit: & hunc, inquit, exopto coram te sistere, ut mecum & ipse Jesum Christum confiteri possit; quare statim eum adduci jussit. Quid autem Domitianus ad eum dixerit, Acta non referunt; hoc certum est, quòd ea quæ Pater tormenta pari alacritate & ipse superavit: nimirum ferreum lectum igne inflammatum, carbones oleo superinfuso accensos, in quorum medio utrumque superimposuit, addito super ventrem vase ebullientis olei pleno. His in tormentis positus Domitiani debilitatem irridebat Conon; asserens, se nihil ab igne pati, ignem non bene accensum, ac sibi à Ministris illudi: quærerent proinde nova supplicia, ut magis Jesu Christi potentiam splendescere faceret.

Tandem cum irâ percitus Domitianus jussisset, eos pedibus suspendi super fumum densum & ad eos suffocandos capacem, Conon quasi irridens dixit: quos invincibiles ad tuos ignes probasti, fumo vincere modò conaris? Tunc amborum manus ligneo malleo concuti ac conteri imperavit; cùm uterque oculis ad Cælum elatis in precibus aliquantisper moratus, præmissio.

supra

supra se ut poterat Sanctæ Crucis signo , vitam gloriosè consummavit . Fertur, eorum mortem terribili è Cœlo voce delapsâ sociatam fuisse , & hâc perterritum Domitianum illicò recessisse: quò Fidelibus ibi existentibus aperta fuit via eorum Corpora elevandi & ea sepeliendi laudando Deum , quòd talem victoriam contra Dæmones Servis suis largitus esset . Passi creduntur anno 275. ineunte , publicatis Aureliani Edictis , & antequam ejus mortis notitia illuc pervenisset . Eorum memoria in Martyrol. Rom. die 29. Maii his verbis celebratur: *Apud Iconiam Isauria Civitatem passio Sanctorum Cononis , & filii ejus annorum duodecim , qui sub Aureliano Imperatore craticula prunis suppositis & oleo superfusus , suspensus in equuleo , atque ignis pœnam constanter passi , malleo ad extremum ligneo manibus eorum contritis , spiritum emiserunt .* Adverto tamen , quòd si ut dixi Cononis filius jam ordinatus fuerat Diaconus , dici debebit , quòd cum passus est , duodecimum annum ætatis duplò ad minus exceperit .

VI. Iconii quoque sub Aureliano passum fuisse S. Charitonem , tradunt Græci in Menologio 28. Septembris ; quem dicunt postea è carcere liberatum Taciti Aureliani successoris mandato plura Monasteria in Palæstina fundasse . Sed Charitonem , qui in Palæstina Monasteria fundavit , posteriorem Aureliano & Tacito fuisse tenentur asserere ; cum , S. Hieronymo teste , primus qui ibi Monasticæ vitæ exemplar præbuit fuerit S. Hilarion , qui post Aureliani tempora vixit . Duos ergo alios iidem Græci Charitones celebrant : unum 3. Septembris vivâ calce consumtum ; & hic fortè sub Aureliano passus est , de quo Martyrol. Rom. eâdem die cum Zenone : alterum 9. Septembris , & hunc fuisse capite truncatum dicunt ; qui fortè ille fuit , qui ut supra dixi cum S. Justino seculo ante gladio cæsus fuit .

Ptolemaide quoque in Palæstina passi ponuntur SS. Paulus & Juliana ejus soror : quos licèt Martyrol. Rom. 17. Augusti dicat sub Valeriano fuisse passos his verbis : *Ptolemaide in Palæstina Sanctorum Martyrum Pauli & Julianæ sororis ejus , qui sub Valeriano passi sunt* : Baronius tamen eos sub Aureliano Martyrio coronatos fuisse colligit ad ann. 275. num. 11. ex eorum Actis . De his agunt & Græci in Menol.



§. VI.

S. Mamas & alii.

I. S. Sanctum Mamantem Cæsareæ in Cappadocia Martyrem celeberrimum reddunt elogia, quibus SS. Gregorius Nazianzenus & Basilius eum ornarunt. Hoc tamen de eo dici potest, quodd si nominis celebritatem spectes, nullus ferè inter Græcos Martyres sit illustrior; si verò gesta investigare volueris vix aliquis eo obscurior reperietur. Ejus antiqua & sincera Acta desiderantur, & solum aliqua ex præfatis duobus Patribus decerpi possunt: nimirum eum fuisse conditione vilem habitantem in agris oves pascendo: additque Nazianzenus cervas ad illum proprio lacte pascendum accurrisse; sic enim Orat. 43. de eo loquitur: *Mamas ille insignis & pastor & Martyr, qui prius quidè cervas mulgebat, ad sanctum Virum novo & inusitato lacte alendum certatim properantes; nunc autem Metropolis Plebem pascit, hodieque multis hominum millibus undecumque accurrentibus ver innovat, tum ob virtutis pulchritudinem varium & pastoribus dignum, tum ob sermones triumphales.* Vocat eum Pastorem Metropolis idest Cæsareæ, ubi ejus corpus quiescebat, & Populorum pietatem alebat gratiis, quas per eum à Deo consequébantur.

S. Basilius autem tom. 1. homil. 26. de Martyre Mamante eum laudat his verbis: *Hic Martyr non accepit aliunde quem habet splendorem, sed ipse per vitæ conversationem gloriæ faculam accendit. A Mamante reliqui, non ab aliis Mamas gloriam habet... Celebremus Virum non alieno sed proprio ornamento decoratum... Ad Martyris memoriam & tota Regio mota est, & ad illius festum diem Urbs universa immutata gestit... Vides honorem constare ex virtute non ex divitiis... Si quisquam igitur pastoris memor est, ne admiretur divitiis. Convenimus enim, non ut divitem laudemus, ne divitem admiratus domum abeas, sed ut paupertatem cum pietate conjunctam extollamus. Pastorem esse nihil habet magnificum, nihil quod sapientiæ & industriæ referat exercitium.*

II. Ex his de S. Mamante nihil aliud colligere possumus, nisi eum agrestem pastorem fuisse, genere & parentibus ignobilem, nihil nec gloriæ nec splendoris ex stirpe sua traxisse, sed unice fuisse propriis meritis non alienis ornatum, & suâ virtute commendabilem non divitiis aut gloriâ vel sapientiâ Mundi: uno verbo, eum fuisse simplicem pastorem non alias habentem divitias quàm alimentum quotidianum, aliud non possidentem præ-

præter baculum & peram , & habitaculum cui cœlum pro tectō erat ; virtute tamen & signis adeò clarum , ut ad ejus solemnitatem ex toto ferè Orbe Populi venerabundi confluerent Cæsaream , & gratiis per eum à Deo obtentis inde lætabundi recederent .

Gratiæ ad ejus sepulcrum accurrentibus concessæ erant , visiones in somno habitæ , aberrantes ad viam reducti , infirmi sanati , mortui suscitati . Ita S. Basilius ibi : *Memores estote Martyris quotquot illo per somnia potiti estis , quotquot in hoc loco constituti adjutorem ipsum ad precandum habuistis , quibuscumque ex nomine advocatus ipsis adsuit operibus , quotquot aberrantes in viam reduxit , quoscumque sanitati restituit , quibuscumque filios jam mortuos ad vitam reductos reddidit , quotquot vitæ terminos prorogavit . Collectis in unum his omnibus ex communi symbolo Martyri encomium construite . Conferte inter vos mutuo quæ quisque novit . . . ista namque demum sunt Martyris eucomia spiritualium Charismatum divitiæ .* Ita S. Basilius .

III. Sicut verò virtutum , quibus tantum coram Deo meritum S. Mamas dum viveret comparavit , Veteres nullam distinctam posteris reliquerunt ; ita de ejus morte loquentes Martyrem quidē dicunt ; sed à quo & quo Martyrii genere fuerit coronatus tacent : solum ex quadam ejus apparitione traditum accepimus , sibi caput amputatum testatum ipsum fuisse ; cujus autem mandato ? Aureliani vel eo imperante anno 274. sententiū communiter Auctores , & quidē Cæsareæ in Cappadocia. His consentit Martyrol. Rom. 27. Augusti his verbis : *Cæsareæ in Cappadocia natalis Sancti Mamantis Martyris , qui à pueritia ad senectutem usque longum Martyrium duxit , & tandem imperante Aureliano sub Alexandro Præside illud feliciter consummavit .*

IV. Græci tamen de eo agunt 2. Septembris his verbis : *Mamas celeberrimus Martyr Aureliano Romanorum Cæsare claruit . Cùm autem orphanus relictus fuisset , parentibus in carcere ob Christianam Fidem extinctis , à quadam Religiosa Senatorii Ordinis Matrona educatus est . Cùm verò ad ætatis maturitatem pervenisset cogereturque ab Idolorum cultoribus sacrificare Idolis , nullā unquam ratione ad id adduci potuit : sed à Divino Angelo in montem deportatus , ibi cervæ lacte alebatur , solusque continuus ad Deum precibus vitam traducebat . Post autem aliquantō cum illius fama longè latère emanaret , iterum comprehensus à Præside Cæsareæ compellitur Idola adorare . Id aversatus ille in ignem conjicitur , atque inde egressus illæsus ad bestias damnatur ; à quibus cùm nullam noxam accepisset , tandem hastili transverberatur , & viscera ejus in terram ob*
gra-

gravissimum vulnus effunduntur : quæ ipse propriis manibus præferens , ex Urbe Cæsarea egreditur , & cum gratiarum actione sanctam beatamque animam suam Deo tradidit , & in eadem Urbe sepultus est. Ita Græci ejus Martyrium describunt . Hæc die celebrari consuevit Constantinopoli etiam tempore Leonis Imperatoris . Alia quoque ejusdem Martyrii solemnitas celebrabatur , nempe Dominica in octava Paschæ : quâ die Orationem prælaudatam habuit Nazianzi in ejus Ecclesia S. Gregorius Nazianzenus ; teste Niceta . Celebrem quoque fuisse hujus Martyris memoriam Romæ colligitur , quia in ejus Basilica homiliam habuit S. Gregorius Papa in die natali ipsius , quæ est 35. in Evangelia .

V. Insigne præ cæteris fuit prodigium , quod seculo quarto accidisse Auctores Græci post Sozomenum commemorant , nempe Gallum & Julianum Imperatoris Constantini ex fratre nepotes Lectores jam ordinatos , in honorem Sancti Mamantis Ecclesiam construere molitos fuisse ; sed eam partem , quam Julianus erigendam susceperat , nunquam stare potuisse . Hoc factum , ut à Viris fide dignis acceperat , refert Sozomenus L. 5. Hist. Eccles. cap. 2. his verbis : *Eo tempore ajunt , illos sepulcrum Mamæ Martyris amplissimâ Basilicâ circumdare studentes , opus inter se partitos esse : dumque alter alterum magnificentiâ & cultu superare contenderet , rem admirabilem prorsusque incredibilem accidisse , nisi multi adhuc nostrâ ætate superessent , qui rem ipsam ab iis quicam viderant , acceperunt : nam pars quidam Operis : quæ Gallo obvenerat attollebatur , & ex animi procedebat sententia ; ex operibus autem Juliani , alia corruiebant , alia ex fundamentis sursum propellebantur , alia ne solum quidam coherere ab initio sustinerentur ; non secus ac si contrariâ quâdam vi deorsum obistente retruderentur . Et omnibus quidam ea res prodigio similis visa est : multi verò quid portenderet ex eventu judicaverunt : nam ipse Julianus cum Imperium adeptus fuit , Christianâ Religione ejuratâ Paganismum amplexus , ob id Julianus Apostata meritò appellatus est . Hanc eandem historiam refert S. Gregorius Nazianzenus Orat. 3. adversus Julianum ; nomen tamen Martyris non exprimit . Porro Templum istud , in cujus erectione prænarratum contigit prodigium , fuisse non Constantinopoli sed Cæsareâ , indicant prælaudata Sozomenis verba dicentis , Gallum & Julianum sepulcrum Mamæ Martyris amplissimâ Basilicâ circumdare studuisse : nemo autem inficiari potest S. Mamantis seu Mamæ sepulcrum Cæsareâ extitisse .*

VI. Præfatis Martyribus sub Aureliano passis addi possunt ex Martyrol. Romano S. Porphyrius , de quo 4. Novembris dicitur :

citur: *Epheſi Sancti Porphyrii Martyris ſub Aureliano Imperatore. Hunc memorant Græci in Menol. Baſil., ejuſque Martyrium deſcribunt die 4. Novembris ſic: Porphyrius Martyr Aureliano Imperatore fuit ex Urbe Epheſo, egregius ſcenicorum ludorum actor, cujus ludicrâ arte delectatus Alexander Caſareenſium Comes ſecum Caſaream illum adduxit. Agebatur fortè feſtus Dæmonum dies ſummâ ludorum celebritate, in quibus & Chriſtianorum ritus per jocum repræſentabantur. Productus igitur Porphyrius, ut ab eo, qui ſcilicet Epiſcopi perſonam indueret, baptizaretur, allatâ aquâ nudus illam ingreditur, falſò interim Epiſcopo Chriſtianorum ritu dicente: In nomine Patris & Filii & Spiritus Sancti baptizatur Porphyrius. Quo ſacſo adſuere Angeli, qui induto ſolâ albâ Porphyrio, cum ſacibus pſallebant dicentes: Quicumque in Chriſto baptizati eſtis Chriſtum induiſtis, Alleluja. Eo miraculo commoti plurimi, in Dominum crediderunt; Comes verò rubore ſuffuſus diſceſſit: & ſequenti die Porphyrium præſento magicæ artis crimine decollari juſſit. Simile contigit in S. Genefio Mimo ſub Diocletiano, de quo Martyrol 25. Auguſti: & in S. Ardalione pariter Mimo ſub Maximiano (de quo Martyrol. 14. Aprilis, & Menol. Baſil. die 17. ejuſdem menſis), qui fingens ſe in ſcena Martyrem pro Chriſto tormentis ſubjectum repente mutatus & converſus verus Martyr effectus fuit: ut verè de iſtis dici poſſit: *Hæc mutatio dextera Excelsi.* Pfalm. 26. v. 11.*

VII. S. Symphorianus, de quo 22. Auguſti legitur: *Au- guſtoduni S. Symphoriani Martyris, qui tempore Aureliani Imperatoris cum Idolis ſacrificare nollet, primò verberibus aſſictus dein- de carceri mancipatus, ad ultimum cæſo capite Martyrium conſum- mavit. Agunt de eodem Beda, Uſuardus, Ado. Extant ejus Acta apud Surium. Gregoriùs Turon. de Gloria Confeſſ. agens de Simulacro Berecinthiæ plura dicit cap. 77. & hiſt. L. 2. cap. 15. Alios omitto; nam hætenùs recenſiti ſufficiunt, imò abundant ad probandam Chriſtianæ Religionis Veritatem ex conſtantia & victoria Martyrum regnante Aureliano, & ad detegendum Doduvelli mendacium dicentis, ſub hoc Principe nullum Martyrem extiſſe.*

§. VII.

De Probo Imperatore & Martyribus ſub ipſo.

I. **A**ureliano ut dixi occiſo, ſex menſibus vacavit Imperium: cum enim Milites nullum ex iis, qui in nece Aureliani partem habuerant, Imperatorem vellent; quavis multi ex iis

id ambirent, electio ad Senatum delata est. Senatus autem probe sciens, Milites libenter non accepturos, quem Senatus elegisset, electionem remisit ad eos. Militibus tamen constanter re-nucentibus, factum est, ut ultrò citròque electio remitteretur. Senatus tandem 25. Septembris ejusdem anni 275. Tacitum Imperatorem declaravit, qui tamen Tyane mortuus mense Aprilis anni 276. solis sex mensibus imperavit. Mortuo Tacito Florianus ejus frater propriâ auctoritate Imperium occupavit, quod tamen solis duobus mensibus tenuit, à Militibus enim Tarsi necatus fuit. Interea fama tulit, Milites in Oriente Imperatorem salutasse illum, quem Senatus vota & Populi acclamaciones postulabant, nimirum Marcum Aurelium Valerium Probum Sirmii in Pannonia natum Maximi Tribuni Plebis filium, & rebus præclare gestis maximè pluribus victoriis contra Barbaros reportatis insignem. Is tamen solis sex annis imperavit: nam anno 282. à Militibus propè Sirmium interfectus fuit.

II. Sub hisce tribus Imperatoribus, maximè sub Probo & Successoribus usque ad Diocletianum nulla in Christianos excitata fuit Persecutio. Quòd si aliqui Martyres sub his Principibus leguntur in Martyrologiis & alibi, hoc non fuisse speciali eorundem Edicto, sed potius vi Edictorum præcedentium Imperatorum & Legum Imperialium, vel privato Præsidium in Christianos odio, credendum est. Ita exponi debet S. Leo supra relatus, dum ait Serm. 2. in Festo Pentec., quòd *Probo Imperatore Persecutio ebulliret*: nisi fortè loco *ebulliret*, legatur *ebullisset*, ut ibi notavi. Ita quoque exponendus est auctor Chronici Paschalis, dum Cari Persecutionem commemorat, *in qua multi Martyrio vitam finierunt*: tanto enim odio Christianos Pagani prosequabantur, ut quâcumque arreptâ occasione eos tanquam Imperii hostes & Deorum eversores ad Tribunalia traducerent; Magistratus autem ac Præsides hoc titulo eos ad supplicia & mortem damnarent.

III. Hâc ratione Martyrol. Romanum & Menol. Græcorum die 19. Septembris sub Probo ponunt passionem SS. Trophimi, Sabbatii, & Dorymedontis. Horum hæc est historia. Trophimus & Sabbatius comprehensi fuere Antiochiæ Pisdix, eò quòd Trophimus Paganorum cultus tanquam stultitias contempsisset, ac statim delatus fuit ad Heliodorum Vicarium, seu si mavis, Magistratus Principem (nam Vicarii nomen solum sub Diocletiano usurpari cœpisse testatur Lactantius de Mort. Persecutorum cap. 7.) : quia verò Magistratus Urbium poterant quidem reos quæstioni subicere, non tamen morti addicere; Heliodorus Tro-

Trophimum & Sabbatium quæstioni eos torquendo exposuit . Cùm verò Sabbatius inter tormenta ploraret , Judex ejus lacrymis insultare non destitit . Cui Sanctus Martyr respondit : „ Ego „ sentio quidè , fateor , dolorum violentiam , adèd ut lacry- „ mas continere non possim : sed magis quoque amo hæc omnia „ pati , quàm Domino meo Jesu Christo renuntiare . Disce ergo „ ex meis lacrymis quanti illum existimem , quantà amoris „ abundantia illum diligam , dum dolores magis sensibiles ce- „ dunt amorì „ . Inde vi tormenti corporis vires superante , Sab- batius spiritum emisit .

IV. Mortuo igitur in tormentis Sabbatio , Heliodorus ad Dionysium Perennium tunc Phrygiæ Gubernatorem Trophimum misit . Erat Perennius tunc Synnade tridui itinere Antiochiâ distante . Illuc ergo Trophimus transmissus fuit constrictos habens pedes ferreo compede ferreis unguis armato , ut Græci in Menologio asserunt : Perennius autem post diversa tormenta eum in carcerem detrusit .

Contigit autem , ut in carcere reclusum Trophimum Dorymedon Urbis Senator adiret , sive cùm jam Christianus esset ut ei subveniret , ut Acta apertè dicunt ; sive , ut alii putant , cùm pietate humanâ motus eum visitasset , ab ipso ad Fidem tunc conversus fuit . Ut ut res fuerit , Dorymedon post ejusmodi præstita caritatis officia , & ipse comprehensus eadem cum ipso tormenta pertulit , ut effossis oculis ambo bestiis expositi fuerint , sed cùm ab istis nullum nocumentum paterentur , gladio tandem ambo capite percussi vitam gloriôsè pro Christo dederunt . Quod Martyrol. Rom. 19. Septembris ita describit : *Eâdem die Sanctorum Martyrum Trophimi , Sabbatii , & Dorymedonis sub Probo Imperatore , quorum Sabbatius Antiochiæ jussu Attici (non Heliodori) Præsidis tamdiu flagris cæsus est , donec emitteret spiritum : Trophimus verò Synnadam ad Perennium Præsidem missus , post multos cruciatus cum Dorymedonte Senatore capitis decollatione Martyrium consummavit .*



CAPUT XIII.

Persecutio Diocletiani & Maximiani .

§. I.

Horum Imperii Initia .

I. **A**ttigimus tandem Diocletiani & Maximiani tempora ; infausta quidē , si tot justorum neces & barbara tormenta , quibus impiē ad mortem usque cruciabantur ; faustissima tamen , si spectemus admirabilem constantiam , quā pro Religione Christianā tormenta superantes invictum pro Veritate Christianæ Religionis argumentum reliquerunt . Et quidē tot Ecclesiæ Martyres hæc tempora Ecclesiæ pepererunt , ut licet antea nullus coronatus fuisset , ex horum tamen ingenti ac propē infinita multitudine , Ecclesia contra Paganos se triumphasse jure merito sibi gratulari posset . Unde Sulpitius Severus L. 2. hist. num. 47. ait : *Nullis unquam magis bellis Mundus exbau-
sus est : neque majore unquam triumpho vicimus , qui cum decem an-
norum stragibus vinci non potuimus* : ubi loquitur de Generali Persecutione , quæ ab anno 303. decem ultimis horum Imperatorum annis toto Orbe grassata est , ut dicemus .

II. Occiso ut supra dixi Probo anno 282. , Milites in ejus locum elevarunt Marcum Aurelium Carum Præfectum Prætorii , qui Carinum & Numerianum filios Cæsares creavit . Carus patriā Narbonensis erat , vix tamen duobus annis Imperium rexit ; cum in bello contra Persas interemptus fuit . In Imperio duo ejus filii continuaverunt Numerianus scilicet in Oriente , Carinus in Occidente . Numerianus paternæ mortis mœrore in morbum incidit , sed post aliquot menses in suo loco occisus fuit , mandante Apro Imperium ambiente . Infirmitatis specie . ejus mors aliquandiū celata mansit , sed fœtore corporis tandem manifesta , Exercitus declaravit Imperatorem Cajum Aurelium Valerium Dioclem , qui nomen postea Diocletiani & Jovis cognomen assumpsit . Die 27. Septembris anni 284. imperare cœpit . Natione Dalmata ac vilis conditionis fuit . Cum ergo interea in Occidente adhuc imperaret Carinus , ut ei adversarium opponeret , Diocletianus Cæsarem declaravit Marcum Valerium Maximianum Sirmii in Pannonia natum , qui assumpto cognomine Herculis regnare cœpit 20. Novembris ejusdem anni 284. Hi duo

duo non magis Imperio , quàm feritate & crudelitate conjuncti , viginti annorum spatio , quibus regnarunt , totum Orbem præcipuè Christianum tragicis eventibus funestavit , seu verius tot insignium Martyrum triumphis illustravit . Horum aliquos in sequentibus ad majorem Dei , Christi , & Ecclesiæ suæ gloriam proponemus : omnes enim simul colligere foret opus in immensum augere .

III. Primum Imperii annum in debellandis domesticis hostibus Diocletianus infumfit . Carinus infamibus suis moribus & arrogantia Senatus & Exercitus odium in se concitaverat . Galliæ rebellaverant , & quidam dicti Bagaudi Eliano & Aman-do ducibus factionem excitarunt . Julianus in Illyrio ambiebat . Contra istum castra movit Carinus eumque occidit : at dum paulò post victoriam adeptus adversus Diocletianum eam prosequitur , à suis necatur anno 285. . Anno autem sequenti 286. prima Aprilis Diocletianus titulo Augusti ornavit Maximianum Nicomediæ ; unde pari auctoritate viginti annis imperavit : Deo regnum præter solitum adeò diuturnum eis concedente , ut eorum crudelitate Christianorum patientia diutius exerceretur , & magis appareret gloria Christi , qui è suorum mortibus Ecclesiæ mirabili propagatione dilatavit .

IV. Primis tamen Imperii temporibus favorabiles Christianis , vel saltem eis non intensi apparuerunt ; nulla enim adversus eos Edicta promulgarunt , nec tunc Christiani maximè iis in locis , quæ sub speciali Diocletiani cura erant , inquirebantur , ut ex Eusebii hist. L.8. cap.1. . Non defuere tamen etiam iis temporibus variis in locis Martyria , & quidè plura , ut statim referam : sed hæc contingere , aut veterum legum auctoritate , aut ex Præsidum genio , aut aliâ quâvis occasione absque specialibus Imperatorum Edictis .

§. II.

SS. Claudius Asterius , Neon &c. & Genesius Martyres .

I. **P**rimi , qui initio Imperii Diocletiani , nempe anno Christi 285. 10. Kalend. Septembris , Diocletiano & Aristobulo Consulibus , vitam pro Christo dedere , fuere Claudius , Asterius , & Neon fratres , & duæ mulieres Domnina , & Theonilla . Hi delati sunt à noverca eorum bonis inhiantem , Claudius nempe Asterius & Neon fratres , quòd essent Christiani & Deos injuriâ afficerent ; atque etiam Domnina & Theonilla ejusdem criminis

reæ

rea sunt constituta; omnesque mandato Judicis victi in carcerem trahi sunt. Ægea in Cilicia, donec Lysias Proconsul illuc perveniret. Cum ergo Provinciam visitans Ægeam advenisset, sedens pro Tribunali dixit, ut ante se traherentur Christiani à Curia officialibus detenti, qui ab Eulalio Commentariensis (idest, cujus erat reorum nomina Commentariis inscribere) illic ducti sunt. Dixitque Eulalius Lysiae: Hi sunt, Domine, quos hujus Civitatis Curiales potuerunt Christianos tibi offerre, tres pueros fratres, & duas mulieres cum infantulo.

II. Ex his primò præsentatus fuit Claudius, qui fortè alios ætate præbat. Interrogatus à Lysia de nomine, se Claudium appellari respondit. Et rursus quæsitus, cur suam juventutem perdere vellet ob suam stultitiam? Accederet & Diis sacrificaret juxta Imperatorum mandatum, ut sic effugeret tormenta, quæ illi jam parata erant: respondit: Deus meus talia Sacrificia non vult, sed eleemosynas & conversationes justas. Dii enim vestri Dæmones immundi sunt: idè hujusmodi Sacrificiis delectantur perdentes animas in æternum; & hos vis ut ego colam? Tunc Lysias aptari eum ad virgas præcepit dicens: alio genere infamiam non vincam. Sed Claudio respondente: etsi graviora tormenta adhibeas, in nullo me lædis, animæ verò tuæ provides æterna tormenta: Lysias comminatus iterum poenas Imperatorum mandato, & simul munera & honores pollicitus, si obediret, videns se nihil proficere, in equuleo eum suspendi jussit, & flammam pedibus ejus adhiberi & de calcaneis partes abscindi: rursus ungulis eum vexari, testam asperrimam lateribus ei incumbi & candelas ardentes ei applicari. Sed in omnibus intrepidus Claudius cum dixisset: mihi ignis & tormenta tua salvam facient animam, quoniam quæ patior propter Deum mihi lucrum magnum, & pro Christo mori divitiæ sunt. Quare iratus Lysias eum ex equuleo deponi & in custodiam dari præcepit.

III. Asterius alter frater secundo loco sistitur; cui Lysias vel tu, inquit, sacrificia Diis, vel tormenta tibi parata ante oculos habe. Cumque Asterius respondisset, se adorare Deum unum, qui est venturus solus in Cælo habitans & humilia respiciens, & ut hunc coleret ac diligeret se fuisse à parentibus edoctum: illos autem, quos Lysias colit, se Deos esse nescire, sed esse ad inventionem perditionis, non veritatem. Lysias eum in equuleo suspendi jussit, & latera ejus torqueri. Inter hæc Asterius dixit: „ Ego sum frater illius, qui paulò ante interrogationibus „ tuis respondit: mihi & illi unus est animus, una confessio. „ Age quæ potes: meum corpus in potestate habes, animam „ non

„ non habes „ . Quibus iratus Lysias jussit carbones pedibus ejus subterni ac dorsum ventremque virgis ac durissimis nervis contundi . Sed Asterius cum infracto animo peteret , ut nullam sui corporis partem sine plaga dimitteret , ut cum cæteris custodiretur dimissus fuit .

IV. Inde Neon frater tertius adducitur , qui à Lysia quaesitus , ut Diis sacrificaret , & sic tormenta evaderet , respondit : „ Dii „ tui , si quid virtutis habent , defendant se ipsos ab his , qui eos „ negant , & tuam defensionem non requirant . Si verò malitiæ „ eorum es socius , multò melior sum Diis tuis & te , quia vobis „ non obaudio habens Deum verum , qui fecit Cælum & terram „ . Cumque Lysias præciperet , ut frangerent cervicem ejus , quia Deos blasphemasset ; Neon dixit „ Blasphemus tibi „ esse videor dicens veritatem „ . Tunc pedibus eum extendi fecit , carbones ei superponi & nervis dorsum contundi . Sed videns , eum ut cæteros immobilem in sententia persistere , tandem pronuntiavit , ut tres fratres foràs extra Civitatem ducerentur , ac ibi Cruci affixi relinquerentur , ut aves eorum corpora lacerarent . Quod impletum fuit .

V. Deinde ei oblata Domnina , eique comminatis tormentis ut Diis sacrificaret , animo plus quàm virili Lysia dixit : „ Ne in „ ignem æternum incidam & tormenta perpetua , Deum colo „ & Christum ejus , qui fecit Cælum & terram & universa quæ „ in eis sunt , nam Dii vestri lapidei sunt & lignei facti hominum „ manibus „ . Hæc ferre non valens Lysias jussit eam depositis vestibus nudam extendi & omnia membra ejus virgis concidi . Quo in cruciatu cum spiritum emisisset , corpus ejus dejici in profundum fluminis imperavit .

VI. Supererat Theonilla . Hæc natalibus ingenua & à 23. annis vidua , olim Paganismo fuerat irretita , sed postea soluta & à Viro & ab errore vigintitres suæ viduitatis annos Deo sacraverat in jejuniis vigiliis & precibus . Adstans igitur hæc coram Lysia tantum abuit , ut aliorum tormentis territa esset , quin potius responderit , se non timere ignem ac tormenta , quæ solum corpus possunt occidere , sed timere ea , quæ animam & corpus possunt in æternum perdere , & quæ parata sunt illis , qui dereliquerunt Deum & adoraverunt Idola & Dæmones . Quare Lysias alapis tundi faciem ejus jussit , eam projici in terram & ligatis pedibus fortiter torqueri . Cumque illa conquereretur , Feminam ingenuam ita indignè tractari , Deum tamen videre quod agitur ; Lysias capillis suspendi , in faciem cædi & toto corpore verberari præcepit . Cum verò se vestibus deundari aspe-

aspexit pudore suffusa : „ Non sufficit , inquit , quòd me nudam „ statuisti ? Non autem me solam , sed & matrem tuam confusione induisti per me . Omnes enim Mulieres unius naturæ „ sumus „ . His tamen nihil motus Lysias caput illi novaculâ acutâ radi ac spineâ coronâ cingi , corpus ejus per quatuor extendi palos , loro non solum dorsum sed totum corpus concidi , demum carbones etiam ventri supermitti , ut sic moreretur , imperavit . Cùm verò jam mortuam audisset , corpus in sacco ligari & in mare projici mandavit . Quod factum fuit .

VII. Ita uterque sexus , immanibus pari constantiâ tormentis superatis ; illustre pro Christiana Religione testimonium dedit anno 285. : quod celebrat Martyrol. Rom. die 23. Augusti his verbis : *Ægea in Cilicia Sanctorum Martyrum Claudii , Asterii , & Neonis fratrum , qui Christianæ Religionis à noverca accusati , sub Diocletiano Imperatore & Lysia Præsidente post acerba tormenta Cruci affixi victores cum Christo triumpharunt . Passæ sunt post eos Domina & Theonilla .*

VIII. Hoc eodem anno 285. probabilius creditur Romæ contigisse mirabilis Genesii ex Mimo in Christianum & Martyrem conversio ; in qua admirari debemus incomprehensibilia judicia Dei ; qui sicut alios multos post præclaras confessiones & immania superata tormenta , in ipso penè mortis articulo desicere ac miserè perire permisit : ita istum nostræ Religionis Sacramenta iridentem tali gratiâ donavit , ut Baptismo quem irridebat repente suscepto , non solum graviora tormenta sed mortem ipsam pro Christi nominis confessione illicò superarit .

Genesius ergo Religione Paganus , & Christianis adèò infensus erat , ut ne nomen quidè audire vellet , Gesticulatoris seu Mimi ludicram artem publicè profitebatur . Quâdam ergo die ut rem gratam Diocletiano faceret , quem sciebat Christianos odio habere , ludum de mysteriis Christianæ Religionis ipsi Imperatori præsentì exhibere cogitavit . Re itaque cum sociis dispositâ , consensu theatro fingens graviter decumbentem in lecto ibi parato se prostravit & clamare cœpit modo tamen ridiculo se baptizatum mori velle : sociis autem respondentibus , cur hoc vellet , post multa de Baptismo irrisoria mutuo prolata , evocatur ex condicò fictus Presbyter & Exorcista ; qui cùm juxta lectum ipsius resedissent , dixerunt : Quid ad nos misisti filiule ? Tum (oh mira Divinæ Gratæ vis !) Genesius subitò mutatus , jam non simulatè ac fictè , sed ex puro corde respondit : „ quia „ accipere cupio gratiam Christi , per quam renatus liberor „ à ruina iniquitatum mearum „ . Tunc qui ad jocum venerant

omnia Baptismi mysteria & caeremonias seriò compleverunt , præmissis nempe solitis interrogationibus Genesius sincero corde respondens aquâ salutari lotus fuit .

IX. His peractis indutus vestibus albis, ad ludum continuandum à Militibus rapitur , & ad similitudinem Martyrum Imperatori exhibetur de Christi nomine ab eo interrogandus : coram quo positus contra omnium expectationem ex editiori loco sequentia ex Actis desumpta Genesius affatus est: „ Audi Imperator „ & omnis Exercitus , Sapientes & Populi hujus Urbis . Ego „ quotiescumque Christianum vel nominatum audiui, exhorruis „ & in confessione permanentibus insultavi. Ego etiam parentes „ meos & affines causâ nominis Christiani execratus sum, & in „ tanta derisione habui Christianos , ut mysteria eorum diligent- „ ti examinatione perquirerem , ut ex eorum sanctificatione ludum vobis exhibere vellem . At ubi me aqua nudum tetigit , „ & interrogatus credere me respondi , vidi super me manum „ cœlitus venientem & Angelos radiantes super me stetisse , „ qui omnia peccata quæ ab infantia feci recitaverunt de libro, „ quæ mox in aqua laverunt ; in qua in conspectu vestro perfusus, „ & mihi candidiorem nive postmodum ostenderunt . Nunc „ igitur, inclyte Imperator & vos omnes Populi, qui de his „ mysteriis risistis, mecum credite verum Dominum esse Christum, hunc esse lumen hunc esse veritatem hunc esse pietatem, „ & per ipsum vos ad indulgentiam posse pervenire .

X. Hæc Genesius omnibus stupore suspensis . Sed Diocletianus tum odio , quo ardebat contra Christianos, tum adeò apertâ & publicâ Christi coram se & toto Populo factâ confessione vehementi indignatione percitus , statim Genesium fustibus crudelissimè cæsum Plautiano Præfecto tradidit , ut eum ad Sacrificia compelleret : à quo in equuleo suspensus & unguarum diutissimâ laceratione vexatus , lampadibus etiam inflammatus cum in Fide constans diceret : „ Non est Rex præter eum quem vidi , & „ adoro & colo eum ; & pro ejus cultura si millies occidar , „ ipsius ero ut cœpi . Christum mihi de ore , Christum mihi de „ corde auferre tormenta non poterunt ; valdè enim poeniteo „ me errasse , quòd ante Nomen sanctum in hominibus sanctis „ exhorruì , & satis tardiùs ad adorandum verum Regem superbus Miles accessi „ . Tum Plautianus hæc audiens , iussit eum illicò decollari . Et decollatus est Beatus Martyr Genesius 8. Kalend. Septembris . Quâ die ejus memoria in Martyrol. Rom. colitur, nimirum 25. Augusti .

XI. S. Genesii passionem ad ann.303. protrahit Cardinalis

Baronius cum aliis, quo anno indicta fuit generalis atrocissima Persecutio, maximè quia Acta appellant Diocletianum *sævissimum Tyrannum, cui Christiani exosierant*. Sed obstare videtur, quia eo anno Diocletianus Nicomediæ cum Maximiano erat, non Romæ: quòd si eodem anno Romam venit fortè ut vicesimum sui Imperii annum triumphali more celebraret, hoc non potuit esse nisi 17. vel 20. Novembris; passio autem S. Genesii jam 25. Augusti secuta fuerat. Verisimilius ergo censent Ruinart Tilmontius & alii, S. Genesium passum fuisse anno 285. cum Diocletianus Carino devicto Romam venit, ut Imperii possessionem caperet. Quòd si in Actis sævissimus Tyrannus nuncupatur, hoc vel exscriptoris additamentum fuit, vel qui estò in Christianos Edicta nondum protulisset, eos tamen tanto odio prosequabatur, ut datâ occasione in eos desaviret, quod in S. Genesio manifestavit. Quocumque tamen tempore contigerit, cum reverà contigerit, S. Genesii mirabilis conversio & passio, maximum præbet pro Christiana veritate argumentum.

XII. Porro idem quod Romæ Genesio, Heliopoli Gelasio seu Gelasio contigit, ut refertur in Chronico Paschali ad ann. 13. Diocletiani. Is quippè alter Mimus Christianorum Baptismo illudens, ab aliis Mimis in balneum, ut Christianorum caeremonias imitarentur, immisus & albâ veste indutus, repentè ita mutatus est, ut se Christianum inclamans, è theatro ejectus & à Populo lapidibus obrutus mortem fortiter pertulerit: *Cujus corpus, inquit Chronici concinnator, in vicum Marianum dictum, unde erat oriundus, extra Heliopolim propinqui detulerunt, ibique ei Oratorium construxerunt*. Hujus Martyris memoriam celebrant Græci die 27. Februarii, & Bollandus eâdem die.

XIII. Aliud quid simile sub Juliano Apostata accidit in Sancto Porphyrio, quem 15. Septembris Græci colunt: qui etiam 14. Aprilis de S. Ardalone dicunt, quòd Maximiani temporibus illudere volens constantiæ Christianorum in Martyrio, in equuleo se extendi fecit, ac si Diis sacrificare recusasset. Sed repentè in tale deliquium incidit, ut quasi mortuus appareret: quod Pagani simulatè factum putantes, ei acclamabant quasi Personam quam gerebat arte perfectâ repræsentaret. At ille ad se rediens, facto silentio, rem ut contigerat narravit, & se Christianum professus est. Cumque in Christi confessione persisteret, Martyr effectus est. De quo Martyrol. Rom. 14. Aprilis hæc habet: *S. Ardalionis Mimi, qui cum Sacris Christianorum in theatro illuderet, de repente mutatus, ea non solum verbis sed & testimonio sui sanguinis comprobavit*. „ Consueverant Gentiles in de-

„ risum Christianæ Religionis Personas in theatrum introduce-
 „ re quæ Sacra Christianorum repræsentarent: sed Deus, qui illu-
 „ sores irridet, jocos in rem seriam, fabulam in historiam, &
 „ Mimum convertebat in Martyrem „. Ita Baronius in Notis
 ibi, de his superius cap. 12. §. 6. num. 6. Ut omnis æquivocatio-
 nis tollatur occasio, distinguendus est à nostro Genesio Mimo al-
 ter Genesius pariter Martyr fortè sub iisdem Imperatoribus an-
 no 303. Arelate passus eâdem die 25. Augusti, ut in Martyrol.
 Rom., de quo inferius cap. 15. §. 2.

§. III.

SS. Mauritius & Socii.

I. S. Sanctus Mauritius primarius Dux erat Legionis Romanæ
 Thebææ seu Thebæorum nuncupatæ, fortè quia ex The-
 baide initia habuerat. Hanc Gregorius Turonensis de Glor.
 Martyr. cap. 75. vocat etiam Legionem felicem, hoc illi ex ali-
 quo felici eventu cognomine tributo; Fortunatus quoque L. 8.
 cap. 4. eam felicem vocat: ita tamen ut eam felicem nominet ex
 felicitate moriendi pro Christo. Apud Romanos Legio referente
 Vegetio L. 2. cap. 2. sex mille & ultra peditibus & septingentis
 equitibus constare solebat. S. Eucherius tamen 6600. militibus
 eam compositam tunc fuisse asserit: ideoque totidem socios in
 Martyrio S. Mauritio assignat. Res ergo ut S. Eucherius Lugdu-
 nensis Episcopus refert, ita evenit.

II. Diocletianus, qui anno 284. electus fuerat Imperator,
 propter tumultus ab Arnando & Eliano in Galliis excitatos,
 ubi rusticæ Gentes sub nomine Bagaudorum rebellaverant, ad
 eos comprimendos anno 286. æquum duxit Maximianum Her-
 culium collegam in Imperio assumere. Ad augendas itaque co-
 pias, quas Maximianus ad istud bellum secum adduceret, Le-
 gionem de qua loquimur ab Oriente accersit, quam Maximiano
 in auxilium tradidit. Qui in ea militabant unà cum Mauritio du-
 ce omnes Christiani erant, & dum Româ transirent, à Cajo tunc
 Papa animati fuisse feruntur ad constanter perseverandum in Fi-
 de, quam Christo promiserant. Hi ergo virtute nobiles sed no-
 biliores Fide, erga Imperatorem fortitudine, erga Christum
 devotione certare, & Evangelici præcepti etiam sub armis non
 immemores, reddere quæ Dei erant Deo, & quæ Cæsaris Cæsari
 restituere decreverunt.

III. Quapropter cum se sicut cæteros Militum, etiam ad di-

laniandam Christianorum multitudinem destinatos vidissent, soli ipsi crudelitatis hoc ministerium detestare ausi sunt, atque ejusmodi præceptis se obtemperaturos negarunt, Maximianus non longè aberat, nam se circa Orthodoxorum (oppidum Valesiæ in Helvetiis propè Sedunum & Agaunum, modò Martigni) itinere festus tenebat: ubi cùm per nuntios accepisset, Legionem hanc adversus mandata Regia rebellem in Agaunensibus angustiis substituisse, uti impietatem suam ad extinguendum Christianum nomen totam armaverat, furore accensus decimum quæque ex eadem Legione gladio feriri jubet, quò facilius cæteri Regiis præceptis metu territi cederent: ac reintegratis mandatis edicit, ut reliqui ad Christianos persequendos cogantur. Ubi verò ad Thebaeos denuntiatio iterata pervenit, vociferati omnes sunt & protestati, se sacrilegium adeò immane non patratos, se Christianos esse, Idola detestari, & paratos esse omnia pati magis, quàm contra suam Fidem quidquam operari. Hujus nuntio perlato, Maximianus majori rabie accensus, eos iterum decimari, nimiràm ex decem unum quem fors obtulerit occidi imperavit, quod secundò factum est, nemine Sanctorum Militum, quamvis gladios manibus tenentium, obstitentes: imò quolibet, ut fors pro Christo præmoriendi contingeret, exoptante.

IV. Tantam alacritatem in omnibus maximè inspirarunt Mauritius Exuperius & Candidus, dum sociorum qui jam præcesserant exemplo cæteros, ut eos ad Cælum sequerentur, adhortari non cessabant. Unde his primoribus suis atque auctoribus animati Maximiano insaniâ adhuc æstuanti mandata mittunt, sicut pia ita & fortia, quæ ut refert Eucherius in hunc modum fuere.

Milites sumus, Imperator, tui: sed tamen servi, quod liberè confitemur, Dei: tibi militiam debemus, illi innocentiam: à te stipendium laboris accepimus, ab illo vitæ exordium sumimus. Sequi te Imperatorem in hoc nequaquam possumus, ut autorem negemus Deum, utique autorem nostrum, Dominum autorem velis nolis & tuum. Si non ad tam funesta compellimur, ut hunc offendamus: tibi ut secimus hactenus, adhuc parebimus: sin aliter, illi parebimus potius quàm tibi. Offerimus nostras in quemlibet hostem manus, quas sanguine innocentium eruantare nefas ducimus. Dexteræ istæ pugnare adversus impios atque inimicos sciunt, laniare pios & cives nesciunt. Meminimus, nos pro civibus potius quàm adversus cives arma sumsisse. Pugnâvimus semper pro justitia, pro pietate, pro innocentium salute: hæc fuerunt hactenus nobis prælia periculorum. Pugnâvimus pro Fide, quam quo pacto conservabimus tibi, si hanc

Deo

Deo nostro non exhibemus? Juravimus primum in Sacramenta Divina, juravimus deinde in sacramenta Regia: nihil nobis de secundis credas necesse est, si prima perumpimus. Christianos ad pœnam per nos requiri jubes; jam tibi ex hoc alii requirendi non sunt: habes hic nos confitentes Deum Patrem auctorem omnium & Filium ejus Jesum Christum & Spiritum Sanctum Deum credentes. Vidimus laborum periculorumque nostrorum socios, nobis quoque eorum sanguine aspersis, trucidari ferro: & tamen sanctissimorum Commilitonum mortes & fratrum funera non flevimus, non doluimus, sed potius laudavimus & gaudio prosecuti sumus, quia digni habiti essent passi pro Domino Deo nostro. Et nunc non nos vel hæc ultima vitæ necessitas in rebellionem coegit; non nos adversum te, Imperator, armavit ipsa saltem, quæ fortissima est in periculis, desperatio. Tenemus ecce arma & non resistimus: quia mori quam occidere satis malumus & innocentes interire, quam noxii vivere peroptamus. Si quid in nos ultra statueris si quid adhuc jussis si quid admoveris, ignes tormenta ferrum subire parati sumus. Christianos nos fatemur, persequi Christianos non possumus.

V. Hæc adeo pia discreta & justa expositio, quæ cujusque rationis compotis animum, si non vincere, movere saltem debuisse, ad Maximianum perlata, in furias eum adegit. Quare desperans gloriosam eorum constantiam posse revocari, unâ sententiâ interfici omnes decrevit: at rem confici circumfusus Militum agminibus jubet. Qui cum missi ad beatissimam Legionem venissent, stringunt in Sanctos impii ferrum, mori non recusantes vitæ amore. Cædebantur itaque passim gladiis, non reclamantes saltem aut repugnantes, sed depositis armis cervices Persecutoribus præbentes, & jugulum Persecutoribus, vel intectum corpus offerentes. Non vel ipsâ suorum multitudine, non armorum munitione elati sunt, ut ferro conarentur asserere justitiæ causam: sed hoc solum reminiscentes, se illum confiteri, qui nec reclamando ad occisionem ductus est, & tamquam agnus non aperuit os suum; ipsi quoque tamquam grex Dominicarum ovium, laniari se tanquam ab irruentibus lupis passi sunt. Operata est terra illic procumbentibus in mortem corporibus piorum, sed apertum est Cælum ad victrices animas excipiendas. Quæ unquam rabies absque bello tantam humanorum corporum stragem dedit? sed quod unquam illustrius pro Christo testimonium Fides obtulit? Quodnam fortius pro Christianæ veritate Religionis argumentum?

VI. Hoc permotus quidam nomine Victor, qui nec Legionis ejusdem fuit, neque miles, sed emeritæ jam militiæ veteranus, cum

cum illuc adveniens, videret ex una parte Martyrum stragem, & ex alia occisores lantos epulantes super eorum spoliis, atque ab his ad convescendum invitatus, auditâ ab exultantibus per ordinem causâ, illicò detestatus convivas & convivium recusabat. Interrogatus autem ab eis, num & ipse forsitan Christianus esset, Christianum se esse & semper futurum esse respondit. Quare statim ab irruentibus interfectus, ceteris Martyribus in eodem loco, sicut morte, ita etiam honore (veluti eorum triumphii appendix) conjunctus est.

VII. Præfatorum Thebææ Legionis sicut certus est triumphus, ita singulorum ignota nobis sunt nomina, sed in libro vitæ descripta. Solos scimus Mauritium, Exuperium, Candidum, atque Victorem, quibus Martyrol. Rom. addit 22. Septembris Innocentium & Vitalem. Et S. Eucherius ex eadem Legione fuisse putat Ursium & Victorem, quos Salodori passos fama confirmat. Solodorum verò (hodie unius Helvetiorum pagi Catholici caput vulgo *le Canton de Soleurre* seu *Solothurn*) Castrum est supra Arulam flumen, neque longè à Rheno positum. Cum enim ex illa Legione aliqui in alias partes fortè missi essent, Maximiani furor omnes delere volens, creditur, ad unum omnes ubicumque essent, jussisse interfici. Ideòque ex Thebæa Legione fuisse creduntur, S. Thyrsus Dux cum aliis, quos Riccius Varus Treviri interfecit cum S. Bonifacio. Item alii Coloniae passi, de quibus Martyrol. Rom. 10. Octobris ait: Coloniae Agrippinæ S. Gereonis Martyris cum aliis trecentis decem & octo, qui in Persecutione Maximiani pro vera pietate gladiis patienter colla subdiderunt. In territorio ejusdem Urbis Sanctorum Victoris & Sociorum Martyrum. Veronæ in Gallia Sanctorum Martyrum Cassii & Florentii: qui tamen, si non omnes de Thebæa Legione erant, certum est, quòd à Maximiano, dum iter haberet per Gallias, pro Christo necati fuerunt.

VIII. At quæ Maximiano poena, & quæ Sanctis Martyribus gloria consecuta sit Eucherius subjicit. *Cum*, inquit Maximianus, *dispositis insidiis genero suo Constantino tunc Regnum tenenti mortem moliretur, deprebenso dolo ejus, apud Massiliam captus, nec multò post strangulatus, terribissimoque hoc supplicio affectus impiam vitam dignâ morte finivit.* Confirmant Eusebius L.8. hist. cap. 13. & L.1. de Vita Constantini cap. 47., Orosius L.7. cap. 28., Lactantius L. de Mort. Persec. num. 29. & 30.: quod anno 311, contigisse probat Pagi ad ann. 307. & 310.

At verò Beatissimorum Agauensium Martyrum corpora post multos passionis annos Sancto Theodoro ejusdem loci Episcopo revela-

ta tradantur ; in quorum honorem cùm extrueretur Basilica , qua vasa adjuncta rapti , non tantùm latere acclinis jacet , quid miraculi tunc apparuerit , nequaquam tacendum putavi . Accidit , ut inter reliquos artifices , qui invitati convenisse ad illud opus videbantur , quidam adesset faber , quem adhuc Gentilem esse constaret . Hic cùm Dominico die , quo ceteri ad expectanda diei illius Festa abscefferant , in fabrica solus substitisset , in illo secreto se subito clarâ luce manifestantibus Sanctis hic idem faber rapitur , atque ad pœnam vel ad supplicium dislenditur : & visibiliter turbam Martyrum cernens , verberatus etiam & increpatus , quòd vel die Dominico Ecclesia solus deesset , vel illud fabricæ opus sanctum suscipere Gentilis auderet . Quod adeò misericorditer à Sanctis factum constitit , ut faber ille consternatus & deterritus , salutare sibi nomen poposcerit , statimque Christianus effectus sit . Ita Eucherius , qui prosequitur .

Neque illud in Sanctorum miraculis prætermittam , quod perinde clarum atque omnibus notum est . Mater familias Quincii egregii atque honorati viri , cùm ita paralyti fuisset obstricta , ut ei etiam pedum usus negaretur , à Viro suo , ut Acaunum per multum itineris spatium deferretur , poposcit , quòd cùm pervenisset Sanctorum Martyrum Basilica famulantium manibus iulata , pedibus ad diversorium rediit ; ac sanitati de præmortuis restituta membris , nunc miraculum suum ipsa circumfert . Hæc duo tantùm mira passioni Sanctorum inferenda credidi . Ceterum satis multa sunt , quæ vel in purgatione Daemonum , vel in reliquis curationibus illic per Sanctus suos Domini virtus operatur . Hactenus Eucherius . Quibus alia addit Gregorius Turonensis L. de Glor. Mart. cap. 76. , Surius tom. 5. & alii .

IX. Cùm præfati Martyres passi sint Acauni seu Agauni , non abs re erit ab eodem Eucherio audire , ubi locus iste situs sit . Acaunus ergo sexaginta fere millibus à Genevensi Urbe abest , quatuordecim verdè millibus à capite Lemanni lacus , quem insluit Rhodanus . Locus ipse inter alpina juga in valle situs est : ad quem pergentibus difficili transitu asperum atque arctum iter panditur . Insestus namque Rhodanus saxosimontis radicibus vix pervium viantribus aggerem relinquit . Eviectis transmissisque angustiarum faucibus , subito nec exiguus inter montium rupes campus aperitur . In hoc Legio sancta sub Diocesi Sedunensi continetur : unde Martyrol. Rom. 22. Septembris dicit Sanctos Martyres fuisse passos *Seduni in Gallia in loco Agauno .*

X. Pro complemento notandum , Græcos etiam 21. Februarii suum celebrare Mauritium cum sociis Apameæ in Syria passum sub Diocletiano & Maximiano , de quo Metaphrastes . Sed hunc

hunc Mauritium & socios diversos esse à nostris certo certius est. Nam illi Apamææ in Syria, nostri Agauni in Gallia passi sunt. Mauritius ille cum septuaginta Militibus Martyrium subiit: noster cum integra Legione. Ille præmissio ad Martyrii palmam filio suo Photino, postquam decem diebus ac noctibus intolerabilia tormenta cum sociis pertulisset, simul cum iisdem inter preces finem vivendi fecit: noster & focii gladio percussi vitam pro Christo dederunt. Quare Baronius, qui antea unum ac eundem esse Mauritium, de quo nos & Græci, existimaverat, in Notis ad 22. Septembris fatetur opinionem præteritam se retractasse.

§. IV.

SS. Donatianus & Rogatianus & Quinſlinus Martyres.

I. **D**Um per Gallias iter ageret Maximianus, ubicumque Christianum sanguinem, dum eos deprehenderet, suæ feritati litabat. Celebres fuere Donatianus & Rogatianus germani fratres, qui Namnetis (vulgò Nantes) in Armoricorum Provincia, hodie Britannia Minori, illustre Martyrium consummarunt. Istorum passionem refert Baronius ad ann. 303., quo Diocletianus & Maximianus generalem publicis Edictis Persecutionem indixerunt: alii tamen ad hæc anteriora tempora præmittunt, quibus etsi non generaliter perquirentur, deprehensi tamen & ad Præsides delati Christiani ultimo supplicio, si Christum constanter tenerent, afficiebantur.

II. Donatianus ergo & Rogatianus genere nobiles erant & fratres, Donatianus quidem natus minor, sed renatus in Baptismo prior, & regenerationis Rogatiani auctor. Ipse enim suscepto jam Baptismate, fratri ut idem faceret institit, qui Donatiani suasionibus & magis gratiâ Dei victus, anxie petere cœpit, ut antequam Persecutionis colluctatio ferveret, Baptismo & ipse muniretur, ne tam felix certamen eum adhuc Paganum inveniret. Sed absentia Episcopi, qui fugâ declinaverat, ne Baptismo ablueretur, impedivit; sed quod de fonte defuit, cruor in Martyrio fusus impendit.

Interea cum Persecutor in Namnetensem Civitatem intrasset, ab uno ex Gentilium turba ei delatum fuit, Donatianum quemdam Diis contemptis nedum Christianum se profiteri, sed & fratrem suum à Diis ad suum Christum abstraxisse. Tunc Præses sine mora Donatianum ad se trahi iussit: qui coram eo libere Christum confessus, in carcerem victus compedibus detrusus fuit.

fuit. Vocatum deinde Rogatianum fratrem blandè monere cœpit, ne confessione unius Dei, plurimorum Deorum iram in sui perniciem incurreret, eique nondum Baptismate infecto faciliorem Deorum indulgentiam, si ad se rediret, & Imperatorum gratiam spondit. Sed cum invenisset eum vanam Deorum potentiam deridentem, & Dei sui, quàm Imperatorum gratiam pluris facientem, iratus Præfès imperavit Ministris, ut & istum detruderent in carcerem, sequenti die illatam Diis ac Principibus ab utroque injuriam vindicaturus.

III. Reclusus in Carcere Rogatianus, sinè Baptismatis gratia se præventum esse contristabatur. Sed Donatianus frater aderat consolans eum, ac pro lavacro fidem ejus accipiendam fore promittens; unde ambo in preces effusi rogabant Jesum, ut apud ipsum promita Rogatiani vota idem obtinerent quod facta; et si sequenti die contingeret gladio interire, sanguinis effusio fieret Rogatiano Baptismi Sacramentum. In hac oratione totâ nocte transactâ crastinus dies illuxit: quo à Præsìde pro Tribunali sedente vocati, Populi spectante multitudine, & iterum interrogati, cum constantes ac omnia contemnentes tormenta reperti fuissent, Præsès jussit eos in equulei catasta suspendi, ut pœnam corpus sentiret, & ut si post expensa adhuc persisterent capite truncarentur: quod impletum est; nam Lictor, ut Judicis crudelitati magis sacrificaret, lanceâ militari prius perfollos gladio vibrante utrique cervices præcidit. Horum gloriosam memoriam celebrant Martyrologia 24. Maii, & Romanum præcipuè sic: *Naunete in Britannia Minori Beatorum Martyrum Donatiani & Rogatiani fratrum, qui sub Diocletiano Imperatore pro constantia Fidei in carcerem missi & in equuleo suspensi ac laniati, deinde lanceâ militari confossi, novissimè capita eorum præcisa sunt.*

IV. Inter Martyres sub Maximiano in Galliis morante cæsus memoratur S. Quintinus. Ejus Acta ferunt, quòd Senatoris filius fuerit, & cum S. Luciano Bellovacensi in Gallias venerit; cum quo Ambianum usque Picardiæ Urbem progressus, ibi substitit Verbi Dei prædicandi causâ. Prædicationem miraculis confirmavit, seque ad Martyrium jejuniis ac precibus præparabat: quod tandem sorte ei contigit Diocletiano & Maximiano imperantibus sub Riccio Varo Præsìde, cujus nomen Christianorum sanguine fuso celebre evasit, ut putatur, anno 287.

V. Riccius ergo Varus antea de S. Quintini fama audierat, & priusquam Ambianum perveniret, ejus mortem quaerit. Illuc ergo appellus, vidensque in Fide progressus, quos viri sancti operâ Deus operabatur, statim eum comprehendit & catenis

nis oneratum in carcerem trudi iussit. Die sequenti eum coram se statuit; sed videns se nec sermone nec promissis nec minis eum flectere posse, crudeliter cædi ac deinde in profundum obscurumque carcerem deici iussit, mandans; ne quiquam Christianorum ad eum confortandum accedere permetteretur. Verùm (ut Acta ferunt) sequenti nocte apparuit ei Angelus, qui eum è carcere educens, ad prædicandum Populo mittit: adeoque efficax fuit animata ejus passionibus prædicatio, ut ferè sexcentos Paganos ad Fidem converterit: imò ipsimet custodes, audito quod venerat, Fidem amplexi publicè coram Riccio Varo eam professi sunt; qui tamen officio eos privasse contentus, totum suum furorem in S. Quintinum convertit.

VI. Hunc itaque coram se adductum postquam falsà suavitatem verborum inutiliter tentavit, extendi usque ad membrorum distractionem iussit, ac ferreis resticulis flagellari; dein supra dorsum ejus oleo pice adipe ardentibus effusis, lampades etiam accensas ei applicari: sed potentior erat Spiritus Sancti flamma, quæ intus ardebat, quàm ignis qui foris urebat. Cum autem exfaturandæ iræ Tyranni hæc satis non essent, ei os calce & aceto repleri & obturari præcepit, ut cui non poterat eripere Fidem, eriperet verbum.

Tandem minatur, se illum Romam ad Imperatores transfuturum: cui Sanctus Martyr respondit, se nihil Romam ire formidare; nam æquè atque hîc, ibi est Deus suus; sperare tamen, se cursum suum in ea Provincia in qua manebat consummatum. Et ita reverà contigit; cum enim Præses quibusdam Militibus mandasset, ut S. Martyrem catenis oneratum præcedere facerent, donec ipse adventaret, pervenerunt ad quandam Urbem (seu ut voluit aliqui Pagum) dictam *Augustam Veromandorum*: quò appulsi à Riccio Varo mandatum acceperunt, ut ibi eum expectarent. Qui cum sequenti die pervenisset, novis artibus ac atrociorum suppliciorum minis constantiam Sancti Viri expugnare conatus est, frustra tamen. Unde & virgis ferreis collum ejus cædi & acutos clavos figi inter ungues & carnem, ac in aliis corporis partibus, ac in ipso etiam cerebro imperavit. (In hoc enim statu repertum ejus corpus fuit, quando è terra primò fuit effossum) sed cum nec in tantis tormentis, quod valde mirum est, interiisset, caput ei amputari præcepit. Quod 31. Octobris impletum fuit.

VII. Porrò S. Martyris corpus, ne à Christianis debito honore sepulturæ traderetur, jubente Præside, ingenti mole plumbi ligatum in Somonam fluvium, ne amplius appareret, noctu pro-

projectum fuit. Ibi quinquaginta quinque annis ignotum prorsus mansit, donec imperantibus Constantio & Constantino ac Constante fratribus, quædam nobilis Matrona Romana Eusebia nomine sed cæca, admonita ab Angelo quoddam illo invento & Populis ostenso visum recuperaret, ad illud perquirendum in loco sibi ab Angelo designato venit: ad quem cum pervenisset & preces fudisset, ecce locus ille agitari cœpit, & illic visum fuit S. Martyris Corpus è fundo ad summum aquarum ascendere & natando ad ripam usque pervenire, in qua stabant qui illud exciperent. Eodem autem tempore visum fuit ejusdem Martyris caput ascendere & super aquas natare, donec suo trunco unitum mansit. Pro certo etiam asseritur, sacrum illud Corpus absque ullo corruptionis signo repertum fuisse, extraordinarie candidum, & suavem spirans odorem. Quid ad hæc & similia? Fabulas non compono, sed Acta eaque sincera ac probata & ab Antiquis accepta refero. Admirare ergo quisquis sis Dei nostri potentiam, qui sicut Servis vires dat ad quæcumque supra naturam superandum, ita post mortem eos inglorios non relinquit, sed miraculis ac portentis eorum etiam victicia corpora illustrat.

VIII. Sed hic portenta non desinunt. Sacrum Corpus Veromanduanam asportare, ibique illud honorifice recondere Eusebia cogitabat: sed cum proximum montem jam ascendissent, illud adeo gravitare cœpit, ut oneri ultra ferendo se impares agnoscences, statim intellexerint, Beatum Martyrem eo in loco requiescere velle. Ibi ergo Eusebia illud sepelivit, ac supra ejus tumulum Oratorium erexit. Quo pietatis opere completo, statim illa visum recepit, & quotquot aderant aliquam aegritudine gravati perfectæ sanitati restituti sunt. Porro Eusebia Romam reversa secum attulit ferreas virgas, quæ Martyrio inservierant. Clavi tamen fixi remanserunt in membris, prout Carnifices illos immiserant. Quare in revelatione ejusdem Corporis S. Elygio Episcopo facta anno 641. clavi membris ejus adhuc infixi reperti sunt. De præfatis videri potest inter alios Gregorius Turon. de Glor. Mart. cap. 73. Hunc Beatum Martyrem die 31. Octobris omnia Martyrologia celebrant: Romanum verò his verbis: *In Gallia apud Augustam Veromanduorum Sancti Quintini Civis Romani Ordinis Senatorii, qui sub Maximiano Imperatore Martyrium passus est: cujus corpus post annos quinquaginta quinque revelante Angelo inventum est incorruptum.*

§. V.

SS. Victorius Fuscianus Gentianus &c. Ruffinus &c. Crispinus & Crispinianus, Macra Virgo, Justus, Piaton, Jonas.

I. **M**aximiano Gallias percurrente Ambiani passi sunt Fuscianus Victorius & Gentianus: ita enim eorum Acta incipiunt: *Eodem tempore quo Maximianus truculentissimus Augustus per arva Gallia præsidebat* &c. Fuscianus ergo & Victorius, dum Rictius Varus anno 286. à Maximiano Præfectus declaratus favam Persecutionem in Christianos exerceret, ad invisendum Sanctum Quinctinum Ambianum venerunt; sed cum non reperissent, iter versùs Parisios susceperunt. Vix Ambiano egressi, à quodam fene cui nomen Gentianus adhuc Pagano, qui tamen Christianus fieri exoptabat, detenti didicerunt S. Quinctinum sex aut septem septimanas ante 31. Octobris Martyrio coronatum fuisse, eosque etiam detinendi mandatum habere: nihilominus ut apud se hospitarentur eos adegit. At Rictius Varus eodem fere tempore superveniens præcipit, ut Fuscianus & Victorius comprehendantur. At Gentianus tunc zelo abreptus evaginat gladium, ac si præsidem interficere vellet: qui causam tantæ temeritatis exquirat; cui ille se Christianum esse respondet, nec aliud optare nisi pro Jesu Christo & Servis suis mori. Votis ejus illicò satisfiit; nam jubente Præfide caput ei amputatur.

II. Varus tunc Fuscianum & Victorium juridicè interrogavit; cumque suam Fidem liberè confiterentur; eos catenis vinculòs Ambianum ad carcerem trahi imperavit; ubi post horribilia tormenta (de quibus statim) capitis absisione eos damnavit: quod 11. Decembris impletum fuisse ferunt Martyrologia, & inter ea Romanum eadem die his verbis: *Ambiani Sanctorum Martyrum Victorici & Fusciani sub eodem Imperatore (Maximiano) in quorum naribus & auribus jussit Rictius Varus Præses immitti variuschar (idest tenuia ferri tela) & clavis ardentibus tempora transfigi, deinde oculis evelli, & postmodum eorum corpora jaculari, sicque unà cum Sancto Gratiano (alias Gentiano) eorum hospite capitibus amputatis migraverint ad Dominum.* Nemo certè in excogitandis pro Servorum Dei torquendâ patientiâ tormentis Rictio Varo subtilior ac truculentior. Quis non horreat? at illi mirabili alacritate pro Christo omnia hæc contemnebant.

III. Ho-

III. Horum Sanctorum Acta ferunt, Rictium Varum priusquam Picardiæ præflet, ingentem Christianorum multitudinem Christo Treviris immolasse; adeo ut Mosâ fluvius, in quem caesorum corpora projiciebantur, sanguine rubicundus flueret. Hujus tamen cruenta carnificina aliud monumentum non habemus, nisi Ecclesiæ Trevirensis tabulas, & Sigebertum in Chronico; ubi ait, anno 1071. Treviris in Ecclesia S. Paulini repertum fuisse ingentem Martyrum numerum, ex quibus tresdecim solum litteris aureis suis nominibus exprimebantur, nimirum Palmatus Consul & Trevirensis Patricius, Thyrsus unus ex Legionis Thebææ Ducibus, Maxentius, Constantius, Crescentius & Justinus ejusdem Urbis Senatores, tres fratres ejusdem dignitatis Leander Alexander & Soter, & alii quatuor, Hormisdas, Papirus, Constans, & Jovianus. Hoc idem in Ecclesia S. Paulini Treviris exhibet quædam inscriptio adhuc extans: quâ habetur, quod Rictius Varus 4. Octobris Trevirim ingressus à Maximiano in mandatis habens exterminandi Legionem Thebæam, cujus aliqui à Trevirensibus Civibus benignè suscepti fuerant, propter hoc etiam Civium ingentem numerum trucidavit: quod non multo post S. Mauritii Martyrium anno 286. contigisse putandum est.

IV. Martyrologia tantæ fragis mentionem faciunt, sed tamquam diversis diebus peractæ; Palmatii enim 5. Octobris in Rom. Martyrol. memoria cum aliquibus Sociis hisce verbis colitur: *Treviris Sanctorum Martyrum Palmatii & Sociorum, qui in Persecutione Diocletiani sub Rictio Varo Præfide Martyrium subierunt. Die 6. Octobris Treviris commemoratio innumerabilium perè Martyrum, qui in Persecutione Diocletiani sub Rictio Varo Præfide vario mortis genere necati sunt. De SS. verò Maxentio Constantio Crescentio & Justino solum 12. Decembris hæc habentur: Treviris Sanctorum Martyrum Maxentii Constantii Justinii & Sociorum, qui in Persecutione Diocletiani sub Rictio Varo Præfide passi sunt.* Ex his colligitur, non unâ sed diversis diebus & mensibus Rictium Varum lanienam hanc consummasse.

V. Sub eodem Rictio Varo immani Christianorum Tyranno Sveffione passi sunt Ruffinus & Valerius. Hos volunt aliqui cum asserito S. Dionysio Parisiensi Româ ad prædicandum Evangelium in Gallias venisse; verius tamen creditur, fuisse simplices Laicos in Galliis morantes in aliquo civili ministerio occupatos, viros tamen fide & pietate singulares. Rictius Varus Christianorum sanguine, quem Rhemis fuderat, adhuc madens dum

dum illac transiret, auditâ eorum pietatis famâ, iussit eos inquiri: qui in quodam antro inventi & ad eum adducti, Christi Fidem intrepidè confitentes, onerati catenis in carcerem detrusi sunt. Sequenti die eos in equuleo suspendi ac plumbatis diu cædi iussit: postea autem iter Sveffionas dirigens, eos secum per tres leucas traxit, & tandem in via decollari iussit 14. Junii, ut in Martyrol. his verbis: *Apud Sveffiones Sanctorum Martyrum Valerii & Ruffini, qui in Persecutione Diocletiani à Præfide Riccio Varo post multa tormenta iussi sunt decollari*. Aliqui tamen, ut Ado & Martyrol. S. Hieronymi volunt, eos in ipsâ Urbe Sveffionensi fuisse capite cæsos. Fertur etiam, quòd cum post eorum Martyrium eorum corpora ad Urbem Rhemensem solemniter deferrentur & pervenissent ad locum, in quo dum viverent morabantur, corpora adeò gravitare cœperunt, ut qui ea portabant putantes SS. Martyres ibi suas exuvias quiescere velle, ubi Deo viventes servierant, eas ibi reliquerint. Sed præter alia, hæc sollemnis translatio Persecutionis tempore verisimilis non est.

VI. Circa hæc tempora sub eodem Riccio Varo passi sunt Sveffione SS. Crispinus & Crispinianus. Hos etiam unâ cum aliis Socios S. Dionysio Parisiensis quidam Recentiores affingunt, & Româ cum eo ad prædicandum in Galliis missos. Sed eos Româ venisse, erant enim nobiles Romani, & in Galliis Evangelii prædicandi munus suscepisse non inficior; at eos socios S. Dionysii, quem supponunt, meliori iudicio statuendum relinquo. Erant ergo & naturâ & gratiâ Crispinus & Crispinianus fratres, & ad Gallias appulsi Sveffione fixerunt sedem, ubi vias omnes pertentabant, quibus Populum illum ad Christum traherent: & hæc occasione etsi genere nobiles futuriæ arti quam didicerant operam dare non erubuerunt exemplo Pauli, qui artem scenofactoriam prædicationis officio conjungebat. Cùmque ea in arte eximii evasisent, nec ab ullo mercedem præsertim pauperibus requirerent, innumeri ad eos confluebant, quos illi occasionem nacti de mysteriis Christianæ Fidei erudiebant, & sic Christo multos lucrabantur.

Maximianus ergo illuc adveniens eos comprehendi iussit, cùmque eorum constantiam frangere inaniter tentasset, Riccio Varo eos tradidit. Hic suam sævitiam de more exercens, ad trochleas iussit extendi, fustibus crudeliter cædi, inter digitorum ungues & carnem fudes præcutas desigi, ex dorsi cute singulas corrigias excindi, appensis ad collum ingentibus molis in flumen sub gelu demergi, deinde in liquefactum ac fervens plum-

plumbum immitti : cùmque hæc Divinâ virtute superassent, gladio caput amputari præcepit, & sic victores ad Cœlos evolarunt anno 287. vel 288.

Eorum festus dies die 25. Octobris in Martyrol. celebratur: ubi additur, eorum corpora fuisse Romam translata, atque in Ecclesia S. Laurentii in Pane & Perna honorificè tumulata. Sed cùm ex Gregorio Turonensi L. 5. hist. cap. 34. Svectione primò sepulta dicantur, & in eorum honorem Ecclesia erecta; non pauci sunt, qui de hac delatione Romam certiora desiderent monumenta. Fertur post Martyrium eos Papæ apparuisse, monentes eum, ut in vineam quam propriis laboribus coluerant, & sanguine suo irrigaverant, novos operarios mitteret: quod ille præstitit mittens in Gallias SS. Sixtum & Sinicium primos Rhemenfes Antistites.

VII. Rhemis sub eodem Rictio Varo passa quoque fuit Sancta Macra Virgo. Quædam de ea feruntur Acta, pulchra quidem sed in aliquibus suspecta. Dicam quod de ea Martyrol. Rom. affert 6. Januarii, nimirum: *In territorio Rhemensi passio Sanctæ Macræ Virginis, quæ in Persecutione Diocletiani jubente Rictio Varo Præsede, cùm in ignem esset præcipitata & permansisset illæsa, dehinc mammillis abscissis & squallore carceris afflictæ, super testas etiam acutissimas ac prunas volutata, orans migravit ad Dominum*, ut putatur, anno 287.

In territorio etiam Beluacensi 18. Octobris refertur passio S. Justini (seu Justiniani) Martyris, qui adhuc puer in Persecutione Diocletiani sub Rictio Varo Præsede casus est. Hunc alii volunt propè Parisios passum in loco dicto Loure: cùm enim Ambianum pergeret cum patre & fratre, nec detegere Persecutoribus voluisset quinam ejus comites essent, capite cæsus fuit.

His adjungendus est S. Piato seu Piaton Presbyter, Tornaci passus, quem ferunt cum S. Quinctino & aliis Româ in Gallias missum, & demum amputato capite migrasse ad Dominum. De hoc Martyrol. Rom. 2. Octobris ait: *Tornaci Sancti Piatonis Presbyteri & Martyris, qui cum Beato Quinctino ejusque Sociis ab Urbe Roma in Galliam prædicationis causâ perrexerit, ac postea in Persecutione Maximiani consummato Martyrio migravit ad Dominum*.

Inter S. Dionysii Socios Martyrol. refert 22. Septembris etiam S. Jonam seu Yonem Presbyterum & Martyrem in Pago Castrensi Parisiensis Diocesis sub Juliano Præsecto: qui cum in ætate admodum provecta Martyrium consummarit, creditur post alios Socios coronatum fuisse. Ferunt (sed sine fundamen-

mento) cum caput suum jam abscissum propriis manibus gestasse.

§. VI.

*SS. Fides Virgo, Caprasius, Vincentius & Victor &c.
Martyres.*

I. **P**Luribus aliis, quos in Galliis hisce temporibus passos Martyrologia referunt, prætermisiss, aliquos subjiciam. S. Fidei Virginis celebre in Gallia nomen est. Agenni in Gallia Aquitaniae Provinciae honesto genere nata, ab infantia in Christiana pietate educata fuit & illibatam virginitatem servavit. Adhuc juvenis vitam Jesu Christo consecrasset per Martyrium dicitur, Daciano Præsidi (antequam in Hispanias mitteretur) eo tempore quo Maximianus in Galliis versaretur, ab anno scilicet 286. ad 292. . Audito Daciani hominis famâ valde trucid Agennum adventu, Christiani sese occultarunt: sed cum ille jussisset Sanctam Virginem Fidem præ cæteris comprehendi, illa sponte se præsentavit, orans Deum, ut sibi, quid Præsidi respondendum esset, inspiraret. Dacianus autem eam sive promissis sive minis inflexibilem inveniens, in ferrea crate extendi ac subitus violentum ignem accendi imperavit: quæ cum illa invictâ constantiâ superaret, plures qui aderant Divinâ gratiâ permoti, Christianos se velle esse protestati, Martyrium quoque pertulerunt.

II. Inter Christianos, qui se abdiderant unus erat nomine Caprasius Agennensis origine ac suâ pietate omnibus amabilis. Is in quadam vicini ac imminenti montis caverna, unde videre poterat quidquid in Urbe ageretur, ac etiam Martyrium quod Sancta Fides patiebatur, sese absconderat. Itaque ad terram prostratus precibus Deum exorabat, ut Sanctæ Virgini in certamine assisteret. Cum repente animum se sentit ad ejus imitandum exemplum. Ut tamen de Dei voluntate certior fieret, apprehensâ manu petram ex qua caverna illa constabat, rogavit Deum, ut si eum Martyrio dignum judicaret, ex illa petra aquam manare faceret. Cumque vix oratione completâ aqua effluere inciperet fontem efformans perennem, & sanandis morbis hisce etiam temporibus salutarem, ille statim abcessit & Urbem ingressus se Christianum esse publicè declaravit.

Quapropter Dacianus eum comprehendi jussit, ac promissis eum allicere nec non minis terrere incassum conatus, variis ac diris

diris cruciatibus eum subjecit . Ejus constantiam admirati Primus & Felicianus fratres, pluresque alii adstantes , altâ voce se Christianos esse conclamaverunt . Judex ergo confusus & victus omnes simul cum S. Caprasio & S. Fide capite detruncari mandavit : quod illicô impletum fuit . Christiani autem eorum corpora , ut tempus permittebat , noctu sepelierunt . Horum Martyrium diversis tamen temporibus Martyrol. Rom. celebrat: Sanctæ Fidei quidê 6. Octobris his verbis : *Agenni in Gallia natalis Sanctæ Fidei Virginis & Martyris , cujus exemplo Beatus Caprasius ad Martyrium animatus agonem suum feliciter consummavit . S. Caprasii verò 10. Octobris sic : Agenni in Gallia Sancti Caprasii Martyris , qui cùm rabiem Persecutionis declinans lateret in spelunca , tandem audiens , qualiter Beata Fides Virgo pro Christo agonizaret , animatus ad tolerantiam passionum , oravit ad Dominum , ut si eum gloriâ Martyrii dignum judicaret ex lapide spelunca limpidissima aqua manaret : quod cùm Dominus præstisset , securus ad arenam certaminis properavit & palmam Martyrii sub Maximiano fortiter dimicando promeruit . Cur autem cùm certum sit , utrumque eâdem die cum sociis fuisse passum , diversis tamen diebus Festum notetur , ignoratur ; nec meum est hic quærere .*

III. Agenni quoque sub Maximiano passus fuisse creditur S. Vincentius Martyr & Levita , de quo in Martyrol. 9. Junii (diversus tamen à celebri S. Vincentio Levita , qui 22. Januarii Valentia in Hispania Martyrio coronatus fuit) . Hunc quidam volunt ordinatum fuisse Diaconum à S. Caprasio , quem sine ullo fundamento Agennensem Episcopum fuisse putant . Aliqui etiam & hunc S. Vincentium opinantur Hispanum fuisse , & ex Hispania Tarraconensi in Gallias venisse . Quidquid autem sit ; cum Agenni in Gallia extitisse , ibique Martyrium subiisse , atque hac de causâ contigisse narratur .

Consueverant illius Urbis & Territorii Incolæ quotannis statutâ die solemne Festum Dæmoni celebrare , ad quod ex omni parte Populi confluebant . Dæmon ut miseros illos magis obcicaret , eâ die è suo Fano in monte posito igneum torrentem effluere faciebat , qui per totum montem usque ad ima percurrens , ad cacumen unde effluerat iterum ascendens , ibi in Templo sistebat . Vincentius ergo videns tantæ multitudinis cœtum , causam quæsit , quâ cognitâ , & subinde viso igneo effluvio egrediente de Templo , manum elevavit , & signo Crucis facto tota illa Dæmonis illusio evanuit . Præses qui aderat , & totum quod acciderat propriis oculis fuerat intuitus , pari stupore ac indignatione commotus Vincentium detineri & ad se trahi jussum , de

nomine patria & familia interrogat. Vincentius autem nomen quidè & qualitatem Servi Jesu Christi, sed nihil aliud prodiit. Hoc silentium velut sui contemptum interpretatus Judex, Sancti Martyris pedes super clavos in terra fixos extendi, & sic fustibus diù cedi imperat. Timens autem, ne Templum quoque dirueret, sententiam capitis in eum protulit: qui dum iret ad supplicium, precibus & signo Crucis se muniens, & sui cordis gaudium vultu hilari exprimens, omnes in admirationem traxit.

IV. Sancti Martyris corpus pietate Fidelium in profundissima fovea tumulatum plus quinquaginta supra centum annis mansit occultum, hominibus quidè at non Dæmonibus; cujus virtute permixti amplius non fuerunt talibus illusionibus homines decipere, aut ab illis ullum cultum exigere. Elapso tempore S. Martyr cuidam Christiano apparuit, fructusque nomen edicens, locum in quo suum corpus jacebat indicavit, eique præcepit, ut inde extractum in alium locum dictum Pompejacum non procul distantem illud transferret. Corpus ejus adhuc integrum & absque ullo corruptionis signo repertum Pompejaci in S. Basilica eidem erecta reconditum fuit. Dixi hunc Martyrem sub Maximiano coronatum fuisse: aliqui tamen censent ejus Martyrium præcessisse circa medium seculi tertii ante ann. 257. sed hoc discutere meum non est: sufficit enim meo argumento, ut veri Martyrii substantia quocumque tempore eveniret.

V. Sancti Victoris Massiliensis nobile pro Christo certamen ac triumphum aggredior, qui sub Maximiano, imò præsentem certavit, unà cum Alexandro Feliciano & Longino anno circa 290. Victor genere nobilis, professione Miles, Religione Christianus erat, adeò fervens, ut per noctes singulas Fidelium domos circumiret, eos ad contemptum præsentis vitæ & ad amorem æternæ inflammando. Tandem captus ad Præfectos adductus fuit; quibus eum adhortantibus, ne famulatum & favorem Principis projiceret propter cultum unius hominis mortui (sic enim per contemptum Jesum Christum Infideles appellabant) tantâ libertate respondit, ut ad clamores & injurias quotquot ibi aderant fuerint concitati. At quia erat Vir conditione æstimabilis, ad Imperatorem Præfecti eum remiserunt. Sed cum coram ipso pari constantiâ intrepidus loqueretur, irritatus Imperator Sanctum Martyrem funibus coarctatum per totam Urbem præcepit volutari; ut ex ignominiosa Viri pœna, & Deorum suorum vindicare injurias, & Christianorum simul animos terret. Ad hoc spectaculum insipientis Populi ruit multitudo; dumque per totam Civitatem manibus pedibusque ligatis Christi

Athle-

Athleta sanguine suo cruentatus pertrahitur , impiis manibus vel maledico saltem ore cruciatus adaugent , ita ut quisque pro reatu non minimo sibi duceret , qui ad ejus injurias non aliquid adjecisset .

VI. Tali ludibrio Vulgi nefandissimi oculis satiatis , adhuc cruentus ad Præfectorum Tribunalia Sanctus Martyr verè Victor rapitur . Hi hoc ludibrio & simul pœnâ eum dejectum putantes , iteratò eum adhortari , & ut tandem resipisceret monere aggressi sunt . At Sanctus Vir de primo jam impetu plenè victor , animo Spiritus Sancti gratiâ magis roborato , proluxâ oratione eos affatus , æquè suam fidelitatem erga Imperatorem , ac Deorum suorum contemptum attestatur , eorum infamiam elevans ; & è contra veram Jesu Christi excellentiam opponens , ut in ejusdem Actis apud Ruinart videre licet . Cum ergo perorasset Martyr , Præsides rationum pondere oppressi ; „ Adhuc , inquirunt , „ Victor philosophari non desinis ? Unum tibi elige , aut placâ , re Deos , aut infelicitèr deperire . Quibus Victor : si sic , inquit , proponitis , quod docui verbis , exemplo firmandum „ est . Deos sperno , fateor Christum . Quæcumque potestis date „ supplicia , cumulate supplicia .

VII. Exasperati ergo responsis suis Præfecti , dum inter se de eo magis laniando dissentiunt , & unus eorum nempe Euricius recedit ; alter solus nomine Asterius de eo torquendo sortem obtinet , qui Sanctum Martyrem statim jubet affigi : cùmque diù torqueretur , attollens in Cœlum lumina , tolerantia donum à Deo precabatur . Tunc misericors Jesus ei apparuit Crucem manibus tenens , eique dixit : „ Pax tibi , Victor , ego sum Jesus , „ qui in Sanctis meis patior . Confortare : tecum sum in certamine „ . His verbis tormentorum sensus & dolor statim evanuit . Unde Victor alacri ac læto vultu visitatori ac confortatori suo laudes canere cœpit . Lictores autem cùm jam lassī deficerent , nihil autem se profecisse jubilante Martyre cernerent , depositum patibulo jussu Præsidis sub custodia Militum in obscurissimum omnium carcerem trudent .

VIII. At ecce in medio noctis benignissimus Jesus ad consolandum Servum suum Angelos suos mittit . Continuo igitur solutis carceris claustris , depulsâ nocte totus carcer luce diurnâ clariore irradiatur , & Sanctus Martyr laudes Domino cum Angelis cantat . Tres Milites qui ad custodiam carceris excubabant , tanto fulgore permoti ad Sancti Martyris pedes prostrati veniam petunt & Baptismum efflagitant , quos pro tempore diligenter instructos adscitis Sacerdotibus , ipsâ nocte ad mare duxit , ibique

baptizatos propriis manibus de fonte levavit. Eorum nomina erant Alexander Longinus & Felicianus. Mane facto, & horum trium conversione evulgata, quanto furore accensus sit Maximianus, Lector perpendat. Missis apparitoribus tres praefatos Milites unâ cum Victore ad publicum forum, quod innumera multitudo convenerat, trahi jubet. Ibi interrogati Milites Sancti, cum in Fidei confessione constantes persisterent, mox gladio caesi sunt.

IX. Porro S. Victor videns hos sibi praemissos ad coronam, lacrymis Deum deprecabatur, ut ipse qui post Deum eorum confessionis auctor fuerat, eorum pariter gloriae Martyrio socius esse mereretur. Statim igitur gloriosus Martyr conclamantibus Turbis undique tunditur, iterumque suspensus fustibus nervisque taureis atrocissime cruciatur: deinde revocatus ad carcerem triduo in oratione perseverans agonem suum lacrymis Deo commendabat. Tandem Maximianus, velut tortor insanius ad ultimum reservatus, eum ad se denuò adduci jubet, dumque interea S. Victorem promissis allicere & minis terrere adhuc tentat, ecce Jovis ara affertur & coram ipso componitur, Sacrilegus quoque Minister paratus assistit. Tunc Imperator ad Victorem conversus: Pone, inquit, thura, placa Jovem, & noster amicus esto. Porro Victor quasi litaturus accedens, Divino actu aram de ipsa manu Sacerdotis eripit, & ictu pedis eam solo prosternit, atque illico jussu Imperatoris pes illi amputatur: & haec fuerunt suae corporis primitiae quas Deo dedicavit.

X. Ad ultimum jam totum corpus & animam Deo redditurus, ad molam pistoriam ducitur. Ibat autem ita celer ac hilaris, ut nihil incommodi passus fuisse videretur. Lictores igitur gloriosum Martyrem toto mox corpore velut frumentum Dei electum conterendum pistoriae molae supponunt, cujus rotatu celeri Sancti Viri ossa conquassari incipiunt. Sed cum paulò post dissipata divinitus machinâ, spirans adhuc aliquantulum videretur, gladio illi caput abscindunt: & statim vox coelestis intonuit dicens: *Vicisti, Victor Beate, vicisti*. Quid ad hæc, mi Lector? Tantum robur, tantam spiritus alacritatem ad talia & tanta ferenda solis naturae viribus tribues, an Deo de Veritate Religionis Christianae testimonium perhibenti?

XI. Maximianus victum se à viventibus videns, mortuos vincere cogitavit. Sanctorum propterea Martyrum corpora terrea mandari vetuit, sed in profundo maris brachio, quo à meridiano latere Civitas cingitur, à piscibus devoranda submergi fecit. At hic quoque victus fuit: nam Deus & honori Sanctorum
& po-

& posterorum patrociniis providens, ministrantibus Angelis natu celerrimo Sancta Corpora in oppositum littus illæsa transmittit, ibique à Christianis in crypta nativo in saxo excisa decenter sepulta multis miraculis honorantur, & multa accurrentibus beneficia eorum meritis per Dominum Jesum conferuntur.

XII. SS. Victoris & Sociorum memoriam colunt Martyrologia 21. Julii; Romanum præcipue his verbis: *Massilia natalis S. Victoris, qui cum esset Miles & nec militare nec Idolis sacrificare vellet, primò in carcerem trusus, ibique ab Angelo visitatus, deinde variis cruciatibus punitus, novissimè contritus in mola pistoria Martyrium consummavit. Passi sunt cum eo & tres Milites Alexander Felicianus & Longinus.* Plures alios in Galliis Maximiani sævities Martyres fecit: cum enim ibi diù moratus fuerit, & pluriès accesserit, plura quoque ibi suæ crudelitatis vestigia & Christianæ constantiæ exempla reliquit: quæ ne opus hoc in immensum crescat apud Martyrologia & Auctores relinquo percurrenda; alia enim & quidè multa supersunt de aliis Orbis Provinciis enarranda.

§. VII.

S. Bonifacius Martyr .

I. **S** Ancti Bonifacii passio, quam P. Ruinart anno 290. consignat, aliqui verò ad ann. 303. protrahunt, prætereunda non est. Ex ejus ergo Actis hæc habentur. Erat in Urbe Roma quædam Mulier potens nomine Aglaes filia Acacii genere clari quondam Proconsulis. Hæc ergo ludos publicos propriis expensis ter Romæ dederat, sub se habens septuaginta tres Procuratores, qui curas agebant in possessionibus suis, & unum, qui omnibus præerat nomine Bonifacium, cum quo ipsa carnali commercio commiscebatur. Erat hic ebriosus adulter & amicus omnium quæ odit Deus. Tria tamen habebat rectitudinis opera: hospitalitatem scilicet, largitatem & misericordiam: si enim aliquando videret peregrinum de itinere venientem, cum omni festinatione & alacritate adhortabatur, ut in hospitium suum introiret, & ministrabat ei. Noctibus autem circuibat plateas & vicos Civitatis tribuens pauperibus omnia quæ necessaria erant.

II. Post annos verò multos gratiâ Dei compungente Aglaen vocavit Bonifacium eique dixit: Bonifaci frater, tu scis in quantis peccatis convoluti sumus, non cogitantes, quoniam Deo præ-

præsentari debemus & rationem reddere omnium malorum, quæ in hoc Mundo gessimus, & nunc audiui quosdam Christianorum dicentium, quoniam si quis ministraverit Sanctis, qui propter nomen Domini Jesu Christi pugnant, confors eorum fiet in die illa terribilis Judicii Dei. Et quia audiui, quod Servi Dei adversus Diabolum multi in Oriente agonizantur tradentes corpora sua carnificibus, ne Christum negent; perge igitur ad illas partes, & affer nobis Reliquias idest Corpora Sanctorum Martyrum; ut & nos eis serviamus, & Oratorias domos eis ædificantes, per sanctas eorum passiones salvemur & nos.

III. Bonifacius ergo accepit aurum copiosum ad comparisonem Corporum Sanctorum & ad sublevationem egenorum & duodecim equites & tres læticas cum unguentis diversis ad honorem Sanctorum Martyrum. Cum ergo egredi inciperet, dixit Dominae suæ gratulanter: *Domina mea, si invenero ad comparandum Reliquias idest Corpora Sanctorum Martyrum, offeram tecum; si verò meum corpus venerit, in nomine Martyris suscipies illud.* (Hæc prophetans & fortè nesciens dixit), cui Domina: „ Abjice, inquit, abs te ebrietatem & stultiloquium, & sic te exhibe, ut dignè possis Corpora Sanctorum Martyrum portare. „ Ego autem peccatrix, licet indigna sim, tamen expectabo te citius. Dominus autem & Deus omnium, qui propter nostram salutem formam servi accipiens, proprium Sanguinem effudit propter salutem generis humani, ipse mittat Angelum suum ante faciem tuam & dirigat gressus tuos in sua benignitate & impleat in bonis desiderium meum, delicta mea oblitus.

IV. In itinere ergo positus Bonifacius secum recogitans dicebat: „ Justum est verè, ut nec carnes contingam neque vinum percipiam, quoniam licet indignus sim & peccator, tamen Sanctorum Corpora portare debeo. Et extendens oculos ad Cælum ait: Domine Deus omnipotens, Unigeniti Filii tui Pater, adesto in adjutorium mihi famulo tuo; & dirige viam meam, in qua ego ambulo, ut glorificetur nomen tuum in secula seculorum. Amen „. Adveniens igitur post dies aliquot in Tarsum Civitatem, & resciscens esse ibi Martyres in agone actu certantes, dicit ad eos, qui cum eo erant: „ Viri fratres, euntes requirite nobis hospitium & ibi requiescere facite animalia: ego autem vado videre eos, quos valde desidero.

V. Cum igitur iret ad stadium, ubi Sancti Martyres erant certantes, vidit eos inter tormenta positos, & quemdam eorum suspensum capite deorsum & ignem subtus eum stratum; alium ex-

extensum in quatuor ligna & diutissimè maceratum ; alium exterminatam habentem faciem ; alium ungulis exaratum ; alium manibus abscissis ; alium stipite in collo ejus infixio & exalatum in terra ; alium inclinatum ex adverso , idest retrò manus & pedes habentem & sic fustibus à Ministris cæsum . Et horror magnus & pavor intolerabilis erat his , qui videbant hæc tormenta : magis autem erat videre Diabolum victum , Servos autem Christi fortiter certantes . Accedens ergo Bonifacius cœpit osculari Sanctos Martyres cùm essent in tormentis : erant enim omnes Viri numero viginti , & clamans voce magnâ dixit : „ Magnus „ Deus Christianorum , magnus Deus Sanctorum Martyrum . „ Obsecro vos , famuli Christi , intercedite pro me , ut & ego „ dignus efficiar consors vestrum inveniri , certans adversus Diabolum „ & confedens pedibus Sanctorum Martyrum , amplectebatur vincula eorum osculans & dicens : „ Certate Athletæ & Martyres Christi conculcare Diabolum modicum perferantes : magnus quidè labor , sed multa est requies : horrida tortura , sed ineffabile gaudium . Super terram torquetur corpus à Ministris , in futuro autem seculo à Sanctis Angelis ministrabitur illi .

VI. Porro Simplicianus Judex aspiciens ad Populum & eum contemplatus dixit : quis est ille , qui me Deosque meos contemnit ? adducatur ad meum tribunal . Adductum eum interrogat : quis es tu , edicito nobis , qui contempsisti judicium meum ? Cui Bonifacius : „ Ego , inquit , Christianus sum & contemno „ te ac tuum tribunal per auxilium Dei mei „ Judex autem ad eum ait : quid vocaris ? At Bonifacius : „ Jam dixi , inquit , quia „ Christianus sum . Si autem meum vulgare nomen discere vis , Bonifacius vocor „ . Tunc Judex dixit : antequam poenis tangam latera tua , sacrifica Diis immortalibus . Bonifacius vero respondit : „ Jam pluriès dixi tibi quia Christianus sum & non „ sacrifico Dæmoniis neque Idolis . Quod ergo vis facere fac & „ noli morari : corpus meum tibi appositum est „ . His vehementer iratus Judex jussit suspendi eum , & diutius ungulis corpus ejus radi , tantùm ut ossa ejus apparerent . Sanctus autem Bonifacius nihil dicens , oculos suos ad Sanctos Martyres attentos habebat .

Tunc Judex jussit eum levari à terra , & post quasi unius horæ spatium , iterùm eum adhortatur ut sacrificet Diis & sui misereatur . Sed respondente Martyre „ Non erubescis , miserrime , sapè dicendo mihi , sacrifica ; me nolente audire de peccatoris tuis simulacris „ ? Furore repletus Judex jussit , ut calami

lami acuerentur & eos affigi sub ungulis manuum ejus. Cumque hoc fieret, aspiciens Sanctus Martyr in Cœlum, alacriter tolerabat. Videns autem impius Judex, quòd tormenta quasi non sentiret, jussit aperiri os ejus & plumbum bulliens ei infundi. Tunc Sanctus Athleta Christi adspiciens in Cœlum Dominum sic deprecatus est: „ Gratias tibi ago, Domine Jesu Christe „ Fili Dei: adesto in adjutorium mihi famulo tuo & adjuva me „ à doloribus istis; & ne permittas me à profanissimo hoc iudice „ vinci: tu enim nosti, quia propter nomen tuum hæc omnia „ patior „. Inde conversus ad Sanctos Martyres: „ Obsecro „ vos, inquit, Servi Christi, orate pro me famulo vestro „. Sancti autem Martyres quasi ex uno ore dixerunt ad eum: „ Dominus noster Jesus Christus ipse mittat Angelum suum & eripiat te de profanissimo isto Iudice & perficiat cursum tuum „ velociter & adscribat nomen tuum cum primogenitis „. Cumque oratione completâ dixissent Amen, Populusplorare & altâ voce clamare cœpit: „ Magnus est Deus Christianorum: „ magnus Deus Sanctorum Martyrum. Christe Fili Dei salva „ nos: universi in te credimus & ad te confugimus. Pereant „ simulacra Gentium „. Et impetum fecit omnis Plebs & destruxit Aram, ac in Iudicem lapides jacere cœpit, qui tumultu perterritus tunc abscessit.

VII. Diluculo tamen sedens pro Tribunali & adducto Sancto Bonifacio, iterum dicit ei: ut quid miser sic insanis, in hominem habens spem & ipsum crucifixum tanquam nequam? Tunc zelo Dei accensus S. Martyr: „ Obmutesce, inquit, infelix & noli aperire labia tua contra Dominum meum Jesum „ Christum: obscurissime mentis serpens, inveterate dierum „ malorum, anathema tibi, Nam Dominus meus Jesus Christus hæc omnia sustinuit volens salvare genus humanum „. Ad hæc irritatus Judex jussit afferri ollam & eam impleri pice, & in bullientem Sanctum Martyrem inverso capite immitti. Sanctus autem Martyr facto signo Crucis immissus est in ollam. Sed Angelo Domini descendente de Cœlo & tangente ollam, hæc protinus liquefacta est sicut cera à facie ignis. Et Sanctus quidem non est molestatus, incendit tamen de adstantibus multos. His tremefactus Judex admirans virtutem Christi & tolerantiam Martyris, jussit gladio caput ejus abscindi. Spiculatores autem tulerunt eum cum festinatione de loco Iudicii. Sanctus verò Christi Martyr facto signo Crucis, rogavit eos, ut largirentur ei parvam horam donec oraret, & stans contra Orientem, Deum ita deprecatus est: „ Domine Deus omnipotens,

„ tens , Pater Domini nostri Jesu Christi , adesto in adiutorium
 „ mihi famulo tuo & mitte Angelum tuum & suscipe in pace
 „ animam meam ; ut non impediatur me pestifer & interfector Dra-
 „ co suâ malignitate , & ne suadeat me in fallacia sua , sed con-
 „ quiescere me fac in choro Sanctorum Martyrum tuorum ;
 „ & erue, Domine , Populum tuum de tribulatione impiorum ,
 „ quoniam te decet omnis honor & potestas unâ cum Unigenito
 „ tuo atque Sancto & vivificante Spiritu in secula seculorum ,
 „ Amen „ . Et cum compleret orationem percussus est à Spicu-
 „ latore ; & factus est terræmotus magnus , ita ut omnes exclama-
 „ rent dicentes : *Magnus Deus Christianorum* . Et crediderunt mul-
 „ ti in Dominum Jesum Christum . Hoc fuit S. Bonifacii Marty-
 „ rium seu veriùs triumphus . In hoc admirare Lector potentiam
 Divinæ Gratiæ , quæ sicut ex Persecutore repente Saulum in
 Apostolum verterat : ita hic Bonifacium ex homine vitiiis ac pec-
 caris implicato illicò fecit constantissimum & gloriosissimum
 Martyrem , & dic : *Hæc mutatio dextera Excelsi* . Sed audi quæ
 sequuntur .

VIII. Conservi autem Beati Bonifacii circuibant , ubique
 requirentes eum ; & non inveniētes cœperunt dicere ad invi-
 cem : Ille modò in adulterio aut in taberna positus epulatur ; &
 nos circuibimus ubique requirentes eum . Cùm ergo inter se con-
 fabularentur , contigit obviare eis fratrem Commentariensis &
 dicunt ei : Forsitan vidisti virum peregrinum Romanum ? Ille
 autem dixit eis : Hesterno die Vir peregrinus martyrizatus est
 pro Christo & abscissus est capite . Qui dixerunt ei : Et ubi est ?
 At ille dixit eis : In stadio , ubi passus est . Et iterum interrogati
 illi de aspectu ejus , dixerunt ei : Vir est quadratus crassus robu-
 stus capillo compositus coccineâ veste indutus ; cùmque ille re-
 spondisset eis : ille ipse est quem quæritis & qui hesterno die
 Martyrio est finitus ; At illi ajunt : Homo quem nos quærimus ,
 magis in taberna requirendus est , quàm in stadio . Ille autem
 dixit eis : quid enim nocebit venire usque ad stadium & videre ,
 si ipse est ?

Illi autem secuti sunt eum ; cùmque in stadio stetissent ,
 ostendit eis pretiosum Corpus ejus ; qui admirati dixerunt :
 Quæsumus ostende nobis etiam Caput ejus : quod cùm ille attu-
 lisset , dum ipsum contemplarentur , virtute Sancti Spiritus risum
 emisit . Tunc cognoscentes eum , fleverunt amarè dicentes : Ne
 memineris nostri peccati ob mala quæ locuti sumus de te , famu-
 le Christi : & dicunt ad Officialem : Iste est quem quærebamus ;
 petimus te : da nobis eum . At ille : ego gratis corpus ejus dare

vobis non possum. Illi autem dantes eis solidos quingentos acceperunt corpus Sancti Martyris, & ungentes illud aromatibus & involventes linteaminibus pretiosis posuerunt in una ex lecticis. Et sic profecti sunt iter suum, gaudentes & glorificantes Deum super glorioso S. Martyris triumpho.

IX. Interea Angelus Domini apparens Aglae dixit ei: Qui prius servus tuus erat, nunc autem frater noster est, sicut Dominum suscipe, & dignè eum reconde: ipsius enim interventu relaxabuntur tibi universa peccata. Et confurgens Aglae confestim accepit secum Clericos & Viros religiosos: & sic cum hymnis & canticis spiritualibus & omni veneratione obviavit Sancto Corpori, & reposuit illud stadiis ab Urbe Roma quinque in via, quæ dicitur Latina, donec ædificaret ei domum passionis ejus dignam: quo in loco plura miracula edita, Dæmones fugati & infirmi sanati sunt. Passus est autem S. Martyr Bonifacius Tarfi Ciliciæ Metropolitæ 14. Maii, quâ die etiam in Martyrol. Romano colitur; & sepultus est Romæ die 5. Junii. Aglaes post hæc renuntians Mundo universa quæ possidebat distribuit egenis. Relaxans autem & universam familiam suam diversi sexus & ætatis à jugo servitutis, sic cum paucis puellis, quæ etiam omnibus renuntiaverant, famulata est Christo: tantâ autem gratiâ donata est, ut Dæmonia expelleret & languores sanaret. Superstes autem fuit Beata Aglaes in exercitiis pietatis tredecim annis, post quos obdormivit in Domino, & apud præfatum Martyrem sepulta est.

§. VIII.

SS. Sebastianus, Marcus, Marcellianus &c. Martyres.

I. **S**ANCTUS Sebastianus nativitate vel saltem origine Narbonensis, Mediolani tamen educatus fuit. S. tamen Ambrosius in Psalm. 118. facit eum Mediolanensem oriundum: inde Romam discessisse dicit, fortasse (saltem consilio Dei) ut ibi inveniret Persecutorem, qui tunc Mediolani non aderat. Ibi vel sub Carino, qui ab anno 282. usque ad 285. imperavit, vel alio prædecesore Militiæ adscriptus, prudentiâ pietate & gratiâ, non solum Militum sed & Magnatum communem amorem & æstimationem sibi comparavit. Quia tamen militarem artem susceperat non armorum studio, sed ut hoc titulo posset facilius inservire fratribus, nempe Fidelibus in Persecutione laborantibus, in hoc pio opere totus erat; secretò tamen, ne ad notitiam

tiam Imperatorum perveniret ; non quia bona & vitam pro Christo dare formidaret , sed quia hoc secretum valde juvabat , ut eos posset in tormentis positos liberius confortare , & à Dæmonis conatibus eripere . Ex quibus , apparet etiam sub Carino aliquod Persecutionis genus Christianos passos fuisse , & multò magis primis Diocletiani annis , ut supra notavi .

II. Inter primos , quos Sebastiani zelus Christo peperit , fuere Marcus & Marcellianus . Hi fratres erant genere clarissimi & fortè etiam Romani Senatores opibus ditissimi , uxores ac filios habentes . Eorum pater Tranquillinus & Marcia mater jam senectâ cani , Pagani erant . Hoc tamen non obstante Marcus & Marcellianus à prima ætate (extraordinariâ Dei Providentiâ , quo enim humano medio hoc fuerit nescitur) Christiani erant . De hoc ergo accusatos ac subinde detentos , S. Sebastianus quotidie visitare ac animare non desistit ; quod eorum quoque Servis & ipsis eâdem causâ comprehensis præstare non cessabat . Quid his eorum Servis evenierit , nescimus ; de Marco & Marcelliano scimus , quòd post multa etiam verbera invictâ constantiâ tolerata , variis cœlestibus consolationibus etiam recreati , sententiâ capitis damnati fuerunt . Sed eorum Parentes à Præfecto Romæ tunc Agrestio Chromatio obtinuerunt triginta dierum dilationem , sperantes , se hoc tempore eorum frangere posse constantiam .

III. Fuerunt itaque in ædes Primiscriinii Præfecturæ nomine Nicostratis catenatis manibus translati , ibique Præfecti & Imperatoris mandato custoditi . Ibi eorum Parentes uxores ac filii adhuc parvuli amique omnes , lacrymis ac ejulatibus , eorum constantiam emollire studuerunt ; jamque lacrymæ corda Sanctorum Martyrum cœperant flectere . Tunc Sebastianus , qui eos quotidie invisebat , accedens , prolixâ ad horam fortique oratione eorum jamjam labentes animos prorsus erexit ac solidavit . At Deus ingenti miraculo vires auxit . Toto tempore , quo Sebastianus ad eos peroravit , lux extraordinaria locum in quo stabant replevit , & statim apparuerunt septem Angeli qui vestibus albis eos induerunt , & juvenis quidam donans eis pacem & promittens , se cum eis semper futurum . Hoc referunt Acta , cujus veritatem prodigiosi effectus gratiæ , quos deinde consecutos referam , comprobabunt .

IV. Vix Sebastianus sermonem compleverat , cùm Zoes Nicostratis uxor à sexennio muta ad ejus pedes provolvitur , gestibus ac nutibus indicans , quid ab ipso optaret . Sebastianus illius statu percepto statim os ejus signo Crucis munit , altâ vo-

ce Christum invocans, ut in testimonium veritatis eorum quæ dixerat, eam sanare dignetur. Et ecce Zoes statim loqui incipit laudans Sanctum Virum & testificans se credere omnia ea quæ dixerat: addens, se vidisse Angelum descendantem de Cœlo, tenentem ante oculos loquentis librum apertum, in quo omnia quæ S. Sebastianus dixerat de verbo ad verbum scripta erant.

V. Nicostrates visâ sanitate uxori restitutâ illicc ad Sebastiani pedes & ipse procumbit, veniam petit, quod Servos Dei in carcere detinuerit, propriis manibus eis vincula solvit, rogans, ut irent quocumque vellent; protestatus, se felicem habiturum, si loco eorum in carcerem traderetur & proprio sanguine æternum ignem sibi debitum extingueret. Marcus tamen & Marcellianus ejus fidem in sua origine adeo perfectam laudant quidem, sed certamen, in quo positi erant deserere & in locum ipsorum Nicostратum exponere recusarunt.

VI. In Nicosttrato tamen ejusque uxore solis Dei gratia non stetit, quin & in omnes qui ibi aderant suos mirabiles effectus effudit. Marcus & Marcellianus nedum in Fide solidati, sed hoc etiam gaudio perfuncti fuere, ut eosdem, qui tot artibus à Jesu Christo ipsos eripere tentaverant, viderent jam paratos fieri ejusdem Discipulos. Marcus itaque ad eos conversus præcipue ad patrem matrem uxorem ac fratrem omnes efficaci sermone adhortatus est, ut Fidem, quam se amplecti velle testabantur, generosâ alacritate susciperent & susceptam custodirent; nec terrentur quibuscumque Dæmonis conatibus, ut ex eorum cordibus eam eriperet, sed vitam hanc quæ mille infortuniis rapi potest, ac miseriis & criminibus obnoxia est, generosè aspernarentur, ut æternam ac inamissibilem, cui nullus subest dolor, nulla tristitia, consequerentur. Quibus omnes compuncti ac in lacrymas effusi præteritam infidelitatem detestati, simul Deo gratias agebant, quod ad veritatem illos vocasset.

VII. Tunc Nicosttratus fervore accensus protestatus fuit, se nec cibum aut potum sumturum, donec sacrâ Baptismatis aquâ perfunderetur. At S. Sebastianus, oportet, inquit, ut dignitatem mutes, ac è ministro Præfecti factus Minister Jesu Christi, adhuc adducas omnes, quos in custodia carcerum detines, ut & isti catechizentur: si enim Diabolus totis conatibus studet eripere Christo qui ejus sunt, debemus viceversa nos pari conatu eos quos impius hostis abstulerat suo restituere Creatori. Promittique ipsi, si tale munus in suæ conversionis initio Christo offerat, statim Martyrio fore remunerandum. Nicosttratus ergo confestim se ad Commentariensem nomine Claudium conferens,

rens , ei præcepit ut omnes in carceribus detentos ad se adduceret , volens eos paratos habere . Quibus adductis Sebastianus tanto fervore spiritus locutus est , ut videns eorum corda Divinâ gratiâ tangi , & lacrymis aliisque exterioribus signis se convictos ac mutatos testari , jussit à vinculis solvi ; & statim abiit ad quærendum Sanctum Presbyterum nomine Polycarpum , qui occasione Persecutionis se occultaverat , eumque ad Nicostratum duxit . Polycarpus postquam noviter conversis gaudium suum de eorum felici sorte testatus fuit , eisque à misericordia Divina peccatorum veniam spondit , jejunium usque ad vesperam indixit , & singulorum nomina quæsit , quod illi cum gaudio & alacritate executi sunt .

VIII. Dum hæc agerentur , venit Claudius dixitque Nicostrato , Præfectum malè habuisse , quòd ipse omnes in carceribus detentos apud se adduxisset , ac proinde ei præcipere , ut facti rationem redditurus coram se accederet . Ivit Nicostratus & Præfecto dixit , se hoc fecisse , ut Christianos quos apud se habebat magis terreret exemplo aliorum , qui suppliciis tradebantur . Cui Præfectus acquievit . (Hoc mendacium damnabile certè fuit , sed in homine recens converso , & nondum plenè instructo excusabile , sicut Exodi 1. excusabile fuit obstetricum Ægyptiarum mendacium .)

IX. Revertens à Præfecto simul cum Claudio Nicostratus , ei omnia quæ apud se evenerant narravit , & præcipuè uxori redditam sanitatem . Audiens hoc Claudius commotus est ; & cum duos filios haberet , unum hydropicum , alterum variis morbis cruciatum , illicò accurrens , eos coram Sanctis adduxit ; protestatus , se ope illorum sanitatem filiis suis sperare , & toto corde in Jesum Christum credere . Tunc Sancti Viri certi quidquid in nomine Jesu & ad animarum salutem petissent , se consecuturos , promiserunt Claudio filios suos & quotquot ibi aderant , ab omni infirmitate fore liberandos , statim ac facti fuissent Christiani . Eodem ergo tempore descripta sunt nomina eorum qui Baptismum postulabant ; qui fuerunt Tranquillinus , sex ejus amici nimirum Ariston , Crescentianus , Eutychianus , Urbanus , Vitalis , & Justus ; deinde Nicostratus & Castor ejus frater , Claudius Commentariensis ac duo ejus filii Felicissimus & Felix (quorum unus vocabatur etiam Symphorianus) Marcia Tranquillini uxor unà cum uxoribus & filiis SS. Marci & Marcelliani ; Symphorosa Claudii uxor , Zoes Nicostrati cum universa ejus familia numero homines triginta tres ; & tandem ii qui in carceribus detinebantur numero sexdecim : qui omnes simul

simul collecti numero sexaginta octo sunt ; quibus addi potest Victorius Claudij frater , de quo aliqua inferius .

X. Hi ergo omnes à S. Polycarpo baptizati fuerunt , Sebastianiano viros , Beatrice (postea Martyre) & Lucinâ feminas è sacro fonte levantibus . Duo filii Claudij primi Baptismo abluti sunt , qui è fonte egressi , sani ut cæteri statim fuere , ut nec signum aliquod incommodi appareret . Tranquillinus post eos baptizatur . Is ab undecim annis podagræ & chiragræ doloribus adeò cruciabatur , ut nec posset sine dolore gessere , nec manus ori apponere ad sumendum cibum , & propterea grave incommodum passus fuit , dum ad suscipiendum Baptismum expoliaretur . Postulante igitur S. Polycarpo , an toto corde crederet , Jesum Christum unicum filium Dei posse ei integram corporis reddere sanitatem & insuper universa peccata dimittere ; altâ voce respondit , se toto corde profiteri , quòd Jesus sit unicus Filius Dei , qui possit salutem animæ & corporis ei largiri : se tamen ab eo aliud non petere , quàm suorum remissionem peccatorum : ita ut etiamsi post sanctificationem Baptismi in doloribus perseveraret , adhuc in Jesu Christi Fide firmus persisteret . Hisce verbis lacrymas ab adsstantibus præ gaudio excussit , qui effectum Fidei adeò puræ à Domino petendum sese mutuo excitabant . Post hæc S. Polycarpus , cùm sacro Chrismate eum unxisset , iterum petiit , an crederet in Patrem Filium & Spiritum Sanctum : & respondente eo se credere : momento statim tota podagra evanuit , ut se ipso , nullo adjuvante in sacrum fontem descenderet clamans : Tu es solus & verus Deus , quem ipse infelix Mundus non cognoscit . Subinde alii omnes baptizati fuere , & decem diebus , qui adhuc supererant è triginta dilationis Tranquillino pro filiis suis à Præfecto concessis , hi novi Christiani in laudibus Dei præparando se ad pugnam , & Martyrium ardentèr desiderando , vel ipsæ feminæ ac pueri perseverarunt .

XI. Completis triginta diebus à Præfecto Chromatio conquistus Tranquillinus adfuit , eique gratias summas de concessa dilatione egit : quia hoc modo & filios patri conservavit & reddidit patrem filiis . Chromatius horum verborum sensum non affectus ei dixit : Oportet ergo ut filii tui veniant & thus Diis offerant . Tunc Tranquillinus apertius se explicans declarat , se jam esse Christianum , & hoc medio liberum evasisse à podagra quâ antea dirè cruciabatur . Chromatius , qui eodem morbo laborabat & nolebat hoc prodere propter eos , qui aderant , post varios simul habitos discursus , Tranquillum detineri & in carcerem duci præcepit dicens , se in prima sessione eum auditu-

rum .

rum. At noctu secretò eum ad se adduxit, eique ingentem argenti summam exhibuit, ut ei indicaret remedium, quo ipse liberatus fuerat. Cui Tranquillinus, argento contento, assērit, se aliud remedium non invenisse, quàm credere in Jesum Christum: si hoc remedium ipse experiri vellet, & ipse à morbo solamen reciperet. Chromatius eum dimisit dicens, ut ad se duceret illum, qui eum Christianum fecerat, à quo, si ei pariter sanitatem promitteret, eandem & ipse Religionem posset amplecti.

XII. Tranquillinus illicò S. Polycarpum adivit, eumque ad Præfectum secretò duxit, qui ei obtulit medietatem bonorum suorum, si ipsum à podagra liberaret. Cui Polycarpus: absit, inquit, hoc enim & mihi & tibi verteretur in crimen. Jesus Christus potens est & tenebras suâ luce dissipare & omnes morbos in te sanare, si in eum ex toto corde credideris. Eum proinde Christianæ Fidei præceptis imbuere ac tridui jejunio se disponere iussit, quod & ipse simul cum Sebastiano peregit. Tertiâ die ambo Chromatium adeuntes, à doloribus suæ podagræ argumentum sumserunt de suppliciis æternis disserendi. Tunc Chromatius nomen suum & Tiburtii unici filii dedit, ut ambo Christiani fierent. Sebastianus tamen eum monuit, ne Baptismum sanitatis desiderio cuperet magis quàm veræ Fidei amore, & propterea in testimonium sinceræ suæ ac veræ conversionis sibi permitti postulavit, ut omnia sua Idola comminueret, spondens ei fore illicò sanandum. Annuit Chromatius; sed cùm per servos hoc exequi vellet, restitit Sebastianus dicens, contingere posse, ut Diabolus habens in eos ratione infidelitatis dominium id attentantibus aliquod nocumentum inferret, & diceretur hoc fuisse in punitionem ob Idola everfa. Ipse ergo Sebastianus unâ cum Polycarpo fufis prius ad Deum precibus, omnes Idolorum statuas usque ad ducentas ex quacumque materia confregerunt.

XIII. Verùm ad Chromatium reversi atque nondum sanatum inveniētes: Cave, inquiunt; aliquid superstitiosum adhuc superest destruendum, & fides tua nondum integra est. Tunc ille ingenuè confessus est, in penetrali domus plures adesse machinas vitreas & chryſtallinas astrologicæ arti inservientes, quas magnis sumptibus parens suus Tarquinius emerat, & has in ornamentum domus suæ asservari. At Sancti Viri ostenderunt ei totius Astrologiæ & prædictionum ex ea sumtarum vanitatem, ac proinde oportere & ista aboleri: quibus ille acquievit. Verùm Tiburtius filius ferre non valens, ut res adeò rara & pretiosa destrueretur, nec parentis sanitatem impedire volens, duas

accendi iussit fornaces, comminatus Sebastiano & Polycarpo, quòd si rebus illis destructis pater suus integræ sanitati non restitueretur, utrumque in fornacem injiceret. Quam conditionem, reluctante licèt Chromatio, Sancti Viri libenter acceptaverunt.

XIV. At ecce eodem tempore quo machinæ illæ confringebantur, Chromatio juvenis quidam apparuit dicens, ei se de Cœlo à Jesu Christo ad eum sanandum mitti. Quo dicto Chromatius eodem momento perfectè sanatus, currens juvenem illum insequitur, ut ejus pedes exosculetur. At ille prohibuit, quòd nondum Baptismate ablatus & sanctificatus foret. Ad pedes ergo Sebastiani Chromatius, & Polycarpi Tiburtius sese prosternunt. Tunc Sebastianus Chromatio exposuit, quòd in dignitate Præfecti perseverans vix, imò nec vix abstinere posset ab interventu spectaculis & à ferendis judiciis & aliis contra Christianos: tutius ergo esset renuntiare Præfecturæ & Successorem postulare, ut ab omni periculo & Mundi hujus curis extricatus unicè posset Deo & animæ saluti vacare. Consilium amplexus Chromatius, eadem die ad amicos in Aula existentes misit, rogans eos, ut ipsum hac in re adjuvarent.

XV. Jam ergo Chromatius proximè baptizandus erat: cùm à S. Polycarpo inter alia quæsitus, an suis peccatis renuntiasset; respondit, nimis serò hanc sibi fieri petitionem, optare tamen sibi differri Baptismum, ut magis in hoc firmaretur, & pro eis satisfaceret. Velle se cum omnibus reconciliare, quod debebat persolvere, quiddid violenter extorserat restituere: & cùm post mortem uxoris duas habuisset concubinas, eas dimittere cum plena nuptiarum libertate, ac viros eis procurare. Post hæc polliceri se renuntiaturum omnibus peccatis & hujus Mundi voluptatibus. S. Polycarpus ejus consilium approbans quadraginta dierum spatium ad hæc peragenda, ut moris erat cum eis quibus Baptismus absque periculo differri poterat, ei præscripsit. Tiburtius quoque renuntiavit Judiciariæ professioni, cui proximè accingendus erat, cùm in eruditione & eloquentia valdè profecisset; & subinde Baptismo initiatus fuit. Chromatius autem abdicatis omnibus Mundi negotiis paucis post diebus eodem fuit insignitus: & cum eo mille & quadringenti è sua familia baptizati fuerunt, quibus antea libertatem donaverat, dicens, non esse conveniens, ut qui Deum cœperant habere patrem, hominis mancipia permanerent. Fecit hic Chromatius, quod (ut putat S. Joannes Chrysostomus hom. 11. in Acta) faciebant primi Christiani, qui agrorum quidèm & possessionum pretia ad pedes

Apo-

Apostolorum deferebant, non tamen servorum, quos non vendebant, sed liberos dimittebant.

XVI. Quæ hætenus dixi, probabiliter contingere potuere deficiente anno 284., cum mortuo Caro Carinus ejus filius homo vitiiis deditus Romæ imperaret, & in Oriente Diocletianus. Anno enim 285. cum Carinus adversus Diocletianum bellum movisset, commisso prælio in Illyrio, Carinus tandem à suis occisus fuit, & Diocletianus totius Imperii Dominus collegam in Imperio assumpsit Maximianum Herculium anno 286. Persecutio tamen, quæ sub Carino efferbuerat, eo etiam mortuo perduravit, imò anno 286. violentior effecta est. Nihilominus hæc Imperii mutatio Sancto Sebastiano non obfuit, qui Christianum se esse nondum palam prodiderat: imò cum Diocletianus an. 285. Romam venisset, nedum eum in munere confirmavit, sicut alios Carini Ministros, sed speciali dilectione ipsum prosequabatur, adeo ut ipsum primæ cohortis ad custodiam Prætorii destinatæ ducem crearet, & quousque Romæ moratus fuit, eum apud se frequenter habere vellet; quod & Maximianus, qui in Occidente remanserat, similiter faciebat.

XVII. Verum cum interim adversus Christianos augeretur Persecutio, Chromatius consilio S. Caii tunc Romani Pontificis omnes recens conversos apud se recepit, summo zelo eos custodiens, ne ad necessitatem Diis sacrificandi adigerentur. Quia tamen ejus ad Fidem conversio ægrè diu occultari poterat, ab Imperatore licentiam petiit se recipiendi in Campaniam, ubi multa possidebat, titulo tum provectæ ætatis tum valetudinis. Quâ obtentâ permissione sese obtulit ad secum in suas Terras adducendos omnes Christianos, qui eum sequi voluissent. Cum autem hi novi Christiani specialiter addicti essent SS. Sebastiano & Polycarpo, oportebat ut alteruter horum ad eos in Fide firmandos in Campaniam cum illis transiret. Id S. Sebastiano difficile erat, tam propter muneris dignitatem, quàm propter Martyrii desiderium, cujus se compotem fieri sperabat magis manendo Romæ, quàm in Campaniam transeundo. Sed cum ejusdem desiderio arderet S. Polycarpus, facta est inter eos sancta contentio, unoquoque conante ad sanguinem pro Christo citius fundendum Romæ manere. Quia tamen hoc fuisset Christi membra adhuc tenera, quia recens nata, sine lacte deferere; existimavit Cajus, hoc debito magis Polycarpum teneri, qui utpotè Sacerdos & Dei scientiâ plenus, poterat ea suâ assistentiâ in Fide magis roborare. Oh si tali contentione inter Servos Dei nostris temporibus quisque de subeundo citius Martyrio decertaret!

Hoc exoptabat S. Augustinus Epist. aliàs 180. modò 228. dicens: *Ob si inter Dei Ministros inde sit disceptatio, qui eorum manent, ne fugã omnium, & qui eorum fugiant, ne morte omnium deferatur Ecclesia. Tale quippè certamen erit inter eos, ubi utrique serveant caritate, & utrique placeant caritati.*

XVIII. Adveniente igitur die Dominico Cajus Papa sacra mysteria in Chromatii domo celebravit, & postquam de gratia confessionis Fidei & Martyrii locutus fuit, cunctis Fidelibus liberam reliquit optionem, vel in Urbe secum manendi, vel cum Chromatio & Tiburtio in Campaniam transeundi. At Tiburtius, patre non dissentiente, obtinuit ut Romæ maneret. Mansit ergo cum Sebastiano, & manserunt insuper SS. Marcus & Marcellianus cum Tranquillino patre, Nicostratus cum Zoe uxore, & Castore fratre, & Claudius cum filiis, & Victorino fratre; cæteris cum Chromatio secedentibus. Subinde Cajus Papa Tranquillinum in Presbyterum, ac filios in Diaconos ordinavit; cæteros autem in Subdiaconos præter Sebastianum, qui cum sub habitu Ducis Fidelibus valido præsidio esset, Ecclesiæ defensor declaratus fuit.

XIX. Hunc Defensoris Ecclesiæ titulum in Ecclesia præcipuè Romana perseverantè colligitur ex Rescripto Valentiniani (apud Baron. anno 268. num.2.) ubi loquitur de instantia sibi porrecta à Defensore Romanæ Ecclesiæ, & Damaso Papa, ut sibi restituatur quædam Basilica, quam factionarii Ursicini Pseudo-papæ occupaverant. Hoc idem Defensoris seu Præsidis Ecclesiæ officium in Ecclesia Ancyra obtinuisse Cyriacum unum ex Marcelli Ancyrani discipulis habetur in quadam Fidei confessione apud Epiphanium hæres. 72., in qua Cyriacus post diversos Ecclesiasticos se subscribit: *Ego Cyriacus Præfex* (seu Defensor) *ejusdem Ecclesiæ*. Ætate verò S. Gregorii ejusmodi Defensoris Ecclesiæ munus erat Ecclesiæ & præcipuè pauperum sublevationi incumbere. De his in suis Epistolis sæpe mentionem facit, & maxime Lib. 8. Epist. modò 14., ubi eis privilegia concedit Regionariorum; ut sicut septem Regionarii erant constituti, septem quoque Diaconi; ita septem essent primarii Defensores, quibus in absentia Pontificis licentiam dat sedendi in Conventu Clericorum, standi verò præsentem Pontificem. Et hoc privilegio gaudere vult etsi ad aliam Provinciam transeant. Forma autem instituendi Defensorem legitur L. 5. Epist. 29. ad Vincomalum apud Baronium ad ann. 599. num. 17.: hoc titulo S. Sebastianus primus ornatus fuit.

XX. Sancti igitur Viri, qui ex dictis Romæ permanferant, cum

cum suæ securitati locum non invenirent , simul cum Cajo Papa in Palatium Imperatoris se receperunt apud quemdam nomine Castulum cum tota sua familia Christianum : ibi enim degentes , præcipuè in superiori Palatii parte ac proinde minùs frequentata , suspicionem ingerere non poterant . Ibi ergo morantes dies ac noctes in lacrymis jejuniis & precibus transigebant , gratiam perseverantiæ ac Martyrii à Deo postulantes . Interea dono miraculorum præditi Christianis ad eorum assistentiam confugientibus multa & quidèm mira conferebant . Tiburtius quâdam die egressus incidit in quemdam juvenem , qui ab alto præceps delapsus membris omnibus confractis jacebat , adcoût nulla spes , nisi eum sepeliendi , superesset . Accedens Tiburtius petiit sibi permitti super illum aliquod verbum proferre , ut si sanari posset tentaret : ac de facto vix ab eo Oratione Dominicâ & Fidei symbolo pronuntiatis , juvenis perfectè sanus exiit . Tiburtius utens gratitudinis officiis , quæ erga se parentes juvenis exhibebant , seorsim vocatos de virtute nominis Jesu Christi instruxit , duxitque illos ad Cajum Pontificem , à quo unâ cum filio baptizati fuere . Baron. ann. 286. num. 11.

XXI. Nunc ad Martyria , quibus singuli coronati fuere procedam . Omnibus exemplo suo prævit S. Zoes vel *Zoa* Nicoftrati uxor . Hæc cum ad Confessionem S. Petri die ejus Festo oraret , comprehensa est & ad Patronum ducta Regionis Naumachia (Regio erat ultra Tiberim , sic dicta , quia ad navalem pugnam representandam destinata) . Hic volens , ut Idolo Martis thus adoleret , reluctanter ac Idola Gentium irridentem ac spem totam in Jesu Christo collocantem in carcerem detruxit obscurissimum , fecitque ut diebus quinque nec lumen videret , nec cibum potumque caperet , intentans illi mortem famis , ni Diis sacrificaret : cùmque die detentionis incluso sex transisset dies , denuntiatur Præfecto , qui jussit eam à collo & capillis in arbore excelsa suspendi , & sub ea fumum è sterquilinio excitari . Statim ergo ut suspensa est , in confessione Domini emisit spiritum . Illi autem tollentes corpus ejus grandi alligatum faxo in Tiberim demerserunt dicentes : ne Christiani Corpus ejus tollant & faciant eam sibi Deam . Ex quibus apparet , inquit Baronius ad ann. 286. num. 14. vel ipsos Ethnicos non latuisse , quòd soliti essent Christiani religioso cultu prosequi Martyrum corpora , quamvis errarent putantes illos colere tanquam Deos . De S. Zoæ passione agit Martyrol. Rom. 5. Julii his verbis . *Roma Sanctæ Zoæ Martyris uxoris Beati Nicoftrati Martyris , quæ cùm ad confessionem Beati Petri Apostoli oraret , sub Diocletiano Imperatore*

à Persecutoribus arſata & in cuſtodiam obſcuriſſimam truſa deinde collo & capillis in arbore ſuſpenſa, adhibito ſubter horribili fumo, in confeſſione Domini emiſit ſpiritus.

XXII. Vix ſecuto Martyrio, S. Zoa in ſomnis apparuit S. Sebaſtiano illud ei indicans: quod cùm Sebaſtianus aliis narraſſet, in has Tranquillinus voces prorupit: *Femina nos ad coronam præcedunt, ut quid vivimus?* Et octavâ Apoſtolorum die ad Beati Pauli Confeſſionem accedens ſenſit & ipſe Gentilium inſidias; nam à Populo lapidibus obrutus mortuus eſt, & corpus ejus in Tiberim projectum. Ejus memoria in Martyrol. Rom. die 6. Julii hiſ eiſdem ſerè verbis colitur: *Romæ natalis Sancti Tranquillini Martyris patris Sanctorum Marci & Marcelliani, qui ad prædicationem Sancti Sebaſtiani Martyris converſus ad Chriſtam, à Beato Polycarpo Presbytero baptizatus, & à S. Cajo Papa Presbyter ordinatus eſt. Is cum ad confeſſionem Beati Pauli die octavarum Apoſtolorum oraret, ſub Diocletiano Imperatore à Paganis tentus & lapidatus Martyrium conſummavit.* Porrò hoc nomen *Confeſſio Petri vel Pauli*, quæ Græcis idem eſt ac *Martyrium*, licet ab hiſ ſumatur pro tota Eccleſia Martyrum, in qua requieſcunt eorum Reliquiæ; à Latinis tamen ſtriçtè ſumitur pro loco illo, in quo olim ſub Altari Majori recondebantur Martyrum Corpora. De hoc Baronius in Notis ad præfatam diem 6. Julii.

XXIII. Nicoftratus quoque, Claudius Commentarienſis, Caſtor, Victorinus, & Symphorianus, dum Corpora Sanctorum Zoæ & Tranquillinæ per ripas Tiberis quærent, tenti ſunt & ad Urbis Præfectum Fabianum (aliàs Fabium) perducti: qui eos hortabatur, ut ſacrificarent, ac diebus decem minis & blanditiis cum illis agens, cùm nihil proficeret, de illis retulit ad Imperatores (fortè enim tunc ambo Romæ erant) qui eos ter torqueri juſſerunt, ſed cùm eorum conſtantia tormenta ſuperaret, lata ſententia eſt, ut in medium mare præcipites mitterentur. Itaque immenſis ponderibus alligati pelagi fluctibus dati ſunt. Eſtò autem hoc contingere non potuerit niſi ad ſummum 17. Julii; ſeptimâ tamen ejusdem menſis die eorum memoria in Martyrol. Rom. & aliis celebratur ſic: *Romæ Sanctorum Martyrum Claudii Commentarienſis, Nicoftrati Primifcrinii, Caſtorii, Victorini, & Symphoriani, quos S. Sebaſtianus ad Fidem Chriſti perduxit, & Beatus Polycarpus Presbyter baptizavit. Eoſdem in perquirendis Sanctorum Martyrum Corporibus Fabianus Judex comprehendendi juſſit, & per decem dies minis & blanditiis exagitans, cùm in nullo penitus poſſet commovere, juſſit tertio torqueri, ac poſtea in mare præcipites dari.*

XXIV. Mo-

XXIV. Modò ad S. Tiburtii, Chromatii ut dixi filii, gloriosum Martyrium me convertam. Hunc ex Actis S. Sebastiani fusè recenset Baronius ad ann. 286. à num. 16. Torquatus quidam dicens se esse Christianum, simulatâ Fide S. Cajo Papæ se sociaverat. Erat autem Apostata & omni dolo plenus. Hic cum à B. Tiburtio frequenter argueretur, quòd capillos arte super frontem compositos gestaret, quòd assiduè comestaretur, & ludendo pranderet, quòd Feminarum aspectu delectaretur, quòd à jejuniis & orationibus se subduceret, quòd somno deditus nocturnis hymnis non interesset, ejus monita se libenter accipere simulavit: sed arte egit, ut S. Tiburtium orantem Infideles comprehenderent; & cum eo fecit se quoque teneri, & simul ad Secretarium Judicis perducì.

Fabianus Judex Torquatum interrogat, quis esset: cui ille: Torquatus sum nomine, professione Christianus. Dicente autem Judice, Leges Imperatorum eisè, ut qui Diis non sacrificant, diversis suppliciis torqueantur, Torquatus ait: Hic Magister meus est, & ipse me semper docuit: quòd cum videro facere, me quoque facere necesse est. Tantam impudentiam ferre non valens Tiburtius, mentiri, inquit, Torquatum dicendo se Christianum esse: tales enim pestes Christus nunquam dignatus est habere servos suos, ejusque subinde vitia & fraudem Judici exponit. Sed cum Judex pluribus hortatus esset Tiburtium, ut Diis sacrificaret, videns eum pro Christo intrepidum, jussit ante pedes ejus carbonem ardentem effundi, & ait ad eum: Elige tibi unum è duobus: aut thura his carbonibus impone, aut pedibus super eos nudis incede. Tunc Tiburtius faciens Crucis Christi signum, constanter super eis nudis ingressus est plantis: dixitque Præfecto: „ Depone infidelitatem & disce, quia hic solus est Deus, „ quem confitemur Creaturis omnibus dominari. Tu verò si „ potes mitte manum tuam in aquam calidam in nomine Jovis „ tui: & si potest Juppiter Deus tuus, faciat te non sentire ardo- „ rem. Nam mihi quidem in nomine Domini mei Jesu Christi, „ videtur quòd super flores roseos gradiar; quia Creatura ipsa „ Creatoris sui famulatur imperio „. Ita Tiburtius.

XXV. At Præfectus ad hæc nihil motus: „ Quis ignorat, „ inquit, artem Magicam vos docuisse Christum vestrum „? Invaluerat enim hæc opinio apud Gentiles, quòd Christus Magus fuerit, Arnobio teste L. 1. cont. Gent., & S. August. L. 1. de Conf. Evang. cap. 9. & 11., quod supra refutavi. At sicut Christus ipse hanc calumniam, quòd in Beelzebub ejiceret Dæmonia non tulit: ita nec Tiburtius, ideòque Præfecto ait: „ Ob- „ mu-

„ mutefce infelix , & noli auribus meis has irrogare injurias , ut
 „ audiam te rabido ore latrantem , vel nominare Sanctum &
 „ mellifluum Nomen „ . Tunc iratus Judex hanc in eum dicta-
 vit ſententiam : Blaſphemator Deorum & reus atrocium injuria-
 rum gladio animadvertatur . Cùm enim nobilis eſſet , ſententia
 capitis , nullis præmiſſis ſervilibus pœnis , à Judice quamvis irato
 condemnatur . Duçtus eſt igitur in viam Lavicanam tertio ab
 Urbe milliario , ubi præmiſſa oratione ad Deum uno gladii icu
 cæſus deceſſit . Et in eodem loco à quodam Chriſtiano , qui illuc
 apparuit , ſepultus eſt . Ejus Martyrii memoriam celebrat Mar-
 tyrol. Rom. 11. Auguſti his verbis : *Romæ inter duas lauros nata-
 lis Sancti Tiburtii Martyris , qui ſub Judice Fabiano in Perſecu-
 tione Diocletiani , cùm nudis plantis ſuper carbones ardentes ingreſſus
 Chriſtum majori conſtiteretur conſtantiâ , duci in tertium ab Urbe
 milliarium , atque ibidem gladio animadverſi jabetur .*

XXVI. Proditor Torquatus S. Tiburtii ſanguine non adhuc
 ſatur , egit , ut & Caſtulus Palatii Zetarius (ideſt curam habens
 quorundam cubiculorum capacium unius lecti cum duabus fel-
 lis) Sanctorum , ut dixi , hoſpes , apprehederetur : qui tertio au-
 ditus & tertio tortus , cùm in Chriſti confeſſione perſeveraret ,
 demifſus in foveam , & impoſita ſuper eum maſſa arenariâ cum
 palma Martyrii migravit ad Chriſtum , ut creditur anno ſequen-
 ti 287. die 26. Martii , cui Martyrologia , & præcipuè Romanum
 illud conſignant his verbis : *Romæ viâ Lavicanâ Sancti Caſtuli
 Martyris , qui cùm eſſet Zetarius Palatii & hoſpes Sanctorum ,
 à Perſecutoribus tertio appenſus , tertio auditus , in confeſſione Do-
 mini perſeverans miſſus eſt in foveam , & dimiſſa ſuper eum maſſa
 arenariâ Martyrio coronatus eſt .*

XXVII. Poſt Sancti Caſtuli Martyrium duo fratres Marcus
 & Marcellianus comprehenſi fuere , & Fabiano Judice ad ſtipi-
 tem alligati & pedes acutis clavis confixi : ſed in tam atroci ſup-
 plicio poſiti , nedum lacrymis dolorem teſtati non ſunt ; ſed in
 hoc ſtatu per totam vitam detineri exoptantes , ſe nunquam in
 majori ſolatio fuiſſe , & tandem amoris erga Jeſum Chriſtum verè
 ſe confixos eſſe dicebant . Atque integrâ die ac nocte in hoc ſup-
 plicio cantantes illud Pſalmi 132. : *Ecce quàm bonum & quàm ju-
 cundum habitare fratres in unum , morati , tandem Judicis man-
 dato lanceis conſoſſi victores ad Cœlum evolarunt .* Eorum cor-
 pora ſepulta fuerunt in Cœmeterio propè viam Appiam eorum
 nomine celebri , in quo diù jacuerunt , quod poſtea à Sancto Da-
 maſo Papa fabricis ornatum fuit , ubi & ipſe cum matre & ſoro-
 re ſepeliri voluit : & propterea dictum etiam fuit S. Damafii Cœ-
 me-

meterium . Eorum Martyrium eisdem ferè verbis celebrat Martyrol. Rom. die 18. Junii : *Roma via Ardeatina natalis Sanctorum Martyrum Marci & Marcelliani fratrum , qui in Persecutione Diocletiani à Judice Fabiano tenti , & ad stipitem alligati , in pedibus clavos acceperunt : cùmque non cessarent laudare Christum , lanceis per latera transfixi , cum gloria Martyrii ad sydere Regna migrarunt .*

XXVIII. S. Sebastianus , qui operâ suâ & zelo prælaudatos Martyres ad Christum præmiserat , eos Martyrio suo & ipse secutus est . Fides , quam , ut liberiùs posset inservire Christo eique Fidelium numerum augere , occultaverat , diù latere non potuit exploratores , qui undique Christianos inquirebant , ut ad Tribunalia eos denuntiarent . Contigisse hoc aliqui putant anno Christi 288. inchoante : detectus enim à quodam , quod sub clamyde ducis Fidem Christianam tegeret , ad Præfectum delatus , qui Diocletiano tunc Romæ existenti suggestit . Eum itaque Diocletianus ad se vocans ita est allocutus. „ Ego te inter primos „ in Palatio semper habui ; & tu contra salutem meam in Deorum injuriam hæcenus latuisti ? Cui Sebastianus dixit : Ego „ pro salute tua semper Christum colui , & pro statu Orbis Romani eum qui in Cœlis est , semper adoravi : considerans à lapidibus auxilium petere insani esse & vani capitis . Tunc iratus Diocletianus jussit eum duci in medium campum , & ligatum ibi perinde ut signum sagittis peti à sagittariis . Posuerunt ergo eum Milites in medio campo , & hinc inde jaculis adeò repleverunt , ut instar Ericii ex sagittarum densitate hirsutus videretur . Existimantes illum mortuum abierunt .

„ Tunc relicta Martyris Castuli Zetarii non nine Irene abiit „ noctu , ut corpus tolleretur & sepeliret : & inveniens eum viventem , per scalam excelsam adduxit eum in domum suam , ubi manebat in Palatio : & ibi intra paucos dies membrorum omnium integerrimam recuperavit sanitatem . Cùmque Christiani ad eum convenirent , omnes adhortabantur eum abscedere . Ille autem oratione factâ descendit ; & stans super gradus Elagabali , venientibus Imperatoribus dixit : Iniquis surreptionibus animos Imperii vestri Templorum Pontifices obsident , suggerentes de Christianis falsa commenta , tamquam illi sint Reipublicæ adversarii , cùm illorum orationibus Respublica „ in melius proficiat & crescat : non enim cessant pro Imperio vestro & pro salute Romani exorare .

„ Cùmque hæc & alia id genus diceret , Diocletianus ait : „ Tu es Sebastianus , quem nos dudum jusseramus sagittis in-

„ terfici ? Sebastianus dixit: Ad hæc Dominus meus Iesus Chri-
 „ stus reservare dignatus est, ut conveniam & contester vos co-
 „ ram omni Populo, injusto iudicio Persecutionem vestram in
 „ Christi famulos ebullire. Tunc iussit eum in Hippodromum
 „ Palatii duci, & tamdiu fustibus cædi, donec exalaret spiritum.
 „ Tulerunt ergo Corpus ejus noctu & in cloacam maximam
 „ miserunt, dicentes: ne fortè Christiani eum sibi Martyrem
 „ faciant.

„ Porro B. Sebastianus apparuit in somnis Matronæ religio-
 „ sæ Lucinæ nomine, dicens ei: In cloaca illa, quæ est juxta
 „ Circum, quære & ibi invenies Corpus meum pendens in un-
 „ co. Quod cum lavaveris perduces ad Catacumbas & sepelies
 „ me in initio cryptæ juxta vestigia Apostolorum. At Lucina
 „ cum servis suis mediâ nocte abiit; & elevans Corpus ejus po-
 „ suit in pilento suo (vehiculi genus erat, quo Matronæ fere-
 „ bantur, ita libratum duabus rotis, ut confidentes in pulvinis in
 „ aere suspensæ agitari viderentur) perductumque ad locum, ubi
 „ ille imperaverat, cum omni diligentia sepelivit: perque dies
 „ triginta a sancto loco illo non recessit. Post aliquos autem an-
 „ nos, pace Ecclesiæ redditâ, domum suam mutavit in Eccle-
 „ siam, omnesque opes suas pro Christianorum consolatione illi
 „ derelinquens, & Ecclesiam earum hæredem instituens, quie-
 „ vit in Christo.

XXIX. Hactenus ex Actis S. Sebastiani & aliorum, de
 quibus supra locutus sum, quæ refert Baronius ad ann. 284. a. n. 3.,
 & signatè de Sebastiano à num. 24. usque ad 28., quæ veridica
 ab omnibus reputantur. Circa ea tamen, quæ de S. Sebastiano
 dicunt, aliqua idem Baronius observat. Primò, colligi ex iis,
 quòd Persecutiones in Christianos ex instigatione Pontificum
 Idolorum maximè excitabantur, qui Imperatoribus falsò repræ-
 sentabant, Christianos aliquid contra Imperium machinari,
 quod S. Sebastianus in sua Apologia mendacii arguit. Secundò,
 quòd dicitur S. Sebastianum constituisse *in gradibus Elagabali*, al-
 ludit ad Templum, quod Elagabalo tanquam Deo Antoninus in
 Palatino monte juxta ædes Imperatorias consecravit, ut ait Lam-
 pridius. In gradibus ergo hujus Templi consistens Imperatores
 ad suas ædes redeuntes Sebastianus expectavit. Tertiò, quòd
 dicitur de *unco* & *cloaca* indicat, corpora damnatorum unco tra-
 hi à carnificibus consuevisse, teste Lampridio in Commodò,
 & Seneca de Ira L. 3., de quo ipse Baronius in Notis ad diem 19.
 Januarii. In cloacam autem infamissimorum hominum corpora
 projiciebantur juxta Lampridium de Elagabalo. Quartò, quid
 per

per vestigia Apostolorum intelligatur, dubium est : judicaverim per ea intelligi Corpora seu Reliquias Apostolorum, juxta quorum sepulcrum Sebastianus sepeliri voluit. Quintò constat, Lucinam, quæ Sancti Sebastiani Corpus sepelivit, diversam esse à Lucina Apostolorum Discipula, cujus memoria celebratur 30. Junii in Martyrol. Rom. his verbis : *Romæ S. Lucina Apostolorum Discipula, quæ facultatibus suis Sanctorum necessitatibus communicans, Christianos in carcere detentos visitabat, & Martyrum sepultura inserviebat, juxta quos & in crypta a se constructa sepulta est.* De hac S. Lucina posteriore quid traditum sit, inferius dicam.

XXX. De Chromatio & sociis, qui (ut supra dixi) in Campaniam missi fuerunt, hoc solum scimus, quòd Martyrologia Ussardi Adonis & Romanum die 2. Julii Martyrium passios fuisse tradunt in Campaniâ sub Diocletiano sequentes, nimirum Arifonem, Crescentianum, Eutychianum, Urbanum, Vitalem, & Justum sex Tranquillini amicos, Marciam ejus uxorem, Symphorosam uxorem Claudii, & Felicem ac Felicissimum Claudii filios; quamvis alter ex dictis alio nomine Symphorianus appellatus Romæ cum patre passus fuisse dicatur : quos Baronius ad annum 303. num. 120. Martyrium eo anno subisse putat; & quidè sex Tranquillini amicos Svesæ in Campania, censet Bollandus 23. Februarii. S. Polycarpum in pace quievissè habemus ex Martyrol. Rom., ubi die 23. Februarii legitur : *Romæ Sancti Polycarpi Presbyteri, qui cum Beato Sebastiano plurimos ad Fidem Christi convertit atque ad Martyrii gloriam exhortandò perduxit.* Ponitur autem mortuus Romæ, quia fortè progressu temporis è Campania Romam reversus fuit, vel ejus Corpus Romam fuit translatus. Quid autem Chromatio evenerit ignoramus; credibile est eum in Domino obiisse.

XXXI. Hæc de S. Sebastiano ejusque pro Christo præclare gestis ejus Acta continent; in quibus jure aliquantò immorati sumus, ut qui legit discat, quantum in ipso & per ipsum Divina Gratia in comprobationem & augmentum Fidei Christianæ operata sit. Quod si quis dubitaret, quomodò Sebastianus Christianus serviebat Imperatori Pagano, & clamydem Militis sub eo gestabat? respondebit S. Thomas 2. 2. qu. 10. a. 10. ad secundum : *Quòd illa prælatio Caesaris præexistebat distinctioni Fidelium ab Infidelibus; unde non solvebatur per conversionem aliquorum ad Fidem: & utile erat, quòd aliqui Fideles locum in familia Imperatoris haberent ad defendendum alios Fideles: sicut Beatus Sebastianus Christianorum animos, quos in tormentis videbat deficere, confortabat,*

bat, & adhuc latebat sub militari clamyde in domo Diocletiani. Hæc S. Thomas. Et S. Paulus ad Philipp. 4. : Salutant, inquit, vos omnes Sancti, maxime autem qui de Caesaris domo sunt, idest Neronis.

XXXII. Propterea S. Sebastianus celeberrimus inter Martyres semper habitus fuit ab Ecclesia & Patribus. Ejus Ecclesia in via Appia una est ex septem Ecclesiis, non Urbi tantum sed toto Orbi notissima, in qua S. Gregorius habuit homiliam 37. in Evangelia, & à S. Damaso Papa erecta creditur. Paulus Diaconus refert, quod cum anno 680. pestis horribilis Romæ grassaretur, Divinâ revelatione erecto in Ecclesia S. Petri in Vincula in honorem S. Sebastiani Altari tempore Agathonis Papæ, statim lues cessavit: ex quo provenisse videtur, quod posteri Fideles eundem Sanctum ad evitandam imminentem pestis cladem consequerint invocare Patronum. Refert etiam Baronius in Notis ad 20. Januarii, in eadem Ecclesia sub titulo Eudoxiæ ad Vincula S. Petri extare egregiam ejusdem Martyris effigiem antiquam opere musivo expressam senili aspectu & barbâ. Unde admonentur Pictores, qui eum juvenem perperam depingunt. Sed hæc nostrum non est scrutari.

§. IX.

S. Lucina Vidua & aliqui Martyres. S. Maximilianus.

1. **D**E S. Lucina, quæ S. Sebastiani Corpus sepelivit, etsi non Martyre, quia tamen ejus historia aliquos involvit Martyres, ut promisi, modò sermo erit. Hæc ergo Lucina (ut ferunt Acta S. Anthimi apud Surium 11. Maii) Sergium Terentianum secundò Romæ Præfectum & Plautinam Gallieni Imperatoris neptem parentes habuit, Virum autem Marcum Faltonium Pinianum. Is à Diocletiano & Maximiano Asiæ Proconsul anno 286. designatus Lucinam conjugem secum adduxit. Consiliarium habebat quemdam nomine Queremonem acerrimum Christianorum Persecutorem, qui à Deo derelictus & Diabolo traditus è curru, quo vehabatur, toto spectante Populo præceps lapsus, post aliquot cruciatus horas Diabolum suæ necis auctorem desperatè invocans, animam ei tradidit in æternum cruciandam.

II. Hoc spectaculo terrefactus Pinianus morbo adeò gravi correptus fuit, ut Medicorum sententiâ nil aliud quàm mors expectaretur. Lucina de conjugis vita piè sollicita, & credens, in

poenam Christiani sanguinis ab eo fusi hoc evenisse, quotquot ex Fidelibus in carceribus detinebantur secretò ad se vocavit, eos adjurans, ut Viro suo sanitatem impetrarent, eis amplam remunerationem & libertatem ipsam promittens. Erant hi Anthimus Presbyter, & Sisinnius Diaconus, Maximus, Bassus, Fabius, Diocletius seu Diocletianus, & Florentius. Tunc Euthimius ei dixit, quòd si Pinianus Christi Fidem amplecti vellet, illicò sanus fieret. Retulit hoc Piniano Lucina: cùmque eum ad hoc paratum invenisset, Anthimum & Sisinnium in cubiculum introduxit, qui, postquam eum de Fide & mysteriis præcipuis instruxerunt, manus tandem illi imposuere.

III. Cùm ergo Pinianus fidem suam ac spem in Christum precibus testaretur, & pro eo Anthimus & Sisinnius quoque idem facerent, ecce claro lumine totum repletur cubiculum; quod per dimidium horæ durans sensim evanuit. Tunc Anthimus & Sisinnius Piniano ut surgeret dixerunt, qui surgens eodem momento perfectè sanus inventus est. Quare gratias agens Jesu Christo accivit ceteros supradictos Confessores, & septem diebus apud se retinuit, continuò laudans Deum & ab eis instructiones recipiens, ac demum ipse cum uxore & amicis suis Baptismum suscepit; omnesque Christianos in carceribus detentos libertate donavit vel ad opera dimisit. Nec miretur aliquis, quòd Eusebius dicat, primis Diocletiani annis Asiæ Ecclesias summâ pace gavisas fuisse; nam estò tunc contra Christianos nondum Imperialia ibi prodissent Edicta, hoc tamen non tollit, quin Præsides malo animo adversùs Christianos ducti, in Christianos tamquam Imperii & Deorum hostes desævirent.

IV. Versùs finem anni 287. Pinianus in Italiam reversus Confessores omnes, quorum opera Christi Fidem amplexus fuerat, ac plures alios Christianos secum adduxit. At ne hoc Romæ suspicionem ingereret, eos in variis terris ad ipsum spectantibus (multas enim possidebat) distribuit. Anthimus Presbyter cum Maximo, Basso, & Fabio in viciniis Romæ occultus moratus est. Sisinnius autem sedem fixit in quodam castro sibi à Piniano donato propè Auximum in Marchia Anconitana, ubi secum habebat Diocletium, Florentium aliosque plures. Ibi tribus annis summâ quiete Deo servientes eique laudes dantes morati sunt, donec anno 290. Martyrio coronati sunt. Consueverant Regionis illius habitatores singulis trienniis quædam sacrificia offerre cuidam Dæmoni, à quo, ut aiebant, responsa & oracula accipere solebant. Cùmque ea tunc obtulissent, Dæmon protestatus est, se non posse amplius responsa dare, nisi Sisinnius, Diocletius,

& Florentius sibi sacrificarent . Statim tres hi Sancti capti cum sacrificare renuerent , à Populo lapidibus obruti spiritum Deo reddiderunt : corpora è lapidibus extracta eodem in loco propè Auximum à Christianis sepulta fuere . De iis Martyrol. Rom. 11. Maii hæc habet : *Auximi in Piceno Sanctorum Martyrum Sisinnii Diaconi Diocletii & Florentii discipulorum Sancti Anthimi Presbyteri , qui sub Diocletiano lapidibus obruti Martyrium compleverunt .*

V. S. Anthimus , & qui cum eo erant non minorem nacti sunt sortem . Sacerdos quidam Idolorum Silvanus nomine cum in quodam Sacrificio invasus fuisset à Dæmone , adeò furiosus evasit , ut quemlibet sibi obvium occideret . Resciens hoc Anthimus , in nomine Jesu Christi nedum furorem ejus comescuit , sed & rationi restitutum elapso triduo ipsum cum uxore & filiis , efficaciam suarum precum ad Fidem convertit . Quo facto plures quoque Christo nomen dantes Silvani Aram everterunt . Hoc indignè ferentes qui in incredulitate permanferant , Anthimum coram Prisco Consulari seu Provinciæ Præside accusarunt . Hic comprehensum videns sacrificare nolle , imposito collo ejus ingenti lapide in Tiberim projici jussit : priusquam autem in aquas deiceretur membra ejus Pagani contriverunt ; sed inde ab Angelo vivus extractus fuit : unde sequenti die Pagani convolarunt ad irridendos Christianos , qui ad benedictionem accipiendam ad eum accedere solebant , at confusi remanserunt , dum ab eis perceperunt , Anthimum perfectè sanum esse in Oratorio suo preces fundentem . Quo miraculo plerique ad Fidem fuere conversi ; alii verò Sanctum Virum ad Judicem Priscum detulerunt : qui post tridui rigorem carceris , & suppliciorum minas , videns , se eum vincere non posse , decollari jussit : ejusque corpus in suo Oratorio sepultum fuit . Concordat Martyrol. Rom. 11. Maii dicens : *Romæ viâ Salaria Sancti Anthimi Presbyteri , qui post virtutum & prædicationis insignia in Persecutione Diocletiani in Tiberim præcipitatus & ab Angelo exinde ereptus , Oratorio proprio restitutus est : deinde capite punitus visor migravit ad Cælos .*

VI. S. Anthimo mortuo ejus Discipuli sub S. Maximi ejus amici disciplina se dederunt : sed cum de isto Pagani coram Prisco conquesti fuissent , ad eum comprehendendum misit : resistente autem Populo , Maximus ipse Priscum spontè adiit , à quo fustibus cœsus , demum capite truncatur . Bassus post ipsum Christianorum curam suscepit eos ad Martyrium animans . Sed cum aliquandiu post Populus in Sabinis ad sacrificandum Baccho con-

congregatus, suæ idololatriæ socium ipsum habere vellet, irridens ille, solo flatu Idola eorum evertit & in frustra contrivit : quare calcibus pugnis ac fustibus adeò percussus fuit, ut spiritum emitteret . Fabius verò Præsidis mandato capite truncatus fuit . Hæc tres Martyrol. Rom. die 11. Maii ita commemorat : *Romæ Sanctorum Martyrum Maximi, Bassi, & Fabii, qui sub Diocletiano viâ Salaria cæsi sunt .*

VII. Nunc ad Pinianum & Lucinam redeamus . De Piniano hoc solum habemus, quòd audito præfatorum Martyrum gloriofo triumpho, vehementer lætatus fuerit ; & quòd in Fide perseverans tandem in Domino quieverit . Addunt aliqui, & ipsum diversis tentationibus fuisse probatum, & titulum Confessoris adeptum fuisse, & multa Ecclesiis bona contulisse .

VIII. De Lucina dicit Anastasius de Vit. Pont. cap. 31. : *Matrona autem quadam nomine Lucina, quæ fuerat cum Viro suo Marco (fortè enim Pinianus Marcus quoque vocabatur) annos 15., & in viduitate sua habebat annos 19., suscepit Beatum Marcellum, quæ domum suam nomine Beati Marcelli titulum dedicavit, ubi diù nocturne hymnis & orationibus Domino Jesu Christo confitebatur : & postea subjungit, quòd Marcello Papa præ ærumnis defuncto, Corpus ejus collegit Beata Lucina & sepelivit in Cæmeterio Priscilla viâ Salaria .* Hæc Anastasius . Ex quibus colligitur, Beatam Lucinam circa annum 275. Piniano nupsisse, qui anno 290. mortuus sit, & tribus annis post reditum ex Asia anno 287. superstitem fuisse . Cùmque anno 288. S. Sebastianus Lucinæ apparuerit mandans ei, ut corpus suum sepeliret, benè concordat ; nam Lucina eo anno Romæ erat . Componitur etiam quòd ipsa corpus Marcelli Papæ, qui mortuus est anno 309. tumulavit, cùm annis 19. in viduitate manserit . S. Marcellus enim 16. Januarii mortuus fuit, & Lucina licèt eodem anno dicatur mortua, potuit aliquot mensibus superstes esse .

IX. Maximilianus Afer erat adhuc juvenis vigesimum primum ætatis annum & aliquot menses agens, patrem habebat Fabium Victorem nomine, & ambo Fidem Christi profitebantur . Contigit ergo, ut 12. Martii anni 296. Fusco & Anullino Consulibus Thebestæ in Numidia Fabius Victor cum Maximiliano filio coram Dione Proconsule præsentaretur, & Pompejanus Advocatus instaret, ut juvenis Maximilianus mensuraretur, ut militari servitio posset adscribi . Apud Romanos enim omnes juvenes certo numero annorum rei militari operam dare tenebantur : & propter ingentem juvenum numerum illi qui staturâ magis proceri & robusti essent eligebantur, & ideò mensurabantur .

Ita-

Itaque Dio Proconsul à Maximiliano petiit, quomodò vocaretur. Cui Maximilianus respondit, cur à me nomen meum postulas? An ut militiæ me adscribas? At scias mihi non licere arma deferre, quia Christianus sum: non quia absolute non liceret Christianis in Castris Imperatorum Gentilium militare; oppositum enim habemus in S. Mauritio, Thebæâ Legionè, S. Sebastiano & alijs; sed quia stantibus Diocletiani Edictis, qui in Castris ejus militabant, vix ab aliquo Idololatriæ & superstitionis actu poterant esse immunes. Verùm quamvis Maximilianus iteratò recusaret dicens, non possum, quia Christianus sum; attamen Dione Proconsule imperante, nolens mensuratus fuit, & inventus est habens altitudinis pedes quinque & uncias decem. Tunc Proconsul ut signaretur præcepit, Maximiliano reclamante: *non facio, non possum militare.*

X. Dion ei dixit, milita ne pereas. Maximilianus respondit: *Non milito, caput mihi præcide: non milito seculo, sed Deo meo.* Cùmque Dio ab eo peteret, quis hoc ei persuasisset, respondit: *Animus meus & ille qui me vocavit.* Dio ad Victorem patrem conversus: Consiliare, inquit, filium tuum. Cui Victor respondit: *Ipse consilium habet, ipse novit quid sibi expediat.* Tunc Dio ait Maximiliano: Milita & accipe signaculum. (Puncta in manibus, inscriptio nominis Imperatoris, & monile plumbeum, tesseræ erant Militis adscripti). Qui respondit: *Non accipio signaculum, jam habeo signum Christi Dei mei:* & addente Dione, statim te ad Christum tuum mitto, respondit: *Vellem modò facias, hoc & mea laus est.* Cùmque Dio Officiali ut eum signaret præciperet, ipse reluctans ait: *Non accipio signaculum seculi; & si signaveris, rumpo illud, quia nihil valet.* Ego Christianus sum: non licet mihi plumbum collo portare post signum salutare Domini mei Jesu Christi Filii Dei vivi, quem tu ignoras, qui passus est pro salute nostra, quem Deus tradidit pro peccatis nostris: huic omnes Christiani servimus, hunc sequimur vitæ principem, salutis auctorem. Cùmque post multa ei objecisset Proconsul, in Castris Imperatorum plures militare & Christianos esse: Maximilianus respondit. *Ipsi sciunt quid ipsis expediat.* Ego tamen Christianus sum & non possum mala facere. Et Dione dicente, quid mali faciunt? respondit: *Tu scis quæ faciunt.*

XI. Videns ergo Proconsul, Maximilianum Militiam constanter recusare, decretum ex tabella recitavit: Maximilianum, eò quòd indevoto animo sacramentum Militiæ recusaverit, gladio animadverteri placuit. Maximilianus respondit: *Deo gratias.* Annorum fuit in seculo 21. mensibus 3. dierum 18., & cùm ducere-

ceretur ad locum, sic ait : *Fratres dilectissimi, quantacumque potestis virtute, avidâ cupiditate properate, ut Dominum vobis videre contingat, & talem etiam vobis coronam tribuat.* Et hilari vultu ad patrem suum sic ait : *Da huic Spiculatori vestem meam novam, quam mihi ad Militiam praparaveras. Sic cum centenario numero te suscipiam, & simul cum Domino gloriemur.* (In hoc imitatus S. Cyprianum, qui, ut dixi, 25. aureos Spiculatori dari iussit). Et ita mox passus est ; & Pompejana Matrona corpus ejus de Judice eruit, & impositum in dormitorio suo (seu lectica) perduxit ad Carthaginem, & sub monticulo juxta Cyprianum Martyrem secus palatium condidit : quæ post tredecim dies mortua ibidem posita est. Pater autem ejus Victor domum suam plenus gaudio, quodd tale munus Domino præmisit, regressus est, ipse postmodum secuturus. Ex his discimus, Victorem quoque Martyrium subivisse. Vota enim Martyris exoptantis socium habere patrem merebantur exaudiri. Cum tamen plures Martyres sub nomine Victoris honoret Africa, quis ex illis iste fuerit, ignoramus : in Martyrol. Rom. 10. Martii mentio fit S. Victoris in Africa Martyris, in cujus solemnitate Sanctus Augustinus ad Populum sermonem habuit ; sed an sit is de quo loquimur, asseri nequit.

XII. Quæ de S. Maximiliano dixi sumta sunt ex Actis, quæ sincera à P. Ruinart, Tilmontio, Fleury & aliis Recentioribus reputantur. Porro quamvis in eis nulla Christianæ Religionis causa pro ejus morte afferatur : jure tamen inter Martyres locum obtinuit, qui cum se salvâ Christi Fide in Castris Diocletiani militare non posse fuisset arbitratus, renuens Militiæ insignia suscipere, morte punitus est. Ut enim docet S. Thomas 2.2. q. 124. ar. 5. in Corp. : *Omnia virtutum opera secundum quod referuntur in Deum sunt quadam protestationes Fidei, per quam nobis innotescit, quæd Deus hujusmodi opera à nobis requirit, & nos pro eis remunerat : & secundum hoc possunt esse Martyrii causa.* Unde *Beati Joannis Baptistæ Martyrium ab Ecclesia celebratur, qui non pro neganda Fide, sed pro reprehensione adulterii mortem sustinuit.* Passus fuit 4. Idus Martii seu 12. Martii, ut Acta ferunt. Et hac die Martyrologia Adonis, Notkeri, Bedæ, & Romanum ejus memoriam colunt : Bedæ quidem sub nomine Maximiliani ; Romanum tamen sub Maximiani nomine, & facit eum passum Romæ, cum ex Actis Thebestæ in Africa Civitate Episcopali Numidiæ reverâ passus sit.

SS. Marcellus & Cassianus Martyres .

I. **I**dem Christianæ innocentiae amor, qui S. Maximilianum apud Thebestem à suscipienda Militia deterruerat, Marcellum Centurionem ad dignitatis suæ insignia in Urbe Tingitana palam abjicienda provocavit. Quâ ratione id contigit, Acta ejus sincera produunt. In Civitate Tingitana (modò Tanger, quæ Urbs est notissima & Provinciæ Mauritaniae caput) procurante Fortunato Præside, adveniente natalis Imperatoris anniversariâ die, omnes in conviviis epulabantur & Diis Sacrificia offerebant. Marcellus quidam Legionis Trajanæ Centurio ea omnia tanquam profana & sacrilega detestatus, ne illis interesset, abjecto cingulo militari coram signis Legionis, clarâ voce testatus est: *Jesu Christo Regi aeterno milito*. Abjecit quoque vitem & arma (vitis enim erat Centurionum insigne) & dixit: *Ex hoc militare Imperatoribus vestris desisto, & Deos vestros ligneos & lapideos adorare contemno, quæ sunt Idola surda & muta. Si talis est conditio Militantium, ut Diis & Imperatoribus Sacra facere compellantur: ecce projicio vitem & cingulum, renuntio signis, & militare recuso*.

II. Stupefacti Milites talia audientes tenuerunt eum ac denuntiaverunt Anastasio Fortunato Legionis Præsidi, qui jussit eum in carcerem conjici. Finitis autem epulis, Fortunatus in Consistorio sedens Marcellum ad se adduci præcepit. Cui, cum venisset, dixit: Quid? adeò insaniisti, ut contra disciplinam militarem te discingeres, & balthem ac vitem projiceres? Marcellus respondit: *Jam die duodecimo Kalendarum Augustarum apud signa Legionis istius, quando diem festum Imperatoris celebrastis, publicè clarâ voce respondi, me Christianum esse, & sacramento huic militare non posse, nisi Jesu Christo Filio Dei Patris Omnipotentis*. Tunc Fortunatus Præses: Temeritatem tuam, inquit, dissimulare non possum; & ideò referam hoc Imperatoribus & Cæsari. Ipse sanus transmitters ad Dominum meum Aurelium Agricolaum agentem vicem Præfectorum Prætorio. Regulariter enim Legionis Præfectus judicium ferebat super suos Milites, eos ad Provinciæ Gubernatorem non remittens. Præfectus tamen Prætorii, cujus vices Agricolaus gerebat, etiam super Milites jurisdictione pollebat.

III. Marcellus itaque ad Agricolaum sub custodia transmissus

sus 30. Octobris ei præsentatus fuit , uno ex Officialibus ei dicente : Fortunatus Præses Marcellum hunc unum ex Centurionibus ad potestatem tuam transmissit . Præstò est Epistola super nomine & factis ejus , quam si jubes recito . Jubente autem Agricolaò lecta hæc continebat : „ Miles hic , rejecto cingulo „ militari , Christianum se esse testatus , coram omni Populo in „ Deos & in Cæsarem multa blasphema locutus est : ideò eum „ ad te direximus , ut quod ex eodem claritas tua sanxerit , ju- „ beas observari „ . Recitatis itaque litteris , Agricolaus interrogavit Marcellum , an hæc locutus esset & an militaret : & Marcello affirmante dixit Agricolaus : Quo furore accensus es , ut projiceres sacramenta & talia loquereris ? Marcellus autem : *Nullus est* , inquit , *furor in eis qui timent Dominum . Talia locutus sum , projecì arma ; non enim decebat , Christianum hominem molestiis secularibus militare , qui Christo Domino militat .* His auditis Agricolaus hanc pronuntiavit sententiam : Marcellum , qui Centurio ordinarius militabat , qui abjecto publicè sacramento polluisse se dixit , & insuper apud acta præsidialia alta verba furore plena deposuit , gladio animadverti placet . Quibus eum non damnat morti directè tanquam Christianum ; tunc enim Ecclesiæ in Provinciis Constantii aliquà pace fruebantur .

IV. Cùm ergo ad supplicium duceretur , dixit Agricolaò : *Deus tibi bene faciat :* & his dictis capite cæsus occubuit . Ita ferunt Acta , quibus concordant Martyrologia Adonis , Usuardi , Romanum &c. , quæ die 30. Octobris , quâ ut ex Actis capite damnatus fuit , ejus memoriam colunt ; Romanum præcipuè his verbis : *Tingi in Mauritania passio Sancti Marcelli Centurionis , qui capitis abscissione Martyrium complevit sub Agricolaò agente vices Præfecti Prætorio .* Ubi notat Baronius , quòd fuit Marcellus pater duodecim filiorum , qui omnes parem patri assecuti sunt coronam Martyrii ; ut ex Breviario Eborensi , & in Chron. Hispan. Vascæi , & in Flor. SS. Hispaniæ . Hunc Martyrem tanquam ex sua Patria ortum sibi vindicant Hispani Scriptores præcitati , & plura habet Tamarus Salazar in Martyrol. Hispanic. ad diem 30. Octobris : ubi addit , ejusdem Sancti Martyris Corpus anno 1493. sub Ferdinando Rege Catholico ex Urbe Tingitana in Hispaniam adductum fuisse ; ubi in Urbe Legionensi , quæ Regni cognominis caput est , asservatur . Ejus Martyrium Vascæus & plerique etiam Recentiores referunt ad annum 198. sub Faustis secundo & Galli Consulatu : & certè ante magnam Diocletiani Persecutionem poni debet .

V. S. Marcelli constantia alium Martyrem Christo peperit .

Exceptor seu Notarius, qui sententiam Agricolai in S. Marcellum scripsit, Cassianus vocabatur. Is scrip̃tā ex officio sententiā, videns iustam Martyris constantiam, & propterea Agricolai sententiam iudicans iniustam, eam clarā voce execratus, graphium & codicem projecit in terram. Inopinato hoc facto attoniti Officiales omnes manserunt, risit Marcellus; & Agricolaus tremefactus exsiliens de sella dixit: quare cum detestatione codices projecisset? respondit Cassianus, iniquam eum dictasse sententiam: quem ut ne se amplius redargueret, statim iussit abduci & in carcerem trahi. Marcellus qui videns Cassiani factum præ gaudio riserat, eum sibi breviter in Martyrio comitem futurum præsciens, capite truncatus fuit. Post mensem autem 3. Decembris ejusdem anni 398. ad eundem locum, in quo Marcellus fuerat auditus, introductus & interrogatus Cassianus, cum iisdem responsionibus ac sententiis, quibus S. Marcellus, locutus fuisset, eodem coronatus Martyrio ipsum secutus fuit. Quod Martyrol. Uuardi & Romanum 3. Decembris his verbis celebrant: *Tingi in Mauritania passio Sancti Cassiani Martyris, qui Exceptoris diu gerens officium, tandem cælitus inspiratus, execrabile duxit Christianorum neci deservire: unde renuntiavit eidem officio, sub Christiana Confessione triumphum meruit obtinere Martyrii.* Et Prudentius L.4. de Coronis versu 45. hæc habet.

*Ingeret Tingis sua Cassianum
Festa Masylum monumenta Regum.*

§. XI.

Generalis Persecutionis initium & causa.

I. **M**artyres, quos sub Diocletiano passos hætenus recensui, præter alios innumeros, Generalem Persecutionem publicis Ediçtis adversus Christianos toto Imperio indictam præcesserunt: odio enim Proconsulum vel Magistratum, & Legibus antiquis non revocatis, vel aliquo particulari eventu fiebat, ut in aliqua Urbe veletiam Provinciâ Christiani ad Iudices delati, & Diis sacrificare recusantes, ultimo supplicio addicerentur. Solùm ergo anno 19. Imperii, & Christi 303. vel 302., publicis Ediçtis Christianos ubique inquiri & persequi Diocletianus imperavit. Ita narrat Eusebius L.8. hist. cap.2. his verbis: *Nonus decimus agebatur annus Imperii Diocletiani, cùm mense Dystro, quem Romani Martium vocant, appetente die Feslo*
Do-

Dominica Passionis proposita sunt ubique Imperialia Ediſta , quibus Eccleſiæ quidẽ ad ſolum uſque dirui , Sacri verò Codices flammiſ abſumi jubebantur ; utque honorati quidẽ infamiã notarentur , Plebei verò libertate ſpoliarentur , ſi in Chriſtiani Fidei propoſito permanſiſſent . Et primũ quidẽ contra nos Ediſtum hujusmodi fuit ; ſed non multò poſt aliæ rursũ Litteræ ſupervenerunt , quibus mandabatur , ut omnes ubicumque Eccleſiarum Antiſites , primũ quidẽ conjicerentur in vincula , deinde verò Diis ſacrificare omni- bus modis cogerentur .

II. Sævus hujus Perſecutionis incentor fuit Galerius Maximianus Cæſar, quem Diocletianus adoptaverat . Cũ enim Imperator 19. anno Regni ſui Nicomediam ut ibi hyemaret adventaſſet , Galerius Maximianus Cæſar poſt devictos Perſas illuc & ipſe acceſſit . Is Diocletiano ſuadere cœpit , ut pro pace Imperii & Deorum honore Chriſtianos ex Orbe exterminaret . Hoc faciebat Galerius matre ſuã extimulante, ſeminã ſuperſtitionibus deditã : quæ Deos montium venerabatur , & quotidie Sacrificia & convivia ex carnibus immolatis peragebat ; quibus cũ Chriſtiani intereſſe nollent , imò eodem tempore precibus ac jejuniiſ indulgerent , ſummum adverſũ illos odium ipſa conceperat , & aſſiduus quereliſ filium non minũ matre ſuperſtitioſum ad eos perdendos excitabat . Galerius ergo totã hyeme ſuper hiſ cum Diocletiano conſilium habuit : cũque hoc fieret prorsũ ſemotis arbitriſ , & nemine ad conſilium vocato , exiſtimatum fuit , capitale aliquod ad Imperium pertinens ab illiſ tractari . Galerii ſuggeſtionibus diũ reſtitit Diocletianus , offendens ei valdẽ damnofum fore totius Orbis quietem hoc factò turbare ac tantum ſanguinem fundere , Chriſtiani enim nil aliud , quam pro ſuo Chriſto mori exoptabant . Præſtare igitur ac ſufficere , ut illiſ Religioniſ homineſ à Palatii publiciſ officiis & à Militia arcerentur .

III. Verũ cũ hiſce rationibus Galerius non acquieſceret , Diocletianus rem hanc cum aliis conferre expediens judicavit : ejus enim erat malitiæ , ut cũ de bono alteri imponendo ageretur , ipſe ſolus deliberaret , & ſic ſibi ſoli honorem & amorem reſervaret ; cũ verò de re odioſa & alteri injurioſa tractaretur , aliorum conſilium adhiberet , & ſic culpam & querelaſ in alioſ vertere poſſet . Itaque convocatiſ pauciſ quibuſdam juſtitia & Militia Officialibuſ , ſervato dignitatis ordine , quid de hoc ſentirent à ſinguliſ petiit . Quidam odio particulari lati in ſententia fuere , Deorum & publicæ Religioniſ hoſteſ eſſe prorsũ exterminandoſ ; alii verò qui ex ſuo privato ſenſu aliter ſentiebant ,

ut tamen Galerio adularentur, in idem votum venire.

IV. Diocletianus necdum permotus dixit, in hoc negotio Deos esse consulendos. Quare ad Apollinem Mileti auspiciem misit: quò cum pervenisset, Apollo non ex hominis ore sed è profundo antri specu respondit: quòd Iusti qui erant super terram, ne veritatem diceret, ei obstitabant; & propterea oracula, quæ ex tripode reddebat, falsa erant. Idem Presbytera locuta est, sparsis capillis hanc humani generis calamitatem deplorans. Diocletianus postulavit, quinam essent Iusti super terram: uno autem ex iis, qui Sacrificiis ministrabant, respondente, hos iustos proculdubio esse Christianos, Imperator grato animo hoc audiens, ut amicis suis & Apollini satisfaceret Persecutionem decrevit: volens tamen ut moderatè ac sine sanguinis effusione exerceretur; quamvis Galerius eos, qui sacrificare recusarent, vivos comburendos esse contenderet, ejusque votum magna in parte ut dicemus factò prævaluerit.

V. Quæ dixi de Apollinis consultatione, responso, & decretà Persecutione, ex Constantino Magno in ejus vita refert Eusebius L. 2. cap. 50. his verbis: *Apollinem tunc temporis ex antro & tenebroso quodam specu, non ex hominis ore oraculum edidisse ferebatur; quo justos viros in terris degentes obflare sibi ajebat, quominus vera prædiceret: atque idcirco falsa ex tripode oracula reddi.* (Tripus sella erat tres habens pedes, in qua Phœbas seu mulier Sacerdos Apollinis sedebat & responsa dabat). *Hanc ob causam ille coronam incultam dimisit: & expulsâ divinandi arte, tantum inter homines malum lamentabatur.* Et cap. 51. idem Constantinus referens, se adhuc adolescentem audivisse Imperatorem ex Prorektoribus suis curiosè sciscitantem, quinam essent iusti in terris degentes, & quemdam ex sacrificulis, qui circa illum (Diocletianum) erant, respondisse, eos esse Christianos: ille responso hominis quasi melle quodam avidè absorpto, gladios ad puniendâ crimina paratos, adversus Sanctitatem omni reprehensione vacuam distrinxit. Statim igitur sanguinolenta Ediçta, cruentis ut ira dixerim mucronibus scripsit: & Judicibus præcepit, ut ingessii solertiam sibi à natura insitam, ad acerbiora supplicia excogitanda intenderent.

VI. Ex his manifestè apparet Christianæ Veritatis potentia, quæ ipsius Apollinis testimonio falsis Deorum oraculis ora obturavit, ut ea ampliùs edere non possent. Et rursus ejusdem Sanctitas dum illius soli Professores ab Apolline & Aruspice vocantur Iusti. Apparet insuper summa cæcitas & injustitia Diocletiani præfatum Decretum pronuntiantis, nimirum soli Christiani sunt iusti, ergo sunt plectendi & morte exterminandi: quid aliud

aliud est, hoc nisi de Mundo justos eliminare, ut soli injusti mancant ? At scio: justorum opera nempe Christianorum contraria erant operibus injustorum nempe Paganorum ; & ideo in Christi Sæctatoribus, quia justis, impleri debebat quod Sapientiæ 2. v. 12. dixerunt impii : *Circumveniamus ergo Justum, quoniam inutilis est nobis & contrarius est operibus nostris & impropere nobis peccata legis & diffamat in nos peccata disciplinæ nostræ*. Sicut ergo quia Christus scandala & peccata Scribarum & Phariseorum damnavat, coacto concilio isti eum morti iniquè addixerunt Joann. 8. ita quia Christiani Paganorum superstitiones & mores pravos justè reprehendebant, coactum est adversus eos præfatum concilium, in quo eos exterminare decretum fuit.

VII. Dies pro Decreti executione designatus, tanquam conveniens & ferri propitius, fuit Festum Terminalium, nempe 23. Februarii, quo antiquus Romanorum annus terminabatur : ut idem qui anni terminus erat, Religionis Christianæ quoque terminus fieret, cum reverà fuerit terminus prosperitatis, quam Diocletianus in suo Imperio antea obtinuerat. Illo igitur die (qui fuit anni Christi 303.) illucescente, Præfectus Prætorio cum Ducibus Tribunis & aliis ad Ecclesiam Nicomediam inopinatè accessit, ubi effractis portis, ac Dei simulacro incausum quæsito, quotquot invenerunt codices combusserunt, reliqua prædæ exposita relinquentes. Ecclesia in loco elevato sita è Palatio prospici poterat. Ambo Principes quod ageretur è fenestris spectantes diù invicem contenderunt, an flammis absumenda esset. Asterebat Galerius, sed Diocletianus advertens, eam esse multis ædibus undique circumdatam, ne magna Urbis pars incendii periculo exponeretur, satius duxit eam solo æquandam esse. Confestim igitur Milites Prætoriani missi ferreis instrumentis eam etsi eminentem paucis horis solo æquatam & lapidum cumulum effectam reliquerunt. Diabolus enim (ut ait Eusebius L. 10. hist. cap. 4.) irritatus tor victoriis, quas Christus super ipsum reportaverat, nec quidquam contra Omnipotentem valens, super visibilia & materialia Tempia ad eum adorandum consecrata primum suum furorem evomit: similis canis qui dentibus mordet lapides, quando eum qui lapides jecit mordere non potest.

VIII. Sequenti die 24. Februarii primum contra Christianos Edictum publicatum fuit omnium antea Edictorum atrocissimum. Neminem quidem morti addicebat, sed omni jure causam dicendi Christianos privabat, omni quoque possessione gradu dignitate ac bonis spoliabat, Plebejos perpetuæ servituti addi-

gens

cens, liberam in omnes agendi iudiciis potestatem relinquens: Ecclesiæ omnes à fundamentis dirui præcipiebantur, Christiani cœtus agere sub gravissimis pœnis interdicebantur. Verùm quamvis hoc primum Diocletiani Edictum contra Christianorum vitam nil expressè statueret, plures tamen Martyres efficere non destitit, præcipuè ob Servorum Dei constantiam in deneganda sacrorum Codicum traditione.

IX. Post Edicti publicationem accidit factum quod Eusebius L.8. hist. cap.5. his verbis enarrat: *Simul ac Edictum contra Ecclesias propositum est Nicomedia, Vir quidam minimè obscurus, sed secularium bonorum prærogativâ imprimis conspicuus, zelo quodam Divino commotus & ardore Fidei excitatus, Edictum illud in publico & illustri loco affixum detraxit, & tamquam impium ac scelerum manibus suis discerpsit; idque duobus Imperatoribus in eadem Urbe commorantibus, quorum unus Senior Augustus primum inter omnes Imperii gradum, alter verò quartum obtinebat. Hic igitur cùm primus omnium in ea Civitate huiusmodi facinore inclarnisset, statim ea supplicia perpeffus, quæ post tantam audaciam ei insignenda esse credibile erat, lætitiâ ac tranquillitatem animi usque ad ultimum spiritum conservavit. Hunc Eusebius nomine non designat, Martyrologia tamen Ufuardi, Adonis, Romanum &c. eum Joannem appellant. Sic enim in Romano die 7. Septembris legitur: *Nicomedia natalis Beati Joannis Martyris, qui cùm videret crudelia Edicta adversus Christianos in foro pendere, Fidei ardore accensus, injectâ manu illa detraxit atque discerpsit: cùmque hoc relatum esset Diocletiano & Maximiano Augustis in eadem Urbe constitutis, omnia suppliciorum genera in eum experiri jusserunt, quæ vir nobilissimus tantâ alacritate vultus ac spiritus sustinuit, ut ne tristis quidem pro his videri potuerit. Lactantio teste L.de Mort. Persec. cap.13., præter ordinarias torturas, super cratem ardentem positus & flammis subtus violenter accensis, igne consumptus hostia Christi effici meruit.**

X. Galerius his non contentus, Edictum volebat quod rem ad extremam crudelitatem deferret. Ad hoc ut Diocletianum traheret, immane facinus meditatus fuit. Cùm vehementi fulmine ignis in aliqua Palatii parte accensus fuisset (ut apud Euseb. Orat. Constantini cap.25.) jussit secretò Galerius per servos suos incendium ad alias Palatii partes extendi; spargens, opera Christianorum excitatum fuisse, qui unâ cum Eunuchis conjurassent, utrumque Imperatorem in proprio Palatio vivum comburere. Diocletianus etsi homo callidus, nihil tamen de hoc mendaci artificio suspicatus, sed toto furore concitatus, confestim

stim iussit, ut omnes domestici crudeliter torquerentur . Quæstioni aderat Diocletianus ipse , & lateri ejus adstabat Galerius ipsius iram ne teperceret magis inflammans . Magistratus omnes in reis inquirendis laborabant ; sed cum soli innocentes , exclusi Galerii servis , qui verè erant rei , quæstioni subjicerentur, nihil inde extrahi potuit . Quindecim elapsis diebus alterum incendium exarsit quod tamen brevi sopitum fuit ; sed nec hujus auctor qui fuit idem Galerius , quibuscumque repetitis quæstionibus, detegi unquam potuit . Quâ eâdem die Galerius ipse è Palatio & Nicomedia decessit, conclamans, se adhuc mediâ hæme fugere , ne à Christianis in proprio Palatio vivus combureretur . Diocletianus interea magis exasperatus iram nedum adversus domesticos , sed & adversus omnes extendit, ut statim dicam .

§. XII.

Martyres Nicomedia , & S. Georgius .

I. **P**rimos sui furoris conatus in Priscam Imperatricem & uxorem, & Valeriam filiam & Galerii conjugem exercuit, utramque ad sacrificandum Diis (fortè enim Christianæ erant) adigendo, quod illæ infelicitè præstiterunt . Tantum earum crimen non distulit Deus punire post mortem ; nam dimisso à Diocletiano Imperio, & eo adhuc in vivis agente, omnia infortunia, quæ personæ talis conditionis pati possunt, & ipsæ passæ sunt ; & tandem mandante Licinio, publicè truncato capite eorum corpora in mare projecta fuere anno 313. . Ex Constantio cap. 13. Potentiores inter Eunuchos, qui principales in Palatio antea fuerant, furoris impetum primi experti sunt, quem illi invidiâ constantiâ usque ad mortem superarunt . Hi præcipuè fuerunt Petrus Gorgonius, & Dorotheus ac cæteri cubicularii .

II. De his audire præstat Eusebium L.8. cap.6. : *Verùm præ omnibus, qui unquam sive apud Græcos sive apud Barbaros admiratione digni, & ob fortitudinem celebres extiterunt, gloriosos atque illustres Dei Martyres ea tempestas tulit . Dorotheum scilicet & reliquos cubicularios pueros : qui tametsi summi honoris prærogativâ ab Imperatoribus ornati essent, nec minùs ab iisdem diligerentur quàm filii ; probra tamen pro pietate tolerata & arumnas & diversa mortis genera adversus ipsos excogitata, majoris reverà pretii esse duxerunt, quàm gloriam & delicias hujus seculi . Horum igitur animi dumtaxat hic exitum referam, ut ex illo Lectores conjicere poss-*

possint, quid reliquis contigerit. Productus est in medium quidam illorum in Urbe superius memorata (Nicomedia) coram iis quos dixi Imperatoribus: iussusque Diis sacrificare, cum id pertinaciter recusaret, nudato corpore sublimis tolli precipitur, & verberibus concidit, quoad tandem vel invitus iussis obtemperaret. Sed cum ille huiusmodi tormentis excarnificatus, in eadem sententia firmius permaneret; ipsi jam ossibus denudatis, commixtum sale acetum tabescentibus corporis membris infuderunt. Quos dolores cum ille etiam toleraret, craticula deinceps & ignis in medium affertur: & reliquia corporis ipsius instar carniū, quæ ad cibum parantur, igne assatæ sunt; idque non simul ac semel sed paulatim, ne scilicet celeri exitu defungeretur. Nec carnifices qui eum rogo imposuerant, dimittere illum sinebantur, nisi prius iussis post tot cruciatus acquievisset. Verum ille in eadem semper sententia perseverans victor ipsis in tormentis animam exhalavit. Huiusmodi fuit Martyrium unius ex Imperatoris cubiculariis, digni profecto suo nomine, Petrus enim ille vocabatur. Reliquorum verò Martyria nibilò inferiora, tamen brevitatē studio hic omitemus. Id tantum retulisse sufficiet, quod Dorotheus & Gorgonius unā cum aliis pluribus, qui in Palatio ministrabant, post cuiusquemodi certamina elisis laqueo saucibus Divina victoria præmium adepti sunt. Hætenus Eusebius.

III. Vide Lector, quantum unius viri Galerii Diocletiani animum transmutaverit. Hos quos ante speciali dilectione prosequabatur, etiam quod Christiani essent; quorum fidei res suas imò & personam suam commiserat, repente velut prodicionis reos & quia Christianos, extremo odio execratur, & inauditos atrocibus addicit suppliciis. Hi ejus uxorem Priscam & filiam Valeriam ad Fidem Christi traxisse feruntur, Lact. de Mort. Pers. cap. 15.; diversâ tamen sorte: nam infelices istæ à Fide quam juraverant deficiendo, vitam opprobrio & quidē sempiterno clausurunt; illis quia in Fide constantibus tormenta & ipsa mors cessit in gloriam ac triumphum. Ex præfata Eusebii narratione colligitur, S. Petrum statim post primum incendium sustinuisse Martyrium, cum dicatur productus coram duobus Imperatoribus: nam, ut dixi, secuto secundo incendio, eadem die iniquus Galerius abcessit. Et quidē non simul & eadem die fuisse passos indicant Martyrologia Bedæ, Ufuardi, Adonis, & Romanum, quæ Passionem S. Petri die 12. Martii colunt, SS. verò Dorothei & Gorgonii 9. Septembris; ubi feruntur eadem tormenta passi, quæ S. Petrus, & tandem laqueo necati; cum tamen Eusebius hos duos solum meminerit, laqueo fuisse occisos: sed cum Eusebius dicat, se ex unius Petri Martyrio

nota

nota facere velle quæ aliis contigerunt, credibile fit; Dorotheum & Gorgonium eadem quæ Petrus pertulisse tormenta, & ulterius laqueo fuisse necatos.

IV. Horum Martyrum Corpora honorificè sepulta, paulò post Diocletiani iussu fuerunt inde extracta & in mare projecta; ne, ajebat, ipsi Christiani eos adorarent & tamquam Deos haberent (Euseb. L.8. cap.6.): nesciens, honorem, quem nos Martyribus exhibemus, summè inferiorem esse cultu, quo soli Deo servimus. Ad hunc immanem Diocletiani errorem allussisse creditur Lactantius L.5. Instit. cap.11. dum ait: *Nemo hujus tantæ belluæ immanitatem potest pro merito describere, quæ uno loco recubans, tamen per totum Orbem dentibus ferreis sævit, & non tantùm artus hominum dissipat, sed & ossa ipsa comminuit, & in cineres furit, ne quis extet sepulturae locus: quasi verò id afficerent qui Deum confitentur, ut ad eorum sepulcra veniatur, ac non ut ipsi ad Deum perveniant. Quenam illa feritas quæ rabies quæ insania est lucem vivis, terram mortuis denegasse? Corpus tamen saltem S. Gorgonii è mari fuisse extractum, indicat Martyrol.9. Septembris, ubi ait: Interjecto autem tempore Beati Gorgonii Corpus Romæ delatum fuit ac viâ Latinâ positum, & inde ad Basilicam S. Petri translatum: postea autem in Gallias deportatum, testis est Sigebertus in Chron. anno Domini 764.*

V. Inter innumeros Martyres, quos hæc occasione Diocletiani rabies immolavit, post trium præfatorum Martyrum, quatuor excubiarum Præfecti, inter quos unus Eusebius vocabatur, ad fidem unâ cum suis uxoribus conversi, mortem pro Christo subire. Bollandus hos eisdem esse putat, quos Græci 20. Januarii Bassum Eusebium Eutychem & Basilidem appellant; de quibus in Menol. Basilii hæc habent: *Isti quoque Sancti temporibus impij Diocletiani Imperatoris Martyrium subierunt. Cùm enim primi in Palatio essent, opibusque & gloriâ præcellerent, videntes Sancti Theopempti in perferendo Martyrio atque cruciatibus constantiam, crediderunt in Christum; solutisque cingulis & ante Imperatorem projectis, se Christianos professi sunt. Tunc præcepit Imperator, ut si ex animo id dicerent, irent, & pecuniam suam omnem aliis traderent, qui promptissimo animo id executi sunt. Tunc Sanctus Bassus in altam foveam demissus terræque usque ad pectus obrutus, præcis manibus spiritum Domino tradidit. Eusebius verò inter duas columnas inverso capite suspensus, securi intercisis obiit. Eutychem autem manibus pedibusque ad quatuor palos alligatis in tres partes discerptus obdormivit. Demum Basilides gladio dissecto per medium ventrem ad Dominum migravit.*

VI. Quia verò præfati quatuor Sancti dicuntur conversi visâ constantiâ S. Theopempti, operæ pretium est ejus referre Martyrium ex eodem Menol. 4. Januarii, ubi sic lego: *Hic temporibus Diocletiani Imperatoris floruit. Cùm autem adversus Christianos Persecutio mota fuisset, primus omnium in eadem Persecutione Christum professus, Martyrii coronam accepit. Nam comprehensus, in ardentem furnum injicitur, sed inde illæsus evadens, effosso oculorum altero, poculum à Theona Mago, jussu Imperatoris veneno infectum exhaurire cogitur, ut sic interiret. Verùm cùm Theonas illam nullo damno affectum vidisset, in Christum credidit. Tum irâ excandescens Imperator, Sanctum Theopemptum decollari mandavit; Theonam verò in altissimam foveam demitti, & congesto à Lictoribus aggere obrui. Quod cùm factum esset, suffocatus in loco Beatam animam suam Deo reddidit: pro quo uterque Sanctus alacri animo proprium sanguinem profundens, Mundum & que in eo sunt abnegavit. Horum agonem commemorat quoque Martyrol. Rom. die 3. Januarii: addens Zosimum & Athanasium Commentariensem; quos tamen dicit passos fuisse in Cilicia. Hoc tamen ad præsens intentum parùm refert.*

VII. Redeundo autem ad quatuor prælaudatos Martyres, fertur quoddam eorum servi cum uxoribus & filiis numero 100., se Diocletiano Nicomediæ præsentarunt, dicentes se Christianos esse, quos repertos in Fide constantes trucidari jussit. De his agunt Græci 7. Februarii: in Menol. Basil. in hoc diversi, quoddam Martyres ad tria millia extendunt, & S. Petrum nominant, quem faciunt Alexandriæ Episcopum: sic ergo dicunt: *Certamen Sanctorum trium millium Martyrum, qui Nicomedia Martyrium passi sunt. Isti subditi fuerunt quatuor Protektoribus, qui à Diocletiano Imperatore missi, Sanctam Petrum Alexandria Archiepiscopum comprehensum decollarunt: tum ad Christi Fidem conversi unâ cum omnibus suis post Sancti Petri mortem, ipsietiam pro Christo cæsi sunt. Videntes autem pro Christo suos Dominos mori, tristes & zelo incensi, assumtis uxoribus suis & liberis omnibusque propinquis, venerunt Nicomediam; & in conspectu Imperatoris exclamarunt dicentes: nos etiam Christiani sumus: quod ubi audivit Diocletianus, turbatus & irâ excandescens, primum quidem blanditiis illos inducere conatus est, ut Christum abnegarent; verùm cùm nihil profecisset, præcepit Militibus, ut gladiis illos coram se conciderent. Horum Martyrium aliqui ad ann. 304. alii ad 305. referunt: sed hæc cum morte S. Petri Alexandrini Episcopi non coherent, quam Baronius ad ann. 310. protrahit.*

VIII. His ergo relictis ad certiora transeo. Persecutio, quæ
à Pa-

à Palatio Imperatoris initium sumserat, ad Ecclesias Nicomediæ furorem extendit. Ferunt Græci in Menol. 28. Decembris, quodd cum Christiani in Festo Natalis Domini Nicomediæ in Ecclesia convenissent, omnes numero 20. millia, unico excepto Episcopo, qui ut alios juvaret à Deo servatus fuit, igne combusti sunt. Hoc item confirmant Latini in Martyrol. Rom. 25. Decembris his verbis: *Nicomediæ passio multorum millium Martyrum, qui cum in Christi Natali ad Dominicum convenissent, Diocletianus Imperator januas Ecclesiæ claudi jussit & ignem circumcirca parari, tripodemque cum thure præ foribus poni, ac præconem magnâ voce clamare, ut qui incendium vellet effugere, foras exirent & Jovi thus adolerent; cùmque omnes unâ voce respondissent, pro Christo se libentiùs mori; incenso igne consumti, eo die nasci meruerunt in Cælis, quo Christus in terris pro salute Mundi nasci dignatus est.* Alii etiam, qui extra rogum fuerant, diversis suppliciis affecti sunt, ut Indes Eunuchus alligato ad collum saxo in mare demersus, Zeon copiarum dux confusus saxo oculis ac dentibus, unâ cum Dorotheo præposito, capite plexus: Mardonius igni combustus; Mygdonius in foveam injectus; Glycerius Presbyter flammis traditus; Theophilus Diaconus præcisâ linguâ in campo lapidatus, & complures alii eodem die coronam Martyrii acceperunt. Quorum omnium Sacras Reliquias Sancta Domina sepelivit, deinde navigio impositas honesto loco abscondit. Quare delata, primùm capite plectitur, mox igni comburitur. Aliquorum ex præfatis meminit Martyrol. Rom. eadem die, addens Agapen & Theophilam Virgines; cum hoc discrimine, quodd Græci hos Martyres volunt sub Maximiano fuisse coronatos, Martyrol. verò sub Diocletiano, ait enim: *Nicomediæ Sanctorum Martyrum Iudis Eunuchi, Domna, Agape & Theophila Virginum & sociorum, qui in Persecutione Diocletiani post longa certamina diverso mortis genere coronam Martyrii sunt affecti.* Et hoc verius puto, Maximianus enim Nicomediæ tunc non erat.

IX. Anthimus Nicomediensis Episcopus capite truncatus est (referente Eusebio L. 8. cap. 6.) de quo Martyrol. Rom. 27. Aprilis ait: *Nicomediæ natalis Sancti Anthimi Episcopi & Martyris, qui in Persecutione Diocletiani ob confessionem Christi Martyrii gloriam capitis obruncatione suscepit. Sequuta est quoque illum universa penè gregis sui multitudo, quorum alios Juxda gladio obruncari, alios ignibus conflagari, alios navigiis impositos pelago immergi fecit.* Causa tantæ stragis, ut dixi, fuit incendium calamitosè Christianis imputatum. Propterea capti Presbyteri &

Ministri Ecclesiæ, cùm tanquam incendiarii puniri defectu probationum non possent, puniebantur quia Christiani, & quotquot ad eos pertinebant, trahebantur cum eis ad supplicium. Hinc (ait Eusebius) *Imperiali jussu quotquot illic erant Dei cultores, acervatim cum suis famulis alii gladio, flammis alii consumti periere. Tunc Divinâ quâdam alacritate, quæ verbis explicari non potest, conciti Viri simul ac Mulieres in ardentem rogam insiluisse dicuntur. Alios quoque innumerabiles vinctos & scaphis impositos Carnifices in profundum mare projecere.*

X. Eâdem crudelitate, ut scribit Lactantius L. de Mort. Persec. cap. 15., in reliquos de Nicomediæ Populo agebatur. In omnibus Templis assidebant Judices, qui omnes ad sacrificandum compellerent, & renuentes morti addicerent. Carceres hisce innocentibus adeò pleni erant, ut nullus verè criminosis superesset locus, & nova in dies pro eis torquendis & necandis excogitabantur supplicia: ac ne fortè contingeret, ut erga aliquem Christianum justitia non redderetur, ubique coram Judicibus disposita erant Altaria, ut sic prius contra Deum sacrilegi fierent, quàm causam coram homine dicerent. Ex quo fit ut innumerabiles hâc occasione Martyrologia nobis exhibeant Nicomediæ passos, & inter cætera Romanum 2. Octobris dicat: *Nicomediæ Sancti Eleutherii Militis & Martyris cum aliis innumeris, qui, cùm Diocletiani Regia incendio flagrasset, falsò hujus criminis accusati, jubente eodem sævissimo Imperatore acervatim necati sunt: quorum alii gladiis obtruncabantur, alii ignibus cremabantur, alii in mare præcipitabantur. Sed horum primus Eleutherius, cùm diù cruciatus per singula tormenta validior redderetur, Martyrium victoriæ suæ, ignibus velut aurum examinatus, complevit.* S. Eleutherium Militem facit Martyrol. Romanum, quia, inquit Baronius ex Eusebio L. 8. cap. 4., Persecutio à Militibus cœpit.

XI. Hoc tempore à Græcis collocatur Martyrium S. Euphrasiæ, quæ à Beato Anthimo servare Fidem & Virginitatem edocla, utramque extraordinario modo servasse dicitur. Ita enim in Menol. Basilii 19. Januarii dicunt: *Sancta Martyr Euphrasia Maximiano Imperatore, ex Urbe Nicomedia fuit pari & generis & morum laude commendata. Comprehensa autem à Idolis sacrificare compulsæ, cùm id facere detrectaret, barbaro & agresti homini violanda traditur: quæ verita, ne sibi vis inferretur, bujusce-modi artificium excogitavit. Si me, inquit ad illum, dimiseris, dabo tibi pharmacum, quod si gestaveris, nec gladius nec aliquid quidpiam tibi nocebit, nec vulnus insligere poterit, sed ab hostibus tuisque incolumis & illæsus servaberis. Cui ille: Hoc equidem*

dem discere vellem mibique persuaderi. Tum Euphrasia extento statura collo: Percute, inquit, gladio: nec enim poteris caput mihi amputare. Qui adhibita illius verbis fide, gladio eam percussit & caput à cervicibus abscidit. Atque ita ab eo erepta est. Ita Græci: penes quos fides sit, hæc enim S. Euphrasia Latinis est ignota.

XII. Inter eos, qui initio Persecutionis anno 303. passi sunt Nicomediæ, enumerantur S. Georgius; inter Martyres quidem celeberrimus, sed cujus Acta nimiam varietate etiam Antiquis suspecta fuere: ideòque anno 494. à Gelasio in Concilio Romano rejecta fuere tanquam ab Hæreticis vel Viris indoctis ac superstitionis conficta. Ex quo concludi videtur, quòd cætera à Posterioribus elaborata velut ab impuro fonte prodeuntia eadem suspitione laborarent. Unde Ecclesia in Martyrol. Rom. 23. Aprilis & in Breviario ejus quidem ut Martyris Festum ac Officium celebrat, sed in ejus gestis recensendis jure quidem merito sobria est. Locus & tempus ejus Martyrii nec etiam constant; Bollandus tamen probabile censet, eum Nicomediæ die Veneris 23. Aprilis anni 303. initio Persecutionis fuisse passum: à quo non dissentior.

XIII. Ne tamen de S. Georgii Actis meum Lectorem prorsus jejunum dimittam, referam quæ de illo Græci in Menol. Basilii habent die 23. Aprilis, nimirum *Georgius Christi Martyr fuit imperante Diocletiano ex Regione Cappadociæ, illustri genere, ac dignitate comes. Persecutione autem adversus Christianos excitatâ, cum illi diebus singulis macerarentur, ipse coram Tyranno intrepidè se sistens, eum redarguit. Idcirco bastili in ventre percussus, & rota acutis undique ferreis circumseptæ cuspidibus alligatus, supernè exsolutus fuit: deinde in frustra dissectus, interim incolumis evasit. atque insperatò Imperatorem conveniens, multos ad Christi Fidem amplectendam induxit. Post hæc variis tormentis iterùm excruciatu, Magentio signum aliquod exposcente, Virum quandam, qui longè antea mortuus fuerat ad vitam revocavit: unde similiter plures Christo nomen dederunt, inter quos fuit quidam nomine Glycerius, cujus mortuum bovem Sanctus Georgius vitæ restituerat, qui etiam capite plexus est. Ipsi autem Sancto Georgio, cum Idola precibus subvertisset, gladio caput amputatum fuit. Ita Græci, quæ Lectoris judicio relinquo discutienda. De Glycerio agit Martyrol. Rom. 21. Decembris, quem passum Nicomediæ & Presbyterum facit: an verò idem sit, an ille de quo supra, dubito.*

XIV. Acta verò à Gelasio conficta, teste Baronio in Notis ad diem 23. Aprilis, multa portentosa mendaciis referta & Martyre indigna, quæ non ad pietatem legentes sed ad Infidelita-

litatem potiùs adducerent, hæc continebant: suspectum S. Georgii contubernium Viduæ; artem dolosam ejusdem ad perdendos Gentiles; innumera præterea tormenta, quibus nec mori potuit, ut præter equuleos ungulas crates ferreas ignitas rotamque mucronibus undique præfixam, calceosque armatos clavis, quæ & in aliis leguntur Actis, etiam arcam ferream clavorum cuspidibus intus ad feriendum aptatam, præcipitium, contusiones malleis ferreis iteratas, columnam ingentis ponderis super eum positam, ingentisque molis saxum super caput revolutum, ferreum ignitum stratum, liquens plumbum super effusum, quadraginta ignitos clavos, quibus est confossus, æneum bovem candentem, demersionem in puteum ingentis ponderis saxo ad collum alligato, quibus nec quidè m occidi potuisse tradunt. Ad hæc insuper fingitur ibi Datinnus quidam Imperator, qui Persis dominetur, & septuaginta quinque Regibus imperet, sub quo Georgius passus sit, aliaque multa, quæ potiùs fabulæ, quàm vera historia Martyris videntur.

XV. Sed quod maximè movit Gelasium ad ea tanquam ab Hæreticis consarcinata rejicienda, fuisse puto conflictum illum quem narrant Georgii cum Athanasio Mago. Ibi enim impius auctor alludit ad Georgium Arianum Episcopum invasorem Sedis Alexandrinæ, & S. Athanasii ejus Sedis Episcopi audacissimum Persecutorem. Porro S. Athanasium ab Arianis esse appellatum *Magam*, Acta Tyrii Conciliabuli satis docent: apud Gentiles etiam hanc de eo sparsam fuisse calumniam, constat ex Ammiano Marcellino Lib. 15.: verùm hunc Georgium Arianum Episcopum, defuncto Constantio Imperatore occisum esse ob ejus scelera Alexandria, & relatum à suis inter Martyres, liquet, testante id etiam eodem Marcellino L. 22.: ex quibus apparet, totam illam fabulam fuisse Arianorum Commentum. Ita ex Baronio, qui addit se vidisse alia S. Georgii Acta, sed quæ sincera sint, judicari non posse.

XVI. Verùm quidquid sit de veritate Actorum, certum est (quod meo argumento sufficit) S. Georgium fuisse Martyrem & quidè m insignem, quem Reges in militari conflictu Patronum invocare solitos, ac eundem propitium expertos esse, ostendunt ea, quæ de Nicephoro Imper. scribit Cedrenus in Compend. histor., & quæ Paulus Diaconus de Gest. Longobard. L. 6. cap. 5. tradit de Chuniperto Rege, qui ob ingentem ejus patrocinio invocato de hostibus partam victoriam, Basilicam & Monasterium in honorem ejusdem Martyris erexerunt. Romana ipsa Ecclesia ad expugnandos Fidei hostes hunc præcipuè Martyrem invocare con-

confueviffe, testatur Ordo Rom. de Divin. Offic. , & in Sacrament. S. Gregorii adest Festum S. Georgii cum præfatione propria , imò ut colligitur ex Lib. 11. Epist. 73. , temporibus ejusdem S. Gregorii erat Ecclesia S. Georgii reparatione indigens , & consequenter anno 601. satis antiqua , quæ paulò post ejus Martyrium credi potest in ejus honorem erecta. Hoc ex dictis colligat Lector , & ex aliis , quæ in Martyrologiis leguntur , tot Nicomediæ hoc anno 303. , & sequentibus , Martyrio coronatos fuisse , ut vix numerari possint : hæc tamen initia fuere , ut videbimus .

§. XIII.

Publicantur Libri contra Christianos .

I. **E**odem tempore , quo Nicomediæ Ecclesiæ solo æquabantur , & gladio feriebantur Christiani , non defuere ibidem , qui Religionis Christianæ Veritatem calamo etiam aggredi tentarint . Lactantius , qui tunc temporis Nicomediæ in Bithynia Oratorias Litteras docebat , lib. 5. Inst. cap. 2. hoc refert , & duos fuisse dicit ; quo tamen nomine vocarentur , non indicat . Unus ex eis Philosophiæ Magistrum se ostentabat , Philopli tamen nec vitam nec mores gerebat : moderationem , frugalitatem , paupertatem publicè commendabat : *Verùm* (inquit Lactantius) *ita vitiosus , ut continentia Magister non minùs avaritiâ quàm libidine arderet , in victu tam sumtuosus ut in schola virtutis assertor , parsimonie paupertatisque laudator , in Palatio pejùs cœnaret quàm domi : tamen vitia sua capillis & pallio (quod maximum est velamentum) divitiis prategebat , quas ut augetet , ad amicitias judicum miro ambitu penetrabat , eosque sibi repensè auctoritate falsi nominis obligabat , non modò ut eorum sententias venderet ; verùm etiam ut confues suos , quos adibus agrisque pellebat , à suo repetendo hâc potentia retardaret .*

Hic verò qui suas disputationes moribus destruebat , vel mores suos disputationibus arguebat , ipse adversùs se gravis censor & accusator acerrimus eodem ipso tempore , quo justus Populus nefarie lacerabatur , tres Libros evomuit contra Religionem nomenque Christianum , professus ante omnia , Philosophi officium esse , erroribus hominum subvenire atque illos ad veram viam revocare , idest ad cultus Deorum , quorum numine ac majestate (ut ille docebat) Mundus gubernetur , nec pati , homines imperitos quorundam fraudibus illici , ne simplicitas eorum præda ac pabula sit hominibus astutis . . .

& etiam

Et etiam ut obstinatione deposita corporis cruciamenta devitent, nec sævas membrorum lacerationes frustra perpeti velint. Ut autem appareret; cujus rei gratia Opus illud elaborasset, effusus est in Principum laudes, quorum pietas & providentia (ut quidem ipse dicebat) cum in cæteris rebus humanis, tum præcipuè in defendendis Deorum Religionibus claruisset.... Ubi autem Religionis ejus, contra quam perorabat, infirmare voluit rationem, ineptus vanus ridiculus apparuit, quia gravis ille consultor utilitatis alienæ, non modò quid oppugnaret, sed etiam quid loqueretur nesciebat. Hæc aliaque Lactantius de hoc inepto & infano adulate potius quàm Philosopho, qui ut gratiam Principum aucuparetur, eodem quo isti tempore Religionem Christianam gladio persequiebantur, eam scriptis invadere conatus est: sed pro merito contemptus, gratiam, quam sperabat adeptus non est, & gloria, quam captavit, in culpam & derisionem ei conversa est.

II. Estò autem, ut dixi, nomen hujus Scriptoris Philosophi indicare Lactantius non curaverit, putant tamen plures cum Baronio ad ann. 302. num. 51., & illum fuisse Porphyrium famosum Christianorum hostem, quem Patres, & præcipuè S. Augustinus pluribus in locis, impugnaverunt. Fertur fuisse patriâ Tyrus, natione Judæus, & aliquandò Christianus, postea tamen desertor & Apostata factus, vel Gentilis vel Gentilium adulator. Ejus à Christo discessionis causa fuit ejus arrogantia & superbia. Cum enim à quibusdam Christianis de quodam errore reprehensus fuisset, hoc ferre non valens vir tumens, Christo terga vertit & Christianos scriptis laceßere cœpit. Propterea illum increpat S. August. L. 10. de Civit. Dei cap. 28. Serm. 241. (aliàs 143. de tempore) cap. 7. & alibi sæpe, & Socrates L. 3. hist. cap. 23., illum comparans Apostatæ Juliano ait: *Num verò illi (Juliano) idem contigisse videtur quod Porphyrio. Etenim isto cum apud Casaream Palestinæ à quibusdam Christianis verberatus fuisset, iram comprimere non valens, præ nimio furore Christianam Religionem deseruit: & odio illorum, à quibus casus fuerat, impetus, Libros maledicentissimos adversus nomen Christianum composuit.*

III. Cæterum non omne simul Porphyrius virus effudit; sed primò tres illos Libros quorum Lactantius meminit, dum esset Nicomediæ, ut ipse testis fuit, quibus alios postea elaboratos addidit usque ad quindecim. Adjecisset & alios, nisi Constantius exterruisset, à quo in exilium pulsus est. Talem ergo Religio Christiana habuit in Porphyrio Philosopho adversarium; hominem Apostatam ac livore obcæcatum Christianorum eversioni con-

glomeratis mendaciis unicè studentem ultra , alia quæ doctrinæ suæ contraria moribus profitebatur , ut ex Lactantio dixi .

IV. Nunc qualis fuerit alter , qui Christianos scriptis aggressus est , videamus . Sic ergo Lactantius prosequitur : *Alius eandem materiam mordaciùs scripsit ; qui erat tunc è numero Judicium , & qui auctor in primis faciendæ Persecutionis fuit ; quo scelere non contentus , etiam scriptis eos quos afflixerat infecurus est ; composuit enim libellos duos , non contra Christianos , ne inimicè insectari videretur , sed ad Christianos , ut humanè & benignè consilere putaretur ; in quibus ita falsitatem Scripturæ Sacrae arguere conatus est , tanquam sibi esset tota contraria : nam quædam Capita , quæ repugnare sibi videbantur , exposuit , adeò multa adeò intima enumerans , ut aliquando ex eadem disciplina fuisse videatur . Quod si fuit , quis eum Demosthenes poterit ab impietate defendere ? qui Religionis cui fueras assensus , & Fidei cujus nomen induerat , & Sacramenti quod acceperat , proditor factus est ? nisi sortè casu in manu ejus Divinæ Litteræ inciderunt . Quæ igitur temeritas erat id audere dissolvere , quod illi nemo interpretatus est ? Benè , quòd aut nihil didicit aut nihil intellexit .*

V. Sed cùm Scriptor iste præcipuè Petrum , Paulum , cæterosque Discipulos , tanquam fallaciæ seminatores , & simul asserat eos fuisse rudes indoctos , & quosdam eorum piscatorio artificio fecisse quæstum ; illum cap. 3. ita Lactantius redarguit : *Absuit ergo ab his fugendi voluntas & astutia ; quoniam rudes fuerunt . Aut quis possit indoctus apta inter se & coherentia fingere , cùm Philosophorum doctissimi Plato & Aristoteles & Epicurus & Zenon ipsi sibi repugnantia & contraria dixerint ? Hac est enim mendaciorum natura , ut coherere non possint . Deinde ostendens , inter Apostolorum dicta summam esse coherentiam , ait : *Illorum autem traditio , quia vera est , quadrat undique ac tota sibi consentit ; & idèò persuadet , quia constanti ratione suffulta est ; non enim quæstus & commodi gratiâ Religionem istam commenti sunt , quippe qui & præceptis & re ipsâ eam vitam secuti sunt , quæ & voluptatibus caret , & omnia quæ habentur in bonis spernit , & qui non tantum pro Fide mortem subierint , sed etiam morituros esse se & scierint & prædixerint , & postea universos , qui eorum disciplinam secuti essent , acerba & nefanda passuros . Ita validè eum perstringit Lactantius .**

Verùm non solos Apostolos , sed Christum ipsum impostor iste infamare conatur ; sequitur enim : *Ipsam autem Christi affirmavit , à Judæis fugatum , collectâ noningentorum hominum manu latrocinia fecisse . Hanc blasphemiam Lactantius impugnât ,*

feu despicies irridet, dicens: *Quis tanta auctoritati audeat repugnare? Credamus hoc planè. Nam fortasse illi hoc in somnis Apollo aliquis uantiavit. Tot semper latrones perierunt & quotidie percut: utique multos & ipse damnavisti; quis eorum post Crucem suam, non dicam Deus, sed homo appellatus est? Verùm tu forsitan ex eo credidisti, quia vos homicidam Martem consecrastis ut Deum, quod certè non fecissetis, si illum Areopagita in crucem sustulissent.* Prosequitur deinde Lactantius, ostendens ex multis & præcipuè ex Prophetarum oraculis, Christo convenire ea, quæ nemini hominum convenire possunt, quæ, ne molestus evadam, dimittam.

VI. Supereſt determinare, quis fuerit iste alter Scriptor, qui adversus Christianos calamum acuit. Fuisse Hieroclem Baronius citato loco num. 58. autumat. Hic Judex erat, qui eo tempore Præfecturam Augustalem exercebat Alexandria, ut tradit Epiphanius hæres. 68. : hic contra Christianos Libros scripsit, quos titulo *Veritatis Amatoris* velut fucato melle linivit. Is unus fuit ex præcipuis Consiliariis, qui Diocletianum ad persequendos Christianos incitavit, ac simul eos scriptis aggressus est: quem Eusebius speciali opere confutavit, ac præcipuè quoad ea quæ de Apollonio Tyaneo Mago dicit, quem comparare conatur, imò Christo præponere contendit. Ita eodem tempore conspirabant Christi hostes & ad eripiendam Christianis vitam corporis & ad delendam ab eorum mentibus veritatem. At de utroque hoc conatu Christus in suis Fidelibus triumphavit.

§. XIV.

Publicantur Ediſta contra Chriſtianos.

I. **H** Aftenus de Gestis Nicomediæ post Decretum de persecutione ac executione in aliis Imperii partibus sermo erit. Diocletianus ergo Ediſtum præfatum ad Maximianum Herculum & ad Constantium, ut ipsi pro parte sua illud exequerentur, transmiſit. Et ſingulare quidè & contra morem ac ſpiritum Diocletiani, quod rem hanc abſque eorum conſilio decreviſſet: ſed Galerii ferocia ac præceps animus contra Chriſtianos has formalitates & dilationes pati nequiverat. Herculus tamen etſi non conſultus, acceptis Diocletiani litteris, ac videns ſtatutum id quod ſuo genio crudeli & barbaro maximè conſentaneum erat, libenter obſecundavit, eaſque omnimodæ executioni in

in Italia & Africa tradi præcepit. De Constantio verò qui Gal-
lias administrabat , quid egerit , infra dicetur .

II. Edictum de Ecclesiarum demolitione circa Festum Pa-
schatis in fine Martii & initio Aprilis , Eusebio teste L.8. cap. 2 . ,
in Ægypto & Palæstina publicatum fuit , imò alicubi ut Antio-
chiæ & Cyri ipsâ Christi Passionis die executioni mandatum ,
quæ fuit 16. Aprilis , ut asserit Theodorus L. 5. hist. cap. 38. .
In totius Africæ Colonis ac Urbibus affixum , singulisque Prin-
cipibus & Magistratibus intimatum , imò Cirthæ in Numidia
die 19. Maii executioni demandatum fuit : & quamvis Tibari
in Proconsulari Provincia solum 5. Junii affixum fuerit , Magi-
stratus tamen , odio quo adversus Christianos ferebantur incita-
ti , etiam ante affixionem in eorum Urbibus opere illud exe-
quebantur . Vi ergo præfati Edicti tenebantur Judices Ecclesias
demoliri , ac insuper è manibus Episcoporum ac Presbyterorum
sacros Codices eripere eosque igni tradere : itaut nec Judices
ipsi sine suo exitio possent quemquam dimittere , nisi eum prius
ad tradendos de factò sacros Codices obligassent , ut refert S. Au-
gust. in Collat. 3. diei cap. 15. . Nec contenti erant Ecclesias de-
moliri , sed & Cathedras Episcopales & Ecclesiæ portas extra-
hebant & comburebant , hoc enim Edictum præcipiebat . Hinc
Magistratus ipsi Ecclesias adeuntes Episcopos aliosque Ministros
ad tradendas Sacras Scripturas sub pœna mortis adigebant ,
ac simul bona omnia ad Ecclesias pertinentia præcipuè sacros
Calices , lampades , candelabra , & si quæ erant alia vasa aurea
vel argentea vel area vestesque sacras asportabant ; quæ tanto
rigore exigebant , ut pœna mortis ea occultantibus immine-
ret : quod si in aliqua etiam privata domo sacri Codices reperti
fuissent , domus illa quasi locus conventus esset , flammis trade-
batur .

III. Porro quia multi nedum ex Laicis sed ex sacris Mini-
stris , tum inferioribus tum Diaconis & Presbyteris , tum ex
Episcopis aliqui , pluri temporalis vitæ quàm æternæ jacturam
facientes , sacros Codices tradidere ; hi à traditis Scripturis *Tra-*
ditores vulgò nuncupati fuere . Cujus criminis multos etsi inno-
centes insimulare Donatistæ consueverant , imò ex hoc crimine
falsò imputato Cæciliano & aliis occasionem suæ schismaticæ
ab Ecclesia Catholica secessionis sumfere . De hoc Donatistæ
inter ceteros accusarunt Fundanum in Africa Episcopum . Fer-
tur , quòd cum Magistratus ignem ad sacros Codices comburen-
dos accendi jussisset , Cælum antea serenum illicò nubibus coo-
pertum ingentem mixtam grandine pluviam effudit , quâ ignis

extinctus fuit, & variæ in tota Regione depredationes secutæ fuere in vindictam sacrilegii, quod adversus Divinos Libros attentabatur. Lugendum laxitatis exemplum reliquissè traduntur Paulus Cirthenfis Episcopus & multi ejusdem Urbis Ecclesiastici, qui sacros Codices Persecutoribus tradidere, ut Acta Minutii Felicis 19. Maii anni 303. fidem faciunt, quæ apud S. August. L. 3. contra Cresconium leguntur cap. 29.

IV. Alii tamen & quidè multò plures supplicia & mortem pati, quàm Divina prodere maluerunt; & non soli Ecclesiarum Præsules ac Ministri, sed & Laici patres-familias aliqui: inter Episcopos claruit S. Felix Tibarensis Antistes, qui à Magistratu ejusdem Urbis sextâ Junii comprehensus, & Carthaginem ad Proconsulem ductus, inde Romam ad Præfectum Prætorio ductus, tandem ad Maximianum Herculium remissus, Venosæ in Apulia 30. Augusti Martyrio coronatus fuit; de quo inferius dicam. Imò in aliquibus adeò excrevit ardor & zelus, ut Christianæ prudentiæ regulas excessissè judicatum fuerit. Hi enim nec capti nec quæsi, spontè Persecutoribus se præsentabant & dicebant, se habere quidè penes se sacros Codices, sed nunquam illos fore tradituros. Hoc tamen Mensurio tunc Carthaginensi Episcopo probatum non fuit (unde habetur apud S. Augustinum Collat. 3. diei cap. 13.) *Eos qui se offerrent persecutionibus non comprehensi, & ultrò dicereut, se habere Scripturas, quas non traderent, à quibus hoc nemo quæserat, displicuisse Mensurio, & ab eis honorandis eum prohibuisse Christianos.* E' contra autem ibidem habetur, quòd Secundus Tigitanus ad Mensurium scripsit: quòd *qui comprehensi & Scripturas sanctas tradere nolentes & multa mala passi, & gravissimis suppliciis excruciatæ & occisi sunt, eosque honorandos pro Martyrii sui merito commendavit: laudans eos non tradidisse Scripturas sanctas, illius Mulieris exemplo, quæ exploratores in Jericho, in quibus figurarentur duo Testament. Vetus & Novum, tradere Persecutoribus noluit.* Quibus apparet Martyrii non esse sese offerre Persecutori, sed à Persecutore quæsitum constanter ei denegare, si petat aliquid contra fidem.

V. Non obstante tamen generali ac severo Edicto de omnibus ubique Ecclesiis diruendis, aliquæ etiam in Provinciis, in quibus furebat Persecutio, aliquo saltem tempore perstiterè. Heracleæ in Thracia apertæ usque ad ultimam anni diem permanferunt; postea tamen sigillatæ, dein discoopertæ, partim dirutæ, & tandem cum suis Codicibus concrematæ fuerunt. In Galatia quamvis Theotecnus Præses apertus Christianorum hostis Edictum de Ecclesiis demoliendis & Altaribus ubique promul-

mulgasset, aliquæ tamen Ancyrae solum clausæ erant circa mensem Maii, & una quindecim ab Urbe leucis distans aperta & libera Christianis permansit: & S. Gregorius Nyssenus refert, circa finem seculi 4. extasse adhuc Neocæsareæ Ponti Ecclesiam illam, quam S. Gregorius ibi Episcopus exxerat. Unde Baronius ad ann. 245. num. 3. asserere non timet, quod Ecclesia illa inter miracula erecta, sicut nullo terræmotus impetu potuit labefactari, quamvis tota Civitas funditus propemodum periisset: ita majori miraculo, cunctis Ecclesiis Diocletiani Edicto dirutis, illa integra ac illibata permansit. Theodoritus tamen L. 5. hist. cap. 39. dicit, quod Diocletianus *cunctas in Orbe Romano Ecclesias destruxit: verum exactis postea novem annis, eadem iterum florere cæperunt, multoque majorem, quam antea splendorem atque amplitudinem adeptæ sunt.* Cæterum hoc non tollit, quin in tot Regionibus aliquæ licet pauca remanserint.

VI. Quoad Sacrorum Codicum traditionem fateri oportet, ingentem fuisse eorum numerum ex quocumque statu, qui metu tormentorum perterriti, eos tradiderunt, dicti propterea *Traditores*. Sed propè infinitus fuit illorum, qui nullâ concussi formidine, ne Codices sacros proderent, lubenti animo mortem exceperunt, quorum unâ die, nempe 1. Januarii, Romæ memoria celebratur his verbis in Martyrol.: *Romæ commemoratio plurimorum Sanctorum Martyrum, qui spreto Diocletiani Imperatoris Edicto, quo traditi sacri Codices jubebantur, potius corpora carnificibus, quam Sancta dare canibus maluerunt.* Si ergo unâ die plurimi Romæ potius mori, quam sacros Codices tradere voluerunt, quot aliis temporibus & partibus Orbis idem fuisse credendum est? Ex Actis SS. Agapis Quionia & Irenes constat, Theſſalonicæ Feminas Christianas inficiis eorum parentibus & aliis sacros Codices abscondisse, paratas mori potius quam eos prodere: imò ut Persecutorum instantias super hoc evitarent, in desertos montes nemine conscio aufugisse, ubi solum Cœlum eis pro testro erat, & Dei providentiâ alebantur. Sed de SS. Agape Quionia & Irene inferius dicam.

VII. Quod verò spectat ad Martyres in hac Persecutione supra atrociorum coronatos, eorumque alacritatem in subeundis etiam atrocioribus tormentis, aliqua dicam inferius, dum celebriora quorundam Martyria exponam. Nunc in generali loquendo videndus est Eusebius L. 8. hist. cap. 9. & L. 2. de Vita Constantini cap. 52., ubi prius Imperator ille ait: *Licuit tunc, licuit, inquam, videre, quantâ cum libertate venerabiles Dei cultores ob continuam crudelitatem gravissimas quotidie contumelias tole-*

rarent. Quippe modestiam, quam nec hostes ipsi ullâ unquam affecterunt injuriâ, effrati Cives probris omnibus incessere pro nihilo duxerunt. Quodnam incendium, quod cruciatuum & tormentorum genus cuius corpori & ætati absque ullo discrimine admotum non fuit. Eâ tempestate tellus quidê ipsa procul dubio lacrymas edidit: Cælum verò, quod universa suo ambitu complectitur, cruore inquinatum ingemuit. Ipsa quoque diei lux præ luctu atque horrore tanti prodigii obscurata est. Hisce Constantinus, qui adhuc adolescens multa viderat, Persecutionis immanitatem exaggerat.

Sulpitius quoque Severus L. 2. hist. num. 47. : *Quâ tempestate, inquit, omnis ferè sacro Martyrum cruore Orbis infectus est. Quippè certatim gloriosa in certamina ruebatur, multòque avidius tum Martyria gloriosis mortibus quærebantur, quàm nunc Episcopatus pravis ambitionibus appetuntur. Nullis unquam magis bellis Mundus exhaustus est: neque majore unquam triumpho vicimus, quàm cum decem annorum stragibus vinci non potuimus. De numero autem Christianorum, qui hâc generali cæde sublati sunt, si ex iis, qui uno mense sunt passi, totius decem annorum temporis, quo strages & quidê semper acerbior perduravit, rationem habeamus, in immensum crescit Martyrum multitudo. Nam Anastasius L. de Rom. Pont. in Marcellino dicit, quòd adèd magna fuit Persecutio, ut intra triginta dies decem & septem millia hominum promiscui sexus per diversas Provincias Martyrio coronarentur Christiani. Statuerant enim Diocletianus, & Maximianus Galerius, & Hercules Imperatores Christianam Religionem penitus è Mundo tollere ac radicibus extirpare. Nos celebriores saltem exponemus.*

§. XV.

SS. Agathopes, & Theodulus, S. Felix Thibaritanus Martyres,

I. **E**odem anno 303. mense Aprili Theſſalonicæ contigiſſe videtur paſſio SS. Agathopis ſeu Agathopodis Diaconi & Theoduli Lectoris ſub Fauſtino Judice. Hi Deo & Jeſu Chriſto unicè ſervientes, omnia quæ Mundi ſunt contemnebant, & licèt non ſanguine, ſpiritu tamen & caritate conjuncti erant, Agathopes ætate jam provectus totam vitam coronâ Martyrii dignam tranſegerat: Theodulus verò ex una inter præcipuas Theſſalonicæ Familias adhuc juvenis ad Lectoratum promotus, Fidelibus Apoſtolorum & Prophetarum ſcripta in Eccleſia legebat, ac Dæmones ſigno Crucis ejeciſſe perhibetur. Tres ei erant fra-

fratres sanguine & pietate germani , Capiton , Metrodorus , & Philostorgius . Ante Persecutionem aliquod sui Martyrii pignus creditur eos accepisse .

Publicatâ Persecutione , cùm ut dixi ad Ecclesiarum demolitionem non statim ventum sit , non latebras , ut alii , querentes , sed in Ecclesia stantes , jejuniis & lacrymis rogabant Deum , & publicè Verbum Dei prædicabant . Quare à Magistratu detenti coram Faustino Præfide adducti fuere , qui eorum alacritatem in dictis & responsis intuitus , Theodulum blandis verbis lucrari seorsim aggressus est ; sed videns , se nihil proficere , eo semoto , Agathopi suadere studuit , ejus focium Theodulum promississe se Diis immolaturum , asserens . Hoc mendacium irritum Agathopes : & Faustinus utrumque carceri destinavit ; metuens , ne eorum constantiæ exemplo alii Christiani , quos in carcere detinebat , animati magis in Fide confirmarentur . Multi interea ad carcerem convolarunt : quidam ut eos à Fide averterent specie pietatis , tum erga Theoduli juventutem , tum erga Agathopis senectam , irritum tamen conatu : quidam verò ex Fidelibus , ut ab eo instruerentur .

II. Hoc permotus Urbanus Magistratus Caput , ne alios ab Idolorum cultu & dictis & exemplo dimoverent , Faustinum adivit , urgens ut quantocius utrumque vitâ privaret . Quare statim ad audientiam rapti tummâ alacritate vultus comparuerunt . Faustinus volens Theodulum ad sacrificandum inducere , hoc accepit responsum , quòd si simulacra adorare oporteret , rationabilius adorare oporteret operarios , qui ea fabricassent . Quo responso iratus Faustinus , Theodulum expositiari jussit , specie illum questioni exponendi . Sed nec cruciatuum metus nec exemplum quorundam infelicium Christianorum , qui doloribus victi sub ejus oculis carnes immolatas edebant , ejus constantiam frangere valuit . Tunc dixit ei Faustinus , ut traderet Codices , quos Christiani Scripturas appellant . Cui Theodulus inquit se eos promptè traditurum , sed tunc solum quando ipse Idolis renuntiasset , eosque ut se in Fide confirmaret legere vellet . Multa addidit Faustinus , ut eum vinceret , sed frustra , quamvis alii qui aderant & promissis & minis eum dimovere conarentur .

III. Tentato insuper Agathope sed inutiliter , & iterum Theodulo , videns se operam perdere , utrumque torqueri jussit , sed & hoc cùm inutile experiretur , eos remisit in carcerem . Multi eorum amici sequebantur plorantes , quibus Theodulus dixit , ut sibi potius condolerent , quam ipsis , qui ad coronam cer-

certainis properabant. Fertur, sequenti nocte visione cœlesti recreatos fuisse, quâ de victoria certiores reddebantur. Mane ergo coram Faustino Iudice adducti & tertio interrogati, cum nil aliud respondissent, quàm se esse Christianos & pro Jesu Christo omnia pati paratos, sententiam acceperunt, quòd quia nolent sacrificare, in mare projicerentur: quare confectim ligatis retrò manibus & saxo ad collum appenso navigio fuerunt impositi, aliquibus etiam Paganis eos comitantibus atque adhortantibus, ut duritiem cordis emollirent & sacrificarent. Quin Faustinus quemdam primi Ordinis Virum nomine Fucium ad eos misit, qui suam gratiam eis promitteret, si saltem thus adolerent, sed nimis Gratiâ Dei roborati erant, ut ad hæc moverentur: quare post longam moram Carnifices opus demandatum exequi disposuerunt. Tunc Agathopes elatis ad Cœlum oculis altâ voce dixit: Eamus, ut secundo abluti Baptismate, puriores coram Jesu appareamus. Quibus dictis ambo in mare projecti sunt. Fertur tamen, quòd ruptis funibus, quibus ligabantur saxa, eorum Corpora vividiora, quàm ante, mare projecit ad litus, quæ ab eorum necessariis accepta sepulturæ mandata fuere.

IV. Horum Martyrum memoriam 4. Aprilis utraque Ecclesia Latina & Græca celebrat; ac specialiter Græca in Menologio Basilii hæc habet: *Agathopodes sacratissimus Diaconus & Theodulus religiosissimus Lector, Christi Martyres, fuerunt ex Civitate Thessalonica: comprehensi verò ob Christi Fidem ab Idololatriis adducti sunt ad Præsidentem Civitatis & compulsi Idolis sacrificare. Quod cum facere recusassent, in carcerem detrusi sunt, in quo eadem nocte hanc ambo visionem habuerunt. Videbantur sibi navem conscendere & in mari navigare. Ingenti autem excitatâ fluctuum procellâ, contritum navigium cernere & navigantes in mare demergi; se verò dumtaxat sospites evadere & in excelsum collem deferri. Portendebat autem ea visio fore, ut ipsi in mari mortem oppeterent, indeque in Cœlum conscenderent. Mane namque cum eos Præses à carcere simul eduxisset, iussit ipsis Idolis sacrificare. Cum verò ad id induci minimè possent, in profundam maris illos demergi mandavit; atque ita Martyrium consummarunt. Quibus explicatur, quanam fuerit visio, quam ut dixi in carcere habuerunt.*

V. S. Felix Tibaritanus, cujus Acta ex Surio refert Baronius ad ann. 302. num. 119., Episcopus fuit Tibari seu Tubyze in Africa, Urbe 14. leucis Carthagine distante, acerrimus Fidei ac Veritatis defensor, qui anno suæ ætatis 56., Christi verò 303., post vitam summâ puritate exactam, 30. Augusti Martyrio coronatus fuit.

Edictum de Ecclesiis ubique demoliendis & sacris Codicibus tradendis 24. Februarii anni 303. à Diocletiano editum, Thibari 5. Junii sequentis affixum fuit : cùmque omnes Urbium Magistratus ac Præsides ejus executionem procurare tenerentur, Magnilianus Curator seu Præsides Seniores Plebis idest Presbyteros accersivit : quia verò Felix Episcopus tunc Carthaginem ierat, Aper (seu Januarius) Presbyter , & Cyrus ac Vitalis (seu Fortunacius & Septimius) Lectores ad eum accedere : Magnilianus ab eis petiit , num haberent Episcopum ; quibus affirmantibus , nescire tamen ubi esset ; & insuper dicentibus, Libros quidè Divinos quos ille petebat adesse , sed penes Episcopum asservari : nec acquiescens , jussit illos in custodia detineri . Quid de istis eveniret , Acta non dicunt : Martyrologia tamen Ursuardi , Adonis , & Romanum , ut dicam , eos faciunt S. Felicis in passione socios .

VI. Postridie 6. Junii Felix Episcopus Carthagine Thibarim reversus & à Magniliano per Officiales ad se adductus , interrogatur , num ipse esset Episcopus Loci illius , cui se esse absque hæsitacione respondit . Sed cùm ab eo peteret sibi tradi Libros , quos apud se habebat , alacri animo dixit , se numquam traditurum Legem Dei sui , Dei Magni qui fecit Cælum terram ; & Magniliano dicente , oportere Imperatoribus obedire , ac Libros illos comburere : *Comburere ?* inquit Felix ; malo corpus meum tradere flammis , quàm Dei Libros ; quia bonum est obedire Deo magis , quàm hominibus . Sed cùm Magnilianus adderet : Prius est quòd Imperatores jussèrunt , quàm id quod tu loqueris : Felix respondit : Prius est præceptum Domini , quàm hominum : tunc Præsides : Recogita , inquit , tecum ; tridui tempus tibi do ; quod si non resipueris , mittam te ad Proconsulem . Interea , ut creditur , in carcere eum detinuit .

VII. Triduo elapso jussit Magnilianus Felicem ad se perducì & dixit ei : Recogitasti tecum ? cui Felix : Quæ prius , inquit , locutus sum & modò loquar , & ante Proconsulem dicturus sum . Tunc Magnilianus ait : Ibis ergo ad Proconsulem & ibi rationem reddes , tradiditque eum Vincentio Celsino Decurioni Civitatis , qui 24. Junii oneratum catenis ad Anulinum Proconsulem Carthaginem eum transtulit . Quò perductus in carcerem trudi à Vicario Proconsulis jussus est . Sequenti verò die ad Proconsulem ante lucem productus est : Cui Proconsul : Quare , inquit , Scripturas supervacuas non reddis ? Cui cùm Felix respondisset , se eas quidè habere , sed eas non traditurum ; nec aliud ab eo obtinere posset , in ima carceris eum detulit ,

trusit, ubi sexdecim diebus detentus est. Quibus elapsis cum constantiorem invenisset, 15. Julii Romam ad Prefectum Prætorio eum transmissit. Quò cum pervenisset, jussit Præfectus eum suo carcere claudi & gravioribus catenis ligari. Post dies autem novem ad Maximianum Herculum, qui tunc in Sicilia partibus erat, Felicem transmittere decrevit.

VIII. Impositus ergo navigio catenis oneratus, in fundo navis volutatus sub pedibus equorum quatuor diebus mansit, nec cibum nec potum gustans, interius tamen à Deo sua gratia roboratus. Quidam serunt cum Nolam appulisset, ab illius Urbis Judice commiseratione moto super ejus statu, ut traderet Scripturas & sic vitam salvaret, fuisse admonitum: sed sanctum Virum intrepidè respondisse, malle se caput perdere quàm tradendo Scripturas sacrilegum fieri. Iterum ergo consensu navi Agrigentum pervenit, ubi à fratribus summo honore exceptus est. Inde Catanam, postea Messanam & Taurominium deducti, tandem transfretantes, in partes Lucaniae Venusium Apuliae Urbem pervenerunt. Ibi Præfectus Felicem à vinculis solvi jussit & ab eo petiit: quare Scripturas Dominicas non das? an forsitan non habes? Cui Felice respondente; habeo quidem, sed non do: Præfectus dixit, gladio interficite. Tunc Felix clarâ voce ait, Gratias tibi Domine, qui me dignatus es liberare. Dubium hic occurrit, quomodo Venusii Præfectus in Sanctum Episcopum sententiam capitis pronuntiavit, cum ad Maximianum judicandus transmittebatur? cui responderi potest, vel quòd Maximianus tunc ibi erat, licet Acta non expriment: vel fortè, quòd ii qui in ea Regione, in qua tunc Maximianus versabatur, præerant, ex speciali ejus mandato, renuentes tradere Libros sacros capite punire tenerentur.

IX. Ductus itaque ad passionis locum die 30. Augusti S. Felix, elevans in Coelum oculos altâ voce dixit: *Deus, gratias ago tibi: quinquaginta & sex annos habeo in hoc seculo. Virginitatem custodivi, Evangelia servavi, Fidem & veritatem predicavi. Domine Deus Cæli & terræ, Jesu Christe, tibi cervicem meam ad victimam flecto, qui permaues in æternum, cui est claritas & magnificentia in secula seculorum, Amen.* Quibus dictis caput demittens decollatus fuit. Ejus Festum Beda ponit die 30. Augusti; Martyrologia verò Ussuardi, Adonis, illud transferunt ad diem 14. Octobris: imò Romanum ei adjungit in Martyrio socios illos, quos supra dixi Thibari ex Clero fuisse detentos: ait enim: *Venusia in Apulia natalis Sanctorum Martyrum Felicis Episcopi Africani, Audacii & Januarii Presbyterorum, Fortunati & Septimi*
Le-

Lectorum : qui tempore Diocletiani à Magdelliano Procuratore multis diù vinculis & carceribus in Africa & Sicilia macerati , eam Felix nullatenus sacros Libros juxta Imperatoris Edictum tradere voluisset , tandem occisione gladii consummati sunt .

§. XVI.

S. Theodotus & septem Virgines Ancyra Martyres .

I. **T**heodotus Urbis Ancyra Civis erat , ubi domicilium suum & bona habebat , mediocris tamen conditionis erat , adeout cauponariâ arte sibi victum compararet : exterius communem vitam in conjugio agebat ; virtute tamen singulari , à juventute voluptates ac divitias contemserat , jejuniis & caritatis operibus totus intentus , S. Virginis Thecusa , quam ut matrem venerabatur , monitis instructus veri Ecclesiastici potius quàm simplicis Laici opera exercebat , omnia sua egenis distribuens , infirmis subveniens , peccatores ad poenitentiam revocans , Gentiles & Judæos suis suasionibus ad Fidem trahens , ac tandem vivis sermonibus Fideles ad omnia & vitam ipsam pro Christo tradendam roborans , ut non cauponem sed verum Episcopum putares : eique tantam Deus gratiam dederat , ut precibus & manuum impositione ægros à quacumque etiam insanabili infirmitate sanaret .

II. Contigit ergo , ut ingruente Persecutione in Galatiam , Gubernator mitteretur vir quidam Theotecnus nomine summè crudelis , & qui Imperatori promiserat , non diù fore , ut nullus ibi esset Christianus . Famâ hâc conterriti ferè omnes huc illucque Fideles aufugere cogitarunt . Theodotus tamen intrepidus mansit , omnia pati paratus , ut fratribus subveniret . Domus autem ejus utpotè cauponariæ arti exposita à suspitione eum liberare poterat . Apud se ergo omnes Fideles , qui non secesserant recepit , eisque in omnibus inserviebat : adeout domus ejus altera Arca Noe effecta videretur , quæ à generali Persecutionis inundatione Christianos præservaret , & simul etiam Ecclesia , in qua & Fideles preces funderent , & Altare , in quo Presbyteri sacra Mysteria conficerent ac dispensarent . Hoc tamen caritati Theodoti sat non erat : accurrebat ille ad carceres , ac Fideles ibi detentos etiam coram Infidelibus ac ipso Gubernatore præsentem ad ferenda pro Christo quæcumque tormenta animabat & post Martyrium eorum Corpora (quamvis tunc esset capitale crimen) sepulturæ tradebat . Cùmque impius Theotecnus om-

nem humani cibi speciem, panem maximè & vinum idolothytis inquinasset; Theodotus quicquid priùs à Christianis emerat, eisdem ad victum, præcipuè ad sanctam oblationem, suppeditabat.

III. Eo tempore factum sequens evenit. Victor quidam amicus Martyris comprehensus hac de causa fuit. Nonnulli ex Sacerdotibus Dianæ eum accusaverant, quòd dixisset, Apollinem sororem suam Dianam ante Aram in Delo violasse, ac proinde pudere debere Græcos talem habentes Deum, qui scelus commisit, quod nec homines quidèmauderent committere. Huic ergo Victori suadebant Pagani, ut obediret Imperatori, & sic gratiam ejus & bona omnia consequeretur, alioquin omnia & se ipsum perderet. Theodotus noctu carcerem ingressus multis eum adhortatus fuit, ut constans in Fide permaneret & nollet aliquid boni sperare à malis, quorum promissa nonnisi ad æternam mortem ducunt. His & aliis confirmatus Victor, mansit ille quidèmaconstans & initia tormentorum generosè pertulit, adeout à spectatoribus laudaretur: sed cum jam penè ad terminum stadii coronam accepturus pervenisset, petiit à Tyranno breves ad deliberandum inducias. Quo audito Lictores statim ab eo verberando destitire, putantes eum defecisse à Fide. Sed in carcerem ductus, ex plagis mortuus est dubium relinquens suæ confessionis exitum usque in hodiernum diem.

IV. Vicus erat Malus nomine tresdecim leucis seu 40. fere milliariibus ab Urbe distans. Huc se contulit Theodotus, ut Martyris Valentis Reliquias in fluvium Halim projectas colligeret, quod & fecit. Accidit autem ut obvios in itinere haberet quosdam Christianos, quos obeversum Altare Dianæ à suismet consanguineis detentos, ipse magno labore & expensis liberaverat. Hi ergo tanquam communi benefactori ei gratias agentes, ab eo ad secum comedendum invitantur, ut inde iter profequi posset. Erat ibi locus floribus arboribus & avium cantu amoenissimus juxta Halis fluentia & prope speluncam. Ibi ergo super herbam assiderunt. Theodotus verò, qui numquam absque benedictione Presbyteri comedere consueverat, aliquos ex sociis misit ad Vicum, qui Presbyterum ad prandium invitaret; quem invenerunt ab Ecclesia egredientem horà sextâ, idest meridie. Presbyter ille comperto quòd essent Christiani, eos ad secum manendum invitavit, ac subinde eis somnium narrans: Vidi, inquit, duos homines vobis similes, & qui mihi dixerunt, se thesaurum ad hanc Regionem deferre. Cui illi: Verum dicis, ajunt, nos enim thesaurum habemus, qui est Theodotus singula-

gularis virtutis vir : sed ostende nobis hujus loci Presbyterum : quibus ille respondit : ego qui Fronto vocor , sum ille Presbyter , quem inquiritis ; sed melius est ad me ducatis Theodotum : æquum enim non est in nemore , ubi Christiani non sunt , immorari . Quare post mutuos amplexus reversi , quæ sibi acciderant narraverunt . Theodotus de reditu Ancyræ ad subveniendum Christianis sollicitus , ab initio se excusavit , sed tandem ivit . Post comestionem Theodotus Frontoni Presbytero subridens dixit : Locus iste valde congruus reponendis Reliquiis apparet . Cui Fronto , eas , inquit , prius habere oportet , & postea locum illis parare . Hoc meum erit subdit Theodotus , seu verius Dei vobis de Reliquiis providere . Parate interim sine mora Ecclesiam , & Reliquiæ quamprimum aderunt . Et hæc dicens anulum è digito extraxit , & Deum rogans , ut sui promissi testis fieret , illum Præsbytero tradidit & confestim Ancyræ proposu-
eravit .

V. Ibi itaque Persecutio velut ingens terræmotus omnia everterat . Erant ibi septem Virgines ætate simul ac pietate à juventute provectæ , has Theodorus in tormentis positas invenit . Præses autem eas constantes videns , impuris adolescentibus in Religionis spretum violandas tradere decrevit , plorantibus ipsis Deumque virginittis protectorem implorantibus . Impudentior ex illis , cum seorsim traxisset Thecusam omnibus aliis seniore , illa plorans ac pedibus ejus apprehensis : Mi fili , inquit , quid speras à Feminis ætate jejuniis ægritudinibus ac tormentis penè consumtis ? Septuaginta & ultra annos ætatis habeo , istæ aliæ paulò minoris ætatis sunt . Desine nos : mox videbis corpora nostra insepulta , vel à bestiis vorari vel ab avibus discerpi . Inde detracto velo , ut ei canos suos ostenderet , addidit : Tu matrem tantæ ætatis fortè habes , relinque ergo nobis nostras lacrymas : & tibi serva spem remunerationis à Jesu Christo . His compuncti adolescentes illi , in lacrymas effusi abscessere .

VI. Tunc Præses , ut aliâ viâ eas tentaret , Dianæ ac Minervæ Sacerdotissas facere eas statuit . Mos erat , ut hæc Idola singulis annis in vicino lacu lavarentur ; & tunc dies anniversaria recurrebat . Cum ergo oporteret Idola vehiculis imponi , jussit etiam ipsas ad paludem duci , eodem quo Idola modo lavandas . Vehementius ergo illas nudatis corporibus stantes in curribus ad verecundiam & irrisionem . Post ipsas verò & Idola vehebantur . Simul etiam ad futurum spectaculum universa Civitas egrediebatur . Inter hæc audire erat & videre tiliarum ac cymbalorum so-

sonum, choreasque Mulierum sparsis crinibus Mænadam instar bacchantium. Strepitus etiam excitabatur pedum saltibus plaudentium & musicorum instrumentorum concrepatione. Et hoc modo vehebantur Idola. Et propterea quidem magna pars Populi concurrebat; major tamen propter Virginum passionem, quarum alii senium miserebantur, quidam admirabantur constantiam, nonnulli laudabant modestiam, omnes verò conspiciendo illas confectas plagis lacrymabantur. Solus Theotecnus humanitatem exutus rabie torquebatur.

Theodotus interea sollicitus de earum constantia, timensque sexus infirmitatem anxie pro illis Deum orabat. Clausus erat in quadam parva domo cuiusdam dicti Theocharis unâ cum Polychronio Thecusæ Martyris nepote, & Theodoto juniore ex ipsius cognata progenito & nonnullis Christianis ibi congregatis. Ita prostrati orantes jacuerant à summo mane usque ad horam sextam: cum Theocharidis uxor nuntiavit, Virginum Corpora in lacum submersa esse. Ad hæc Theodotus surgens è terra & adhuc genibus flexis attollens ad Cælum manus: *Gratias*, inquit, *tibi ago, Domine, quòd stertam meum hunc nolueris esse inutilem*. Tum quomodo res gesta fuerit, à Muliere exquiri. Illa autem, quæ omnibus fuerat præsens, sic ait: Omnes Theotecni conatus ac promissiones irritæ cesserunt: Dianæ ac Minervæ Sacerdotissæ coronam vestemque albam Sacerdotii insignia offerentes, ut quæ cum eis Dæmonibus sacrificare deberent, rejectæ cum impropriis sunt. Quare iussit Præses, ad earum colla ingentes lapides alligari, & parvo scapho impositas eò devehî, ubi profundior lacus erat, ubi injectæ in aquas sunt ad spatium duorum jugerum à ripa.

VII. His auditis, eodem in loco manens Theodotus cum Polychronio & Theocharide consultare cœpit, quomodo Sanctarum Virginum Corpora extrahi possent de lacu. Sub occasum Solis adfuit adolescens Glycerius nomine & ipse Christianus, asserens, à Præsidente circa lacum dispositos fuisse Milites, qui ne extraherentur Corpora custodirent. Mœrens hæc audivit Theodotus: res enim difficilis videbatur, tum ob custodientes Milites, tum ob lapidum gravitatem, quorum singulos ægrè plaustrum movisset. Relictis ergo ibi sociis progressus ad Ecclesiam Patriarcharum dictam, cum eam ab impiis obstructam reperisset, ne quis Christianorum eam ingrederetur, foris juxta concham in precibus se prostravit. Inde procedens ad Confessionem seu Ecclesiam dictam Patrum devenit, quam ibidem obstructam inveniens extra in oratione procubuit. Verùm magnum

Arce-

strepitum audiens, & credens aliquos sibi imminere, ad Theocharidis habitaculum reversus est. Ibi cum aliquantulum obdormisset, apparuit ei Beata Thecusa dicens: *Dormis, fili Theodose, & nulla te nostri cura tangit? Neque meministi adhortationum, quibus te juniorem instruxi, ac præter opinionem parentum ad virtutem manuduxi? Et tu quidem viventem numquam negligebas, sed colebas ut matrem: nunc verò postquam obii, oblitus es quod usque in finem ministrare debebas? Ne, obsecro, sinas nostra corpora sub aquis lacu fieri escam piscium. Nam & post duos dies magnum te expectat certamen. Surgens igitur accede ad paludem, verum cave tibi à proditore. Atque hæc dicens recessit.*

VIII. Tunc exurgens à somno, visionem fratribus exposuit: cumque illuxisset, miserunt Glycerium cum Theocharide, qui accuratius explorarent de custodibus: recessisse illos suspicati propter Dianæ Festum, quod eo die celebrabant: sed eos adhuc ibi stantes invenere. Continuerunt ergo se etiam illà die. Vespere tamen sunt egressi versùs paludem adhuc jejuni acutas secum falces deferentes, ut si fortè in aquam daretur ingredi, præstinderent funes, quibus demersarum collo lapides adhærebant. Tenebræ autem profundæ erant, nec Luna nec stellæ conspiciebantur. Cum verò pervenissent ad locum, in quo rei solebant cruciari, locum horribilem, quia ibi præcisâ capita, aut palis infixâ stabant aut dispersâ jacebant igne combusta, horrore non modico correpti & ipsi sunt. Sed audierunt vocem dicentem: Fidenter accede Theodote, tunc singuli signo Crucis semunientes, viderunt Crucem ab orientali parte ignitum radium mittentem, quâ mixtus gaudio timor fuit & genuflexi versùs locum, unde Crux apparebat, adoraverunt.

Prosecuti igitur sunt iter, sed propter densam noctis caliginem unus alterum non videbat: cui ingens pluvia accessit, & tantum inde lutum, quo gressus adeò lubrici fiebant, ut nec quasi subsistere, nedum in via progredi possent. Quare iterum ad orandum substitere auxilium à Deo postulantes: cum subito apparuit eis ignita lampas viam præmonstrans: apparuerunt etiam Viri duos splendidas induti vestes, capillo & barbâ cani, qui & dixerunt: „ Confide, Theodote, Dominus nomen tuum „ inter Martyres descripsit: missi autem ab eo sumus, ut te suscipiamus & sumus illi qui vocantur *Putres*. Veniens porrò „ ad paludem videbis *S. Sossandrum* armatum, qui formidinem „ incutiet custodibus: sed non debebas tecum adducere proditorem „ sequentes ergo lumen quod apparebat sibi, quodque eis illuxit donec sacra lipsana abstulerunt, venerunt ad paludem.

IX. Tunc facta sunt tonitrua fulmina multa & imbres, ventus autem tam vehemens irruit, ut corporum custodes fugam elegerint ad vicina tuguria se recipientes. Nec tantum propter tempestatem fugerunt, sed maxime territi visione, quam videbant procerum Virum, clypeo, thorace, galea & hasta armatum, ex quibus undique erumpebat ignis, minaci vultu contra se stantem; & hic erat S. Martyr Sofander. Aqua verò ventorum impetu in alterum propulsa littus usque adeò recesserat, ut fundus appareret siccus, & Virginum Corpora conspicerentur, unde innexos funes Theodotus & socii præciderunt falcibus, ac ea efferentes jumento imposita vexerunt ad Ecclesiam Patriarcharum sepelientes ea in vicino monumento. Virginum autem nomina hæc sunt: *Thecusa*, *Alexandra*, *Phoine*, quæ Apostolicam vitam omnibus renuntiantes tenuerant, *Claudia*, *Euphrasia*, *Matrona* & *Julitta*, seu, ut Græci volunt, *Julia*.

X. Factâ die, famâ sacrorum Corporum raptus universa Civitas repleta est. Unde mox ac Christianus aliquis conspiciebatur, in quæstionem trahebatur. Quod cum non paucis accidisse Theodotus rescivisset, voluit se ipsum tradere; sed à suis impeditus fuit. Polychronius tamen mutato habitu transformans se in rusticum, in forum abiit ad veritatem certius explorandam. Sed agnitus & comprehensus adductus est ad Præsidem, à quo plagis multatus, cum etiam stricto gladio mortem sibi comminari videret, terrori cessit & confessus est de reliquiis Virginum quod eas de lacu tulisset Theodotus, & locum ubi eas abdiderat indicavit. Unde sacra Corpora è monumento à Paganis extracta concremata fuere, & tunc cognoverunt proditorem, à Thecusa & iis qui apparuerant prænuntiatum, à quo Theodotus cavere debebat, esse Polychronium. Hoc Sanctus Vir cum audisset, valedicens fratribus, eosque ut pro se orarent adhortatus, ad certamen se præparat. Cum illis in oratione diu persistens rogat Deum, ut det sibi vires ad perficiendum agonem, sanguinis sui effusionem in sacrificium acceptet, & tandem Ecclesiæ suæ donet pacem. Precibus completis, singulos amplectatus monuit, ut si Presbyter Fronto è Malo veniret ferens secum anulum, darent ei Reliquias suas, si tamen eas potuerint suffurari. Atque hæc dicens, totumque corpus suum signo Crucis muniens, in stadium processit animo imperterritus.

XI. Eunti autem illi occurrerunt duo Cives amici ejus, qui hortari cœperunt, ut dum adhuc erat tempus se præservaret: Quia, agebant, Sacerdotes Minervæ & Dianæ cum Turba populari, te accusant, quòd omnibus Christianis dissuadeas cultum

Ido,

Idolorum, & Polychronius reum te fecit subductorum furtim Corporum. Quibus ille subridens ait, imò si amici mei estis & gratiam mihi vultis facere, ite ad Magistratus & dicite: Theodotus, quem Sacerdotes cum tota Civitate accusant, ante fores adstat; & his dictis eos antecessit, seque accusatoribus suis præsentavit: & ad Tribunal ingressus stabat intrepidus ac vultu subridenti præparata intuebatur tormenta, ignem, lebetes ferventes, rotas, & alia cruciatuum genera ibi exposita.

XII. Tunc sic adstantem Theotecnus conspiciens longo sermone eum ad se trahere conatus fuit, eumque amplis promissis allicere, dummodò ejurato Christo Deos veneraretur. Quibus omnibus palàm respondit Theodotus; hinc falsorum crimina & infamias, quas eis Pagani ipsi attribuunt, detestans; hinc Jesu Christi excellentiam & miracula extollens. His multitudo eorum qui aderant, & Sacerdotum præsertim, furore accensa, conclamare ad Præsidentem cœpit, cur hunc contra Deos blasphemum in frustra non consideret? Quare statim Theodotum equuleo suspendi jussit ac divisi in partes carnifices latera ejus unguis lacere cœperunt quantum quisque valebat, adeo ut aliquibus lassis alii succederent. Pugil autem invictus mentem fixam habens in Deum corpus non suum sed alienum tradidisse carnificibus videbatur. Tunc Theotecnus aceto plagas aspergi & igne torreri præcepit. Cùmque Sanctus Martyr, ab adustis laterum carnibus sentiens nidorem, non nihil nares avertisset, Præses existimavit, eum à tormentis jam vinci cœpisse. At Theodotus: falleris, inquit, non lassor ego, sed tui carnifices in me torquendo lassantur. Nova adinveni tormenta, ut me probes, seu potius agnosce alacritatem spiritus, quàm me donat Jesus Christus & facit, ut te tuosque Imperatores eorumque minas contemnam. Ita loquenti maxillas saxis contundi & dentes excuti Theotecnus jussit. E' contra verò Martyr: *Etiam si, inquit, linguam mihi excideris, Theotecne, & omnia vocis organa, Deus tamen etiam tacentes Christianos exaudit.*

XIII. Tandem fessis ab eo laniando lictoribus, mandavit Præses ex ligno depositum claudi in carcere, in aliam quæstionem reservatum. Ipse verò cùm per medium duceretur forum toto concisus corpore, ipsisque vulneribus victoriam ostentans, concurrentes undique ad spectaculum Cives invitabat, ad cognoscendam ex iis quæ passus erat, Christi potentiam. Quinque elapsis diebus à Judice iterum vocatur, qui cùm firmiorem ipsum invenisset, jussit denud applicari ad lignum: & utrimque adstantes lictores velut feræ, priorum vulnerum loca scrutari

coeperunt, & ungulas profundè infigere. Sed videns Præfes frustra se laborare ac tortores deficere, depositum è ligno supra ignitas testulas iussit collocari, quibus interiora corporis penetrantibus gravissimum sentiebat quidè dolore, sed Deo juvante nihil se pati ostendebat. Quare equuleo aliisque sævioribus tormentis excarnificatus fuit, solâ ejus linguâ ad laudes Dei illasâ permanente. Cum verò exhaustis tortoribus, Martyr omnia velut jocum ferret, desperatus Theotecnus capitis sententiam in eum postea comburendum pronuntiavit; quam ille lato animo suscepit. Et cum duceretur ad supplicium, velut ad triumphum iret, quotquot convenerant Viri ac Mulieres generosè allocutus, ad stadium perveniens, præmissâ ad Deum oratione gaudens suscepit gladium.

XIV. Tum verò ingenti pyrâ constructâ cadaver Sancti Martyris in ipsam lictiores conjecerunt: sed ecce prodigium: subito enim apparuit supra pyram lux circumquaque refulgens; itaut nemo eorum qui ignem incensuri erant, accedere auderet & sacrum Corpus illasum permaneret: de hoc accepto nuntio mandavit Theotecnus ad capitis & cadaveris custodiam Milites ibi manere, quod factum est. Interim ad vesperam ex vico Malo Presbyter Fronto Ancyram advenit ferens ex condicto anulum Martyris, à quo sacras Reliquias sperabat juxta promissâ se accepturum; secum trahebat jumentum vino veteri ex vinea, quam ipse colebat, oneratum. Cum ergo ad locum pervenisset ubi Corpus Martyris custodiebatur, Dei providentiâ factum fuit, ut asina super Martyris Corpus ramis superinjectis & sæno coopertum procumberet: hoc videntes custodes, Frontonem invitarunt ad manendum cum eis eâ nocte. Igitur igne accenso & coenâ paratâ Frontonem ut secum biberet induxerunt. Ille autem jumento exonerato vinum gustandum eis præbuit, quod optimum experti sunt. Dum biberent, sermonem habuerunt de iis quæ passi fuerant, ob malè custodita corpora Feminarum in lacum projecta, quæ homo quidam ferreus furtim sustulit: cujus propterea corpus capite truncatum ibi custodire se asserēbant. Hoc audit Fronto, totâ facili serie sibi expositâ, cognovit, hunc hominem ferreum fuisse Theodotum; quem ferreum appellabant, qui omnibus in tormentis insensibilis apparuerat. Tunc Presbyter Fronto actis Deo gratiis, ejus imploravit auxilium. Cum ergo custodes vino inebriati gravi sopore correpti fuissent, Corpus Martyris sibi indicatum sustulit, ac digito ejus anulo reposito, illud jumento imposuit. Deinde ramos ac sænum, uti jacuerant supra Sanctum, sic iterum composuit, ut custodes suspicari non poss-

possent, aliquid inde esse ablatum. Illucescente autem die surgens Presbyter quærebat asinam; quæ tamen ab Angelo deducta per devia loca ad vicum Mali pervenit, & cum sacro onere procubuit in eo loco, ubi postea in honorem Martyris Ecclesia erecta fuit.

XV. Acta S. Theodoti & septem Virginum, & constantiæ omnes scripta sunt à Nilo teste de visu, quia uno ex focis S. Theodoti; ideoque ut sincera & omni fide digna habentur à Bollandò, Ruinart, & aliis Recentioribus. In eis recensendis immoratus sum; quia & prodigia, quæ Deus in istis Sanctis operatus est, & constantia quam exhibuerunt septem ille Virgines, & maximè Theodotus homo cauponarius & conditionis infimæ tum in defendenda Fide, tum in ferendis pro ea cruciatibus, demonstrant clarè adfuisse potentiam supra humanam: & consequenter valdè promovent hujus mei argumenti pro Religione Christiana firmam Veritatem. S. Theodoti & SS. Virginum memoriam colunt Latini & Græci die 18. Maii; Græci verò aliud de receptione Reliquiarum S. Theodoti solemne Festum celebrant die 7. Junii in Menol. Basilii, ubi hæc habent: *Theodotus Christi Martyr in Galatia Provincia in Castello Malo natus, cum Sanctorum Martyrum Reliquias sepeliret, delatus apud Ancyra Præsidentem & captus in carcerem detruditur. Mox ad questionem ductus, Præsidi vehementer contradixit, Deosque Græcorum irriti eorumque adoratores fatuos & miseros appellavit. Tum verò gravissimè casus lignoque suspensus, ad motis facibus in lateribus ustulatus est ejusque carnes dilaceratae. Post hæc latâ sententiâ, ut gladio feriretur, oravis, atque ita capite plexus est. Quidam verò Presbyter Phronto nomine animadvertens ejus Reliquias à Militibus custodiri, ad eos accessit: vivoque delinxisit & somno captis, Reliquias jumento impositas abstulit, & in pradio suo sepelivit, ubi usque in præsentem diem curationes funduit. Hæc compendio sunt, quæ ex Actis retulimus.*

§. XVII.

S. Romani & Infantis Martyrium.

I. **N**on minùs celebre fuit primo Persecutionis anno S. Romani Martyrium, cujus tota Civitas Antiochena, imò & Galerius Imperator, qui tunc ibi aderat, testes fuere. Erat Romanus, patriâ Palæstinus, genere nobilis ætate juvenis, Ecclesiæ Cæsariensis Diaconus & Exorcista: eo enim tempore ob pe-

nuriam Clericorum, idem sæpè plures functiones exercebat. Contigit ergo, ut mense Martii vel Aprilis anno 303. Antiochiam adveniret, cùm Diocletiani Edicto Ecclesiæ solo æquarentur; vidensque plures viros, feminas, pueros, & Ecclesiæ Ministros turmatim ad Idola accedere, ejusmodi spectaculum intolerabile judicavit: quapropter zelo Fidei ac pietatis accensus altâ voce eos increpavit; nec curans, quanto se periculo exponeret, Christianos qui perierant convocavit, eosque tanto ardore est allocutus, ut alacres facti, parati essent ad novum certamen subeundum, & ad eos, qui se vicerant, novo certamine superandos. Imò addit Eusebius (L. 2. de Resurrectione) videns Judicem exultantem de his qui fuerant superati, aggreditur vim faciens, & dicit: *Non recedes latus, habet enim Deus Milites, qui superari non possunt.*

II. Judex nomine Asclepiades, qui ex victoria de iis qui ceciderant, sperabat se de omnibus triumphaturum, tam subitam mutationem cernens, furorem suum in auctorem convertit. Romanum ergo ad se adduci imperavit, qui cum gaudio non solum secutus est vocantes, sed præcessit. Coram Judice positus, & ab eo exprobratus, cur adedò audacter tot Christianos ab obedientia Imperatoribus debitâ subtraxisset, fassus est, se criminis adedò gloriosi reum esse, & pro eo se paratum esse omnia pati, quæ sæva crudelitas excogitare posset. Quare Asclepiades, ut erat genio ferox, eum in equuleo extendi & viscera ejus lacerari præcepit. Advertens tamen, eum esse genere valdè illustrem, mutato consilio, alia tormenta & quidè atrociora excogitavit: plumbeis flagellis totum corpus ei contundi jussit; sed cùm majori libertate Sanctus Martyr Idololatriæ vanitatem despiceret, & Jesu Christi excellentiam extolleret, irâ percitus Judex tormentis tormenta eaque ferociora addidit, tantoque æstu furens, ut carnificum manibus eum torquere non contentus, furentibus ac minacibus obtutibus, stridore dentium manuumque extensione eum terrere conaretur, adedòque irâ ageretur, ut identidem è sella, quasi eum suis manibus percussurus profliret, minas in eum intorquens. Quibus nihil territus, referente Prudentio, Sanctus inter alia respondit: quòd si Imperator Christianos persequitur, ipse ut suum Imperatorem non ampliùs recognoscit: nec enim tenetur obedire homini etiam Principi, quando præcipit crimen.

III. Asclepiades sumens verba hæc posteriora, ut notam rebellionis, jussit eum in equuleo suspendi & ferreis unguis usque ad ossa dilacerari. Quo in cruciatu adedò sævi tortores fuerunt, ut

ut carnibus laceratis , ipsi ferrei unci in ejus ossibus hebetarentur . Hæc tamen animi tranquillitatem ei turbare non poterant , quin & infelicitatem inimicorum Christi deploraret , & suam felicitatem in tormentis publicaret . Quare irritatus Judex præcepit ut non ampliùs latera , sed genæ & facies ei lacerarentur : de quo S. Martyr gratias egit , quòd non unum tantùm sed plura ad laudandum Deum sibi ora aperirentur . Tunc quiescere jussis tortoribus , minatur Judex , se eum vivum combusturum . At hoc nihil commotus Romanus , sed gloriam Religionis Christianæ celebrans , proposuit Judici , ut si vellet , hujus veritatis ab innocente puero exquireret testimonium , spondens , quod ille dixerit se secuturum .

IV. Non displicuit Asclepiadi hæc petitio . Accersito itaque puero vix ab uberibus evulso , cui nomen Garulas , Romanus ab eo petiit : dic mihi , filiole , quem oportet adorare ? Christum Jesum , & in illo Patrem , an Deorum multitudinem ? Respondit Infans : alius non est nisi unus Deus , & Jesus Christus est verus Deus . Hoc responso confusionem inter ac indignationem fluctuans Asclepiades , puero dixit : quis hæc te docuit ? at ille : mea mater , inquit , & matrem docuit Deus . Hæc cum lacte ab uberibus hausi , Christum & hausi credere . Tunc Judex : veniat , inquit , mater , & adsit supplicio filii . Quæ cum venisset , puerum nudari ac flagellis adeò crudeliter cædi jussit , ut undique sanguinis rivi effluerent , omnibus qui aderant ipsis etiam Officialibus & tortoribus commiseratione lugentibus , Matre solâ ad hoc spectaculum serenâ facie permanente : imò cum puer præ dolore supplicii potum in refrigerium postulasset , illa severis oculis ipsum intuita ei dixit : nil ampliùs imposterum petas , fili mi , præter aquam vivam vitæ æternæ , quam dabit tibi Jesus Christus , sicut pueris Bethlehem largitus fuit . Tunc infans carceri traditur , & Romanus tormentis iterùm applicatur violentius : sed cum iste carnificum segnitiei & laxitatem argueret , eodem quo infans carcere reclusus fuit , donec ejus constantiâ defatigatus cum vivum comburi , & infantem capite truncari jubet .

V. Sententiam hilari animo Romanus excepit . Non procul ab Urbe supplicii locus erat : ibant ergo ; Infantem suum ulnis gestabat mater , cumque ad locum venisset , absque lacrymis aut ullo doloris signo filium carnifici tradidit , solum ori ejus osculum imprimens & precibus illius seipsam commendans : deinde expanso pallio caput sanguinem & corpus filii dum truncaretur excipiens , in sinu repositum asportavit . Infantis hujus

Mar-

Martyrium canit inter cæteros Prudentius hymno 10., & Ecclesia Latina colit 18. Novembris unâ cum S. Romano dicens : *Passus est etiam ante ipsum puerulus nomine Barula, qui ab eo interrogatus, utrum melius esset unum Deum colere, an plures Deos, cum in unum Deum, quem Christiani colunt, credendum esse respondisset, verberibus casus iussus est decollari*. Græci quoque in Menol. Basilii eâdem die, ut infra dicam.

VI. Interea eodem in loco parata erat ingens lignorum frues, in qua jam positus fuerat Romanus comburendus, jamque manibus retrò victis palo alligatus erat, solùmque Galerii Imperatoris, qui tunc aderat Antiochiæ, mandatum de igne accendendo expectabatur. Erant ibi tunc quidam Judæi, qui ei dicebant : Apud nos tres pueri in fornace Babylonica præservati fuere in testimonium veritatis nostræ Religionis : Christiani tamen ardent & in cineres resolvuntur. Verùm mox Cælum nubibus coopertum tantam pluvix copiam effudit, ut quocumque conatu ignis accendi nequiverit, Romano interim iridente & à tortoribus petente : *ubi est ignis ?* Hoc nuntio correptus Imperator censuit contra Dei voluntatem non esse pugnandum, ideoque decrevit libertate esse donandum, quem ad eò visibili portento liberaverat : sic ad Judæos confundendos Divina virtus operata est, ut ubi in fornace Babylonica tres pueros à flamma liberavit, hic ne quidèmm flammam accendi concessit.

VII. Liberatus fuit S. Romanus ab uno supplicio, sed incidit in aliud. Asclepiades quod contigerat prodigium magicæ arti tribuens, ut Imperatori blandiretur, suamque feritatem expleret, severiorem excogitavit cruciatum. Jussit, ut lingua, quæ ne Deum negaret adversùs hominem locuta fuerat, ei præcideretur. Aderat ibi quidam Medicus nomine Ariston, qui præ infirmitate à Fide defecerat. Hic secum deferens instrumenta ad hoc necessaria urgebatur incidere, quam nolebat, linguam. Et de facto incidit, incisam tamen apud se custodivit, tum ad sui tutelam, ut videbimus, tum ut eam in honore haberet, consueverant enim etiam infirmiores, interiùs tamen Fideles, honorare si quid à Martyribus sumtum esset. At ecce novum miraculum : qui abscissâ linguâ mori debuerat, remittitur sanus in carcerem, ubi à Custode ejus quod acciderat ignaro, de nomine interrogatus, altâ & clarâ voce respondit : *Romanus vocor* : imò & in aliis occasionibus loquebatur distinctiùs quàm priùs, cum ante excisam linguam balbutiret. Rumor hujus novi prodigii ad Galerium & Asclepiadem pervenit : qui suspicati, chirurgum muneri ac mandato defuisse, sive quòd & ipse

ipse adhuc secretò Christianus esset, sive quòd argento seductus, carceri eum addixerunt. Adductus ergo ad Judicem, qui eum morti tradere cogitaverat, petiit primò, ut oculari inspectione videretur, in intra Romani os ampliùs lingua esset: deinde in testimonium protulit linguam abscissam, quam in sui tutelam apud se aservabat: addiditque: producatúr alius, cui non assistat Deus, & secundùm mensuram incisæ linguæ ei incidatur lingua, & si vixerit, meum commentum est, & non Dei defensio. Producitur quidam damnatorum, & diligentissimè mensura accepta, incisa ei lingua est. Tantum ut impleta incisio est, finis vitæ ejus completur, mortuus est enim. Quibus in Romano duo vides miracula: unum quòd sic præcisâ linguâ non statim mortuus sit: alterum, quòd præcisâ linguâ adhuc loqueretur & quidè expeditiùs quàm ante.

VIII. Quid verò postea S. Romano acciderit, & quis fuerit illius gloriosus exitus, habemus ab Eusebio L. de Mart. Palæstinæ cap. 2., nimirùm quòd *Contrusus in carcerem & diutissimè ibidem maceratus, tandem cum Imperatoris vicennialia jam adessent, & ex solempni more universis, qui in custodia tenebantur, indulgentia publicè per præconem annuntiata esset, solus ad quatuor usque puncta dissonans habens pedes, in ipso jacens nervo, fractis laqueo faucibus, Martyrio sicut optaverat, coronatus est.* Ubi notandum quòd toto illo tempore, quo in carcere mansit, continuavit in eo miraculum, ut sine lingua expeditè loqueretur; sic enim idem Eusebius Lib. 2. de Resurrect. ait: *Non enim semel locutus tacuit, sed conferebat cum aliis de Cruce & victoria Christi; & hoc multis mensibus in carcere constitutus.* De hoc S. Martyre sermonem unum & fortè duos habuit S. Chrysostomus, qui extant tom. 2. Oper. novissimæ editionis; ipsum quoque in Occidente celebravit Prudentius, ut supra dixi.

Quæ de S. Romano & Infante dixi, Græci in Menol. Bas. 18. Novemb. ita memorant: *Hic impio Maximiano (Galerio) imperante Martyrium subiit. Obviàm enim factus Asclepiadi Præfecto, cum Idolorum Fanum ingrederetur, zelo accensus conatus est, hominem ab hujusmodi proposito avertere, asserens Idola nequaquam Deos esse, sed unum esse Christianorum Deum. Quare colaphis caesus, in equuleum rapitur & depectitur: qui dum torqueretur, pergebat dicere, unum esse Deum Christianorum, quem vel infantes agnoscunt. Productus itaque Sancti jussu ad redarguendam Præfectum Insans & interrogatus à Præfecto, quemnam Deum coleret: Eum, inquit, quem Christiani colunt & adorant; seque ita à matre eductum. Verberibus igitur exceptus Insans præsentem matrem, equam* popo-

poposcit quā sitim depelleret: cui Mater: *ne bibas ait, fili, ex hac aqua, sed vade & ex aqua vivente bibe. Et hunc in modum decollatus est. Romanus verò post excisam linguam, rursus expeditè loquens, in carcerem detrusus, ibique Maximiani iussu suffocatus, Martyrii coronam adeptus est. Ita Græci. Latini verò eādem die in Rom. Martyrol. ajunt: Antiochiæ natalis Sancti Romani Martyris, qui tempore Galerii Imperatoris, cum Asclepiades Præfectus in Ecclesiam irrumperet, eamque funditùs conaretur evertere, ceteros Christianos hortatus, ut ei contradicerent, post dira tormenta & linguæ abscissionem (sine qua tamen Dei præconia loquebatur) in carcere laqueo strangulatus celebri Martyrio coronatur. Quæ in substantia cum Græcis concordant,*

§. XVIII.

SS. Procopius, Philippus Heracleæ Episcopus, & socii Martyres.

I. **P**rimus, qui in hac Persecutione Palæstinam Martyrio illustravit, Eusebio teste L. de Mart. Palæst. cap. i., Procopius est. Vir fuit à juventute castitate omniumque virtutum exercitio clarissimus, austeritate vitæ adeò extenuatus, ut semimortuus videretur, animā corpus ei sustinente. Panis & aqua ejus cibus erant, à quo triduo vel septiduo etiam abstinebat. Die ac nocte sacras Scripturas legebat. In his totus erat, in scientiis verò humanis sobrius. Genere Æliensis erat, habitatione Schythopolitanus. Ibi Ecclesiæ tria ministeria præbebat: unum Lectoris, alterum Interpretis in linguam Syriacam; cum enim tunc Scripturæ græcè vulgarentur, ipse linguā Syriacā tunc vernaculā Populo eas exponēbat; tertium verò Exorcistæ. Schythopoli Cæsaream cum aliis ductus in porta Civitatis sistitur & ad Flavianum Præsidem trahitur: & priusquam carceris vel vinculorum experiretur angustias, in ipso ingressu à Flaviano ut Diis sacrificaret impellitur. At ille magnā voce, *non esse Deos multos, sed unum Factorem omnium* testatus est. Quibus commotus & conscientia saucius Judex, ejus sermoni acquiescit: & ad alia divertens, ut saltem Imperatoribus sacrificet, imperat. Sed cum Procopius quasi despiciens responderet: *Non est bonum multos Dominos esse: Unus Dominus est, unus Rex.* Quæ verba malè habens Judex capite eum damnavit; quod impletum fuit Cæsareæ in Palæstina 7. Julii anni 303. die Mercurii. Cujus memoriam celebrant Latini die 8. ejusdem mensis.

II. Græ-

II. Græci eâdem die ac mense in Menol. Basilii agunt de S. Procopio Martyre, diverso tamen ab eo de quo cum Eusebio locutus sum, ajunt enim: *Magnus Martyr Procopius in Urbe Ælia Christiano patre matre Paganâ natus, imperante Diocletiano, post patris obitum à matre educatus, eidem Diocletiano oblatus est, ut ad honores promoveretur. Quare Alexandria Dux creatus, illuc mittitur, non modò hostibus bellum illaturus, verùm etiam Christianis. Domum itaque suam pergens, audit vocem è Cælo lapsam dicentem: Adolesceus, desine pugnare adversus servos meos, ne moriaris: ostensa insuper ipsi est Crucis figura. Quamobrem Scythopolim profectus, aurificem ad se venire jussit, ut secundum ostensam sibi figuram Crucem effingeret, quam deinceps gestavit. Cùm verò de Saracenis trophæa retulisset atque domum rediisset, à matre ad Imperatorem delatus est, quòd Christianus esset. Idcirco variis cruciatus affectus, patris ab ipso miraculis, non modò alios complures ad Christi Fidem convertit, verùm etiam matrem ipsam & aliquot mulieres, cum quibus capite plexus, ad Deum migravit. Hic Procopius, ejusque gesta, à Procopio & gestis, quæ narrat Eusebius, planè diversa sunt.*

III. Post S. Procopii Martyrium, prosequitur Eusebius citato loco, quòd in eadem Urbe (Cæsareæ) quamplurimi Ecclesiarum illius Provincia Antistites gravissima supplicia alacri animo perpessi, illustrium certaminum spectacula exhibuerunt. Alii verò non pauci præ ignavia, fracti animis ac debilitati, primo statim impetu conciderunt. Ex reliquis varia quisque tormentorum genera expertus est. Aliqui tamen post dira tormenta constantes inventi violentèr ad Aras trahebantur, & quamvis nec sacrificassent nec thus adolevisset; eos tamen sacrificasse conclamabant, & sic dimittebantur. Adeò magni apud eos aestimabatur, si vel viderentur effecisse id quod voluerant. Ex istis igitur, qui tot numero erant, soli Alphæus & Zacchæus Martyrii coronam adepti sunt: qui post flagella & ungulas, post acerbissima vincula & dolores in iis exantilatos, post alia omnis generis tormenta, cùm viginti quatuor horarum spatio pedes in nervo ad quatuor usque puncta distentos habuissent, unum Deum ac Dominum Jesum Christum confessi; perinde ac si impium quidpiam locuti essent, eodem quo primus ille Martyr Procopius supplicii genere abscissi capitibus interiere, die septimo decimo mensis Dii, quod est apud Romanos ante diem 15. Kalend. Decembris, nempe diem 17. Novembris, de quibus Martyrol Rom. eâdem die.

IV. Primo Persecutionis anno desinente poni potest Martyrium S. Philippi prius Diaconi deinde Presbyteri, tandem

Heracleæ Civitatis Thraciæ Metropolis Episcopi. Publicatio Edicti de Ecclesiis destruendis ad finem anni ibi dilata fuit, siue quia Bassus illius Urbis Præses genio non adeo ferox erat, siue quia ejus uxor Christiana ipsum detinuerat. Tandem ne contumacis notam incurreret, illud publicè affixit. Philippo duo inter cæteros erant Discipuli, quos in Fide confirmabat, Severus Presbyter & Hermes Diaconus. Circa diem Epiphaniæ anni 304. Aristomachus Stationarius Urbis accessit, ut Præsidis jussu impressis cerâ sigillis Ecclesiam clauderet Christianis. Cui Philippus dixit: Homo insensate, credis tu in parietibus magis, quàm in cordibus hominum Deum habitare? Postero die Stationarius inventis & signatis omnibus vasis sacris egrediebatur. Fratres qui aderant mœrore conficiebantur; at S. Philippus januæ Ecclesiæ innixus unâ cum Severo & Hermæ omnes consolabatur & animabat unumquemque ut oportebat.

V. Interea Bassus superveniens ac videns Philippum ac cæteros ibi congregatos, coram se omnes adduci jussit ac petiit, quis inter illos esset Doctor ac Magister. Cui Philippus: Ego sum, inquit, quem quæris. Tunc Bassus ait: Audistis Imperatoris Legem, quâ vetatur, ne Christiani ullibi conveniant, sed præcipitur, ut vel sacrificent vel pereant. Deserte igitur ad me omnia vestra vasa aurea argentea aut aenea vestro ministerio inservientia, & simul etiam Scripturas, quas ad legendum & docendum adhibetis, ne, si negaveritis, hoc post tormenta faciat. Respondit Philippus: „ Si te nostra tormenta delectant, ea „ pati parati sumus. Vasa verò quæ postulas, quacumque apud „ nos sunt, mox accipe: non enim pretioso metallo Deum colimus, sed timore; eique ornamenta cordis plus placent, quàm „ ornatus Ecclesiæ. Scripturas autem nec accipere tibi nec dare „ mihi convenit. Tunc Præses accedere jussit carnifices, inter quos Mucapor inhumanus erat. Mox Severum Presbyterum introduci Præses mandavit; sed cùm non inveniretur, diù torqueri fecit Philippum. Porro Hermes qui propè aderat ait: „ Et si „ omnes Scripturas nostras acceperis, ut nulla prorsus earum „ vestigia super terram appareant: filii tamen nostri paternarum „ traditionum memores animæ suæ consulentes majora scribebunt volumina, & timorem qui impendendus est Christo, vehementius edocebunt.

VI. His dictis, diù antea verberatus, ingressus est, ubi vasa omnia & Scripturæ latebant. Secutus est eum Publius Assessor Præsidis homo furandi avidus, qui cùm vasa aliqua furtim raptè tentasset, eumque Hermes impedire conaretur, Hermen in facie

facie effuso sanguine percussit. Quibus cognitis Bassus, & vultu ejus aspectu, iratus est Publio & curari Hermen præcepit. Traditis verò vasis ac Scripturis, quæ inventæ fuerant, Officialibus, Philippum & cæteros hinc inde custodibus vallatos ad forum jussit adduci, ut Infideles gaudio Fideles autem terrore perfunderet tali exemplo: ne autem Christiani possent ampliùs convenire, ab Ecclesia tegulas & tectum prorsùs devolvi jussit; quod protinùs impletum fuit. Interim impositas Militum humeris sacras Scripturas eò deferri jussit, ubi publicè comburerentur, atque eò crevit incendium, ut adstantes singulos formido à spectaculo tanti ignis arceret. Quod cum S. Philippo in foro stanti multis præsentibus nuntiatum fuisset, hæc occasione sermonem habuit de igne vindictæ Divinæ super impios, ostendens eam in fuorum Deorum Tempia Idola, imò & ipsas eorum personas sæpiùs irruisse, qui in variis eventibus combusti interiire, incipiens ab Hercule, à quo Heraclea nomen fumsit, qui in Ygie monte combustus est: concludens hoc igne Scripturas urente, Ecclesiam non comburi, sed potiùs renasci; nam bonis non flamma sed lux est.

VII. Dum hæc meditarentur, accessit Cataphronius Sacerdos cum suis Ministris infelices epulas & profana sacra portantibus. Tunc Hermes dixit: Cœnam istam quam cernitis, Diabolica est invocatio, quæ ut nos polluat, huc adfertur. Confestim autem Bassus præses, quem magna multitudo omnis sexus & ætatis sequebatur, forum ingressus est, quibusdam pro Populi genio de suppliciis Christianorum tristantibus, quibusdam latantibus. Bassus ergo urget Philippum ut sacrificet primò Diis, postea Imperatoribus, deinde Civitatis fortunæ. Recusanti tandem dixit: moveat te saltem Herculis præsentia, cujus hîc vides tam magnum & pulchrum simulacrum. At Philippo velut impium Idolorum cultum detestante, Præses ad Hermen divertens ait: saltem tu sacrificâ: cui Hermes: Ego, inquit, Christianus sum, non sacrifico. Quæsitus cujus conditionis esset, respondit: Decurio sum, & Doctori meo in omnibus obsecundo; ait Præses: Si Doctor tuus Philippus ad sacrificandum fuerit inductus sequeris ipsum? respondit Hermes: nec ego sequar, nec ille vincetur; par enim nobis & virtus & animus est. Quare Bassus cum ipsum & blandè & minaciter inutiliter tentasset, indignatus jussit utrumque in carcerem trudi.

VIII. Porro dum ducerentur, quidam ex assistentibus impulsu crudelis dextera Philippum solo sæpè fundebant, ut ne illo quidèm tempore ei deesset poena; Sanctus tamen Senex læto

vultu è terra se erigebat , ut nec indignationem ostenderet nec dolorem , & omnes ejus patientiam admirarentur . Tunc Psalmum dicentes Domino ; qui eos fecerat fortiores , se lætos tradiderunt custodiis . Paucis in carcere elapsis diebus ; permissum eis fuit in quadam vicina domo cujusdam Pancratii sub custodiâ morari . Ibi multos ex diversis partibus ad se venientes excipiebant , sacra Divinæ Legis mysteria edocebant . Displicuit hoc Diabolo , qui eos fecit denuò in carcerem mitti . Sed cùm è carcere secretus esset in theatrum ingressus , illuc etiam noctu magna Populi turba accurrebat , & aliqui prostrati solo Philippi vestigia sacra lambebant , scientes quantum in eo Divini esset auxilii .

IX. Interea expleto Bailli gubernio annuus succe sior advenit , nomine Justinus , sed mente perversus , qui nesciebat Deum vel intelligere vel timere . Hæc res fratres vehementer affecit : Bassus enim & mitior erat , & ratione sibi redditâ vincebatur , suadente maximè uxore ejus , quæ aliquanto jam tempore , ut dixi , Deo serviebat . Tunc Zoilus Magistratus Urbis ad Justinum Tribunal S. Philippum adduxit . A quo interrogatus , an Christianorum esset Episcopus ; se id negare non posse , respondit . Justinus ei exponit Imperatoris mandatum , & præcipit ut sacrificet Diis . Non possum , quia Christianus sum , inquit Philippus : tu autem me quidem puniendi potestatem habes , adigendi tamen non habes . At nescis , inquit Justinus , quamnam tibi parantur tormenta ? Respondit Philippus : Tu me quidem torquere poteris , sed vincere non poteris ; nemo enim me ad sacrificandum perducet . Justinus ait : Per mediam Urbem pedibus traheris , & si vixeris , traheris in carcerem ad majora supplicia . Cui Philippus : Utinam , inquit , hoc facias , & tuæ impiæ satisfacias voluntati . Justinus ergo trahi eum vinctum pedibus per Urbem jussit , unde acceptis tot lapidum offensione vulneribus toto corpore laceratus , a fratribus deportatus fuit in carcerem .

X. Factus est Infidelium tumultus ubique Severum Presbyterum inquirentium . Is occultioribus latebris se subtraxerat , quem cùm investigare non possent , impulsu Spiritus Sancti in medium ipse prorupit ; nec enim diù latere poterat , quem passio ipsa vocabat . Cùm ergo ad judicium fuisset adductus , Justinus omnem artem adhibuit , tum spe præmiorum tum terrore pœnarum , ut eum à Fide dimoveret ; sed videns se frustra laborare , illum coniecit in carcerem ; quod & in Hermen , quem similiter constantem invenit , executus est . Paulùm tamen à severitate discedens , duobus diebus jussit in hospitio custodiri ; sed

postea in carcerem traduxit, ubi septem continuis mensibus moratos tandem Hadrianopolim transferri precepit: quibus egredientibus, omnes Heracleæ Christiani tanto mœrore confecti sunt, quòd Doctoribus suis privarentur, ut vel ipsi infantes nutricum uberibus inhaerentes à lacrymis temperare non possent.

XI. Cùm Hadrianopolim tres Sancti Martyres pervenissent in diversorio cujusdam Sempronii extra Urbem usque ad Præsidis adventum custoditi sunt. Qui cùm avenisset, postera die sedens pro Tribunali ad Thermas adduci jussit Philippum; quem inventum in proposito firmiorem, expoliari ac virgis adeò crudeliter cædi mandavit, ut viscera apparerent. Quod ille tantâ animi alacritate sustinuit, ut lictores ipsi stupeant, imò & Justinus ipse, qui illum remisit in carcerem. Inde vocatur Hermes, qui in Decurionis munere, quod exercuerat, multis favorabilis fuerat, & idè Officialibus gratus erat; sed hic etiam in Fide constans ad carcerem remittitur. Ibi duo Martyres de felici victoriæ initio gratias Deo agentes morabantur, Philippo etiam ætate provecto & flagellis cæso, nullum incommodum sentiente. Post tres dies Justinus eos ad Tribunal iterum vocavit: cùmque incassum tentasset ad obediendum Imperatoribus trahere Philippum, ad Hermen conversus ait: si huic senectus vicina jam morti suadet bonâ hujus vitæ contemnere, tu ætate florens felicem sacrificando te redde. Sed cùm Hermes cæcitatem & absurditatem idololatriæ exprobrasset, iratus Justinus: Tu mihi, inquit, ita loqueris, ac si Christianum me facere posses. Cui Hermes respondit: Optarem, ut nedum tu sed omnes hic adstantes Christiani fierent.

XII. Tunc Justinus à fortissimis Dei athletis victus, adhibito consilio sævam hanc sententiam protulit: Philippus & Hermes, qui præceptum Imperatoris contemnentes Romano nomine se reddiderunt indignos, mandato nostro incendantur vivi, ut eorum exemplo cæteri agnoscant, quanto constet exitio Imperialia contempsisse mandata. Itaque egressi SS. Martyres gaudentes ibant ad flammam. Beatus verò Severus, qui solus in carcere remanserat, audito, quòd socii ad Martyrium ducerentur, quasi ovis in solitudine relicta trepidabat. Gaudebat quidè eorum gloria, sed se participem cum eis non fieri tristabatur. Quare cum magno gemitu orans ad Dominum, quod petebat impetravit; nam postera die coronam Martyrii & ipse accepit.

XIII. Doloze pedum impeditus S. Philippus manibus portabatur; cum sequebatur S. Hermes lento passu, simili detentus incommodo: dumque iret dicebat Philippo: „ Doctor optime,
„ se-

„ festinanter pergamus ad Dominum : nulla nos pedum cura
 „ sollicitet , quibus jam nullus eorum futurus est usus : cessatu-
 „ ra sunt enim ministeria terrena , cū ad cœlestia fuerit Re-
 „ gna perventum „ . Tunc ad multitudinem versus narravit omnia , quæ passurus erat , fuisse sibi à Deo revelata . Dormienti enim visa sibi fuit columba alba sicut nix , quæ cubiculum in quo jacebat ingressa in capite ejus consedit , quæ & inde descendens in pectus elcas ei gratissimas obtulit : quo dignovit , se ad Martyrium à Domino vocari . Cū ergo ad supplicii locum pervenissent , de more carnifices Beati Philippi pedes humo usque ad genua texerunt , & religatas post tergum manus clavis in fuste configunt . Similiter & Hermes descendere jubetur in fossam , qui baculo trepida vestigia sustinens ridens ait : Neque hîc , Diabole , me sustinere potes . Et statim super pedes ejus ministri congerunt terram , Antequam tamen flamma accenderetur , Hermes quemdam ibi adstantem in nomine Jesu Christi adjuravit , quò filio suo Philippo imponeret , ut omnia deposita , quæ ipse acceperat restitueret , & exemplo suo vitam proprio labore sustineret . Quibus dictis , manus ei post tergum ligatæ sunt , & statim flammâ suppositâ quandiū sermo duravit , dum arderent , Deo gratias agebant ,

XIV. Sic Beati Martyres testimonium Fidei vitâ dederunt . Eorum Corpora integra reperta fuerunt : extensæ Beati Philippi manus ut in oratione fuerant ; facies ex sene juvenis reparata & quasi adversarium provocans ad certamen . Similiter & Beatus Hermes inventus est facie florens & colore pretiosus , lividis paulisper auriculis , quasi ex certamine quodam . Diabolus tamen ut Beatorum Corporum gloriam absconderet , Justino suavit , ut ea Hebro Thraciæ fluvio juberet immergi ; quod factum fuit . Sed Hadrianopolitani Cives aliqui , quos Dei cultus urgebat , apparent retia & navigia conscendunt , ut si alicui piscanti obvenerat grata captura . Orantibus annuit Deus ; nam mox illæsa Corpora involuta retibus extrahuntur , quæ triduo abscondita in villa Ogestistyron dicta duodecimo ab ea Urbe lapide , ibidem sepulta fuere . Omnia hæc ex Actis sinceris apud Ruinart desumpta sunt . De his Martyribus agit Martyrol. Rom. 22. Octobris : quamvis autem eos passos dicat sub Juliano , verius tamen sub Diocletiano eos Martyrium subiisse creditur , quo imperante Ecclesiæ dirutæ & Codices sacri combusti fuere .

XV. Quoad sacrorum combustionem Librorum celebre est Arnobii dictum , melius fuisse ad honorem Deorum Paganorum comburere omnes libros Poetarum de Diis agentium , & demoli-
 liri

liri theatra potius quàm Ecclesias. Ita enim L. 4. adv. Gentes propè finem loquitur: *Quòd si haberet vos aliqua vestris pro Religionibus indignatio, hos potius literas, hos exurere debuistis olim libros istos, demoliri dissolvere theatra hac potius, in quibus infamiae numinum propudiosis quotidie publicantur in fabulis. Nam nostra quidè scripta cur ignibus meruerunt dari? cur immaniter conventicula dirui? in quibus summus oratur Deus, pax cunctis & venia postulatur Magistratibus, Exercitibus, Regibus, familiaribus, inimicis adhuc vitam degentibus, & resolutis corporum junctiōe: in quibus aliud auditur nihil, nisi quod humanos faciat, nisi quod mites verecundos pudicos castos familiares, communicatores rei &c.* His & aliis Arnobius Paganorum injustitiam in comburendis Christianorum Libris & Ecclesiis demolendis redarguit.

§. XIX.

Novis Edictis aucta Persecutio.

I. **P**aulò post primum Edictum de Ecclesiis demolendis & sacris Codicibus tradendis & comburendis 24. Februarii anni 303. publicatum & ad Provincias transmissum, aliud seu alia eodem anno sæviora prodissè Edicta, quibus ulterius Christiani & præcipuè Ecclesiastici sub pœna mortis sacrificare cogebantur, satis demonstrant SS. Martyrum passionēs, quas supra descripsimus, & quæ eodem anno contigisse feruntur. Cur autem acerbiora hæc Edicta prodirent, causam fuisse aliqui putant Galerium ad Christianorum totale exterminium implacabili furore conautem, vel Maximianum Herculum, qui Romano Populo Christianorum extinctionem postulante, approbante Senatu, de compellendis ad Sacrificium Christianis ulterius decretum edidit.

II. Si tamen Eusebio credimus, ulterioris Edicti occasionem præbuere tumultus Melitinæ in Armenia contra Imperium excitati, & in Syria quoque, ubi Eugenius quidam à Militibus Imperator acclamatus fuit. Quorum auctores cum accusarentur Christiani, novo in eos Edicto ad internecionem sæviri ceptum est. Ita Eusebius L. 8. hist. cap. 6., ubi enarratis iis, quæ post primum Edictum Nicomedix in ipso Persecutionis exordio contigere Martyria, subjungit: *Ceterum paulò post cum alii in Melitina Armeniæ Regione, alii in Syria Imperium arripere conati essent, promulgatum est Imperatoris Edictum, ut omnes ubique Ecclesiarum Antistites vincti in carcerem truderentur. Earum verò re-*

tum,

rum, quæ postea facta sunt, spectaculum omnem prorsus dicendi copiam superabat: quippe cum innumerabilis ubique hominum multitudo custodiæ manciparetur; & carceres olim homicidis, & sepulcrorum expilatoribus deputati, tum Episcopis Presbyteris Diaconis Leitoribus atque Exorcistis complerentur: adeout iis, qui ob crimina condemnati fuerant, nullus jam locus superesset.

Rursus verò, cum aliud Edictum priora illa subsecutum fuisset, quo præcipiebatur, ut carceribus inclusi, si quidem sacrificassent, liberi abire sinerentur; si verò id renuerent, tormentis gravissimis cruciarentur; vix iniri numerus potest omnium, qui deinceps in singulis provinciis passi sunt Martyrium: ac præsertim eorum, qui per Africam & Mauritaniam, per Thebaidem & Egyptum sunt interfecti. Ex Egypto quidem nonnulli in alias quoque Urbes ac Provincias transgressi nobilibus Martyriis inclaruerunt. Ecce tria Edicta adversus Christianos subsecuta. Primum de Ecclesiis demolendis & sacris Codicibus comburendis. Secundum de Ministris Ecclesiæ carceri mancipandis. Tertium de omnibus ad sacrificandum compellendis.

III. Subinde cap. 7. Eusebius narrat ea, quæ apud Tyrum Phœniciæ Urbem ipso præsentē gesta sunt. „ Plures post innumeros flagrorum ictus constantes, leopardis uris aliisque bestiis humanum sanguinem lambere assuetis expositi fuerunt: quæ ferro & igne adversus eos excitatæ, primo quidem impetu feris ululatibus irruere videbantur, dum Christiani firmo pede eas expectarent; sed potentiâ Christi detentæ voracissimæ bestiæ longo temporis spatio nec attingere Sanctorum corpora, nec propius accedere sunt ausæ, sed in Infideles, qui eas instigabant, impetum suum converterunt. Et quamvis Sancti Martyres (ut jubebantur) commotis manibus eas ad se provocarent, interdum irruebant quidem in eos, sed Divinâ quâdam virtute repulsæ omnibus admirantibus retrocedebant. Videre erat inter alios adolescentulum vicesimum ætatis annum vix ingressum, ibi absque vinculis stantem manibus in Crucis formam expansis Deo supplicantem. Contra, istum uris & pardi furorem ac mortem anhelitu ipso spirantes, cum membra penè jam morsibus invasuri accederent, constrictis Divinâ quâdam virtute eorum faucibus, retrò protinùs abscedebant. Alios numero quinque videre erat efferato obiectos tauro, qui ex Infidelibus multos in sublime iactatos cornibus discerpebat ut semivivos asportandos relinqueret, ad solos Martyres, cum in eos furens irrueret, ne accedere quidem poterat: sed pedibus terram quatens, & hac illâc iactans

„ cor-

„ cornua , atque ob candentis ferri stimulos furorem ac minas
 „ spirans , nihilominus Divinâ vi obistente retrò avertebatur .
 „ Proinde cùm nullatenus ab eo læsi essent , aliæ rursus in illos
 „ immisæ sunt bestię , à quibus cùm illæsi mansissent , omnes
 „ tandem gladio confossi , sepulcri loco marinis gurgitibus com-
 „ mendati sunt ., . Hæc Eusebius oculatus testis enarrat .

IV. Præterea cap. 8. ad eos transiens , qui in Ægypto passi
 „ sunt , ait : „ Ibi Viri prope innumerabiles cum uxoribus & libe-
 „ ris pro Servatoris nostri doctrina vitam hanc aspernati varia
 „ mortis genera sustinuerunt : alii quidè post ungulas ac fidi-
 „ culas , post crudelissima verbera & varios etiam dictu horren-
 „ dos cruciatus , flammis absunti ; alii verò in mare demersi ;
 „ alii carnificibus capita sua amputanda alacri animo præbue-
 „ rant : nonnulli tormentis ipsis immortui , quidam fame con-
 „ sumti , alii denique in crucem acti ; pars eo modo quo malefi-
 „ ci vulgò configi solent ; pars atrocius capite deorsum verso
 „ clavis confixi & vivi eò usque servati , quoad in ipsis patibulis
 „ fame interiissent .

V. Atrociora sunt ea , quæ cap. 9. refert passos fuisse in The-
 „ baide Christianos : „ Quorum alii acutis testis vice ungularum
 „ adhibitis toto corpore ad mortem usque lacerati . Mulieres
 „ verò altero pede religatæ sublimes , capite deorsum vergente ,
 „ machinis quibusdam in altum sublata , nudis ac prorsus inte-
 „ ctis corporibus , foedissimum simul atque inhumanissimum spe-
 „ ctaculum cunctis intuentibus præbuerunt ; alii ad ramos arbor-
 „ um alligati interiere , nam cùm robustissimos ramos infle-
 „ xos machinamentis quibusdam in unum coire fecissent , Mar-
 „ tyrum cruribus utrimquè ad eos religatis , ramos subito ad
 „ proprium & naturalem situm reverti sinebant ; quo fiebat , ut
 „ membra eorum qui affixi erant uno impetu discerperentur :
 „ atque hæc non paucis diebus , nec exiguo temporis spatio , sed
 „ prolixo aliquot annorum curriculo continuè perpetrata sunt ;
 „ cùm nunc deni , interdum viceni & ampliùs , nonnumquam
 „ ad triginta usque & sexaginta , quandoque & centeni Viri
 „ simul ac Mulieres cum parvulis uno die interficerentur , variis
 „ ac per vices alternatis suppliciis addicti ., . Ita Eusebius .

VI. Ne autem suspicari quis posset de veritate eorum , quæ
 „ narrat , addit : *Nos quoque cùm in illis partibus degeremus , quam-*
plurimos acervatim uno die alios quidè capite truncatos , alios verò
flammis traditos vidimus : adeunt gladii ipsi bebetarentur , & ca-
dere amplius non valentes frangerentur ; ipsique carnifices viribus
fatiscences sibi invicem succederent . Quo quidè tempore mirabili-

lem inprimis animi ardorem verèque Divinam virtutem & alacritatem eorum, qui in Christum Dei crediderant, oculis nostris conspeximus. Etenim vix dum adversus primos lata erat sententia, cum alii aliunde ad Tribunal Judicis profugerunt, Christianos se esse confessi: & pericula quidem cunctaque multiformium tormentorum genera parvi ducebant, supremi verò omnium Numinis cultum liberà voce absque ullo metu profitebantur, & cum gaudio atque hilaritate ridentes capitalem sententiam excipiebant: adeunt in laudem Conditoris omnium Dei, psalmos hymnosque & gratiarum actiones ad extremum usque spiritum concinere.

VII. Inde præcæteris extollit Eusebius Viros duos nobilitate & scientiâ claros, nempe Philoromum, qui non vulgarem Magistratum Alexandriae exercens, quotidie Romano more stipatus Militibus jus dicebat; & Phileam Ecclesiæ Thmuicarum Episcopum, virum cunctis in patria honoribus admodum clarum, & in Philosophiæ studio insignem. Hi ergo Jesu Christi amorem omnibus præferentes, cum ab innumeris cognatis atque amicis, & quibusdam etiam ex Magistratibus rogarentur, ut sui ipsorum misereri, & uxoribus ac liberis suis consulere vellent; nunquam his omnibus adduci potuerunt, ut vitæ conservandæ causâ Divinas Leges de confessione nominis Christi ipsam negando continerent. Quare Judicis minas ac terrores nihil facientes ambo securi percussî sunt. Eorum tamen Martyrium post annum 306. contigisse fertur. Hujus Phileæ Martyris Epistolam per extensum refert Eusebius L. 8. cap. 10., quâ incredibilem constantiam plurimum, qui Alexandriae horribilia tormenta pro Christo superarunt, recenset.

VIII. Tria priora adversus Christianos Edicta estò quamplures etiam cujusvis status sexus & ætatis Martyrio coronaverint, directè tamen & principaliter Ecclesiæ Ministros feriebat; at sequenti anno prodiit quartum tribus prioribus violentius, quo omnes omnino Christiani Diis sacrificare sub poena mortis jubebantur. Hoc Edicto, quod in Palestina & Thracia primò publicatum fuit, Christiani nominis à toto Orbe exterminium, si humana potentia Divinæ prævaluisset, parabatur. Hoc fuit Edictum, de quo Constantinus Imperator (apud Eusebium L. 2. de Vit. Const. cap. 51.) pronuntiavit, scriptum fuisse magis sanguine quàm atramento, & gladio magis quàm calamo, exaratum à tribus immanibus bestiis Diocletiano & duobus Maximianis Herculio & Galerio, quorum furori totus Orbis Christianus ab Oriente ad Occidentem expositus fuit: *Statim igitur, ait Constantinus, sanguinolenta Edicta cunctis ut ita dixerim mu-*

chronibus scripsisti; & Judicibus præcepit, ut ingenui solertiam sibi à natura inditam ad acerbiora supplicia excogitanda intenderent.

IX. Nec huic mandato implendo Præsides, proprio etiam odio adducti, desuere. Ad hunc annum referri potest, quod in singulis fontibus, plateis & viis distributa forent parva Idola, & homines, qui ad eis thus adolendum quemque ex accedentibus vel transeuntibus compellerent; adeo nec ad vendendum nec emendum quidquam, nec ad aquam hauriendam procedere possent, nisi prius Dæmoni sacrificium obtulissent. Barbarum autem Judicum ingenium in excogitandis novis ac variis tormentorum generibus, ut innocentes & justos velut gravissimi criminis reos cruciarent, testantur, qui universo Romano in Orbe ea passi sunt Martyres, de quibus in particulari aliqua inferius dicam. Hoc verum est (inquit Sulpitius Severus L.2.hist. num.47.) quod eâ tempestate omnis ferè sacro Martyrum cruore Orbis infectus est.

X. Tales sævitie ministros jure Lactantius bestias, imò peiores bestiis pronuntians L.5. Inst. cap.11. ait: *Etenim si nemo est quin emori malit, quàm converti in aliquam figuram bestiae, quamvis hominis mentem sit habiturus; quantum est miserius in hominis figura animo esse efferato? ... Aspernantur itaque corpora belluarum, quibus sunt ipsi sæviores; sibi que aded placent quod homines nati sunt, quorum nihil nisi lineamenta & summam figuram gerunt: nam quis Caucasus, quæ India, quæ Hircania tam immanes tam sanguinarias unquam bestias aluit? Quoniam ferarum omnium rabies usque ad ventris satietatem furit, fameque sedatâ protinùs conquiescit Nemo hujus tanta belluæ immanitatem potest pro merito describere, quæ uno loco recubans, tamen per totum Orbem dentibus ferreis sævit, & non tantùm artus hominum dissipat, sed & ossa ipsa comminuit & in cineres furit, ne quis extet sepultura locus: quasi verò id affectens qui Deum confitentur, ut ad eorum sepulcra veniatur, ac non ut ipsi ad Deum perveniant. Quanam illa feritas, quæ rabies, quæ insania est lucem vivis, terram mortuis denegasse? Dico igitur nihil esse miserius iis hominibus, quos ministros furoris alieni, quos satellites impiæ jussionis necessitas aut invenit aut facit.*

XI. Deinde ad immanitatem, quâ toto Orbe sævierunt, procedens: *Quæ autem, inquit, per totum Orbem singuli gesserint enarrare impossibile est. Quis enim voluminum numerus capiet tam infinita tam varia genera crudelitatis? Accepta enim potestate pro suis moribus quisque sævit. Alii præ nimia timiditate plus ausi sunt, quàm jubeatur, alii suo proprio adversus justos odio; quidam naturali mentis feritate; nonnulli ut placerent, & hoc officio viam sibi*

ad altiora munirent; aliqui ad occidendum præcipites extiterant, sicut unus in Phrygia, qui universum Populum cum ipso pariter conventiculo concremavit. Sed hic quanto savior, tanto clementior invenitur. Illud verò pessimum genus est, cui clementia species falsa blanditur, ille savior, ille gravior est carnifex, qui neminem statuit occidere. Itaque dici non potest, hujusmodi Judices quanta & quam gravia tormentorum genera excogitaverint, ut ad effectum propositi sui pervenirent. His & aliis exponit Lactantius varium Præsidum genium, omnem tamen ad stragem Christianorum collimantem.

XII. In hac sæva tempestate, à tribus Imperatoribus Diocletiano & Maximianis duobus, tot turbinibus toto Romano Orbe excitatâ, solæ Galliæ placidâ gaudebant tranquillitate, piâ Constantii eis imperantis moderatione & genio in Christianos propenso eam promovente, ut Eusebius refert L. 8. Hist. cap. 13. Is Magni Constantini pater, eodem Eusebio L. 1. de Vit. Constant. cap. 16. testante, rem auditu mirabilem, factò tamen mirabiliorem gessit: Palatinis omnibus, qui in ipsius aula militabant, ad ipsos usque in summis potestatibus constitutos datâ eligendi utrum mallet: facultate, hanc conditionem detulit, ut si quidem Dæmonibus sacrificassent, manere ipsis in palatio, & consuetis honoribus frui liceret; si verò id facere renuissent, ab ipsis aditu excluderentur, & ab ipsius notitia & familiaritate remoti discederent. Cùm ergo universis barbariam diremti essent; aliusque in hanc alius in illam partem discessisset, & aniuscujusque propositum ac sententia explorata fuisset: tunc eximius Princeps, consilium suum, quod hæc tunc latuerat detegens, illorum quidètim timiditatem ac virum sui ipsius amorem condemnavit; hos verò ubi devotam Divino Numini conscientiam magnoperè probavit. Ac deinde illos quidètim tanquam Dei proditores, ne Principis quidètim obsequio dignos judicavit: nam, quomodo, inquit, fidem erga Principem suum servaturi sunt, qui erga Deum perfidi esse deprehenduntur? Itaque ejusmodi Viros à Regis adibus procul ablegandos esse censuit. Illos verò, quos Deo dignos esse veritatis ipsius testimoniò constaret, eodem erga Principem animo futuros esse affirmans, Protectores atque Imperii ipsius custodes constituit; ejusmodi homines inter præcipuos amicorum, & maximè necessarios habendos esse dicens, multòque pluris æstimandos quàm maximarum opum thesauros. Dignum fanè tanto & tam pio Principe consilium, necnon omnibus Principibus illustre exemplum ac documentum. Quàm felix propterea præ cæteris Imperii consortibus fuerit Constantii exitus, capitibus 17. & 18. narrat Eusebius, & inferiùs dicitur.

§. XX.

SS. Vincentius Levita, Eulalia, Leocadia Martyres .

I. **E**Xpositâ in generali hujus Persecutionis toto Orbe strage , de qua videri potest Eusebius L.8. hist. & L. de Martyribus Palæstinæ , ubi innumeros recenset in ea glorioso Martyrio coronatos , in sequentibus insigniora aliquorum certamina ad Fidelium solamen & excitamentum , necnon ad Divinæ gratiæ ostensionem , quæ tantis viribus Servos Dei donavit , recensebo .

II. Primus sit S. Vincentius , cujus Martyrium initio anni 304. creditur consummatum . Dacianus Præfecturam & Persecutionem simul , Maximiani Herculi in Occidente imperantis nomine in Hispaniis exercebat . Hic Cæsaraugustæ comprehensos Valerium Episcopum & Vincentium primum Diaconum , catenis oneratos , Valentiam ubi ipse morabatur transferri jussit . Vincentius genere illustris erat Officæ Regni Granatenfis Urbis natus , cujus avus paternus Agrestius nomine Consulatum gesserat . Adolescens erat animoque & corpore vicens ac studio deditus . Illum à se Divinâ scientiâ imbutum , aliis instruendis Valerius vice sui præfecerat , cum ipse impeditioris esset linguæ . Adductos ad se Dacianus increpavit , quod mandatis Principum non obsequerentur : cumque reticeret Episcopus , qui licet eruditus scientiâ sed ut dixi tardioris linguæ ; Vincentius ab eo petiit : si jubes , Pater , responsis Judicem aggrediar : cui Valerius : Jamdudum , inquit , fili carissime , Divini Verbi tibi curam commiseram ; nunc autem pro Fide , quâ adstamus , responsa committo . Tunc Vincentius alacri animo respondit , se Christianos esse , ac veri Dei permanentis in secula famulos & testes , nec pro veritate tuenda minas ac supplicia timere ; sed hæc eis cessura erunt ad coronam & vitam immortalem .

III. His & aliis Vincentii verbis furore percitus Dacianus , Valerium in exilium mitti præcepit ; Vincentium verò ad equuleum applicari , ac in eo membra distendi & toto corpore diffipari . At Vincentius ac si in deliciis positus esset hilari vultu dicebat : „ Hoc est quod semper optavi , hoc est quod votis omnibus exquisivi „ . Inde Tyrannum provocans : „ Insurge , „ ajebat , & toto malignitatis furore debacchare : videbis me „ Dei virtute plus posse dum torquor , quam possis ipse qui „ torques „ . Quare dentibus frendens impius Judex clamare in tortores cœpit , & ac si muneri suo in torquendo deessent , virgis

ac fustibus in eos deservire. Qui irati totâ rabie S. Martyris corpus adeò lacerare cœperunt, ut jam non à solis lateribus sed à toto corpore sanguis efflueret: erant enim interna viscera jam patefacta, & juncturæ à compagibus separatæ. Sed Vincentius nihil his commotus ad atrociora tormenta judicem provocabat.

IV. Hinc ex equuleo assumptus atque ad ignis patibulum raptus, tortores penè ipse præveniens moras carnificum arguendo ad poenam alacriter properabat. Cùmque parata esset ferrea crates, & addita subtus accensa carbonum congeries, intrepidus Dei Athleta eam ultrò conscendit. Ibi jacenti, præter ignem subtus urentem, applicantur pectori & membris ardentes laminæ; salis ignibus sparsi minutie crepitantes per membra dissiliunt, & jam non ad artus tantum, sed ad ipsa viscerum abdita penetrant; dum interea manet Dei servus immotus ac Deum precatur. Tantâ victus constantiâ Dacianus inde eum extrahi jubet, & in profundissimum ac obscurissimum carcerem testarum fragmentis undique stratum, distentis cruribus & pedibus ligno constrictis, eum dejici; ut quâcumque vel parvâ corporis concussionem testarum aculeis plagæ exasperentur. Quod impletum est, & ostium tenebrosi carceris clausum.

V. Ibi ergo positus Vincentius, cùm è brevi somno evigilasset, vidit carcerem cœlesti lumine illustratum, ligna quibus tenebatur fracta, & acutas testas in redolentes mollesque flores conversas. Dumque his refectus, in laudes & hymnos Deo gratias agens erumpit: ecce Angelorum Chorus eum circumdat eumque hoc alloquio demulcet: agnosce Vincenti invictissime pro cujus nomine fideliter decertasti; ipse tibi reverâ coronam præparatam servat, qui te victorem fecit esse in poenis. Esto igitur jam securus de præmio, quia mox deposito carnis onere, nostro addendus eris collegio: dantur hinc laudes Deo, & resonante organo vocis Angelicæ modulata suavitas procul diffunditur. Suaves has voces audientes custodes, territi ad clausas carceris fores contendunt, & introspectantes per rimas, Dei ministros sydereâ venustate coruscantes vident, antrum tenebris primùm horribile, immensâ luce splendere, testarum aculeos multipliciter florere, Sanctumque Dei Martyrem solutis cunctis nexibus deambulantem psallere. Qui mox Divino terrore compuncti, relicto Gentilitatis errore, Christianæ Religioni fideliter se dedere; incipientes obsequia ei præstare in cujus necem fuerant grassati. Hos in Fide confirmavit Vincentius, ac venientes Fideles læto sermone allocutus est.

VI. Ad hæc sibi renuntiata exsanguis Dacianus: Quid amplius

plius faciemus ? inquit, victi sumus. Volens ergo ei eripere gloriam inter tormenta moriendi, iussit super mollem lectum reponi, ut attrita pœnis membra, requiê obductisque vulnerum cicatricibus reparata, novis & atrocioribus tormentis experiretur. Verùm Daciano inaniter tractante de supplicio, Christus clementer disponit de prœmio. Delatus namque Dei Martyr ad lectulum, ac piis Fidelium manibus in strati mollitie repositus, mox pretiosam resolutus in mortem Cœlo triumphans spiritum reddidit. Videres tunc circumstantium frequentiam Sancti vestigia certatim deosculando prolambere, vulnera totius laceri corporis piâ curiositate palpare, sanguinem linteis excipere, sacrâ veneratione posteris profuturum.

VII. Cognito ejus abscessû, Dacianus victus atque confusus cogitavit vincere mortuum, quem non potuit superare viventem. Corpus itaque ejus in apertum campum projici mandavit, ut nullo defendente obstaculo à feris & avibus consumtum non ampliùs appareret. Sed ut ait S. Augustinus Serm. 277. cap. 1. : *Ejus fuit cadaver invictum : Dominum confessus est vivus ; inimicum superavit & mortuus*. Corvus enim avis lenta & pigerrima, haud procul stans, quasi tetrâ sui specie lugentis habitum demonstrans, non solum adventantes aves quodam impetu eminùs fugabat, sed & advenientem immanem lupum abegit à corpore ; qui reflexâ in illud cervicem quasi stupefactus hærens, certo modo Angelicam custodiam mirabatur. Ita factum fuit, ut corvus, qui olim Eliæ pleno ore cibum detulerat, nunc S. Vincentio Martyri iussu ministraret obsequia.

VIII. Territus hoc nuntio Dacianus, ac videns se nec mortuum vincere posse, quem non potuerat vincere vivum, desperato consilio sacrum corpus in pelagus demergi præcepit. Culeo ergo seu sacco insutum ac fiscellæ impositum, appensâ molâ, ac navigio in altum mare deductum, in escam piscium non ampliùs conspiciendum projicitur. Sed Vincentius, qui Daciani studia elusit in terra, elusit etiam in aquis, & qui *vicit injustus ignibus, vicit immersus fluctibus* (S. August. Serm. 274.) : dum enim nautæ nuntiabant ei sacrum ejus Corpus in profundo maris demersum nunquam ampliùs appariturum, Deus ad maris litus illud jam deduxerat inde extrahendum & honorificè tumulandum. Sanctus enim Martyr quemdam Virum in extasi admonet, se deportatum ad litus, & locum in quo jacebat demonstrat. Sed dum iste hæsitans, tardius exhibere parat obsequium, commo- nita in somnis quædam vidua nomine Jonica, ætate & pietate, provecta vera signa quiescentis corporis accepit : quæ adhibitis
secum

secum pluribus Christianis venit ad locum, & certa sibi ostensa relegendis signa, Vincentii sacrum Corpus inter ipsa soli & aquarum commercia invenit : & cum præ Gentilium furore non liceret illud honorifico tumulare cultu, ad quandam Basilicam sepeliendum delatum fuit, donec cessante Persecutione inde levatum, ad Ecclesiam extra muros Valentia deportatur, & sub sacro Altari reconditur. Unde S. August. Serm. 175. num. 3. : *Ille, inquit, qui rexit corda certantium, nec corpora deseruit mortuorum. Velut de hujus ipsius Beati Vincentii corpore præclarissimum miraculum exhibuit, ut id quod inimicus omnino non apparere cupierat sategerat fecerat, iam præsentis vultu Divino proderetur, & religiosiis humandum venerandumque demonstraretur.*

IX. Hujus S. Martyris celeberrima quovis seculo apud Latinos & etiam Græcos memoria fuit. Latini ejus Festum colunt in Martyrol. die 22. Januarii, & eadem die Græci in Menol. Ejus Gesta integro hymno Prudentius descripsit. S. Augustinus quatuor Sermones habuit : unde brevi tempore Vincentii fama totum Christianum Orbem adeo pervasit, ut ipse Serm. 176. num. 4. dicat : *Qua hodie Regio, quæve Provincia ulla, quæ usque vel Romanum Imperium, vel Christianorum nomen extenditur, natalem non gaude celebrare Vincentii?* Illum Hispania decus vocat Paulinus Poem. 27. : laudant Gregorius Turon. L. 3. hist. Franc. cap. 29. & L. 1. de Glor. Mart. cap. 90. : uno verbo : adeo celebre evasit nomen Vincentii, ut vel ipsum suum Persecutorem omnibus seculis famosum reddiderit. *Quis enim* (ait S. August. loco mox allato) *hodie Daciani vel nomen audisset, nisi Vincentii passionem legisset? Quod verò tantâ curâ servavit Dominus Martyris corpus, quid aliud demonstravit, nisi se gubernasse viventem, quem non reliquit exanimem? Vicit ergo Dacianum vivens Vincentius, vicit & mortuus. Vivens tormenta calcavit, mortuus maria transnavavit. Sed ipse inter undas gubernavit cadaver extinctum, qui inter ungulas animum donavit invictum. Non flexit flamma torrens cor ejus, non merfit aqua maris corpus ejus. Sed in his & hujusmodi omnibus nihil est aliud, nisi pretiosa in conspectu Domini mors Sanctorum ejus.* His S. Augustinus & alij S. Vincentii laudes extollit.

X. Eodem anno 304. eodem Daciano Maximiani Herculii vices in Hispaniis gerente, paulo post S. Vincentii Martyrium, contigit S. Eulalia Virginis Emeritensis passio, quam Prudentius Carm. 3. describit. Emerita Urbs Lusitania olim celeberrima patria fuit, genus etiam nobile. Ita laudatus Prudentius.

*Germinē nobilis Eulalia
Mortis & indole nobilior,
Emeritam sacra Virgo suam
Cujus ab abere progenita est
Offibus ornat, amore colit.*

Ab ipsa infantia Cœlo destinatam Eulalam ostendebant virginitas, suavitas, modestia & gravitas, quæ in ejus vultu elucebant; ludorum pariter & ornatum contentus, quæ illius ætatis blandimenta esse solent.

XI. Porrò cùm Maximiani Herculi vulgatum esset Edictum, quo omnes Populi Diis sacrificare jubebantur, Eulalia, quamvis annum ætatis duodecimum nondum excederet, ardore Martyrii se incensam prodidit. Mater verò ejus ardoris impetum curans moderari, eam ad domum ruris satis ab Urbe distantem secum transtulit. Matrōna tamen diligentia ac vigilantia nihil profuit; intempestâ enim nocte fores sine teste Virgo aperiens aufugit, ac per invia spinisque obsita carpens, iter pedibus laceris multa millia confecit, & ad Urbem ante lucem pervenit. Facto mane Præsidentem intrepida adivit, eumque liberè (se Christianam esse professâ, & ad omnia pro Christo sustinenda paratam) increpavit, quòd cultu Dæmonum tot animas perderet. Tantam in puella alacritatem admiratus Præses, eam detineri jussit: priusquam tamen tormentis experiretur, multis eam blandè est adhortatus. Quibus Eulalia nihil respondit; sed in faciem Præsidentis expuens, jaculo pedis Idolum (quod ibi erat) prosternit, & quæ parata erant ad sacrificium evertit.

XII. Hoc Eulaliæ factum, ut à Prudentio describitur, si secundum prudentiæ humanæ & communis leges pensandum esset, non leves pateretur difficultates: ultrò enim se offerre Tyranno, eumque provocare, Martyris non est, sed solum illatam passionem tolerare; ut enim docet S. Thomas 2. 2. qu. 124. a. 1. ad 3. *Aliqua pertinent ad actum virtutis secundum præparationem animi, ut scilicet superveniente tali casu homo secundum rationem agat. Et hoc præcipue videtur observandum in Martyrio, quod consistit in debita sustententia passionum injustè inflatarum. Non autem debet homo occasionem dare alteri injustè agendi; sed si alius injustè egerit, ipse moderatè tolerare debet.* Verùm si attendamus ad Divina consilia, multa in Sanctis Martyribus, Deo specialiter eos movente, facta, quæ supra communes prudentiæ regulas sunt, inveniemus; & proinde in exemplum non trahenda: & hoc de S. Eulalia in præsentī dicendum est.

XIII. Illicò igitur duo Carnifices S. Virginem jussu Præsidentis

dis aggressi pectus ei dilacerant, & latus ungulis usque ad ossa secant; interea sacrâ Virgine numerante ictus, quibus eam feriebant, & dicente, hos esse characteres, in quibus Christi trophæa & victoria legi possent: adeoque constans perstitit, ut nec lacrymas nec gemitus edens prorsus insensibilis videretur. Post hæc flammæ ardentes costis & stomacho applicantur: unde ignis ad capillos, quos super collum humerum & sinum præ modestia gestabat sparsos, ascendens ad caput pervenit, quo ipsa mori cupida os aperiens suffocata remansit. Moriens inclinavit caput & eodem tempore columba nive candidior ex ejus ore egressa ad Cœlum volavit suæ puritatis testimonium ferens. Cujus prodigii carnifices ipsi oculati testes fuerunt. Confestim verò copiosa nix (erat enim mensis December) Virgineum Corpus quod nudum remanserat, suâ albedine cooperuit & quasi sepultum reliquit.

XIV. Istius S. Virginis memoriam Martyrol. Rom. 10. Decembris colit his verbis: *Emerita in Hispania passio S. Eulalia Virginis, quæ sub Maximiano Imperatore cum esset annorum duodecim, jussu Daciani Præsidis pro confessione Christi plurima tormenta perpeffa est: novissimè in equuleo suspensa & exungulata, faculis ardentibus ex utroque latere appositis, hausto igne spiritum reddidit.* Huic in Martyrio sociam S. Juliam (cujus tamen Prudentem non meminit) adjungit dicens: *Item ibidem S. Julia Virginis & Martyris, quæ Beata Eulalia socia fuit, & illi ad passionem properanti comes individua adhesit.* De qua agunt etiam Beda, Ufuardus, & Ado.

XV. Aliam Sanctam Virginem Eulalam sub Diocletiano coronatam 12. Februarii Ecclesia Barcinonensis sibi vindicat, de qua eadem die Martyrol. Rom. hæc habet: *Barcivona in Hispania S. Eulaliæ Virginis, quæ tempore Diocletiani Imperatoris equuleum ungulas flammæque perpeffa, demum cruci affixa Martyrii coronam accepit.* Hanc eandem esse cum S. Eulalia Emeritenfi, cujus Corpus postea Barcinonam translatum sit, censent non pauci. Sed ut duas Eulalias non unam tantum admittam, movet me primò diversitas loci, in quo leguntur passæ, nempe una Emerita, altera Barcinonæ: secundò diversitas temporis; nam una 10. Decembris, altera 12. Februarii; una dicitur hausto igne suffocata, altera cruci affixa.

XVI. Hic quoque temporibus affigi potest confessio Sanctæ Leocadiæ Virginis Toletanæ, de qua Martyrol. Rom. 9. Decembris: *Toleti, inquit, in Hispania S. Leocadia Virginis & Martyris, quæ in Persecutione Diocletiani Imperatoris à Præfecto*
Hispa-

Hispaniarum Daciano dirá carceris custodia macerata, càm gravissimos Beata Eulalia & reliquorum Martyrum cruciatus audisset, genibus in oratione positis, impollutum spiritum Christo reddidit. Hujus Acta in Hymno Breviarii Toletani recitantur.

§. XXI.

SS. Cucuphas, Justus, Pastor, & alii Hispanie Martyres.

I. **S** Trages, quam in Hispania Romani Præsides, præcipue Dacianus, exercuerunt, innumeros Christo Martyres peperit; adeout sibi viderentur Christianum nomen penitus extinctisse; quod ex antiquis inscriptionibus colligitur: in quarum una legitur: „ Diocletianus Jovius, Maximianus Herculus, „ Cæsares Augusti post extensum Romanum Imperium in „ Orientem & Occidentem, & abolitum nomen Christianum, „ quod Orbem evertibat &c. „. In altera: „ Diocletianus Cæsar Augustus, post adoptatum in Oriente Galerium, & ubique „ abolitam Christi superstitionem, necnon extensum Deorum „ cultum &c. „. In quo quàm vanè sibi fuerint adulati ostendit eventus, cùm Christianorum necibus nomen Christi magis ampliaretur, quousque tandem extincto Idolorum cultu de toto Orbe triumpharit. Horum tamen aliquos saltem in Hispania pro Christo gloriosè coronatos recensebo.

II. Martyrem Cucuphatem Barcinona exhibuit, de quo Prudentius hymno 4.

Barcinon clavo Cucuphate freta

Surget.

Ejus Acta in Breviario Toletano carmine sapphico expressa leguntur, & memoria colitur in Rom. Martyrol. 25. Junii his verbis: *Barcinona in Hispania natale beati Cucuphatis Martyris, qui in Persecutione Diocletiani sub Daciano Praside plurimis tormentis superatus, percussus gladio victor migravit in Cælum. Notkerus in suo Martyrol. hæc habet: In Hispania Civitate Barcinone Cucuphatis Martyris, qui ex Civitate Scyllitana oriundus fuit; Barcinone sub Rufino Proconsule & Galerio Maximiano passus, primò gravissimè tortus & casus, deinde catenis adstrictus, in craticula superextensus, aceto & synapi persusus assari jussus est: cùmque ab igne & flammarum globis illatus apparuisset, ex præcepto impii Judicis extra Civitatem ductus in ignem copiosum iterùm projectus est: quo Divino nutu extincto, iterùm ferro vinculus in custodiam detrusus est; ubi Divino splendore consolatus, iterùm car-*

duis ferreis & taureis crudelissimè casus, in ultimo gladio perimente consummatus est. Hæc Notkerus; quibus distinctius exponit Martyris cruciatus, quamvis non sub Daciano, sed sub Rufino eos pertulisse velit.

III. Daciani victimæ Compluti extiterunt etiam SS. Justus & Pastor fratres germani, qui ex parentibus Christianis nati, cum adhuc pueri scholas frequentarent, videntes Christianos omnes terrore concussos ob Daciani ad eos persequendos adventum, relictâ scholâ ac projectis Libris Daciano ambo se præsentarunt, Christianos se esse asserentes. Dacianus comprehendî eos ac dirè torqueri imperavit; illi autem nihil territi ad omnia pro Christo sustinenda invicem se adhortabantur. Quare Dacianus, ut declinaret pudorem, se à pueris quoque vinci, ab ulterioribus cruciatibus abstinens capite plecti confestim iussit. De his Prudentius hymno 4. ait.

*Sanguinem Justî, cui Pastor hæret,
Ferculum duplex, geminumque donum
Ferre Complutum gremio juvabit
Membra duorum.*

Horum memoriam Martyrol. Rom. 6. Augusti ita celebrat: *Compluti in Hispania Sanctorum Martyrum Justî & Pastoris fratrum, qui cùm adhuc pueri litteris imbuerentur, projectis in scholæ tabulis, spontè ad Martyrium cucurrerunt: & mox à Daciano Præsîde teneri iussî & sustibus cædi, cùm se mutuis exhortationibus constantissimè roborarent, extra Civitatem perducti a carnifice jugulati sunt.*

IV. Post invictum Christi Martyrem Vincentium innumeri Cæsaraugustæ Christi Fidem sanguine testati sunt; quorum memoria in Martyrol. Rom. 3. Novembris ita recolitur: *Cæsaraugustæ Sanctorum innumerabilium Martyrum, qui sub Daciano Hispaniarum Præsîde mirabiliter occubuerunt pro Christo. Hi sunt quos Prudentius Hymno 4. dum de Cæsaraugustana Civitate agit his sapphicis canit.*

*Sola in occursum numerosiores
Martyrum turbas Domino parasti
Sola prædices pietate multa
Luce fruëris.
Vix parens Orbis populosa Pæni,
Ipsa vix Roma in folio locata
Te decus nostrum superare in isto
Munere digna est.*

*Omnibus portis sacer immolatus
Sanguis exclusit genus invidorum
Dæmonum, & nigras pepulit tenebras
Urbe piatā.
Nullus umbrarum latet intus horror;
Pulsa jam pestis populum refugit:
Christus in totis habitat plateis:
Christus ubique est.*

His & aliis Cæsaraugustæ pro Christo Fidem extollit Prudentius;
& Isidorus L. 15. Originum dicit, eam esse omnibus Hispaniæ præstantiorem.

V. Inter tot tamen celebres sunt decem & octo Martyres,
de quibus idem Prudentius ibi:

*Tu decem Sanctos revehes & octo
Cæsaraugusta studiosa Christi
Verticem flavis oleis revincta.
Pacis honore.*

Horum nomina sunt Optatus, Lupercus, Succesius, Martialis;
Urbanus, Julia, Quintilianus, Publius, Fronton, Felix, Cæcilianus, Evotius, Primitius, Apodemius & quatuor Saturnini: quorum omnium Corpora in eodem sepulcro recondita fuerunt. De his Martyrol. Rom. agit 16. Aprilis.

VI. Istis adjungit Prudentius Sanctam Encratidem seu Engratiam Virginem: de hac canit in eodem Hymno:

*Hic & Encrati recubant tuarum
Ossa virtutum, quibus efferati
Spiritus Mundi violenta Virgo
Dedecorasti.*

De hac Martyrol. Rom. post enarratam decem & octo Martyrum passionem 16. Aprilis subjungit: *Ibidem Sanctæ Encratidis Virginitas & Martyris, quæ laniato corpore, mamillâ abscissâ & jecore avulso adhuc superstes, in carcere inclusa est; donec ulceratum corpus putresceret.* Hi omnes sub Daciano passi probabiliter creduntur. Sanctæ Encratidis & aliorum 18. Martyrum Corpora inventa fuisse traduntur anno 1389. in quadam Ecclesia, quæ adhuc retinet eorum nomen, ac eorum Reliquias servat.

VII. S. Acisceli meminit Prudentius in supralaudato hymno.
Corduba Aciscelum dabit.

Quo patet eum Cordubæ Martyrio coronatum fuisse. Romanum Martyrol. 17. ei jungit Victoriā sororem, & facit utrumque passum sub Dione Præsidente his verbis: *Cordubæ Sanctorum Martyrum Acisceli & Victorie germanorum, qui in eadem (Diocletiani)*

ni) *Persecutione jussu Dionis Præsidis sævissimè cruciati; coronas à Domino illustri passione meruerunt. Cordubæ quoque coronatum Zoellum addit Prudentius: hic idem putatur ac Zoilus, qui cum aliis 19. ibi passus dicitur in Martyrol. 27. Junii: Cordubæ Sanctorum Martyrum Zoili & aliorum decem & novem. Zoilum fuisse Clericum, S. Eulogius L. 2. cap. 6. testatur, & sub Diocletiano & Maximiano passum scribit Vassæus in Chron. Hisp.*

VIII. In præfato Hymno Cajum & Crementem Martyres Cordubenses memorat Prudentius dicens:

*Additis Cajo (nec enim silendi)
Teque, Crementi, quibus incruentum
Ferre provenit decus ex secundo
Laudis agone.*

*Ambo confessi Dominum steterunt
Acriter contra fremitum Latronum,
Ambo gustarunt leviter saporem
Martyriorum,*

De his 16. Aprilis Martyrol. Rom. ait: *In eadem Civitate (Cæsaraugustâ) Sanctorum Caii & Crementis, qui secundo confessi & in Fide Christi perseverantes Martyrii calicem gustaverunt (sub eodem creditur Daciano).*

IX. Tres alios Martyres dedit Corduba, quos tres Coronas vocat Prudentius. Hos esse tres fratres Faustum Januarium & Martialem, qui Cordubæ passi sunt, censet Ruinart; quos Hispani Auctores vulgò existimant fuisse filios S. Marcelli Tingitani Centurionis & Martyris: qui propter Christum cingulum militare abiecit, eique duodecim filios similiter Martyres attribuunt; & licet Tingis vulgò *Tanger* in Mauritania fuerit Martyrio coronatus, eum tamen in Hispania ortum fuisse volunt. Hi ergo tres, cum Eugenius Præses Cordubam advenisset, ut Deos adorare præciperet, spontè ei se præsentarunt, Christianos se esse dicentes: a quo post tentatam crudeli sævitâ eorum constantiam, igne tandem consumti sunt. Eorum passionem Martyrol. Rom. 13. Octobris ita describit: *Cordubæ in Hispania Natalis Sanctorum Martyrum Fausti Januarii & Martialis, qui primò equulei penâ cruciati, deinde superciliis rasis, dentibus evulsis, auribus quoque & naribus præcis, ignis passione Martyrium consummarunt.*

X. His adjungendi sunt SS. Servandus & Germanus Martyres, de quibus Martyrol. Rom. 23. Octobris habet: *In Hispania prope Gades ad Fundum Ursonianum Sanctorum Martyrum Servandi & Germani, qui in Persecutione Diocletiani sub Viatore Vi-*
cario

cario post verbera, squallorem carceris, famis ac sitis injuriam, & longissimi itineris laborem quem ferro onusti pertulerunt, novissime Martyrii sui cursum casus cervicibus impleverunt: ex quibus Germanus Emerita, Servandus verò Hispali conditus est. Quorum Acta (inquit Baronius ibi) narrantur Hymno sacro Breviarii Toletani. Vicarius iste Viator fortè fuit Vicarius Præfecti, qui Daciano successerat.

XI. Gerunda etiam Catalauniæ Urbs Martyrem sub Daciano dedit S. Felicem, de quo Prudentius dicto Hymno ait:

Parva Felicis decus exhibebit

Artubus sacris locuplet Gerunda.

De hoc Martyrol. Rom. 1. Augusti dicit: *Gerunda in Hispania natalis S. Felicis Martyris, qui post diversa tormentorum genera à Daciano tamdiu jussus est laniari, donec in viæum Christo spiritum redderet.* De eo scribit S. Eulogius in mem. Sancti. L. 1. cap. 16. quòd Cæsareâ Mauritanix Martyrii cupidus Gerundam venit. Gregorius Turon. L. 1. de Glor. Mart. cap. 92. agit de ejus miraculis. Multi alii ejus Acta retulerunt, quæ tamen Criticis parùm sincera videntur.

XII. Quia tamen Gerundæ passus dicitur S. Felix Diaconus unà cum S. Narcisso Episcopo, de quibus in Martyrol. 18 Martii ita legitur: *Augustæ S. Narcissi Episcopi, qui primus in Rhetia Evangelium predicavit, deinde in Hispaniam profectus, cum Gerundæ multos ad Christi Fidem convertisset, ibidem in Persecutione Aureliani cum Felice Diacono Martyrii coronam accepit:* propterea hunc Felicem Diaconum confundunt aliqui cum Felice, de quo supra. Verius tamen crediderim, duos Felices Gerundæ passos fuisse; unum Diaconum cum S. Narcisso Episcopo antea passum, cujus Corpus à Carolo Magno translatus Parisios dicitur; alterum laicum, cujus Reliquiæ Gerundæ asservantur.

De S. Narcisso dicitur, cum Gerundensem Episcopum fuisse: ingruente autem Diocletiani Persecutione Augustam in Rhetia cum Felice Diacono profectum fuisse, ibique inter alios Sanctam Afram, de qua infra, convertisse: inde post novem menses Gerundam reversum triennio Fidem Christi prædicasse, & tandem à Paganis sacrum Sacrificium celebrantem multis ictibus cum Felice Diacono necatum fuisse. Hæc aliquatenus cum Martyr. supra relato concordant: solum dissident: solum dissident: solum Martyrol. vult eum fuisse passum sub Aureliano, cæteri autem sub Diocletiano, sub quo etiam contigit conversio S. Afræ. Conferantur quæ de S. Narcisso supra dixi cap. 12. §. 4. num. 5. & 6. Gerundæ velut illius Ecclesiæ Pater Pontifex & Martyr colitur. Sunt qui

qui eum confundant cum S. Narcisso Jerofolymitano Episcopo, de quo 29. Octobris: sed immeritò; nam iste (ex Martyrologio) Jerofolymis in pace quievit; dicitur enim: *Jerofolymis natalis Beati Narcissi Episcopi sanctitate patientiâ ac Fide laudabilis, qui centum & sexdecim annorum migravit ad Dominum.*

§. XXII.

SS. Saturninus, Dativus, &c. Martyres in Africa.

I. **F**ortia suorum certamina anno 304. Africa exhibuit, quæ in Actis Sanctorum Saturnini Dativi & sociorum ad nos pervenerunt. Hi Abitinæ Urbe Proconsulari comprehensi & Carthaginem adducti, ubi Anulinus Proconsul morabatur, gloriosam Christi confessionem edidere. Res ita fuit. Persecutionis tempore, quo publicos conventus agere Fideles prohibebantur; ne à sacris mysteriis prorsus vacarent, sapienti consilio in aliqua privata domo secretò conveniebant. Cum ergo præfati Martyres in cujusdam Octavii Felicis domo cœtum agerent, & Divina mysteria de more celebrarent, Abitinæ Magistratus cum Stationariis Militibus repentè supervenerunt. Et primò quidè detinuerunt *Saturninum* Presbyterum cum suis quatuor filiis, *Saturnino* videlicet Juniore & *Felice* Lectoribus, *Maria* Sanctimoniali, & *Hilarione* puero: deinde *Dativum* Senatorem, *Felicem*, alium *Felicem*, *Emeritum*, *Ampelium*, *Rogatianum*, *Quintum*, *Maximianum*, *Thelicam*, *Rogatianum*, *Rogatum*, *Januariam*, *Cassianum*, *Victorianum*, *Vincentium*, *Cacilianum*, *Reslitutam*, *Primam*, *Evam*, *Rogatianum*, *Givalium*, *Rogatum*, *Pomponiam*, *Secundam*, *Januariam*, *Saturninam*, *Martinum*, *Dantum*, *Felicem*, *Margaritam*, *Majorem*, *Honoratam*, *Regiolam*, *Victorinum*, *Pelussam*, *Faustum*, *Dacianum*, *Matronam*, *Cacilianam*, *Victoriam*, *Herestinam*, *Secundam*, item *Matronam Januariam*, numero 49.: nempe triginta duos Viros & decem septem Mulieres: omnesque hilares & præ gaudio psalmos hymnosque canentes, Dativo præeunte & Saturnino cum filiis, sequentibus cæteris ad forum processerunt; ubi gloriosè confessi Religionem Christianam, ab Urbis Magistratu Carthaginem ad Anulinum Proconsulem catenis onerati transmissi sunt.

II. Notandum, quòd in hoc eodem foro (ferunt Acta) jam pro Dominicis Scripturis dimicaverat Cœlum, „ Cùm Funda-
„ nus ipsius Civitatis quondam Episcopus Scripturas Domini-
„ cas traderet exurendas: quas cùm Magistratus sacrilegus igni

„ ap-

„ apponeret, subitò imber sereno cœlo diffunditur, ignis Scripturis sanctis admotus extinguitur, grandines adhibentur, „ omnisque ipsa Regio pro Scripturis Dominicis, elementis „ furentibus devastatur.

III. Carthaginem appulsi SS. Martyres ab Officialibus Anulino Proconsuli offeruntur; eique suggeritur quòd à Magistratibus Abitinentium transmissi essent Christiani, qui contra interdictum Imperatorum & Cæsarum Collectam & Dominicum (idest sacra Mysteria Corporis & Sanguinis Domini, ut Cyprianus Epist. ad Cæcilium) celebrassent. Illicò Proconsul Dativum interrogat, cujus conditionis esset & an Collectæ interfuisset? cui cum respondisset, se Christianum esse & in Collecta fuisse: confestim postulatur, qui illius Collectæ Præses fuisset; & statim in equuleo extendi & ungulis lacerari jubetur. Sed cum carnifices costas ejus denudassent, jamque lateribus ejus ungulis imminerent; Thelica se se tormentis subitò objiciens exclamavit: Et nos Christiani sumus, nos Collectam fecimus. Quare Proconsul furis invecus, eum gravissimis ictibus tundi, in equuleum suspendi, ac perstridentibus ungulis laniari præcepit; Sancto Thelicâ interim media in ipsa tortorum rabie exclamante: Deo gratias. In nomine tuo, Christe Dei Fili, libera Servos tuos.

IV. Talia precanti Proconsul: quis est, inquit, ex vobis conventus vestri Præses? respondit Thelica: Is est Saturninus & omnes; ac deinde adstantem Saturninum ostendit, non quasi prodens illum, sed favens ejus ardori patiendi pro Christo, vel etiam ut Judici pauderet, integram se celebrasse Collectam seu Dominicum, quando cum ipsis etiam Presbyter fuerat. Inde S. Martyr dum sevius torquebatur, pro inimicis suis imitator Christi veniam à Deo ferventiùs deprecabatur; & Proconsulem ac tortores his verbis monebat: „ Injustè facitis, infelices; „ contra Deum facitis. Deus altissime, noli illis consentire ad „ hæc peccata. Peccatis infelices; innocentes laniatis: non „ sumus homicidæ, non fraudem fecimus. Deus illis miserere. „ Gratias tibi ago: da mihi ad tolerantiam pro nomine tuo vi- „ res. Libera Servos tuos de captivitate hujus seculi. Gratias „ tibi ago, nec tibi gratias agere satis sum „. Et cum ictibus ungularum concussa fortiùs latera sulcarentur, profluensque sanguinis unda violentis tractibus emanaret, dixit ei Proconsul: „ Incipite sentire, quæ vos pati oporteat „: cui Sanctus Thelica respondit: „ Ad gloriam meam: jam incipio videre Regnum „ æternum, Regnum incorruptibile, Domine Jesu Christe,

Tem. VI. Fff

„ Chri-

„ Christiani sumus, tibi servimus: tu es spes nostra, tu es spes
 „ Christianorum, Deus altissime, Deus sanctissime, Deus om-
 „ nipotens: tibi laudes pro nomine tuo reddimus „. Cùmque
 sic orantem interpellaret Judex: obedire debueras iussioni Impe-
 ratorum & Caesarum, Thelica licet defatigato jam corpore,
 forti & constanti voce exclamavit: „ Non curo nisi Legem Dei
 „ quam didici; ipsam custodio, pro ipsa moriar, in ipsa con-
 „ summor, præter quam non est alia „. Tunc Anulinus non
 amplius ferre valens, iussit eum detrudi in carcerem ad ulteriora
 supplicia reservatum.

V. Dativus, qui de proximo appensus equuleo, fortè The-
 licæ certamen cominus aspexerat, se Christianum esse & Colle-
 ctam fecisse, & ipse conclamabat. Verùm ex improvise Fortu-
 natianus, Sanctæ Victoriæ (unius ex suprarelatis Martyribus)
 frater, vir togatus, sed à Christiana Religione tunc alienus,
 prorumpens: Domine (inquit Proconsuli) hic est, qui dum in
 hac Urbe nostro patre absente studiis vacaret, Victoriâ soro-
 rem nostram unâ cum Restitutâ & Secundâ hinc ad Abitinam
 Coloniam secum adduxit; nunquam enim domum nostram in-
 gressus est, nisi ut eas simplices puellas suasionibus suis seduce-
 ret. Aderat ibi Victoria, quæ hâc imposturâ Dativum onerari
 ferre non valens: „ Mentiris, inquit; nullius persuasione profe-
 „ sta sum, nec cum ipso ad Abitinas veni: hoc possum per Ci-
 „ ves probare: omnia meâ sponte atque voluntate perfeci „.
 Nam & in Collecta sui & Dominicum cum fratribus celebravi,
 quia Christiana sum. Tunc Fortunatianus maledictâ in Victo-
 riam exaggerabat. Et contra Dativus ex equuleo cuncta vera
 responsione solvebat. Inter hæc Anulinus ardens irâ premi un-
 gulas in Martyrem jubet: quod carnifices adeo crudeliter im-
 plevērunt, ut disruptis cutibus visceribusque divulsis secreta pec-
 toris apparerent. Dativus tamen mente & animo immobilis
 aiebat: O Christe Domine non confundar. His dictis Beatissimus
 Martyr, quod à Domino poposcerat, tam facile obtinuit, quàm
 breviter postulavit; Anulinus enim ab eo torquendo cessari ius-
 sit. Sed cùm interrogaretur, utrùm & ipse in Collecta fuisset,
 & constanter assereret, se Collectâ jam adunatâ supervenisse &
 Dominicum cum fratribus celebrasse, auctorem Collectionis se
 non unum fuisse, iterùm ungulis laceratur. Sed ipse pristinam
 repetens orationem: Rogo, ait, Christe, non confundar. Quid
 feci? Saturninus Presbyter noster est.

VI. Saturnino ad Tribunal adducto: Tu es, inquit Procon-
 sul, qui contra mandatum Imperatorum & Caesarum fecisti, ut
 om-

omnes hi in Collectam convenirent? Saturninus respondit: securi Dominicum celebravimus: nec enim illud omittere possumus. Quo audito, equuleo suspendi iubetur propè Dativum, qui corporis sui plagas, quibus laniabatur, nihili pendens, unice rogabat Deum, ut servaret animam suam, ut spiritum suum custodiret & daret ei sufferentiam, ne confunderetur. Et cùm à Proconsule ei diceretur: Tu debueras alios ad bonam mentem vocare, & non contra præceptum Imperatorum & Cæsarum facere: ille fortius atque constantius clamabat: Christianus sum: quâ voce Proconsul seu verius Diabolus superatus, ut illi parceretur iussit, & in carcerem truderetur.

VII. Presbyter verò Saturninus in equuleo recenti Martyrum sanguine delibuto pendeat, quo ut & ipse in Fide, ut cæteri, persisteret, monebatur. Hic requisitus, an ipse omnes ad Collectam adunasset, respondit: etiam ego præsens in Collecta fui. Tunc Emeritus Lector spontè ad pugnam prosiliens: ego, inquit, sum auctor, in cuius domo Collectæ factæ sunt (fortè enim ei communis erat cum Octavio Felice domus) At Præses impetum Emeriti declinans, ad Saturninum reversus ait, quare contra præceptum fecisti? cui ille respondit: Intermitti Dominicum non potest: Lex sic jubet. Itaque Proconsul increpitarum quòd contra præceptum Imperatorum facere non debuisset, torqueri iussit; adeoque crudeles fuere carnifices, ut apertis visceribus, ad horrorem videntium nudata ossa pallerent, Sancto sene Deo se commendante, eique gratias agendo, subsidium implorante. Et cùm Proconsul repeteret: quare hoc fecisti? nil aliud ab eo obtinere potuit, nisi: Lex sic jubet, Lex sic docet. Quare & ipse à tormento depositus in carcerem reductus fuit.

VIII. Deinde ad Emeritum Proconsul ait: In tua ergo domo Collectæ factæ sunt contra præcepta Imperatorum? In domo meâ, inquit Emeritus, egimus Dominicum: at cùm ei ille diceret, quare permittebas illos ingredi, respondit? Quia fratres mei sunt, & non poteram illos prohibere, quoniam sinè Dominico esse non possumus. Positus ergo in equuleo validos carnificum patiens ictus aiebat: Rogo Christe, subveni mihi: contra præceptum Domini Dei facitis, o infelices. Dicente autem Proconsule, oportere prius Imperatoribus obedire, respondit: Deus maior est, non Imperatores: rogo Christe, tibi laudes refero, Christe Domine, da sufferentiam. Quærente autem Proconsule, an haberet Scripturas aliquas in domo sua: habeo, inquit, sed in corde meo: his Apostolum imitatus, qui Legem

Domini se habere dicebat scriptam non atramento sed spiritu Dei vivi; non in tabulis lapideis sed in tabulis cordis carnalibus. Cumque preces Deo prosequeretur, Proconsul ex equuleo deponi & ad carcerem ulterioribus suppliciis cum cæteris tentandum remisit.

IX. Tunc Felix se præsentavit ad pugnam. Tyrannus autem animo jam penè destitutus, videns carnifices jam defatigatos ac Sanctos Martyres fortes in confessione persistentes, voce minus asperâ: Spero, inquit, vos electuros meliorem partem, ut obediendo vivatis. At omnes Sancti quasi unâ voce dixerunt: Christiani sumus; non possumus nisi Legem Domini sanctam usque ad effusionem sanguinis custodire: quâ voce percussus Proconsul Felici dicebat: non quæro, an Christianus sis; sed an Collectam feceris & Scripturas aliquas habeas. Cui Felix, Christiani, inquit, sine mysteriis & sine Dominico esse non possunt, Collectam gloriosissimè celebravimus, ad Scripturas Dominicas legendas in Dominicum convenimus semper. His confusus Anulinus adeò graviter fustibus eum cædi iussit, ut exanimis brevè ad cœlestia præmia evolarit. Ei alter Felix successit, qui pari virtute congressus, etiam ipse fustium illusione quassatus animam ponens superioris Felicis Martyrio est copulatus.

X. Post istos producit Ampelius custos Legis, & Divinarum Scripturarum fidelis conservator: qui similiter interrogatus & confessus, se fecisse Collectam & Dominicum celebrasse ac Scripturas secum habere sed in corde, cervicibus contusus in carcerem relegatur. Eadem fors Rogatiano contigit, qui nomen Dei confessus, carceri, illæsus tamen, deputatur: cui etiam Quintus & Maximianus in confessione pares fustibus cæsi adsociantur. Post istos junior Felix spem ac salutem Christianorum Dominicum esse proclamans carceri cum aliis traditus fuit.

XI. Saturninus junior Presbyteri Saturnini filius accersitus interrogatur & ipse, an Collectæ interfuerit; & respondenti, Christianus sum, Proconsul ait, non hoc à te postulo, sed an mysteriis adfueris: cumque ille affirmaret, dicens, Christum esse communem Salvatorem: indignatus Proconsul, in equuleo in quo ante pater ejus appensus fuerat, extendi eum præcepit, ac subinde an Scripturas haberet, postulavit: qui nil aliud ei respondit, etsi pluriès petitus, nisi: Christianus sum: aliud non est nomen, quòd post Christum oporteat nos Sanctum observare: quare Anulinus, quoniam, inquit, manes in obstinatione tua, & tu cum patre tuo vexaberis. Statimque carnifices ferreis ungulis

gulis paterno cruore adhuc madentibus et idaterra dicerpere coe-
perunt : sancto juvene interim altâ voce clamante : Scripturas
habeo Divinas , sed in corde habeo : rogo te Christe , da suffe-
rentiam , spes est in te : & cum jam instaret Proconsul : cur con-
tra præceptum Imperatorum fecisti ? nil aliud obtinere potuit ,
quàm , Christianus sum . Unde Priestes cessare jussit tormenta ,
& in patris confortium sanctum juvenem relegari .

XII. Interea vergebat in publici dies , & Proconsul ac tor-
tores defatigati erant : cumque singulos in particulari cruciare
amplius non possent , reliquos omnes Anulinus ita est allocu-
tus : vidistis quid passi sint , qui ex vobis in confessione persevera-
re voluerunt , & quid patientur etiam qui eorum sequi exem-
plum voluerint ? Qui ergo vestrum ad indulgentiam vult perve-
nire , modò se manifestet , ejusque vita salva erit . Sed cum ad
hæc conclamarent omnes : Christiani sumus : eos in carcerem
Martyrio destinatos detrudi jussit .

XIII. Porro ne sanctæ mulieres ac virgines certaminis
gloriâ privarentur , omnes in Sancta Virgine Victoria congregatæ
sunt . Itaque nobilitate generis & oris venustate & virtute , præ-
sertim virginitatis , inter omnes eminebat . Hanc ab infantia
exactè coluit ; adeo ut cum parentes ejus contra ejus voluntatem
nuptui eam tradere decrevisset , ipsa è fenestra sese dejiciens
in Ecclesiam confugerit , ubi virginitatem Deo devovit . Hanc
ergo Proconsul , cujus professionis sit , interrogat : cui illa altâ
voce respondet : Christiana sum : Fortunatianus ejus frater , ra-
tiones , Sanctæ Virginis inanes esse , imò & eam esse mente ca-
ptam ostendere conabatur . At illa : mens , inquit , mea hæc est ;
nec unquam mutata sum : tunc Proconsul ei dixit : Vis ne cum
Fortunatio fratre tuo ire ? respondit : nolo , quia Christiana sum ;
& illi sunt fratres mei , qui præcepta Dei custodiunt . His auditis
depositâ Judicis auctoritate , Proconsul blandè eam persuadere
cœpit , ut sibi consulere vellet , & fratri ad providendum salutem
ejus parato adhereret . Illa tamen constantior repetiit : mens
mea est , nunquam mutata sum ; nam & in Collecta fui & Domi-
nicum cum fratribus celebravi , quia Christiana sum : mox ergo
irâ accensus Anulinus eam cum cæteris in carcere relegans ,
passioni omnes reservavit .

XIV. Sed Hilarianus adhuc supererat è filiis Presbyteri
Saturnini unus , ætatem adhuc teneram constantiâ vincens .
Hiç patris fratrumque triumphis adjungi properans , Tyranni
atroces minas despexit . Cum enim ei diceretur : Patrem tuum
& fratres tuos secutus es ? vox infantilis è propecto pectore sta-
tim

tim erupit: Christianus sum, & sponte ac meâ voluntate cum patre meo & fratribus Collectam feci: tunc Proconsul: Ampulabo, inquit, tibi & comam & nasum & auriculas, & sic te dimittam: Ad quâ intrepidus sanctus puer clarâ voce respondit: quidquid facere volueris fac, quia Christianus sum: Proconsul verò necdum agnoscens, se in vacuum contra Deum dimicare, jubet eum cum ceteris in carcerem recipi: quo audito Hilarius exclamavit, Deo gratias: Hucusque Acta perveniunt, nec quid de sanctis Martyribus imposterum actum sit exponunt. Credibile est eos in carcere diu maceratos plagis & fame ac siti consumptos unum post alium, confessionem suam gloriose consummasse. Quamvis aliqui putent, eorum aliquos & præcipue juniorem Saturninum ad consolationem & bonum Ecclesiæ fuisse præservatos. Horum memoria in Martyrol. Rom. die 11. Februarii colitur. Eorum tamen certamen 12. Februarii videtur consignari apud August. in Breviculo Collationis tertiæ diei cap. 17. anni 304.

XV. Quia verò id quod SS. Martyribus ab Anulino in crimen vertebatur, erat, quòd *Collectam* fecissent & *Dominicum* celebrassent, non abs re erit, quid apud Veteres *Collecta* esset, quidque *Dominicum*, indicare. *Collecta* ergo dicebatur Collectio seu unio & conventus Fidelium in Ecclesia seu in aliqua privata domo tempore Persecutionis ad preces Deo fundendas & ad eleemosynas etiam colligendas. Has Romæ indici à Summo Pontifice colligit Baronius in Notis ad 1. Februarii ex sex sermonibus S. Leonis de Collectis habitis, in quorum tertio alludens S. Leo ad superstitiones eâ die à Gentilibus celebrari solitas, dicit, tunc magis *Collectas* haberi debere: *Nam illi Beatissimi Discipuli veritatis (Apostoli) hoc divinitus inspiratâ commendavere doctrinâ, ut quoties cecitas Paganorum in superstitionibus suis esset intensior, tunc præcipue Populus Dei orationibus & operibus pietatis instaret.* At quia in *Collecta* Sacerdos salutato Populo consueverat Orationem indicare dicendo *Oremus*, & in silentio orante Populo, communes Populi preces unicâ suâ voce recitabat ac Deo offerebat, inde *Collecta* nomen huic Orationi postea tributum fuit, vel quia super Populum collectum dicitur, vel quia collectè & compendiosè Populi preces constringit. De quo plura Macri in Hierolexico V. *Collecta*.

XVI. *Dominicum* verò aliquando sumitur pro Ecclesia seu loco, ad quem Christiani conveniunt, ut orent & sacra celebrent mysteria, ut *Dominicum* idem sit ac Domini domus, in quo sensu Concilium Laodicenum Can. 28. dicit; *Non oportet cenare*

cenas in Dominicis ponere. Et S. Cyprianus Tract. de Opere & Eleemofynis: *In Dominicum*, inquit, *sive Sacrificio venis?* Et Rufinus L. 1. hist. cap. 2.: *Tunc Senior*, *si hæc inquit, ita credis*, *surgere & sequere me ad Dominicum*. Et Antiochiæ nobilissima erat Basilica *Dominicum aureum* appellata. Templum autem (inquit Eusebius Orat. de Laud. Constantini) *Domini vocabulo honorata sunt; non ab hominibus, sed ab ipso omnium Domino cognomen tum sortita.* Ab eo quippe *Dominica* appellantur.

Aliquando autem convenire ad Dominicum, idem est ac convenire ad Sacrificium Corporis & Sanguinis Domini, & agere seu celebrare Dominicum idem est ac illud celebrare vel sumere. Ita loco mox allato S. Cyprianus: *Lacuples & dives es & Dominicum celebrare te credis, quæ corbam omnino non respicis?* Et Epist. 63.: *Nunquid ergo Dominicum post cenam celebrare debemus?* In hoc ergo sensu præfati SS. Martyres Proconsuli dicebant, Dominicum cum fratribus celebravimus, & sine Domino esse non possumus.

§. XXIII.

SS. Agapæ Chionia Irenes &c. Anyfia, Demetrius Martyres.

I. **S** Anctæ Agapæ, Chionia, & Irenes, de quibus hic acturus sum, Thesalonicam patriam habebant, sorores erant, omnes nuptæ, & dum passæ fuerunt, earum Pater adhuc vivebat; qui tamen sicut & earum Viri pagani erant. Hoc tamen non obstabat, quin omnibus virtutibus & præcipuè ardore caritatis essent ornata. In sacris legendis Scripturis; quarum plures habebant Codices, ferè continuè versabantur. Porro cum anno 303. Diocletianus primum de sacris Codicibus comburendis Edictum promulgasset, ut obedirent Evangelio & Abraham imitarentur, domum patriam, conjunctos, & omnia sibi relinquenda esse existimarunt, & secum sacris Libris secretò asportatis in altissimos montes, huc illucque sine domicilio vagantes se receperunt, ubi Deo solo providente alebantur. Quid de illis factum esset, nemo, nec earum pater sciebat. Post aliquod tempus proprias domos repetierunt: sed ibi maximè tristabantur, quòd liberè, ut ante, sacros Libros legendi Martiri non auderent, metu ne ab ipsismet Maritis, quos ut peiores hostes timebant, deferrentur.

II. Eis tamen adhibita cautela non diù profuit, nam tandem

dem detestæ delatæ & comprehensæ, & sacri Libri, quos tantâ curâ custodierant, inventi traditi & combusti fuere. Magistratus Urbis, qui eas comprehendi iusserat, & ipsi satellites, ut scripto renuntiarent Christo ac Idolothytis vescerentur, eas adigere conabantur, sed id facere prorsus renuentes, ad Præsidentem nomine Dulcitium à Castahdro Stationario cum aliis remittuntur, scripto causam detentionis exprimente, in quo hæc legebantur: Scias, Domine, quodd Agatho, Agapes, Chionia, Irenes, Casia, Philippa, & Eutychia carnibus Diis immolatis vesci recusarunt. His auditis Dulcitius: Quanam, inquit, stultitia est, ut piis Imperatorum & Caesarum mandatis obsequi renuatis? Inde ad Agathonem, qui ante Idolorum Minister fuerat, conversus ait: Quare tu de Sacrificiis non comedisti? Quia (respondit illè) Christianus sum. Reposuit Dulcitius: Et adhuc in eadem sententia perseveras? utique ait Agatho. Feminas deinde de eodem interrogat: cui Agapes: ego, inquit, spem meam in Deum vivum jeci; nolo conscientiam meam quietem adimere. Idem Chionia respondit. Irenes declarat, se timore erga Deum prohiberi, ne mandatis Caesarum obediret. Casia, se velle animam suam salvam facere: Philippa & Eutychia, se mori potius paratas esse, quamde Idolorum Sacrificiis participes fieri.

III. Dulcitius videns Eutychiam prægnantem ei dixit: Virum habes? Habui, respondit, & ex eo concepi, sed à septem mensibus mihi eum eripuit mors. Eoque rursus petente quis esset? Ille (inquit illa) cui me sociaverat Deus! Tunc Dulcitius illam adhortari cœpit, ut hanc stultitiam deponeret, & ad rationem rediens mandatis Imperatorum pareretur. Quibus Eutychia respondit: parere nolo: Christiana sum, Dei omnipotentis ancilla. Tunc Dulcitius ait: Quoniam Eutychia prægnans est, in carcerem reducatûr; Legibus enim Romanis vetitum erat Feminas prægantes morti addicere. Tentavit insuper Agapen & Chioniam seducere, sed eas constantes inveniens petiit, quis ad hanc amentiam eas induxisset; sed cum illæ, nullo hominum nominato, respondisset, Deum omnipotentem, & Jesum Christum Filium ejus unicum luce veritatis eas perfudisse; hanc in Agapen & Chioniam sententiam protulit: ut ambæ igne comburerentur, cæteræ autem in carcerem usque ad novum mandatum retruderentur. Porro quid Agathoni, Casiæ, Philippæ, & Eutychiæ eveniret, Acta non referunt.

IV. Postquam Agapés & Chionia igne consumptæ agonem suum consummarunt, accidit ut apud Irenis cophinos plures Libri & schedæ reperirentur, quarum magna pars ex Libris sacris erat.

erat . Propterea Irenes ad Dulcitium trahitur ; qui eam primò de Libris interrogavit , quis auctor fuisset ut eos custodiret , quis conscius ? cui illa respondit : quòd solus Deus omnipotens eos custodiri iusserat , & ipse solus eos vidit , hominum autem nemo . Secundò ab ea quærit , ubinam post evulgatum Imperatorum Edictum cum sororibus latuerit , & quis eis tunc alimenta ministravit ? respondit illa : in montibus sub dio , hic illic , scit Deus , latuimus ; Deus qui omnibus alimenta suppeditat , ibi nos pavit . Et cùm rursùs peteret , an earum secessus pater & vicini conscii fuerint , & an post recessum Libros legerint , respondit : nemo , nec quisquam alius sed solus Deus ubi essemus novit : reversis autem è secessu , Libri domi nostræ erant , sed eos efferre non audebamus ; & idèò summè angebamur , quòd non possemus nocte ac die in eis meditari , ut ante annum superio-rem , quo illos occultavimus , consueveramus .

V. His indignatus Dulcitius dixit : sorores quidèò tuæ pœnas nostro jussu decretas exsolverunt ; te verò etsi antea quàm aufugisses , propterea quòd scripta ac membranas istas occultaveras , mortis pœna tibi decreta fuerat ; non tamen eodem modo jubeo è vita sic repenti discedere : verùm per satellites ipsos , & Zozimum publicum carnificem , in lupanari nudam statui præcipio , è Palatio singulis diebus panem unum sumentem , satellitibus ipsis non permittentibus te illinc discedere . Quâ pronuntiatâ sententiâ , & pœnâ mortis satellitibus & carnifici impositâ , si vel ad horæ momentum è loco , ad quem duci iusserat , eam educi permisissent , illicò ad lupanar ducta , ibi nudata constituta fuit . Deo tamen eam protegente , nullus ausus fuit ad eam accedere , nec verbo minùs honesto ejus polluere modestiam . Quare iterùm ad Tribunal ductam Judex iterùm iuterrogat , an in pristina temeritate adhuc persisteret ; at ipsa respondente : Minimè temeritas , sed Dei pietas est in qua persisto : Judex in eam finaliter pronuntiavit , ut viva combureretur . Igitur Milites comprehensam in sublimem locum duxerunt , ubi & ejus sorores antea passæ fuerant . Cùm autem magnum rogam accendissent , jussu in eum conscendere , Sancta Irenes Psalmos canens & gloriam Dei celebrans in eum se projecit , & ita Martyrium consummavit Kalendis Aprilis anni 304 . Hæc ex Actis sinceris sunt desumpta .

VI. Harum memoriam Latini & Græci celebrant . Diversitas tamen est in die ; nam ubi Acta dicunt , S. Irenem Martyrium consummasse die 1. Aprilis : ex quo fieret , ut Agapes & Chionia , quæ antea passæ fuerant , illud consummarint Martio propè

desinente ; Martyrologia tamen vulgata , inter quæ Romanum, SS. Agapen & Chioniam die 3. Aprilis , Sanctam verò Irenen die 5. ejusdem mensis memorant . Græci verò in Menologio Basil. de omnibus tribus agunt die 3. Aprilis . Discrepant etiam quia Græci eas *Mulieres* vocant ; quo indicatur , eas non fuisse Virgines , sed nuptas , quod supra dixi : Latini verò omnes tres Virgines fuisse in Martyrologiis asserunt . Quidquid tamen sit , eas gloriosum Martyrium pertulisse pro Christianæ Religionis Veritate , quod ad præsens argumentum pertinet , certum est .

VII. Inter plures Thessalonica passos recensetur quædam Virgo nomine Anyfia , de qua in Martyrol. 30. Decembris & in Menologio Basilii , ubi hæc habentur : *Sancta Martyr Anyfia Maximiano Imperatore ex Urbe Thessalonica piis fidelibus divitiisque parentibus nata , post illorum obitum sola derelicta , vitâ moribusque Deo gratias agebat . Quâdam autem die , cum de more Ecclesiam adiret , obviam ei factus Miles Idolorum cultor , comprehensam compellebat abire Idolisque sacrificare . Reluctantem verò & in ejus os conspuentem iratus Miles , trajectis gladio lateribus gravique inflicto vulnere , in terram dejecit : at illa sic dejecta Deum orare eique gratias agere non cessabat : at hunc in modum per plures horas faciens spiritum Domino tradidit .*

VIII. Insignis quoque fuit S. Demetrius . Is Thessalonica morabatur , ubi imitator factus Apostolorum pro Fide alacriter decertabat : cui pietatis opera conjungens verum se Christi discipulum exhibebat . Cum Thessalonicam Maximianus Galerius advenisset , Milites destinati ad perquirendos Christianos Demetrium , qui mortem non timens latebras non quæsierat , facile invenerunt & comprehensum Galerio eunti ad Gladiatorum pugnam in amphitheatro spectandam præsentarunt : qui præcepit eum ibi detineri circa balneum propè Amphitheatrum , donec reverteretur . Erat inter Gladiatores quidam nomine Lyeus Imperatori carus , qui ut invincibilis habebatur : unde Imperator magnum promisit præmium ei , qui cum illo congredi ausus esset . Nestor quidam nomine surgens , quamvis Imperator eum dehortaretur , pugnam acceptavit . Vix congressus lethali ictu Lyeum ferit prostrernit & occidit . Quod adeo indigne tulit Imperator , ut nec cogitans de præmio quod promiserat victori , exasperatus recesserit . Ut autem erat irâ furens , recordatus Demetrii , præcepit , ut in loco ubi eum detineri jusserrat , lanceâ transfigeretur , quod factum fuit . Hunc Demetrium fuisse Proconsulem , quidam præsertim ex Græcis volunt : imò talis etiam describitur in Martyrol. Rom. 8. Octobris , ubi dicitur : *Thessalonica Sancti De-*

Demetrii Proconsulis, qui, cum plurimos ad Christi Fidem perduceret, Maximiani Imperatoris jussu lanceis confossus Martyrium consummavit. Aliquibus tamen incredibile videtur, quòd Proconsul talem pro veritate moriendi animum habuerit, & quòd Proconsulem nullo præcedente mandato à Militibus captum, nullo super eum habito judicio, Maximianus occidi jusserit.

IX. Nestor quoque, qui Lyeum occidit, ponitur inter Martyres ibidem his verbis: *Ibidem Sancti Nestoris Martyris: Ita etiam asserunt Græci in Menol. Basilii die 16. Octobris, ubi postquam egerunt de S. Demetrio (quem tamen Proconsulem non dicunt) de S. Nestore hæc habent: Nestor Martyr Thessalonica claruit temporibus Maximiani Imperatoris. Christianus cum esset, frequenter Sanctum Demetrium adibat ubicumque is moraretur, ab eo veritatis verbo accuratius institutus docebat. Cum autem Thessalonica Maximianus adesset, & Circenses ludi committerentur, gladiatoremque Gentilem Lyeum nomine, portentosa corporis proceritate & fortitudine in theatrum produxisset, qui omnes in certamen descendere ausos interficiebat; Sanctus Nestor zelo Divino accensus, ut audivit Maximianum dicentem, si quis vult, congregiatur cum Lyeo eumque vincat; re cum Sancto Demetrio communicatâ, ab eoque confirmatus & virtute Domini nostri Jesu Christi auctus in arenam descendit, Lyeumque gladio sustulit. Quamobrem commotus vehementer Imperator Nestorem decollari jussit. Atque ita finem habuit, de Diabolo simul & de Lyeo triumphans. Hoc tamen factum, tum ex parte Demetrii adhortantis tum Nestoris exequentis homicidium, velut Divinæ Legi contrarium, indignum Martyre videtur. Nisi dicatur, hoc speciali Dei impulsu factum, ut Nestori esset occasio, quâ cognitus à Maximiano quòd esset Christianus, mortem pro Christo subiret. Quidquid tamen de Nestoris Martyrio sit.*

X. Certum est, S. Demetrium in utraque Ecclesia ut celebrem Martyrem coli. Corpus ejus nocte Martyrium sequente ab aliquibus Christianis tumulatum eodem in loco secretò fuit, ibi diù occultum jacens; donec Leontius Præfectus Prætorii in Illyrio Ecclesiam ei erexit, quæ postea celebris evasit ob insignia ibi patrata miracula, quæ Græci narrant. Inter quæ Thessalonica à Barbaris obsessa ejus intercessione fertur liberata, teste Allatio de Simeonibus: & Michael IV. Imperator ejusdem patrociniò implorato victoriam de Bulgaris, ut narrat Historia Græca, reportavit; Deo sic honorante eos, qui in testimonium veritatis vitam pro eo dederunt.

SS. Theodora, & Didymus Alexandria Martyres.

I. **T**heodora ex nobilioribus Alexandria Familiis progenita Christi Fidem amplexa virginitatem suam Domino consecraverat. Postquam Diocletianus initio anni 304. ferale promulgavit Edictum, quo Christiani omnes aut Dæmoniis sacrificare aut mori juebantur, Theodora comprehensa & carceri tradita fuit circa Martii seu Aprilis mensem. Ibi aliquandiu mansit, donec Proculus, seu Eustratius, Præses eam ad se vocavit: qui ab ea petiit, an ingenua esset an ancilla. Illa autem respondit, se Christianam esse, & à Christo Jesu liberatam à servitute peccati; ceterum, quod ad hoc seculum attinet, se ab ingenuis parentibus genitam esse. Cumque Lucius Urbis curator testimonio suo Ingenuitatem & honestatem Theodora confirmasset, ei dixit Judex: si ingenua es, quare nubere noluisti? at illa: Propter Christum, inquit, qui adveniens in carne in hunc Mundum nos eripuit à corruptione, & vitam æternam promisit. Ego autem confido in eo, si ejus Fidem servavero, me quoque corpore intactam permansuram.

II. Tunc Judex ait: Nescis Imperatores jussisse, ut vos virgines aut Diis sacrificetis aut locis infamibus exponamini? Illa verò respondit: Puto non ignorare te, quoniam Dominus voluntatem castitatis respicit; quòd si contra meam voluntatem egeris, violentia erit, mihi tamen non erit crimen: at Judex: cognoscens, inquit, te ingenuam esse & parcens speciei tuæ, misereor tui; moneo te, ne contempnas me, nihil enim proficis per Deos omnes. Cumque ei repeteret Imperatorum jussionem, illa eodem responso repulit, nempe quòd si cogatur hoc facere, hoc sibi ad fornicationem non imputabitur: addens: quod si autem volueris caput meum abscindere, aut manum aut pedem aut totum corpus dissipare, hæc violentiæ opera sunt, non voluntatis: Deo castitatem meam voto commisi, ipse eam custodiet & columbam suam sibi servabit: cumque instaret Judex, ne vellet generis sui nobilitatem perpetuam infamiam polluere; quid enim à Christo Crucifixo sperare poterat? Illa fervore accensa: Ita, inquit, spero in Jesum Christum sub Pontio Pilato crucifixum, quòd ille castitatem meam adversus omnes hominum violentias intactam servabit, quousque ei Fidem servavero: ac Judici minanti, se, nisi pareret, tanquam vilem ancillam tractaturum, San-

Sancta Virgo respondit : Parata sum corpus meum præstare in quod habes potestatem , sed animæ solus Deus potestatem habet : quibus accensus Judex : Expalmate , inquit , istam arctius , & dicite illi , noli esse stulta , sed accede & sacrificia Diis : stulta ! ne me cogas injuriam tibi facere . At respondente illâ : Stulta non sum Dominum confitendo ; & quam tu vocas injuriam , honor mihi & gloria erit in seculum . Judex videns se nihil proficere , superfedendum duxit .

III. Quare ad eam conversus : do , inquit , tibi tridui spatium : & per Deos nisi consenseris , jubebo te ad lupanar duci , ut omnes Mulieres videant & exemplo tuo confundantur . Theodora respondit : Hi tres dies mihi jam transierunt , fac itaque quod vis : solum rogo te , ut immaculatam me serves , donec pronunties sententiam : tunc Judex ait : Jubeo Theodoram sub idonea custodia ad tres usque dies custodiri , si fortè poenitentiam ducta à contumaci sua , persuasione resiliat . Nulla sanè ei violentia ingeratur , optimo enim genere est . Sicque triduò Sancta Virgo in custodia mansit . Post tres autem dies pro Tribunali sedens Judex vocari Theodoram jussit eique dixit : si te jam emendasti , sacrificia & vade . Dico autem tibi , quod si in hoc permanes proposito , non eris pudica . Sed ad hæc dicente ipsâ , quod Christus , cui suam castitatem promisit , scit quomodo agnam ancillam suam custodiat : Præses ait , hætenus distuli mandata exequi Imperatorum , ut viderem , si tuam vincere contumaciam possem ; nunc , quoniam ita vis , ad locum infamem ibis , & videbimus , si tuus Christus , pro quo adeò obstinate resististi , ibi te custodiet .

IV. Ad lupanar ergo perducta Sancta Virgo , oculos ad Cælum elevans dixit : , Pater Domini nostri Jesu Christi , adjuva , me & libera me de hoc infami loco , qui adjuvisti Petrum , cum esset in carcere , qui eduxisti eum sine contumelia , educ , me sine macula hinc ; ut omnes videant , quoniam tua sum , ancilla . Populus interea velut lupus ad prædam exterius stabat , circumspiciens , quis ad illam prior intraret . Dominus autem Jesus , qui in eum confidentibus adest , suscitavit quendam Christianum , qui militari veste indutus ad eam ingressus est . Quem videns illa tali habitu indutum expavit , & per angulos cubiculi circumfugere cœpit . At Didymus , non sum , inquit , quem me vides . Frater tuus sum voluntate ac fide , qui hunc habitum , ut te hinc liberarem , assumsi . Veni itaque , vestimenta mutemus , Tu meum suscipe , quod tibi timorem incussit & egredere ; ego hic manebo vestem ac personam tuam gerens .

Cognoscens Theodora, hunc esse Angelum, quem postulaverat, à Deo missum, consensit; & veste suâ femineâ tradidit Didymo, induit ipsa habitum Militis, & capite pileo, quem ad hoc ipse attulerat, ad frontem usque cooperto, demisso vultu quasi erubescens, ac nemini ad portam loquens, ut ipse monuerat, feliciter egressa est, manente Didymo femineâ veste induto & capite cooperto. Cumque jam turbam declinasset illa, Deo liberatori gratias egit.

V. Jam hora transierat, cum alius quidam ingressus est; & inveniens pro femina virum stupefactus intra se dixit: Ergo ne virgines in viros demutat Jesus? Ille qui intraverat, jam exivit; quis est ergo hic qui sedet? ubi est virgo huc deducta? Audieram, Jesum aquam mutasse in vinum & fabulam existimabam: nunc quod majus est video, quoniam virginem demutavit in virum; timeo, ne me demutat in mulierem. At Didymus se ipsum manifestans impavidè dixit, non mutavit me Dominus, sed me & illam coronavit. Nam quam habebatis non habetis, quem autem habetis accipite.

VI. Egressus ergo qui intraverat, rem pandit, cujus famâ ad Præsidem perlatâ, adduci jubetur Didymus, qui introductus ac interrogatus, quis esset, quis eum misisset, ut hoc faceret, respondit: Didymus vocor: & Deus me misit, ut hoc facerem. Tunc Præses, confitere, inquit, ante tormenta: ubi est Theodora? respondit. Per Jesum Christum Filium Dei vivi nescio ubi sit. Hoc quidem scio; quod ancilla Dei est, & confessa Christum illæsâ permansit. Judex ait, Didymè, cujus conditionis es? respondit: Christianus sum; liberatus à Christo. Judex ergo eum dupliciter torqueri jussit, & quod Christianus nollet Diis sacrificare, & quod Theodoram fraude liberasset. Sed cum eum constantem reperiret, caput ei amputari, & reliquum corpus igne cremari præcepit: quod impletum fuit. Hic finiunt Acta, nec quem exitum S. Theodora habuerit, indicant.

VII. Attamen ex S. Ambrosio L. 2. de Virginibus cap. 4. colligit inter cæteros P. Ruinart in Act. Mart., eam cum Didymo Martyrio coronatam fuisse. Cum enim audisset, Didymum capite damnatum, ad locum supplicii festina cucurrisse fertur, & de corona cum eo contendere cœpisse. Cumque Didymus diceret: Mea est corona, qui jam sententiâ damnatus sum; mea est, ajebat illa, nolo, de tua morte culpabilem vivere, sed magis innocentem mori. Consensi, ut meum quidem salves pudorem, sed non vitam; infamiam fugi quidem, sed non mortem: si tu Martyrio me privaveris, me fecellisti. Sic duo contendere runt,

runt, & ambo vicerunt, quia utrique corona Martyrii reddita est. Dubitant tamen aliqui, an Virgo, de qua Ambrosius loquitur, fuerit Theodora, de qua nos; & an ille, qui sub habitu Militis ejus servavit pudorem, fuerit Didymus. Nam Ambrosius neutrius nomen indicat; imò hæc Antiochiæ contigisse non Alexandria dicit. Et insuper proponit hoc tanquam recens secutum. Hæc tamen facile concordari posse videntur. Nam historia, quam Ambrosius narrat, omninò concordat cum iis, quæ de Theodora & Didymo dicta sunt. Quòd utriusque nomen tacuerit, solum arguit, historiam non adeò distinctè Ambrosio perspectam fuisse, quâ ratione pro Alexandria potuisse Antiochiam credere, par est; nisi dicatur, hanc mutationem exscriptorum vitio accidisse. Nec officit, quòd Ambrosius hanc historiam proponat tanquam recentem; nam cùm Theodoræ passio eodem seculo, quo vixit Ambrosius contigerit, recens & nupera dici potuit; maximè in comparatione Theclæ, de qua paulò ante mentionem fecerat. Nec tandem obest, quòd Acta supra relata Theodoræ mortem omittant; nam multa, quæ in Actis desunt à sequentibus auctoribus suppleta fuisse, sexcenta exempla demonstrant.

VIII. S. Theodoram cum Didymo Martyrium subiisse, confirmant Latini in Martyrol. Rom. 28. Aprilis his verbis: *Alexandria passio Sanctæ Theodoræ Virginis, quæ Idolis sacrificare contemnens, cùm esset in lupanar tradita, repente quidam ex fratribus nomine Didymus mire Dei favore commutatis vestibus illam eripuit, qui postea in Persecutione Diocletiani sub Eustratio Præsidente simul cum eadem percussus simul coronatus est.* Græci etiam in Menol. Basilii die 27. Maii totam historiam sic perstringunt. *Sancta Theodora claruit temporibus Diocletiani. Cùm autem ad Præfectum Alexandria adducta Christum profiteretur, in lupanar conjecta est. Verùm suscipiens Deum precibus, incorruptam se servavit: nam Christianus quidam nomine Didymus, Deo inspirante, habitu militari indutus, ad eam accessit. Illa verò timore percussa, in angulum domus profugit. At Didymus bono animo illam esse jubens, nec quidquam mali suspicari, Militari stolâ indutam è domo exire mandat; ipse verò muliebri habitu amictus, & caput velo tegens loco illius mansit. Cùm autem impurus quidam ingressus esset, & sub muliebri specie virum deprehendisset, rem totam Præsidente enarravit. Quare statim comprehensus Sanctus capite plexus fuit. Post hæc capta est & Sancta Theodora; cùmque ipsi caput amputatum esset, in flammis cadaver injectum fuit.*

S. Irenæus Episcopus Sirmii, Montanus, & Pollio :

I. **S**irmium apud profanæ historiæ Scriptores celebris Pannoniæ Civitas fuit . Probo Imperatori natalia dedit ac simul sepulcrum : nam propè illam à Militibus irritatis , quòd nimio labore eos jussisset ad majorem aeris salubritatem aquas è vicinis agris divertere , occisus fuit . Cognita est quoque in Ecclesiastica Historia infausto nomine Photini Hæresiarchæ ejus Episcopi seculo 4. , & Germani inter Arianos præcipui , & duplici Synodo in ea coacta , à Catholicis una , à Semi-Arianis altera . Æquè tamen eam illustrem reddidere diversi sancti Viri , quos post Evangelium susceptum Christo dedit , inter quos Principem locum tenet S. Irenæus , de quo hic agemus . Modò tamen stragibus Gothorum Hunnorum & plurium Barbarorum devastata ad pagum redacta , nomen Comitatus in Ungaria reliquit .

II. Sanctus Irenæus probabiliter Sirmii oriundus erat . Nam tota ejus familia ejus Martyrio adfuit , quæ toto conatu studuit eum ad præferendam Fidei vitam adhortari , ut statim dicam . Ex quo inferri videtur , omnes è sua domo fuisse Paganos vel Fidei desertores . Ipse tamen à prima ætate piæ alicujus Personæ instinctu Jesum colere cœpit . Uxorem habebat & plures filios adhuc parvulos , quando Martyrium subiit . Ætate adhuc valde juvenis erat , pietate verò & Fide provectus , ceterisque Christianis virtutibus adeò ornatus , ut meruerit in Episcopum Sirmiensis Urbis in adolescentia sua eligi , & ad palmam Martyrii pro Fide & Populo sibi credito constanter pugnando pervenire , imperante Diocletiano 8. Idus Aprilis anni 304. Res ita contigit .

III. Probo Pannoniam gubernante , Irenæus Episcopus comprehensus & coram ipso adductus fuit . Probus ei statim præcepit , ut Diis sacrificando Imperatoris mandata faceret , alioquin tormentis subiceretur . Cumque Irenæus respondisset , se quævis tormenta pati malle , quàm Deo negato Dæmoniis quales sunt Diis sacrificare ; nam qui Diis & non Deo sacrificat eradicabitur ; iratus Probus dixit : aut sacrificæ , aut faciam te torqueri . Cui Irenæus : Gaudeo , inquit , si feceris , ut Domini mei passionum particeps inveniar . Quare Præfes jussit eum torqueri . Cumque acerbè vexaretur , dixit ei Probus : Quid dicis Irenæe ? Sacrificæ . At ille : Sacrifico , inquit , per bonam confessionem Deo meo , cui semper sacrificavi . Tunc accesserunt

parentes ejus uxor filii cognati & amici ejus, qui videntes eum torqueri, lacrymis & plorantibus eum flectere conabantur. Hinc pueri pedes ejus amplectentes dicebant: miserere tui & nostri pater uxor quoque ejus lugens vultum & aetatem ejus precabatur; parentum verò & omnium luctus & fletus erat super eum, domesticorum gemitus, vicinorum ululatus & lamentatio amicorum, qui omnes clamantes ad eum dicebant: teneræ adolescentiæ tuæ miserere. Sed ille meliore cupiditate detentus, sententiam Domini ante oculos habens, qui dixit: *Si quis me negaverit coram hominibus, & ego negabo eum coram Patre meo, qui est in Calis*: omnes despiciens, nulli eorum respondit. Probus autem Præses ait: quid dicis? Flectere horum lacrymis ab insania tua, & consulens adolescentiæ tuæ, sacrifica. At Irenæus: Consulo mihi, inquit, in perpetuum, si non sacrificavero. Tunc Probus recipi eum jussit in custodiam carceris; ubi plurimis diebus clausus diversis pœnis est afflictus.

IV. Post hæc, residente pro Tribunali Probo, mediâ nocte Irenæus adductus est, à quo semel & iterum jussus ut sacrificaret, cum ille constans negaret dicens: fac quod jussus es; hoc à me ne expectes; fustibus cæsus est. Sed nihil proficiens Probus eum interrogat: uxorem habes? Irenæus respondit: non habeo inquit. Iterum: Parentes habes? respondit: non habeo: tunc Probus ait: Et qui fuerunt illi, qui in præterita fiebant sessione? Respondit Irenæus: Præceptum Domini mei Jesu Christi est dicentis: Qui diligit patrem aut matrem aut uxorem aut filios aut fratres aut parentes super me, non est me dignus. Et hæc dicens oculos ad Cælum levabat, ostendens se neminem nosse super terram. Unde dicenti Probo: sacrifica saltem propter filios. respondit: filii mei Deum habent, quem & ego, qui potest eos salvare: tu autem fac quod tibi præceptum est. Iratus Probus: dabo, inquit, in te sententiam. Respondit Irenæus: gratulor si feceris. Tunc sententiam protulit: quòd Irenæus præceptis Regalibus inobediens præcipitur in fluvium: quam audiens Irenæus dixit: Post tot minas & tormenta nil aliud in me decernis? expectabam, ut ferro me subjiceres. Hoc facias oro; & discas, quòd Christiani propter Fidem, quæ est in Deo, mortem contemnere consueverunt. Tandem fiducia percussus Præses, jussit, eum etiam gladio percuti. Quibus Sanctus Martyr gratias agens ductus fuit in pontem supra Savum, ubi expoliatus se vestimentis suis, commendans animam suam Deo, & Sirmiensis Populi in Fide constantiam, truncato capite Martyrium consummavit, & Corpus ejus in Savum fluvium projectum fuit sexto seu octavo Idus Aprilis.

V. Hujus tamen memoriam celebrant Latini in Martyrol. die 25. Martii his verbis : *Sirmii passio Sancti Irenæi Episcopi & Martyris , qui tempore Maximiani Imperatoris sub Præfide Probo , primùm tormentis acerrimis vexatus , deinde diebus plurimis in carcere cruciatus , novissimè abscisso capite consummatus est .* Græci verò de eo agunt die 23. Augusti , ubi in Menol. Basil. hæc habent : *Sacer Christi Martyr Irenæus imperante Diocletiano fuit . Edocens autem eos , qui ad ipsum adventabant , atque in Christi veritate instituens & Christum apertè prædicans , delatus est ab Idololatriis apud Probum Præfektum , ac detentus & catenis devinctus stetit ante illum . Interrogatus verò , cujus nominis fortuna Religionis patriæ atque instituti esset , cæteris omnibus ipse omisissis , se Jesu Christi servum confessus est . Acriter igitur percussus custodia traditur , & magnas ibidem pertulit calamitates ; jussis carceris custodibus , non modò quàm diligenter ipsum asservare , sed nemini permittere , ut ad illum curandum , seu ad aliqua ei afferendum esculenta introiret . Ergo post multos dies de carcere eductus ac denuò coactus desciscere à Christo , Idolisque sacrificare , & nullo modo ad id se induci passus , flagellis vehementer contunditur . Post hæc gladii subiens sententiam , capite plectitur .*

VI. Acta S. Pollionis (de quo statim) mentionem faciunt Sancti Montani Presbyteri Ecclesiæ Singidunensis sub eodem Probo , qui exordium Persecutionis ab Ecclesiasticis præcipuè sumebat , Martyrio coronati . Huic Martyrol. Romanum Sanctam Maximam ejus uxorem Martyrii sociam adjungit : sic enim 26. Martii habet : *Sirmii Sanctorum Martyrum Montani & Maxime , qui ob Christi Fidem in flumen demersi sunt .* Pleraque alia Martyrologia quadraginta eis in passione socios tribuunt . Monet tamen Baronius in Notis ibi : „ Cum Montanum & Ma-
„ ximam audis , ne quid tibi subrepat ob similitudinem nomi-
„ num de Montano illo & Maximilla , qui fuerunt hæresiarchæ
„ Cataphrygarum dogmatis , qui nec Martyres occubuerunt , sed
„ ut scribit Apollinaris Hierapolitanus Episcopus apud Euse-
„ bium L. 5. cap. 15. , arrepti malo spiritu , sibi ipsi laqueo mor-
„ tem conscivere : hi autem pro Fide Christi certantes , in flu-
„ men demersi sunt .

VII. Nunc de S. Pollione seu Pullione sermo sit . Probi crudelitas cum Irenæi & Montani sanguine Sirmii fuso satiata non fuisset , vicinas peragrandas esse censuit Civitates . Cumque sub specie publicæ necessitatis ad Urbem Cybalitarum pervenisset (Urbem claram natalibus Valentiniani Imperatoris & Eusebii illius Episcopi certamine , qui in superiori Persecutione pro Christi nomine de Diabolo triumphaverat) contigit , ut eodem die

die comprehensus Pullio, primus inter Lectores & Fidei ardore notissimus, à Ministris ei offerretur dicentibus : Hic in tantam superbiam prorupit, ut Deos ac Principes blasphemare non cesset. Cybalis olim Urbis Episcopalis modò vix ullum extat vestigium ; inter Sirmium & Mursam sita erat .

VIII. Adstantem ergo Pollionem Probus interrogavit, quis esset, cujus Religionis, & quo munere fungeretur. Cui respondit : Christianus sum & Primicerius Lectorum. At quorum Lectorum ? inquit Probus. Eorum Pollio respondit, qui eloquentiam Divinam Populis legere consueverunt. Ita (ait Probus) illi nimirum, qui leves mulierculas, dum vetant ne nubant, pervertere, & ad vanam castitatem suadere dicuntur ? Respondit Pollio : „ Leves & vani illi sunt, qui relicto Creatore suo ve-
 „ stris superstitionibus acquiescunt ; caterum devoti & constan-
 „ tes illi sunt, qui Regi æterno servant fidem, qui mandata quæ
 „ legerint, etiam tormentis prohibentibus implere contendunt, „
 At Probus : Cujus Regis & quæ sunt hæc mandata ? Tunc Pollio ait : „ Christi Regis sunt pia & sancta mandata, quæ nimirum
 „ unum Deum in Cœlis indicant tonantem, quæ non posse
 „ Deum dici ex ligno & lapide formatum testantur, quæ corri-
 „ gunt noxas & emendant, quæ innocentes in perseverantia
 „ corroborant ; quæ Virgines custodire docent virginitatem,
 „ nuptas continentiam in procreatione filiorum : quæ dominis
 „ in servos plus pietate quàm tumore dominari persuadent,
 „ ac Regibus justa imperantibus obedire, reddere honorem
 „ parentibus, amicis vicem, inimicis veniam, affectum civi-
 „ bus, hospitibus humanitatem, pauperibus misericordiam, ca-
 „ ritatem cunctis, malum nemini facere, accipere patienter
 „ injurias, facere omninò nullas ; suis bonis cedere, aliena ne
 „ oculorum quidè delectatione concupiscere ; in perpetuum
 „ esse victurum, qui pro Fide momentaneam mortem, quam
 „ vos potestis inferre, contemserit. Hæc si displicent, optimè
 „ cognita tuo judicio, poteris derogare, „ . Ita invictus Martyr Pollio.

IX. Hæc cum audisset Probus ait : Et quid proderit, si homo intersectus hâc luce careat, & bona corporis sui universa deperdat ? Proderit sanè, respondit Pollio : quia hâc brevi melior est lux illa perpetua, & dulciora sunt quæ permanent, quàm quæ pereunt bona ; nec est prudentiæ caducis postponere sempiterna : at Probus nolens intelligere ait, quid ista ? fac quod iusserunt Imperatores : respondit Pollio, quid est hoc ? Probus dixit : ut sacrifices . Cui Pollio : Fac, inquit, quod tibi præce-

ptum est: ego hoc facturus non sum, quia scriptum est: Sacrificans Dæmoniis & non Deo eradicabitur. Probus dixit: Gladio ferieris, si non sacrificaveris: cui Pollio: fac, inquit, quod tibi præceptum est. Me autem Episcoporum, Presbyterorum & omnium Patrum, quorum doctrinis imbutus sum, sequi totâ veritate vestigia oportet. Unde & omnia, quæ inferre volueris, totâ exultatione suscipio. Quibus auditis datâ sententiâ, iussit Probus flammis cum exuri. Moxque raptus à ministris Diaboli & ductus milliario longè à Civitate, agonem suum gloriose complevit anno 304. 27. Aprilis, quamvis in Martyrol. die 28. notetur.

§. XXVI.

SS. Soteris Virgo, Pancratius, Marcellinus Papa & Agnes Martyres.

I. **D**E Sancta Sotere Virgine & Martyre illustre dat testimonium S. Ambrosius L. de Exhort. Virg. cap. 12., & L. 3. de Virginibus cap. 6., ex quibus locis colligitur, eam fuisse genere nobilem, & ex eadem familia, quâ S. Ambrosius; ideoque eam proponit Marcellinæ sorori tanquam exemplum domesticum, & à quo trahebat ipsa originem. Nobilitati generis Consulatus & Præfecturis clari, castitatis amorem & Fidei servandæ zelum Sancta Soteris conjunxit, ut ætate adhuc juvenis Martyrium pati pro Christo non formidaret anno 304.: quod Martyrol. Rom. his verbis die 10. Aprilis commemorat: *Romæ viâ Appiâ Sancta Soteris Virginis & Martyris, quæ, ut scribit S. Ambrosius, nobili genere nata parentum & Consulatus & Præfecturas contempsit, iussaque immolare non aquiescens, & graviter & diutissime alapis cæsa est, & cum cætera quoque pænarum genera vicisset, percussa gladio lata migravit ad Sponsum.*

II. At audiamus S. Ambrosium L. de Exhort. Virginis c. 11., ubi Sanctæ Soteris exemplo Virgines à Mundi vanitatibus & illecebris avocans ait: *At non Sancta Soteris, ut domesticum piæ parentis proferamus exemplum At non ut dixi Soteris vultus sui curam gerebat: quæ cum esset decora facie valde & nobilis Virgo Majorum profapia, Consulatus & Præfecturas parentum sacrâ posthabuit Fide, & immolare iussa non acquievit, quam Persecutor immanis palmis cædi præcepit, ut tenera Virgo dolori cederet aut pudori. At illa ubi audivit hanc vocem, vultum aperuit, soli inviolata atque intacta Martyrio: & volens injuriæ occurrit, vultum offereus, ut ibi Martyrii fieret Sacrificium, ubi solet esse tentamentum pudo-*

pudoris. Gaudet enim dispendio pulchritudinis periculum integritatis auferri. Sed illi potuerunt quidem vultum ejus vulnerum vibricibus exarare, faciem tamen virtutis ejus & gratiam decoris internè nequaquam exarare potuerunt. Et L. 3. de Virg. cap. 6. Marcellinæ sorori Soterem proponit in exemplum domesticum dicens: Sed quid alienigenis apud te, soror, utor exemplis, quam hereditaria castitatis insperata successio, parentis infusione Martyris eruditivæ? Inde Soteris constantiam celebrans: Non vultum, inquit, inflexit, non ora convertit; non gemitum, non lacrymam dedit. Denique cum cætera pœnarum genera vicisset, gladium, quem quærebat, invenit. Hæc aliaque de S. Sotere Ambrosius.

III. Ex dictis colligitur, Sanctam hanc Virginem non in Oriente fuisse passam, ut apud Martyrologia Usuardi Adonis Bedæ invenitur, sed in Italia, & quidem Romæ. Et hoc ex Sancto Ambrosio certum videtur; nam post allata Pelagiæ, aliarumque Antiochenarum Virginum, quæ in Oriente passæ fuerant, exempla, ad Soterem transiens ait, se relinquere *alienigenas, & domesticum* proferre exemplum: cumque eam proponat tanquam de suo genere & familia, quæ Romana erat, sit, ut Soteris Romana fuerit & Romæ passa.

IV. Romæ pariter eodem tempore Martyrio coronatur Sanctus Pancratius, & ipse adolescentulus, cum ætatem 14. annorum non excederet. Fuit hic genere nobilis, qui cum in teneris annis orphanus relictus esset sub Dionysii patrui sui tutela, ab isto è Synnada Phrygiæ Urbe Romam ducitur. Ubi cum propè domum, in qua Summus Pontifex (fortè tunc Marcellinus) latitabat, hospitium statuissent, illius permoti virtutibus & miraculis, quamvis Persecutio tunc violenter defæviret, Fidem Christi ambo amplexi sunt, & ab ipso Pontifice baptizati. Quindecim elapsis diebus, Dionysius vitæ functus est: cujus memoria in Martyrologiis, etiam Romano, unà cum S. Pancratio nepote 12. Maii colitur.

V. Pancratius non diù post comprehensus, quamvis quartum decimum ætatis annum nondum egressus esset, summâ tamen alacritate Christum confitetur. Quare Persecutores, ne pudore suffunderentur, se à puero vinci, omiſſis aliis tormentis, cum illicò capite plectunt. Quod 12. Maii anni 304. impletum fuit, ideòque in Martyrol. eadem die legitur: *Romæ viâ Aureliæ Sancti Pancratii Martyris, qui cum esset annorum quatuordecim sub Diocletiano Martyrium capitis obruncatione complevit.* In hujus præclari Martyris memoriam in suæ confessionis & sepulcri loco à Symmacho Papa erecta fuit Ecclesia propè muros Romæ, quæ

quæ S. Pancratii nomen adhuc præfert, sicut & Porta quæ ad eam ducit antea Aurelia dicta, modò S. Pancratii nuncupatur. Ad ejus sepulcrum, Gregorio Turon. teste L. de Glor. Mart. cap. 39., mirabile hoc Deus operabatur, ut qui falso juramento adstricti ad illud accederent, statim à Dæmone correpti in terram mortui caderent. S. Gregorius Magnus die festo ipsius magno Populi interventu habuit homiliam 27. in Evangelia. Sed cum præfata Ecclesiâ à quibusdam Clericis administraretur & diebus Dominicis à Missæ celebratione deficerent, idem S. Pontifex Mauro Abbati Monachis ac successoribus eam tradidit, injungens eis: *Ut ibidem ad sacratissimum Corpus Beati Pancratii quotidie opus Dei proculdubio peragatur.* (L. 4. Epist. Epist. 18.) quæ tamen hodie ad PP. Carmelitas Excalceatos transit, qui summâ religioſitate in ea sacris ministrant. Inter Titulos Cardinalitios computatur. Quo honore ac Titulo licet immeritus ipse in præſens fruor.

VI. Marcellinus Papa, qui SS. Dionysium & Pancratium (ut supra) baptizaverat, eodem anno Martyrio coronatus fertur. Licet autem de hoc multi dubitent, Martyrol. tamen Romanum 26. Aprilis eum cum sociis Martyrem recitat dicens: *Roma Sancti Marcellini Papæ & Martyris, qui sub Diocletiano pro Fide Christi una cum Claudio Cyrino & Antonino capite truncatus est: quo tempore magna fuit Persecutio, ita ut intra unum mensem decem & septem millia Christianorum Martyrio coronarentur.* Idem inter alios sentit Anastasius Biblioth. L. de Vit. Pont., qui tamen corrigendus est in eo quod dicit, S. Marcellinum thus adolevisse Idolis, sed postea pœnitentiâ ductum, ab eodem Diocletiano capite damnatum fuisse. Quod enim S. Marcellinus Papa thus Diis adoleverit, falsam fuisse calumniam à Donatistis Ecclesiæ Romanæ insensis fabricatam, demonstrat S. Augustinus L. de unico Bapt. contra Petilianum cap. 16. ; eamque refutat dicens: *Marcellinus, & Presbyteri ejus Melchides Marcellus & Silvester, traditionis Codicum Divinorum & thurificationis ab eo (Petiliano) crimine arguuntur: sed nunquid ideo etiam convincuntur, aut convicti aliquâ documentorum firmitate monstrantur? Ipse sceleratos & sacrilegos fuisse dicit; ego innocentes fuisse respondeo. Quid laborem probare defensionem meam, cum ille nec tenuiter probare conatus sit accusationem suam?* Eam propterea ut culumioſum hæreticorum inventum Catholici omnes eruditi cum S. Augustino contemnunt.

VII. S. Agnetis quoque Martyrio celebris anno 304. Roma imò univèrsa Ecclesiâ fuit, cujus in castitate & Fide constantiam

tiam Patres commendarunt. Virgo ista genere nobili, piis parentibus nata & in Fide Christi educata, cujus sicut & castitatis servandæ ardore flagrabat, vix tertium decimum ætatis annum attigerat, cùm ad certamen pro utraque vocatur: quod Hymno 14. descripsit Prudentius, & S. Ambrosius L. 1. de Virgin. cap. 2. celebravit; quibus addi potest S. Augustinus Serm. 274. Causam Martyrii fuisse ferunt aliqui filium Symphronii Romæ Præfæcti, qui eam sibi sponsam exoptans, ab illa, quæ virginitatem suam Christo dicaverat, repulsam passus fuerat. Quæcumque tamen fuerit causa, certum est, Sanctam Virginem comprehensam, & ad Idolis immolandum violenter raptam, signo Crucis se muniendo viriliter repugnasse. Quare Judex putans, ei magis sensibilem fore virginitatis jacturam, quàm quodcumque supplicium, minatus ei fuit, si Minervam non adorasset, & ab ea veniam non petiisset, se ejus pudicitiam publicè violandam expositurum. Quod illa Jesu Christo castitatis tutori confidens infractò contempsit animo.

VIII. Igitur nudata prorsus vestibus fuit exposita, sed illicò propriis capillis fuit miraculosè crescentibus obtectæ, ut nemo ad illam accedere, imò vel in eam oculos convertere auderet. Unus solus impudens juvenis minùs castè eam inspicere ausus, illicò Divinam ultionem expertus fuit; nam ignis ad modum fulminis (seu Angelus) è Cœlo oculos ejus feriens, infelicem obcæcatum ac semimortuum in terram prostravit, adeò ut socii ejus flentes inde asportarent, Sanctâ interim Virgine Deum orante, ut misero illi lucem ac sanitatem restitueret. Illustrè hoc factum ita canit Prudentius.

*En ales ignis fulminis in modum
Vibratur ardens, atque oculos ferit:
Cæcus corusco lumine corrui,
Atque in plateæ pulvere palpitat.
Tollunt sodales seminecem solo
Verbisque defleunt exsequialibus.
Ibat triumphans Virgo, Deum Patrem
Christumque sacro carmine concinens,
Quod sub profani labe periculi
Custum lupanar nec violabile
Expertæ vittæ virginitas foret,
Sunt, qui rogatam retulerint preces.
Fuisse Christo, redderet ut reo
Lucem jacenti: tum juveni habitum
Vita innovatum visibus integris.*

IX. Huic primæ coronæ aliam Sanctam Agnes adjuuxit; Persecutor enim victum se cernens, eam capite damnavit. Tunc videns Carnificem Sancta Virgo exultavit, atque ad supplicium velut ad nuptias, plorantibus omnibus, imò & carnifice trepidante, sola triumphans ibat. Quò cum pervenisset, collum in preces inclinatum gladio exhibuit, quo tremente Carnificis manu truncatum fuit. S. Ambrosius hoc enarrans loco supra laudato: *Stetit, inquit, oravit, cervicem inflexit. Cerneret trepidare carnificem, quasi ipse addictus fuisset: tremere percussoris dexteram, pallere ora alieno timentis periculo, cùm puella non timeret suo. Habes igitur in una hostia duplex Martyrium, pudoris & religionis. Et Virgo permansit, & Martyrium obtinuit.*

Ejus Corpus sepultum fuit viâ Nomentanâ prope Romam in agro, quem ejus parentes possidebant, quò cum Christiani convenissent, à Paganis lapidibus ejecti, & multi vulnerati fuerunt. Ibi Sancta Emerentiana ejus collactanea adhuc Catechumena ad sepulcrum ejus orans lapidibus obruta remansit, & sequenti nocte in eodem loco sepulta. Ejus memoria die 23. Januarii in Martyrol. Rom. colitur. Hoc tamen non obstitit, quin S. Agnetis parentes ad ejus sepulcrum vigilias prosequerentur. Unde octavo die eis apparuit habens agnum lateri suo assidentem, & ut alii dicunt, Choro Sanctarum Virginum comitata, eosque de gloria, quâ in Cœlis fruebatur, certiores fecit. Hujus apparitionis memoria die 28. Januarii agitur. Fertur, quòd Constantia seu Constantina Magni Constantinii filia adhuc pagana ad ejus sepulcrum miraculosè sanata, ad Christum conversa ei suam virginitatem devovit. Hæc tamen narratio suspecta redditur (inquit Baronius ad ann. 324. §. 107. & 108.) ob difficultates, quas ibi elevat, & quas nostrum non est hic expedit. Duæ in honorem S. Agnetis Romæ honorantur Ecclesiæ. Una viâ Nomentanâ extra Portam, Piam nuncupatam, in qua ejus Corpus, vel saltem maxima pars adhuc custoditur, quæ à Constantina filia (vel à Constantino Patre ad ejus preces) erecta fuisse, & in ea Constantina ipsa unâ cum Constantia amita Licinii vidua sepulta traditur, seu ut alii volunt à Liberio vel Honorio I. Pontificibus extructa seu reparata. Altera in medio Romæ sita loco, qui olim dicebatur Circus Agonalis (modò *Piazza Navona*) in quo profana Gentilitatis lupanaria erant, & ad quem tracta S. Agnes ut violaretur, intacta ut dixi indè exivit.

§. XXVII.

SS. Marciana , Nabor , Felix , Victor , & Euplius Diaconus Martyres .

I. S ANCTÆ Marcianæ Virginis & Martyris in Martyrologiis Latinorum celebre nomen est . De ea enim agunt die 9. Januarii, qui Martyrii dies creditur ; & rursus 12. Julii, qui putatur dies Translationis Corporis ejus Toletum: unde in Brevariario sacer Hymnus legitur , in quo ejus Martyrium describitur . Inde factum est, ut ex Hispanis aliqui eam ex suâ Gente fuisse autumarint: cum tamen reverâ ex Mauritania fuerit , & patriam Rufuccurum (hodie Alger) Cæsareæ Mauritaniæ Coloniam habuerit . Ita enim in Martyrol. 9. Januarii notatur : *In Mauritania Cæsariensi Sancta Marciana Virginis , quæ bestiis tradita Martyrium consummavit* . Ejus Martyrii tempus , etsi certò statui non possit , probabiliter tamen Vincentius Belluacensis & alii sub Diocletiano eam passam fuisse arbitrantur .

II. Marciana ex Familia illustri orta, divitiis & oris venustate donata fuit . Hæc tamen omnia contemnens Cæsareæ domicilium elegit, ubi in parva cellula castitatem quam Deo voverat custodiens, vitam à deliciis & seculi pompis alienam ducebat . Contigit autem, ut quâdam die Urbem pertransiens incidere in turbam Populi, qui in platea propè Portam Tipasæ Urbis propinquæ coram Dianæ statua supra fontem erecta ludos agebat ; quo viso Sancta Virgo Divino correpta Spiritu statum illam evertit & contrivit . Unde Populus in eam insiliens ictibus gravissimè percussam ad Judicis tribunal rapuit . Quò perducta, ad primam interrogationem Jesum Christum publicè confessa, Populum adhortari cœpit, ut Idola manuum suarum dereliqueret, & veri Dei cultum amplecteretur .

III. Judex fustibus à tortoribus cædi jussam , Academiae Gladiatorum eam tradidit constuprandam ; noverant enim Pagani, apud Christianas Virgines ereptionem Virginitatis tormentorum esse maximum : hinc Tertullianus Apolog. adversus Gentes cap. 50. : *Proximè, inquit, ad lenonem damando Christianam potius quàm ad leonem, confessi estis, labem pudicitia apud nos atrociorē omni pœnâ & omni morte reputari* . Hoc tamen nihil territa fuit Sancta Virgo ; sciebat enim, Christum Virginum Sponsum fore suæ castitatis fidum custodem ; atque ita fuit . Quidam enim Gladiatorum, cui tunc ipsa in custodiam seu verius in

prædam tradita fuerat, Flammeus nomine, cùm ad locum, in quo Virgo Deo preces fundens manebat, noctu accederet, murum quo progredi detinebatur invenit: quo perculsus, factâ jam die ad pedes ejus procidit, plorans ac veniam petens eamque rogans, ut precibus à Deo obtineret suam à Gladiatorum cœtu liberationem; cui illa promisit, ipsâ sui Martyrii die ab illo scædo munere fore à Deo liberandum: quod ita evenit. Evulgatâ hujus prodigii famâ, Judex alteri & sequenti die tertio Gladiatori S. Marcianam tradi præcepit; sed cùm utrique idem murus, quem Deus ad famulæ suæ tuendam castitatem crexerat, obstitisset, non ausus fuit eam ulterius exponere. Hæc aliaque etiam mirabilia operatur Deus ad suarum Sponsarum castitatem tuendam. Sancta igitur Marciana videns pudorem suum in tuto positum, unicè ad Martyrium se præparabat.

IV. Propinqua loco, in quo S. Virgo morabatur, domus erat cujusdam Judæi nomine Buderii Synagogæ Principis. Cùmque quidam illius domus irrisiones & contumelias in eam effunderent, Sancta Martyr, extraordinario Spiritus Dei impulsu afflata, domui illi maledixit Deumque rogavit, ut igne è Cœlo demisso eam consumeret, nec unquam iterùm ædificari permetteret; imò è contra lapides ipsi aliò translati in ruinam aliarum domorum, si ex illis eas extruere vellent, verterentur. Quæ Oratio exaudita fuit. Ita ut eodem momento, quo Beata Virgo emisit Spiritum, igne de Cœlo lapsa domus illa & aliæ vicinæ consumptæ fuerint: & quamvis Judæi eam iterùm excitare conati fuerint, statim rueret ædificium, & qui præfatos lapides vellent assumere, sepulcra potius sibi, quam domos erigerent.

V. Dies ejus Martyrii seu veriùs triumphi jam advenerat. Gladiatores in Amphitheatrum ad pugnam descenderant: & Flammeus voce clamantis Populi, ut Marciana promiserat, liberatus est. At ipsa eodem Populo postulante palo alligata ferocissimo leoni exponitur, qui furenti impetu in eam irruens vix ei pectus unguibus tetigit, cùm illicò destitit ac illasam reliquit. Quo prodigio stupefactus Populus volebat, ut libera dimitteretur. Sed Buderius, qui ibi cum filiis suis aliisque Judæis spectator aderat, tumultu facto clamare cœpit, ut in eam taurus immitteretur; quod annuente Judice obtinuit. Quare taurus cornu in altero ex uberibus insigens, eam semimortuam & sanguine conspersam prostravit, inde in hospitium deducta ac sanguine coercito, ad novam & extremam coronam recipiendam perducitur. Ubi illa voce elatâ exclamavit, Domine te video

te sequor: ancillæ tuæ spiritum suscipe. Tu qui mecum in carcere fuisti & dignatus es castitatem meam custodire. Quibus indignatus Iudex immisit in eam leopardum, qui dentibus ei petus lanians, felicem animam à corpore separavit. Quis ex tanta in Virgine constantia & tot patris pro ea prodigiis Divinam potentiam & Christianæ Religionis veritatem non fateatur?

VI. SS. Nabor Felix & Victor celebri Martyrio Mediolanum decorarunt. Eos proinde laudat Ambrosius infra referendus. Natione Mauritani erant, professione Milites seu Militiæ Officiales tres omnes erant. Christi Fidem profitebantur; sed eorum Fides erat granum sinapis, quod nondum tritum suum non spargebat odorem. Venit Persecutio, & ipsi depositis armis caput gladio deponentes Martyrio suo odorem Fidei suæ toto Orbe diffuderunt. Ita S. Ambrosius L. 7. in Luc. cap. 13.: *Felix Nabor & Victor . . . habebant odorem Fidei, sed latebant. Venit Persecutio, arma posuerunt, colla flexerunt: contriti gladio, per totos terminos Mundi gratiam sui sparsere Martyrii, ut jure dicatur: In omnem terram exiit sonus eorum.*

VII. S. Victorem cum SS. Nabore & Felici passum fuisse circa mensem Aprilis anni 304. probabiliter censetur. Martyrologium tamen Romanum diversis diebus eorum Martyria affigit: nempe S. Victoris diei 9. Maii, & SS. Naboris & Felicis 12. Julii. Eorum Acta fratres fuisse supponunt. Cum ergo Maximianus Herculus Mediolani tunc moram traheret, ac eos Christianos esse rescivisset, comprehendi jussit, eorumque constantiâ minis ac terroribus frustra tentatâ, duodecim diebus nec panem nec aquam eis ministrando carcere clausos detinuit. Quo elapso tempore iterum Maximiano præsentatos ad Anulinum Consiliarium eos remisit; à quo post quinque alios carceris dies fustibus cæsi & ungulis ferreis laniati, igni deinde applicati poenâ incendii damnati fuere: ex quo, ut Acta ferunt, exierunt illæsi & ad carcerem reducti. Maximianus autem Laudam proficiscens, eos secum adduci jussit, ubi iterum fustigati tandem capite damnati fuere.

VIII. Eorum Corpora Femina religiosissima Savina collegit, ac Mediolanum, ubi hætenus jacent, deportavit. Hujus Sanctæ Mulieris Festum Mediolani celebratur, & die 30. Januarii in Martyrol. Rom. notatur. De hac tamen nil aliud scimus, nisi quod orans ad sepulcrum SS. Naboris & Felicis obdormivit in Domino, & quod S. Carolus cum anno 1571. ejus sepulcrum aperuisset, reperit & corpus & vestimenta absque ulla corruptione integra.

IX. De S. Victore specialiter Acta ferunt, quòd ad Maximianum delatus & Fidem Christi coram ipso generosè confessus, sex diebus carcere clausus absque cibo & potu detentus mansit, deinde denuò interrogatus ac fustibus cæsus, cùm Maximiani & Anulini minas contemneret, iterùm cæsus & ferreis compedibus vinculus fuit. Postridie eum Imperator ad se vocavit omnia instrumenta supplicii ei ostendens; quæ cùm sprevisset, totum corpus ejus liquenti plumbo jussit perfundi: cùmque S. Victor nec ea sentire indicaret, eum ad portam Vercellinam trahi jussit; ubi dum dormirent Milites in stabulum se abscondit: sed à custodibus inventus, tandem à Maximiano jussus decollari, Martyrium gloriosè consummavit. De eo Martyrol. Rom. 8. Maii hæc habet: *Mediolani natalis S. Victoris Martyris, qui natione Maurus, & à primæva ætate Christianus, cùm esset in castris Imperialibus Miles, compellente Maximiano, ut Idolis sacrificaret, in confessione Domini fortissimè perseverans, primò graviter fustibus cæsus, sed Deo protegente doloris expers, deinde liquenti plumbo perfusus, sed nihil penitus læsus, novissimè gloriosi Martyrii cursum capitis abscissione complevit.*

X. S. Euplius natione Siculus, patriâ Catanensis, ministerio Diaconus erat, vitam adeò pauperem agens, ut domum se non habere coram Judice confessus sit. Dum Populo Evangelium legeret à Militibus Christianos perquirentibus captus, ad Calvisianum Siciliæ Gubernatorem pro Tribunali sedentem trahitur secum ferens Librum Evangelii; quo tempore sacros Libros vel retinere, pœnis rigorosissimis vetabatur. Cùm stetisset in atrio ante locum, ubi sedebat iudex, altâ voce exclamavit, mori se velle, quia Christianus erat; quare introductus fuit. Sed cùm Maximianus Senator Romanus, qui cùm Calvisiano aderat, vidisset eum Librum Evangelii manibus gestantem, infrenduit, quòd Ediçta Principum tantâ audaciâ violarentur. Tunc ab eo petiit, an ipse Librum illum tulisset; & Euplio affirmante, jussit ut aliqua de eo legeret. Aperto autem Libro inter alia Euplius legit illud Matth. 5. v. 10.: *Beati qui Persecutionem patiuntur propter justitiam, quoniam ipsorum est Regnum Celorum.* Et illud Matth. 16. v. 24.: *Si quis vult post me venire, abneget semetipsum, & tollat crucem suam & sequatur me.* Quæ cùm Calvisianus audisset, ait: *Quæ sunt hæc?* respondit Euplius: *Hæc est Domini mei Jesu Christi Lex.* Tunc Calvisianus, quoniam, inquit, hujus confessio clara est, interrogetur publicè in quæstione, & tradatur tortoribus; interim autem custodiatur.

XI. Die 12. Augusti S. Euplius coram Calvisiano iterùm
fissi-

sistitur : à quo interrogatus , an in præfata confessione persiste-
ret , factò supra frontem sacræ Crucis signo , ac tenens sacri
Evangelii Librum respondit : Quod jam dixi , confirmo : Chri-
stianus sum & sacras Scripturas lego . Cùmque Judex diceret :
cur Scripturas istas detines contra Imperatorum Edicta , & non
potius tradis ? repetiit Euplius : Christianus sum , ideòque eas
tradere mihi non licet ; mori potius volo , ac vitam istam amit-
tere , quàm æternam . Quare quæstioni subiectus tandiù cadi
jussus est , quamdiù se Diis sacrificaturum non promitteret . Sed
ille inter tormenta Deo gratias agens eum rogabat , ut in Fide ,
pro qua patiebatur , conservaret . Cùmque diù tormentum pro-
traheretur , Calvisianus præcepit tortoribus , ut desisterent , & ad
Euplium conversus dixit : Infelix , Deos adora , Martem , Apol-
linem , & Eufculapium . Cui Euplius : Ego , inquit , adoro Pa-
trem Filium & Sanctum Spiritum . Ego adoro Sanctam Trini-
tatem , extra quam nullus est Deus . Pereant Dii , qui non fece-
runt Cælum & terram , & quæ in eis sunt : Christianus sum . Et
cùm Præfes rursùs instaret : Sacrifica , si vis liberari ; respondit :
Sacrifico modò Christo Deo me ipsum , quid ultra faciam non
habeo ; Christianus sum . Tunc Calvisianus præcepit iterum
acriùs torqueri : at ille dum torqueretur dicebat : Gratias tibi
Christe , succurre Christe , propter te hæc patior Christe : & de-
ficientibus viribus labiis tantum hæc aliæque proferebat .

XII. Quamobrem Calvisianus velum interiùs ingrediens di-
scavit sententiam , quam foràs egressus ex tabella legit : nimirum
Euplium Christianum Edicta Principum contemnente , Deos
blasphemantem nec resipiscentem , gladio animadverti jubeo :
ducite eum . Tunc appensum est ad collum ejus Evangelium
cum quo apprehensus fuerat ; & proclamante præcone : Euplius
Christianus inimicus Deorum & Imperatorum : Euplius dicebat
semper : Gratias Christo meo . Et cùm ad locum perductus esset ,
prolixius oravit , & iterum gratias agens præbuit jugulum , & à
carnifice decollatus est . Sublatum est postea à Christianis Corpus
ejus , & aromatibus conditum sepultum est . Ad ejus sepulcrum
plura patrata feruntur miracula . Hujus Martyris memoria cele-
bratur à Latinis 12. Augusti , à Græcis verò 11. ejusdem mensis , ubi
in Menol. Basilii , post equuleum , manicas , unguiculas ferreas ,
& malleo ossa concussa , addunt : *Postea ex equuleo depositus in
carcerem detruditur : ubi sitiens , nec aquam ad bibendum habens ,
fussis ad Deum precibus fontem aquæ ex terra eduxit ; bibensque
gratias Deo egit . Tum è carcere extractus , auribus subulis perfora-
tis , postremum gladio cæsus est .* Ubi aliquas adjungunt tormento-
rum

rum species, & prodigium aquæ salientis, quorum in Actis supra relatis nulla mentio fit.

§. XXVIII.

SS. Afra & sociæ, Julianus, & Ferreolus Martyres.

I. **A**ugusta Rhetici Urbis S. Afra patria fuit. In ea insigne Divinæ misericordiæ donum eluxit, quam velut alteram Magdalenam è peccatrice fecit Sanctam, imò & Martyrem. In lupanari prostituta sui corporis diu copiam fecerat, ideòque infamiæ notam apud totam Civitatem contraxerat. A Beato Narcisso (de quo supra §. 21. num. 12., & cap. 12. §. 4. num. 5. & 6.) conversa ad Fidem Christi & baptizata unà cum Digna Eunomia & Eutropia ejus ancillis quæ cum ea in peccato fuerant, & Hilaria ejus matre, tanto dolore præterita crimina detestabatur, ut quamvis sciret, ea sibi in Baptismo fuisse misericordiæ Dei remissa, attamen tanquam præsentia recogitabat in concupiscentia & pravis habitibus, quos amaro fletu extinguere assidue conabatur. Propterea abjectis divitiis, quas suis criminibus cumulaverat, ad extremam paupertatem redacta fuit, humiliter patientiâ tolerans ignominias, quibus à plerisque despiciebatur.

II. Cum ergo Persecutio advenisset, Afra cum matre & ancillis comprehensa ad Judicem nomine Gajum ducta fuit. Qui cum quæ esset, præscivisset, dixit ei: Sacrifica Diis, quia expedit tibi magis vivere, quam inter tormenta deficere. Afra respondit: Sufficiunt mihi peccata mea, quæ ignorans Deum gessi; hoc autem quod me jubes facere, nunquam factura sum. Tunc Gajus: Accedens, inquit, ad Capitolium sacrifica. Afra tamen respondit: „Capitolium meum Christus est, quem habeo ante oculos meos; ipsi quotidie crimina mea & peccata mea confiteor: & quia indigna sum ipsi sacrificium offerre, me ipsam pro nomine ejus cupio sacrificare, ut corpus in quo peccavi, dum poenas pertulerit, abluatur. Quæ audiens Gajus dixit: Ut audio, meretrix es: sacrifica, quia aliena es à Deo Christianorum. At illa respondit: „Dominus meus, Jesus Christus dixit, se pro peccatoribus descendisse de Cælo. Nam & Evangelia ejus testantur, quòd Meretrix rigaverit lacrymis pedes ejus, & indulgentiam acceperit; & Meretrices, & Publicanos nunquam despexit, quos etiam secum man-
ducare permisit.

III. Hâc viâ nihil se proficere videns Judex, aliam excogitavit . Eam ergo adhortari cœpit , ut sacrificando pristinam resumeret vitam , ut sic diligeretur ab amatoribus suis , & sibi pecuniæ multæ inferrentur ab eis . Exhorruit ad hæc verba Afra & protestata est , se nunquam execrabiles , quas jam projectas , quia malâ conscientia acquisitas , pecunias admitturam . Quare Judex ad priora reversus , jam te , inquit , Christus dignam non habet : sine causa vis eum Deum tuum dicere , qui te suam esse non cognoscit . Meretrix enim quæ est , dici Christiana non potest . (Hoc judicium de puritate Religionis Christianæ vel Gentiles ipsi ferebant) : respondit Afra : ,, Christiana ego quidem ,, dici non mereor , nec vocari ; sed misericordiâ Dei , qui non ,, de merito sed de sua pietate judicat , ipse me ad hoc nomen ,, admisit ,, . Perente autem Judice : unde hoc sciret ? ait : ,, In ,, hoc me cognosco , à facie Dei non esse projectam , quia ad ,, gloriosam confessionem sui Sancti Nominis permittor accedere ,, re , per quam me credo omnium scelerum meorum indulgentiam accepturam ,, : At Judex has esse fabulas dicens , eam Diis sacrificare jussit , per quos salutem consequeretur . Cui cùm respondisset , salutem suam Christum esse , qui in Cruce pendens latroni consenti bona Paradisi pollicitus est . Tunc Gajus sacrificæ , inquit , alioquin te cædi faciam in conspectu amatorum tuorum . At illa ait : Confusio mihi nulla est , nisi de peccatis meis .

IV. Propterea videns Gajus , se cum ea operam perdere , dixit ei : Sacrificæ , alioquin occideris ; & Afra respondente : ,, Hoc est quod opto , si tamen merear , ut per hanc confessionem digna efficiar requiem invenire . Corpus in quo peccavi ,, torqueatur ; nam animam meam Sacrificiis Dæmonum non ,, coinquinabo ,, . Impius Judex dictavit sententiam , ut viva incenderetur . Statim igitur à Ministris raptæ , & in Insulam Lyci fluminis ductæ , vestibus expoliata ad stipitem ligata fuit : Illa autem Deum precabatur , ut suarum immemor iniquitatum per hunc ignem temporalem ab igne æterno corpus & animam liberare dignaretur . Quibus dictis sarmentis circumdata , ac igne supposito , vox ejus audiebatur dicentis : ,, Domine Jesu Christe , ,, ste , qui me dignatus es hostiam habere pro nomine tuo , qui ,, pro toto Mundo solus hostia oblatas es in Cruce , justus pro ,, injustis , benedictus pro maledictis , mundus è peccato pro ,, peccatoribus universis , Tibi offero Sacrificium meum , qui ,, cum Patre & Spiritu Sancto vivis & regnas Deus in secula seculorum . Amen ,, . Et hæc dicens emisit spiritum . Ejus mem-

moria in Martyrologio Romano die 5. Augusti celebratur :

V. Porrò dum Beata Afra Martyrium consummasset, stabant juxta ripam fluminis Digna Eunomia & Eutropia, quæ fuerunt ejus ancillæ, simulque fuerunt in peccato, & simul à Sancto Narcisso Episcopo baptizatae. Hæ precibus obtinuerunt, ut in Insulam transferrentur, ibique S. Afra Corpus prorsus integrum invenerunt. Puer autem, qui cum ipsis erat, transnavit & nuntiavit matri ejus Hilariæ : quæ noctu veniens cum Sacerdotibus Dei, tulit Corpus ejus & posuit secundo miliario à Civitate Augusta in monumento, quod sibi suisque construxerat. Quod cum Gajo Judici nuntiatum esset, misit ad monumentum, ubi Beata Mulieres manebant dicens : Ite & tenete eas : & si consenserint vobis ad sacrificandum, cum honore eas adducite ad me ; si verò eas contumaces reperieritis, eas in monumento ipso comburite. Euntes autem Milites, prius blando sermone eas provocabant, deinde terroribus impellebant. At ubi viderunt, omnes simul contemnere Sacrificia, repleverunt sarmentis & spinis aridis sepulcrum illudque clauferunt, ac supposito igne abjecerunt. Sicque factum est, ut eadem die, quâ sepulta est Afra, simul etiam mater ejus Hilaria & famulæ ejus Digna Eutropia & Eunomia simul Martyrii coronam acciperent. Hæc ex sinceris Actis apud Ruinart desumpta sunt.

VI. De his Martyrol. Rom. agit 12. Augusti, ubi alios quoque Martyres adjungens, hæc habet : *Augusta Vindelicorum S. Hilariæ Matris Beata Afra Martyris, quæ cum ad sepulcrum illius excubaret, ibidem pro Fide Christi à Persecutoribus igni tradita est cum Digna & Eutropia & Eunomia ancillis suis. Passi sunt etiam eodem die in præfata Urbe Quiriacus, Largio, Crescennus, Nimmia, & Juliana cum aliis viginti.* Hæc anno 304. contigisse creduntur. Quomodo autem hæc omnes in eodem sepulcro concrematae fuerint facile concipietur, si advertatur, apud Antiquos sepulcra fuisse structuræ elevatæ, & sepe etiam spatiosa, ut plures in eis hospitari possent. Unde in ea loca (etiam Catacumbas dicta) ardente Persecutione ad preces fundendas convenire solebant Christiani.

VII. SS. Julianum & Ferreolum simul proponam, quia eorum gesta conjuncta sunt. S. Julianus origine Viennensis in Delphinatu ex illustri familia natus erat; Militiam ad provectam usque ætatem, in qua Martyrium subiit, secutus fuit; Fidem Christi fuerat amplexatus, quam palam profitebatur. Fidei respondebant opera, & præcipue Caritas, quâ ejus anima flagrabat.

bat . Apud Sanctum Ferreolum morabatur ; qui Tribunus erat , Christianus & ipse estò minùs apertè talem se proderet , ac sum-
mopere S. Julianum diligebat ejus pietatis causâ : sicque inter
eos vera conjunctio erat , quia pietatis & caritatis vinculo tene-
batur .

VIII. Interim excitatâ sub Crispino Consulari in Civitate
Viennensi Persecutione , ut creditur anno 304. , in hac tempesta-
te prævidens Ferreolus , quòd Julianus Martyrii amore fla-
grans nullatenùs occultari se pateretur , cœpit omni instantiâ
agere , ut antequam Persecutorum rabies ulteriùs procederet ,
Vir Dei occultè discederet , & in solamen superstitum Christia-
norum se reservaret . Itaque ab amico suafus & exoratus , quam-
vis anxie Martyrium sitiret , ejus monitis S. Julianus parere
non distulit . Cui accedebat metus , ne si Viennæ maneret , pa-
rentes & amici officiis suis Martyrii coronam ei præripuissent .
His ergo apud se collatis propria quæque relinquens juxta Beati
Ferreoli consilium clam discessit , & in Arvernæ Urbis territo-
rio divertens , non alibi nisi in Brojateni vico , in quo phantici
erroris naniæ colebantur , latitare disposuit . Unde manifestum
fit , eum non metu mortis ab Urbe Viennensi secessisse , sed ob
hoc potiùs ut Christi præceptum de fugiendo ab una Civitate in
aliam impleret , & suis omnibus qui ob stare potuissent relictis ,
optati stadium certaminis liberiùs currere posset .

IX. Deus non distulit diù , Crispinus enim , comperto quòd
Vir Sanctus clandestino discessu fugiens in Arvernæ Urbis terri-
torio latitaret , Milites misit exitiali imposito præcepto , ut ubi-
cumque invenirent , caput ei truncarent . Festini iverunt , cum-
que ad locum qui Vinicella vocatur pervenissent , unus ex eis
oculos in Sanctum Julianum conjiciens eum contemplabatur ,
at iste quorundam Senum tugurium quasi latebras quærens in-
greditur : sed quia Vir Sanctus sensit se à Deo vocari , etsi Senes
eum abscondere conarentur ne quid periculi à Persecutoribus
eis immineret , foràs exiliens : Quem poscitis , inquit , quem
quæritis , ecce adsum : in me convertite ferrum . Cumque illi
ad tantam constantiam hæsitarent , ille constantior adjecit : No-
lo ampliùs in hoc seculo commorari , quia Christum totâ animi
aviditate sitio ; ecce occurro obvius , caput subdò intrepidus :
cùmque orasset Deum , ex lictoribus unus educitâ frameâ caput
illi amputavit .

X. Caput Beati Martyris abscissum , ac in vicino fonte ab-
lutum ab ipsis Militibus Viennam delatum , in manus S. Fer-
reoli tandem pervenit . Corpus verò à loco , in quo percussus ,

Brivatum asportatum fuit, & à duobus memoratis Senibus honorificè sepultum: quo in pietatis opere vigore juventutis in corpore à Deo donati fuere: ex quo colligitur, eos jam fuisse Christianos. De aquis verò illius fontis, in quo S. Juliani caput ablutum fuit, multæ sanitates tributæ sunt infirmis; ab his enim cæci illuminati sunt, febres fugatæ, incendia paucis earum guttis extincta: tandem Sanctus iste omnes ad se confugientes præsentè Domino Jesu Christo lætos dimittit. Omnia hæc ex S. Gregorio Turonensi excerpta sunt.

XI. S. Ferreolus, ut dixi, Viennæ morabatur gradum Tribuni Militum exercens; sub militari tamen habitu, quem gestabat exteriùs, Christianæ pietatis spiritum custodiebat, estò coram Paganis illum publicè non proderet. Caput tamen S. Juliani, quod sive pecuniâ sive suâ auctoritate acquisierat, imminentis sibi Martyrii pignus fuit. Ferreolum itaque Christianum esse rumor exiit, qui cùm ad Crispini aures pervenisset & ad suum Tribunal eum adduxisset, ei dixit: Ferreole, tu qui Imperatorum beneficentiâ cæteris præstas, etiam obedientiâ eorum mandatis eminere ac cæteris exemplo tuo præire debes. Sacrificare ergo Diis iustus es; quid moraris? Tunc S. Ferreolus ait: „ Christianus sum; sacrificare Diis non debeo. Imperatoribus „ quamdiù salvâ Religione licuit, militavi, iustis Legibus pa- „ rui; sacrilegiis nunquàm servivi, sacrificare autem iis quos „ vocas Deos, sacrilegium est. Stipendia, honores, non requi- „ ro. Pascat sacrilegum Militem sacrilegus Imperator; mihi „ sufficit si salvâ Religione liceat vivere Christianum: quòd si „ id non liceat, paratus sum mori.

XII. At Crispinus: unde hæc, inquit, tanta moriendi fiducia? an ex injuriâ Legum & contumeliâ, quâ Principes adhuc affecisti, venit hæc desperatio vivendi? Scias tamen, modò dictorum tuorum te pœniteat, & Legibus ac Principibus obsequaris reprobando Sectam Christianorum & numinibus sacrificando, omne crimen tuum humanitate meâ fore abolendum. Quibus respondit Ferreolus, se nullius criminis reum esse, qui veram Divinitatem adorat; illos potiùs esse reos, qui Divinitati detrahunt & sensibilia ac caduca venerantur: ideoque se nullâ vniâ indigere, nec injurium Imperatoribus fuisse, dum Legem Dei Legibus eorum præposuit. His & aliis testatus fuit, se nec minis nec cruciatibus unquam Christo renuntiaturum. Quare Iudex sibi eum præcepit ac diutiùs verberari. Cùmque nec sic, succedentibus sibi ex more tortoribus, eum flecti possè videret, squalido carcere includi iussit: statimque Ministri oneratum ferro in

in carcerem conjecerunt adhibitis custodibus denuò præsentandum .

XIII. Illic verò biduo exacto , summo mane tertiæ diei , ut fit , graviore somno oppressis custodibus , spontè solutis vinculis , liberum se Dei servus agnovit , & lento gradu ad ostium accedens , illud sibi patere cernit : quare juxta Evangelium Persecutionem fugiens , ad extraneam properat Regionem . Egressus foràs Portam Lugdunensem , ancipiti defixus consilio constitit , quærens secum , cui potissimum viæ insisteret , & ut nulla posset relinquere indicia ipsum insecuturis . Præmissâ itaque oratione , difficili natatu Rhodanum transfretare instituit . Armatus igitur Fide amnem fidus ingreditur , quem sibi incumbentem leni tergo solidior unda suspendit ; unde paucis natandi conatibus Beatus Martyr fluvium trajicit , & in ulteriorem ripam exit securus . Dehinc concito gradu ingressus aggerem publicum usque ad Jarem (vulgò Gere) fluvium percurrit , ubi incidens in Persecutores , & ab eis comprehensus , cùm revinctis post tergum manibus duceretur in eum locum , ubi sacrum ejus Corpus conditum fuit , gladio percussus occubuit . Hactenus ex Actis apud Ruinart erutis à pluribus Manuscriptis , quæ fidelia reputantur , locutus sum .

Ejus Corpus eodem in loco à Fidelibus sepultum fuit , tenens unâ manu caput S. Juliani , alterâ proprium supra pectus . Ei postea erecta fuit Ecclesia à quodam ex Viennæ Primoribus nomine Castulo , adhuc Catechumeno : quam cùm S. Mamentus Viennensis Episcopus anno 470. periculo imminenti Rhodani expositam videret , aliam extruxit , ad quam sacrum ejus Corpus & S. Juliani Caput transtulit . S. Ferreolum pro speciali Patrono à Viennensibus suo tempore habitum , testatur Fortunatus L. 8. Poem. 4. , ubi singularum Provinciarum vel Urbium Sanctos Tutelares recensens , ait :

Privatum Gabalus , Julianus Arvernus abundans :

Ferreolum pariter pulchra Vienna gerit .

XIV. Quia tamen duplicem Ferreolum Martyrem Gallicana Ecclesia veneratur , ideo ut tollatur æquivocatio , sciendum , unum fuisse Presbyterum , qui cum Ferrutione Diacono à S. Irenæo in Gallias ad prædicandum Verbum Dei missus , postea sub Claudio Judice ambo diversis pœnis excruciat gladio percussus sunt : & de his agit Martyrol. Rom. 16. Junii ; & ad eorum intercessionem fororis suæ Virum à febre vehementiori fuisse sanatum ; scribit Gregorius Turon. L. 1. de Gloria Mart. cap. 7. : Alterum Ferreolum fuisse Militem , & Tribunitiæ potestatis sub Diocle-

tiano passum, de quo Martyrol. 18. Septembris, cujus Acta hic descripti.

§. XXIX.

SS. Tarachus Probus & Andronicus in Cilicia Martyres.

I. **T**Arachus & Socii in Cilicia passi sunt Diocletiano imperante, ut creditur anno 304. Tarachus Romanus erat Militaris familiæ, Claudiopoli tamen in Isauria natus. Aliquando sub nomine Victoris arma gestavit: quia tamen Christianus erat, suo annuente Duce Polybione ea dimisit; ideòque privilegiis Militiæ adhuc fruebatur. Etatis 65. annos habebat. Probus Taracho ætate minor ex Thracia oriundus erat, natus tamen in Pamphylia, sive Tide sive Perge, conditione humilis sed fortunæ bonis dives; quæ tamen dimiserat, ut soli Deo serviret. Andronicus valde juvenis Ephesus erat, familiâ illius Urbis præclarâ.

II. Quomodo hi tres Sancti Viri simul convenerint, ignoratur. Scitur solum, à duobus Militibus Eutolmio & Palladio Ciliciæ Præsidi Flavio Numerio (seu Numeriano Maximo) Pompejopoli ejusdem Provinciæ Urbe fuisse præsentatos; sed quid de illis tunc ibi actum sit, latet. Ex eorum Actis solum habetur, quòd 25. Martii cum idem Præses Maximus Tarsi moraretur, Demetrius Centurio eos iterum præsentavit. Interrogatus Tarachus quia ætate minor, quis esset, respondit, Christianus sum. Et quamvis Præses ei diceret, ut hanc impiam professionem taceret, ipse tamèn iteratò, Christianus, inquit, sum. Quare Præses eum in maxillis percuti jussit: cumque ab eo tandem audisset nomen, patriam, dimissionem Militiæ, ut Christo serviret, ac ætatem; Maximus eum adhortari cœpit, ut suæ seductis misertus adoraret Deos, quos Imperatores adorabant, Cui Tarachus respondit: Non miror, si homines decipiantur; à Satana enim seducuntur. Ego Deo meo sacrifico, non sanguine, quia his sacrificiis non eger, sed corde puro. Et quamvis Judex ei maxillas acrius contundi jussisset, quòd Imperatores à Satana seductos pronuntiasset, Tarachus tamèn impavidus: jam dixi, inquit, & repeto; impietatem admittere nolo, Legem Dei mei honoro. At Maximus ait: Miser! num adest alia lex Principis? Ita sanè respondit Tarachus, & hæc est, quâ vos impii lapides & ligna opera hominum adoratis. Et cum Præses super cervicem eum cædi jussisset dicens: noli vanus esse; respon-

spondit : ego de vanitate ista non recedo , quæ me salvum facit ; fac quod vis , potestatem habes in corpus meum .

III. Tunc Maximus expoliari eum & virgis cædi præcepit : sed dum torqueretur , dicebat : nunc verò prudentem me fecisti plagis confortans me ; opto ut magis ac magis augeatur vigor iste in nomine Dei & Christi sui . Hæc audiens Maximus dixit : tu ergo duos Deos colis ; at cur nostros adorare recusas ? Sanctus verò æquum non judicans in tam sublimis mysterii explanationem cum illo intrare , continuè se dicens , Christum esse Deum Filium Dei & spem Christianorum . Tunc Demetrius , ut voluit se immiscere suadendo Tarachum , ut Diis immolaret , ab eo hoc responso rejectus fuit : recede à me cum consilio tuo , Minister Satanæ . Quare Maximus interrogatoriis solutis , S. Tarachum ferreis vinculis oneratum in carcerem detrudi mandavit .

IV. Post hæc à Demetrio Centurione Probus adducitur : cui Maximus amicitiam suam & favorem Principis , si Fidei renuntiaret , promissit , sed incassum ; Probo ei respondente , se neque honorem Principum velle , nec amicum ejus esse cupere , imò divitias suas non paucas reliquisse , ut liberiùs Deo vivo serviret . Maximus eum expoliari pallio ac cæteris vestibus , & in equuleo vinctum extendi nervisque bubulis cædi præcepit , ut terra sanguine ejus cooperiretur . Quod videns Demetrius , ut sui ipsius pietate moveretur , eum adhortari cœpit ; sed Probus illi respondit : Corpus meum ante vos est ; mihi autem tormenta vestra remedium & balsamum sunt . cùmque eum percutere cessassent , Maximus ait : Exurge miser à vanitate à durtia tua . Sed respondente Probo : non sum vanus sed prudentior vobis ; idèd Dæmoniis non sacrifico ; iratus Maximus dixit : Gyrate illum , & super ventrem cædite . Et quia Probus dicebat : Auxiliare servo tuo Domine . Maximus ait : Cædentes illum dicite illi : Ubi est auxiliator tuus ? at Probus respondit : Et modò auxiliatur & auxiliabitur in futurum : sic enim pro nihilo habeo tormenta tua , ut non acquiescam tibi ; nam quantò plus corpus meum pro Jesu Christo patitur , tantò plus sanitatis & vitæ anima mea acquirit . Quare Maximus jussit ambas manus & pedes ei in nervo stringi , & sic trahi alligatum , detrudi in carcerem ; ut nemò ad eum accederet severè prohibuit .

V. Subinde tertius , nempe Andronicus à Demetrio præsentatur : qui præfatis pulsatus interrogationibus , in confessione Christiani nominis sicut cæteri perstitit . Maximus ejus adolescentiâ commotus , sicut Pater filium blandè eum monere cœ-

pit, ut stultitiâ depositâ Principes ac Deos ut Patres veneraretur. Sed cùm responderet Andronicus: Benè illos patres nominatis, quoniam vos ipsi patrem habetis Satanam; nam filii Diaboli estis facti, & opera ejus perficitis. Maximus dixit: Adolescentia pueritiæ tuæ adhuc me compescit, scias enim magna tibi tormenta parari. Verùm Andronicus: Adolescens, inquit, tibi videor in annis, homo tamen perfectus in anima & in omnibus sum: ne me credas ita stultum ac debilem, ut minor in constantia quàm ceteri inveniar; paratus sum tibi ad omnia tormenta. Tunc igitur vestibus spoliatus in equuleo extenditur: atque interim dum in tormento cruciatur, Maximus. Demetrius & Athanasius Cornicularius variis suasionibus ad sacrificandum Diis eum inducere conantur. Sed Andronico constanter resistente, eorumque monita solidè rejiciente, jubet Maximus crura ei graviter torqueri, deinde costas lacerari, sale plagas aspergi & acutis testulis radi; comminatus, se minutatim corpus ejus concisurum. Sed cùm ille, ac si tot tormentorum nec sensum haberet, hilaris responderet: non timeo comminationes tuas, sensus enim meus melior est cogitatione malitiæ tuæ: confortasti corpus meum in plagis, propterea contemno tormenta tua. Maximus se vincere illum desperans, jussit ligari ejus pedes & collum ferro, & sub custodia haberis; rigorofo imposito præcepto, ne quis ad carcerem accedere permetteretur; volens, ut plagis sensum tabescentibus sic interiret. Sed contra Deum inanes sunt cogitationes hominum, nam Andronici plagæ nullo curante miraculosè sanatæ sunt.

VI. Post aliquod tempus, licèt ignota sit dies, Mopsvestiæ celebri Ciliciæ Urbe tres Sancti Martyres iterùm in judicium vocantur. Maximus ad Tarachum conversus dixit: Scio, quòd senectutis character & gloria est sapienter ac prudenter cogitare ac decernere; spero igitur, te saniori consilio decrevisse Diis sacrificare, ut sic merearis honores, quos à Principum clementia sperare licet. Tarachus respondit: Si Principes & quotquot cum illis sentiunt, qui sint veri honores, intelligerent, omnes cæcitatem cogitationum vanitatis suæ deponerent, & meliori vitâ ac lumine à Deo illustrarentur. Hæc Maximus accipiens tanquam Principibus injuriosa, os ei lapidibus frangi jussit, adeout dentes exciderent, dicens, recede à stultitia tua. At Tarachus: Si, inquit, stultus ero, sicut vos estis: dentes jam contritos habeo; sed mihi non suadetis, nam si etiam omnia membra mea collidas, ego sto fortis in eo, qui vobis fortior est.

VII. Tunc Maximus in equuleo eum extendi & nervis crudis

dis cædi jussit : Taracho autem nihil respondente , ait , cædite illum in os , ut respondeat . At Tarachus : maxillæ meæ , inquit , fractæ sunt , quomodo respondeam tibi ? sed si corpus meum infirmasti , animam meam certè non infirmasti : fac ergo quod vis ; conatus tuos omnes superabo , quia vigor meus Deus est . Tunc jussit super manus ejus ignem expandi , quæ exustæ remanserunt . Sed Tarachus : Ignem tuum , inquit , temporalem non timeo ; timeo autem , si consensero tibi , ne fortè ignis æternus in me dominetur . Tunc jussit eum à pedibus ligatum capite deorsum in altum suspendi , & acrem fumum ad faciem ejus supponi ; minatus , se in eo statu relinquiturum , donec sacrificet . Sed Vir Dei nihil territus ait : Ignem tuum contempsi & fumum tuum timere debeo ? sacrificia tu , qui solitus es sacrificare hominibus ; mihi hoc non licet . Tunc Maximus acetum acre jussit afferri & in naribus ejus infundi , sinapi cum aceto immixto : verùm irridente Taracho & dicente : fallunt te Ministri tui , Præses ; mel pro aceto infuderunt mihi : Maximus victus , cogitabo , inquit , proximâ sessione alia tormenta , ut respicias à stultitia tua : cui , & me ad omnia tormenta paratum invenies , Tarachus respondit : quare eum catenis ligatum in custodiam trahi & alterum jam adduci præcepit .

VIII. Adductus itaque Probus fuit , cui Præses ait : Cogitasti ne recedere à stultitia tua , & Diis , quibus sacrificant Principes , immolare ? respondit Probus : Si ipsi faciant , ego nunquam faciam : auctaster hoc dico : in confessione veri Dei perisso . Quæ passus sum , ad ulteriora & graviora pro Deo meo perferenda robur mihi addiderunt ; et si volueris , proba . Cùmque in ostendenda vanitate Idolorum & stultitia eorum , qui ligna adorant & lapides , sermonem protraheret , dixit Judex : an me errantem putas stulte , Diis sacrificia . Probus verbis Scripturæ respondit : Diis , qui non fecerunt Cælum & terram , exterminabuntur . Judice autem suadente , ut saltem Jovem adoraret , hæc occasione acceptâ Vir Dei : Illum , inquit , dicis Deum , qui eum sua sorore fornicatus est , & alia multa fecit , quæ non possum dicere ; hunc Deum dicis ? Cùmque Judex cædi eum in ore ut blasphemum jussisset , ait , quid me cædis ? omnes , qui ei imolant , hoc dicunt , sicut & tu ipse optimè nosti .

Tunc Maximus ignitum ferrum stantis pedibus jussit subterni ; sed quamvis verè ardens esset , Vir Dei se vix tepidum illum experiri dicebat , & ministros ei illudere . Quare in equuleo extendi , nervis crudis cædi & aperiri dorsum ejus mandavit : Probo interim dicente : Ignem tuum non timui ; tormenta tua

contemno: sed si habes aliam cogitationem, adhibe, ut cognoscas, qui est in me Deus. Jussit ergo illi radi caput & prunas igneas ei superponi: cum autem Sanctus Martyr diceret: Ustulasti mihi pedes & caput, & probasti, quia servus Dei sum, & tolero iram tuam. Judex vanâ felicitate eorum, qui gratiâ & favore Deorum ac Principum fruuntur, cum ipse ob contumaciam suam omnibus esset execrabilis, eum seducere conatur. At Probus ait: Crede mihi, omnes hi perierunt, qui servierunt Idolis & verum Deum dereliquerunt, nisi ad eum conversi pœnitentiam egerint. Cùmque Maximus diceret: Frangite faciem ejus, ut non dicat *Deum*, sed *Deos*. Vir Sanctus conquestus est, quòd quia veritatem dixerit, os ei frangi mandaverit. Et comminante, se non os solum, sed etiam linguam ei incisurum, respondit: Etsi exteriorem incideris, habeo interiorem & immortalem linguam, quâ tibi respondebo.

IX. Tandem jussit Maximus, ut Probo in custodiam missò, Andronicus sisteretur. Hunc coram se positum ita est allocutus. Qui ante interrogati sunt, post multa tormenta ad sacrificandum Diis tandem conversi sunt, propter quod magnum honorem accepturi sunt à Principibus. Tu ergo lucrare tormenta & sacrificia Diis nostris & honorabilis eris. Quod si nolueris, juro tibi per Deos & Principes nostros, quia de manibus non evades. Cui Andronicus compertâ fraude ac mendacio: Miser, inquit, & mendax, quid me fallis? Fratres enim mei non potuerunt Dominum negare & stultitiæ tuæ consentire: existima ergo, quòd & me talem invenies. Armatus à Deo ante assisto, neque Deos tuos sciens, neque Principes, neque Tribunal tuum metuens: exequere ergo in me omnia pœnarum genera, quæ cogitasti. Tunc Maximus, quatuor palis tendi & nervis bubulis eum dirè cædi præcepit. At Sanctus quasi irridens hoc tormentum: Ad hoc, inquit, omnes minæ tuæ devenerunt? propter hoc per Deos & Principes tuos jurare oportebat? Cùmque Athanasius Cornicularius ei diceret: Totum Corpus tuum laceratum est, & pro nihilo habes omnia ista, miser? ei respondit: Qui Deum vivum diligunt, ista omnia contempnunt.

Tunc Maximus dixit, sale fricate ei dorsum. Andronicus verò: Jube, inquit, plus salis mitti, ut possim conditus non corrupti à malignitate tua. Maximus iterùm ait: Convertite eum & in ventrem cædite, ut priores plagæ excitentur, & usque ad medullam descendant. Andronicus verò respondit: A plagis, quas in prima quæstione mihi inflixisti, perfectè ut vides sanatus sum. Qui me sanavit, iterùm me sanabit. Cùm ergo sa-

natio esset visibilis, Maximus arguere cœpit custodes, quasi ejus præceptum adducendo medicum violassent . At Pegasio Commentariensi se per caput suum protestante, neminem omnino ad eum accessisse, quomodò autem sanatus se nescire, subdidit Andronicus: Medicus noster grandis est; non medicamentum ponit aut emplastrum, sed solo sermone curat omnes qui sperant in eum. Habitat in Cœlo, præsens est ubique; sed tu insensate non agnoscis. His auditis dixit Maximus: hi sermones nihil serviunt; accede & Diis sacrificâ. Cui Andronicus respondit: Quæ semel ac iterum dixi tibi, nunc repeto; puer non sum, ut sermonibus tuis seducar. Et dicente Maximo: non patiar, me à vobis vinci; repôsuit Andronicus: nec tu tormentis ac terroribus tuis vinces nos, erimus Athletæ invincibiles in eo qui nos confortat Jesu Christo. Maximus verò atrociora tormenta parare cogitans dimisit sessionem, mandans, Andronicum in vinculis ferreis recipi in custodiam, ad quam nemo accederet.

X. Tertia sessio interrogatoria Anazarbe Ciliciæ Urbe fuit; ubi Maximus Demetrio Centurioni, vocate, inquit, impios Christianos. Et Taracho adducto dixit: Audi me & sacrificâ Diis, per quos omnia stant. Cui Tarachus respondit: Peribunt qui talia sentiunt; paratus est enim ignis æternus illis & omnibus, qui talibus Mundi Gubernatoribus obediunt. Cumque Maximus minaretur, se impudentiam suam capitis abscissione, ni recederet, puniturum: dixit Tarachus: Hoc à te non peto, nimis enim breve meum certamen foret; adauge potiùs tormenta, ut mihi augeatur corona. Tunc Maximus: Et quid speras, inquit, miser, post mortem adeò turpem ac funestam? Tarachus respondit: Non tibi licet de hoc interrogare, neque scire, quam præparavit Deus nobis positam mercedem in Cœlis: propterea sustinemus iram tuam & minas ac tormenta tua. Indignatus Maximus ait: Tu mihi ita loqueris, maledicte, ac si esses consors meus? Respondit Tarachus: Consors tuus non sum, sed habeo potestatem loquendi, & nemo potest me compescere, per eum qui me confortat; hic est Deus. Et eum adhortante Maximo, ut sacrificaret Diis: Jam dixi, inquit Tarachus, in prima & secunda mea confessione, quòd Christianus sum; & hoc idem modò tibi confirmo, nec aliud à me expectare potes: non sacrifico; si me pœnituisse, in primis & secundis interrogationibus voluntati tuæ consensissem; de meo corpore fac quod vis, in tua enim est potestate.

XI. Maximus ergo dixit: Suspendite eum in equuleo, quia

stultus est. Stultus essem, inquit Tarachus, si tuæ voluntati consentirem. Antequam tamen suspensus quæstioni subjiceretur, dixit ei Maximus, Militiæ privilegio eum à quæstione exemptum esse, & hoc Diocletianum declarasse; sed Milites pro salute Principum semper Diis sacrificant; tu autem cum sis pessimus, quod & fugisti militiam, oportet majora pati tormenta; noli putare te semel damnari, sed particulatim te exterminabo, & reliquias tuas bestiis dabo. Cumque Tarachus nihil territus respondisset: Quod facturus es, fac citius, noli sermonibus promittere; Maximus subjunxit: Putas, quia mulierculæ aliquæ post mortem corpus tuum habent aromatibus vel unguentis condire, nequissimæ? cogitabo, ut reliquias tuas exterminem. Tarachus respondit: Et nunc quæ vis corpori meo adhibe & post mortem fac quod vis. Cumque instaret, ut prius Diis sacrificaret, subiecit Tarachus: sæpius dixitibi, stulte, quod nec Diis tuis sacrificare nec abominationes tuas adorare volo.

XII. Tunc iratus Præses faciem ejus frangi, & labia concidi præcepit. Cui Tarachus: Etsi, inquit, faciem meam exterminasti, animam tamen meam armis Dei protectam vivificasti. At Maximus ait: Ubi sunt ista arma? video quidem te cooperatum, sed plagis, ceterum te nudum conspicio. Cui Tarachus: Tu, inquit, arma mea videre capax non es, quia cæcus es. Quia verò Maximus eum accusabat tanquam Magum & impostorem, Vir Dei negavit & addidit: Magi titulus iis congruit, qui adorant Dæmonia; ego adoro Deum meum vivum, qui mihi dabit patientiam, & quid dicam quidque loquar ad te. Tunc Maximus obeliscos igniri, & supra mamillas poni præcepit, deinde super dorsum, postea ad latera. Et cum Tarachus diceret: Deus vidit & judicat: ait Maximus: Quem Deum invocas, miser? Illum, inquit Tarachus, quem tu nescis, & qui unicuique reddet secundum opera sua. Jussit deinde aures illi abscindi & novacula caput decorticari. Post hæc comminatus Maximus se eum flammis absumpturum, & cineres in ventum sparsurum ne colligerentur, reduci jussit in custodiam bestiis exponendum.

XIII. Probus deinde jussus accessit, cui similiter, ut Andronico, persuadere Maximus studuit, alios tandem socios victos celsisse & Idolis sacrificare promississe. Sed Probo id verum esse negante: Ergo, inquit Maximus, omnes Diis non sacrificare conspirastis. Respondit Probus: Modò verum loqueris: sensus noster unus est, quia uni vero Deo servimus: noli putare, te à nobis aliud audire, quam audisti & didicisti; quoniam non po-

potes convertere nos, nec irā tuā virtutem nostram extinguere. Audax præstò sum tibi hodie contemnens omnem contentionem tuam: quid expectas? Inde protestatur, numquam fore, ut vel ipse vel Dæmones vel qui ei dederunt potestatem torquendi, separarent eos à Fide & caritate Jesu Christi. His auditis Maximus, pedibus in altum eum suspendi & ignitis unguibus latera ejus cruciari præcepit, Probo interim Deum invocante & ab eo fortitudinem ac patientiam postulante. Tunc Maximus (Diabolo certè cogitatum hunc suggerente) de vino & carnibus Diis immolatis, in os ejus per vim infundi mandavit, dicens: Vides, miser, ecce jam de Sacrificio accepisti, quid habes facere? Probus autem Deo in testem suæ voluntatis & violentiæ sibi allatæ vindictam invocato, dixit: Nunquam tibi benè sit; ut vincas propositum meum & inquines confessionem meam. Hoc enim scire debes, quoniam etsi omne inquinamentum Ararum tuarum torum liques & infundas mihi, nihil inde inquinabor; scit enim Deus & videt vim quam patior.

XIV. Maximus ergo iterum ad tormenta confugiens, ferreas ungues igniri & super femora ei imponi præcepit, & ustulatos clavos manibus ejus infigi. Probus autem gratias Deo egit, quòd dignus effectus fuerit pro nomine ejus crucifigi. Cumque Maximo insultanti respondisset, multam potestatem quam habebat, non solum stultum sed & cæcum eum fecisse, non enim sciebat, quid faceret; Et offensus diceret: Insensatum & cæcum ausus es me dicere, quoniam super pios Deos agonizor? respondit Probus: Utinam cæcus esses oculis & non corde; nunc autem cum te speras videre, in tenebris es & non vides. At Maximus putans, quòd adeò liberè loqueretur, quia licet toto corpore læsus, oculos tamen adhuc sanos haberet, jussit oculos ejus minutatim pungi, ut lumine privaretur. Sed cum Sanctus intrepidè diceret, sibi quidèmodum oculos corporis abstulisse, sed interiores cordis auferre ei non posse, crudelem eum & tyrannum vocans, Præses dixit: mortuus es totus in carne, & non cessas à multiloquio, iniquissime? Probus autem: Usquequò, inquit, habeo spiritum meum in me, non tacebo in Deo meo, qui me fortem facit. At Maximus ait: Post ista tormenta vivere te speras? aut putas dimittam te lætum mori? paulatim te plagis interficiam, ut dignus es. Respondit Probus: In hoc pugno agonizans, ut testimonium integrum ac perfectum Jesu Christo feram; tu vitam mihi sinè misericordia eripe. His dictis custodiæ traditur in proximo bestiis exponendus, imposito præcepto, ne quisquam ad eum accederet.

XV. Postremus Audientiæ præsentatur Andronicus . Ei multa promissit Maximus , si ætati suæ consulens Diis sacrificaret : at ipse cum horrore hanc propositionem excipiens protestatus est , nihil se impediturum , quo minùs usque ad mortem in confessione Fidei Jesu Christi persisteret . Quod cum summâ efficaciam protulisset , dixit ei Maximus : Videris mihi furiosus esse , & Dæmonium habere . Cui Andronicus ait : Si Dæmonium haberem , contentirem tibi ; nunc autem sine Dæmonio sum , quia Dæmoniis non acquiesco : tu autem Dæmon es totus , & quæ Dæmoniorum sunt , ipsa operaris . Maximus tamen vincere eum volens , dixit : Qui ante te voluerunt loqui , multa ante tormenta locuti sunt , postea autem plagis & pœnis subacti pios se esse confessi sunt , Diis ac Principibus sacrificantes : sed ad hoc mendacium irridens Andronicus respondit : Conari veritatem mendaciis obruere proprium tui est , & eorum quos adoras : cave , ne Deus qui veritas est , te confundat . Quare Maximus iussit ferri papyrus , & ex eo manipulis factis , ignem ventri ejus apponi . At Servus Dei : Etsi , inquit , totus arsero non me vinces ; præstò enim est qui confortat me Deus meus . Maximo autem eum increpanti , quousque non acquiescis , insensate ? dixit : Quousque vivo , vincam malitiam tuam ; totum membratim me interfice , festina ; hæc enim mihi gloria est apud Deum . Iussit ergo obeliscos idest ferrea acumina incendi , & inter digitos figi : ille ridens ajebat , se habere secum Christum , & omnia proinde contemnere . Quod audiens Maximus ait : iniquissime , non scis , quem invocas Christum , hominem quemdam fuisse sub Pontio Pilato punitum ? At Vir Dei : Obmutesce , inquit , ini- que ; non licet tibi de ipso loqui : si dignus es ejus Majestatem agnoscere , non ita in servos ejus ageres ; sed tu & qui tibi consentiunt perditis estis .

XVI. Post varia , dixit Maximus : Nolo tormentis aliis pœnas tibi adjicere , aut semel te morti tradere ; bestiis te faciam dari , ut videas membra tua singula ab eis ante mortem tuam discerpi . Andronicus verò : Ne loquaris , inquit , de bestiis ; tu enim bestia omnium crudelissima es , dum nullius criminis reos velut homicidas lanias . Adhibe ergo , quæ paras tormenta , & fortem me invenies in Christo Deo meo . Tunc Maximus iussit ei per vim os aperiri & violenter cibos & vinum de Sacrificio intrudi . Atrocius Servo Dei cæteris omnibus hoc tormentum fuit : eodem tamen tempore cum S. Probo dolorem lenivit , quòd non volens sed coactus & repugnans hoc passus sit , sperans , se quamprimum ab ira Satanæ liberandum , quòd multis ser-

sermonibus expressit. Quare Maximus furore accensus, comminatus ei dixit: Faciam tibi linguam incidi, ut vel sic non loquaris. Cui Andronicus gratias agens dixit: Hoc est quod à te peto, ut abscindas linguam & labia mea, in quæ putas sordes tuas immisisse. Et Maximo ei insultanti: ecce sicut præcepi gustasti de Sacrificiis: accensus zelo Vir Dei maledixit illi & eis, qui dederunt ei hanc potestatem; cùmque Maximus diceret: Maledicis Principibus, qui diuturnam pacem præstiterunt? Andronicus velut prophetico afflatus spiritu ait: Maledixi & maledico potestates & sanguinarios, qui seculum everterunt: quos Deus brachio suo evertat & conterat & perdat & det super eos iram, ut sciant, quòd agant in Servos Dei.

XVII. Tunc Maximus ampliùs ferre non valens: Mittite, inquit, ferrum in os ejus & excutite ei dentes & malam, & blasphemam linguam excidite, ut discat non blasphemare in Principes. Dentes autem ejus & blasphemam linguam tollite & comburite & cinerem facite & ubique spargite, ut nemo de consortibus ejus impiis aut de mulierculis aliqua colligat, ut servet, quasi pretiosum aliquid aut sanctum æstimet. Ipsum autem tollite & in carcere custodite eum, ut simul cum fociiis suis offeratur bestiis,

XVIII. Eâdem die Maximus vocavit Terentianum Ciliciæ Pontificem (quasi Ciliciarcham utpotè totius Ciliciæ Templâ sub sua habentem potestate, ut notat Valesius in Euseb. Lib. 8. c. 18.) eique injunxit, ut pro die sequenti pararet Gladiatorum & bestiarum certamen. Terentianus autem jussis iis, qui præerant bestiis, omnia in crastinum disposuit. Mane igitur facta tota Civitas, Viri, Mulieres, pueri ad amphitheatrum uno milliari ab Urbe distans convenere. Plures etiam ex Christianis, etiam Presbyteris & Ecclesiasticis in locum, unde omnia spectari poterant, vicinum fortè montem (ipsi autem in abscondito erant) se receperunt, cum metu & lacrymis quid futurum esset expectantes. Interea cùm Amphitheatrum plenum Populo fuisset, Maximo adveniente, Gladiatorum & bestiarum cœpta est pugna, & ad plures horas protracta, in qua multi sive à Gladiatoribus cæsi, sive à bestiis laniati occubuerunt.

XIX. Tandem impius Maximus Sanctos adduci Martyres jubet: sed cùm tormentis fracti incedere non possent, oportuit ut aliqui ad eos humeris portandos adigerentur: quos cùm ita delatos, & in medio Amphitheatri semivivos relictos vidisset Populus fremere, & (quod in Actis Martyrum rarum est) injustum Judicem proclamare cœpit: quin & multi tale horrentes

spe-

spectaculum ex Amphitheatro discesserunt . Quod advertens Maximus Militibus injunxit , ut eos qui discedebant , notarent : Christiani verò è loco , in quo se abdiderant per fixuras petrarum videntes SS. Martyres confratres suos ita adductos , cum magna deprecatione lacrymas fundebant .

Jussit ergo Maximus , adversus Martyres plures bestias laxari , nulla tamen ex illis illorum corpora tangere ausa est . Quare ardens irâ Maximus vocatos ferarum custodes cædi jussit , & severâ comminatione dixit eis , ut dimitterent atrocissimam feram , quam haberent . Illi autem timore perculsi dimiserunt ursum ferocissimum , quem dicebant ipsâ die tres homines occidisse . Ursus ergo ad Corpora Sanctorum accedens nullum eorum tetigit , imò ad S. Andronicum veniens & sedens lungebat vulnera ejus . Et quamvis Andronicus poneret caput suum super ursum , illumque instigaret , ut irascens celerius eum occideret ; ursus tamen quasi mansuetus subitò factus est . Quare irâ repletus Maximus jussit eum occidi , & ante pedes S. Andronici occisus fuit . Terentianus metuens implacabilem Præsidis iram , produci jussit lænam , quæ missa illi fuerat ab Herode Asiarcha . idest Pontifice Syriæ Antiochiâ . Cùmque rugitu magno exiens timorem omnibus incussisset , perveniens tamen ad S. Tarachum super genua ejus procubuit , quasi eum adorans . S. autem Tarachus trahebat eam manu per crines & aures ad se , ut bestia iratâ citius consummaretur ; Læna tamen velut ovis mansueta ad ejus pedes jacebat . Crudelior Maximus eam ad furorē provocari jussit ; & illa quidē furens surrexit sed fracto postico irruit , ut omnis Populus clamaret : Claudatur in sui cubili læna . Maximus extremo furore captus , volens suæ impietati aliquo modo satisfacere , vocato Terentiano jussit , Gladiatores introduci , ut Sanctos Dei Martyres interficerent : quod statim impletum est ; nam gladio consumti , testimonium pro Fidei Christianæ veritate gloriosum suâ constantiâ reliquerunt .

XX. Post expletam suæ insanix rabiem Maximus ex Amphitheatro recedens , reliquit ibi decem Milites , præcipiens eis , ut Corpora Sanctorum inter corpora cærorum Gladiatorum confunderent , ut discerni non possent . Quæ cùm Milites facerent , Christiani , qui è vicino monte omnia conspexerant , viso Maximi discessu , Amphitheatro appropinquant , & genibus flexis Deum deprecantur , ut dignaretur Sanctorum Reliquias eis ostendere . Et cùm ad theatrum pervenissent , viderunt custodes cœnantes & focum ante se habentes propter vigilias noctis . Tunc iterum genuflexi Deum rogarunt , ut desiderium eorum ,
mit-

mittens ex alto auxilium suum, impleret. Tunc subito terramotus factus est magnus & tonitrua & fulgura, & nimia tempestas, imbrium descendebat. Et cum cessasset, rursus Deum oraverunt, & ad Corpora appropinquantes invenerunt focum à tempestate extinctum, & Milites & custodes territos aufugisse. Tunc Sanctorum Martyrum Corpora inquirere coeperunt elevantes ad Deum manus, ut ea sibi discernere concederetur. Cum subito misericors Deus stellam splendidam de Cœlo misit, quæ sedebat super singula Corpora Sanctorum; & ipsi cum gaudio ea rapuerunt; sanctus autem stellæ splendor (velut olim Magis) antecedebat eos iter demonstrans. Et cum fuissent in via præ lassitudine defecti, deposuerunt Corpora & quieverunt; stella autem ab eis non recedebat. Cumque cogitarent, ubi Corpora Beatorum absconsè sepelirent, deprecati sunt Dominum, ut opus, quod ipse inchoaverat, perficeret: & fortitudine ac fiducia repleti, bajulantes Corpora Sanctorum pervenerunt in quandam montis partem; & cum stella ab eis recessisset, viderunt in parte montis petram apertam & in ea Sanctorum Corpora collocarunt; & cum magna diligentia, ne detegerentur, absconderunt, speluncæ aditum obstruentes.

. XXI. Deinde ad Urbem venientes invenerunt custodes à Maximo punitos, eò quòd Sanctorum Corpora non invenisset; ipsi autem in hymnis Deo gratias egerunt, quòd per eos hoc operari dignatus sit. Hi sunt qui Acta trium Sanctorum conscripserunt: & quoad Gesta in tribus Interrogatoriis, ea hauserunt à quodam Milite, nomine Sabasto, Spiculatore ducentis denariis comparata, qui omnibus adfuerat, eaque scripto notaverat, quibus ipsi addiderunt ea, quæ de consummatione Martyrii propriis oculis conspexerant. De his omnibus litteras dederunt ad Fideles Iconii, rogantes ut eas transmitterent etiam ad eos, qui erant Pisidiæ & Pamphyliæ. Litteræ Iconium datæ nomina undecim Christianorum præferunt, qui sunt: Pamphylus, Marcianus, Lyfias, Agathocles, Parmenas, Deodorus, Felix, Gemellus, Athenion, Tarachus, & Orosius. Ex qua Epistola, quæ hæcenus dixi sumpta sunt apud P. Ruinart, Tilmontium, Fleury &c.

Horum Martyrum illustrem memoriam Latini celebrant in Martyrol. Rom. 11. Octobris, quamvis *Tarfi*, non *Anazarbe*, uti reverà contigisse Acta ostendunt. Græci etiam in Menol. Basil. eam colunt, sed die sequenti, qui tamen volunt Mopsuestiæ eos fuisse passos. Hæc puto conciliari posse dicendo, in hisce tribus locis verè passos fuisse; nam in Tarso passionem inchoa-

runt

runt, Mopsuestiæ eam persecuti sunt, sed Anazarbe eam consummarunt, ibique eorum Corpora sepulta fuerunt. Hoc præter dicta confirmari potest; nam cum seculo quarto exeunte Auxentius Mopsuestiæ Episcopus Arianus Ecclesiam in honorem eorundem Martyrum extruxisset, ab Anazarbensibus obtinuit, ut Sanctorum Martyrum tumuli referarentur, & aliquid ex eorum sacris Reliquiis sibi concederetur. Sed apertis tumultis tot prodigia acciderunt, ut nemo sacra Corpora contingere ausus fuerit: fortè indignante Deo, quòd Reliquiæ eorum, qui pro Fide sua tuenda tot tantæque passi fuerant, homini à Fide extorri, quia Ariano, concederentur.

§. XXX.

SS. Vitalis & Agricola, Proculus, Crispina, Chrysogonus, & Anastasia.

I. **P**AUCA, quæ de hisce Martyribus scimus, Sancto Ambrosio debemus L. de Exhort. ad Virg. cap. 1. & 2.. Agricola ergo & Vitalis Itali & Bononienses erant, Agricola herus, Vitalis verò ejus famulus & discipulus, nam Agricola eum Fide Christi imbuerat; & sic qui conditione ipsi inferior erat, in Fide sibi æqualem reddidit. Agricola genio suavis ac mitis erat, ut vel ipsi Infideles eum diligerent; Vitalis fortior & animosior. Exortâ Persecutione, omni tormentorum genere Vitalis constantiam labefactare Infideles prius tentarunt; sed illè tormenta contemnens & in eis altâ voce Christum confiteri perseverans, tot denique plagis coopertus fuit, ut nullus in ejus corpore vulneri locus amplius supereffet. Quare Jesum Christum deprecatus, ut spiritum suum susciperet, eique ab Angelo sibi offensam coronam redderet, tradidit animam. Persecutores rati, Vitalis tormenta animum Agricolæ quem diligebant fregisse vel saltem conterruisse, ejus passionem aliquantulum distulerunt. Sed videntes, eum Vitalis animatum exemplo ejus sortem æmulari, & conqueri primatum in Martyrio sibi à servo ereptum fuisse, eum clavis Cruci affixerunt, & tanto clavorum numero corpus ejus perfoderunt, ut plura essent vulnera quàm membra. Eorum Corpora simul cum Cruce sepulta fuere.

II. Audiendus est Ambrosius, citato loco eorum Martyrium hisce verbis celebrans: *Martyri nomen Agricola est, cui Vitalis servus fuit ante, nunc consors & collega Martyrii. Præcessit servus, ut provideret locum; secutus est dominus, securus quòd Fide ser-*

servuli jam inveniret paratum . Non aliena laudamus , passio enim servi Domini disciplina est : hic instituit , ille implevit ; nihil illi decerpitur , quomodo enim minui potest quod Christus donavit ? Egrege & ille qui homini servivit , serviendo didicit quomodo Christo placeret : hic tamen geminam laudem acquisivit , in illo magisterii , in se Martyrii . Certaverunt tamen inter se invicem beneficiis , postquam aequales esse meruerunt ; hic illum ad Martyrium pramisit , iste illum accersivit . Nullum ergo ad commendationem hominis conditio affert impedimentum , nec dignitas prosapia meritum sed Fides affert : sive servus sive liber , omnis in Christo unum sumus , & unusquisque quod fecerit bonum , hoc recipiet à Domino &c. Et infra .

III. Cùmque Sanctus Vitalis cogeretur à persequentibus , ut Christum negaret , & ille ampliùs profiteretur Dominum Jesum Christum ; omnia tormentorum genera in eum exercentes , ut non esset in corpore ejus sine vulnere locus , Orationem fudit ad Dominum dicens : Domine Jesu Christe Salvator meus & Deus meus , jube suscipi spiritum meum , quia jam desidero , ut accipiam coronam , quam Angelus tuus Sanctus mihi ostendit . Et completà Oratione emisit spiritum . Sanctus verò Agricola mitior habebatur moribus , ut ab ipsis etiam inimicis diligeretur ; idèque differebant ejus passionem : sed hæc Persecutorum bonorificentia erat omni immanitate acerbior , quæ invadebat Martyrium . Denique ubi non acquirerit Sanctus Agricola , crucifixus est ; ut advertamus , illas blanditias eorum non sedulitatis fuisse sed fraudis : supplicio servi Dominum terrere voluerunt ; vertit hoc Deus in gratiam , ut Martyrio servi Dominus invitaretur .

IV. Hucusque S. Ambrosius : qui addit , Corpora Martyrum sepulta fuisse in solo inter Judæorum sepulcra ; & quòd Judæi , qui vivos persecuti fuerant æquè ac illum pro quo fuerant passi , mortuos honorabant & sepulcrum habere cum ipsis exoptabant . Ad eorum corporum translationem S. Ambrosius invitatus Bononiam accessit , ut ipse ibidem testatur , & corporum inventionem ac inde translationem describens ait : Illic igitur Martyris exuvias requirebamus , tanquam inter spinas rosam legentes , circumfundebamur Judæis cùm sacræ Reliquiæ eveherentur . Aderat Populus Ecclesiæ cum plausu & latitia . Et addit , propriis manibus se sustulisse Crucem & clavos , quibus S. Agricola confixus fuerat , sicut & de sanguine ejusdem : quæ omnia ad Ecclesiam summo plausu delata fuerunt ; & insuper partem ligni Crucis & sanguinis S. Agricolæ sibi retinuisse .

V. Concordant hæc cum Martyrol. Rom. 4. Novembris ,
Tom. VI. M m m ubi

ubi hæc habet : *Bononia Sanctorum Martyrum Vitalis & Agricolæ, quorum prior posterioris servus antea fuit, postea confors & collega Martyrii; in quem Persecutores omnia tormentorum genera exercuerunt, ita ut non esset in corpore ejus sine vulnere locus. Quæ constanter perferens in oratione spiritum Deo reddidit. Agricolam verò plurimis clavibus cruci affigentes interemerunt. Eorum translationi S. Ambrosius cum interesset, Martyris clavos sanguinem triumphalem & Crucis lignum se collegisse refert, ac sub sacris Altaribus condidisse. Adventus autem S. Ambrosii Bononiam (ex Paulino in ejus Vita) contigisse videtur anno 393., quo, ut declinaret occursum Eugenii Tyranni tunc in Italiam venientis, relicta Mediolanensi ad Bononiensem Civitatem emigravit; ubi rogatus inventioni & translationi Corporum præfatorum Martyrum interfuit; quæ ibidem decenter collocata fuerunt. Unde S. Paulinus Nolanus Poemate 24. ait :*

*Vitalem, Agricolam, Proculumque Bononia condit,
Quos jurata fides pietatis in arma vocavit,
Parque salutiferis texit victoria palmis,
Corpora transfixos trabalibus inclita clavibus.*

VI. Quia verò S. Paulinus memorat etiam S. Proculum Bononiensem Martyrem, & Bononiæ passum, de quo ibi Festum agitur die 1. Junii; cum ejus Acta deperdita sint, de eo nil certi dicere possum. Bononienses colunt eum tanquam Militem clavibus ut Sanctum Agricolam confixum, quod videtur indicare S. Paulinus; Romanum tamen Martyrol. 1. Junii facit eum Episcopum dicens: *Bononia S. Proculi Episcopi & Martyris, qui sub Maximiano Imperatore passus est*: Ughellius tamen inter Episcopos Bononienses eum non recenset. De S. Proculo notat Baronius in Notis ad 1. Junii, quòd usque ad sua tempora percrebuerat opinio, quòd passus sit temporibus Theodorici Regis Ariani, ea de causa quòd zelo Fidei in Arianum Præfectum Catholicis insensissimum insiliens eum occidisset. Sed hæc vana esse, ostendunt tum Martyrol. quod eum sub Maximiano passum dicit, tum ea quæ S. Paulinus, qui longè tempora Theodorici præcessit, supra relatus de eo canit tanquam uno ex Italiæ Martyribus. Cujus auctoritate motus Gabriel Card. Paleotus Archiep. Bonon. tabulas pristinas illius Ecclesiæ emendavit. ita Baronius. An verò fuerit Episcopus vel Miles, mei argumenti non est modò inquirere.

VII. Crispinam inter Africanas Martyres celeberrimam fuisse, testatur pluribus in locis S. Augustinus: in Psalmum enim 120. num. 13. de ejus genere & fortitudine: *Saviebant,*
in-

inquit, *Persecutores in Crispinam, cujus hodie natalitia celebramus, sciebant in Feminam divitem & delicatam: sed fortis erat, quia Dominus tegumentum ejus. . . . Hanc enim, Fratres, numquid est qui in Africa ignoret? clarissima enim fuit nobilis generare, abundans divitiis. Sed hæc omnia sinistra erant, sub capite erant. Venit inimicus, qui feriret caput, & sinistra illi objecta est, quæ erat sub capite &c.* In Psalm. 137. num. 3. : *Gaudet iniquus in popina; gaudet Martyr in catena. Quomodo gaudebat Sancta ista Crispina, cujus hodie solemnitas celebratur? Gaudebat cum tenebatur, cum in carcerem mittebatur, cum ligata producebatur, cum in catasta levabatur, cum audiebatur, cum damnebatur: in his omnibus gaudebat, & eam miseri miseram putabant, quæ coram Angelis gaudebat. Eam insuper laudat n. 14. & 17. ejusdem Enarrat. & Serm. 286. & 354. eam cum Agnete comparans, hanc licet non Virginem, non minus dignam Martyrio pronuntians, quam Agnetem quæ Virgo fuit.*

VIII. Fuit ergo Crispina genere nobilis, divitiis abundans, corpore delicata, sed in Christi Fide quam semper tenuerat, confitenda fortis & robusta. Thagaris ei patria fuit. Virum habuit, ex quo plures filios genuerat: nihilominus omnia propter Christum contemnens, coram Anulino Proconsule accusata & capta, nec filiorum ploratus eam tanquam crudelem & non matrem sed novercam appellantium curabat; sed se ad Judicem rapi, in carcerem detrudi, catenis onerari, in catasta levari, & vitam temporalem amittere pro lucranda æterna summopere lætabatur.

IX. Anno 304. ad Anulinum Thagasten è Thagari ducta ab eo interrogatur, an notum illi sit sacrum præceptum? Cui cum illa diceret se nescire, ait ille: Præceptum est à Dominis Imperatoribus, ut omnibus Diis nostris pro salute eorum sacrifices, Respondit Crispina: Numquam ego sacrificavi, nec sacrifico, nisi uni Deo, & Domino nostro Jesu Christo Filio ejus qui natus est & passus, nec alium novi. Et Anulino comminante, quod si in contumacia perstiterit, incipiet vim Legum invita sustinere; Respondit; Quidquid emerferit, pro Fide mea, quam teneo, libenter patiar. Volebat Judex coram illa legi præceptum; sed cum protestaretur, se non aliud præceptum observare, quam Jesu Christi, Anulinus subjunxit, si non obediens præceptis Imperatorum, perdes caput. Crispina verò ait: Nunquam bene sit illis, ut cogant me sacrificare Dæmoniis: & comminante iterum severitatem Legum, respondit: Quod dicis non timeo; nihil est: at si Deum qui in Coelis est contemsero, sacrilega ero,

Deus me perdet ; & nec inveniar in illo die novissimo . Quid vis ? ut sim sacrilega apud Deum , ut apud Imperatores non sim ? Deus omnipotens est , qui fecit mare herbas & aridam terram & omnia . Et homines ipsi facti ab ipso quid mihi possunt præstare , ut ab eo defendar ? Dii tui ? at isti quid aliud sunt , nisi lapides & figmenta manibus hominum facta ?

X. Anulinus hæc postrema verba tanquam blasphemum accipiens , iussit novacula ei radi crines & decalvari : quod cum impletum esset , Anulinus ei dixit : Diu vivere desideras , an mori in pœnis sicut cætera consortes tuæ Maxima Donatilla & Secunda ? respondit : Si verè mori vellem & in interitum animam meam tradere , & in ignem æternum , tuis Dæmoniis traderem voluntatem meam . Tunc Anulinus , caput , inquit , tibi incidam , si Deos venerabiles adorare despexeris . Sed cum illa nihil territa respondisset : Deus meus , qui est , & qui fuit , ipse me iussit nasci ; ipse dedit mihi salutem per aquam sacri Baptismi ; ipse mecum est , ut anima mea , sicut tu vis , non faciat sacrilegium . Anulinus in eam velut impiam sententiam capitis legi iussit . Quâ auditâ , Beata Crispina ait : Christo laudes ago , benedico Dominum , quia sic de manibus tuis me dignatus est liberare : & ita Martyrium capitis abscissione gloriose consummavit Thebeste 5. Decembris : quod Martyrol. Rom. eâdem die ita celebrat : *Thebeste in Africa Sanctæ Crispinæ nobilissima Femina , quæ temporibus Diocletiani & Maximiani cum sacrificare noller , jussu Anulini Proconsulis decollata est , quam S. Augustinus sæpe laudibus celebrat .*

XI. Porro cum Anulinus , ut supra , memoraverit SS. Maximam Donatillam & Secundam , videntur istæ etiam sub eodem passæ fuisse ante Crispinam . Equidem in Martyrologiis , etiam Romano die 30. Julii legitur : *Tuburbi Lucernariæ in Africa Sanctarum Virginum & Martyrum Maximæ Donatillæ & Secundæ , quarum duæ primæ in Persecutione Valeriani aceto & felle potatæ , deinde plagis acerrimis cæstæ & equulei extensione cruciatæ & craticulis etiam exustæ & calce perfricatæ , postmodum cum Secunda Virgine duodecim annorum ad bestias simul projectæ sed ab his intactæ , novissimè gladio jugulatæ sunt .* Quas Ado & Petrus in Catal. L. 6. cap. 159. dicunt fuisse passas sub Anulino : sed cum istæ dicantur Martyrio coronatæ sub Valeriano vel Gallieno , non sub Diocletiano & Maximiano : & insuper , cum , ut notat Baronius ad diem 28. Julii , plures fuerint Anolini , qui Christianos persecuti variis temporibus fuere , dubium manet , an istæ eadem sint ac illæ , de quibus Anolinus ad

ad Sanctam Crispinam, ut eam terreret, loquebatur.

XII. S. Anastasia Vidua & Martyr, de qua hic loquar, dicitur fuisse filia cuiusdam Prætextati ex Primatibus Romæ Idololatriæ summè dediti, & Mulieris Christianæ nomine Flaviæ, quæ ipsam à nativitate in vera Christiana Religione educavit, Sancto Chrysogono, de quo infra, eam instructe. Matre defunctâ, patre imperante cuidam Pagano Publico nuncupato nubere coacta, Virginitatem quam in votis habebat servasse intactam fertur, ideò à Græcis ut Virgo honoratur. At Publico ejus Viro omnia bona sua cum sui similibus perditis dissipante, ipsa summoperè angebatur, cum ampliùs non posset in usum & opem Fidelium, ut consueverat, erogare; quod tamen ut poterat summâ caritate prosequabatur. Hæc Publius cum rescivisset, eam repentinè sub arcâ custodia reclusit, tanquam Magam & sacrilegam vocans, ac ne quisquam ad eam accederet severè prohibens.

XIII. Hisce in angustiis constituta summoperè tristabatur; & maximè quia cum S. Chrysogono, qui post diversa superata tormenta, in carcere à Diocletiano tunc detinebatur, conversari non poterat. Cogitavit ergo per litteras eum de suis angustiis secretò monere, rogans, ut suis precibus à Deo suam liberationem impetraret; non quia pro Deo pati refugeret, sed quia timebat ne ad ipsi renuntiandum vi cogeretur. Hæc & similia Anastasia scripsit. Quibus per fidam vetulam acceptis, Chrysogonus, postquam cum multis aliis Confessoribus Deum pro ea deprecatus fuit, rescripsit, eam primò adhortans ad fortiter & constanter adversa tolerandum, eique promittens, non multò post Dei adiutorium ei adfuturum. Sed cum hujus promissi implementum aliquandiù differretur, ipsa majoribus angustiis pressa iterum Chrysogono scripsit, rogans, ut repetitis precibus Dei pro quo patiebatur opem imploraret, ut animam suam accipere dignaretur. Chrysogonus verò respondit, eam monens ad perseverandum usque in finem, sub spe vitæ æternæ & Martyrii gloriæ propter Christum consequendæ.

XIV. Quæ de liberatione ab angustiis Chrysogonus Anastasia prædixerat, mox evenere; Publius enim vir ejus Legatus missus ad Persas, in itinere mortuus fuit. Quo Anastasia & sui & suorum bonorum libera Domina electa, in subveniendi Fidelibus in carcere detentis illa ac semetipsam impendere cœpit, eos propriis manibus pascens. Non multò tamen post Romæ domicilium reliquit, ut; Sanctum Chrysogonum Magistrum suum, qui à Diocletiano Aquilejam vocabatur, sequeretur; quod

quod ineunte ætate anni 304. creditur evenisse. Quod perductus Chrysogonus, cum nec promissis nec minis Diocletiani flecteretur, ejusdem iussu capite plexus fuit; ejusque corpus & caput in aquas seu mare propè Gradum projecta fuere: quæ Presbyter Zoilus postea inventa in cavea suæ domus tumulavit.

XV. S. Chrysogoni Martyrium Latini & Græci celebrant. Latini 24. Novembris, ubi in Rom. Martyrol. hæc habent: *Natalis Sancti Chrysogoni Martyris, qui post longa vincula & carceres pro constantissima Christi confessione toleratos, jubente Diocletiano Aquilejam perductus, ibidem capite cæsus, & in mare projectus Martyrium consummavit.* Græci verò die 22. Decembris in Menol. Basil. fusiùs sic de eo loquuntur. *Chrysogonus Martyr ex magna Urbe Roma fuit, Diocletiano Imperatore, vir pius Deumque timens, qui Sanctam Martyrem Anastasiam & fidem in Christum & sacras litteras docuit. Commotà autem Persecutione captus in carcerem conjicitur. Tum verò ad eum scripsit S. Anastasia, ut pro ipsa Deum oraret, ut si Vir suus futurus esset Christianus, viveret; sin minus moreretur, ne opes suas cum Idololatriæ consumeret, sed eas ipsa in Sanctorum pauperumque sumtus expenderet. Quod & contigit; factaque voti compos, omnibus facultatibus in pauperes erogatis, sumtâque pauperis stola circumibat, & ministrabat Sanctis in carcere detentis. Quo tempore Diocletianus ex Urbe Nicæa, ubi morabatur, litteras Romam dedis, ut Christiani omnes interficerentur; Chrysogonus verò ad se ventus Nicæam duceretur; adductum autem decollari iussit. His confirmant Græci, quæ supra dixi. Solum in hoc dissident; quòd S. Chrysogonum dicunt passum Nicææ, ubi Martyrologia eum passum fuisse volunt Aquilejæ.*

XVI. Nunc ad S. Anastasiam revertamur. Hæc Chrysogono Magistro suo orbata, vitam in hoc Mundo protrahabat, ut tandem omnia bona sua in membra Jesu Christi distribueret; Confessorum præcipuè, qui in carceribus detinebantur, curam gerens, Ipsa tandem comprehensa & ad Florum Illyrici Præfectum ducta, ab isto præsentata Diocletiano fuit, qui ad eundem eam remisit, & demum in manus Ulpiani Pontificis tradita fuit. Hic post inutiliter omnibus viis eam tentatam, oculos & vitam amisit. Hujus mors Sanctam Anastasiam libertati restituit: sed paucos post dies iterum comprehensa, in manus ejusdem Præfecti Illyrici remissa fuit, qui post varios eventus, & diversas huc atque illuc remissiones, tandem iussit, ut simul cum quodam Christiano Eutychiano nomine, & 120. reis duceretur in medium mare, ubi impositi in navi perforatâ omnes mergerentur. Sed Deo, qui dissipat consilia hominum, disponente, omnes

nes ad littus incolumes evaserunt . Quo miraculo , cùm rei omnes , qui cum Sancta Anastasia salvi facti fuerant , fuissent ad Christum conversi , Præfectus post varios cruciatus omnes interfici iussit , Sanctam verò flammis tradidit comburendam ; quamvis alii velint quòd ex igne incolumis exiens eam tandem præceperit decollari : sicque agonem suum gloriosè complevit .

XVII. De ea agit Martyrol. Rom. 25. Decembris , plures tum Viros tum Mulieres in Martyrio consortes ei assignans his verbis : *Natalis Sancta Anastasia , quæ tempore Diocletiani primò diram & immitem custodiam à Viro suo Publio perpeffa est , in qua tamen à Chrysogono Confessore Christi multàm consolata & confortata fuit : deinde à Floro Præfecto Illyrici diutinià custodià macerata , ad ultimum manibus & pedibus extensis ligata est ad palos , & circa eam ignis accensus , in quo Martyrium consummavit in Insula Palmaria , ad quam cum ducentis Viris & septuaginta Feminis deportata fuerat , qui variis interfectionibus Martyrium celebraverunt .*

XVIII. Græci verò 22. Novembris in Menol. Basil. fusiùs loquuntur sic : *Anastasia Martyr , Diocletiano Imperatore Roma claruit , divitibus ac nobilibus parentibus nata , atque à Matre Fidem Christi edocta , à Chrysogono verò Christianorum Doctore sacris Litteris instituta . Virum autem duxerat Publium nomine , divitem quidè sed ethnicum . Quòd igitur Christianus non esset , eum Anastasia oderat , nec ullam ei corporis sui potestatem faciebat : erat autem benigna & liberalis in pauperes , eosque qui in vinculis detinebantur visitabat . Quamohrem in carcerem à Viro suo detruditur . Sed mortuo eo , dimissa , omnibus facultatibus suis in pauperes distributis , sedulam Sanctis operam dabat , Martyrio defunctos sepeliebat , multos ad perseverendum Martyrium impellebat . Quare à multis diverso tempore Præfectis excruciatà , deinde in mare , postea in ignem injecta , sed incolumis inde evadens , tandem unà cum iis quæ secum erant , mulieribus decollatur . Ita Græci , qui S. Anastasiam decollatam volunt , & cum ea solas Mulieres memorant .*

§. XXXI.

SS. Cyprianus Antiochenus & Justina Martyres .

I. **C**ypriani nomen illustre in Ecclesia reddidit , nedum Africa in suo Cypriano Carthaginensi Episcopo cuius præclara Gesta & Martyrium supra enarravi Cap. 11. §. 6. , verum etiam Oriens

Oriens in altero Cypriano Antiocheno Episcopo. Non latet, S. Gregorium Nazianzenum Orat. 18. visum fuisse Cyprianum Carthaginensem cum Antiocheno confundere, dum illi tribuens quæ huic conveniunt, dicit, illum ante conversionem fuisse Magum, & infano amore Justinam Virginem Antiochenam deperisse; sed ab ea fuis ad Deum precibus fuisse tandem ad Fidem conversum. Attamen S. Gregorium in hoc aliquâ æquivocatione laborasse ostenditur, quia Pontius, qui ejus vitam conscripsit, non solum de ejus Magia & vesano amore ante conversionem nihil dicit, sed expressè ait, studia & bonas artes devotum pectus ejus imbuisse. Lactantius insuper Augustinus & Hieronymus Rhetorem quidem & Oratorem eum fuisse dicunt, sed Magum nunquam, nec Justinæ Virginis vel verbo sermonem faciunt. Accedit, quod Cyprianus ipse in Epist. ad Donatum ubi conversionem suam narrat, si hisce nævis inquinatus fuisset, Vir humilis certè non dissimulasset.

II. Diversum ergo esse à Cypriano Carthaginensi Cyprianum Anthiochenum, demonstratur ex diversitate temporis, Provinciæ, Civitatis, Judicis, diei & circumstantiæ Martyrii. Nam Carthaginensis sub Valeriano & Gallieno in Africa, Carthagine sub Galerio Maximo, comitibus Crescentiano & aliis tribus, 18. Kalend. Octobris passus est. Antiochenus verò sub Imperatore Diocletiano, in Bithynia, Nicomediæ, sub Judice Eurholmio cum Justina Virgine sexto Kalend. Octobris. Uterque Episcopus fuit, sed unus Carthaginis in Africa, alter Antiochiæ. Omnem tamen scrupulum tollit auctoritas Ecclesiæ, quæ de utroque diversis, ut supra, diebus celebrat, & diversa de utroque refert, ut ex Bedæ, Adonis, Ufuardi, & Romano Martyrologiis apparet; quibus subscribunt Raphael Volaterranus, S. Antoninus, Vincentius Bellovacensis, Hermannus Contractus, & Critici recentiores quasi omnes.

III. His statutis: hujus S. Cypriani & S. Justinæ ejus in Martyrio sociæ historiam metricè scripsit Eudocia Leoncii filia, & Theodosii Junioris uxor anno 471. tribus libris; quorum compendium exhibet Photius in Biblioth. Cod. 184.. Extat etiam ejusdem Cypriani Confessio in Anglia manuscripta reperta, quæ ad calcem Operum S. Cypriani Edit. Maurinæ legitur. Ex his monumentis colligitur, quod hic Cyprianus origine Antiochenus fuit, genere & divitiis clarus, ingenio etiam præditus; quo tamen ad sacrilegia addiscenda & patranda diù abusus fuit. Ex parentibus idololatriæ natus, ab eis vix septimo ætatis anno Mithræ mysteriis hoc est Dæmonibus offertur, atque in omnibus

nibus cæremoniis sacrilegis ac studiis superstitionis præsertim Magiæ educatur; adeoque in hoc profecit, ut nemo unquam in Paganismi mysteriis ac Dæmonum præstigiis magis instructus evaserit. Ad hoc divitias impendit, labores sustinuit, itinera assumsit. Athenas annum agens decimum à parentibus ductus, ac Civis factus, in Cereris mysteriis facem prætulit. Montem Olympum Deorum, ut aiebant, sedem ascendens, ibi Dæmoniacas omnes abominationes vidit. Athenis Argos transiit, inde in Phrygiam, ubi ad divinandi & haruspiciandi magicamque artem pertinentia multa collegit.

IV. Postea annos natus viginti Memphim in Ægyptum venit, penetrans usque ad Indos, ubi mirabilia omnia & phantastica, quæ ars dæmoniaca facere potest, se vidisse narrat. Jamque ad ætatem triginta annorum pervenerat, cum in Chaldaam progressus, ejusque Gentis litteris ac mysteriis institutus, astrologicis & magicis illusionibus summè imbutus fuit. Non solum enim sub diversis phantasticis figuris Dæmones frequenter se conspicuos ei reddebant, honoribus ac blanditiis eum demulcentes; sed & ipse identidem diversas formas assumens uni sub una specie, alteri sub altera apparebat; quam deinde repente visibilibus mutabat, ut omnibus admirationi simul ac terrori esset, & veluti Deus, aut saltem Jesu Christo major ab obscæcatis Populis haberetur.

V. Quamvis Magia maximum in se crimen esset, Cypriano tamen initium & fons aliorum immanium criminum fuit. Nam modò ut opera sua magica impleret, modò ut petentibus ac Dæmonibus ipsis satisfaceret, Viros, Mulieres, pueros, ac præsertim magno numero infantes occidebat, horumque sanguinem velut victimam Dæmoniis offerebat. Porro enormibus criminibus ad alia enormiora viam parabat, ut sive propriæ sive amicorum cupiditati avaritiæ & impuditiæ deserviret, & maxime expugnandæ Virginum castitati & sacris matrimonii legibus violandis; ad hæc enim obtinenda Pagani plerumque incantationes adhibebant. Sic Cyprianus totus pro Dæmonibus, totus contra Deum erat. Fatebatur tamen invitus, solos Christianos esse, in quos sua maleficia nihil possent. Quia verò tempus Dei nondum advenerat, ejusmodi experienciâ nil movebatur, sicut nec cujusdam Eusebii monitis (qui cum eo humanioribus litteris studuerat & fidelis servus erat) nec assiduâ consideratione, quòd potentia Dæmonis nisi ad malum tenderet ac injustitias: imò in obstinata sua cæcitate persistens Christianos summo odio habebat, Sacras Scripturas irridebat, Ecclesiæ

Ministros, Sacramenta contemnebat, Jesum Christum blasphemabat, Virgines & nuptas calumniis atrocibus denigrabat. Factus proinde Veritatis Persecutor, eâ quâ pollebat eloquentiâ & auctoritate, Fideles omnes ad renuntiandum Evangelio & Baptismo adigere conabatur: multos etiam suâ impietatis discipulos coegerat, quos in suis detestabilibus operibus erudierat; imò & plures ab amplectenda Religione Christiana suis apparentibus prodigiis deterrebat.

VI. Talia erant Cypriani merita, quæ amplam ad æternas inferorum pœnas ei viam parassent, ni Deus velut alterum Saulum in exemplum suæ misericordiæ illum assumere decrevisset, & ut ipsum à captivitate Dæmonis ac suarum passionum eriperet, ipsos Dæmones ipsasque passiones, quibus ante servierat ad omnia detestanda, inscrutabili judicio adhibuisset. Quomodo autem hoc evenerit, dicam.

VII. Erat quædam Virgo genere nobilis, pulchritudine speciosa nimis, Justina nomine, ex eadem quâ Cyprianus Antiochiæ Civitate. Primò quidè Pagana fuerat, sed postea ad Christum conversa secum etiam parentes suos ad Fidem traxit. Virginitatem, quam Deo voverat, summâ cautelâ custodiebat. Hoc tamen impedire non poterat, quin aliquandò ejus promissitas oculis hominum appareret. Quare juvenis quidam Paganus nomine Aglaides eâ accensus varias tentavit artes, ut eâ ad suam exsaturandam libidinem potiri posset. Sed cùm omnes conatus inutiles experiretur, ad Cyprianum confugit, putans, illius magica secreta ad expugnandam Virginis castitatem valida fore. Cyprianus, tum ut amicis, tum ut propriæ passioni satisfaceret, libenti animo opus aggressus est. Omnem ergo Magiæ vim exercuit, & ut Dæmonem ad satisfaciendum passioni, cujus ipse auctor erat, magis accenderet, nova crimina ei promissit, adorationes nempe & sacrificia. Nec defuit inferorum auxilium, paratos enim omnes Dæmones habuit, quorum violentiores ac impuriore ad tentandam Virginis castitatem mittebat: adeò ut (fatetur ipse in sua Confessione) omnes Dæmonum species, ipsum eorum principem, per dies septuaginta miserit.

VIII. Justina obscenâ hâc & continuâ obsidione agitata, defensionem sui unice à Deo precibus postulabat, ac Virginis Deiparæ in suâ castitatis tutelam opem implorans, super nudam humum cubans ac jejuniis se macerans, decorem vultus, à quo illi tantum periculum imminebat, extenuare conabatur, hisce macerationibus Divinam se flectere misericordiam sperans: quod

quod ei feliciter contigit , nam Dæmon signo Crucis victus ab ea fugiebat . Cyprianus tamen nondum animo destitutus Dæmones iterum provocavit , seipsum transmutavit in Feminam ; sed ut primum attigit Justinæ vestibuli januam , e mentita forma evanuit & Cyprianus remansit . Aglaidem aliquandò mutavit in passerem , qui cùm super fenestram Justinæ volasset , eumque illa conspexisset , statim periit forma passeris , ac miser Algaides ex alto stans periisset , nisi Virginis misericordiâ leniter per scalam demissus fuisset , quæ hortata ut Deum coleret , è vestibulo illum eiecit .

IX. Victus sed non animo fractus Cyprianus (seu veriùs Diabolus) variis morbis ac ærumnis illam & parentes ejus vexavit , sed invictam semper invenit (rem narrat in sua Confessione Cyprianus ipse) , „ Illam à Medicis desperatam plorabant patres , rentes ; sed illis ipsa dicebat : ne lugeatis , non enim moriar , „ nec animo deficio aut quidquid dolco , nec ullum morbum „ sentio , nisi fortè levem quemdam calorem tamquam ex aere „ mihi transmissum „ . Alia contra ipsam tentarunt Dæmones , sed ipsa signo Crucis se muniens eorum pellebat operationes . Hinc ad parentes conversi , eorum greges boves & jumenta occiderunt ; illa autem hortabatur , ne animum desponderent aut desperarent : ac prudenti ejus consilio evenit , ut multò plura reciperent , Deo iis qui superfuerant benedicente . Populo pestem immisit Diabolus , ac oraculum dedit , non fore liberandum nisi Justina Aglaidi jungeretur . Verùm clamantem Populum Justinæ compressit oratio & pestem simul ab Urbe propulsavit . Quibus animadversis , immutati Cives Christum celebrabant , ac Cypriano velut Urbis insidiatori convitiabantur , itaut ipse latenter prodiret & notorum occursum metueret .

X. Quare Dæmon ipse Cypriano ingenuè confessus fuit , se adversùs Justinam nihil posse . Cyprianus tamen propriâ passione & Aglaidis importunitate cruciatus Dæmonem rogavit , ut saltem ab Aglaide animum de Justina imposterum cogitandi auferret . Statim igitur Princeps Dæmoniorum Spiritui fornicationis præcepit , ut Aglaidem liberum dimitteret , eum omni libidinis actu erga Justinam exueret : at ille sibi hoc non licere respondit , posse quidè à bono ad malum inducere hominem , sed illum è malo restituere in bonum non posse . Videns Cyprianus , nullum sibi extare remedium , furore suæ passionis agitat , Dæmonem injuriis onerare cœpit , eumque etiam colaphis percutere tentavit . Dæmon timens , ne homo sibi adeò utilis cum desereret , sub Justinæ specie ipsum adiit , quasi ejus volunta-

ti ipsa tandem obtempersset. Sed Deus volens suæ famulæ honorem simul & castitatem fartam testam tueri, fecit, ut dum Cyprianus eam alloqui inciperet, vix pronuntiato Justinæ nomine, totum illud phantasma evanesceret.

XI. Tot tantisque excussus experientiis, Dei gratiâ oculus ejus aperiente, Dæmonis fraudes & impotentiam dignoscere & contemnere cœpit, ac simul detestari magicæ artis tum impietatem, quæ nisi ad crimina deserviret; tum vanitatem, dum tota ejus potentia coacta fuerit cedere puellæ alia arma non habenti quàm purum Christi signum. Unde ad Diabolum conversus, aiebat: „ Si te umbra Christi vincit, quid facies si ipse adveniat? si tantum nominatur Christus & tremis, quid facies si ipse te aggredi velit? si signum illius passionis infirmum te facit, coram illius potentia ubinam eris? si signat, nec aus des accedere ad limitem ejus, quosnam igitur poteris ex manu illius eripere? nihil es & nihil habes solidi ad defensionem, nihil potes &c.. „ His aliisque impropriis irritatus Diabolus irruit in Cyprianum, & eum suffocare conabatur: cum verò Cyprianus viribus imparem ad ei resistendum ac sensim deficientem se agnosceret, memor illius signi, quo Justina utebatur: Deus Justinæ, inquit, auxiliare mihi; & statim vires ei accesserunt. Diabolus autem ab eo velut telum recessit, sed stans ac tenens gladium eum occidere minabatur. Cyprianus autem Christi signi vim jam expertus, majori confidentiâ eo se munire & Christum invocare cœpit. Tunc ab eo discessit Diabolus minabundus ac dicens: „ Non te salvabit ex meis manibus Christus, nam detestatur impios, & nunc per dolum tibi auxiliatur, ut te morti tradat. Cum te ergo projecerit, ego tibi ostendam, quid sit meum imperium contemnere. Cares igitur meâ gratiâ, nec quidquam te ille juverit, cum meos non admittat.

XII. His Diaboli verbis exterritus Cyprianus anxie cœpit timere ac inquirere, an Christus placatus eum recepturus esset ad pœnitentiam. Opportunè illi præstò fuit quidam servus Dei nomine Timotheus, qui ab hoc Dæmonis fraude incusso timore eum liberavit: ostendens ei, hoc esse fraudolentum Dæmonis mendacium, nec Jesum Christum cuiquam illudere; nec quemquam etsi impium, ad se tamen sincero corde accedentem, & verè pœnitentem respuere, sed benignè suscipere & amplecti: Ipse enim fallere nescius juravit, se peccatores ad se revertentes ac crimina detestantes quâcumque horâ recepturum; imò & ad hoc venisse, suamque Incarnationem, Passionem & Mortem argumentum esse suæ erga impios misericordiæ, dum in Cruce

pendens, etiam pro se crucifigentibus veniam à Patre suo imploravit. His & similibus confortatus Cyprianus novum proficiendi in viam salutis robur concepit; quia enim suis illusionibus multos deceperat, solemnem coram omnibus criminum suorum ac prolixam confessionem cum gemitibus ac lacrymis emisit.

XIII. Nihilominus Dæmon adhuc non desperans, ex ipsa sua poenitentia novam eum tentandi occasionem sumsit. Omnia ejus enormia crimina in mentem ejus congestit, ac ex eorum gravitate tantum horrorem illi instillare studuit, ut de venia penè desperaret. Persuasus de veritate Dei Christianorum, se indignum esse, ut ad eum accederet, existimabat. Quare ante ipsum se prosternere, & sibi mortem consciscere quasi statuerat, potius quàm in vita tot foedatâ criminibus perseverare. Lacerabat sibi propterea vestes, caput cineribus operiebat, & se in terram dejiciens, gemitibus & lacrymis exclamabat: me miserum! me maledictum! perditus sum: qui verò circumstabant Christiani eum lacrymis comitabantur.

XIV. Jam tres dies absque cibo & potu in hoc statu transegerat; cùm misertus Deus Eusebium veræ pietatis magistrum velut Angelum misit, qui Divinis oraculis ac sacris historiis atram diffidentiae nubem, quâ spiritus ejus tegebatur, dissiparet, & spei lumine illustraret: quod his verbis fecit: „ Crede „ mihi Cypriane, qui te fallere nolo. Multos novi, qui cùm „ ad Christum non præclare factis, sed tamen animi affectibus „ accederent, suscepti fuere. Magi erant illi, & suscepti sunt, „ tu quoque Magus eodem prorsus modo ac illi recipieris. „ Peccata tua majora fortè sunt quàm peccata illorum; at nun- „ quid misericordiâ Dei majora sunt? Quousque igitur te ipse „ cædis & ulcisceris, quamvis admodum infirmâ valetudine? „ Vide, ne in hanc quoque desperationem Diabolus te conse- „ ceris: versutus enim est: id quod tibi apertius est quàm mihi. „ Invoca Christum, & ejus misericordiam experiere. Tempo- „ re non indiget, sed cordis compunctione &c.

XV. His & similibus victus Cyprianus, sed non plenè, dixit, de criminibus in Justinam patratiss se maximè angî, propter quam puerorum cadem & jecoris in mulieribus inspectionem & alia nefariæ artis facinora commisit: propterea optare se, ut ex Scripturis Christi ostenderet, an ex iis, qui similem impietatem professi sunt, conversum aliquem suscepit. Tunc Eusebius proposuit exempla Sanctorum Pauli & Petri, Nabucodonosoris & Manassis, qui etsi gravissimorum criminum rei, poeniten-

tentes suscepti fuere, & similes ab Ecclesia in dies suscipi ostendit; quia nullum est crimen adeò atrox, quod per Baptismum penitus non deleatur. Tandem ipsum adhortatus, ut aliquo alimento, à quo per triduum prorsus abstinuerat, se reficeret: promisit, se ad Ecclesiam immediatè ipsum adducturum, & ad Presbyteros, qui omnibus Divini Verbi veritatem sine fastu & fuco communicant, & post hæc Episcopo se eum presentaturum.

XVI. His auditis Cyprianus decurrit ad Eusebium, eumque complexus, collum caput & pectus exosculatur, patrem suum eum vocans. Eusebius secum illum ducens à triduo jejunioreficiendum curat, & sequenti die ante lucem in Ecclesiam perducit. Obstupuit, & quasi extra se raptus fuit Cyprianus videns ibi super terram cœtum prorsus cœlestem, & Populum simul unitum, audiens laudes Deo canentem tanto vocum concentu & consonantiâ, ut ex omnibus una vox confici videretur. Fideles vicissim viso introeunte in Ecclesiam Cypriano converso ac humiliato, admirati, de hoc prodigio gratias Deo agebant. Solus Episcopus illum rejecit, ac ejus ingressui diù resistit, sibi persuadere non valens, talem hominem Religionem Christianam sincero & vero corde amplecti velle. Sed Cyprianus evidens signum suæ veræ conversionis ei dedit, quando postridie congestos libros Magicos, quos apud se retinebat, publicè omnes Episcopi jussu combussit; & meritò, hoc enim unico testimonio conversionis sinceritas probari poterat: quod & tempore S. Pauli fecerunt Ephesii Act. 19. v. 19. Hoc idem S. August. ad calcem Psalmi 61. factum dicit cum quodam Mathematico: *Quia talis est ars, in qua exercitatus erat, quæ suspecta esset de mendacio atque fallacia, dilatus est ne tentaret, & aliquandò tamen admissus est ne periculosius tentaretur.*

XVII. Non contentus tamen Cyprianus, omnes suos Libros in poenitentiae testimonium combussisse, omnia sua bona Christo immolare voluit, ea in pauperes distribuendo; & tandem ab Episcopo Fidem apprimè edoctus, per Eusebium obtinuit cœtui Fidelium uniri, & signo Domini per Baptismi lavacrum muniri. Porro Eusebius, qui in tentationibus illum sustinuerat, magnam apud Deum remunerationem obtinuit, decoratus etiam Sacerdotii dignitate (si tamen antea non erat, quod non est certum). Aglaides quoque, propter quem Cyprianus tot crimina incassum patrauerat, cognitâ Dæmonum fraude, distributis in pauperes bonis suis, Christianus & ipse factus est. Justina verò tanto jubilo Cypriani conversionem audivit, ut lampadem accenderit, capillos ut eos Deo offerret sibi totonde-

derit , ornatus omnes muliebres , & quicquid ei in dotem contingere poterat , vendiderit , pretio in pauperes distributo . Parentes quoque ejus propriam domum in servitium Ecclesiæ Deo consecraverunt . Omnes demum Fideles hanc Sanctam Virginem & Eusebium tam sancti operis ministrum summâ veneratione prosequébantur .

XVIII. Interim Cyprianus totus à priori diversus , amore Dei repletus , & præteritorum criminum odio vera suæ respicientiæ testimonia palàm exhibebat . Modestus ac humilis erat in vestibus , omnia terrena contemnens , primus in vigiliis & aliis carnis macerationibus & pietatis operibus ; & qui postremus Christi viam ingressus fuerat , omnibus , qui à longo tempore eam calcaverant , præcellebat . Ut autem superbiam humilitate contereret , petiit & obtinuit , ut purgandi ac verrendi Templi cura sibi demandaretur , seu ut ait Eudocia apud Photium Cod. 184. Templi janitor destinaretur . Quibus & aliis Deo ita acceptus evasit , ut Charismatum donis ornatus , morbis alios , Dæmonibus alios liberaverit , nedum à corporum sed & animarum possessione Dæmonia ejiciendo , ac plures ad Christi Fidem trahendo . Et tandem meritis aded cumulatatus fuit , ut ad Ecclesiam Antiochenam post Antimum regendam elevatus fuerit .

XIX. Quid in Episcopatu gesserit , historiæ non produnt ; unde ad ejus Martyrium nobis transeundum erit , quod sub Diocletiano creditur contigisse simul cum S Justina . Captus ergo Antiochiæ fuit , & ad Judicem seu Phœnicie Præsidem (ut creditur) Antolmum nomine , Tyri residentem raptus . Justina pariter , quæ Antiochiâ relicta Damasci Christi Fidem publicè prædicabat , comprehensa coram eodem Judice adducta fuit ; disponente Deo , ut illam , per quam Cyprianus gratiam Fidei hauserat , haberet in corona sociam ; & in Martyrio haberet comitem , quam in crimine non potuit habere consortem . Cum ergo neuter impii Judicis sermonibus obedire vellet , Justina nervis bubulis cæsa fuit ; Cyprianus autem in aere suspensus unguis ferreis lateribus apposis laceratur . Verùm cum his suppliciis eorum constantia non moveretur , utrumque in carcerem separatim amandavit . Unde postea evocatos cum verbis frustra tentasset , in aream sartagine , pice adipe ac cerâ in eadem simul mixtis , multoque igne accenso , Martyres Dei conjecit .

XX. Ibi cum Athletæ illi fortiter perdurarent , ac potius velut in rore Deum , quod tormentis superiores evasissent , lati lau-

laudarent, Athanasius quidam Dæmonum Sacerdos Cypriano antea familiaris, & assessor tunc fortè Judicis tormenta inferentis, mentis cæcitate correptus, ausus est Deos suos familiares invocans in ignem & ipse ingredi: sed dum miraculum extenuare nititur, si & ipse sine noxa ibidem perduraret, magis illud auxit, confestim enim ab igne consumtus in cinerem versus est.

XXI. Hæsitans ergo Judex decrevit Martyres ad Diocletianum mittere, & ad eum, tum quæ pertulissent tormenta, tum quemadmodum pœnis essent omnibus superiores, perscribere. Quæ cum Imperator Nicomediæ intellexisset, præcepit Martyres ad vicinum Urbi flumen, cui Gallo nomen, capite truncari. Hætenus Eudocia apud Photium: quæ addit, quòd Theoctistus quidam cum Cyprianum salutasset, ex hoc deprehensus quòd esset Christianus, eâdem horâ Martyrium cum Cypriano & Justina passus fuit. Is fortè cum quibusdam nautis similiter Christianis Româ advenerat: qui nautæ non obstante, quòd Infideles Martyrum Corpora custodirent, ne humarentur sed à bestiis vorarentur, clam eadem abstulerunt, & navi imposita Romam asportarunt. Sed cum Romæ quoque Persecutio vigeret, apud piam quandam Matronam aliquandiù abscondita remanserunt, donec à Rufina, quæ generis stirpem à Claudio II. Imperatore repetebat, in honorem prædictorum Martyrum magnificum Templum propè Claudii Forum excitatum fuit. Hic admirare Lector Dei potentiam, quæ omnia Diaboli machinamenta dissipavit, Cypriani pravam voluntatem sibi subegit, & Justinam, quam volebat in crimine, fecit ut haberet in gloria Martyrii consortem. Horum memoria in Martyrol. à Latinis colitur die 26. Septembris; in Menol. autem Græco Basilii die 2. Octobris.

§. XXXII.

SS. Julitta Quiricus Januarius Sosius & socii.

SANCTA Julitta Iconii nata ex illustrioribus Licaoniæ familiis, & Regio veterum illius Regionis Principum, ut aliqui putant, sanguine originem traxit. Religione Christiana erat: cùmque Iconii nupsisset, genuit filium nomine Quiricum, seu ut aliqui putant Ciryum vel Cyrum. Hic trimulus erat, cum mater Julitta, ut Persecutionem, quam Domitianus homo ferus Diocletiano imperante ibi exercebat, declinaret, Licaoniam omniaque sua bona reliquit, secum afferens infantem filium

filium ac duas ancillas , & Seleuciam se contulit . Sed dum vitavit Carybdim , incidit in Scyllam ; Alexander enim Seleuciam Præses , novis à Diocletiano acceptis Edictis , crudelius in Christianos agebat : quare Julitta consilium Christi secuta , Seleuciam deseruit , & unâ cum filio & ancillis Tarsum aufugit .

II. Porro Deus , qui eam coronare disposuerat , fecit ut idem Alexander , cujus sævitiem declinaverat , à gubernio Seleuciæ ad Ciliciæ regimen , cujus Tarsus Urbs præcipua erat , non diù post transferretur . Is ergo Julittam comprehensam ad se adduci jussit : affuit illa suis ulnis tenellum puerum gestans , ancillis interim fugientibus & quid ageretur spectantibus . Illa tribunali adhibita , ac nomen fortunam patriamque ab Alexandro rogata , fidenti animo respondit : *Christiana sum* . Irâ itaque accensus Alexander è brachiis ejus abripi infantem & ad se adduci , matrem verò , composito atque distento super equuleo corpore , nervis bubulis crudeliter cædi mandavit . Puer à matre avulsus totus in eam gestiens nec oculos ab ea divellens ploratibus ad eam clamabat ; Illa autem dum atrociter caderetur , id unum dicebat : Christiana sum , nec Dæmoniis unquam immolabo . Infantis ejulatibus commotus Præses cum manu accepit , tum blandè delinens à fletu cohibere nitebatur , genibusque impositum osculari tentabat : sed puer intentis in matrem luminibus , Præsidem abs se submovebat , & caput avertebat , manibusque obnitens ei faciem unguiculis scalpebat , ac veluti turturis pullus , eandem quam mater vocem pronuntians , clamavit : *Christianus sum* : calcibus quoque Judicis latus incompotè petens ab ejus manibus evadere conabatur . Quare Alexander pedis ictu ex alto tribunalis puerum ad terram dejecit ; unde collisos ad graduum angulos atque contrito capite , aream cruore opplens felicem spiritum ad cœlestem gloriam emisit .

III. Hoc viso Julitta mater , nedum non plorans , sed gaudio repleta gratias agebat Deo , quòd filium suum ad coronam præmisset . Ejus jubilus Alexandrum furore accendit ; qui proinde Ministris jussit , pendenti in equuleo validè fodi latera , & ex lebetè haustam picem bullientem pedibus affundi : comminatus , ni Diis sacrificare statueret , eandem quam filius malam necem reportaturam . Sed cum illa respondisset , se Dæmonibus ac mutis statuis numquam , sed soli Christo sacrificaturam , & festinare assequi filium suum , eique sociam fieri in Regno Cœlorum ; insanus Judex sententiam capitis in eam pronuntiavit , & quòd filii corpus inter damnatorum corpora projiceretur . Confestim ergo ministri ad solitum carnificinæ locum eam duxe-

re. Quò cùm pervenissent rogavit Iulitta, ut sibi brevis precandi mora concederetur, quâ expletâ, caput ei licitor absceidit, projecto corpore extra Civitatem, ubi etiam filii corpus positum erat. Contigerunt hæc 17. Kalend. Augusti seu 16. Julii anno Christi verius 305.. Postridie verò ambæ ejus ancillæ sublata noctu cadavera in Tarsi Urbis agro procul deposita condidere. Cùmque ad tempora Constantini datâ Ecclesiæ pace altera ancillarum superstes esset, locum manifestavit, ad quem accurrentes Fideles sacrorum pignorum reliquias ad sui præsidium asportarunt.

IV. Hæc omnia ex Epistola Theodori Iconii Episcopi desumpta sunt; qui protestatur, ea sincera esse, & à fabulosis qui circumferebantur libellis discreta; iisque propterea Ruinart, aliique Critici omnimodam Fidem adhibendam esse censent. Hoc dixi, ne quemquam offendant, quòd inter libros à Gelasio I. in Concilio Romano ad apocrypha mandatos velut ab Hæreticis conscriptos, legatur *Passio Quirici* (seu Ciryci) & *Iulittæ*: nam ista Theodori ab illis diversa sunt, & fabulis ab Hæreticis fortè Manicheis insertis repurgata; cùm enim Episcopus quidam Zenon seu Zozimus nomine ferre non posset, quòd illa scripta tot fabulis indignis ac Fidei contrariis referta circumferrentur, præfatum Theodorum Iconii Episcopum rogavit, ut si fieri posset Acta horum Martyrum sincera inveniret. Quod ille præstitit: & ex iis, quæ aliqui Justiniani Imperatoris Ministri ex eadem Sanctorum Martyrum familia originem trahentes, Majorum suorum Traditione acceptâ narrarunt, antiquis etiam consona monumentis, prænarratam Epistolam conscripsit.

V. In hanc consentit utraque Ecclesia. Latina in Martyrol. 16. Junii his verbis: *Tarsi in Cilicia Sanctorum Martyrum Quirici & Iulittæ matris ejus sub Diocletiano Imperatore: quorum Quiricus triennis puellus, cùm matrem, quæ arte Alexandrum Præsidentem nervis dirissimè cadebatur, implacabili luctu lugeret, ad gradum tribunalis illisus interiit. Iulitta verò post dira verbera & gravia tormenta Martyrii sui cursum capitis obtruncatione complevit.*

Græca verò in Menol. Basil. die 15. Julii fusiùs hæc habet: *Martyr Christi Iulitta ex Urbe Iconio Diocletiano Imperatore clauit. Glisciente autem Iconii Persecutione, unâ cum filio Cyrice trienni puero Selesciam contendit, eandemque ibi Persecutionem offendens, Tarsum profecta est: ubi etiam Alexander Præfex homo crudelis & ferus Sanctos exagitabat. Comprebensa itaque & à puero separata tormentis subijcitur. Puero autem super genibus posito*

posito Præses interim blandiebatur : at ille averſo ab illo ore , deſignoque in matrem obtutu , balbutiente voce nomen Chriſti appellabat , & ad matrem abire conabatur . Quare ab immiti ſerâ calcibus truſus & per gradus deſectus , colliſo ad petram capite contritoque , exanimatus eſt . Mater verò Deum glorificans , poſt plures cruciatus etiam ipſa capite plexa fuit . Ita Græci : quæ in ſubſtantia concordant cum ſupra enarratis ex Epiſtola Theodori .

VI. Nunc de S. Januario Epiſcopo Beneventano & Sociis , quorum Martyrium refert Baronius in Annalibus , & in Notis ad Martyrol. 19. Septembris , ad annum 305. , quem plerique Recentiores ſequuntur . De S. Januario ante Epiſcopatum nil , ſaltem certi , habemus . Dum ergo Beneventi eſſet Epiſcopus , aderat in Eccleſia Miſeni olim Urbis Campaniæ propè Neapolim quidam Diaconus nomine Soſius , cujus virtutis fama adeò celebris erat , ut quamvis admodum juvenis eſſet trigefimum ætatis annum vix attingens , S. Januarius tamen ad eum frequenter accederet , quò ad pietatis ſtudium magis inflammaretur , & domeſticâ ejus converſatione lumina neceſſaria ab bene inſtruendum Populum ſibi commiſſum compararet . Cùmque aliquandò eum in Eccleſia Evangelium canentem comperiſſet , vidit caput illius undique flammis circumdatum , ex quo prædixit eum Martyrio fore coronandum . Quod non diù poſt impletum fuit ; cùm enim Dracontius Provinciæ Præſes Miſenum veniſſet , incitatus ab aliquibus virtutis inimicis , Soſium comprehendendi juſſit ; & videns ejus in confeſſione nominis conſtantiam , flagellis caſum Puteolos traduxit carceri mancipandum , Ibi ad eum viſitandum & confortandum S. Januarius , & ulterius Proculus Diaconus Eutices & Acucius Puteolani Cives frequenter conveniebant . Hoc cùm Dracontius reſciviſſet , eos ad ſe adduci juſſit , & crudeliter caſos in carcerem detrudi .

VII. Adhuc in carcere Sancti Martyres detinebantur , cùm Diocletianus ſucceſſorem in gubernio Dracontio Timotheum miſit . Novus hic Præſes Nolam adveniens , ac reſciens caritatis officia ; quæ erga Soſium S. Januarius exercebat , ad eum comprehendendum miſit , & comprehenſum in fornacem ardentem injici juſſit ; ex qua cùm illæſus omninò (ut fertur) evaſiſſet , poſt immanem nervorum torturam in carcerem conjecit .

Interim Feſtus ejus Diaconus & Deſiderius Lector , auditi Januarii ſui Epiſcopi capturâ , Nolam venerunt . Ibi & ipſi deſcendenti unâ cum Januario coram Timotheo præſentati fuere , quos Januarius ſuos ac de ſuo Clero eſſe conſeſſus eſt . Quare Timotheus vinculis oneratos ante ſuum curram Puteolos uſque duci

mandavit, ut ibi unâ cum aliis ibi detentis, bestiis exponerentur. Sequenti ergo die in Amphitheatrum ducti fuere; sed cum nulla ex bestiis immixtis eos læsisset, Timotheus Populi commotionem sedare volens, ex Amphitheatro in medium forum eductos omnes capite truncari præcepit: quod illicò impletum fuit.

VIII. Ad sacra præfatorum Martyrum Corpora elevanda ex diversis Urbibus Fideles certatim venerunt. Sancti Proculus Eutices & Acucius Puteolis remanserunt, S. Januarius Neapolim delatus fuit, Festus ac Desiderius Beneventum asportati fuere; Sosius verò Misenum, ubi in Ecclesia magnifica in ejus honorem erecta postmodum repositus fuit. Si tamen Joanni Diacono credimus, S. Januarii corpus non illicò intra Neapolim delatum fuit, sed solum circa annum 400. Severus Neapolitanus Episcopus & Joannes ejus successor è loco quodam prope Puteolos ad Ecclesiam apud Neapolim transtulere. Ut ut sit, Corpus S. Januarii modò Neapoli in Ecclesia Metropolitana summâ celebritate colitur.

IX. Gloriosum S. Januarii & Sociorum ejus agonem recolunt ac venerantur die 19. Septembris non solum Latini in Martyrol., sed & Græci eâdem die, qui in Menolog. illum ita laudant: *Sacro sanctus Martyr Januarius unâ cum Sociis Diocleziano Imperatore claruit. Erat autem Urbis Beneventi Episcopus: ob Christi verò confessionem in vincula Puteolis conjectus fuit unâ cum Sosio, Proclo, Eutychio & Acustio Diaconis. Timotheus autem Regionis Præfectus Puteolos profectus, cum Sanctum in vinculis reperisset, è carcere eductum in caminum iniecit. Sed cum inde illæsus & incolumis evasisset, majori furore correptus, præcepit lictoribus, ut nervos pedum ejus præciderent. Quod supplicii genus cum Sanctus fortiter pertulisset, iterum in custodiam conjicitur. Cum autem Festus & Desiderius Clerici ex Urbe Benevento visitandi cum causâ venissent, comprehensi & ipsi, vinculis unâ cum Episcopo & Diaconis in carcere cōstringuntur. Indè educti & ad bestias damnati, neque ab iis læsi, Præfecti jussu capite plexi sunt.*

X. Baronius in Notis ad diem 19. Septembris refert, ex quadam pervetusta Homilia in sua Bibliotheca asservata, & confirmat ex Marcellino Comite antiquo Chronographo in Chron. sub Conf. Leone Augusto quartum & Probianum Indict. 9. ad ann. 471. vel 472.; quòd Vesuvius mons Campaniæ intestinis ignibus æstuans tantâ flammarum copiâ erupit, ut nedum proximæ adjacenti Civitati, ac circumpositis Regionibus, sed toti ferè Europæ conflagratio imminere videretur; quæ S. Januarii

patrocinio à Populis invocato fuit compressa. Cujus prodigii memoria quotannis Constantinopoli celebrabatur, ut scribit Procopius L. 2. de Bello Gothico: ex quo factum putat idem Baronius, ut ex tam insigni & toto Orbe vulgato miraculo Græci solemnem cultu iteratò eundem Martyrem celebrent, nempe & 19. Septembris, & 11. Kalend. Maii, seu 21. Aprilis: & ex remotis undique partibus frequenti cœtu Populi ad ejus sepulcrum venerandum Neapolim accurrerint & adhuc accurrant, nec non in ejus honorem multæ fuerint erectæ Ecclesiæ.

XI. Aliud quoque insigne & continuum miraculum Deus operatur, nimirum quòd Sanguis S. Januarii, qui cùm in ampulla vitrea concretus asservatur, si tamen è conspectu capitis ejusdem Martyris collocetur, liquefcit & fluit, ac si recens effusus esset: quod miraculum non unius vel alterius testimonio, sed omnium, inter quos ipse sum, qui propriis oculis vidi, comprobatur: ut meritò dicat Baronius ibi, quòd Januarii Sanguis vocibus quibusdam, velut Abel sanguis clamans, universo Orbi Christiano atque Ethnico intonet potentiam Dei. Hujus prodigii veritatem defendi contra Piceninum & alios A catholicos Tom. 1. Veræ Ecclesiæ cap. 2. §. 4. num. 38. ; & hoc etiam ut prodigiosum proponit Ecclesia in Martyrol. 19. Septembris dicens de S. Januario: *Beatissimi Martyris Sanguis in ampulla vitrea adhuc servatur, qui in conspectu capitis illius positus velut recens liquefcere & ebullire conspicitur.*

§. XXXIII.

*SS. Arrianus, Apollonius, Timotheus, Maura, Asclas
& alii Martyres Ægypti.*

1. **A**rrianus crudelis Ecclesiæ Persecutor fuit, qui tempore quo Thebaidem rexit, pluribus Servis Dei vitam adegit. Fertur, in una Ægypti Civitate 547. Viros & Feminas à S. Paphnutio Anachoreta ad Christum conversos occidisse; & ipsum S. Paphnutium, post horribilia ei illata tormenta, ad Diocletianum transmisisse, à quo stipiti affixus cum aliis ferro necatis Martyrio coronatur. De hoc Latini in Martyrol. Rom. die 24. Septembris habent: *In Ægypto Passio Sanctorum Paphnutii & sociorum Martyrum. Is vitam in solitudine agens, cùm audiret multos Christianos in vinculis retineri, Divino Spiritu concitatus spontè Præfecto se offert, & Christianam Religionem liberè proficitur: à quo primum catenis ferreis constringitur, & in equa-*

leo

leo diutissime torquetur ; deinde cum aliis plurimis ad Diocletianum mittitur , cuius jussu ipse palmæ affigitur , ceteri autem ferro necantur .

Græci verò die 25. Septembris de eodem ita dicunt in Menol. Basilii : *Impii Diocletiani Imperatoris crudelitas plurimos Christianorum non solum ex Laicis sed ex Monachis effecit Martyres : ex quorum numero fuit Sanctus Paphnutius , qui ex Ægypto oriundus , abdicatione seculo , maximam vitæ partem in eremis transiegit . Sed cum plurimos Græcorum ad Christum converteret , à Præfetto ad necem quærebatur . Multis ergo ejus causâ comprehensis , jussus ab Angelo , Præfetto se ultro obtulit : in cuius conspectu Christum professus catenis ferreis constringitur ; tum in equuleum actus eò usque depeñtitur , donec illius viscera in terram profluere . Verum cum rursus , illis ab Angelo compositis in locum suum restitutis , sanus effectus multos ad Christi Fidem traxisset , mittitur à Præfetto unâ cum iis qui crediderant , ad Diocletianum Imperatorem , à quo palmæ affixus decessit : atque uno eodemque die quingenti quadraginta septem Martyres decollati sunt .*

II. SS. Timotheus & Maura conjuges Arriani sævitiam & ipsi experti fuere . Timotheus vici Perapis in Thebaide Lector erat , Pater ejus nomine Poicles Presbyterio in eodem locoungebatur : cùmque Lectoribus nuptiarum libertatem Ecclesia permittat , Timotheus Mauræ ætate quindenni ac cujusdam fabri filiæ matrimonio junctus fuit , quæ probabiliter Christiana erat . Vix à nuptiis viginti elapsis diebus Timotheus detectus à Persecutoribus , quòd Christianus esset , comprehenditur & Arriano præsentatur : qui conatur tormentorum metu eum ad sacrificandùm inducere ; sed cùm responderet Timotheus , Spiritum Jesu Christi qui cum illo erat sibi non permittere , ut aliis quàm ipsi sacrificaret ; nec se tormenta timere , Angeli enim Dei circa ipsum stabant ; Arrianus Libros ab eo postulavit (volens procul dubio eos flammis tradere juxta Diocletiani Edictum) cui Timotheus ait , sacros Libros sibi esse tanquam filios , nec parentem filios suos morti unquam traditurum .

III. Arrianus constanti hoc responso irâ accensus ignitum ferrum in auriculas ei jussit intrudi , cuius adeò violentus fuit effectus , ut ab oculis pupillæ excussæ erumperent . Quia tamen Timotheus se ipsum consolabatur , quòd exteriori lumine orbatus , adhuc lumine Jesu Christi interiùs illustraretur ; Arrianus eum columnæ pedibus appendi jussit , & saxo ad collum alligato , nec non frano ore ejus ne loqui posset obstructo , diù in hoc crudeli tormento eum reliquit , interim oculos cordis ad Deum ele-

elevantem , & ab eo vires postulantes . Cùm verò Judici nuntiatus esset , Timotheum recens nuptias contraxisse , & fore ut sponsæ blanditiis & amore vinceretur ; eam accersiri fecit eique dixit , quòd si Virum suum saluum vellet , eum ad sacrificandum induceret , exhibens illi si hoc faceret non modicam argenti summam .

IV. Mulier nondum in Fide , ut oportebat , firma paruit , ac Viro suo quæ Dæmon ei suggerebat dixit , ac ut posset ab ipso responsum accipere , ut ab ejus ore frænum amoveretur obtinuit . At primus concessæ sibi libertatis usus fuit rogare patrem , qui aderat , ut sibi sudariolum super faciem imponeret , ne odoribus mortis , idest suffitibus qui à vestibus feminæ exibant , nares ejus profanarentur ; his indicare volens horrorem , quem conjugis verba sibi ingerebant . Ipsâ tamen adhuc perseverante ut ipsum emolliret ac vinceret , & Timotheo eam adhortante , ut se generosâ Christi confessione à tanto crimine purgaret ; vicit tandem Divina Gratia , & mulier infidelis Fide Viri sui facta fidelis fuit : illicò enim Spiritu Sancto in cor ejus effuso , dum Timothei verba exterius aures feriebant , tota interiùs mutata , se victam declarat , & in ejus sententiam venit . Timotheus tamen fortè timeans , ne primus iste terror saltem se mortuo frigeret , eam adhortatur , ut se Judici præsentet , & coram eo Fidem suam declarans , ejus immanitatem detestetur . Cùmque illa trepidaret asserens , teneram suam ætatem tanti animi non esse , ut faciem Judicis irati & tormentorum immanitatem sustinere possit ; Timotheus eam monet , ut totâ suâ fiduciâ in Jesum Christum , qui omnia vincere potest , collocatâ , nil timeat ; ac simul preces Deo fundit , ut ambobus vires donet , quibus de hostibus pro gloria sui nominis triumphare possint .

V. His peractis precibus , Maura igne Sancti Spiritus accensa Præsidem adiit , eumque acriter increpat , quòd argento animam suam corrumpere ac perdere tentaverit ; nec speret , se hoc consecuturum , cùm ipsa viribus Jesu Christi armata ei sese præsentet . Admiratus Arrianus ei dicit : Tu ergo magis amas mori quàm vivere ; quòd si hæc tua deliberatio ex hoc procedit , quòd nolis viduam te videre , uni ex præcipuis meis Centurionibus desponsari te faciam . At illa ejusmodi propositione contentâ , declarat , se alium sponsum nolle , quàm Jesum Christum Dei vivi Filium . Tunc iratus Præses capillos ei jussit evelli : ipsa autem læta benedixit Deum , qui à vanis complacentiis , quas fortè habuit , & à peccatis , ad quæ potuisset hisce superfluis ornatibus alios allicere , eam purificare dignatus esset . Quo

resposo exasperatus Præses, digitos ei iussit præcidi: at illa gratias quoque egit Deo, quòd hoc supplicio sibi condonaret prævum usum, ad quem vanè se ornando digitos suos convertisset. Hæc generosâ constantiâ commotus (nondum tamen victus) Arrianus in magnum leberem aquâ ebulliente plenum Mauram injici præcipit: Deus tamen aquæ effectum cohibuit, ut Sancta Mulier velut in temperato balneo jacens Deum laudaret, quòd à præteritis noxis eam ablueret.

VI. Hoc miraculo visus Arrianus aliquantùm emolliri, Mauram dimitti jubet. Verùm Deo nondum in corde ejus operante, confestim illam revocans minatur, se ignitos carbones in os ejus intrusurum. Ipsa autem nil aliud exoptans, quàm, ut olim Isaïæ, sibi quoque labia à culpis purgarentur, sibi gratum fore respondit, si in toto etiam corpore eam igne purificaret. Quo audito, furore abreptus Præses, totum ejus corpus sulphure ac pice ardentibus perfundit, Populo tam immanem crudelitatem palàm detestante, ipsâ verò irridente ac dicente, quòd si quanta sit Dei virtus probare vellet, eam in ardentem fornacem injiceret.

VII. Post tot tantâ constantiâ superata supplicia victus Judex sententiam protulit, ut Timotheus & Maura unus ante alium Cruci affigerentur. Ad supplicium ergo ducebantur, cùm Sanctæ Mauræ mater ploratu & gemitu accurrens, in eam se projecit, eamque rogabat, ut sui ac vestium & ornamentorum, quæ pro suis nuptiis profuderat, memor esset. At Sancta Martyr hæc omnia transeuntia se contemnere dixit, & ad coronam à Jesu Christo promissam, quæ æterna est, contendere: & è matris manibus se propiciens, ad pedes sibi destinatæ Crucis festina cucurrit. Itaque ambo Cruci affixi toto reliquo vitæ spatio (quod novem dierum fuisse, ut infra, traditur) ad constantiam mutuò se adhortabantur. Hoc tempore S. Maura visione donata fuit, quâ ei ostendebatur in Cælo thronus elevatus & corona pro illa, & alter paulò sublimior pro Viro suo. Percontanti autem, cur duo throni separati essent, responsum fuit, hoc esse ob discrimen inter ipsam, & ipsum qui suis exhortationibus in causa fuit, ut & ipsa coronam acciperet. Antequam spiritum redderet, adstantes monuit, ne in hisce terrenis affectum figerent, sed in Deo, à quo remissionem criminum & subinde coronam essent recepturi.

VIII. Itaque Sancti conjuges Martyrio coronati sunt: quorum agonem Latini in Martyrol. Rom. 3. Maii ita celebrant: *In Thebaide Sanctiorum Martyrum Timothei & Mauræ conjugis,*
quos

quos *Arrianus* Præfectus post multa tormenta cruci jussit affigi, in qua novem diebus vivi pendentes, ac se ipsos in Fide roborantes Martyrium consummarunt. Græci autem eâdem die expressius ita referunt in Menol. Basil.: *Timotheus Christi Martyr Sanctissimæ Dei Ecclesiæ Lector fuit. Cùm autem conjugii lege Mauram accepisset in uxorem, vix elapsis diebus viginti, comprehensus est ab Idololâtris, & vincitus ad Arrianum Thebaidis Præsidentem adductus eique traditus, qui ait ei: affer libros tuos eosque coram me combure. Cùm autem Sanctus id facere renueret, candentibus laminis ferreis in aures ejus immisit, statim exciderunt pupillæ oculorum ejus. Deinde rotæ per talos alligatur, lignumque ori ejus imponitur, & saxo ad collum alligato, inverso capite suspenditur. Cùmque nihil ei Præses persuadere potuisset, præcepit conjugem ejus, ut bortaretur eum descere à Christo. At illa elegit potius Martyrium pati: quare evelli jussit crines capitis ejus, ac demum utrumque ad parietem clavis configi, ubi novem dierum spatio perseverantes, vitam consummarunt.*

IX. *Arrianus impietati adhuc serviens alium Martyrem Christo dedit. Fuit hic Asclas, alio nomine Sabinus, unus ex præcipuis Hermopolis in Thebaide Civibus, qui diversâ militaria munera sub duce Ægypti obierat: ejus præcipuum decus erat Jesu Christi esse discipulum. Cùm ergo Diocletiani Edicta, quibus Christiani omnes morti addicebantur, publicata essent anno 384., quibus magna in Ægypto excitata fuit Persecutio, ipse Urbe relicta in parvam domum se recepit, ubi dies ac noctes in jejuniis & precibus transgebat. Multis Christianis eo tempore comprehensis, Arriani jussu Asclas præ cæteris inquirebatur: inventus tandem fuit proditione, ut fertur, cujusdam mendici, cui elemosynam largiri consueverat. Comprehensus ergo cum aliis, solus catenis oneratus Præsidi præsentatus fuit. quid aliis eveniret ignoratur. Arrianus, qui tunc Hermopoli aliò iter parabat, ab uno ex suis Ministris, cui nomen Apollonides, eum interrogari fecit: cui Asclas illicò se Christianum esse respondit. Quo ad Arrianum delato, ab eo quæsit, an sciret, quid contra Christianos præcepissent Imperatores: respondit, se audivisse de quibusdam Edictis, quæ totum Orbem turbatione impleverant, de Idolis adorandis.*

X. *Arrianus offensus, quòd tali contemptu de suis Diis & Principum Legibus Asclas loqueretur, minatus fuit, tormentorum vi ad se retractandum eum adacturum. Vir Sanctus ei respondit: Facito quod volueris. ego alias non agnosco ut Leges nisi quæ legitimæ sunt, & ad communem utilitatem ordinatæ,*

non autem eas, quæ ad privatam passionem implendam solum ordinantur. Comminationes tuæ nullum mihi metum incutiunt: magis timeo eum, qui animam & corpus mittere potest ad supplicia æterna, quàm eos, qui nisi corpus meum torquere possunt, & post hæc non habent ampliùs quod faciant.

XI. Ad hæc Arrianus infrendens, in equuleo eum suspendi, & ferreis unguis adeò crudeliter lacerari præcepit, ut laceræ carnis frustra ad ejus usque pedes penderent: dumque hoc immane supplicium perduraret, Vir Dei nec verbum protulit, ut Arrianus ipse tanquam invictæ constantiæ effectum admiratus sit. Sed cum Advocatus quidam nomine Bisamon dixisset, proximitatem morti ei abstulisse judicium, Sanctus respondit: Judicium non amisi; sed Deum qui me creavit, nunquam derelinquam. Cum ergo ibi ulteriora instrumenta ad eum torquendum deessent, Arrianus deponi eum, & Antinoum, quò ipse ire disponebat, traduci præcepit. Quò cum Arrianus pervenisset, Sanctum Asclam ad se vocavit, eique super costas ac ventrem ignem poni jussit, adeò ut tota ejus caro affata appareret, Viro Dei nec verbum proferente. Quare lassatus Arrianus ipse, video, inquit, te mori velle. Cui hoc solum Asclas respondit: Mori volo, sed ut resurgam non ampliùs moriturus. Arrianus tandem convictus, nihil esse quod Fidem ei eripere possit, mandavit, ut appenso ad illius pedes saxo in aquas Nili projiceretur.

XII. Multitudo eorum, qui ad hoc spectaculum accurrebant, aliquam executioni attulit moram, atque interim cum plures Sancto Martyri cibos, quibus reficeretur, præsentarent, abnuvit ille dicens, se cibum ac potum ab hoc Mundo nolle ampliùs sumere, sed ad mensam æternam Sanctis à Deo paratam se properare, adhortans omnes qui aderant, ut eâ se dignos efficerent. Impositus itaque fuit scapho in medium fluminis projiciendus: quo tempore Christianos aliquos, qui ei propiùs aderant, rogasse fertur tanquam filios, ne Corporis sui sepulturam negligenter, sed ipsum cum lapide sibi ad pedes alligato tumularent, indicans eis locum, in quo post biduum illud essent reperiuri. Quod reverà contigit; nam cum 21. Januarii Martyrio coronatus obierit, die 23. ejusdem mensis, quâ in Martyrologiis colitur, tumulatus fuit; cujus curam assumpsisse S. Apollonius Diaconus, de quo statim, ab aliquibus creditur. Fertur etiam, ad S. Asclæ sepulcrum Arrianum ipsum post suam conversionem confugisse, eumque orasse, ut sibi à Christo intercederet pro nomine ejus pati, quâ obtentâ gratiâ juxta ipsum sepultum fuisse.

XIII. S. Asclæ memoriam, ut dixi, die 23. Januarii Latini
co-

colunt: *Apud Antinoiū Ægypti Urbem Sancti Asclæ Martyris, qui post diversa tormenta pretiosam Deo animam in flumen præcipitatus reddidit.* Græci verò in Menol. Basil. die 13. Martii (sub nomine tamen *Sabini*) ejus Acta ita describunt: *Sabinus Christi Martyr ex Regione Ægypti fuit; propter incumbentem verò Persecutionis sævitiam seculum deserens, secessit, & extra Civitatem se abdidit in exiguam domunculam. Cùm autem magna Christianorum multitudo ab Idolorum cultoribus comprehenderetur, Sabinus etiam quæsitus est, nec inventus haud levi Infideles dolore affectit. Tunc mendicus quidam solitus ad Sabinum accedere, ab eoque accipere victui necessaria, Idololatriæ dixit: quid dabitis mihi, & ostendam vobis quem queritis Sabinum? (ecce novum Judam) Dederunt autem ei nummos duos, eumque secuti irruerunt in domunculam, atque comprehensum Sabinum vinctumque adduxerunt ad Præsidentem. Dixit porro ad eum Præsides: Quare contemnens Editum Imperatorum magnosque Deos, ignotum quemdam Deum prædicas? respondit Sabinus: quia hunc, quem prædico Deum, præ omnibus confiteri atque credere te oportet. Itaque post tormenta in flumen projectus vitam finivit. Hæc Græci. Quæ cùm iis quæ de Asclæ supra dixi omninò consona sint, credere par est, eum fuisse binominem, & quem Latini Asclam, Græci verò Sabinum appellant, eandem personam esse.*

XIV. Post S. Asclæ seu Sabini Martyrium, omnes Urbis Antinoi Christianos comprehendi Arrianus mandavit (ultimus fuit hic impietatis ejus conatus) præcipuè verò illos, qui pietate clariores erant. Vi hujus mandati triginta septem ex Clero detenti fuere, inter quos S. Apollonius. Fuerat iste Monachus in agro propè Urbem degens, qui cùm virtute cæteris in solitudine viventibus emineret, ad Diaconatum elevatus fuerat. Quare Persecutione irruente in visitandis fratribus eisque ad Martyrium animandis totus erat. Cùm ergo captus in carcere detineretur, plures ex Paganis ad eum accedentes ei impropertiis & maledictis insultabant, necnon impietatis & blasphemiarum verba miscebant. Inter istos erat quidam Philemon dictus Choraula seu fistulæ sonator famosus, & omni Populo amabilis, qui cùm multis eum fatigaret injuriis, impium scelestum & seductorem eum vocans, multaque indigna in eum evomeret, respondit ei Apollonius: Misereatur tibi Dominus, fili mi: & nihil tibi horum quæ locutus es, reputet ad peccatum. Hæc cùm audisset Philemon (proh mirabilis Dei gratia!) statim corde compunctus est, vimque verborum ejus supra humanum morem in sua mente persensit, adeo ut Christianum se repente fateretur.

XV. Indè autem statim ad Arriani tribunal, atque in conspectu totius Populi proclamans: Injustè, inquit, agis, o Judex iniquitatis, Viros religiosos & Deo amabiles puniens; nihil enim mali Christiani vel faciunt vel docent. Audiens hæc Arrianus primò quidè̃m putabat, eum ex arte sua jocando loqui; sed cùm audisset hæc eum seriò prosequentem & omni constantiâ asserentem: Insanis, inquit, o Philemon, & mente captus es subito? Ad hæc Philemon ait: Ego non insanio, sed tu injustissimus atque insanissimus Judex es, qui tot justos injustè perimis viros. Ego enim Christianus sum, quod est hominum genus optimum. Tunc Arrianus coram Populo blanditis revocare cœpit; sed ut immobilem vidit, omnia genera tormentorum in eum exercuit. Cognito verò, quòd Apollonii verbis facta fuerit hæc mutatio, correptum etiam Apollonium gravioribus subdidit tormentis, deceptoris crimen in eum intorquens. Apollonius verò dixit ad eum: Utinam & tu, Judex, & omnes qui assistunt & audiunt me, hunc meum quem dicis errorem deceptionemque sequeremini. At ille (Arrianus) ubi hæc audit, & ipsum & Philemonem ignibus tradi in conspectu Populi jussit. Cùmque ambo ingressi essent flammæ, Apollonius cunctis audientibus clamabat: Non tradas, Domine, bestiis animas consentium tibi; sed ostende nobis evidentè salutare tuum. Ubi hæc dixit, repente nubes repleta rore circumdedit eos, & flammæ accensi ignis extinxit.

XVI. Tunc (oh inauditum Divinæ Gratix triumphum!) Judex ipse Arrianus & omnis Populus stupetacti unâ voce clamare cœperunt: Magnus & unus est Deus Christianorum, solus immortalis est. In hoc prodigioso eventu ponderando immorari non vacat. Hoc unum dicam, quod evidens pro Veritate Religionis Christianæ exhibet argumentum. Arrianus Provinciæ Rector, implacabilis Christianorum Persecutor, eodem momento, quo sevitiâ in servos Christi furens exercet, repente mutatus, dignitati & omni quod in Mundo magnum est & amabile renuntiat, ut Religionem quam actu persequitur amplectatur, à qua aliud sperare non poterat, nisi eadem supplicia, quæ ipse aliis inflixerat. Alia in aliis servis Dei nec inferiora, ut supra dixi, viderat prodigia; nihil tamen in eo operata fuerant, sed, ut ante, impius blasphemus & persecutor permanferat. Hoc docet, aliud præter miracula ad cordis conversionem requiri; nam & Judæi qui tot tamque insignia viderant à Christo patrata miracula, adhuc perfidi eum Cruci addixere. Arriani conversio Sauli conversioni æquiparari potest; imò in hac

hac major gratiæ vis eluxisse videtur, quia in impietate diutius induratum cor expugnavit, & ad supplicia statim perferenda, quæ sub Diocletiano prævidere poterat, paratum reddidit.

XVII. Ita autem evenit. Nam Arriani famâ conversionis & aliorum Alexandriam delatâ, Præfectus Ægypti genio crudelis, hoc factio magis exasperatus, electos è Ministris sævissimos Antinoum misit, qui Arrianum Judicem & eos, per quos virtus Dei apparuerat, vinctos Alexandriam perducerent. Sed hic Divinæ Gratia terminus non fuit: cum enim adducerentur, S. Apollonius eos qui se & alios ducebant Fidem Christi docere cœpit, ejusque doctrinam tantâ efficacîâ misericordia Dei roboravit, ut iidem sævissimi, qui Sanctos trahebant, Ministri eâ cordis firmitate in Christum crediderint, ut cum illis, quos secum duxerant, Alexandria Præfecto se præsentantes, Christianos se esse pariter profiterentur. Quos omnes Præfectus in Fide constantes expertus, unâ cum Apollonio Philemone & Arriano in profundum maris demergi jubet: nesciens quid ageret; hoc enim Sanctis Dei, non mors, sed Baptismus fuit. Mare verò speciali providentiâ Dei Corpora integra reportavit ad litus, quæ ab iis qui obsequii causâ convenerant suscepta in eodem sepulcri loco collocata sunt, ubi virtutibus & miraculis coruscant.

XVIII. De his Martyrol. Rom. 8. Martii dicit: *Apud Antinoum Ægypti Urbem Sanctorum Martyrum Philemonis & Apollonii Diaconi, qui tenti & ad Judicem adducti, cum constanter Idolis sacrificare renuissent, perforatis calcaneis per Civitatem horribiliter tracti, novissimè gladio cæsi Martyrium compleverunt. Item ibidem Passio Sanctorum Arriani Præsidis, Theotici & aliorum trium, quos Judex submersos in mare necavit, sed delphinorum obsequio Corpora eorum ad litus delata sunt.* Licet autem Martyrologium discordet à supranarratis ex Ruffino de Vitis Patrum cap. 19., tum in loco & qualitate Martyrii; eorum tamen Martyrium confirmat, quod est præsentis Operis argumentum.

XIX. Græci verò in Menol Basil. 14. Decembris rem aliter narrant de S. Apollonio Philemone & Arriano, quem à Præsede distinguunt: ajunt enim: *Isti Sancti, Diocletiano imperante, ex Thebis Ægypti urbe orti, sex & triginta numero fuerunt. Cum autem comprehensi fuissent, unus ex eis Apollonius nomine Clericus datâ Philemoni Cytharista eorum custodi pecuniâ, rogavit, ut sumtis suis vestibus iret, ac pro se Idola coleret, iisque sacrificaret. Sed Philemon, sumtis Apollonii vestibus, dum Sacra facturus iret, Christum confessus est. Quare Præfectus hujus rei ignarus, Vocavit,*

ait, *Cybaristam Philemonem, ut cytharam pulsans, vocum suavitatem delinitos Christianos ad sacrificandum Idolis inducat. Agnitus igitur Philemon à Præfecto unò cum aliis torquetur: demum Præfectus ipse cum omnibus suis Fidem Christi suscepit. Quod ubi rescivit Diocletianus, cruciari illum iussit cum Arriano opulento homine. Postremò vinctos homines & sacco inclusos in mare projici mandavit. Ita Græci.*

De hoc autem Arriano eadem die sequentia addunt: *Postquam variis suppliciorum generibus in Sanctis Diocletianus animadvertisset, demisit Sanctum Arrianum catenis constrictum in altissimam foveam, multoque illam terræ aggere obstruxit; sedensque pro tribunali, cepit per jocum Milites compellare & dicere: Videamus, an Christus Arriani veniat, eumque ex hac fovea educat. Vix autem sese in Regiam receperat & accubuerat, cum lapidem & catenas, quas gestarat Arrianus, è lectulo suspensas, Arrianumque ipsam in eo jacentem videt. Quare perterritus Imperator, ratus ipsum esse Magum, & eum & Milites, qui cum ipso crediderant, in mare projecit, quorum Reliquias saccis quinque insutas delphines in Alexandria litus deportarunt, quæ ab Arriani servis cognoscæ, honorificè in urbe Alexandria repositæ fuere. His quæ de hoc miraculo asseruntur fidem nec detraho nec exhibeo. Sive Arrianus fuerit ipse Præfectus ut probabilius creditur, sive alius; habemus semper, quòd ille, qui in Thebaide Præfecturam gerebat, & in Sanctos Martyres sæviebat, repentè conversus fuit ad Christum.*

XX. Propterea sub nomine S. Arriani proposui, quia utpotè Præfectus & Persecutor, in Martyriis Sanctorum, qui sub ipso passi sunt, veluti causa partem habuit, & omnia demum conversione suâ & Martyrio complevit. Si ergo S. Arrianus Thebaidis Præfex sub Diocletiano fuit, ut hætenus dixi, putare possumus Martyrium S. Paphnutii contigisse anno 304, eodemque anno SS. Timothei & Mauræ. Martyrium verò S. Asclæ anno 305., & paulò post mense Martio Arriani Præfecti Passionem.

§. XXXIV.

SS. Theodorus, Eutropius, Cleonius & Basiliscus Martyres.

I. **D**E S. Theodori gestis testem habemus S. Gregorium Nyssenum, qui in ejus laudem egregiam Orationem habuit, in qua S. Martyris non laudes solum sed & egregiam Fidei

Fidei confessionem, summam in tormentis constantiam, ac tandem felicem exitum exponit . Eum proinde velut unum è præcipuis Provinciæ Tutelaribus ac Patronis invocatur & veneratur : & adejus Festum undique & ex Urbibus & ex agris cætervatim Fideles confluisse dicit . Quia tamen Græci in Menol. duos venerantur Theodoros ambos Martyres , unum 8. Februarii Heracleæ in Ponto sub Licinio passum , quem dicunt Militum Ducem fuisse , & ob Idola aurea & argentea contracta , & eorum pretium in pauperes distributum , à Licinio post varia tormenta capite fuisse plexum : Alterum verò 17. Februarii Amaseæ in Ponto passum , quem *Tironem* vocant : de hoc secundo cum S. Gregorio Nysseno hic agere intendo .

II. Hic ergo Theodorus ex Oriente originem trahebat , cæterum nec gloriâ seculi , nec honoribus Mundi , nec terræ divitiis eminebat . Adhuc juvenis in sua Regione militiæ adscriptus fuit unâ cum SS. Eutropio Cleonico & Basilisco ejus cognatis , ut putant Græci in Menol. 3. Martii ; qui & ipsi Martyrio postea coronati fuere , ut infra dicam . Bello autem repente mortuo , non ex Barbarorum incursione , sed ex Lege Satanica , Edictis nempe Maximiani Galerii & Maximini , qui tunc anno 306. in Oriente imperabant , quibus Christiani omnes vel Diis sacrificare vel mortem subire juebantur , Theodorus licet in armis seculi adhuc juvenis , in militia tamen Christi veteranus , nil hoc periculo territus , Fidem in Christum ubique circumferebat , quasi inscriptam in fronte Christi confessionem gerens . Quare ad Præsidem & Tribunum , sicut Christus ad Herodem & Pilatum , adductus fuit , qui ei dixerunt : Cur tibi tanta audacia & temeritas , ut Legem Imperatorum contempnas , nec tremens eos qui rerum potiuntur veneraris ? Ille autem vultu alacri & animo imperterrito hoc eis dedit responsum : „ Deos quidem nescio : neque enim reverà sunt . Vos quidem erratis , qui Dæmones fallaces & impostores Dei appellatione honoratis : mihi verò Deus est Christus , Dei Unigenitus Filius . Pro pietate igitur atque confessione illius , & qui vulnerat , incidat ; & qui verberat , laceret ; & qui cremat , flammam admoveat ; & qui his vocibus meis offenditur , linguam eximat . Per singula enim membra corpus Creatori patientiam debet .

III. Fracti his verbis Tyranni , videntes juvenem exultantem ac velut suavem portum tormenta & mortem appetentem , hæsitantes cunctabantur , quid facto opus esset mutuo consultant . Tunc Miles quidam Posidornus nomine ; unus ex eis qui
Ordi-

Ordines ducebant, vir facetus, responsum Martyris irridens: Est ne, inquit, o Theodore, filius tuo Deo? & generat ille ut homo carnis affectibus obnoxius? Cui Theodorus: „ Humano „ quidē, inquit, more affectibus carnis obnoxius meus Deus „ non generavit: verū & Filium confiteor, & nativitatem „ talem esse dico, quæ Deum deceat. Tu verò, o miser & im- „ perite, quod ad sensum & rationem attinet, an non erubescis „ ac pudore vultum demittis, qui etiam Feminam (Cibelem) „ Deum confiteris, & ut matrem duodecim liberorum adoras? „ &c. „. Sic irrisione stulto irrisori repositâ, Tyranni aliquan-
tulum emolliti: exiguum, inquit, insanienti ad deliberan-
dum tempus concedatur: fortasse per otium, re secum melius
perpensâ, mutabitur in melius. Theodorus ergo dimissus, in
precibus & laudibus Deo dilationis tempus consecrabat.

IV. Hoc tempore Theodorus zelo extraordinario accensus
maximum opus aggressus est. Erat Amasæ Templum Cibeli,
quam matrem Deorum vocabant, circa ripam amnis conf
cratum. Hoc Vir strenuus occasione datâ concremavit, re ipsâ re-
sponsum, quod post deliberationem expectabant, impiis dans.
Facto statim patefacto, incendium enim Urbi imminabat, tan-
tū abfuit, ut opus à se inceptum Theodorus occultaret, quin
potius palam significabat, se ob rem præclarè gestam exultare,
& de dolore Populi, eversionem Templi & statuæ lugentis, supra
modum gaudere. Atque ille quidē ad tribunalia tumultuariè
convolvit; Theodorus verò in medio Populi erat magnâ lo-
quendi libertate utens; nec territus, quod illud incendium
suis manibus excitasse accusaretur & proinde atrociam ei osten-
tarentur supplicia, magnâ confidentiâ coram omnibus loqueba-
tur: imò cum Publius Præfectus eum argueret, cur locò ea ado-
randi, Idola incendisset: respondit, se non negare id fecisse, sed
ligna incendisse, ut lapides combureret, & consequenter etiam
Deos, quorum tota virtus in lapidibus clauditur. Hoc audito
cædi eum præcepit, atrociora comminatus supplicia, nisi Edi-
cis Imperatorum pareret. Sed Theodorus constans omnia des-
pexit; &, ut quidquid vellet de se faceret, ei dixit, sperans
sibi Jesum fore adiutorem.

V. Tunc Judices adhuc eum tentare volentes: Scito, in-
quunt, si consilium nostrum admittere volueris, protinus te
ex obscuro nobilem, ex humili despectoque & inglorio honora-
tum efficiemus, ac tibi Pontificatus dignitatem promittimus.
At Theodorus auditiâ Pontificiâ dignitate sibi promissâ, primò
quidē irrisit, deinde deploravit talium Pontificum & ipsorum Im-

Imperatorum cæcitatem ac perditionem, addens ut de se quod vellent facerent; sive in ignem projicerent, sive corpus lacerarent; sive minutatim conciderent, Jesu Christi Nomini numquam renuntiaturum. Et hoc dicto, elevatis ad Cælum oculis, sancto signo Crucis totum corpus suum munivit.

VI. Tunc Judices iis, quæ contra Deos Pontifices & Imperatores suos dixerat exasperati, pietatis larvâ depositâ, Theodorum primò in equuleo suspensum lacerabant. At ille lictoribus vehementer eum torquentibus, nihil de pristina animi constantia remittens, illud Psalmi canebat: *Benedicam Dominum in omni tempore, semper laus ejus in ore meo*. Atque illi quidè carnes cædendo diminuiebant, ipse verò, quasi alius quis poenam subiret, hilaris psallebat. Hoc modo punitum carcer excepit; sed ibi circa ipsum etiam miracula edebantur: noctu enim vox multorum psallentium audiebatur, & facum allucentium splendor ab iis, qui foris erant, conspiciebatur: adeò ut etiam carceris custos insolitâ atque mirabili visione & auditione turbatus insili- ret in domunculam, & neminem inveniret præter Martyrem quiescentem & cæteros victos dormientes.

VII. Tandem videns Judex, se Martyris in confessione constantiam nec suasionibus nec tormentis vincere posse, sententiam tulit, ut vivus combureretur: quod illiè impletur. Dum ergo ad supplicium duceretur, signo Crucis se muniens, hilaris incedebat, donec in flammam injectus, animam Deo reddidit 17. Februarii anni 306. Ejus corpus integrum & à flammis illæsum quædam Mulier Eusebia aromatibus dividit, & curâ ac honore sepelivit in loco Eucaites dicto, Amasæâ Ponti Metropoli unius diei itinere distante. Ad ejus sepulcrum Fideles quotannis tempore hyemis magno concursu conveniebant: &, ut Gregorius Nyssenus testatur, quibus datur sacras attingere Reliquias, *Quasi Corpus vivens & florens, qui intuentur, amplectuntur, oculis ori auribus sensuum instrumentis adhibentur: deinde officii & affectionis lacrymas Martyri, quasi integer esset & apparet supersundentes, ut pro ipsis deprecator intercedat, supplices preces offerunt, tamquam satellitem Dei orantes, quasi accipientem dona, cum velit, invocantes*. Quæ verba Sanctorum Invocationem mirè exponunt & probant.

VIII. Sanctus iste Martyr Theodorus *Tiro* appellatur, sive quia retens arma suscepisset: sive, ut contendit Jacobus Goar, ex una Legionum esset, quæ *Tironum* vocabatur: cui Græci, ut infra, consentiunt. In Actis vulgatis dicitur Legioni Marmaritanorum adscriptus fuisse. Dictus etiam fuit Theodorus Ama-

senus à loco passionis, Eucaites à loco sepulcri. De eo agunt Græci in Menol. Basil. 17. Februarii, qui addunt draconem ab eo interfectum fuisse, & Præfectum vocant *Cringam* his verbis: *Sauctus magnus Martyr Theodorus Tiro, Maximiano & Maximino acerbissimis Christianorum Persecutoribus, adolescens militavit in ea quam Tironum dicunt Legione, professus postea sub Cringa Præposito. Cùm autem in Amaseæ finibus esset audiretque multos pro Christo pati, zelo incensus voluit & ipse Martyrium subire. Ad Cringam itaque Amaseam profectus, cùm cognovisset draconem portentose magnitudinis esse apud Eucaita, secum reputabat, si draconem interfecisset, omnino se superaturum etiam Diabolum: quod & præstitit. Ingressus autem Amaseam Cringam adiit, Christumque professus, flagris ceditur. Deinde tempore ad deliberandum ei dato, Sanctus noctu Idolorum Fanum incendit. Quare indignatus Cringas Theodorum flammis adjudicavit, quibus Fanum combusserat. In fornacem itaque injectus agovem suam conficiebat: & videns Cleonicum amicum suum prope adstantem ait: Cleonice, te expecto; atque ita consumtus est. Cleonicum verò ipsum in Martyrio fuisse secutum, inferius ostendam.*

IX. Latini verò ejus memoriam ad diem 9. Novembris dilatam ita celebrant: *Amaseæ in Ponto natalis Sancti Theodori Militis, qui tempore Maximiani Imperatoris pro Christiana Fidei confessione fortiter casus & in carcerem missus, deinde Domino sibi apparente ac movente, ut constanter & viriliter ageret, relevatus est: novissimè postquam equuleo suspensus & unguis corrasus est, ita ut ejus interiora nuda apparerent, ardentibus ignibus comburendus traditur, cujus laudes Sanctus Gregorius Nyssenus præclaro encomio celebravit.*

X. Porro benedictio, quâ Deus S. Theodori pugnam coronavit, ad alios quoque, nempe SS. Basiliscum Eutropium & Cleonicum transivit, qui, sicut, ut supra indicavi, ei sanguine & amicitia conjuncti fuerant, ita & Martyrio eum secuti sunt, in quo utraque Ecclesia Latina & Græca, quæ eos ut Martyres veneratur ut infra dicam, consentit: eosque indicasse visus est S. Gregorius Nyssenus in prælaudata Oratione de S. Theodoro, cùm ait: *Quòd si majori etiam opus fuerit advocacy ac deprecatione, fratrum tuorum Martyrum coge chorum: quibus Theodorum unà cum præfatis tribus in adjutorium pro Populo invocat. Acta tamen, quæ de istis habentur, in aliquibus circumstantiis dissident. Unde quæ communiora sunt exponam.*

XI. Basiliscus ergo Eutropius & Cleonicus eidem Legioni quâ S. Theodorus, Marmaritæ dictæ, quæ Amaseæ sub Brinca Tri-

Tribuno stationem habebat, adscripti fuerunt . Hi tres quia Christiani, Judici nomine Asclepiodoto præsentati fuere : & primo alligati columnis crudeliter cæsi & laniati usque ad licitorum defatigationem . Cùmque S. Eutropius nimiam Judicis sævitiam reprehendisset, in facie repetitis ictibus percussus fuit . At Jesus Christus unà cum S. Theodoro (jam mortuo) eis appareus omnes continuo sanos effecit : quo miraculo magnus hominum numerus conversus fuit ; qui amittentes caput cœleste Regnum adepti fuere . Judex mutato consilio Cleonicum donis ac promissis aggredi conatur ; his tamen artibus Sancti Martyris constantiam roboravit : itaque irridens stultitiam Judicis, ut suorum Deorum vanitatem ostenderet, fusis ad Deum precibus, Dianæ statuam, cui tunc Judex sacrificabat, coram ipso funditus evertit . Quo accensus furore Judex, lebetem bitumine ac pice ardentem super tres Dei Servos effundi jussit ; sed cùm sani evasisent, tandem Eutropium & Cleonicum Cruci affigi mandavit .

XII. Basiliscum verò in carcerem conjecit eos proximè secuturum . Interea loco Asclepiodoti novus Præses nomine Agrippa destinatur, in mandatis habens Christianos omnes, qui sacrificare nollent, atrocibus suppliciis interficere . Basiliscus dies in carcere moriens transigebat Deumque deprecabatur, ne sui oblivisceretur, sed quibus socius fuerat in pugna, faceret etiam in corona consortem . Nec votis defuit clementissimus Jesus ; ei enim noctu apparens dixit, ne tristarerur, quòd à sociis præventus esset, cùm & ipse alios multos foret præventurus . Iret prius, & cognatis suis valediceret, nec timeret supplicia, quæ postea esset passurus : Ego enim, inquit, tecum sum . Hæc visione gaudio repletus fuit, sibi que ostium carceris apertum esse videbatur . Cùmque illuxisset dies custodes rogabat, ut sibi quadridui spatium permitterent, qui visitatum pergeret cognatos suos, promittens eis, se illicò reversum, ut suum verum Patrem Jesum Christum adiret . Custodes ei testati sunt, se libenter etiam prorsus liberum dimissiuros ; non audere tamen vel quadriduum absentiae illi indulgere, metuentes, ne Præses, cujus imminabat adventus, de eo statim inquireret . Obtinuit tamen, ut ab ipsis custodibus duceretur .

XIII. Cùm patriam suam Cumialem pervenisset, mater ejus fratres & cognati & noti summo gaudio ad eum convenerunt (erant enim omnes Christiani) quibus ille ostendit, per multas tribulationes oportere intrare in Regnum Dei : persisterent ergo in Fide usque ad ultimum, se eos relinquere non amplius rever-

surum, sed pergere ad complendum suum Martyrium, ut Sanctis Theodoro Eutropio & Cleonico socius efficiatur. Tunc adstantes omnes amplexibus ad collum ejus accurrentes cum lacrymis rogabant eum, ut post completum Martyrium ipsorum omniumque Christianorum memor, oraret Deum, ut cessare faceret Tyrannorum Persecutiones, & Sacrificia Dæmonum, omnisque terra Jesu Christi nomen personaret.

XIV. Eâdem die, quâ Basiliscus Apameâ discefferat, advenit Agrippa, qui in Sacrificiis die consumto, postridie pro Tribunali sedens, de eis qui in carceribus detinebantur inquirat. Ut autem de Basilisco, cujus nomen in regeſto scriptum erat, audivit, eum ad se arceſſiri jubet. Minister quidam illicô ivit ad carcerem, sed eum non inveniens, clavigerum secum traxit ad Præsidentem, qui eum acriter reprehendit, quòd captivo & inimico Deorum fugam permisisset. Cui claviger respondit, pridie illum cum custodibus ad patriam seceſſiſſe, & post quatrídium se illum præſentaturum.

XV. Tunc Præsēs, indictâ pœnâ mortis, nî eum præſentaret, sub cautione Ministri (defensoris Civitatis dicti) ad Basiliscum perquirendum clavigerum misit, eique socium dedit quemdam Magistrianum dictum, cui injunxit, ut Basiliscum aliosque detentos Cumanas quò ipse ire diſpoſuerat duceret; addens, se ex hoc agniturum quantæ fidelitatis & in exequendo promittitudinis eſſet. Magistrianus ergo ſperans se novi Præſidis gratiam conſecuturum, ſi in Sanctum Dei ſummâ feritate ageret, calceos areos clavis acutis intus armatos conſtrui fecit, & comitibus Clavigerò aliquot Militibus & Inſignio Cancellario (qui hoc optaverat. fortè enim Chriſtianus erat) Cumialem iter direxit; cùmque in itinere obvium habuiſſet Basiliscum, qui Amasiam revertebatur, Magistrianus duplici gravique catenâ eum vinciri & areis caligis calceari præcepit; quarum acutis clavis uſque ad oſſa penetrantibus, undique ſanguis effundebatur, atque Militibus ad ſic incedendum eum adigentibus veſtigia cruore madida ſolo imprimebat.

XVI. Omnes lacrymis ſequebantur: ſola ejus mater eum ad fortiter perſerendum animabat ſpe retributionis æternæ, & Chriſti, pro quo patiebatur, aſſiſtentiâ: Si homines, ajebat, te velut ſceleſtum & latronem condemnant, Latro ille qui cum Chriſto cruci affixus fuit, in Cœlum te recipiet. Quibus dictis rogans eum ut ſui memor eſſet, & Deum precans ſeceſſit. Sanctus verò Martyr ei ac tribus fratribus cæterisque cognatis valedicens rogavit omnes, ut domum reverterentur. Quia autem
ſuper

super poena quam patiebatur amarè flebant : Ne ploretis , inquit S. Martyr , sed Deum orate , ut mihi in hac pugna victoriam concedat , quâ Diaboli insidias & Judicis vincam crudelitatem : cur vestris lacrymis me affligetis ? Utinam pro Domino Jesu plus quàm semel mori possem . His dictis amplexus eos sapiùs rogabat ut discederent : cùmque adhuc reluctarent , Magistrrianus ipse minatus est , ni recederent , se omnes comprehensos ad Præsidentem adducturum . Basiliscus autem cruentis caligis calceatus Deo laudes concinens omnes præcedebat ; tale suæ alacritatis exhibens testimonium , ut Magistrrianus ipse stuperet , nesciens , Deum illi lenire poenas & esse in doloribus adiutorem .

XVII. Tandem circa meridiem ad vicum nomine Dacozam pervenerunt , ubi Magistrrianus ac cæteri numero 14. (præter Basiliscum & Insignium) à Vidua Pagana in eo loco nobili , Trojana nomine , ad prandium invitati , Sanctum Basiliscum manibus retrò vinculis & trunco arboris alligatum ac Solis caloribus expositum reliquerunt . Interea magna Populi pars ejus poenas commiserans circa ipsum stabat ; dum ipse Psalmos concinens Dei potentiam sibi adjutricem implorabat . Et quidè exaudita fuit ejus Oratio : subito enim tremore terra concussa fuit , & vox audita de Cælo dicens : Quidquid postulasti , tibi concedo ; ne timeas , quia ego tecum sum . Eodemque momento ærea caligæ ut cera liquefactæ fuerunt , ferrea vincula fracta ac funes resoluti . Ad hæc qui aderant stupore perculsi præcipuè Christiani glorificabant Deum (paucis exceptis , qui Magiæ totum tribuebant) Magistrrianus ipse terræmotu perculsus , relicto cum aliis prandio , foràs prodiit , & timore adactus prodigiorum testis & ipse effectus fuit : quæ in servo suo adhuc Deus auxit ; nam paralytico & aliis ægrotis , qui Fidem Christi susceperunt , sanitatem donavit , atque Trojana cum filio ac familia tota Christum confessâ fuit , omnesque baptizati fuere .

XVIII. Ibi ergo S. Basiliscus usque ad mane diei sequentis mcratus est . Magistrrianus tactus quòd tot malis servum Dei affecisset , blande ad eum accessit , rogans ut iter prosequi vellet , metuens , ne mora in præjudicium vitæ sibi cederet . Inde ergo discedentes totus Populus secutus est , cujus pars comes adhæsit usque ad magnum pontem super fluvium Irim : quibus traufcuntibus pons totus contremuit , Sanctus autem in preces de more effusus , Populum qui sequebatur ad sua remisit . Jam triduo pedestri itinere S. Basiliscus nullo alimento refectus incedebat : quare cùm ad pagum nomine Saon pervenissent , Magistrrianus eum rogavit , ut aliquid in alimentum sumeret , quod Vir Dei

renuit , dicens , se satis nutriri à Jesu Christo Verbo Dei , gratiâ Sancti Spiritus , Oratione , & gratiarum actione : renuit quoque ascendere in jumentum , quod ei in levamen obtulerat , asserens S. Spiritum totam quam optabat requiem sibi largiri , nec cibum aut potum gustare voluit in diversorio vespere nec mane : cùm Comanas appulsi omnes etiam Eufignius horâ decimâ refecti fuere ; sed morabatur , Deum rogans , ut sibi aliisque servis suis daret constantiam in tormentis , quibus Præses Christianos agitabat ; eique apparens Christus ait : Ne impiorum timeas minas ; Ego enim tecum sum .

XIX. Porro cùm Urbem essent ingressi , Magistrianus certior factus , Præsidem tunc cum toto Populo in Templo Apollinis sacrificare , ei per nuntium significavit , se Basiliscum traxisse . Quo gavissus Præses Magistrianum commendans , Militibus etiam , qui Cumialem Sanctum Virum duxerant , condonavit . Cùm autem à Magistriano audisset miracula , quæ patrarat , irridentis dixit : has illusiones magicas esse , & præcepit ut Basiliscus adduceretur ad sacrificandum . Milites itaque ad eum ducendum à Præsidente missi , Sanctum Virum percutientes , dicebant ei , ni sacrificaret , atrociora imminere supplicia ; nec rationale esse , eum mori velle pro Deo quem non videbat . Quibus ille respondit : Deus quem adoro potentiam suam satis ostendit miraculis quæ per servos suos edit , & quorum isti qui me duxerunt , testes esse possunt . Dictum Basilisci Magistrianus & alii confirmarunt , ab eoque veniam petierunt , quod malè tractassent ; addentes , quòd si capitalis sententiæ metus eos non retraxisset , post tanta prodigia liberum eum dimississent ; ideòque memor eorum in suis precibus esset .

XX. Ingressus sereno vultu in Templum S. Basiliscus , à Præsidente interrogatur , an ipse ille sit , qui sacrificare recusat . Cui respondit : Quis tibi dixit , me non sacrificare ? Ego Deo meo Sacrificium laudis offero . Judex , quæ illi dixerat non percipiens , sed putans , eum alicui ex suis Diis sacrificare velle , gaudio repletus respondit , liberum sibi cui Deo sacrificare vellet eligere . Erat in Templo magnum Apollinis simulacrum . Sanctus ergo ei appropriat , & petens quodnam illius Dei esset nomen : „ Jure , inquit , hunc Apollinem , idest Destructorem „ vos appellatis , quia omnes , qui illum ut Deum adorant , pe- „ ribunt & destruentur . Ego Deum verum ac æternum adoro , „ ei laudem debitam offero . Videtis ergo quale sit meum sacri- „ ficiu & quales offeram preces „ . Inde celebrare cœpit bonitatem & potentiam Dei in creatione Universi , eum tandem ro-
gans ,

gans, ut Idolum illud mutum ac insensibile conterat, & eos qui honores impios ei tribuunt à deceptione liberet. Quâ Oratione per Amen completâ, illicò vehementi terramotu Templum concutitur, simulacrum evertitur & in pulverem redigitur. Hoc terribile prodigium Præsidentem aliosque in fugam adexit, adeò ut solus Basiliscus dans gloriam Deo ibi remaneret.

XXI. Præsides itaque eum vocari jubet, ac furiis invehens increpat quòd eum fefellisset. At Sanctus Vir non respondens secretò orabat : ac tandem dixit : Qui Deum vestrum contrivit, modò etiam Templum incendit, & hoc eodem tempore cœlestis ignis illud à fundamentis absumit ; hic meus Deus est, hunc adoro, huic sacrifico. Cùmque Præsides eum tanquam Magum detestaretur ; respondit : Modò experientiâ discis, quis & qualis tuus Deus sit ; ille ultionem de me sumat, si potest, se ipsum ac suam Divinitatem defendat. Post varia, novis eum tormentis subijcere opportunum non judicans, Præsides sententiam capitis in eum tulit. Quare extra Civitatem ducitur in locum Discorum nuncupatum ad ripam Iris, & ibi spectante Populi multitudine capite truncatur. Tunc magnus Angelorum & Archangelorum numerus ad ejus animam suscipiendam è Cœlo descendere visus fuit, eam invitantium ad eorum Regnum, quo illius socii jam fruebantur : & nos omnes (addit Actorum Scriptor) qui hoc mysterium intuiti fuimus, in terram prostrati Deum adoravimus, eique gratias egimus, quòd tanti prodigii visione nos dignos effecerit.

XXII. Præceperat Præsides, ut Sancti Martyris Corpus in fluvium projiceretur, comminatus tormenta & bonorum amissionem, si quis illud inde extrahere ac sepelire ausus fuisset. Cùm verò unus Militum, ut in fluvium projiceret, illud summisset, acceptis à Christianis triginta aureis, in manus eorum sacrum Corpus tradidit, qui illud noctu in quodam agro culto sepelierunt, & quædam legumina superfeminantes, eadem nocte germinasse invenerunt. Addunt Acta, Dæmonem Præsidentis corpus invasisse, qui cruciatum se videns, Corpus Sancti Martyris ubique perquisivit, sperans, se solo illius tactu liberum evasurum. Sed cùm ei diceretur, ipso jubente projectum fuisse in flumen, nec quisque auderet pandere, quid de eo factum fuerat, ipsemet ad locum, in quo decollatus fuerat, accessit ; ubi cùm guttam sanguinis à Martyre effusi invenisset, ipse suis manibus terræ permixtam collegit, eamque linteo quo cingebatur includens, statim liber evasit & in Christum credidit. Hæc de S. Basilisco verè mirabilia hausta sunt ex Actis Ensignii Scribæ & Can-

& Cancellarii nomen præferentibus, & qui se testem ocularem omnium quæ scribit, fuisse protestatur. Hic autem ut supra dixi, S. Basilisci comes in itinere ad Martyrium fuit.

XXIII. De S. Basilisco semel atque iterum memoriam habemus in Martyrologiis & Menologiis. Primò quidè die 3. Martii, ubi recensetur cum SS. Eutropio & Cleonico, cum quibus ejus passio sumsit exordium. Secundò die 22. Maii, ubi solus ipse nominatur à Latinis his verbis: *Comana in Ponto Sancti Basilisci Martyris, qui sub Maximiano Imperatore & Agrippa Præfide ferreas crepidas ignitis clavis confixas calceatus, multaque alia passus, demum capite obruncatus & in flumen projectus Martyrii gloriam consecutus est.* Græci verò in Menol. Basil. eadem die ajunt: *Basiliscus Christi Martyr, imperante Maximiano, fuit ex Regione Armeniacorum filius fratris Sancti magni Martyris Theodori. Cùm autem antea decertasset unà cum Sanctis Eutropio & Cleonico, qui sub Sancto Theodoro militabant, illis pro Christo occumbentibus, ipse in carcere detentus est. Deum verò rogabat, ut certaminis cursum perficeret. Quare stimulatus fuit ab ipso, ut affinis suis sese conjungeret, ut Martyrium Comanis subiret. Domestici itaque suis adjuncti ab Agrippa Præfide comprehenditar vinculisque Comana abducitur. Cùm verò per viam miracula edidisset, plurimos ad Christi Fidem suscipiendam induxit. Comana autem profectus, suis ad Deum precibus, ignem à Cælo detulit, quo Apollinis Fanum Idolumque incendit. Quamobrem capite plexus in fluvium projectus est.* Crederem hâc die ab utraque Ecclesia S. Basilisci memoriam coli, quia hâc Martyrium consummaris nisi me detinerent ejus Acta, quæ ponunt ipsum 21. Julii passum fuisse. Sed hoc discutere præsentis argumenti non est.

§. XXXV.

SS. Apphianus & Ædesius Agapius Anicetus & Photius Martyres.

I. **A**pphianus (seu Appianus aut Amphianus) & Ædesius fratres erant nati in quadam Lyciæ Urbe Pagas ex conspicua & valde diviti familia. Beryti diù morati sunt, illuc à parentibus missi, ut humanioribus litteris, & fortè etiam Juri civili, de quo celebris Beryti schola erat, operam darent. Ibi à S. Pamphylo Presbytero & postea Martyre Christi Fidem ambos fuisse edoctos sentiunt Græci, ut infra dicam. Hoc mirum est, quòd in Urbe corruptione plenâ adhuc adolescentuli vitam regulis Evangelii con-

conformem, ac proinde gravem modestam ac piam ducebant. Prius ergo de Appiano qui prius coronatus fuit, deinde dicam de Ædelio.

II. S. Appianus decimo octavo suæ ætatis anno Beryto apud patrem rediit: cogitabat iste illum ad graviora munera & primarias Urbis dignitates sensim promovere; at Spiritus Dei, qui Appiani animum replebat, contemptibiles ei reddebat omnes seculi honores & voluptates. Quod autem intolerabilius ferebat, erat videre se cum patre ac totâ familiâ paganâ: quare se à propria domo secretò subducere statuit; & nihil sollicitus de victu ac vestitu, sed unicè Divinæ providentiæ confidens, Cæsaream in Palæstina venit; ubi apud Eusebium postea ejusdem Civitatis Episcopum diverstit, & sacris litteris plenè imbutus fuit. Rem ipse Eusebius L. de Mart. Palæst. cap. 4. de Appiano ita enarrat: *Qui quidè reversus postea à Berytensibus studiis, cùm pater ipsius principem locum domi obtineret, ipse nihilominus cum patre & propinquis suis versari non sustinuit, eò quòd illi ex Divinæ Religionis præceptis vitam agere recusarent. Sed Divino quodam Spiritu afflatus, & præ innato Philosophiæ studio, seu potiùs celestis ac veræ Sapientiæ amore, vanam hujus seculi gloriam & corporis voluptates despiciens, clam domo ansugit: ac ne quidè de sumptu ad diurnum victum necessario sollicitus, ob spem ac fiduciam, quam in Deo collocaverat, prævio & quasi manu ipsum ducente Spiritu Sancto, Cæsaream pervenit, ubi corona Martyrii ipsum manebat. Ibi nobiscum versatus, cùm ex sacrarum litterarum lectiōe, quantum fieri potuit, brevissimo illo tempore fructus sibi collegisset, & congruâ arctioris abstinentiæ exercitatione semet roborasset, tandem ejusmodi exitu inclauit, quem quisquis visu acceperit, fieri nullo modo potest, quin simul obstupuerit.*

III. Hoc ita contigisse refert. Nam cùm Maximinus secundum promulgasset Edictum anno Persecutionis tertio nimirum 306. ineunte, quo Rectores jubebantur operam dare, ut omnes omnium Urbium Incolæ Diis publicè sacrificarent: cùmque præcones per universam Cæsaream cunctos patres-familias ad Dæmonum Templum iussu Præsidis vocarent, & singulorum nomina à Tribuno citarentur, omnibus ubique Christianis summo angore ac metu percussis, Appianus nemini nec etiam domesticis communicato consilio, penetratâ cohorte, ad Urbanum tunc Palæstinæ Præsidem intrepidus accessit, dum iste Diis suis actu libabat; ac fidenti animo comprehensâ ejus dextrâ, è vestigio Sacrificium omittere ipsum coegit. Mox cœpit ipsum Divinâ quâdam gravitate monere, ut ab errore desisteret, nec ve-

rum Deum falsis Diis ac veris Dæmonibus posthaberet, summâ libertate publicè prædicans.

IV. Tam audaci perpetrato facinore, Sanctus juvenis à militibus qui Præsidi apparebant tamquam à feris bestiis discerptus, & toto corpore casus, in carcerem conjicitur; ubi cùm noctis ac diei unius spatio pedibus in nervo distentis mansisset, postero die in judicium adducitur. Compulsus deinde à Judice Diis sacrificare, constanterque renuens, horrendos cruciatus invictè superavit: lateribus enim non semel sed iterùm ac sæpius ad ipsa usque ossa & viscera fulcatis, tot plumbatarum ictibus in os ac cervicem verberatus fuit, ut contusâ ac tumefactâ facie, ne ab illis quidè eum optimè norant cognosceretur. Verùm cùm ille tantis doloribus nullatenus cederet, tortores jussu Præsidis linum oleo madefactum pedibus ejus circumponentes, ignem postea subjecerunt; quo tanto dolore affectus fuit, ut ignis consumptis carnibus ad ossa usque penetraret, & universus humor corporis ceræ instar liquefactus stillatim deflueret. Tantâ Martyris fortitudine animum despondentes, quasi victi adversarii, eum in carcerem conjiciunt. Tertio autem die Judici oblatus, & constantior repertus, licèt semivivus, in profundum mare demersus est. Hactenus cum Eusebio locutus sum.

V. Id quod postea subsecutum fuit (addit Eusebius) licèt incredibile videatur, verum tamen est, & omnium utriusque sexus ac ætatis, qui tunc aderant, testimonio comprobatum. Vix Sancti Martyris Corpus in medium mare projectum fuit, cùm repentè tantus motus tantusque fragor non solum mare, verùm etiam aerem totum concussit, ut terra quoque & ipsa Casariensium Civitas eo motu quateretur. Eodemque temporis momento Divini Martyris cadaver à fluctibus ante portas Civitatis ejectum est. Hujusmodi fuit exitus Appiani verè admirandi die secundo mensis Xanthici, qui est dies quartus ante Nonas Aprilis, feriâ sexta: quâ die de illo agit Martyrol. Rom., ubi sub nomine Amphiani de eo dicit: *Cæsareæ in Palæstina S. Amphiani Martyris, qui in Persecutione Maximini cùm Urbanum Præsidem Idolis immolantem arguisset, sævè dilaniatus, ac pedibus vivo in oleum immixto eoque accenso volutis, acerbissimè cruciatus, demum in mare demersus, transiens per ignem & aquam eductus est in refrigerium.* De eodem die 2. Aprilis agunt Græci in Menol. Basil. simul cum S. Ædesio, ut infra dicam. Passus est Beatus Appianus seu Amphianus annum agens circa vigesimum.

VI. S. Ædesius, ut dixi, S. Amphiani seu Appiani ex patre, vel, ut Græci volunt, ex matre non solum secundum carnem, sed

sed & secundum spiritum frater, ut idem Eusebius L. de Mart. Palæst. cap. 5. refert, in studiis præfertim philosophicis plus quam Appianus profecerat, unde philosophicum pallium gestabat; ejus tamen philosophia magis Christiana erat quam humana. Pluries Christum confessus, pluries etiam carceres & vinculorum cruciatus sustinuit, donec Judicum sententiâ ad metalla in Palæstina damnatus fuit. Tandem (inquit Eusebius) apud Alexandriam cum Judicem, qui de Christianis quæstionem habebat, supra modum debacchantem atque insultantem vidisset; & nunc quidem Viros graves variis afficientem contumeliis, nunc Mulieres eximiâ castitate præditas atque etiam Virgines Deo devotas lenonibus ad omne genus turpitudinis dudentem; idem ac frater facere conatus est: cum enim hæc ipsi intolerabilia viderentur, ingenti animi fiduciâ accessit ad Judicem; cumque verbis simul ac factis illum pudore atque ignominia perfudisset, post hæc multiplicis tormentorum cruciatus fortiter perpeffus, tandem in mare præcipitatus, eodem quo frater genere mortis interiit. Et hæc quidem Eusebio, tametsi aliquantò post tempore, ad hunc modum contigerunt.

VII. Hujus memoriam colit Martyrol. Rom. 8. Aprilis dicens: *Alexandria Sancti Eusebii Martyris fratris Beati Amphianis qui cum impium Judicem, quod Deo dicatas Virgines lenonibus traderet, palam argueret, à Militibus tentus savissimisque affectus suppliciis in mare demersus est pro Christo Domino.*

Utriusque fratris Appiani & Eusebii Menol., ut dixi, die 2. Aprilis Martyrium ita celebrat: *Appianus & Eusebius Christi Martyres ex matre fratres, Maximiano imperante, ex Lydia Regione ortum duxerunt. Cum autem Berytum venissent, Christi Fidem à Pamphilo Martyre edocti sunt. Unde comprehensi ad Præsidentem Civitatis adducti fuerunt. Et primum quidem Appianus palam & liberè Christum prædicans in facie percussus fuit, atque in terram corruens Militum pedibus conculcatus est, lignoque suspensus calcium ictibus tumefactus fuit & disruptus. Permauens autem adhuc constanter in Christi confessione, in profundum maris projectus, ibi vitam absolvit. At verd Eusebius condemnatus, ut in metallis effodiendis puniretur, missus est Alexandriam, ubi cum quadam die Urbis Præsidentem vidisset acriter in Christianos deservientem, accurrens illum virga percussit. Unde multis prius cruciatibus venatus, in mare demum demersus Martyrium consummavit. Ita Græci in aliquibus diversi ab iis, quæ supra retulimus ex Eusebio; cui tamen magis standum est, utpotè qui Cæsareæ domesticè cum Appiano conversatus, & fortè testis ocularis fuit multorum quæ refert.*

VIII. Præfatis Martyribus adjungit idem Eusebius L. de Mart. Palæst. cap. 6. S. Agapium, quem ultimò fuisse passum dicit an. 306., Persecutionis quarto, Cæsareæ ante duodecimum Kalend. Decembris feriâ sextâ. Sanctus iste, ut notat idem Eusebius, antea pro confessione Christi ter carceri mancipatus fuerat, & multis tormentis cum S. Timotheo cruciatus, ac demum bestiis exponendus fuerat anno 304. vel 305. Præses tamen executionem sententiæ distulerat, sive pietate erga ipsum motus, sive confidens, ipsum tandem à proposito se abducere posse (quam plurimum Judicum subdolum fuisse artem testatur Lactantius L. 6. Inst. cap. 21.) Cum verò Maximinus Cæsaream adventasset, & ob diem natalem suum spectaculum exhibere Populo statuisset (quod præcipuè in exponendis miseris ferarum voracitati exercebatur, ut rem gratam Populo faceret) S. Agapium unâ cum servo quodam, qui dominum suum peremisse ferebatur, in stadium adduci iussit. In quo innovatum fuit quod Christo evenerat cum Barabba; nam servus homicida bestiis expositus veniam à clementia Imperatoris obtinuit, & publicis acclamationibus super Imperatoris benignâ indulgentiâ totum amphitheatrum personavit: inde verò Agapium Imperator accivit: *Cumque ab eo postularetur, ut Fidei suæ propositum abjuraret, promissâ sibi, si id faceret, libertate; contentâ voce professus est, se non ob aliquod crimen, sed pro pietate in Deum omnium conditorem quacumque sibi inferrentur supplicia, non modò alacri & forti animo, sed etiam cum voluptate esse subiturum. Hac locutus, simul cum diâlis facta conjungens, ursa, quæ adversus ipsum immissa fuerat, concito cursu obviam occurrit, seque ipsam bestia devorandum libentissimè obtulit. Post cujus laniatus adhuc spirans in carcerem reportatur: ubi cùm diei spatio supervixisset, sequenti die appensis ad pedes ejus lapidibus medio mari submersus est.* Ita Eusebius.

IX. Hujus memoriam celebrant Latini die 20. Septembris, quæ, secundum Eusebium ut supra, dies est sive illius agonis in amphitheatro coram Maximino, sive mortis quæ die sequenti contigit. Græci verò in Menol. de illo agunt 19. Augusti simul cum SS. Timotheo & Thecla (non quidem Protomartyre, sed aliâ ejusdem nominis posteriore): verum S. Agapius illis quidem in certamine quo coronati sunt socius fuit, sed ut dixi ad aliud certamen reservatus.

X. Hoc eodem anno 306. statui potest Martyrium SS. Aniceti Comitissæ & Photini seu Photii ejus fratris seu nepotis, de quibus Latini 12. Augusti; Græci verò in Menol. Basil. eâdem die hæc habent: *Photius atque Anicetus Christi Martyres Dio-*
cle-

clesiano Imperatore claruerunt . Erat autem Photius Aniceti nepos : cum verò ad Nicomediæ Populum concionem Diocletianus haberet , euntiaque in medium tormenta proferret , comminatur , fore ut morti succumberet qui se Christianum confiteretur . Adstans Anicetus Christianum sese clarâ voce enuntiavit ; comprehensusque vehementer est casus, & belluas in eum immixtas ovibus mitiores effecit ; orans deinde Hercules contrivit Idolum . Acceptâ autem gladii sententiâ , dum jam caput illi esset amputandum , suis precibus , manum tortoris aridam reddidit . Tunc accurrens Photius illum amplexatur , detentusque simul cum eo vincitus est : ac uterque diversis affectus cruciatibus , tandem suis igne consumptus . Ita Græci .

§. XXXVI.

SS. Acacius Guriæ Samonas & Abibus .

I. **A** Cacijs ex Acacia originem traxit , & familiâ nedum Christianâ , sed quæ plures Ecclesiæ ministros dederat . In Cappadocia ubi pater ejus degebat natus , apud Ecclesiasticos educatus , de litteris humanis vix tantum hausit , quantum Sacræ Scripturæ legendæ satis erat . Militiæ nomen dedit in numero Martensium sub Flavio Firmo Duce , ac proinde stationem habuit in Thracia . Quidam Centurionis gradum ei tribuunt , quidam verò simplicem Militem eum fuisse volunt : non diù tamen in hoc munere persistit , nam vigesimo quinto ætatis anno Martyrium subiit , ad quod plures alios suæ militiæ & ætatis se præcedere vidit ; quorum gloriâ sibi à Deo revelatâ , ipse testatur , se accensum fuisse ad præferendam cuicumque honori mundano Martirii coronam .

II. Ineunte igitur anno 306. , ut putatur , novis Maximiani Galerii Edictis iterum accensâ Persecutione , Firmus Tribunus milites suos omnes recensere censuit , ut qui essent Christiani ad Sacrificia compelleret . Plures illius sive blanditiis sive terroribus cessere ; Acacius tamen , se esse Christianum altâ voce declarat . Firmus ter inutiliter tentatum eum ad Ducem superiorem Bibienum nomine Perinthum remittit , datis litteris causam missionis exponens . Crastinâ die cum Perinthum pervenisset , Bibieno tunc alios Christi Confessores interroganti præsentatus fuit . Apparuit hilari vultu Acacius , & quis esset requisitus respondit , suum ac totius familiæ suæ esse nomen Christiani , pluraque alia adeò fortia & docta addidit , ut Bibienus ipse non modicam de eo æstimationem se concepiisse testatus fuerit . Ni-

hilo-

hilominus ab eo petiit, an sacrificare vellet: cùmque respondisset, se paratum potiùs esse quæcumque supplicia pati; tunc præcepit, quatuor palis eum alligari ac nervis bubulis cædi: quod tantâ immanitate super dorsum & ventrem impletum est, ut undique sanguis in terram diffunderet, Acacio interim nil aliud dicente, quam: Jesu Christe miserere servi tui, ne me deseras, Domine. Judex ipse aliquâ tactus miseratione, an sacrificare vellet, iterùm petiit; at ille: Tua, inquit, tormenta fortiolem me reddiderunt; antea aliquâ timoris & horroris specie ea respiciebam, sed dum modò quid sit pro Jesu Christo pati experior, & simul gaudium & vires quibus à Deo perfundor, totum me ipsi trado paratum absque hæsitazione omnia propter ipsum pati. Tu quod facis fac citiùs: quantò plura in me supplicia congefseris, tantò plus gratiæ apud Dominum meum cumulabis. Videns itaque Judex eum se vincere non posse, lictores ab eo torquendo cessare jussit: cùmque Commentariensis nomine Antoninus eum argueret, quòd tot se malis exponeret potiùs quàm obedire: eas, inquit Acacius, tu, ac pro te hæc monita custodi: ego mei Dei munitus gratiâ judicem minas & tormenta contemno; tu autem præsumis ut te audiam?

III. Tunc Babienus in carcerem eum trudi fecit, præcipiens, ut ferreis catenis toto corpore oneratus in loco obscuriori custodiretur, ne quisquam Christianorum seu alius ad illum accederet, sed solus ille qui cibum ei esset allaturus: hoc medio cogitans, se ejus constantiam utpotè juvenilem frangere posse. Antoninus, cui custodia demandata fuit, majori etiam rigore jussâ complevit, & septem diebus Sanctus Martyr plenus gaudio & fiduciâ in Deum, qui non fallit, permansit. Quibus elapsis è carcere extractus fuit, Byzantium cum aliis detentis adducendus, quò Flaccinus Provinciæ Proconsul Bibienum advocarat. In hoc itinere voluit Deus, ut Acacius onera fragilitatis humanæ experiretur. Plagarum dolor, catenarum pondus, itineris 25. leucarum labor, alimenti quo nutriebatur parvitas, Militum ad iter ipsum urgentium sævities nemine ipsum animante, corporis & spiritus vires adeò debilitaverant, ut crederet in via se moriturum. Non tamen desperans, sed obtento brevi ad quiescendum spatio, Deum precatus est, ne gratiâ suâ illum desereret sed corporis & spiritus vires augetet, quibus vitam suam Judicis sententiâ pro ipso dare posset.

IV. Tunc ab omnibus audita fertur vox adhortantis ipsum ad fortiter tolerandum, quâ quotquot cum illo vincti ducebantur, ad Christum conversi, ejus instructiones avidè suscipiebant.

Ad-

Additur , sequenti nocte in loco ad quem diverterant , & alterâ in domo , ubi Byzantium appulsi eum collocarunt , qui cum eo tenebantur vidisse plures ad eum accedere , eum consolantes & plagas ejus curantes , quos Angelos fuisse existimarunt . Postmodum in tetrum carcerem catenis oneratus & compedibus vinculus conjicitur ; hoc tamen non abstulit , quin sequentibus noctibus idem miraculum repeteretur . Viderunt hoc qui in carcere proximo detinebantur , & Custodi nomine Cassio renuntiaverunt , qui & ipse testis esse voluit : imò sapius carcerem ingressus fuit , ut dignosceret , quinam essent illi , quos cum Acacio conspexerat , sed ingressus alium neminem inveniebat , nisi Acacium solum aliquandò quiescentem plerumque tamen orantem . Interea Sanctus Dei perfectè sanus apparuit , viribus fortis ac robustus , & novâ vultus formositate vividus & decorus : quod Cassius iste pluribus amicis suis indicavit .

V. Biduo vel triduo post Byzantium Bibienus advenit , qui videns Sanctum Acacium ad se adductum in statu adeò florenti ac diverso ab eo , in quem tot mala , quibus afflictus fuerat , eum redegisse cogitaverat , ministros suos acriter increpavit , quòd mandata fideliter non implevissent : sed Antonino affirmante , se rigore sibi demandato omnia executum , & ostendente catenas , quibus adhuc Servus Dei onerabatur , accersito Cassio custodi impropèravit , quòd alimentis nimis lautè illum veluti Athletam pavisset : quod verbum resumens Acacius : Verè , inquit , Athleta sum tecum pugnaturus non in hoc mundo , sed ante Tribunal Dei , qui verbo suo me sanavit . Tunc Judex jussit ei contundi dentes , quòd ausus fuisset non quæsitus ita loqui . Referente autem Cassio custode miracula , quæ in carcere contigerant , & quorum testis ipse fuerat , nihil motus Bibienus Sanctum Virum in collo cædi jussit , asserens eum à Christianis pecuniam accepisse .

VI. Interim mediis in doloribus S. Acacius ridebat : cumque Judex ob id magis irâ accenderetur , Sanctus Vir ei dixit : Non irrideo ob mala ad quæ per totam æternitatem festinas , sed ob hæc maximè doleo . Tuam stultitiam irrideo , quâ tuum deseris Creatorem , ut ligna & lapides adores . Cui Judex : Ergone , inquit , in tua stultitia persistens nunquam sacrificabis ? At Acacius pari efficacità respondit : Tu verò à laniandis hominibus nullius criminis reis nec tibi in aliquo injuriis numquam cessabis ? His auditis furens Bibienus nucis arbori appensum virgis immaniter cædi super dorsum & ventrem præcepit . (Nux illa Arcadii temporibus adhuc perseverabat anno scilicet 404 . juxta quam

quam parva Basilica erecta fuerat, teste Socrate L. 6. hist. c. 23.). Sancto autem Acacio in suis excessivis doloribus Deum invocante, vox eum confortans de Cœlo audita tortores sine verbo & motu semianimes reliquit.

VII. Quamobrem victus ejus constantiâ Bibienus, audito, quòd Byzantium Flaccinus advenisset, Sanctum Acacium unâ eum verbali processu & litteris suam crudelitatem & Martyris invictam constantiam abundè testantibus ad eum remisit. Flaccini uxorem fuisse Christianam certò traditur, quæ ab eo etiam sub juramento obtinuerat, ut in judiciis supra Christianos saltem ab iis diù torquendis abstineret. Acceptis ergo à Bibieno processu & litteris, Sanctum Acacium carceri tradi jussit, absque catenis tamen & absque severa custodia. Quinque post dies adduci ad se Sanctum Martyrem & legi processum jussit. Audiens autem quòd adeò immaniter in eum actum fuisset, detestatus est, asserens erga Virum militarem celerem expeditionem esse adhibendam, Ne ergo quod in alio damnabat ipse faceret, sententiam capitis in S. Acacium illicò pronuntiavit. Quâ auditâ Sanctus Martyr summo gaudio perfusus fuit, ac Deo gratias agens ad locum supplicii ductus, obtento brevi ad precandum spatio, collum gladio seu verius coronæ submitit. Ejus Corpus quorundam pietate sublatum, possibili honore in loco dicto *Staurion* conditum fuit. Martyrologia S. Hieronymi ipsi, quem Agathium vocant, alios nonaginta in Martyrio socios jungunt: qui fortè illi fuerunt, quos secum victos in itinere Perintho Byzantium ad Christum convertisse dixi, quod indicant quoquè Græci in Menol., ut infra.

VIII. De S. Acacio memoria colitur in Martyrol. Rom. 8. Maii his verbis: *Constantinopoli Sancti Acathii Centurionis, qui in Persecutione Diocletiani & Maximiani à Firmo Tribuno delatus quòd Christianus esset, & à Bibieno Judice Perinthe sevirissimè tortus, Byzantii demum à Flaccino Proconsule capitis damnatus est: cujus Corpus ad Scyllacium littus Divinitus postea delatum, ibi honorificè asservatur.* Historiam hanc de Translatione Corporis S. Acathii Scyllacium Baronius in Notis ibi se legisse dicit ab ea Ecclesia missam: cùm enim capsula plumbea, in qua Martyris Corpus asservabatur, ab Infidelibus projecta fuisset in mare, Divino auxilio natans ad littus prope Scyllacium pervenit: aliqui tamen hoc in dubium vertunt.

IX. Græci verò in Menol. Basilii S. Acacium diè 7. Maii ita celebrant: *Acacius Christi Martyr fuit, Maximiano Imperatore ex Regione Cappadociæ, Militiam exerceens in scholarum cohor-*
te.

te. Cognitus autem ut Christianus, comprehensus fuit & adductus ad Regionis Præsidentem, ac Christum confessus graviter caditur. Deinde ad alium Præsidentem missus ac vincitus una cum aliis captivis Byzantium adducitur, flagrisque crudelibus & tortuosis lignis toto corpore cæsus, in carcerem detruditur; ubi accurrentes Divinus Angeli incolumem ipsum reddiderunt. Cum autem omnes, qui in carcere erant eum tam repente sanitati restitutum conspicerent, in Christum & ipsi crediderunt, ac proinde capite obtruncati sunt. Deinde Acacius è carcere eductus atque ad alium Præsidentem remissus rursùmque excruciat, capite obtruncatus fuit: & Reliquiæ ipsius depositæ fuerunt in loco, qui Staurium dicitur.

X. SS. Guriæ & Samonas Edessam in Mesopotamia patriam habuere, & in ea educationem. Guriæ contemplationi deditus, ut popularis tumultus diversionem declinaret, Edessâ relicta in agrum secessit, ubi usque ad provectam senectutem solitariam vitam egit, in mortificationis & pœnitentiæ actibus adeò sedulus, ut *Continenti*s nomine vulgò appellaretur; & faciei squallor vitæ austeritatem demonstrabat, cum alioquin vir esset gravitate fortitudine & caritate ornatus. Samonas junior erat corpore & spiritu vivax; hic Guriæ se adjunxit, ut virtutis ejus sectator fieret ac imitator: quibus accessit tertius nomine Abibus utroque ætate junior, sed pietate & humilitate non minor; Diaconus hic erat, cum cæteri duo essent merè laici (Græci tamen eos Sacerdotes asserunt.) Hi tres vitâ verè sanctâ, & pietatis exercitiis ad Martyrium se disponebant, eorumque virtutis fama nedum Edessâ & finibus ejus sed totâ Syriâ vulgabatur.

XI. Ab anno 303. Diocletiani Persecutio illuc pervenerat, Augaro Zoaris filio Magistratum Urbis gerente, & Antonio seu Antonino Provinciæ Præsidente. Cùmque initio anni 304. Persecutio etiam ad Laicos extensa fuisset, Guriæ & Samonas alique multi comprehensi fuere, eò quia, ut volunt Græci, Confessoribus antea captis alimenta suppeditarent. Præsentati igitur Antonino, cum ejus suasionibus acquiescere nollent, in carcerem ubi plures alii antea clausi fuerant conjecti sunt. Licet autem ex aliis detentis multi citò dimissi fuerint, vel quia Fidei turpiter renuntiarent, vel aliâ non notâ causâ; Guriæ tamen & Samonas, contra quorum virtutem Diabolus magis furebat, longiori tempore detenti fuere; idèò Confessorum nomine speciali titulo ornari meruerunt.

XII. Dum adhuc in carcere permanerent, abdicato anno 305. à Diocletiano Imperio, Maximinus, qui ei in Oriente successit, iteratis contra Christianos Edictis sequenti anno in

Mesopotamiam novum Præsidem misit Mufonum quemdam, hominem cui nihil gratius erat quàm in Christianos sævire. Hic præfatos duos Sanctos Viros, quorum non esse impios totum crimen erat, ad se duci jussit. Hos primò blandè allicere, deinde minis terrere studuit; sed cùm videret, eos nec blanditiis flecti nec terreri minis, ad carnifices sibi confugiendum esse existimavit. Utrumque ergo unâ manu in aere suspensum, gravioribus saxis ad pedes alligatis, ab hora nona matutina usque ad secundam pomeridianam reliquit. Inde ad eos accedens petit, an tandem Imperatoribus obedire decrevisset; sed cùm nec verbum respondissent, jussit eos deponi, & in profundum obscurumque carcerem compedibus vinctos dejici. Sequenti verò die muro ostium carceris claudi mandavit; eosque prorsus in tenebris, nec aqua guttam in alimentum eis permittens, tridudò dereliquit. Tandem rupto muro ostium carceris denuò apertum fuit, in quo usque ad diem decimam Novembris inclusi permanserunt.

XIII. Tunc Judex eos ad se iterùm vocatos magis firmos & in proposito constantes invenit: videns tamen Guriam viribus corporis acedò fractum & macie confectum, ut si quæstioni exponeretur, ne spiritum emitteret prudenter timeri posset, ab ulteriores cruciatibus eum dispensavit. At Samonam viribus adhuc fortem uno pede in aere suspendi, in altero autem ingentem ferri molem, ac si eum vellet per medium discindere, jussit alligari: quo factum fuit, ut coxa è loco demitteretur, & fieret omninò impotens ad ambulandum: & in tanto cruciatu per quinque ferè horas permanens, elatis continuè ad Cælum oculis, nec gemitum nec verbum protulit. Quare iterùm ad carcerem tracti, usque ad 15. Novembris ibi detenti sunt: quâ die Judex ante lucem in atrio cum Ministris sedens, Sanctos Viros coram se statui jussit: & S. Gurias quidè ætate malis & jejuniiis confectus, duobus illum sustentantibus, accessit, Sanctus verò Samonas ex integro portabatur: tunc Judex post tentatam verbis inutiliter tamen utriusque constantiam, desperatè sententiam capitis in utrumque protulit. Itaque Sancti Martyres curru impositi, nondum die illucescente, in montem ab Urbe remotum deducti sunt, ibique obtentâ priùs breviter precandi veniâ capite truncati sunt. Eorum passio in Martyrol. & Menol. die 15. Novembris notatur: quâ die accidisse creditur, & ut puto anni 306.; estò enim Maximinus anno præcedente imperare cœperit, nova tamen adversus Christianos Edicta solum sequenti anno promulgavit.

XIV. Licet autem eadem die notetur Passio S. Abibi, hæc tamen non contigit eodem anno sed multò post, nempe sub Licinio circa annum 322. ; Deus enim Sanctum istum Diaconum ad instructionem Fidelium superstitem esse voluit: quo in munere tanto zelo & alacritate continuavit, ut nec Persecutio quam Licinius excitarat eum retardaret: quare à Lyfania Præsides certior factus Licinius, ut de medio Abibum tolleret speciali mandato ei præcepit. Vir Dei cum matre & pluribus de familia in loco extra Urbem suo ministerio vacans morabatur: cum scivit se inquiri, latebras petiit, ut diù quæsitus inveniri non potuerit; metuens tamen, ne occasionem Martyrii fugiens Dei iram provocaret, Theotegni uni ex primis Præsidis Ministris spontè se præsentavit. Quamvis autem Theotecnes ut se reciperet eum adhortaretur, asserens nihil inde damni matri & cognatis ejus secuturum; Abibus tamen dixit, se jam paratum omnia pro Christo pati, ideòque ad eum accessisse: quòd si noller eum ad Præsidem trahere, se ipso eum aditurum. Quare Theotecnes timens, ne sibi aliquid mali ob id eveniret, Lyfaniam adiit eique renuntiavit, Abibum diù quæsitum se sibi spontè præsentasse.

XV. Lysanias hæroicum hunc Abibi animum veluti suæ auctoritatis contemptum interpretatus, illum ad se ductum severè increpare cœpit, cur Diis sacrificare noller; sed cum Abibus intrepidè respondisset, se nunquam verum Deum deserturum ut adoraret opera hominum; Judex stipiti eum brachio suspendi, & latera ejus ferreis unguis lacerari præcepit, & interea & promissis & minis ipsum seducere tentabat, dicens ei: stulte, quid tanta patiens lucraris? cui Sanctus Martyr respondit: Nos præsentia contemnimus propter ea, quæ speramus futura; non enim sunt condignæ passionibus hujus temporis ad futuram gloriam, quæ revelabitur in nobis: quare Lysanias videns eum insuperabilem, flammis eum addixit. Ad locum supplicii extra Urbem situm mater & cognati ejus sequebantur, quos amplexus in osculo pacis & Deum precatus, flammis traditus spiritum emisit. Igne autem extincto, sublatum corpus balsamo conditum & vestibus pretiosis indutum cognati ejus juxta Sanctos Guriam & Samonam sepelierunt, ut qui adeò conjuncti fuerant viventes, conjuncti manerent etiam post mortem: is S. Abibi exitus gloriosus fuit.

XVI. De SS. igitur Guria Samona & Abibo conjunctim loquuntur etiam Martyrologia & Menologia die 15. Novembris, quia hæc mensis die licet diverso anno passi sunt. Martyrol.

Rom. his verbis : *Edeſſæ in Syria Sanctorum Martyrum Guria & Samonæ ſub Diocletiano Imperatore & Antonino Præſide. Ibidem paſſio Sancti Abibi Diaconi, qui ſub Licinio Imperatore & Lyſania Præſide anguibus laceratus in ignem conjeſtus eſt. Menologium verò Baſilii ita fuſius habet: Certamen Sanctorum Confeſſorum Guria Samonæ & Abibi, qui in urbe Edeſſa Martyrium ſubiſere. Iſti Diocletiano Imperatore & Antonino Duce claraerunt: delati autem, quòd Chriſtianos in cuſtodia incluoſos curarent; Gurias inquam & Samonas, qui ex eadem urbe erant & in Ordine Sacerdotum cenſebantur, coram Duce adducti neque Idolis ſacriſicare volentes, ſublimes ex altera tantum manu horis quinque pependere: deinde depoſiti, cùm in confeſſione perſiſterent, iterum inverſo capite ſuſpendeduntur: poſtea in tenebriſoſum lacum conjeſti, gladio demum caſi ſunt. At Sanctus Abibus Diaconus, Licinio Imperatore Martyrium ſubiit; accuſatus enim quòd vicos peragrans ſacrarum litterarum lectione Infideles confirmaret, ejuſdem impii & iniqui Imperatoris juffu in caminum aridis virgultis accenſum injectus, vitam lætus finiuit.*

VXII. Prætere non poſſum inſigne factum, quod ſeculo quarto in finem vergente ad horum trium Martyrum gloriam contigit. Quidam natione Gothus Romanæ Militiæ adſcriptus, cùm Edeſſæ ſtationarius eſſet ſponſam petiit unicam filiam nomine Euphemiam Sophiæ Viduæ, apud quam hoſpitabatur. Diu renuit mater, tandem verò conſenſit: cùm autem Gothus paulò poſt eſſet diſceſſurus & uxorem jam totam ſecum ducere vellet, Sophia mater ambos ad ſepulcrum Sanctorum Guria Samonæ & Abibi duxit; ubi Gothus tangens eorum ſepulcrum juravit, ſe uxorem ſuam Euphemiam uti decebat tractaturum, ſui juramenti Sanctos Martyres invocans fidejuffores, ac deinde diſceſſit: porrò cùm jam ad locum conſueti ſui domicilii Gothus appropinquaſſet, declaravit Euphemiam ſe alteram habere uxorem, cui ipſa tanquam ancilla Domini parere debebat, comminatus ei mortem ſi quod reverà erat prodiſſet; ex quo tempore cum ea tanquam cum vili mancipio agere cœpit. Nec profuit, quòd illa objiceret juramentum, quo ipſe appoſita Martyrum cautione ſeſe obſtrinxerat; nam parere coacta fuit, & de uxore in ancillam verſa, domini tanquam procum eam reſpicienti, ac proinde ſummâ duritie cum ea agentis, inſervire.

XVIII. Nihilominus Euphemia ad partum deveniens filium feliciter enixa fuit, quem domina cùm veneno impiè ſuſtulſſet, paulò poſt & ipſâ morte ſublata fuit. Suſpicatus Gothus, mortem hanc veneno ab Euphemia clàm propinato accidiſſe, eam in

codem sepulcro, quo domina, impiè reclusit. In hoc igitur misero statu posita Euphemia ad Deum & Martyres fidei flores preces dirigit; & ecce tres Viri lumine circumfulti tribus equis albis insidentes ei apparent, suumque ei auxilium pollicentur: cumque obdormisset, evigilans, se prope Edeßam in Ecclesia Sanctorum Martyrum positam invenit. Tunc illa gratias Deo agens, ad sepulcrum Martyrum procubuit, & quidquid sibi evernerat Presbytero narravit; qui ad illius matrem mittens, Euphemiam illi tradidit, omnibus de tanto miraculo Deo gratias referentibus. Aliquo elapso tempore Gothus Edeßam iterum missus, apud Sophiam hospitium quæsit, putans eam ignaram esse eorum quæ evernerant: a Sophia velut gener suus humaniter exceptus, ei de filia sua mendaciter multa retulit; at stupens ac tremefactus remansit, cum coram se stare Euphemiam vidit, & quàm iniquè erga eam egisset, sibi à Sophia improperari audivit: quæ de omnibus processum verbalem confecit, & ad S. Eulogium tunc (anno 378. vel 379.) Edeßenæ Urbis Episcopum detulit, & iste ad Præsidentem. Præsides autem cum Gothum & Euphemiam vocasset, coram Eulogio & Populi multitudine causam egit. Gothus conscientiam victus omnia confessus fuit & misericordiam imploravit: at Præsides tantum crimen indignum veniam iuste judicans, caput ei amputari præcepit; & solum ad S. Eulogii preces, ne deinde cremaretur ut statuerat, indulxit. Hæc ex Metaphraste & Aretha Tilmontius.

§. XXXVII.

SS. Pelagia Bernices Profdoces & Domina.

I. **A**ntiochia Urbs toto Romano Imperio celeberrima, celeberrimum quoque immanitatis theatrum à Persecutoribus Christi, Diocletiano & ejus in Imperio confortibus, effecta fuit. Quare Eusebius L.8. Hist. cap. 12., post enarrata, quæ in diversis Orbis Provinciis Sancti Martyres passi sunt supplicia, Antiochiam deveniens ait: *Jam verd ea, quæ apud Antiochiam gesta sunt, quid opus est in memoriam revocare? ubi alii craticulis impositi, non ad mortem usque sed ad diuturnitatem supplicii torrebantur. Alii dextras suas in ignem immittere maluerunt, quàm impia libamenta contingere. Ex quibus nonnulli periculum vitantes, priusquam caperentur & in insidiatorum manus inciderent, ex sublimibus tabulatis præcipientes se dederunt, propter impiorum malitiam mortem lucro deputantes. Quadam etiam sanctissima Femina,*

Ob animi fortitudinem admirabilis, opibus ac splendore generis, bonâque in primis samâ Antiochia percelebris, quæ duas filias virgines formâ & ætatis flore præstantes Christianæ Religionis præceptis insituerat &c.. Quibus primo loco Pelagiam videtur indicare, quæ ut satellitum manus evaderet, præcipitem ex sublimi domus suæ se dedit; secundò Dominam & Bernicem ac Prosdocem filias, quæ eâdem ratione in fluvium spontè se dejecerunt, ut infra dicam.

II. Nec quicquam moveat, quòd, ut dixi in Theol. tom. 1. in 1. 2. qu. 3. de Act. hum. moralit. dub. 7. §. 3., & tom. 2. in 3. par. qu. 2. de Bapt. dub. 2. §. 1., nec Fidei nec pudicitie causâ liceat ultrò sibi mortem inferre, ut S. Augustinus L. 1. de Civit. Dei cap. 25. 26. & 27. apertè docet: quandoquidem si hoc fiat ex speciali Dei mandato vel instinctu, licitum esse concedit c. 26. ubi allato exemplo Samsonis, & Abrahamæ qui Deo iubente filium suum occidere paratus fuit, Cum, inquit, Deus jubet, seque jubere sine ullis ambagibus intimat; quis obedientiam in crimen vocet? quis obsequium pietatis accuset? Quod & in Milite confirmans, qui si Imperatoris justû hostem occidit homicidii reus non est, cuius tamen reus esset si spontè & propriâ auctoritate faceret, ait: Quod si ita est iubente Imperatore, quantò magis iubente Creatore? Sed hoc in exemplum trahi non debere ita subdit: Sed non ideò sine scelere facit, quisquis Deo filium suum immolare decreverit, quia hoc Abraham laudabiliter fecit; quia Abraham Deo iubente fecit: & hâc viâ salvat harum Sanctarum Virginum factum, quæ ut insectatores suæ pudicitie devitarent in rapturum & necaturum se fluvium projecerunt. Et S. Joannes Chrysostomus tom. 1. hom. 40. modo tom. 2. homil. 1. in S. Pelagiam, eam salvat, quòd, ut infra dicam, ne violaretur se præcipitem dederit, quia id Divino consilio fecit: Non enim, inquit, sola intus erat, sed Jesum habebat consiliarium; ipse aderat, ipse cor ejus tangebatur, ipse animum confirmabat, ipse metum pellebat. Illud autem non sine causa faciebat, sed quia ipsa Martyr se antea dignam ejus auxilii præbuerat.

III. Sancta igitur Pelagia Antiochena erat Virgo quintum decimum ætatis agens annum, æquè formosa & castitatis custos severa. Prima Christianæ Religionis rudimenta à Sancto Luciano Presbytero Antiocheno & postea Martyre (anno 312.) haufisse fertur. Primo Persecutionis Diocletiani rumore audito domi se conclusit; cum Milites repentè irruentes & ad fores stantes vidit, qui ad judicium illam vocabant, spe ab illa eripiendi vel fidem vel castitatem. Non pater tunc intus erat non mater non

nutrix non ancilla, non denique vicinus aliquis aut amicus præstò erat, sed sola carnificibus exposita: quid tenera puella in hisce angustiiis factura erat? id planè quod Deus intus eam agens illi suggerit. Momento temporis intrepidà facie ad fores domus astitit, petiitque à Militibus, ut sibi liceret redire intro & vestem mutare, ac sic decenter coram Magistratu comparere. Milites, disponente Deo, fraudem non assecuti annuerunt. Sic Beata Virgo à mediis retibus avolavit, & veluti venatorum manus evasit.

IV. Regressà igitur domum vestes magis magnificas induit, seu veriùs exuta veste corruptionis, vestem immortalitatis assumens, Jesum Christum precata, ejusque Spiritu afflata in superiorem domus partem ascendit, & inde se præcipitem dedit; atque illicò spiritum emittens prædonum artes elusit: *Ut verò discas* (ait Chrysost. relatus) *id non sinè Divino nutu factum fuisse, id maxime comperias, tum ex Virginis alacritate, tum ex eo quoddà Milites dolum non effecerint, quod petenti annuerint, & quoddà res ad exitum deducta sit: neque minùs id ediscere liceat ex ipsa mortis ratione. Multi enim è sublimi tecto delapsi, nihil mali passi sunt; alii item membris quibusdam corporis mutilati, longo post lapsum tempore vixerunt: Beata autem Virgini nihil hujusmodi contingere voluit Deus: sed jussit animam statim ex corpore exire, & eam, ut quæ satis ceriasset omniaque impleisset, excepit: non enim ex casus natura, sed ex Dei jussu mors consequuta est: hæc & alia in laudem hujus Virginis S. Chrysostomus. Eam quoque S. Ambrosius celebrat L. 3. de Virginibus: undè in Martyrol. Rom. 9. Junii dicitur: Apud Antiochiam S. Pelagiæ Virginis & Martyris, quam Sancti Ambrosius & Joannes Chrysostomus magnis efferunt laudibus. Et eadem die in Menol. Basil. de S. Pelagià legitur: Hæc apud Præfectum accusata, càm suæ metueret virginitali, Deum precata est, ac decenter cooperta, summam domum, in qua jussu Præfecti detinebatur conscendit; seque inde præcipitans animam suam Deo reddidit. Venerabilis Joannes Chrysostomus. encomiis ipsam celebravit, tum propter illibatam ejus castimoniam, tum propter eximias virtutum exercitationes.*

V. Verùm inter narrationem Ambrosii & Chrysostomi aliqua discrepantia videtur, ut notat Baronius ibi; nam S. Ambrosius Pelagià cum matre & sorore in fluvium se conjecisse videtur dicere, Chrysostomus autem è sublimi tecto se dejecisse dicit: cæterùm utriusque Patris opuscula legens nullam in hoc discordiam reperi; de Pelagiæ enim morte nihil aliud dicit Ambrosius, nisi *Matris in gremio fertur oruasse caput, nuptialem induisse*

duisse vestem, ut non ad mortem ire diceret sed ad Sponsam : quibus à genere mortis præscindit. Dicit quidè in gremio matris ornat- se caput, cùm Chrysostomus dicat matrem tunc abfuisse ; sed hoc ex aliorum sententia eum protulisse, indicat illud fertur : nam antea dixerat : Cùm se à prædonibus circumfœderi videret ab- sente matre & sororibus &c.. Sanctam verò Pelagiam mortuam jam fuisse priusquam aliæ in fluvium se deicerent, ipse Ambro- sius ostendit, dum subdit : At ubi detestandi Persecutores ereptam sibi viderunt prædam pudoris, matrem & sorores caperunt quærere.

VI. Major difficultas est de matre & sororibus, ad quas in- quirendas dicit S. Ambrosius, quòd Persecutores ereptâ sibi Pelagiâ processerunt : an istæ fuerint S. Pelagiæ mater & sorores, & an Domnina Bernices & Prosdoces, quæ ut dicam in flu- men se projecerunt. In hoc verius judico, quòd dato etiam ex Ambrosio, eas, quas carnifices infecuti sunt & quæ in fluvium se dejecerunt, fuisse matrem & sorores S. Pelagiæ (de quibus tamen S. Chrysostomus, qui Antiochiæ duas illas homilias de S. Pelagiâ habuit, nihil dicit) illæ tamen diversæ fuerunt à Do- mnina Bernice & Prosdoce. Tum quia Chrysostomus, qui de his homiliis alias §. 1. habuit, eas ad Pelagiam pertinuisse non dicit ; dicturus utique, si una ex eis fuisset illius mater & aliæ sorores. Tum quia Domnina & filia ejus, cùm Pelagia Marty- rium subiit, jam Antiochiam reliquerant & Edessam se contule- rant, ut ex Chrysostomo statim dicetur. Quare vel Domnina & filia diversæ sunt ab iis de quibus Ambrosius, nempe à Pe- lagiæ matre & sororibus, vel Ambrosio res supposita fuit aliter quàm revera contigerat.

VII. Domnina igitur mulier virtutibus ornatissima, genere illustri, necnon divitiis abundans, ipsis Persecutionis temporibus sollicita de filiabus suis Bernice & Prosdoce, quarum casti- moniam ac Fidem summo zelo custodiebat, domi aliquandiu conclusas detinuit : sed videns, eas Antiochiæ parum tutas esse, ubi etiam ab amicis & cognatis ipsis timendum erat, ne eas Magistratibus cum Fidei & castitatis periculo traderent, ex Urbe secretò educens exemplum Abrahæ & Lothimitata, Edessam Mesopotamiæ cum illis se recepit. Sed hoc asylum parvoeis tempore profuit ; cùm enim anno 306. Maximianus novo Edi- cto præcepisset, ut omnes denuntiarent si quos scirent Chri- stianos, & vel maritus uxorem vel pater filios vel filii paren- tes ; ipsemet Domninæ maritus & Bernices & Prosdocus parens, maritalis & paterni amoris oblitus uxorem ac filias prodidit ; & ad locum quò confugerant, Edessam nempe, cum Militibus

accessit. Captæ igitur, ut Antiochiam reducerentur, voluntariè comprehensiores suos sequebantur: *cùm enim* (ait Chrysostomus) *fugiendum erat fugerunt, cùm ineunda erant certamina constiterunt, & amore Christi vincitæ sequebantur; ut enim tentationes accersendæ non sunt, ita cùm advenierint decertandum est; ut inde nostræ lenitatis, hinc nostræ fortitudinis specimen edamus: id quod illæ tunc fecerunt: & reversæ sunt & decertarunt.*

VIII. Genus autem certaminis (prosequitur Chrysost.) fuit ejusmodi. Venerunt in Urbem Hierapolim nomine (modò Aleppum). Viam illam quâ redibant fluvius præterfluebat. Dum ergo Milites prandium fumerent & inebriarentur, conscio etiam ut aliqui volunt & adjutore patre, ut Milites fallerent, ejus operâ Milites amoventes, in medium flumen ingressæ sunt, nimirum mater & filia, seque ipsas in illa fluenta demerserunt, sicque novo ac inusitato Baptismate ablutæ Cælum intrarunt. Quærit hic S. Chrysostomus, cur Domina in judicium filias secum trahere noluit, sed eas potius secum traxit in flumen: & ait, hoc fuisse, *non quòd tormenta reformidaret, sed ne illæ oculis lascivorum paterent: non metuebat, ne quis latera ipsi effoderet, sed ne quis filiarum corrumpere virginitatem timebat.* Additque, multò graviores in flumine cruciatus tolerasse: multò enim gravius est & acerbius..., propria viscera, filias inquam, manu sua demergere ac suffocari cernere, quàm lacerari carnem videre; & ipsam fieri earum necis ministram & quasi carnificem, quàm ab aliis hoc peractum videre. Earum Corpora Antiochiam delata ibi suo tempore asservari indicat idem Chrysostomus. De his suppresso nomine agunt Augustinus L. 1. de Civit. Dei c. 26., & Eusebius L. 8. hist. cap. 12., ubi totam historiam refert: memorant Latini in Martyrol. 14. Aprilis, & Græci in Menol. 4. Octobris,

§. XXXVIII.

SS. Euphemia Serenus Phileas & Philoromus.

I. **E**uphemia apud Latinos & Græcos Virgo & Martyr celeberrima est. Id quod de ejus Martyrio certum habetur, sumtum est ex S. Asterio Amasæ Episcopo, qui ex quadam pictura quarto seculo picta, & super ejus sepulcrum posita, in qua illud exprimebatur, descripsit: quæ descriptio extat etiam in Conc. Nicæno II. Act. 4.: „In ea ergo tabula representabantur: „ S. Euphemia tamquam Virgo, quæ Deo suam virginitatem

„ obtulerat : stans Judex (nomine Priscus) acerbo ac truci vul-
 „ tu contuens Virginem : Magistratus satellites ac Milites non
 „ pauci : Commentarienses tabulas ferentes ac stilos , quorum
 „ unus manum è cera educens intensè adspicit in adstantem ju-
 „ dicio Virginem totam despectens faciem , tanquam jubeat
 „ loqui clariùs , ut ne difficilè audiens mendosa scribat ac di-
 „ gna reprehensione . Adstat autem Virgo pullâ veste & pallio
 „ induta , quam ducunt ad Præsidentem duo Milites , alter quidè-
 „ ante trahens , alter verò à tergo urgens . Virginis habitus pu-
 „ dore & constantiâ mixtus enitet : inclinat quidè-
 „ ac cernua oculos demittit , tanquam virorum erubescens obtutus ; stat
 „ verò imperterrita , nihil in certamine timidum patiens .

„ II. Ulteriùs autem procedente picturâ , visebantur carni-
 „ fices quidam in levibus nudi tunicis operi jam insistentes , ac
 „ alter quidem apprehendens Virginis caput , & retrò insectens ,
 „ alteri ejusdem os præbebat expeditum ad poenam , qui malleo
 „ Virgini dentes excutiebat . Unde guttæ sanguinis ex ore
 „ fluentes adedò ad vivum exprimebantur , ut intuentis oculi
 „ à lacrymis temperare non possent . Iterùm autem Euphemia
 „ in carcere exprimebatur , quæ in pullis vestibus sola sedens ,
 „ ambaque manus ad Cælum attollens Deum sibi adiutorem
 „ invocabat ; ac oranti apparebat super caput sacrum Crucis
 „ signum proximæ passionis suæ symbolum . Tandem alio loco
 „ ignem validum Pictor expresserat , & in ejus medio Sanctam
 „ Virginem expansis quidè-
 „ in Cælum manibus , nullam ta-
 „ men tristitiam præferentem sed potiùs gaudentem , uti ad in-
 „ corpoream & beatam vitam properantem , . Hucusque S. Eup-
 „ hemiæ Martyrium manu Pictor , Sanctus verò Asterius Sermo-
 „ ne descripsit .

III. Chalcedone passam fuisse conveniunt omnes , Fortunatus L. 8. carm. 4. de Virginitate his verbis

Euphemiam Chalcedon offert .

Sanctus Paulinus qui fortè omnium primus de ea scripsit idem confirmat Poem. 24. his versibus .

Et quæ Chalcedonis Euphemia Martyr in oris

Signat virgineo sacratum sanguine littus .

De facto autem in ipso loco , in quo Martyrium passa fuerat , idest in Suburbio Chalcedonenſi & maris littore , & ubi erat ejus sepulcrum , constructum fuit magnificentissimum Templum ; & idedò locus ille vocatur à S. Paulino littus maris sanguine ejus conspersum . Chalcedonè quoquè ejus Martyrium ponit , quamvis diverso modo Martyrol. Rom. , sic enĩ ait 16. Septembris :

Chal-

Chalcedone natalis Sanctæ Euphemie Virginis & Martyris, quæ sub Diocletiano Imperatore & Prisco Proconsule tormenta carceres verbera argumenta rotarum, ignes pondera lapidum bestias plagas, virgarum ferras acutas, sartagines ignitas pro Christo superavit; sed rursus in theatrum ad bestias ducta, cum orasset ad Dominum ut spiritum suum susciperet, unâ ex iis morsum Sancto Corpori infigente, cæteris pedes ejus lambentibus, immaculatum spiritum Deo reddidit. Plura cerè tormentorum genera S. Virginem tolerasse hic narratur, quàm pictura supra ab Asterio relata exprimat. dici posset, plura ibi omiſſa, quia una tabula omnia capere non poterat: at ne hoc dicam, detinet me diversum genus mortis, nam hic morsu bestie necata dicitur, ibi autem ut incendio sublata exprimitur. Passa fuisse creditur quinto Persecutionis Diocletiani anno nempe 307., quamvis Baronius in Ann. ad an. 311. ejus passionem num. 18. referat.

IV. Templum in honorem S. Euphemie Chalcedone erectum, & in quo sacrum ejus Corpus depositum fuit, variis eventibus illustre evasit. Primò enim, ut refert Socrates L. 6. hist. cap. 6. & Sozomenus L. 8. cap. 4. anno 400., in illud ingressi Arcadius Imperator & perfidus Gainas natione Gothus Sectâ Arianus, juramenti invicem præstitis confirmarunt, neutrum alteri insidias structurum fore: quæ cum Gainas impiè violasset, miserè tandem interemtus fuit. Secundò: hujus Ecclesie decus maximè auxit Concilium Chalcedonenſe Generale quartum, quod in ea celebratum fuit anno 451.: cujus occasione Martinus Imperator, ut ipsemet loquitur in fine Actionis sextæ, Chalcedonenſi Civitati salvo Ecclesie Nicomediensis jure Metropolis nomen his verbis concessit: *Ad honorem Sanctæ Martyris Euphemie & vestra pariter sanctitatis, Chalcedonensium Civitatem, in qua Sancta Fidei Concilium gestum est, Metropolis privilegia habere sancimus, nomine tantum banc honorantes, salvâ videlicet Nicomediensium Civitati propria dignitate: quod omnes approbaverunt dicentes: Justum judicium Imperatoris digni Sanctæ Martyre.*

V. Occasione hujus Concilii prodigium S. Euphemie gloriosum accidisse narrant Constantinus Tejenſis apud Sur. 11. Junii, Nicephorus L. 15. cap. 5., Zonaras, Glycas & alii, quamvis in aliquo discordes. Cum enim Synodus Decreto suo Fidem Catholicam contra Eutychem firmasset sed aliqui adhuc se opponerent, statuerunt super S. Euphemie Reliquias editam Definitionem ponere, sperantes, aliquo miraculo illius precibus veritatem Catholicam fore confirmandam; ac de facto dum San-

Æ Martyris Corpori chartam, in qua declaratio scripta erat, applicassent, extendisse illam manum, & chartam deosculatam defensoribus Veritatis reddidisse: & propterea dicunt, S. Euphemiam chartam manu tenentem pingi consuevisse. Alii verò dicunt, Patres Concilii duas chartas supra S. Martyris Corpus reliquisse, unam dogma Catholicum, hæreticum alteram continentem: cum totam noctem precibus transegissent, mane revertentes, invenisse chartam Catholicam in manibus S. Martyris, hæreticam verò ad pedes illius projectam.

Hoc posteriori modo exponunt Græci in Menol. Basil. die 11. Julii, quâ hujus celeberrimi miraculi memoriam celebrantes dicunt: *Theodosio Juniore imperante prodiit Eutyches Monachus & Presbyter hæreseos auctor, docens, Christo Domino nostro unam naturam inesse. Segregatus idcirco à Fidelium communionem à Flaviano Constantinopolitano Patriarcha, non tamen cessavit Ecclesiam perturbare. Cum autem Sanctus Marcianus Imperium adeptus Synodum sexcentorum ac triginta Patrum convocasset, & cum Hæreticis disceptaretur, placuit universis, duos tomos alterum Orthodoxorum alterum hæreticorum exponi, apertâque Martyris urnâ tomos ejusdem pectori superimponi, & ab illa probatum teneri. Hoc factò post sex dies urnam referantes, repperunt hæreticorum quidè tomum sub pedibus ejus positum, Orthodoxorum verò ejusdem manu retineri. Atque ita hæretici confusi sunt, Orthodoxi verò summo gaudio affecti.*

VI. Baronio tamen ad ann. 451. num. 21. &c. hoc miraculum suspensum videtur: nam Patres in Conciliis non ex miraculis sed ex Scripturis in primis & antiquis Traditionibus Patrum Veritatem inquirere consueverunt. Et eò maximè quòd Acta Concilii Chalcedonenfis hujus facti & miraculi nullam mentionem faciunt. Verùm ego quidè Baronio assentior, Patres in Conciliis veritatem dogmatum ex Scripturis Traditione & Patribus, non ex miraculis exquirere solitos fuisse; sed puto non negabitur, quòd stabilitâ jam ex Scripturis &c. Catholicâ Veritate, si hæretici adhuc persistant in sui favorem Scripturas &c. detorquentes, prudens consilium sit eos miraculis convincere. Sic enim fecit Christus, sic fecere Apostoli, qui ultra Scripturas miracula ad incredulos revincendos adhibebant. Atque ita fecerunt Patres Chalcedonenses. Catholicam Veritatem de Duabus in Christo Naturis jam ex Scripturis decreto firmaverant, sed quia aliqui Scripturas in alium sensum interpretantes adhuc persistebant; ad prænarratum experimentum communi consilio venerunt. Estò autem Acta Concilii hujus miraculi

expressam mentionem non faciant , aliquid tamen singulare S. Euphemie intercessione contigisse indicant par. 3. cap. 2., dum in Epist. ad S. Leonem Papam de felici Concilli exitu hæc leguntur : *Deus enim erat qui operabatur , & quæ suo thalamo Concilium coronavit ornata decore victoria Euphemia , quæ tanquam propriam confessionem Fidei definitionem suscipiens à nobis , suo Sponso per piissimum Imperatorem & amicam Christi Augustam obtulit , omnem quidem perturbationem contrariorum sedans , Veritatis autem confessionem roborans ut amicam , & manu ac lingua universonum decretis pro demonstratione subscribens .* Hæc certè testantur , Sanctam Euphemiam aliquid singulare in Concilio Chalcedonenfi operatam fuisse , nempe Fidei confessionem suscipiendo , eam Christo offerendo & manu probando .

VII. Aliud prodigium de S. Martyris sepulcro narrat Evagrius L. 2. hist. cap. 3. : *Frequenter enim , inquit , aut Episcopis illius Civitatis aut Viris pietate illustribus , qui ad ipsius Basilicam advenierint , in somnis apparens , præcipit ut in Templo vindemient .* (idest , ut ex sequentibus notat Valesius , sanguinem è suo corpore velut succum ex uva in vindemia expriment) *Quod ubi tum Imperatori tum Patriarchæ totique Civitati innotuit , statim omnes ad Basilicam pergunt , tam Augusti scilicet quàm Pontifices & Magistratus & reliqua Populi multitudo , ut sacrarum mysteriorum participes fiant .* Cunctis deinde spectantibus , Episcopus Urbis Constantinopolitana unà cum suis Sacerdotibus in sacrarium ingreditur , in quo sacrum illud ut dixi Corpus depositum est . In eadem arca foramen est exiguum in lava parte parvis quibusdam ostiis obfirmatum ; per quod ferrum oblongum , cui Spongia annexa est , usque ad sacras Reliquias demittunt . Et postquam Spongiam hæc illac versaverint , ferream virgam ad se retrahunt cruore plenam & coagulato sanguine : quod ubi Populus viderit , confestim Deum cum laudibus adorat . Tanta autem est cruoris , qui illinc extrahitur copia , ut non solum piissimi Imperatores & Sacerdotes illic congregati , universa denique Populi multitudo ibidem collecta abundè ex eo accipiant , sed & Fidelibus quicumque cupierint per universum terrarum Orbem guttas ejus mittant : porro coagulatus ille sanguis perpetuè durat , nec in alium colorem mutatur sacer cruor . Hoc autem miraculum fit , non certo aliquo ac destinato temporis spatio , sed prout Episcopi vita & morum gravitas promeruerit : ferant enim , quoties Vir probus atque honestus omnique virtutum genere exornatus Ecclesiam rexerit , id miraculum fieri , & quidem frequentissimè : quoties verò non ejusmodi Antistes fuerit , rarè hæc signa evenire . Hucusque Evagrius , qui deinde aliud signum , nempe quòd

qui-

quicumque sive Fidelis sive Infidelis ad illam arcam accesserit, tantam odoris suavitatem sentit, quæ omnes consuetos odores longè superet.

VIII. Sanctæ Martyris Corpus adhuc Chalcedone servabatur cum Persæ Urbem illam occuparunt Heraclio imperante; & licet illud cum capsâ conati fuerint comburere, non valuerunt. Quare postea Constantinopolim translatum, in Ecclesia in honorem ejus à Constantino (ut fertur) erectâ atque ornatâ repositum, magno in honore ob miracula quæ coram illo Deus operabatur habitum fuit. At Leo Isauricus sacrarum Imaginum & Reliquiarum hostis infensissimus S. Euphemie Corpus in mare projici jussit & Ecclesiam profanavit: Deo tamen disponente Sacræ Reliquiæ inventæ, in insula Lemni collocatæ fuerunt, donec Irene & Constantino filio imperantibus anno 796. Constantinopolim reportatæ, & in eadem Ecclesia repurgata repositæ fuerunt.

IX. S. Serenus Natione Græcus cum de locis peregrinis Sirmium in Pannonia venisset, hortum ibi colere cœpit ut inde vitam transigeret, eò quod aliam artem non nosset. Quia verò furor Persecutionis sæviebat, aliquandiù latitavit, postea verò hortum suum iterùm operari liberè cœpit. Quâdam autem die, dum hoc ageret, Mulier cum duabus puellis hortum suum ingressa cœpit per illum deambulare; Serenus eam videns, quid vellet, ei dixit: respondente autem illâ, se delectari in horto illo ambulare, reposuit Serenus, non decere Matronam illâ horâ deambulare; erat enim hora sexta idest meridiana; ac propterea intelligere se, eam non causâ deambulandi illuc venisse, sed indisciplinationis & lasciviæ; ideòque egrederetur & ut decet Matronam disciplinatè viveret.

X. Egredia Mulier fremens, non dolore expulsiõis sed quod libidinis suæ causam non adimpleset, scripsit ad Virum suum, qui Maximiani Imperatoris domesticus erat, insinuans ei injuriam quam passa fuerat. Vir ejus apud Imperatorem conquestus, obtinuit, ut per Rectorem Provinciæ vindicaret se, ut placeret. Quâ potestate acceptâ festinus Sirmium venit, & statim ingressus ad Præsidentem, scripta Imperialia ei porrigit & vindictam de injuria suæ Matronæ irrogata postulat. Præses admiratus: quis, inquit, ausus est injuriam irrogare Matronæ Viri lateri Regis adhærentis? at ille dixit: Serenus quidam plebejus hortulanus. Perquisitus ergo Serenus stetit coram Præsidente à quo interrogatus de nomine & arte, respondit, Serenus vocor & hortulanus sum. Tunc ille increpare cœpit Præses, cur Matro-

næ injuriam irrogasset ; cui respondentem , se nulli unquam injuriam fecisse , Præses iratus , dic , ait , cui Matronæ injuriam feceris , cum in horto tuo deambulare vellet . Ille autem siue trepidatione respondit : Recordor , ante hos dies quandam Matronam in horto meo horâ indecenti deambulasse ; increpavi eam & dixi , quod non rectè versaretur Mulier , quæ tali horâ de domo Viri sui egressa fuisset . Hoc audiens Vir suus erubuit & confusus nil amplius de injuria vindicanda suggestit .

XI. Præses tamen Sancti Viri responsione auditâ , cogitare cœpit , eum esse Christianum , cui indecenti horâ displicuit Mulierem videre in horto suo : unde ad illum dixit : quod genus tibi est ? ille autem sine mora respondit , Christianus sum . Quo audito Præses : ubi , inquit , usque nunc latitasti , vel quomodo subterfugisti , ut Diis non sacrificares ? at Serenus respondit : „ Usque ad præsens Deus ut sibi placuit vitam corporis mihi „ conservavit . Eram autem sicut lapis ab ædificatione projectus , nunc autem requirit me Dominus in ædificium suum . „ Modò ergo quia palam me voluit esse , paratus sum pro nomine ejus pati , ut cum cæteris Sanctis ejus partem habeam in „ Regno ipsius „ . Quæ cum audisset Præses , iratus , quod latendo Imperialia præcepta contempsisset , jussit illum capite plecti , quod anno 307. impletum fuisse creditur . De eo Martyrol. Rom. agit die 23. Februarii sub nomine *Sireni* eum appellans *Monachum* , idest solitariam vitam agentem .

XII. Nunc de Sanctis Philea & Philoromo Martyribus sermo erit . Quamvis autem innumerabiles fuerint , quos Diocletiani utriusque Maximiani & Maximini crudelitas in Thebaide & Ægypto diversis cruciatuum & mortis generibus ob Christi confessionem affecit , de quibus generaliter loquitur Eusebius L. 8. Hist. cap. 9. ; duos tamen tanquam celebriores recenset , nimirum Phileam & Philoromum . Phileas ex Urbe Thmuis in Ægypto ortus , ejusdem etiam Episcopus , genere illustris divitiis potens & sapientiâ præcipuè philosophicâ clarus fuit : unde S. Hieronymus L. de Script. Eccles. cap. 78. eum recenset , ut statim dicam . De eo hæc scribit Eusebius loco citato : *Hujusmodi fuit Phileas Ecclesie Thmuitarum Episcopus ; vir cunctis in patria honoribus ac muneribus summa cum laude persansus & in philosophia studiis admodum clarus . S. Hieronymus verò laudato loco : Phileas ; inquit , de urbe Ægypti , quæ vocatur Thmuis nobili genere & non parvis opibus , suscepto Episcopatu elegantissimum librum de Martyrum laude composuit , & disputatione Actorum habitâ adversus Judicem , qui eum sacrificare cogebat , pro*
Chri-

Christo capite truncatur, eodem in Ægypto Persecutore (nempe Maximiano) quo Lucianus Nicomedia.

XIII. Phileas uxorem habuit, & duos ex ea suscepit filios, consanguinei quoque multi & amici illi erant, & omnes ex illustrioribus Urbis. Fratrem quoque habuisse fertur, qui Advocati munereungebatur. Tota autem ejus familia & ipsa quoque uxor adhuc in Paganismo fuisse videntur quando ipse Martyrium subiit. Ex quo apertè deducitur, ipsum quoque ab ortu Paganum, nisi serò ad Christum fuisse conversum, nam Paganam non duxisset uxorem, si Christianus ante fuisset. Tempus & modum suæ conversionis ignoramus, & similiter quid in Episcopatu egerit, & quomodò captus Alexandriam ductus fuerit, ubi Martyrii coronam accepit. Scimus, eum dum Alexandriæ cum pluribus fratribus, qui ante ipsum passi fuerunt, in vinculis detineretur, Epistolam ad Ecclesiam suam Thmuitarum elegantem paulò ante ibi tum scripsisse, cujus exemplum nobis exhibet Eusebius L. 8. cap. 10. In ea enim partim quo in statu ipse tunc versaretur exponit, partim narratis horribilibus cruciatibus, quos Martyres ibi superaverant, fratres Ecclesiæ suæ allatis Scripturæ testimoniis adhortatur, ut pietatem in Deum, etiam post obitum suum jamjam imminentem, mordicè retinerent. Et hæc Epistola est illa, quam S. Hieronymus supra allatus vocat *Librum de Martyrum laude*, ob quem Phileam inter sacros Scriptores recenset. Hæc de eo ante ejus certamen habemus.

XIV. Philoromus ei in Martyrio socius, ait Eusebius ibi cap. 9., *Non vulgarem Magistratum, Procuratoris scilicet summa rei* (idest generalis pecuniæ Imperialis Receptoris, italicè *Intendente*) apud Alexandriam gerebat, & pro dignitate ac prerogativa honoris Romani stipatus militibus quotidie jus dicebat. Hinc deducit Eusebius utriusque in certamine constantiam: nam cum innumeris cognatis atque amici, quidam etiam ex Magistratibus atque honoratis eos rogarent; cum Judex ipse eos cohortaretur, ut sui ipsorum misereri, & uxoribus ac liberis suis consulere vellent; nunquam his omnibus adduci potuerunt, ut vitæ suæ conservandæ causâ Divinas Leges de confessione & negatione nominis Christi latas contemnerent: sed virili ac philosophico animo, seu potius religiosâ ac Deo dicatâ mente, adversus omnes Judicis minas & contumeliasambo præstantes securi percussi sunt.

XV. Nunc ad Acta utriusque Martyris, quæ ex pluribus Codicibus manuscriptis exhibet inter alios P. Ruinart, gradum facio. Impositus Phileas super ambonem à Culciano Præfide, plurimorum Fidelium sanguine fuso celebri, primò monetur, ut

ut depositâ stultitiâ Diis sacrificet . Id autem Phileâ se facturum negante , Judex eum adhortatur , ut sacrificet Deo soli ; sed hoc etiam detrectantē Phileâ & dicente ex Scripturis Deum suum tale genus sacrificiorum rejicere , Culcianus dixit : quilibet ergo sacrificiis delectatur Deus tuus ? respondit Phileas : Corde mundo & sensibus sinceris & verborum verorum sacrificiis delectatur Deus ; alia sacrificia ego non didici ; cūque instaret Præses , Paulum & Moysen sacrificasse , Phileas de Paulo immolasse negavit , de Moysē verò ait : solis Judæis præceptum fuerat sacrificare Deo soli in Jerosolyma , nunc autem peccant Judæi in locis aliis solemnia sua celebrantes : cūque Culcianus hæc tanquam futilia sperneret , iterum ut sacrificaret eum monuit ; cui Phileas respondit : non inquinabo animam meam .

XVI. Hoc audiens Culcianus : animæ , inquit , jacturam facimus ? Respondit Phileas : animæ & corporis . Culcianus ait : corporis hujus ? & affirmante Phileâ , iterum quæsit : caro hæc resurget ? cui respondit : ita . Tunc Culcianus : Paulus , inquit , non negavit Christum ? non ; absit , Phileas respondit : cūque vellet Præses ut juraret , renuit ille dicens : non est nobis præceptum jurare , Sacra enim Scriptura dicit : sit vestrum est est , non non . Inde cū multa de Paulo interrogasset Culcianus , & ad omnia ut par erat Phileas respondisset & sacrificare adhuc negasset , se pro conscientia facere non posse affirmans ; subjunxit Judex : quomodò ergo , quæ ad filios tuos & conjugem conscientia est , non custodis ? Dicente autem Phileâ , in se prævalere conscientiam erga Deum , quæ sibi dicat , Deum super omnia esse diligendum ; dixit Culcianus : quem Deum ? Tunc Phileas elatis ad Cælum manibus : „ Deum , inquit , qui „ fecit Cælum & terram & omnia quæ in eis sunt : Creatorem „ & factorem omnium visibilium & invisibilium , ineffabilem , „ qui solus est permanens in secula seculorum . Amen .

XVII. Advocatis autem , qui ibi aderant , eum identidem increpantibus , quòd coram Præsīde plurimùm loqueretur ac Præsīdi resisteret , respondit : ad quod me interrogat ei respondeo : cūque Præses diceret : parce linguæ tuæ & sacrifica : non sacrificio , inquit , animæ enim meæ curam habeo : & exemplum Socrates vobis ostendit , Paganos quoque vitam suam aliquandò contempsisse ; nam cū duceretur ad mortem , adstante ei conjugē cum filiis suis , non est reversus , sed promptissimè canus mortem suscepit . Culcianus inde quæsit , an Christus esset Deus ? Phileâ autem affirmante , & hoc propter prodigia quæ fecit , Culcianus ait : quomodò Deus qui crucifixus est ? respondit Phi-

leas : „ Crucifixus est propter nostram salutem , & quia ipse voluit . Et quidem sciebat , quia crucifigendus erat & contumelias passurus , & dedit semetipsum omnia pati propter nos : „ Sacra Scripturæ hæc de eo prædixerant , quas Judæi putant „ se tenere , sed non tenent . Qui vult ergo veniat & aspicat .

XVIII. His auditis Calcianus ait : memento , quòd te honoraverim ; poteram te in patria tua injuriis afficere , sed non feci ne te confunderem . Respondit Phileas : debeo tibi ob hanc gratiam , vellem tamen ut faceres perfectam . At quid deficit ? ait Calcianus : respondit Phileas : ut tuâ utens auctoritate facias quod tibi iustum est . Ergo ne (inquit Culcianus) sic sine causa vis mori ? Phileas respondit : non sine causa , quia pro Deo & pro Veritate : ait Culcianus : Paulus erat Deus ? non , inquit Phileas , homo erat sicut nos sumus . Spiritus tamen Dei in illo erat , & in isto virtutes signa & miracula faciebat . Cum verò diceret Culcianus se gratiam fratri suo facturum , ait Phileas : & tu gratiam hanc perfectam mihi præsta : utere auctoritate tuâ & quod tibi iustum est fac .

XIX. Tunc Culcianus : si scirem , inquit , te indigere , & sic in hanc amentiam venisse , non tibi parcerem ; sed quia multam substantiam habes , ita ut non solum te sed prope cunctam Provinciam alere possis ; idèò parco tibi & suadeo te immolare ; respondit Phileas : non immolo , in hoc mihi ipsi parco . Aderant ibi Advocati , qui ad Præsidentem dixerunt : jam immolavit in Phrontisterio (idest Schola vel Collegio) : quibus respondente Phileâ , non immolavi certè , Culcianus videns præsentem illius uxorem filios fratres cognatos & alios multos , ei dixit : misera uxor tua tibi intendit . at Sanctus Martyr , qui oculos amplius non habebat nisi ad Cælum , nec aliud amabat nisi Deum & propter Deum , respondit : Dominus Jesus Christus omnium Salvator , cui ego vinculus servio , potens est ipse , qui me vocavit in hæreditatem gloriæ suæ , & hanc salvare . Advocati autem ad Præsidentem dixerunt : Phileas dilationem petit , quam cum paratus esset Præses ei concedere , ut secum cogitaret , Phileas intrepidè ait : sepè cogitavi & pro Christo pati elegi . Quare Advocati , Officiales omnes unà cum Curatore Magistratus Principe & omnibus propinquis ejus pedes amplectebantur , rogantes , ut saltem pietate erga uxorem ac filios moveretur . At ille velut si saxo immobili unda allideretur „ garrientium dicta respuere , „ animo ad Cælum tendere , Deum habere in oculis , parentes „ & propinquos Sanctos Martyres & Apostolos ducere se oportere dicebat .

XX. Philoromus, de quo supra, qui fortè jam interrogatus ac Judicis sententiam expectans ibi præfens erat, cum vidisset Phileam circumdatum lacrymis propinquorum, & Præsidis calliditate fatigari nec tamen flecti ullatenus posse, sancto impulsus zelo exclamavit: „ Quid inaniter & superflue constantiam „ Viri tentatis? quid eum qui Deo fidelis est, infidelem vultis „ efficere? quid eum cogitis negare Deum, ut hominibus ac- „ quiescat? Non videtis, quòd oculi ejus vestras lacrymas non „ vident, quòd aures ejus verba vestra non audiunt? terrenis „ lacrymis non flecti, cujus oculi cœlestem gloriam contuen- „ tur? „ His cunctorum irâ in Philoromum versâ, unam eam- „ demque eum cum Philea sententiam subire poscunt: quod li- „ benter annuens Judex ambos feriri gladio jubet. Cumque exis- „ sent & irent ad locum carceris consuetum, frater Phileæ qui erat unus ex Advocatis exclamavit dicens: Phileas abolitionem pe- „ tit. Quare Judex Phileam revocans ait: quid appellasti? at Phi- „ leas: „ Non appellavi, inquit, absit: huic infelicissimo noli in- „ tendere: ego autem magnas ago gratias & Regibus & Præsidi, „ quoniam cohæres factus sum Jesu Christo „: Post hæc exiit Phileas: cumque pervenissent ad locum ubi jugulandi erant, extendit manus suas Phileas ad Orientem, & ad Fideles adstan- „ tes dixit: „ Filioli mei carissimi quicumque Deum quæritis, „ vigilate ad corda vestra, quia adversarius noster sicut leo ru- „ giens circuit quærens quem transferat: nondum passi sumus: „ nunc incipimus pati, nunc cœpimus esse Discipuli Domini „ nostri Jesu Christi: carissimi attendite præceptis Domini no- „ stri Jesu Christi, invocemus immaculatum incomprehensibi- „ lem qui sedet super Cherubim, factorem omnium, qui est „ initium & finis, cui gloria in secula seculorum. Amen. „ Hæc cum dixisset, Carnifices jussu Judicis exequentes caesis cer- „ vicibus amborum è corpore solutas animas ad Cœlum dimise- „ runt. Quorum memoriam Latini colunt in Martyrol. 4. Fe- „ bruarii. Passio eorum post annum 307. à Ruinart refertur, à Tilmontio autem protrahitur ad ann. 311.

§. XXXIX.

SS. *Quirinus Petrus Balsamus & alter Petrus.*

I. S Sanctus Quirinus Siscia Urbis in Pannonia propè Savum fluvium Episcopus fuit. Furente sub Diocletiano & Maximiano Persecutione comprehendi jussus à Maximo Præside sum-
V v v 2 gam

gam arripuit, sed detectus & detentus ad Præsidentem ductus fuit, à quo interrogatus quò fugeret? respondit: „ Non fugiebam, „ sed iussum Domini mei faciebam; scriptum enim nobis „ est: si vos persequantur in una Civitate fugite in aliam. „ Præsides ait: quis hoc præcepit? respondit Quirinus: Christus qui est verus Deus: at nescis, inquit Præsides, quia ubique te Imperatorum præcepta poterant invenire? & hic quem dicis *Deum verum* comprehenso tibi subvenire non poterit, sicut & modò fugiens comprehensus es & deductus? Cui Quirinus respondit, Deum suum secum semper esse, & cum apprehensus fuit, & etiam tunc coram ipso stanti adesse, verba dantem quibus ei respondeat. Tunc Maximus tanquam stultiloquum senem (erat enim ætate provectus) illum despiciens, cœpit adhortari ut iussa Imperatorum Diis sacrificando impleat, multa ei bona promittens si obediret; comminatus autem mala, etiam mortem, si recusaret. Videns autem, se hortamentis operam perdere, fustibus eum cædi iussit; addens, nisi Jovi sacrificaret, se ad Amantium primæ Pannoniæ Præsidentem, à quo sententiam mortis exciperet, eum transmissurum. Ex quo conicitur, Maximum non fuisse verè Præsidentem sed Magistratum Urbis, cum non haberet mortis potestatem.

II. Ad hæc Quirinus intredidè respondit: „ Verè modò Sacerdotio fungor, si me ipsum vero Deo Sacrificium obtulero. „ Et hoc quòd corpus meum casum est delector, nullum sentiens dolorem: idèdque offero me majoribus suppliciis, ut me, quibus præpositus fui in hac vita, sequantur ad illam æternam vitam, ad quam per huiusmodi iter facillè pervenitur. „ Tunc Maximus iussit eum recludi in carcere & catenis gravari: quò perductus Vir Dei in preces procubuit, gratias Deo de sibi propter ipsum illatis contumeliis agens; ac rogans, ut qui in eo carcere detinebantur, sentirent se cultorem veri Dei esse, & crederent, alium non esse Deum nisi Ipsum. Mediâ autem nocte apparuit splendens magnus in carcere; quem cum vidisset Marcellus custos aperuit carcerem, & ad Beati Quirini pedes sese prostravit dicens cum lacrymis: *Ora pro me Dominum, quia credo non esse alium Deum nisi quem tu colis.* Multùm ergo eum hortatus Sanctus Episcopus fuit & in nomine Domini Jesu Christi consignavit (hoc est catechumenum fecit, ni velis quòd eum baptizaret.)

III. Post triduum Maximus Beatum Quirinum Sisciâ ad Amantium Præsidentem ad primam Pannoniam deduci iussit, ut ab isto ultimam sententiam exciperet. Ibat ergo per singulas Civi-

Civitates ad ripam Danubii vinctus catenis Sanctus Episcopus ad primam Pannoniam : cùmque illuc pervenisset , offertur Amantio è Civitate Scarabetenfi (vel Scarab , vel ut aliqui putant modò Edemburg) eâdem die revertenti ; eumque Præses ad Urbem Sabariæ , ut audiretur pergere iussit . Interim ad Sanctum Episcopum Christianæ Mulieres ingredientes , cibum ac potum ei obtulerunt : quarum fidem intuens S. Quirinus , dum ea quæ offertur benedicit , catenæ quibus ligatæ manus ejus & pedes fuerant , illicò ceciderunt . Acceptâ igitur escâ , regressis mulieribus , hi qui eum custodiebant Sabariam duxerunt : ubi cùm Amantio sedenti in theatro oblatus fuisset ac interrogatus an adhuc in sua superbia permaneret , respondit Quirinus : „ Apud Sisciam verum Deum confessus sum , ipsum semper co- „ lui , ipsum corde teneo : nec me ab eodem , qui unus Deus „ & verus est , homo poterit separare „ . Tunc Amantius ejus ætatis misertus cœpit eum adhortari , ut tormenta & mortem declinans Legum Romanarum cultorem se exhiberet . Sed Quirino vitam longiorem & omnia , propter Christum & æternitatem , contemnente , Amantius post varias passionem iussit Sancto Dei molam ad collum alligari & in Sibarim fluvium demergi : cùmque de ponte præcipitatus fuisset & diutissimè supernataret , & cum spectantibus ne suo terrentur exemplo locutus , vix orans ut mergeretur obtinuit . Ejus corpus non procul à loco in quo mersum fuerat inventum est , & deinde in Basilica ad Scarabetensem Portam depositum .

IV. Passus fuit S. Quirinus Sisciensis Episcopus , ut ferunt Acta , pridie Nonas seu quartâ Junii : quâ die cum Martyrologia colunt . De eo Prudentius Hymnum edidit , in quo Judicem qui eum morti addixit non Amantium sed Galerium vocat . Cui adhærens Martyrol. Rom. 4. Junii dicit : *Siscia in Illyrico S. Quirini Episcopi , qui sub Galerio Præside pro Fide Christi , ut Prudentius scribit , molari saxo ad collum ligato in flumen præcipitatus est ; sed lapide supernatante , cùm circumstantes Christianos , ne ejus terrentur supplicio neve titubarent in Fide , diâ fuisset hortatus , ipse ut Martyrii gloriam assequeretur , precibus à Deo ut mergeretur obtinuit .* Ejus Martyrium anno 309. contigisse fertur : cùmque ab anno 307. Licinius in Pannonia imperaret , sub eodem S. Quirinum fuisse passum credi potest .

V. S. Petrus , dictus paterno nomine Balsamus , ex finibus Eleutheropolis Urbis , in Judæa celeberrimæ (quæ secundum aliquos antiqua Hebron fuit) oriundus , Maximiano Galerio Imperium regente ; apud Aulanam (seu Aulonam Civitatem

comprehensus fuit & Severo Provinciæ Præsidi præsentatus . Ab eo interrogatus , quodnam illi esset nomen ? respondit : „ No-
 „ mine paterno Balsamus dicor ; spirituali verò nomine quod
 „ in Baptismo accepi , Petrus dicor „ . Quæsitus de genere re-
 „ spondit „ Christianus sum „ , de officio ait „ , hōc majus officium
 „ habere non possum . Et quid esse potest hoc melius , quàm ut
 „ sim Christianus ? „ . Post hæc quæsitus , an parentes habeat ?
 „ apertè respondit : non habeo : cūque Judex ei diceret : menti-
 „ ris , audivi enim te parentes habere ; Petrus viro Evangelico
 „ verè dignum responsum dedit , nimirum „ , In Evangelio mihi
 „ præceptum est omnia denegare , cū ad nominis Christiani
 „ venero confessionem .

VI. Tunc Judex , nosti , inquit , quid præceperint Imperato-
 res ? præceperunt , ut omnes Christiani aut sacrificent aut diver-
 sis poenis moriantur ? „ . Novi (respondit Petrus) quid Deus
 „ meus , qui verus & perpetuus universorum Rex est , mihi
 „ præcipiat : en sui Edicti verba . Si quis sacrificaverit Dæmo-
 „ niis & non soli Deo , eradicabitur : quid ergo melius est , à te
 „ perire , aut à Deo vero in perpetuum eradicari ? tu judica , si
 „ verè est in te aliqua iustitia „ . At his Judex nihil motus , audi
 „ me , inquit , & sacrifica Diis & comple jussu Principum . „ . Ego
 „ respondit Petrus , non sacrificio manufactis Diis ligneis & la-
 „ pideis , quales vos adoratis . „ . Præses dixit , injuriam nobis
 facis : nescis , quia potestatem habeo occidendi te ? Tunc Vir
 Dei ait : „ . Nullam tibi injuriam facere intendo , sed quod scri-
 „ ptum est in Lege Dei , hoc dico : *Simulacra* , inquit , *gentium*
 „ *argentum & aurum , opera manuum hominum :* deinde subdit :
 „ *Similes illis fiunt qui faciunt ea & omnes qui confidunt in eis :*
 „ si hoc dicit Deus per Prophetam & Spiritum Sanctum , quo-
 „ modò mihi dicis , quòd injuriam tibi fecerim , quia dixi , si-
 „ milem te esse lapidibus & lignis mutis & surdis , in quibus
 „ Dæmonia colitis , & me persuades tibi similem fieri ?

VII. Severus tamen veritati adeò clarè oculos claudens ,
 adhuc ei dicit : audi me , miserere tui & sacrifica . Petrus verò
 respondet : „ . Tunc mei misereor , si non sacrificavero & a ve-
 „ ritate non discessero : sed quia Infidelis es & nec mihi credis
 „ nec Legi Divinæ , quia qui Dæmoniis sacrificat eradicabi-
 „ tur , & semper mihi hoc ingeris ; fac quod tibi jussum est „ .
 Quamvis autem Judex eum suaderet ; ut secum cogitaret & sa-
 crificando se saluum faceret , fortior tamen Petrus : „ . Superflue ,
 „ inquit , me persuades ; fac jam quod facturus es & adimple
 „ opera patris tui Diaboli : nam ego quod suades non sum fa-

„cturus; nec Dominus meus Jesus quem colo hoc permittat.
 VIII. His exasperatus Præses jussit eum suspendi, dumque extenderetur dixit: Petre, sentisne angustias corporis tui? quid dicis? numquid vis sacra reddere? Sanctus Petrus respondit:
 „Ego soli Deo meo, pro ejus amore patior, sacrifico: ubi
 „sunt ungulæ ferreæ quibus lacerer? „Tunc jussit Præses atrociter illum torqueri; at dum torqueretur, nec vocem doloris dabat, sed lætus psallebat: „*Unam petii à Domino, hanc requiram, ut inhabitem in domo Domini omnibus diebus vita mea:*
 „& iterum: *Quid retribuam Domino pro omnibus quæ retribuit mihi?* Calicem Salutaris accipiam & nomen Domini invocabo. „
 Hæc illo loquente magis accensus Præses, alios carnifices jussit accedere. Turba verò adstans, cùm videret nimium sanguinem excurrere per pavementum, dolens dicebat ad eum: misereere tui, ò homo, & sacrifica, ut te liberes ab his crudelissimis pœnis. Sanctus vero Martyr respondit: „Hæ pœnæ nullæ sunt,
 „nec mihi aliquem incutiunt dolorem: quòd si negaverio non,
 „men Dei mei, in veras pœnas & in majora tormenta perpetua
 „ingressurum me esse cognosco „: demum Judice ut sacrificaret hortante, Petro verò negante, ad sententiam ventum est, nimirum: Petrum jussà Principum contemnentem, ut obediat Legi Dei sui crucifixi, sententiam subire Crucis præcipio. Ita hic gloriosus Christi Athleta complens agonem suum, dignus effectus est passioni Domini sui conformari apud Aulanam seu Aulonam Civitatem 3. Januarii, quâ die in Martyrologiis etiam Romano colitur.

IX. Eusebius Lib. de Mart. Palæstinæ cap. 10. cujusdam Petri Martyrium refert cognomento *Aspelami*, qui sub Maximo & ipse passus fuit. Hunc ob similitudinem nominis Aspelami eundem ac Petrum Balsamum esse, aliqui arbitrati sunt. Patria Eutheropolis utrique communis est, & similiter passionis annus; alia tamen discordant, & præcipuè qualitas & locus Martyrii. Petro Aspelamo Ascetæ nomen Eusebius tribuit, quales tunc vocabantur Christiani, qui austeriorem & magis solitariam vitam agebant, unde nomen Monachi ortum est. Admodum juvenis erat cùm captus fuit; ideòque Judex & adstantes eum hortabantur, ut suæ juventutis misereri vellet; sed ille constans omnia contempsit propter Deum: ideòque tanquam aurum igne probatus, Cæsareæ in Palæstina Martyrium consummavit 11. Januarii sexto Persecutionis anno, nempe Christi 309. inchoato. Hoc ita refert Eusebius. *Petrus Asceta, qui & Aspelamus vocabatur, ortus ex vico Anea in Agro Eleutheropolitana-*

no: velut aurum purissimum per ignem probatus, suæ in Christum Fidei in Urbe Cæsarea illustre specimen edidit: nam & Judicem ipsum, & cunctos qui ei apparebant identidem hortantes ut sui ipsius misereri vellet, generoso animo despexit; & spem, quam in condicione omnium Deo collocaverat, omnibus rebus ipsique aded vitæ suæ anteposuit.

X. Addit Eusebius, simul cum Aspelamo eodem igne crematum fuisse quemdam nomine Asclepium, quem Episcopum Sectæ Marcionitam dicit: atque ita duo homines visi fuerunt in eodem rogo positi, ambo pro eadem causa in speciem combusti, differenti tamen exitu; nam Petrus à flammis, quæ ejus holocaustum consumserant, in Cælum elatus fuit; Asclepius verò coepit in eodem igne experiri tormenta, quæ passurus erat per totam æternitatem: Cùm hoc (inquit Eusebius) Asclepius quidam, qui Sectæ Marcionitarum Episcopus esse ferebatur, zelo quidem ut ipse existimabat pietatis adductus, sed non illius quæ est secundum scientiam: uno eodemque nihilominus rogo consumtus, ex hac luce migravit.

XI. S. Petri Aspelami Martyrium in Menol. Basilii die 11. Januarii ita celebrant Græci: Sanctus Martyr Petrus in pago Anea apud Eleutheropolim natus, corpore robusto sed Fide in Christum robustior, ab adolescentia senilem prudentiam præferebat, cùm doceret omnes ab Idolis secedere, & ad Christum solum verum Deum hominumque Servatorem accedere. Quæ cùm de illo accepisset Eleutheropolis Præses, missis satellitibus comprehensum compellebat Christum ejurare: sed cùm ad id illum inducere nequirit, præcepit ut in ardentem fornacem ignis injiceretur: in quam immixtus Sanctus, per multas horas gratias agens Deumque pro totius Mundi Sanctarumque Ecclesiarum tranquillitate orans, decessit. Ita Græci in hoc solum ab Eusebio discordes, quod iste vult eum fuisse passum Cæsareæ in Palæstina, illi verò Eleuthero-

§. XL.

SS. Pamphilus Valens Paulus Porphyrius & alii Martyres.

I. S. Sanctus Pamphilus Presbyter sapientiâ pietate & tandem Martyrio Ecclesiæ Sacerdotium illustravit. Tanti illum fecit S. Hieronymus, ut L. de Script. Eccles. cap. 75. dicat: Pamphilus Presbyter Eusebii Cæsariensis Episcopi necessarius, tanto Bibliothecæ Divinæ amore flagravat, ut maximam partem Orig-

nis voluminum suâ manu descripserit, quæ usque hodie in Cæsariensi Bibliotheca habentur. Sed & in duodecim Prophetas viginti quinque exegeseon (idest expositionum) Origenis volumina manu ejus exarata reperi, quæ tanto amplector & servo gaudio, ut Cresi opes habere me credam &c.

II. Ejus propterea virtutes summis laudibus celebrat Eusebius L. 6. Hist. cap. 32. L. 7. ca. 32., & L. de Martyr. Palæstinæ cap. 11., ubi de ipso ait: *Vir toto vitæ suæ tempore in omni virtutis genere spectatissimus, seu fugam & contemptum seculi consideres, seu bonorum largam in pauperes erogationem, seu secularium bonorum ad quos aspirare poterat despicientiam, seu denique ætioris & Philosophicæ cujusdam vitæ exercitationem; sed præ cunctis nostræ ætatis hominibus eminebat in eo Viro ardentissimum studium sacrarum literarum, & in iis rebus, quas sibi perficiendas proposuerat, indefessa laboris assiduitas & diligentia: ad hæc singularis in proximos cunctosque, qui ad ipsum accesserant, beneficentia. Hujus Viri reliquas virtutes resque præclare gestas, quæ prolixiorẽ orationem desiderant, jam pridem nos in peculiari opere, quod de ejus vita conscripsimus, tribus libris complexi sumus (hi tamen libri Eusebii ad nos non pervenerunt.) Hoc certum est, Eusebium Pamphili amicissimum cum eo convixisse, adeo ut ab eo nomen Pamphili summis aliqui putent apud Photium Bibl. Cod. 13.*

III. Ex his colligitur, S. Pamphilum genere fuisse clarum, opibus potentem & in patria (quam aliqui Berytum putant) prima studia perfecisse, in quibus præcipuè Rhetoricis & Philosophicis mirè profecit: abjectis tamen seculi illecebris celebrior evasit terrenorum contemptu, ac bonorum in pauperes distributione. Cæsareæ in Palæstina ab Agapio post Theotecnum illius Urbis Episcopo in Presbyterum ordinatus illius Ecclesiæ ornamentum fuit, ut ait Eusebius L. 7. cap. 32., qui Agapio in Episcopatu succedens Pamphilum jam Presbyterum invenit, quem videns totum pietatis operibus & in sacrarum literarum studiis promovendis infatigabilem, arctâ sibi familiaritate, ut dicebam, adjunxit.

IV. Tanta virtus Paganorum invidiam & maximè Urbani tunc Provinciæ Præsidis excitavit, qui labente anno 307. Persecutionis quinto Pamphilum comprehendi jussit. *Ac primum quidam (Eusebius L. de Martyr. Palæst. cap. 7.) Urbanus ejus tum in arte dicendi, tum in Philosophia peritiam experimento aliquo agnoscere voluit: deinde sacrificare illum jubens, cum renuentem minasque ipsius aspernentem videret, supra modum efferratus gravioribus cum tormentis excruciarî præcepit. Post hæc angularum,*

quibus latera ejus persulcaverat, crebritate ac pertinaciâ tantùm non carnibus illius passus vir immanissimus, cùm ex his omnibus nihil præter dedecus atque ignominiam retulisset, tandem illum cæteris qui in carcere erant Confessoribus aggregavit. Debitas tamen ob sævam immanitatem, quam in hunc & alios Sanctos Urbanus exercuerat, pœnas luit; nam (ut ait idem Eusebius ibi) è gubernio dejectus ob crimina quæ patrauerat, & omnibus opprobrium factus, ejusdem Maximini Imperatoris, quem antea protectorem habuerat, jussu capitali sententiâ damnatus fuit.

V. Pamphilus in carcere diù detentus, in eo socium habuit etiam ipsum Eusebium, atque ibi Apologiam pro Origine simul edidisse feruntur (Phot. Bibl. Cod. 118.), quam ad eos qui fuerant ad metalla damnati transmiserunt. Eusebius tamen estò Pamphilo in carcere socius, ei tamen socius non fuit in corona Martyrii, sed vel quia promissit facere, vel quia fecit quod non licebat, è carcere liber evasit: propterea in Tyriensi Synodo (apud Athanas. Apolog. contra Arianos) accusatus fuit, quòd Idolis sacrificasset. Et Epiphanius hæres. 68. inducit Potamonem, qui cùm vidisset Eusebium in Concilio Tyri tanquam Judicem sedentem, & S. Athanasium stantem tanquam reum, voce magnâ invehctus est contra Eusebium & dixit: *Tu sedes, Eusebi, & Athanasius innocens existens à te judicatur? quis tulit istalia? Nonne tecum fuisti in carcere tempore Persecutionis? Et ego quidem oculum amisi pro veritate, tu verò nihil mutilatum in corpore habere videris, neque testimonium per confessionem præbuisi, sed stetisti videns nullâ parte detruncatâ. Quomodò discessisti è carcere, nisi quod promissisti his, qui necessitatem Persecutionis nobis intulerunt, id quod vesarium est te facturum esse, aut sanè fecisti? Quæ cùm audisset Eusebius, indignatione quidem commovebatur, & surrexit ac dissolvit judicium.* Hæc de Eusebio: quæ tamen hic non vacat discutere.

VI. Modò S. Pamphili Martyrium expendendum est, cujus initium sub Urbano Præfide anno 307. collocavi. Urbano autem, ut dixi, capite truncato, Firmilianus, qui tum in munere tum in sævitie ei successit, S. Pamphili Martyrium complevit, postquam ferè biennio in carcere detentus fuit, nimirum ab an. 307. ad annum 309. 16. Januarii. Socios in passione habuit SS. Valentem & Paulum, qui cum ipso jam in tormentis suam in Fide constantiam testati fuerant. Valens Eusebio teste L. de Mart. Palæst. cap. 11. erat Urbis Ælia (Hierosolymæ) Diaconus, augustâ canitie conspicuus, ipsoque aspectu venerabilis senex, qui Divinas Scripturas præ cæteris egregie callebat. Eas enim usque aded

fidei

fideli memoriâ complectebatur, ut nihil omninò interesset, an ex Codice ipso legeret. Paulus Jamnitarum oppido oriundus erat, vir in agendo servidus & ardore spiritus plenus, qui ante Martyrium candentis ferri exustiones perpeffus confessionis coronam retulerat.

VII. His tribus memoratis (prosequor ex Eusebio) occasionem Martyrii præbuit quorundam quinque Ægyptiorum fratrum adventus, qui cū præcedente anno Confessores quosdam ex Ægypto in Ciliciam ad metalla ibi damnatos honoris causâ comitati fuissent, dum reverterentur in patriam, ad ipsas Urbis Cæsareæ portas interrogati à Custodibus, quinam & unde profecti essent, rem ut erat confessi, protinus vinciuntur; qui ad Tyrannum Maximinum perducti, & coram illo liberè locuti, detrusi sunt in carcerem: postridie verò, idest ante diem 16. Februarii, unâ cum Pamphilo & sociis Valente & Paulo ex mandato Judici exhibentur. Convenerant hi Ægyptii, ne imposteriorum propriis nominibus, quæ fortè erant nomina Idolorum, invicem appellarentur, sed assumerant nomina Prophetarum Eliæ Jeremiæ Isaïæ Samuelis & Danielis.

VIII. Qui ergo inter illos præcipuus videbatur, tormentis excruciatu à Firmiliano Judice, interrogatus quo nomine vocaretur, uno ex his nominibus puta Eliæ se appellari respondit. Judex de tali nomine vim ejus non percipiens nihil sollicitus, de patria quæsit: cui respondit, sibi patriam esse Jerusalem, illam scilicet Jerusalem quæ coelestis est intelligens, de qua Paulus Galat. 4. v. 26. ait: *Illam autem quæ sursùm est Jerusalem, libera est, quæ est mater nostra.* Judex tamen in terreno sensu ista accipiens, quænam & ubi esset ista Civitas anxie inquirebat, tormentis etiam illum adigens ut diceret veritatem: sed ille manus post tergum retortas pedesque novis quibusdam machinis luxatos habens, verum se dixisse affirmabat. Interrogatus iterum ac sapius, quænam esset Civitas & ubi terrarum sita (quo apparet, Jerusalem sub hoc nomine fuisse tunc etiam in Palæstina ignotam, fortè enim Eliæ nomine vulgabatur) respondit, eorum dumtaxat, qui veri Dei cultores essent, hanc patriam esse & ad Orientem sitam. Firmilianus animo æstuans, ratus, hanc Urbem quamdam esse, in qua adversus Romanos se munire Christiani cogitarent, cū nec flagris nec aliis cruciatibus quidquam aliud à Martyre extorquere posset, capitali eum sententiâ damnavit. Reliquos deinde quatuor Ægyptios, cū simili certamine exercuisset, pari quoque mortis generi addixit.

IX. Fessus deinde Judex ad Pamphilum ejusque socios transit; ac videns, se frustra Christianos tentare suppliciis, expertus

enim fuerat quantâ constantiâ cruciatus superassent, ab eis ulterius torquendis abstinuit; solûmque ab eis quæssivit, an in contumacia adversus Imperatorum Edicta adhuc persistenter? Cùmque nihil aliud à singulis elicere potuisset præter ultimam, quæ in Martyrio fit, Fidei confessionem, eodem quo supradictos supplicio eos affecit.

X. Post hæc adolescens quidam nomine Porphyrius ætatis annorum 18. ex familia Pamphili, & sub ejus disciplina & convictu sanctè educatus, simul atque sententiam in Dominum suum latam esse cognovit, è medio Turbæ exclamans, ut mortuorum cadavera sepulturæ saltem traderentur, postulavit. At Judex, non hominis sed belluæ aut si quòd etiam belluâ tetrius est dignus nomine, nullam ætati veniam indulgens, postquam interrogatum juvenem Christianum esse ex ipsius confessione didicit, statim, quasi telo aliquo sauciatus, mandavit tortoribus, ut totis viribus in adolescentem sævirent. Postea sacrificare eum jubens, cùm renuentem videret, adolescentis latera ad ipsa usque ossa & intimos viscerum recessus absque ullis induciis sulcari præcepit. Quod cùm diutius fieret, nec adolescens vocem aut sensum doloris ederet, ac si prorsus sine anima esset, nihil ejus patientiâ permotus, sed majori sævitiâ accensus Judex, statim vivum cremari præcepit; quod ingenti rogo peractum fuit: sicque qui postremus stadium ingressus fuit, primus coronam accepit etiam ante Pamphilum dominum suum, cùm ministri in exequenda circa ipsum & socios sententia moram traherent. Ibat ergo ad supplicium intrepidus, & pallio ut consueverat indutus, velut ad triumphum: cùmque accessisset ad rogam accensum, ipse hinc inde flammam ore attrahebat, nec aliam vocem emisit, nisi invocando adiutorem Dominum Jesum, quando ipsum flamma contingere cœpit. Hujusmodi certamen Porphyrii fuit.

XI. Hujus consummationem cùm Confessor quidam nomine Seleucus origine Cappadox olim militiam professus S. Pamphilo renuntiasset, confestim socius in Martyrio aliis meruit adjungi. Nam vix mortem Porphyrii nuntiaverat & unum ex Martyribus osculo salutarat, subitò Milites correptum ducunt ad Præsidentem, qui perinde ac si Porphyrio in Cælum tendenti comitem eum adjungere voluisset, illicò eum capitali supplicio plecti jussit. Seleucus ætatis flore & proceritate corporis ac robore inter lectos Romanæ Militiæ juvenes non mediocrem honoris gradum fuerat adeptus: at sub initiis Persecutionis (forte anno 298. quo Maximianus Galerius Milites Christianos per-

sequebatur) flagrorum verbera perpeſſus , & Confessoris titulo decoratus , abjectâ Militiâ totum se pietatis operibus dedit , ac viduis pupillis omni ope destitutis, egenis quoque & infirmis, instar patris cuiusdam aut curatoris inspectorem se & curatorem exhibuit . Is ergo eâdem die quâ Pamphilus cum aliis Martyrio coronatus Cœlum ordine decimus introivit : adeo ut illâ die portæ Cœli plus solito Martyrum ingressui patuisse viderentur .

XII. De factis S. Seleucum & alios undecimus secutus fuit Theodulus . Erat is Vir gravis & religiosus senex , unus ex Præsidis familia , & ab ipso Firmiliano præ cunctis domesticis honoratus , partim ob senectutem & quoddam tertiæ jam stirpis nepotes haberet , partim ob sinceram fidem quam ipsi perpetuè præstiterat : at cum deosculando unum ex Martyribus imitatus fuisset Seleucum , deductus ad dominum , magis illum quàm superiores exacerbavit . Unde statim in crucem actus eodem quo Salvator noster Martyrio defunctus est .

XIII. Deerat adhuc unus , qui duodecim sive Apostolorum sive Prophetarum numerum impleret : huic consummando Julianus adfuit . Erat hic Cappadox patriâ , moribus verò religiosissimus & Spiritu Sancto plenus : qui Cæsaream peregrè adveniens eâdem die , quâ hæc contigerant , necdum Urbem ingressus prænuntium omnium accepit . Statim ergo ad spectaculum contendit ; cumque Sanctorum Cadavera humi jacentia vidisset , gaudio diffusus singulos complexus honorificè salutavit : quo in facinore comprehensus à Militibus , qui cædium ministri erant , perducitur ad Firmilianum ; qui à solita crudelitate nequaquam desciscens , ingenti rogo eum comburi præcepit .

XIV. Horum sacra Corpora iussu impii Præsidis per quatuor continuos dies totidemque noctes additis Militum excubiis exposita manserunt , ut à carnivoris bestiis laniarentur : sed cum præter omnium expectationem nec fera nec volucris ulla nec canis ad ea accederet , tandem Divinâ ordinante Providentiâ integra atque illæsa asportata sunt , omnique funebri cultu , ut par erat , ornata & curata consuetæ tradita sunt sepulturæ . Passi sunt 16. Februarii anni 309. : quâ die Martyrol. Rom. Sanctorum quinque Ægyptiorum & Porphyrii ac Seleuci Martyrium his verbis celebrat : *Cæsarea in Palaestina Sanctorum Martyrum Ægyptiorum Elia Jeremiæ Esaia Samuelis & Danielis , qui cum spontaneè ministrassent Confessoribus in Cilicia ad metalla damnatis , inde revertentes comprehensi , & à Firmiliano Præsidente sub Maximo Imperatore sævissimè torti , gladio demum cæsi sunt . Post quos S. Porphyrius Pamphili Martyris famulus , & S. Seleucus Cappa-*
dox ,

dox, qui iteratis certaminibus sæpè vicerant, alter incendio, gladio alter Martyrii coronam acceperunt. Die verò 17. Februarii de SS. Theodulo & Juliano agens: Cæsarea, inquit, in Palaestina Sancti Theoduli senis, qui ex familia Præsidis Firmiliani, Martyrum excitatus exemplo, cum Christum constanter confiteretur, cruci affixus Martyrii palmam nobili triumpho promeruit. Ibidem Sancti Juliani Cappadocis, qui exosculans necatorum Martyrum Corpora, ut Christianus delatus & ad Præsidem ductus, lenio igne jussus est comburi.

De SS. verò Pamphilo Valente & Paulo idem Martyrol. memoriam differt ad diem 1. Junii, ubi ait: *Cæsarea in Palaestina Beati Pamphili Presbyteri & Martyris viri admirandæ sanctitatis & doctrinæ, atque in pauperes munifici, qui ob Christi Fidem in Persecutione Maximini primò sub Urbano Præside cruciatus & in carcerem trusus, deinde sub Firmiliano iterùm revocatus ad pœnas unà cum aliis Martyrium consummavit. Passi sunt etiam tunc Valens Diaconus & Paulus alique novem, quorum memoria aliis diebus celebratur. Græci tamen in Menol. Basilii de omnibus eadem die 16. Februarii memoriam agunt.*

XV. Cum illustre horum duodecim Martyrum certamen in ore omnium adhuc versaretur, Adrianus & Eubulus ex regione Manganæ Cæsaream ad reliquos Confessores profecti, in ipso Civitatis introitu perinde ac cæteri interrogati sunt, cujus rei gratiâ advenissent; confessique id quod res erat, Firmiliano exhibentur: qui illicò de more ferus, post crebra ungularum verbera quibus latera eorum sulcaverat, eos ad bestias damnavit. Biduo igitur interjecto, die 5. Martii quâ natalis Genii publici seu fortunæ celebratur, Adrianus leoni objectus ac deinde gladio transfixus Martyrium consummavit. Eubulus verò post duos dies nempe 7. Martii, cum suasiones ac preces Judicis ut sacrificaret contempsisset, post bestias & ipse jugulatus est, & ita Cæsariensium Martyrum certamina ultimus consummavit. Haetenus cum Eusebio L. 1. de Mart. Palæst. cap. 11. ferè ad verbum locutus sum: qui addit, quòd Providentia Divini Numinis impios illos Præsides dignâ ultione multavit: etenim (præter Urbanum, de quo supra) Firmilianus, qui Martyribus Christi adeò contumeliosè insultaverat, cum aliis extremo supplicio adductus capite truncatus est.

Horum duorum Martyrum Rom. celebrat, Sancti Adriani quidè 5. Martii, S. Eubuli verò die 7., quibus diebus de facto evenit, ut dixi: Græci verò in Menol. Basil. de utroque simul agunt die tertiâ Februarii.

CAPUT XIV.

Continuatio Persecutionis sub Licinio .

§. I.

Galerii & Maximini Exitus .

I. **D**Imisso à Diocletiano & Maximiano Herculio artibus Maximiani Galerii Imperio anno 305. , sub Galerio & Maximino ad Imperium assumtis , Persecutio Christianos usque ad annum 310. vehementer afflixit . Deus tamen Servorum suorum miseratus de hostibus eorum ac suis debitam ultionem sumsit . Anno igitur Persecutionis nono (Christi verò 311.) seu decimo ineunte ut vult Eusebius L. 8. Hist. cap. 16. , Galerium Persecutionis præcipuum incentorem pœna cœlitus inflicta corripuit , ab ipsis exorta carnibus ad animam usque progressa : quæ anno integro eum afflixit , totum enim corpus ejus putrescere cœpit , ut ex illo vermes scaturirent , adeò ut nec medicinæ nec Deorum suorum ope , quos invocaverat , ullum levamen sperare posset . Quare doloribus , quibus in dies magis cruciabatur , verum Deum , quem antea fuerat persecutus , velut alter Antiochus confiteri coactus , promisit , in suorum criminum expiationem ejus Tempia antea eversa se reedificaturum . Cujusdam Medici consilio hoc fecisse refert Ruffinus L. 8. cap. 18. . Hic enim vocatus , ut aliquod ei afferret remedium liberrimè dixit : „ Falleris , Imperator , si putas , homines „ sanare posse agritudines , quas Deus in pœnam immittit : in „ firmitas hæc humana non est , quæ nostris remediis cedere „ possit . Memor esto malorum , quibus servos Dei afflixisti , „ & quibus erga ipsum ac suam sanctam Religionem impius fuisti , & hinc videbis , à quo tuo morbo implorare remedium „ possis . Hoc nec aliud tibi suggerere possum . Vitam , ut aliis „ fecisti , mihi adimere potes , sed vi medicinæ salutem sperare „ non potes „ . Hæc Medicus ille fortè Christianus .

II. Hæc cum Galerius audisset (inquit Eusebius L. 8. cap. 18.) *Intelligere cœpit , quæ in cultores Dei admiserat scelera . Totæque mentis acie in semetipsum conversâ , primùm quidè Conditori omnium Deo errorem suum confessus est : convocatis deinde Palatii sui Proceribus , absque ulla dilatione Persecutionem Christianorum cohibere eos jubet , & Ecclesias illorum quantociùs exstruere Imperiali Re-*

Rescripto præcipit, quo Christiani Sacra sua solito more peragere possent, ac pro Imperatore preces ad Deum fundere. Confestim igitur, verba subsequenter factis, per singulas Urbes propostæ sunt Edicta palinodiam erga nos continentia. Hæc Eusebius, qui subinde ea per extensum refert: quod præstitit etiam Laëtantius L. de Mort. Persec. cap. 35. Edicta hæc, præfixo nomine omnium, qui tunc imperabant, affixa fuere Nicomediæ 30. Aprilis ejusdem anni 311. & inde publicata in omnibus Provinciis Minoris Asiæ, Ponti, Bithyniæ, Galatiæ, & aliis Galerii jurisdictioni subjectis.

III. Maximinus tamen qui in Syria & Ægypto regnabat, *Vir (ait Eusebius L. 9. Hist. cap. 1.) omnium hominum impiissimus & Divina Religionis hostis acerrimus, cum hujusmodi litteræ ei displicerent, loco Rescripti, quod propositum fuisse memoravimus, verbis dumtaxat mandavit Judicibus suis, ut ab oppugnatione nostrorum abstinere. Nam cum aliqui minimè auderet potiorum voluntati ac sententiæ refragari, suppresso Edicto illo... æmque curâ ac cautione adhibitâ, ne per Provincias Imperii sui publicè propteroneretur, ipse nudâ voce Rectoribus Imperio suo subjectis præcepit, ut Persecutionem adversus nostros inhiberent. Quod quidem mandatum ipsi sibi invicem Rectores per litteras significarunt. Inde refert Eusebius Epistolam Sabini Præfecti Prætorii super hoc ad Provinciarum Præsides, omnia continentem, quæ in Edicto Imperatorum, excepto quòd de reædificandis Ecclesiis non loquitur.*

IV. Vi hujus Imperatorum concessionis Præsides à Persecutione cessarunt, ac ut idem facerent Magistratus ceterique inferiores Ministri demandarunt; quare Fideles omnes sive in carceribus inclusi sive ad metalla damnati liberi dimissi sunt, & laudantes Deum solitos cœtus magno numero frequentare & Ecclesias reædificare cœperunt. Quod describens Eusebius dicto L. 9. cap. 1. ait: *His ad hunc modum confectis repente instar cœlestis cujusdam lucis, quæ post densissimas noctis tenebras exoritur, Ecclesias in singulis Civitatibus congregatas, & frequentissimos Christianorum concursus, & Collectas ibidem ex more fieri solitas ceruere licebat. Ex quo Infidelium Populos ingens pervaserat stupor, cum tantam tamque insperatam rerum conversionem admirarentur. Exclamabantque solum magnum & verè Deum esse qui à Christianis coleretur... Sic igitur numerosa nostrorum agmina per vias publicas & per fora Deum hymnis & canticis celebrando iter suum peregerunt. Et qui paulò ante cum summa acerbitate vinelli, & ex patria fuerant expulsi, eos tunc læto atque hilari vultu sua domicilia postliminio recuperantes vidisses: aded ut illi ipsi, qui priùs cadem nobis*

nobis atque excidium minabantur, tam inſperata rei miraculo attoniti nobis gratularentur. Ita Eufebius.

V. Interim Chriſtiani ſecundùm monitum Pauli pro Galerio etſi ſceleſto, preces ad Deum fundere non ceſſabant; ſed iſte Divinâ miſericordiâ ſe indignum reddidit: nam non ſolùm criminis ſui veniam à Deo non poſtulat, ſed faſtu & arrogantia tumens Chriſtianos oderat, eos omni ſupplicio dignos eſſe pronuntians, & ſuâ clementiâ præſervari. Quare Deus nedum ſanitatem ei non conceſſit, ſed brevi ademptâ ei vitâ ad æterna tranſire fecit ſupplicia. Mortis ejus ante finem Maii Nicomediam perlato nuntio, Maximinus in poſſeſſionem Aſiæ ſeſtatem immiſit: ſed cùm Licinius omnia, quæ ſub Galerii dominio fuerant, ſibi vindicare vellet, ac proinde bellum imminens eſſet; amicabiliter conventum eſt, ut quidquid Galerius in Aſia poſſederat Maximino cederet, quidquid verò in Europa Licinii eſſet.

VI. Ejuſmodi tamen pax belli adverſus Chriſtianos innovatio fuit in Oriente. Cùm enim mortuo Galerio Nicomediam Maximinus veniſſet, occurrerunt ei Pagani ſua Idola ante ipſum ferentes, & ut Chriſtianos expelleret enixè rogantes. Placuit Maximinino hæc petitio; ei tamen ſe annuere non poſſe reſpondit, ſed velle Mundum in ſua relinquere libertate. Hoc autem dixit, quia cùm in illis partibus ingens eſſet Chriſtianorum numerus, ac ſibi à Licinio bellum timeret, noluit tantam multitudinem adverſum ſe provocare. Non diù poſt tamen ab hoc timore liber, protulit litteras manu ſuâ ſubſcriptas, quibus permittebat Urbium Magiſtratibus ut impedirent ne Chriſtiani cœtus ſuos in cœmeteriis habere & Eccleſias intra mœnia Urbium erigere poſſent: atque ita, ut notat Eufebius L. 8. cap. 2., ne ſex quidem menſibus integris permiſſum fuit Chriſtianiſ conſeſſâ libertate gaudere.

VII. Huic maximam incentivum dedere Antiochenſes, qui loco maximi beneficii poſtularunt, ne cuiquam Chriſtianorum Antiochiam incolere liceret, auctore Theoteco viro violento verſuto atque improbo, qui tunc in illa Civitate Curatoris officium gerebat. Hic cùm antea variis artibus Chriſtianos calumniari conatus fuiſſet, tandem ſimulacrum Jovis Philii magicis artibus conſecratum erexit. Cùmque ad ejus cultum inania myſteria ac deteſtandas expiationes inſtituiſſet, compoſitis quibuſdam oraculis, ad ipſum uſque Imperatorem præſtigiarum ſuarum ſpecimen detulit: ſœdâque adulatione gratiam ejus captans finxit Deum jubere, ut Chriſtiani Urbe omnique territorio pel-

lerentur; quod illi ex sententia successit. Nam Magistratus omnes Maximino subiecti, stimulantibus quoque Idolorum Sacerdotibus, ut rem gratam Principi facerent, nihil non egerunt quod adversus Christianos esse existimarent. (Eusebius L. 9. cap. 3. & 4.) Impius tamen Theotecnus debito tempore poenas luit; nam ut ait idem Eusebius cap. 11.: *Licinius, Maximino devicto, cum Antiochiam venisset & praestigiatos pervestigare ac deprehendere instituisset, inter ceteros etiam novi illius simulacri Prophetas & Sacerdotes tormentis subiecit, quâ ratione fraudem concinnassent, interrogans. Qui cum veritatem amplius celare non possent, vi tormentorum adacti, totiusque mysterii scenam à Theotecnio arte quâdam compositam fuisse faterentur, Licinius meritis supplicio cunctos afficiens, primum quidem Theotecnum ipsum, deinde reliquos fraudis ac praestigiarum conscios ac participes post plurimos cruciatus interfici iussit.*

VIII. Redeundo igitur ad Maximini impietatem, iste non contentus Christianis vitam adimere, honorem eis quoque eripere, Christum ejusque Legem infamiâ notare tentavit. Acta enim quâdam apud Pilatum super Servatore nostro habita confingi curavit (vel jam conficta prodidit) plena impietatis adversus Christum: quæ illicò per omnes Provincias evulgari mandavit per litteras, ut ubique locorum tam in Urbibus quàm in oppidis & agris publicè proponerentur, & ut ipsi Ludimagistri pro dictatis declamanda & memoriæ commendanda pueris traderent, & sic horrorem contra Religionem Christianam à teneris annis conciperent. De quo Eusebius L. 9. cap. 5. ubi addit, quòd Dux quidam mulieres quasdam impudicas è foro tractas minis adegit, ut faterentur se olim Christianas fuisse, & flagitiorum quæ à Christianis patrantur conscias esse; eos in ipsis ædibus sacris obscœna quâdam perpetrare asseverantes, & quæcumque alia ad infamandam Christianam Religionem Dux voluerat. Harum mulierum testimonia Actis inserta, & ad Imperatorem transmissa, ejus jussu ubique publicata sunt: verum non longo post tempore Dux ille mortem sibi consciscens improbitatis suæ poenas luit.

IX. Interea (pergit Eusebius cap. 6.) revixit Persecutio, adeò ut Christiani latebras iterum quærere, Provinciarum Regibus contra eos insurgentibus, cogerentur; & multi, qui in Sacra Fidei prædicatione excelebant, comprehensi capitali sententiâ damnati sint. Ex his apud Emesam tres Christianos se esse confessi bestiis obijciuntur: inter quos Silvanus Episcopus decrepitæ jam ætatis, qui per annos quadraginta ministerium obie-

obierat ; Petrus quoque Alexandrinæ Ecclesiæ Episcopus vir sanctitate & doctrinâ celeberrimus Maximino jubente capite truncatur ; atque cum ipso idem perpeffi sunt alii quoque Ægyptiorum Episcopi. Sed & Lucianus Antiochenæ Ecclesiæ Presbyter vir tum vitæ continentiam tum sacrarum litterarum peritiâ conspicuus, perducus Nicomediam in qua tunc Maximinus morabatur, cum confessionem Fidei quam profitebatur coram Præsidente edidisset, coniectus in carcerem trucidatur. (Hujus dum esset in carcere memorabile factum pro antiquitate Sacrificii Missæ retuli supra tom. 2. cap. 5. §. 3. num. 11.) Demum tot tantaque mala brevi tempore Christianis intulit ille omnis virtutis inimicus Maximinus, ut hæc Persecutio multò acerbior priore videretur, Eusebio teste.

X. Verùm tandem didicit, manum hominis nihil contra Deum posse. Pluribus enim dimissis nempè fame peste beillis quibus totum Imperium concussum fuit, Maximinus ipse à Licinio in prælio superatus & fugâ elapsus, Licinio cum exercitu eum insequente, ad abditos montis Tauri recessus & tandem Tarsum aufugit. Ibi videns, se terrâ & mari periculis expositum, nec ullum effugium inveniens, desperato consilio mortem sibi accersire decrevit. Vino igitur ac cibis immoderatè repleto stomacho venenum sumsit ; sed cum hoc propter abundantiam ciborum effectum suum statim parere non potuisset, tantum in visceribus ejus accendit ardorem tamque acerbos dolores, ut furore extra se raptus ac humi prostratus terram plenis manibus sumeret, camque famelici instar quatrîduò deglutiret : & caput in parietibus collidens effossis oculis omninò cæcus evaderet. Tunc visu corporeo orbatus, oculos mentis aperire cœpit. Visus ei fuit Deus Judex Ministris stipatus albis vestibus indutis, super ipsum instituens judicium, quo miser, velut in tormentis interrogaretur, auditus fuit prius clamare : Non ego hoc feci sed alii : deinde tamen reum se confessus, identidem gemens acplorans veniam à Jesu Christo implorare non cessabat : sed nimis serò, nam inter hæc miseram efflavit animam.

XI. Totum hoc refert Lactantius L. de Mort. Persec. c. 49. ubi postquam dixit Maximinum Tarsum confugisse, subdit : *Ibi cum jam terrâ marique perterreretur, nec ullam speraret refugium, angore animi ac metu confugit ad mortem, quasi ad remedium malorum, quæ Deus in caput ejus ingessit. Sed prius cibo se inserfit ac vino ingurgitavit, ut solent hi, qui hoc ultimò se facere arbitrantur, & sic hausit venenum ; cujus vis refocto stomacho percussa, valere non potuit in præsens : sed in languorem malum versa est pestilentia*

similem, ut diutius protrahere spiritu cruciamenta sentiret. Jam savire in eum coeperat virus, cujus vis cum praeordia ejus ureret, insupportabili dolore usque ad rabiem mentis elatus est; adeo ut per dies quatuor insani percitus haustam manibus terram velut esuriens devoraret: deinde post multos gravesque cruciatus, cum caput suum parietibus infligeret, exsilierunt oculi ejus de caveis. Tunc demum amisso visu, Deum videre cepit, candidatis Ministris de se judicantem. Exclamabat ergo sicut ii qui torqueri solent, & non se sed alios fecisse dicebat; deinde quasi tormentis adactus fatebatur, Christum subinde deprecans & plorans ut suimet miseretur. Sic inter gemitus, quos tanquam cremaretur edebat, nocentem spiritum destabili genere mortis efflavit. Ita Lactantius, cui similia Eusebius refert L. 9. Hist. cap. 10.

XII. Sic Galerius & Maximinus eodem quo olim Antiochus (L. 2. Mach. cap. 9.) infelici ac turpi exitu vitam clauserunt, & sub omnipotentis Dei manu positi ejus condignam ultionem experti sunt. Hanc uterque sentiens, sicut ille, Deum, quem in servis suis persecutus fuerat, tandem agnovit oravit & multa ad ejus gloriam & Fidelium utilitatem se facturum pollicitus est: sed de utroque ut de illo verè dictum fuit: *orabat scelestus Dominum, à quo non esset misericordiam consecuturus: quia nimis fera imò nec vera poenitentia erat. Paucis ergo immediate succedentibus annis tres ferocissimos Ecclesiae suae hostes prostravit Deus, anno 310. Herculum, 311. Galerium, & 313., Maximinum. Quare cum Lactantio L. de Mort. Persec. cap. 52. Deo gratias agendo dicere possumus: Ubi sunt modò magnifica illa & clara per gentes Foviorum & Herculiorum cognomina, quae primùm à Dioclese ac Maximiano insolenter assumpta, ac postmodum ad Successores eorum translata viguerunt? Nempe delevit ea Dominus & erasit de terra.*

§. II.

Qualis Licinius fuerit erga Christianos.

I. **V**alerius Licinianus Licinius conditione vilis, quia Agricola filius, anno 307. à Maximiano Galerio Caesar declaratur, eique Pannoniae & aliarum fortè Provinciarum Imperium committitur. Eum in Christianis persequendis Galerio fuisse consortem, extra dubium esse videtur, saltem usque ad annum 311., quo, ut supra dixi, Galerius ipse ab eis persequendis cessavit, ut apparet ex Edicto nomen etiam Licinii praefrente (apud Eusebium L. 8. Hist. cap. 17.) quo indulgetur, ut

omnes Christiani ades suas, in quibus conventus peragebant, denud instaurare possint, ita ut nihil contrarium disciplinae suae deinceps facere cogantur. Galerii mors, quæ anno 311. contigit mense Maii, totius Illyrici Græciæ & Thraciæ dominium Licinio reliquit. Eodem tempore cum Constantino inito foedere Mediolanum Licinius accessit, ut Constantiam Constantini fororem sibi promissam uxorem acciperet, quam de facto Mediolani accepit anno 313. ; ibique ambo Edictum summè favorabile Christianis promulgarunt, quod per extensum refert Eusebius L. 10. Hist. cap. 5. quod tamen ad solam Ecclesiam Catholicam se restrinxisse alio Rescripto indicarunt.

II. Maximinus tamen (ut refert Lactantius L. de Mort. Persec. cap. 45.) ubi intellexit, Licinium nuptiarum solemnibus occupatum, adversus eum movit exercitum, & transiecto protinus freto ad Byzantii portas accessit armatus, ac militibus ibi in præsidium relictis promissis & muneribus frustrà tentatis, vi & obsidione per dies undecim Urbem oppugnavit, quam Milites non fide sed paucitate diffusi dederunt. Inde Heracleam progressus, & illic eadem ratione detentus aliquod dierum tempus amisit. Inter hæc accepto nuntio Licinius cum paucis Hadrianopolim venerat ; Maximinus autem, occupatâ per ditionem Perintho, ad mansionem decem millium & octo pervenit nec ultra processit ; alteram mansionem Licinio tenente : qui collectis ex proximo quantum potuit Militibus, obviam ei pergebat magis ut Maximinum detineret, quam proposito dimicandi aut spe victoriæ : quippe cum ille septuaginta millium armatorum exercitum duceret, ipse vix triginta millium numerum collegisset ; sparsi enim Milites per diversas Regionem fuerant, & adunari omnes angustiae temporis non sinebant.

III. Propinquantibus tamen exercitibus, jamjam futurum prælium videbatur. Tum Maximinus ejusmodi votum Jovi vocavit, ut si victor evaderet, Christianum nomen extingueret funditusque deleteret. At proximâ nocte Licinio quiescenti adstitit Angelus Dei, monens ut ocius surgeret & oraret : Deum summum cum omni exercitu suo ei victoriam daturum, si fecisset. Post has voces cum surgere sibi visus esset, qui eum monuerat, docuit quibus esset orandum : quare discussio somno jussit acciri notarium, & sicut audierat hæc verba dictavit : *Summe Deus te rogamus : & Sancte Deus te rogamus : omnem justitiam tibi commendamus : salutem nostram tibi commendamus : imperium nostrum tibi commendamus . Per te vivimus , per te victores existimus . Summe Sancte Deus , preces nostras exaudi ; brachia nostra ad te ten-*

dimas : exaudi, Sancte summe Deus. Scribuntur hæc in libellis, & per Tribunos mittuntur, ut suos quisque Milites doceat. Crevit in omnibus animus, victoriam credentibus sibi de Cœlo nuntiatam. Maximinus autem castra composuit : nuntiatur Licinio : capiunt Milites arma obviâque procedunt. Erat utraque acies in conspectu. Liciniani scuta deponunt, galeas dimittunt, manus ad Cœlum tendunt, & præeuntibus Ducibus ac Imperatore preces dicunt : audit acies peritura precantium murmur. Oratione ter dictâ, virtute jam pleni reponunt capitibus galeas, scuta resumunt : procedunt ad colloquium Imperatores : sed ferri non potuit ad pacem Maximinus : contemnebat enim Licinium & desertum iri à Militibus existimabat, eò quòd ille esset in largiendo tenax, ipse autem profusus : & ad hoc arma moverat, ut exercitu Licinii sine certamine accepto, in Constantinum duplicatis viribus pergeret.

IV. Ventum igitur est ad pugnam. Liciniani impetu facto adversarios invadunt : illi verò perterriti nec gladios expedire nec tela jacere valuerunt. Maximinus aciem circumire ac Licinianos Milites nunc precibus nunc donis ad se trahere satagit, sed non auditur. Fit impetus in eum & ad suos redit. Interim acies ejus impunè cædebatur, & tantus numerus Legionum, tanta vis Militum à paucis metebatur : sic eos summus Deus tradidit jugulandos. Tantæ multitudinis stragem videns Maximinus, abjecit purpuram & servilem vestem induit, ac fugæ se commisit Nicomediam primùm, inde in Cappadociam, tandem Tarsum confugit, ubi ut dixi miserè vitam finivit. Exercitus sui media pars prostrata est, media vel dedita vel in fugam versa. Licinius paucis post diebus Nicomediam ingressus, gratias Deo, cujus auxilio vicerat, retulit, ac de restituenda Ecclesia & Christianæ Religionis libertate amplissimas litteras dedit, quarum exemplum Lactantius citatus cap. 48. nobis exhibet.

V. Tanto beneficio Licinius à Deo cumulatus, existimabit quispiam, quòd Christianam Religionem illicò amplexus sit. Ita existimasse visus est Sozomenus dum L. 1. Hist. cap. 7. ait : *Licinius verò qui antea Religionem Christianam coluerat &c.*, & solum ad Paganismum reversum, cum Constantini inimicus factus fuit. Idem erui videtur ex quadam Oratione panegyrica in congressu Episcoporum habita super ædificatione Ecclesiarum (apud Euseb. Lib. 10. cap. 4.) ubi de Imperatoribus tunc regnantibus Constantino & Licinio dicitur : *Adeò ut, quòd nunquam contigerat, summi Imperatores honoris illius, quem Dei beneficio acceperant, sibi conscii, jam in mortuorum simulacrorum faciem*
cen-

conspuant ; & profanos Daemonum ritus conculcent . . . unum verò ac solum Deum cum erga omnes tum in se ipsos maxime beneficium agnoscant , & Christum Dei Filium univerſorum Regem esse profiteantur . Ita fortè creditum fuit ab illis , qui procul ab ejus confortio erant ; videntes enim , quæ in favorem Ecclesiæ operabatur , & audientes , quòd Divinâ ope vicisset Maximinum , sibi persuadebant , Licinium tanti memorem beneficii Christo æquè ac Constantinum nomen dedisse .

VI. Verùm deceptos fuisse puto ; Licinium enim nunquam Idola deseruisse & Christianam Religionem amplexum fuisse , certius judico . Primò quidè Christianis valde favorabilem se exhibuit , præsertim post victoriam de Maximino Divinâ ope reportatam , cujus testimonium præbent litteræ postea datæ ; animo tamen nunquam Christianus fuit , sed quæ in gratiam Christianorum fecit & dixit , exterius præstitit , ut Constantino , cui tunc fœderatus erat , complaceret . Cæterùm exortis tractu temporis invicem simultatibus , quæ tandem in apertum bellum eruperunt , qualis in corde semper fuisset indicavit : & maxime tunc cum prælium commissurus , ubi Constantinus precibus , ille vaticiniis & falsis Diis sacrificando & cum despectu de Christo loquendo se præparabat , ut videre est apud Eusebium L. 2. de Vita Constant. cap. 4. & 5. . Licinius ergo cum cœpisset Constantinum odisse , odio cœpit etiam habere Christianos , eisque infensus esse , *ex eorum calamitatibus maximum dolorem Constantino allaturum se esse sperans : simul etiam existimans , Ecclesias Christianorum id unum optare ac studere , ut illum solum Imperatorem haberent .* Ita Sozomenus L. 1. cap. 7.

VII. Non statim tamen sed paulatim odium in Christianos prodidit Licinius . Primò enim , ut scribit Eusebius L. 1. de Vita Constant. cap. 51. vetuit , Episcopos conventus agere , fines alterius intrare & Concilia cogere . Secundò cap. 52. Christianos omnes è suo Palatio expulit , & quos in comitatu suo habebat fidiſsimos , eos præcipuè in exilium relegavit . Rursus cap. 53. Legem tulit ; ne viri orandi causâ in Ecclesiam Dei simul cum mulieribus convenirent ; ne mulieres ad virtutis scholas discendi causâ ventarent ; ne Episcopi Religionis præcepta mulieribus traderent , sed ut mulieres ad id electæ docendis mulieribus præficerentur : jussit etiam , ut solemnes Populorum conventus extra Portas in aperta planitie celebrarentur ; asserens , liberum extra Portas aerem turbis longè commodiorem esse , quàm Oratoria intra Urbem sita : & hæc arte Ecclesias sensim destruere tentabat . Verum (cap. 54.) cum ne in hoc quidè obsequi sibi

videret, reiectis ambagibus, nudo quod ajunt capite decrevit, ut Milites, qui per singulas Urbes apparebant Judicibus, nisi Damonibus sacrificare vellent, à Militia & cæteris præsidialibus officiis removerentur. Aliud quoque mandatum fecit, ne quis detentis in vinculis quidquam etiam ad vitæ sustentationem necessarium suppeditaret; poenâ impositâ, ut qui inclusis stipem dedisset, pari cum ipsis supplicio plecteretur. Talem Legem humanitati aded contrariam nemo etsi barbarus unquam tulit.

VIII. Hæc & alia Eusebius cap. 55. & 56. refert, à Licinio adversus Christianos facta anno 319. & 320., donec crescente in dies in Constantinum, à quo iterum victus fuerat, odio, apertè Ecclesiam persequi Licinius cœpit, & ipsos præcipuè Episcopos, quos maximè sibi adversos esse intelligebat; pro inimicis præcipuè habens eos, qui Deo carissimi Imperatoris amici essent. Nec ipsum deterruit exemplum eorum, qui ante ipsum fuerant persecuti, quorum ipse ex parte spectator fuerat & etiam ultor, ut Maximini: qui omnes infelici exitu perierunt. Quia tamen Constantinum metuebat, ausus non fuit omnibus Ecclesiis suo Imperio subiectis apertum bellum indicere; ad instar colubri, qui non audens in eum quem aggreditur insilire, contorquet se sinuosè, ac sibilis & linguâ furorem suum prodit, & si potuerit repentè mordet: sic Licinius suæ perfidiæ venenum corde retinere magna ex parte coactus, minis fremebat, & sinuosè variis prætextibus, præsertim verò dum poterat, in Episcopos evomebat. Hinc factum puto, ut Sulpitius Severus L. 2. num. 48., hanc inter Persecutiones non computet.

§. III.

SS. XL. *Milites & Severianus Martyres.*

I. S Olos Episcopos sub Licinio passos fuisse audacter de more asserit Doduvellus Dissert. de Paucit. Mart. num. 91. dicens: *Caveant itaque Fabulatores, ne quos alios sub Licinio Martyres faciant, præterquam Episcopos*: at verius puto, Doduvellum ipsum fabulari. Nam Gregorius Nyssenus, Ephræm Syrus, Septimæ Synodi Generalis Patres, & ut notat Gerardus Vossius in scholiis ad homil. S. Ephræm in SS. XL. Martyres, horum memoriam non Græci solum & Latini, sed & Syrii Chaldæi Maronitæ Armeni & Orientales omnes celebrant. Omnes ergo isti Fabulatores sunt? Fateor equidem, Licinium in Episcopos magis sævisse, quia eos utpotè Constantino maximè deditos, specia-

cialiter oderat ; sed tandem à Constantino devictum generaliter in omnes Christianos exarsisse : id enim Eusebius ipse testatur , qui L. 10. Hist. cap. 8. & L. 2. de Vita Const. cap. 1. & seq. describens Persecutionem , quam Amaseæ & cæteris Ponti Urbibus sæviùs excitavit , dicit , *quoddam multi novum mortis genus pertulerunt , corpore in multas partes , bestiarum more , conciso , & post atrox ejusmodi spectaculum , ut piscibus cibum præberent in altissimum mare projecti* . Erat ergo hæc Persecutio præcipuè contra Episcopos & contra Milites concitata . Hinc Sozomenus L. 1. cap. 7. Hist. non solum multos Sacerdotes à Licinio afflictos fuisse commemorat , sed & *alios plurimos & præcipuè Militaris Ordinis male multatos* asserit . Nec tamen fieri Persecutio dicebatur , erat enim ut ait Socrates L. 1. Hist. cap. 3. *aperta simul & occulta ; nam verbis quidem dissimulabatur , re ipsa verò erat manifestissima : ii enim qui Persecutioni subiacebant , innumerabilia mala tum in bonis tum in corporibus suis perpetiebantur* . Et quidem si , ut dixi , præceptum erat , ne iis qui erant in carcere cibum quisquam deferret , quot ex illis inedia necatos fuisse credendum est ? Unde Rufinus L. 9. Hist. cap. 10. : *Multitudines , inquit , in carcerem reclusæ inedia necabantur* .

II. Inter eos , qui sub Licinio passi fuere , celebres sunt quadraginta præfati Martyres professione Milites , qui Sebasten Armeniæ Urbem passione suâ illustrarunt . Hi ex diversis Provinciis Militiæ adscripti , mole corporis , virium robore , flore ætatis , sed magis pietate , erant enim omnes Christiani , cæteris eminebant : cum ergo Licinii Edictum , quo Milites omnes Dæmoniis sacrificare jubebantur , illuc pervenisset , ipsi perfracto animo renuerunt ; se Christianos esse dicentes . Agricolaus Præses hoc audito anxius ac dubius , primum quidem dulci sermone eos aggreditur : Nolite , inquit , juvenes ætatem vestram perdere , & fortia quæ hæcenus gessistis facta pravorum hominum morte obscurare : aderunt vobis ab Imperatore honores divitiæ omnia bona , si mandatis ejus parueritis . Sed cum illi hæc omnia contemnerent , dicerentque , multò plus esse , quod eis eripere tentabat quia æternum , quàm quacumque posset promittere quia temporalia & fugacia : faceret de eorum corporibus quod vellet , nam illorum animæ soli Deo vero dicatæ erant , nec quisquam ab eo tollere poterat . Iratus Præses virgis eos cædi & latera ungulis lacerari , deinde catenis invicem ita colligari ut unâ catenâ viderentur omnes vinciri , & in carcerem trudi jussit .

III. Eorum nomina , ut à Bollandistis 10. Martii recensentur , sunt *Quirion , Candidus , Domnus , Meliton , Domitianus* ,

Ennoicus, Sisinnius, Heraclius, Alexander, Joannes, Claudius, Athanasius, Valens, Helianus, Ecdices, Acacius, Vibianus, Elias, Theodulus, Cyrillus, Flavius, Severianus, Valerius, Cudion, Sacerdon, Priscus, Eutiches, alter Eutiches, Smaragdus, Philoctemon, Accius, Nicolaus, Lyssimachus, Theophilus, Xanthreas, Angiacus, Leontius, Hefychius, Cajus, & Gorgonius. In vinculis & carcere detentis corona ad quam anxie suspirabant septem diebus dilata fuit: quibus exactis, cum Cæsareâ Sebasten Lysias advenisset, Agricolaus è carcere educi præcepit; & interrogati, cum iterum Christum liberè confessi fuissent, remittuntur ad carcerem sequenti die ultimo supplicio addicendi.

IV. Cogitanti verò Judici, quo mortis genere illos afficeret, occurrit hoc æquè rarum & crudele supplicium. Armenia Regio frigidissima est, tunc autem nonâ Martii boreâ intensè flante omnia gelu concreta erant, adeò ut stagnum intra Urbis mœnia situm præ gelu pedibus permeabile esset. Observatâ ergo nocte, quâ boreas maximè rigebat, in congelatum stagnum conjici mandavit. Quantum sit hoc tormentum describit S. Basiliius hom. 20. de SS. 40. Mart.. *Nam corpus in primis frigore prostratum, primum in pallorem concreto sanguine vertitur; deinde turbatur & fremit, dentes frendent, vena contrahuntur & totum corpus invitum constringitur. Dolor insuper quidam acutus & labor inenarrabilis per medullas penetrans intolerabilem facit sic frigore concretis dolorem: deinde extremitates ipsius mutilantur, perinde ac si ab igne crematæ extremæ partes essent; calor enim ab extremis corporis partibus pulsus & ad interiora confugiens, quadam inde absistit mortua relinquit, nonnulla verò ad quæ tendit doloribus afficit, morte paulatim procedente.* His S. Basiliius hujus tormenti atrocitatem subjicit. Porro ut Martyrum constantiam magis tentaret, jussit Præses balneum calidum in loco propinquo parari, ut si quis ex eorum numero à proposito resiliiret solamen in promptu haberet.

V. Hoc igitur audito damnationis jussu Sancti Martyres ad locum deducti, amictum alacriter rejicientes per frigus properarunt, non tanquam ad supplicium tristes, sed hilares tanquam ad rapienda spolia invicem se ad fortiter tolerandum adhortantes. Ita vel super stagnum frigidissimo aeri nudi noctuque expositi, vel ut alii volunt in aquam gelu constrictam merfi, uno ore Deum orabant dicentes: *Quadragesima in stadium intravimus, utinam quadragesima, o Domine, coronemur; non desit numero ne unus quidem. Venerabilis est, quem quadragesima dierum jejunio prævasti, per quem Divina Lex in Orbem transiit: quadragesima die-*

dierum jejunió Elias Dominum exquirens videre meruit .

VI: Nihilominus unus ex eis dolore victus ac vi cruciatus animo fatiscens, ac desertor factus inconsolebilem dolorem Sanctis reliquit, nec propterea Dominus eorum vota inania esse permisit . Propè aderat Licitor quidam in loco, ubi, ut dixi, erat balneum calidum, qui se fovens & calefaciens rei exitum spectabat, paratus suscipere, si quis Militum transfuga fieret . Is spectaculum vidit inusitatum, Angelos nempe à Cœlis descendentes, & singulis generosis Militibus pretiosa dona distribuentes, uno tamen excepto : & is fuit qui in cruciatu defecerat ; debitas tamen pœnas luit ; nam calentem aquam ad quam ob levamen confugerat cùm tetigit, statim interiit . Licitor autem hoc videns, cœlesti quam viderat visione tactus, statim abjectis vestibus clamans *Christianus sum*, cæteris Martyribus sese immiscens quadragenarium numerum implevit, & mœstos ob amissum socium Sanctos consolatus est & Martyribus adnumeratus . Ita, inquit Basilii, *exemplum est Apostolorum imitatus . Abiit Judas, Mattheus est subrogatus : imitatus est Paulum, qui heri persecutor, hodie factus est Evangelizator : supernè & ipse vocatus, non ab hominibus neque per homines : credidit in nomine Domini Jesu Christi ; Baptismum suscepit, non ab ullo sed à propria Fide, non in aqua, sed in proprio sanguine .*

VII. Die verò jam illucescente, cùm adhuc spirantes inventi fuissent, curribus impositi in ignem projecti fuere, atque ita ab extremo frigido ad extremum calidum transeuntes majori doloris acerbitate necati sunt . Hic narrat idem S. Basilii, quòd unius illorum (quem Melitonem Acta vocant) mater, videns filium suum tanquam vegetiorem à Militibus relinqui, quasi eum servantibus ut à proposito dimoverent, ipsum propriis accepit manibus, & curru in quo reliqui jacentes ad pyram ferebantur imposuit, dicens ei : Vade, o nate, perforce cum tuis sociis iter beatum, ne unus desis illorum choro, ne reliquis seriùs Domino præsenteris : oh matrem verè felicem & Machabæorum matris spiritu hæredem ! Perducti ad pyram omnes combusti sunt, eorumque Reliquiæ in fluvium projectæ . Celebratur horum Martyrum memoria die 9. Martii ab utraque Ecclesia Latina & Græca : utraque tamen in specie Martyrii & mortis ab hæcenus dictis dissentit; eos enim non igne sed crurifragio interfectos dicit, ac eorum corpora in fluvium projecta, ut in Martyrologio Rom. & Menol. Basilii videre est .

VIII. Non solis quadraginta prælaudatis Militibus Sebastena Civitas gloriatur, sed Sanctum Severianum virum similiter

militarem profert. Is divitiis sed pietate ac Fide magis affluens, in sublevandis pauperibus, eisque maximè qui propter nomen Jesu Christi in carceribus patiebantur, totus exercebatur: imò creditur, eum dictos quadraginta Martyres ad illustre pro Christo testimonium excitasse, necnon ex Infidelibus multos ad Fidem suâ pietate traxisse. Hæc tamen, quæ coram Deo merita erant, fiebant coram hominibus & præsertim Licinio immania crimina, quia impio ejus Edicto contraria, quo vetuerat, ne detentis in carcere quisquam in levamen vel minimum suppeditaret. A Lysia Duce propterea perquisitus, se se ei spontè præsentavit, qui nervis bubulis cædi & ungulis lacerari mandavit, & in carcerem detrusum per dies quinque detinuit. Iterùm autem ad se adducto faciem saxi contundi & latera ungulis lacerari mandavit: post quæ ad collum & pedes lapidibus appensis, ex alto præcipitatus ad Cælum evolavit. Ejus Corpus Fideles quidam sublatum tumularunt.

IX. S. Severiani historiam exhibent Latini in Martyrol. Rom. die 9. Septembris, & fusiùs Græci in Menol. Bas. eâdem die his verbis: *Severianus Martyr patriâ Sebastenus, Licinio imperante Miles fuit: cùm autem quadraginta Martyres comprehensississent & in carcerem pro Christo detrussi, eos adivit, & ad perferendum Martyrium hortabatur. Cognitus autem captusque sistitur Lysia Duci: cùmque Christum liberè confiteretur, erroremque argueret ipsique Lyciæ constanter se opponeret, suspensus nervis bubulis caditur, in lateribus dilaniatur, facibusque adurit. Post hæc de alto muro suspenditur vinctus funibus, pedibus ingentium saxorum mole oneratis, manibusque post tergum revinctis; diùque suspensus verberibus caditur, quoad nervi saxorum mole luxati sunt ac membra dissoluta. Interim Deo gratias agens atque orans, inter gravissima tormenta decessit, in manus Dei spiritum commendans.*

§. IV.

*SS. Macrobius &c. Theogenes Acacius &c. Leontius
& alii Martyres.*

I. **U**T Doduvelli temeritas magis appareat, qui, ut dixi, tanquam fabulatores traducit, alios præter Episcopos Martyres sub Licinio ponentes; placet ultra supradictos hîc alios indicare. Inter ipsos celebres sunt Sancti Macrobius, Gordianus, Zothicus, Lucianus, & Heli, quorum tres primi capite plexi, alii duo vivi combusti fuere. Macrobius & Gordianus
erant

erant Licinii domestici eique cari, sed eos in Christi Fide constantes inveniens in Scythiam relegavit, ubi Martyrio coronati sunt. Martyrologium Rom. 13. Septembris meminit tantum Macrobi & cujusdam Juliani. Græci verò in Menol. Basilii omnes recensent, & addunt S. Valerianum: qui plorans ad eorum sepulcrum animam Deo reddidit. Sic ergo habent: *Hi Sancti Martyres Licinio imperante claruerunt; & Macrobius quidem ex Cappadocia ortum duxit, Gordianus verò ex Paphlagonia: cum autem florenti essent ætate, & fortitudine sapientiâque præditi, id muneris obibant ut ad Imperatoris mensam ministrarent, & ab illo ob virtutem suam & egregiam corporis formam maximè diligebantur. Sed Fidei Christianæ accusati, cum nec adhortationibus nec minis ad Christum abnegandum adduci possent, relegantur in Scythiam: quò deportati invenerunt Sanctos Zoticum, Lucianum, & Heli, fortissimè pro Christi confessione pugnantes. Post multos autem cruciatus, Zoticus quidem & Lucianus capite plexi sunt, ipsi verò unà cum Heli in carcerem detrusi: atque ille quidem decollatus est, Macrobius autem & Gordianus in ignem coniecti occubere. Valerianus verò ad sepulcrum Sanctorum plorans, spiritum emisit.*

II. S. Theogenis, qui Cyzici passus fuit, celebre est nomen. Cujusdam Episcopi filius fuisse fertur, qui sub Licinio captus fuit, ut Legioni Trajanæ, quæ Cyzici Hellesponti Metropolis stationem habebat, adscriberetur. Ductus ad Zelicinthus Tribunum, & Possidonium Legionis Ducem, videntem se Militibus circumdatum, Spiritu Sancto repletus altâ voce dixit: Ego Christianus sum & Regis Regum Miles, jam illi obstructus; nulli alii fidem dare possum: atque idem dixit, cum arma ei præsentabantur. Cumque Tribunus quæreretur, an hoc renueret, quia Licinio servire ei non placeret, respondit: ego neminem novi: Christianus sum: Regi æterno milito; nulli alteri militare volo. Et quamvis ei diceretur, multos Christianos arma Imperatoris gestare; ad hæc tamen nihil motus respondit: quod sibi placuerit quisque faciat: mihi tanta est Dei mei celsitudo, ut nulli alteri servire possim. De Diis autem interrogatus, dixit, se alium Deum non nosse, quàm Deum omnipotentem per Jesum Christum Filium ejus, à quo dignoscendo retrahuntur illi, qui his temporalibus irretiti, solum hujus Mundi Regibus qui transeunt placere student, & Regem supremum, à quo æterna bona solo spectare possunt, contemnunt.

III. His auditis, iratus Tribunus, totam Legionem in crastinum summo mane extra Civitatem coire jubet, atque illuc Theogenem ductum, manibus, ac pedibus quatuor palis appendi,

& baculis ligneis aded cædi, ut Lictores ipsi deficerent, ipsum interea an arma gestare vellet interrogans: sed Sancto Martyre hæc irridente & iteratò dicente, se à Militiæ æterni Regis desertorem fieri nolle, ut temporalis Regis castra sequeretur; iterum cædi eum præcepit: jamque tertiâ pomeridianâ horâ adveniente, Legionem ad Urbem revocavit, comminatus Theogeni graviora tormenta, ni resipisceret. Interim eum in carcerem trusum quadraginta diebus detinuit, quousque à Licinio, cui omnia nuntiaverat, quid imposterum ageret, responsum acciperet. Cùmque mandasset Licinius, ut in mare projiceretur, hoc audito nuntio vir Dei lætus ad pœnam seu veriùs ad vitam æternam, ad quam à Deo vocabatur, processit. Ejus corpus ad litus ejectum Fideles quidam collectum propè Urbem in cavea cujusdam Christiani nomine Adamantii condiderunt.

IV. Plura ejus Martyrium & mortem prodigia illustrasse feruntur, quibus ex Legione ex nautis & Populo multi ad Christum conversi fuere. Additur etiam, quòd post duos à morte Sancti Dei menses Zelicinthus Tribunus in prælio fractus fuit, omnesque ex ejus Legione qui Christiani non erant cæsi perierunt. Quo indignatus Licinius, Tribuno & alteri Ministro, qui S. Theogeni insultaverat crura truncari præcepit, quæ an. 323. probabiliter evenere: imò circa ejusdem anni finem Licinius ipse à Constantino victus Imperium ac deinde vitam amisit. Latini in Martyrologio Rom. 2. Januarii, Theogeni in certamine jungunt Cyrinum & Primum; Græci verò die 4. Januarii de illo agunt, in hoc diversi quòd eum faciunt Episcopum Parii.

V. S. Acacii quoque sub Licinio mentionem faciunt Latini in Martyrologiis die 28. Julii, ejusque certamen eadem die Græci in Menol. Basilii his verbis exponunt: *Acacius Christi Martyr claruit imperante Licinio, ad quem adductus, cùm Christum confessus fuisset, suspensus & excarnificatus est: deinde Terentio Præfecto traditus ejusque jussu in candentem ollam pice olea seboque plenam injectus, incolumis evasit. Præfectum verò Apameam & Apolloniadem abeuntem sequi compulsus, ibique in Fanum Idolorum adductus, suis precibus simulacra omnia contrivit: postea Tribuno traditus graviterque casus cum feris pugnavit, mox in fornacem injectus illæsus permansit. Tribunus verò frigesactam fornacem existimans, cùm eam visurus appropinquaret, flammâ combustus in pulverem redactus est. At Acacius Possidonio Præfidi traditus gravibusque catenis ferreis circumdatus, Miletum abductus fuit, ubi eum Idola rursus contrivisset, capite obruncatus sanguinem & lac emisit. Quot prodigia in uno hoc Sancto Viro Divina Potentia operata est!*

VI. Nicopoli quoque in Armenia quadraginta quinque Christiani sub Licinio & Lysia Præside vitam pro Christo dederunt ; inter quos Viri in ea Urbe conspicui Leontius Mauriti-
 us Daniel & Antonius : quorum agonem memorant Latini in Martyrol. 10. Julii , & Græci in Menol. Basil. eâdem die his ver-
 bis exprimunt : *Quinque & quadraginta Christi Martyres Licinio Imperatore & Lysia Præside claruerunt , quibus præerant Leontius Mauricius Daniel & Antonius . Comprehepsi ergo Nicopoli in Armenia Lysia Duci sistuntur ; qui Christum confitentes & Idola conspuentes , verberibus primùm cæduntur , mox lapidibus os & facies eis contunduntur , postremò in custodiam detruduntur : cùm verò per plures dies sine cibo mansissent , cognitâ eorum constantiâ , Milites carceris custodes Christi Fidem susceperunt : post è custodia eductis crura securibus truncantur ; & continuò alii quidè extincti , alii verò adhuc spirantes in ardentem fornacem injecti consummati sunt , accipientes paratum sibi ante Mundi constitutionem à Christo immor-
 tale Regnum .*

VII. Sebaste insuper in Armenia pro Christo certarunt At-
 ticus , Eudoxius , Agapius , Carterius , Styriacus , aliique multi Milites , de quibus Menol. Basil. 2. Novembris hæc refert : *Isti Sancti Milites fuere in Urbe Sebaste temporibus Licinii Imperato-
 ris , qui id omnes consilii capere ut cum omnibus Militibus in Fide Christi manerent . Quare à Marcello Duce cruciati , in carcerem detruduntur ; inde eductis tergum & renes nervis crudelissimè lace-
 rantur dentesque evelluntur . Cùm autem torquerentur , conversus Dux ad Sanctum Carterium : Tu solus , inquit , ausus es Populum à Fide Imperatoris abductum ad defectionem impellere ? cui ille : Ego Populo auctor fui , non ut à Fide Imperatoris discederet , sed ut immortalem Regem Christum sequeretur . Post hæc adducitur Sty-
 riacus , Tobias , & Nicopolitanus : cùmque in Christi confessione perseverarent , Marcelli jussu lignis contusi aliisque pluribus tor-
 mentis excruciat , unâ cum multis aliis qui in Christum credide-
 rant igni damnati , vitam finierunt . Horum memoriam eâdem die celebrat Martyrol. Romanum .*

Hi quos hæcenus recensui præter innumeros alios , quos prætereo , nec Episcopi nec Ecclesiæ Ministri erant sed meri Laici : quid ad hæc Doduvellus ? numquid fabula erit afferere , Licinium præter Episcopos alios persecutum fuisse ? Nunc ad Ecclesiæ Ministros & Episcopos , ex multis saltem aliquos ser-
 monem divertam .

§. V.

SS. Ammon & 40. Virgines, Paulus Basileus Theodotus Blasius.

I. **L**egem statuerat Licinius, ut dixi, ne quis Ministrorum Ecclesiæ feminas mysteria Fidei doceret, sed istæ à mulieribus instruerentur. Hujus Legis violatio in causa fuit, cur Ammonius Diaconus & 40. Virgines, quarum instructioni ipse vacabat, Martyrio coronarentur: de quibus Martyrol. Rom. agit primâ Septembris, & eâdem Menol. Basilii his verbis: *Quadráginta harum Virginum & Martyrum cætus patriam habuit Hadrianopolim Macedonia, Doctorem autem Fidei Ammonem Diaconum, à quo ea quæ ad Cælorum Regnum pertinent didicerunt. Obeam autem causam à Præside ejus Urbis comprehensa multa suppliciorum genera perpassa sunt, quod Idola adorare recusarent: deinde adductæ Beræam ut sacrificarent, cum ibi Deum orarent, precibus suis effecerunt, ut sublatus in æra Sacerdos Idolorum concideret, & statim interiret. Post hæc Sanctus Ammon suspenditur & in lateribus scalpitur, nudoque capite candentem cassidem induere compellitur: & unâ cum Virginibus ad Licinium tyrannum mittitur, qui adversus illos sententiam mortis pronuntiavit: & decem quidam eorum igne consumptæ sunt; octo cum Magistro suo decollatæ; decem in ore & corde gladio transfixæ decesserunt; sex minutatim concisæ; sex denique injecto in os candenti ferro extinctæ sunt. Corrigendus est hic Nicephorus (inquit Baronius ad ann. 316. num. 12.) qui has, quas omnes attestantur Virgines, ipse tradit uxores fuisse illorum quadráginta Militum, quos supra dixi fuisse Sebastæ passos: quod ignari vulgi rumore & paritate numeri falsò jactatum, Nicephorus fortè accepit.*

II. Huc etiam referri potest quod idem Baronius ibi num. 13. addit ex Gregorio Presbytero Orat. de Patribus Nicenis & Theodorito L. 1. Hist. cap. 7. de Paulo Episcopo Neocæsareæ Euphratesiæ: qui cum minimè destitisset munus suum implere instruendo Fideles omnes, etiam Feminas, jussu Licinii vinctus fuit, & ludibrii causâ ejus genitalia igne combusta, atque articulorum nervi candente ferro eis admoto contracti: eò enim Licinii odium adversus Christianos processerat, ut teste Socrate L. 1. Hist. cap. 3., *Lege latâ Episcopos ad Gentilium ades vetuerit accedere, ne scilicet Christianorum Religio hujusmodi obtentu propagaretur.*

III. S. Basilii (seu Basilei) Amasæ Episcopi illustre Martyrium fuit . Hic patriâ Amasenus ejusdem Urbis factus Episcopus, eam summo zelo rexit sub Persecutione Diocletiani & Maximiani, & anno 314. Concilio Ancyrano interfuerat . Licinius antea Christianorum fautor, deinde hostis infensissimus effectus, nedum mulierum Fidei sed & castitati insidias struere cœpit . Aderat inter ancillas Constantiæ Augustæ fideliter ministrantes puella quædam Christiana, cui nomen Glaphyra: hanc Licinius insano amore æstuans ad stuprum sollicitare fecit: quæ cum Dominam suam de nefario ausu monuisset, ejus consilio relicta aulâ Amasæam clanculum secessit; ac secretum suum Basilio Episcopo aperuit, ejusque monitis confirmata aliquandiu secreta ibi mansit, multa Ecclesiæ illi bona, aurum Constantiæ suppeditante, conferens.

IV. Sed maligni Dæmonis arte factum fuit, ut deprehensis Glaphyræ litteris, quas ad Imperatricem scribebat, ad Licinii deveniret notitiam locus, in quo puella morabatur: quare Provinciæ Præsidi statim præcepit, ut eam unâ cum Episcopo comprehenderet & ad se utrumque traduceret: verum priusquam mandatum hoc executioni daretur, Glaphyra jam è vivis excesserat. Hanc Latini 13. Januarii in Martyrol. recolunt, Græci verò 26. Aprilis simul cum Basileo, de quibus infra. Solus ergo Basileus Nicomediam, ubi tunc Licinius erat, vinculus ducitur & in custodiam traditur. Theotimus & Parthenius Diaconi, qui eum secuti sunt, apud quemdam Christianum nomine Elpidiphorum custodi carceris notum hospitio recepti sunt; cujus ope & etiam pecuniæ vi consequi potuerunt, ut noctu præcipue cum ipso S. Episcopo invisere possent.

V. Instante igitur die, quo ante Tyrannum Basileus ipse sistendus erat, mediæ noctis tempore, carceris custode accersito, Diaconos suos & Elpidiphorum quæsit, custosque illos ad Basileum confestim duxit: qui eum precibus adeo absorptum invenerunt, ut extra se lapsus suspicarentur. Precibus tamen completis ad eos conversus, post multa de futuris ærumnis dicta, eos ad fortiter permanendum est adhortatus, & fiduciam in Deo ponendam, qui solus potest lacrymas vertere in risum & labores in requiem: deinde Diaconis suis dixit, Deum sibi eâ nocte mortem suam revelasse, & proinde curarent, ut in locum suum Eutychius Callistratis filius substitueretur; postea Diaconos Elpidiphoro commendans pro certo affirmavit, ei paratam esse à Deo coronam si in caritate & tolerantia passionum constans permaneret.

VI. Eis dimissis paulò post Basileus à Licinio vocatur, qui ei in crimen vertit, quòd Glaphyram apud se recepisset, nec de hoc quidquam ei significasset; super quo Basileus optimè defendit: quare ipsum remisit ad Præfectum, ut eum ad sacrificandum Diis tentaret: quod cum frustra contigisset quamvis ei multa & Pontificatum ipsum promitteret, nuntio ad Licinium perlato, in mandatis accepit, ut, si peristeret, leviter eum fustibus cædi & tandem capite truncari juberet. Sanctus igitur Basileus in Fide perstans ad littus maris ducitur, ubi præmissa Oratione & salutatis suis osculo sancto, jugulum præbens Martyrium consummavit. Ejus verò Corpus jubente Licinio in mare dejicitur. Hoc enim modo (inquit Joannes Presbyter, qui ocularis testis hanc historiam scripsit) quamplurimos, illos præsertim qui gregi Dei præsidebant, obtruncatos, piscibus escam tradebant. Contigit hoc 18. Martii anni 320. Conatus fuit Elpidiphorus argento Corpus vel saltem caput Sancti Martyris à carnificibus obtinere, incassum tamen: at providente Deo paucos post dies Corpus & caput apud Sinopen Ponti Urbem inventa & Amaseam delata cum aliis Martyribus sepulta fuere. Mortuus fertur S. Basileus annum ætatis agens septuagesimum.

VII. Verum S. Basilei memoria colitur 26. Aprilis in Martyrol. Rom., quia hac die Corpus ejus monitu Angeli ab Elpidiphoro repertum ac tumulatum fuit. Hæc eadem die de eo simul cum Glaphyra agunt Græci in Menol. Basilii, ubi hæc dicunt: *Sacro sanctus Martyr Basileus, imperante Licinio, Episcopus fuit Amasæ. Martyrium autem subiit hunc in modum: Ancilla quadam uxoris Licinii, quæ Glaphyra dicebatur, ut pudicitia studio concubitus ipsius evitaret, domina sua consilio cum ingenti nummorum copia occultè in Orientales plagas aufugit; & cùm Amaseam venisset, ab Episcopo Basileo tanquam Christiana excepta fuit. Cùm autem id rescivisset Licinius, ambos coram se adduci mandavit: sed Glaphyra, quæ jam fato concesserat, ab ipsius manibus efugit; Basileus verò Episcopus vinculus Nicomediam adducitur: cùmque Imperatorem redarguisset, capite obtruncatus est & in mare projectus, seorsim quidè Corpus ejus & seorsim caput; at Dei providentiâ ipsius Corpus capiti junctum est, undisque supernatus, in Sinope Urbe inventum fuit ac deinde Amasæ depositum.*

VIII. Græci in Menol. Basilii 18. Januarii mentionem faciunt S. Theodoti Episcopi Cyriniæ (olim Cerauniæ in Cypro) de quo hæc habent: *Iste Licinio Imperatore & Sabino Insula Cypri Præfecto ob Christi confessionem comprehensus & ad eundem Sabinum Præfectum adductus, nervis bubulis durissimè caditur deinde*

in equuleum suspensus excarnificatur : mox super ferreum grabatum subiectâ flammâ extenditur ; sed Divino beneficio ex igne admirabiliter servatus, ferreis calceis iisque clavis acutis confixis calceatus, currere compellitur : demum carcere inclusus, tamdiu in vinculis fuit, quoad cessante Constantini Magni Romanorum Imperatoris Edicto persecutione solutus, Ecclesia sua regimini incubuit, Verbum Domini nostri Jesu Christi deposito omni metu docens. Cùmque biennium vixisset, multosque ad pietatem convertisset, migravit ad Dominum, & à religiosis discipulis suis honorificè sepultus fuit. Illius commemorationem quoque faciunt die 2. Martii, fortè quia hâc die in pace quievit anno 326. ; passus autem fuerat Januario anni 324. . Latini tamen de eo in Mart. Rom. agunt 6. Maii.

IX. S. Blasii Sebaste Episcopi celebre nomen est, licèt de eo Acta authentica desiderentur : Latini tamen & Greci eum pari consensu venerantur ; illi quidè 3. Februarii, isti verò die 11. ejusdem mensis, ubi ajunt in Menol. Basil. . *Certamen Sacrosancti Martyris Blasii & Sanctarum sociarum Mulierum . Iste Licinii Imperatoris temporibus Sebaſtes Episcopus vitanda Persecutionis causâ in cujusdâ montis speluncam se abdidit, & ibi ferocem belluarum naturam benedictione mansuetam effecit : cùmque esset Medicæ artis peritus multas curationes faciebat, miraculorum gratiam à Deo accipiens. Comprehensus autem & ad Agricolaum Præfectum ductus Christi que nomen professus virgis cæditur ; deinde in equuleum atlus dilaniatur : postea cùm in carcerem abduceretur, septem Mulieres secum consecuta Christianasque se esse professæ, statim capite plexæ sunt. Sanctus verò Blasius primò quidè in profundum lacum projectus, sed inde ad terram siccis pedibus evadens, capite plexus unâ cum duobus infantibus, qui simul cum ipso in vinculis erant. Eadem ferè dicunt in Martyrol. Rom. Latini die 3. Februarii. De tempore quo passus fuit aliquod diffidium videtur ; in aliquo enim scripto Codice sub Diocletiano ponitur, veriùs tamen sub Licinio plerique putant, & Sanctos 40. Martyres prælaudatos mense uno ac diebus aliquot ad coronam præcessisse : tunc enim Agricolaus Præses erat, qui & præfatos Martyres ad coronam misit. Nec obest quòd sub Diocletiano passus ab aliquibus dicatur ; nam cùm Licinii Persecutio brevis admodum fuerit, nec generalis, ac proinde nec inter decem Persecutiones annumerata, censetur quasi appendix & continuatio Persecutionis Diocletiani.*

X. Nec solum brevis Licinii Persecutio fuit, quia ab an. 319. exorta in anno 324. exitum habuit, in quo Licinius à Constanti-

no ultimò profligatus & captus apud Nicomediam cum Martiano filio, Constantiæ tamen precibus à morte servatus, vitam privatam egit usque ad sequentem annum, quo Thessalonicae morti addictus fuit: sed nec toto quinquennio in Regionibus illis, ubi excitata fuerat, uniformi passu processit; Licinius enim homo versutus ac versipellis, tempori & circumstantiis sese accommodans, modò Christianis se favere exterius demonstrabat, modò ex animo eos persequabatur: adeò ut in dubio reliquerit, an aliquando Christianus, postea apostata factus fuerit. Metu Constantini ovis pellem induebat, ac se Christianorum fauorem simulabat, metu verò cessante, velut Lupus qualis verè erat oves persequabatur. Talem illum describit Eusebius L. 2. de Vita Constant. cap. 15. dicens: *At Licinius specie quidem ipsa fingebat Leges se libenter amplecti & Fidem jurejurando firmabat: verum occultè militarem apparatus instruebat, atque iterum bellum inferre, iterum pagnam instaurare meditabatur. Sed & Barbarorum auxilia undique conquirebat, & novos circumquaque investigabat Deos, utpotè à prioribus in fraudem inductus. Nec memorià repetebat, quæ paulò ante de Diis in concione dixisset: nec Deum qui pro Constantino propugnasset agnoscere volebat; sed multò plures & recentiores Deos non sine risu ac ludibrio cæpit conquirere. Sed ab his quoque sicut à prioribus, quia nihil valentibus, derelictus, vitam infelici exitu consummavit.*

CAPUT XV.

Martyres quorum ætas nescitur.

§. I.

*SS. Arcadius Cassianus Faustus Januarius & Martialis
Acisclus & Zoilus.*

I. **P**urimi ultra recensitos superessent, qui in prænaratis Persecutionibus Christi Fidem sanguine confirmarunt, quorum tempus & annus determinari nequit, & quibus plena sunt Martyrologia & Menologia, ut si singulos vel recensere vellem, plures Tomos implerem. Aliquos tamen pro præsentis argumenti majori robore inferere satagam.

II. Cùm in Achaja sævus debaccharetur Persecutionis furor & tota familia Christi sævientis Diaboli incurfibus turbaretur; ut hos declinaret S. Arcadius suamque animam in tuto ponere.

neret, relicta patriâ domo & bonis omnibus, in solitarium locum secessit, ibique in precibus vigiliis & jejuniis aliquandiu delituit: sed cum impii exploratores observassent, eum cum aliis Sacrificia non frequentare, suspicati eum propterea se occultasse, repente ad ejus domicilium Milites qui eum traherent miserunt; sed loco ejus quemdam propinquum invenientes, ab eo quærebant ubi esset Arcadius: quem negantem se scire, illicò traxerunt ad Præsidentem, qui eum arcto carceri addixit, ibi mansurum, donec ubi esset Arcadius non proderet.

III. Facti hujus rumor ad Arcadium pervenit: quare jam pleno Martyrii ardore accensus, nolensque, propinquum suum suâ causâ pati, latebris relictis in Urbem rediens se Præsidi obtulit: hic ei dixit, se fugæ suæ veniam indulgere paratum esse, si vel serò sacrificare statueret. Ad hæc exhorrens Sanctus Martyr respondit, nunquam fore, ut vel terror suppliciorum, vel mortis timor à Jesu Christo ejusque Fide eum divellerent: quâ responsione iratus Præses: Tibi, inquit, equuleus plumbati fustes ungulæ ferreæ ac cætera ordinaria tormenta vilescunt? excogitabo nova & atrociora. Ita putabat, se vincere Deum in Servis suis. Vocatis ergo inter Liçtores sævioribus jussit, ut paulatim singula corporis membra & juncturas inciderent: a digitorum nodis inciperent, dein manus à lacertis, lacertos à cubitis, mox à thorace humeros discinderent, & sic articulos à pedibus, crura à poplitibus, femora à coxis; & in hoc artificio moram traherent, ut sic Deorum contemtor miseriam suam magis sentiret.

IV. Quod præceperat sigillatim impleri cœptum est. Vir Dei illicò protulit manus: dumque articulatim secaretur, Deum laudans gratias ei agebat, quòd membra, quæ ipsi tradiderat, singulatim recipere dignaretur: in hoc adeò intrepidè perseverans, ut vel ab ipsis carnificibus lacrymas excuteret. Eò tandem barbara hæc laniena processit, ut corpore ad truncum redacto, & suo in sanguine volutante, Vir Dei pridie Idus Januarii felicem animam Deo reddiderit. Tantam constantiam vel ipsi Infideles admirati sunt. Fideles verò pietate moti sparsas corporis ejus reliquias collectas ei adjunxerunt, & possibili honore sepelierunt. Ejus memoria in Martyrol. Rom. die 12. Januarii collocatur.

V. S. Cassianus Martyrii locum habuit Imolam (alias Forum Cornelii quia à Cornelio Sylla fundatam) Urbem Roman-diolæ. De eo Prudentius hymnum 9. edidit, ac de eo agunt Beda Ufuardus Ado & Martyrol. Rom. 13. Augusti. Cassianus ergo ibi studiis puerorum præerat, quos in bene loquendo & scri-

scribendo severâ disciplinâ erudiebat . Furente Persecutione captus & ad Judicem ductus , sacrificare compellitur : quod cum ille constanti animo recusaret , monitus Judex , eum instruendis ephebis operam dare , hoc inauditum supplicium excogitavit . Duci eum iussit ad scholam , ubi congregati erant discipuli , ibique nudatum manibus tergo revinctis ad eum feriendum illos excitavit . Memores igitur verberum , quibus eorum defectus asperâ facie sæpe punierat & proinde illis exosus factus fuerat , in eum omnes insilierunt tum lapidibus , tum ferreis stilis , quibus tunc ad scribendum utebantur , millenis ictibus vulnerantes ; lento quidem , quia pueriles manus lethale vulnus insligere non poterant , sed diutino & acerbo cruciatu sensim ei mortem pararunt ; sicque sanguine guttatim fuso destitutus spiritum emisit . Ita ejus Martyrium describit Martyrol. Rom. : *Apud Forum Syllæ natalis Sancti Cassiani Martyris , qui cum adorare Idola nolisset , vocatis à Persecutore pueris , quibus docendo exosus factus fuerat , data eis facultas ipsum perimendi : quorum quondam infirmior erat manus , tantò graviores Martyrii pœnam dilata morte faciebat .* Addit Baronius in Notis , ex quibusdam Manuscriptis haberi , hunc Cassianum fuisse Episcopum Brixinensem ; sed inde pulsum Imolæ consedisse , ac ibi ludum litterarium aperuisse , & tandem ibi Martyrium consummasse . Nusquam tamen apud Veteres Cassianum Imolæ Patronum Episcopum fuisse legitur ; ideòque multis suspectum redditur quod Baronius dicit .

VI. Faustus Januarius & Martialis Fide ac pietate conjuncti Cordubæ degebant ; cum Persecutor Eugenius nomine animo Christianos ad Sacrificia Gentium trahendi illuc adventasset . Tres isti coram ipso se præsentarunt ei exprobrantes , cur Servos Dei seducere , eos ad falsos Deos adorandos impellendo , tentaret . Tunc Eugenius perditos & infelices eos appellans , quid de desperatâ suâ locietate facere vellent , quæsit : cui Faustus : desperatio , inquit , eorum propria est , qui inutiliter Christianos à vero Deo ad falsos abducere conantur . Quibus accensus Præses , eum & simul Januarium in equuleo suspendi iussit . Inde ad Martialem , qui fortè junior erat , conversus ei suadere cœpit , ne stultitiam sociorum imitari vellet : sed cum iste quoque iram Dei comminatus ei fuisset , Eugenius eum cum aliis in equuleo suspendi mandavit , ac deinde torqueri , donec Deos suos adorarent . Sed cum Faustus hæc omnia despiciens irrideret , dixit Eugenius : nunc te tormentis afficiam : iussitque abscindi ei nares & auriculas , radi supercilia , dentesque mandibulæ superioris evelli (Fausto interea hilari voce Deo gratias agente :) quod cum

cum factum esset, ait Januario Eugenius: videsne quanta passus est Faustus, dum deceptus opinione suâ pertinaciter imperio meo parere recusat? At Januarius: impietas inquit ista & pertinacia Fausti in me maneat, & ejus vinculum caritatis non disrumpatur: quare eadem quæ Fausto ipsi absceidi jussit. Tentavit inde & Martialem, sed cum & hunc constantem inveniret, jussit eos igne cremari. Latantes igitur ad supplicii locum ibant; quod cum pervenissent, præhabita ad Populum oratione, traditi flammis ad Deum læti commigrarunt.

VII. De his Martyrol. Rom. 13. Octobris ait: *Corduba in Hispania natalis Sanctorum Martyrum Fausti Januarii & Martialis, qui primò equulei pœnâ cruciati, deinde superciliis rasis, dentibus evulsis, auribus quoque & naribus præcisiss, ignis passione Martyrium consummarunt.* Hos indicasse visus est Prudentius, dum in Hymno 4. de Martyribus Hispanis dicit, quod Corduba dabit tres coronas. Historici Hispani de eis frequenter loquuntur, & volunt eos fuisse filios S. Marcelli Centurionis, Martyrio Tingi in Mauritania coronati; quo fieret, ut horum trium passio sub Diocletiano ponenda esset.

Prudentius in prælaudato Hymno dicit, quod Corduba dat etiam *Aciscum & Zoellum*. S. Aciscus in Martyrol. Rom. ponitur passus sub Diocletiano, Dione Præside, unâ cum Victoria sorore his verbis: *Corduba Sanctorum Martyrum Acisceli & Victorie germanorum, qui in eadem Persecutione (Diocletiani) jussu Dionis Præsidis severissimè cruciati, coronas à Domino illustri passione meruerunt.* S. Zoilus (apud Prudentium fortè ratione metri Zoellus seu Zoillus) Cordubæ cum decem & novem sociis Martyrium subiit. Ita Martyrologia S. Hieronymi Ussardi Adonis, & alii. De eo Martyrol. Rom. 27. Junii hæc habet: *Corduba Sanctorum Martyrum Zoili & aliorum decem & novem.* Passum fuisse Diocletiani & Maximini temporibus aliqui volunt, sed incertum est.

§. II.

SS. Drosidis Virgo Genesius Arelatenfis & Julianus Cilix.

I. DE Sancta Droside Virgine & Martyre apud Latinos & Græcos Historicis altum est silentium; attamen S. Jo: Chrysostomus celebrem de ea Orationem habuit, quæ extat to. 1. homil. 71. (modò tom. 2. pag. 688.): ubi dicit, quod Sanctæ Drosidi fuit corpus imbecillum & obnoxium sexus injuriæ, & junior

ætas ; imbecillitatem tamen omnem Divina gratia sustulit & ad omnia subeunda fortem ac paratam reddidit. Coram ergo Persecutore positam , cùm in Fide constans peristeret , noluit Tyrannus celeri morte perimere , sed horribili spectaculo prius terere . Jussit ergo coràm ipsa ingentem accendi rogam , jamque flamma in summam altitudinem attollebatur : spectabat illa ; sed major erat amoris Christi , quæ intus ardebat , quàm quæ foris urebat . Trium Puerorum memor , ardebat se in certamen illorum venire & cum eis coronari . Voti autem compos effecta fuit ; nam in ardentem rogam tandem injecta , dum carnes ejus liquefiebat & ossa torrebantur , animæ fides firmior & splendior fiebat , donec corpore dissoluto ad æternam visionem evolavit . Antiochiæ passâ fuisse creditur , tempus autem ignoratur .

II. S. Genesius inter Galliæ Martyres celeberrimus , ex Urbe Arclatensi ortum accepit , cujus ipse postea Martyrio suo Patronus evasit . Adhuc valde juvenis & simplex Catechumenus erat , quando pro Christo patiendi gratiam accepit , prius filius Dei & hæres Regni , quàm in ipso renatus : quod ei fuisse à Deo concessum dicitur , intuitu ardentis Fidei & amoris , quo , ut dicam , in eum ferebatur . Cancellarii seu Exceptoris munus in justitiæ tribunali obibat , cujus erat Advocatorum & Judicis verba excipere & in tabulis veloci manu notare : quod ei occasio Martyrii fuit : accidit enim , ut eodem ante tribunal Judicis Exceptoris munus implente , impia atque sacrilega mandata Persecutionis jussa legerentur : quæ cùm devotus Deo Genesii repudiaret auditus & imprimere ceris manus sancta respueret ; abjectis ante oculos Judicis tabulis , secutus Evangelicum consilium Persecutionis impetum declinandi , repente aufugit ; hucque illucque loco & Civitate mutatâ , latebras quæsiit .

III. Hoc inopinato facinore Judex stupore simul & furore correptus , illum inquiri confestim mandavit ; & ut eum ubicumque invenissent interficerent sed crudelissimis poenis , ministris injunxit . Quod ubi Beato Genesio vel occultis nuntiis vel rumore publico innotuit , diversa latendi loca , non carnis infirmitate sed pio consilio mutavit . Cùmque nondum esset ex aqua & Spiritu Sancto renatus , ut Fidem suam confirmaret , per fidos internuntios à Catholicæ Religionis Antistite donum Baptismatis postulavit . Sed ille vel temporis angustiis impeditus vel juvenili ætati diffidens , sed veriùs Divino nutu , distulit , ei renuntians , quòd plenam Baptismatis consummationem daret etiam prompta pro Christo cruoris effusio . Deo , inquam , sic disponente , ut circa ejus consecrationem officia humana cessarent ,

rent, cui unius Baptismatis duplex gratia, & aqua scilicet & sanguis è Christi latere parabatur.

IV. Itaque cum Dominus nolens differri coronam, ubi videbat paratam esse victoriam, Persecutoribus eum obtulit. Is autem ubi se prospicit deprehensum, Rhodani se immittit fluentis, & natatu ad ulteriorem ripam transgreditur: transgressum tamen Persecutor assequitur, & gladii ictu festinantem animam vinculis corporis quibus tenebatur absolvit. *Providerunt tamen Fideles temporis illius Dei servi, ut utramque ripam fluminis geminatis Urbibus ambiendam unius Martyris tutela muniret: nam in ipso beata passionis loco, consecrati cruoris vestigia relinquentes, in alterum fluvii latus honoratas reliquias transfulerunt, ut utrobique præsens Sanctus Genesius, illic sanguine haberetur, hic corpore.* Ita S. Paulinus Nolanus Epist. 52., ex quo omnia supradicta de S. Genesio excerpti. Vocat autem Arelatem geminatas Urbes, quia Rhodano interfecatur, ac si duæ Urbes essent. Sunt qui dubitant, an sit genuinus S. Paulini fœtus; nemo tamen inficiari potest, quin ab ipsius xvi Auctore descripta fuerit, siue is fuerit Faustus Rhegiensis Episcopus, siue Eusebius Emislenus, siue Eusebius Gallicanus.

V. De Sancto Genesio agit Martyrol. Rom. 25. Augusti his verbis: *Arelate in Gallia beati Genesii, qui Exceptoris officio fungens, cum impia Edicta quibus Christiani puniri jubebantur nollet excipere, & projectis in publicum tabulis se Christianum esse testaretur, comprehensus atque decollatus, Martyrii gloriam proprio cruore baptizatus accepit.* De eo meminit etiam Prudentius Hymno 4. cum ait:

*Teque præpollens Arelas habebit,
Sancte Genesi.*

Et Venantius Fortunatus his versibus.

*Porrigit ipsa decens Arelas pia dona Genesi
Astris Casareo concomitante suo.*

Sic etiam in Breviario Toletano legitur ejus sacer Hymnus, quo S. Genesii Acta egregie canuntur: quæ etiam Gregorius Turon. celebrat L. de Glor. Mart. cap. 68. & 69.: qui etiam refert, quod S. Honorati temporibus (idest ann. 427. vel 428.) pons quidam scaphis compactus, qui Arelate super Rhodanum transitum parabat, dum immensâ Populi multitudine nimium gravaretur, repente contractus corruit. Omnes tamen qui in fluvium demersi fuerant S. Genesium implorantes ad ripam incolumes evaserunt.

VI. Inter plures Sanctos Martyres, qui *Juliani* nomen gerunt

Tom. VI.

B b b b

runt

runt illustis ille est, quem in Cilicia natum propriâ panegyri celebrat S. Joannes Chrysostomus tom. 1. homil. 47. (modò tom. 2. pag. 671.) ubi eum vocat S. Pauli concivem, sive quia ex eadem Urbe Tarso, sive quia, ut veriùs putatur, ex eadem Provincia, & etiam vocat Ministrum Ecclesiæ sicut Paulum, quia in Ordine aliquo Ecclesiastico constitutum (de quo tamen Martyrologia & Menologia, ut infra, nihil dicunt) Ex his ergo & ex S. Chrysostomo sequentia respectivè colliguntur. Primò, S. Julianum ajunt Græci natum fuisse Anazarbi in Cilicia, patre illius Urbis Senatore, matre verò Christianâ, quæ ipsum in Fide Christi educavit & sacras litteras docuit.

VII. Deinde dum ageret annum ætatis decimum octavum sæviente Persecutione præsentatum fuisse in Urbe Ægas cuidam Judici Marciano nomine, cujus jussu ad sacrificandum compulsus, cum nollet obedire, Liçtores violenter os ei aperuerunt, & in illud vinum & carnem Idolis oblata infuderunt: deinde in carcerem coniectus est & mater ejus adducta: quæ de illo interrogata, petiit sibi filium suum concedi per tres dies, quibus posset cum illo deliberare. Quo facto rursùm in quæstionem adducuntur, & cum dixissent, Christum se nequaquam abnegaturos esse, matrem calcaneis perforatis dimiserunt. Hucusque Græci in Menol. Basilii die 16. Martii: quod tamen de S. Juliani matre dicunt, nec in Martyrologiis nec in reliquis Menæis reperitur.

VIII. Addit Chrysostomus, quòd sævus Judex cum Julianum videret forti animo præditum, nec suppliciorum vehementiâ robur ejus posse infringi, procrastinatione uti decrevit, ut sic eum vinceret: quare diebus singulis eum ad se introducebat educebat interrogationes adhibebat, supplicia minabatur blanditiis & promissis alliciebat, omnes machinas admovebat & immotum illud fundamentum concutere nitebatur. Anno integro per universam Ciliciam illum circumducebat, putans se ignominia afficere, cum illum redderet illustriorem: nam vulnera, quæ gestabat, patientia, quâ omnia tolerabat, velut lux ad oculos totius Ciliciæ immissa, omnes ad imitationem excitabat facto magis quàm verbis. Sanctus itaque in medium producebatur; admovebant illi carnifices ignem & ferrum & tormenta; loquebatur ille tantùm & opera sermo vincebat: vox Martyris in Cælum subsiliebat, & inde reportabat robur, quod inimici superare non poterant.

IX. Vidit tandem Tyrannus, quòd Sanctum Martyrem torquere æquè inutile erat, ac adamantem frangere velle: quare
fatius

fatius duxit eum damnando ad mortem victum se confiteri. In hoc tamen suæ crudelitatis notam voluit ostendere: allato sacco arenâ completo, & in eum injectis scorpionibus viperis & draconibus, Sanctum Julianum unâ cum illis inclusum in mare dejecit (erat enim Ægas ubi passus fuit Urbs Ciliciæ maritima.) Accepit eum mare, non ut occideret, sed ut coronaret, & post coronam corpus ejus reddidit: quod teste Chrysostomo Antiochiam delatum ibi honorificè conditum fuit. Tali genere Martyrii coronatum fuisse contestantur Martyrol. Rom. & Menol. Basilii die 16. Martii; quamvis dicat, ejus Reliquias Alexandriam ejectas à Religiosa quadam Vidua fuisse sepultas. Huic horribili mortis generi, refert Eusebius L. de Mart. Palest. cap. 5., pro Christo fuisse quoque additum anno 306. S. Ulpianum adolescentem in Urbe Tyro, qui *post crudeles plagas & acerbissima flagrorum verbera, unâ cum cane & aspidē in culeo ex crudo bovis corio insutus, in mare præcipitatus est*: hoc genere supplicii teste Baronio in Notis ad diem 3. Aprilis puniebantur parricidæ Lege Romanâ, quamvis ob nimium horrorem in usu esse postea desierit,

§. III.

SS. Leo & Paregorius: *Julius Eutychius Pasistrate,*
& *Valentia.*

I. S. Sancti Leo & Paregorius Pataræ in Lycia Martyres fuerunt; Acta tamen Paregorium cum Leone vixisse, sed antea Martyrio coronatum supponunt, ac proinde de eo obiter tantum loquuntur, occasione scilicet Martyrii S. Leonis: ideoque quo genere mortis obierit ignoratur; scitur tamen ipsius Leonis testimonio fuisse Virum factis præclarum. Igitur Procuratoris jussu, qui expectans Lolliani Proconsulis adventum Pataram tunc regebat, Festum Serapidis celebrabatur, cui omnes omnino etiam Christiani interesse tenebantur, & de facto ex eis non pauci metu adacti intererant. Quo cum Sanctus Leo summe tristaretur, ad sepulcrum S. Paregorii, ut ibi orando solamen acciperet, pergere decrevit. Oportebat autem locum in quo profanum Festum agebatur, pertransire. Eum cum vidisset Populus vultu severo & incessu gravi procedentem: asceticam enim vitam continentiae castitati & temperantiae deditam à juventute exercuerat, & aspero pilisque contexto indumento utebatur, eum esse Christianum quisque conjecit. Ipse tamen nihil

immoratus iter suum prosequens ad locum sibi propositum accessit, ibi preces solitas fudit, & domum reversus de more panem sumsit, & præclara Paregorii gesta apud se meditabatur. Paulatim verò in somnum resolutus vidit Paregorium stantem in medio torrentis magno impetu defluentis, ac se ipsum in torrentem projicere, ut ei ad Martyrium eunti conjungeretur. Quâ visione intellexit, se quoque cum illo Martyrio coronandum.

II. Ad sepulcrum itaque S. Peregorii continuè pergenti accidit, ut per medium quâdam die transiret, ubi Fortunæ Templum erectum erat: & videns lucernas & cereolos circa ipsum accensos, primò quidè cæcitatibus eorum qui accenderant miseratus est; propius tamen accedens Divino spiritu correptus lucernas suis manibus contrivit & cereos conculcavit pedibus, dicens: Si Deos existimatis habere vires, se ipsos defendant. Hoc gravi in Populo excitato tumultu, monitus Procurator præcepit Militibus, ut Leonem revertentem comprehenderent: quod factum fuit. Et ductus ad Procuratorem, ab eoque asperè increpitus quòd talia ausus fuisset, occasionem Vir Dei sumsit obijciendi vanitatem Deorum ac Dæmonum, quos colebant relicto summo Deo omnium Conditor: asserens, se pro eo omnia pati paratum esse, ut ab eo vitam æternam consequeretur; addens ad ad eam per passiones tutiorem sterni viam.

III. Cùm ergo alia multa dixisset, quæ Judæis aequè & Gentilibus displicebant, facta est vox adversus ipsum clamantium, ne ampliùs loqui sineretur. Quare Procurator videns, Sanctum Dei Deos suos adorare prorsus nolle, flagris eum cædi jussit, & quidè sævissimè, ut totum corpus plagis sauciaturum esset, ipso ne quidè suspirium emittente. Cùmque Procurator ipse pietate erga ejus canitiem motus eum hortaretur, ut saltem diceret: Dii magni sunt: respondit; dicam: Dii magni & potentes sunt, sed ad perdendum miseros, qui illos adorant. Quibus iratus Procurator, graviora supplicia & mortem ipsam comminatus, videns hæc à S. Leone contemni, & iterum conclamante Populo, jussit pedibus alligatum per Urbem ad torrentem trahi extremo ibi supplicio finiendum: quod inhumaniter à Diaboli Ministris impletum fuit. Cùmque semiaminis ad locum supplicii perductus fuisset, obtentâ brevi precandi veniâ, beatam animam statim emisit. Tunc impii satellites beatum Corpus in excelsam rupem elatum, illud in profundam voraginem præcepit dejecerunt, putantes illud dispergendum & in frustra comminandum: sed intactum ac facie quasi ridente præter leves quasdam puncturas repertum, à piis Fidelibus honorificè tumulatum fuit.

IV. S. Julius, ut notat Martyrol. Rom. 27. Maii, Miles veteranus ac emeritus erat. Tempore Persecutionis comprehensus ab Officialibus oblatus fuit Maximo Præsidi Dorostori in Mysia, qui promissis & minis eum impellere studuit ad obediendum mandatis Principum Deos suos adorando: sed cum Julius promissa rejecisset & minas contempsisset, capitali sententiâ eum multavit. Cum autem ductus fuisset ad supplicii locum Beatus Julius, osculabantur eum omnes: ipse autem dicebat: Unusquisque videat qualiter osculetur. Hesy chius autem quidam Christianus cum esset Miles, & ipse custodiretur, Sancto Julio dicebat: „ Obscuro te, Juli, cum gaudio comple pollicitationem „ tuam & accipe coronam, quam Dominus consistentibus se „ dare promissit, & memor esto mei; nam ego subsequor te: „ plurimum etiam saluta Pascheratem & Valentionem famulos Dei, „ qui nos per bonam confessionem præcesserunt ad Dominum, „ Julius verò osculans Hesy chium dixit: „, Frater, festina venire: „ mandata enim tua jam audierunt, quos salutasti, „. Et hæc dicens Sanctus Julius ligavit oculos suos, & tetendit cervicem suam dicens: „, Domine Jesu Christe, pro cuius nomine „ hæc patior, tu cum Sanctis tuis meum collocare dignare „ spiritum, „. Tunc Minister Diaboli educens gladium caput ei abscidit in Civitate Dorostori 6. Kalend. Junias. De anno ambigitur. Nam quidam, ut Martyrol. Rom. ponunt eum passum sub Alexandro; alii anno 302. sub Diocletiano, adeoque passionis tempus incertum est.

V. Hesy chius, de quo supra, paulò post Martyrium sub eodem Maximo, ut ipse prædixerat, passus est. De eo enim in Martyrol. Rom. 15. Julii dicitur: *Dorostori in Mysia Sancti Hesy chii Militis, qui cum Beato Julio comprehensus sub Maximo Præsidi post eum Martyrio coronatus est.*

VI. Pascheratem verò & Valentionem biduo ante S. Julium coronatos fuisse indicant Martyrologia; inter quæ Romanum 25. Maii ita habet: *Dorostori in Mysia natalis Sanctorum Martyrum Pascheratis Valentionis & aliorum duorum coronatorum: ubi duos adjungit socios. Græci quoque in Menol. Basilii 24. Aprilis rem fufius exponentes ajunt: Martyres Christi Pascherates & Valentinus fuerunt ex Civitate Dorostolo in Macedonia Milites quidam, sed tamen Christiani. Unde cum viderent, ab Idololatriis lapides animo carentes adorari, zelo commoti, palàm ac libere Christum solum Deum esse, idola verò res esse omnis sensus expertes, professi sunt. Comprehenfi proinde coram Præsidi adducti fuerunt, idoloque Apollinis eis exhibitò, ut illi sacrificarent, currens Pasi-*

erates in illud expuit . At accedens ad eundem Pascratem ipsius frater , qui paulò ante tormentorum metu à Christo defecit , ei suadere conabatur , ut adoraret , atque ita tormenta evitaret . Ille verò fratrem repulit , suà cognatione eum indignum appellans . Interrogatus deinde Sanctus Valentinus , eadem cum Pascrate sentire se respondit : ac proinde ambo summa cum lætitia pretiosis capitibus plexi sunt , cùm & ipsa Pascratis mater præsens esset filiumque ad Martyrium alacriter subeundum adhortaretur . Ita Græcis in hoc diversi , quòd quem Acta vocant Valentionem , ipsi Valentinum appellant , & quam Dorostorum in Mysia Acta dicunt , ipsi Dorostolum in Macedonia nuncupant .

§. I V.

SS. Nicander & Marcianus , Patricius & alii in Ægypto & Africa Martyres .

I. **S** Anctorum Nicandri & Marciani tempus & locus Martyrii controvertitur . Tempus enim ad Domitiani quidam , ad Diocletiani vel Maximiani Persecutionem referunt alii . Locum similiter Atinenses enim & Venafrenses Campaniæ Populi hos Martyres , sicut & Pascratem & Dariam sibi attribuunt : quibus favet Martyrol. Romanum 17. Junii dicens : *Apud Venasrum Sanctorum Martyrum Nicandri & Marciani , qui in Persecutione Maximiani capite cæsi sunt .* Alii verò , inter quos P. Ruinart , observantes horum Martyrum Festum celebrari etiam à Græcis in Menol. Basilii 7. Junii , suspicantur eos in Græcia & quidè in Mæsia fuisse passos ; quod ex prælaudatis S. Julii Actis colligi posse videtur , in quibus etiam Pascratis Martyris mentio habetur . Quin & idem est Præsidis nomen & idem genius , si utraque Acta conferantur . Quidquid tamen sit de tempore & loco , veritas eorum Martyrii (quæ præsentis Operis est argumentum) certa subsistit .

II. Nicander ergo & Marcianus Militiam profitebantur , uterque uxorem habebat & parvum filium . Marcianus in uxore sua alteram Evam expertus fuit , cujus tamen suggestionibus Adamo selcior non consensit . Uxor verò Nicandri nomine Daria uxorem dignam Martyre se exhibuit , ut dicam . Cùm igitur Imperialia insonuissent Edicta , ut Milites omnes Diis immolarent , Nicander & Marcianus , potius quàm Militiæ Christi fieri desertores , Militiam seculi deferere statuerunt . Hoc tanquam crimine maximo ad Præsidem Maximum delato , utrumque mo-

nere

nere cœpit, ne sui iacturam facerent, Imperialia mandata exequi renuentes; sed utroque pari constantiâ se Christianum esse proficiente & ejusmodi præcepto teneri non posse, Maximus dixit Nicandro, ut thure saltem Deos honoraret, cui Nicander respondit, se suum Creatorem deserere non posse, ut lignis & lapidibus cultum præstaret.

III. Aderat ibi Daria Nicandri uxor, quæ Virum suum animabat dicens: „Cave, Domine, ne id facias, cave Domine, „ne Dominum nostrum Jesum Christum neges. Intuere Cœlum, & in eo ipsum videbis, cui Fidem & conscientiam servas; Ipse est enim tuus adjutor „. Hæc cum Præses audisset, oh, inquit, malum caput mulieris! sic Virum tuum mori desideras? Illa verò ait „, ut vivat apud Deum desidero, & numquam moriatur „: cui Maximus: non ita est, inquit, sed quia robustiori Viro desideras copulari, ideò hunc vitâ citius privari festinas. At illa respondit: „, Si suspicaris, me id animo cogitare, atque id me esse facturam, primam me propter Christum „, occidito; si tamen id etiam de mulieribus tibi mandatum „, est „. Tum Maximus: de mulieribus quidèm hoc mihi minime est injunctum; neque equidem faciam quod cupis. Verumtamen eris in carcere. Hoc responsum probabile reddit, ejusmodi tunc accidisse, cum soli Milites sacrificare jubebantur, & proinde Persecutionis Diocletiani initiis.

IV. Deductâ in carcerem Dariâ, Maximus monere cœpit Nicandrum, ne ad verba uxoris vel cujusvis alterius attenderet; sed cogitaret, an melius sit illi vivere an mori; propter quod intervallum acciperet. At Nicander: „, Spatium, inquit, „, quod te daturum promittis, jam putato esse completum, ac „, me deliberasse cognosce, ut nihil aliud cupiam præ salute „. Quæ verba cum Maximus, ut de salute corporali prolata intellexisset, ac proinde eum sacrificaturum existimasset, gaudere cœpit cum Leucone consiliario suo. Sed cum audisset Nicandrum Deo gratias agentem, & orantem ut à labe & tentatione hujus seculi liberaretur, ait ei: quomodò tu, qui nunc vivere vellexisti, nunc iterum desideras mori? cui Nicander ait: Ego vitam æternam opto vivere, non hanc temporalem; & propterea in corpus meum tibi potestatem feci. Fac igitur quod vis: ego Christianus sum. Præses ergo ad Marcianum conversus: & tu Marciane? qui respondit: eadem quæ commilito meus, ego etiam affirmo. Tunc Præses: ergo, inquit, simul etiam in carcerem ambo tradamini, pœnam sine dubio subituri.

V. In carcerem verò missi, post viginti (seu triginta) dies ite-

iterum ad Præsidentem adducuntur: quibus ait Præsēs, satis temporis habuistis, ut ad parendum Imperialibus mandatis moveamini. Cui Marcianus: „ Verborum tuorum multitudo neque nos faciet à Fide recedere, neque negare Deum, quem præsentes, & nos vocantem videmus. Noli ergo nos retinere: „ sed mitte nos citò, ut videamus Crucifixum, quem vos blasphematis, nos autem veneramur & colimus, „. Ad quæ. Ecce, inquit, pro desiderio vestro moriemini: & Marciano eum rogante, ut quàm citò desiderio eorum satisfaceret, Maximus dixit: mihi non contradicitis; neque enim ego vos persequor, sed Imperatorum præcepta; unde alienus sum & mundus à vestro sanguine: si autem scitis, vos benè ituros, gratulor vobis; vestrum desiderium compleatur. Hæc dicens sententiam in eos pronuntiat capitalem. Sancti verò Christi Martyres, quasi unâ voce ac linguâ dixerunt: Pax tecum, Præsēs humane.

VI. Ibant ergo gaudentes & benedicentes Deum, & Nicandrum quidè sequēbatur uxor ejus, & Papianus (seu Papinianus) frater Martyris Paschratis filium Nicandri portans infantem, atque ei gratulans de salute. Marcianum verò sequebantur cognati, atque uxor ejus veste conscissâ, quæ præsentans ei filium infantem & verbis & ploratibus totum agebat, ut eum à proposito dimoveret; Sanctus verò Martyr severo vultu eam rejiciens: „ Quamdiù, inquit, Satanas mentem tuam & animum excæcavit? recede à nobis; concede mihi, ut Martyrium Deo perficiam, „. Interea Christianus quidam nomine Zoticus eum ad fortiter perficiendum animans manum ejus sustentabat: sed cùm uxor ejus se ingereret plorans eumque retrò trahere conaretur, Marcianus ad Zoticum dixit, ut eam teneret: Zoticus eo dimissio eam continuit.

VII. Postquam verò ad locum Martyrii venisset, circumspexit Marcianus, ac de multitudine Zoticum ad se vocavit, eum rogans, ut uxorem suam ad se adduceret, quam adductam amplexatur eique dixit: „ Recede in pace: non potes enim me „ Martyrium celebrantem aspicere, mente tuâ à maligno Spiritu subreptâ, „: Infantem verò osculatus & ad Cælum aspiciens ait: Domine Deus omnipotens, tibi sit hujus cura. Tunc Martyres sese invicem complectuntur, & perficiendi causâ Martyrii paulisper recedunt. At Marcianus videns uxorem Nicandri præ turba ad eum accedere non posse, manū ei porrectâ eam ad Virum suum adduxit. Ad quam Nicander: Deus inquit sit tecum: cui illa ait: „ Bone Domine, bono animo „ esto, ostende tuum certamen; decem annos in patria sine te „ se-

„ feci , ac momentis omnibus à Deo ut te viderem optabam :
 „ nunc verò vidi & gratulor ad vitam proficicenti : ecce nunc
 „ clariùs exclamabo & gloriabor , uxor Martyris constituta .
 „ Bono animo esto , Domine , ac redde Martyrium Deo , ut me
 „ etiam de morte perpetua liberes „ . Post hæc Percussor velo
 oculis Martyrum circumdatis , injecto gladio caput eis amputa-
 vit . Tunc Christiani eorum Corpora sublata propè locum
 Martyrii sepelierunt .

VIII. Observandum hic censeo , Græcos in Menologio Ba-
 silii de Nicandro & Marciano eodem mense Junii iteratò agere :
 primò quidè die septimâ , & hos puto esse , quorum Passionem
 recensui , quia capite plexos dicunt ; quamvis pro causa afferant ,
 quia cùm essent Milites , missi ad capiendos Christianos , quos-
 dam ut fugerent admonebant , quosdam capiebant quidè , sed
 ipsi parcentes sollicitè res eorum curabant . Die autem quintâ
 ejusdem mensis de SS. Marciano & Nicandro & sociis tractant ,
 quos puto à prædictis esse diversos ; de eis enim hæc dicunt : *Marcianus & Nicander Christi Martyres cum sociis suis in Ægypto nati propter Christi confessionem comprehensi sunt à Præfecto : cùmque adhibitis vi compellerentur Christum ejurare & Idola colere , nec id facere vellent , primùm quidè diris verberibus excepti fuerunt ; mox latera eorum lampadibus exusta : deinde suspensi ferreis unguis lacerati sunt , quousque carnes eorum in terram deciderent : postea semimortui in carcerem detrusi , apparente illis Angelo Dei sanati fuerunt ; atque ita post multos dies è carcere sani & incolumes exierunt . Tum verò ad Tribunal Præfecti adducti , cùm propter hoc miraculum multos Infidelium ad Dominum convertissent , iterùm in carcerem coniecti ibidem animas suas Deo tradidere .*

IX. Alteriùs quoque Nicandri Ægyptii meminit Martyrol. Rom. 15. Martii his verbis : *In Ægypto Sancti Nicandri Martyris , qui cùm Sanctorum Martyrum Reliquias studiosè perquireret , & ipse Martyr effici meruit sub Diocletiano Imperatore .* De eo etiam mentionem sub eadem die faciunt Græci in Menologio Basilii , ubi addunt , quòd gladio vitam finivit .

X. S. Patricius Prusæ in Bithynia Episcopus unâ cum Acatio Menandro & Polyæno ibidem Martyrium subiit . De eo & sociis agunt Latini in Martyrol. Rom. 28. Aprilis , Græci verò in Menol. Basilii 19. Maii , ubi hæc habent : *Sanctus Pater noster Patricius fuit Prusæ Urbis Episcopus : cùm autem Christi Fidem eos qui ad ipsum accedebant edoceret , captus ab Idolorum cultoribus ad Bithyniæ Præsidentem adducitur , à quo interrogatus liberè Christum professus est . Dicente autem Præsidente , tamquam Deos ado-*

rari oportere *Jovem Apollinem Bacchum ac reliquos*, quorum providentiâ calidæ aqua in hominum beneficium erumpunt; respondit Sanctus: calidæ aquæ virtute Christi emanant, non autem Idolorum, quæ sunt ligna inanimata & lapides sensu carentes. Quamobrem in Therma ipsas vi effervescentes injectus incolamnis evasis, satellitibus omnibus combustis. Mox variis tormentis excruciatum, postremum gladio plectitur unâ cum discipulis suis Acacio Menandro & Polyæno. P. Ruinart & alii S. Patricii Martyrium eodem modo referunt.

XI. Triginta septem Martyres in Ægypto passos referunt Bollandistæ 18. Januarii, & Ruinart in Actis Mart. Ferunt ergo, hos inter Fideles eximios fuisse, & probabiliter Diaconatu vel alio Ecclesiastico ministerio insignitos. Hi per Ægyptum in quatuor partes divisi, ubique Fidem & nomen Jesu Christi annuntiabant. Paulus qui velut omnium caput habebatur, præerat illis, qui in Orientali parte prædicabant; Recombus eis qui in Septemtrionali; Theonas eis qui in Meridionali; & Papias eis qui in Occidentali Verbum annuntiabant. Præfectus Ægypti omnes comprehendit, eisque præcepit, ut vel sacrificando Legibus Imperialibus obedirent vel omnes morerentur: sed cum unâ Pauli voce omnes responderent, se mori paratos esse potius, quàm tantum crimen quale est sacrificare Dæmoniis se admittere, omnes illicò morti adjudicati sunt: Paulus quidè & Theonas cum sociis flammis absumti, Recombus cum suis gladio cæsi, & Papias cum affeculis cruci affixi.

XII. S. Augustinus Serm. 325. & fortè etiam 326. Maurinæ Editionis exhibet nobis viginti Martyres, quorum solemnitas Hippone celebris erat: & proinde in Africa passi creduntur potius, quàm apud Tarsum Ciliciæ, ut putat Baron. in Notis ad 6. Junii. Hi enim viginti qui sub Diocleriano apud Tarsum passi ibi dicuntur, planè diversi sunt ab illis, de quibus modò Augustinus. Horum trium nomina recitat, nempe Valerianam Fidentium Episcopum & Victoriâ: ut enim omnem excusationem præcludat ait: *Impar es pueris? impar es puellis? impar es Sanctæ Valerianæ? Si adhuc sequi piget, non vis adhaerere Victoriæ? sic enim nobis Sanctorum viginti Martyrum series recitata est. Cæpit ab Episcopo Fidentio, clausit ad fidelem femineam Sanctam Victoriâ; initium à Fide, finis ad Victoriâ.* Hi ergo, cum Idolis sacrificare constanter renuerent, in carcerem coniecti, tandem Martyrio coronati sunt.

XIII. Ad memoriam horum viginti Martyrum patratum miraculum narrat idem S. August. L. 22. de Civit. Dei cap. 8.: *Erat quidam senex Florentius Hipponensis noster, homo religiosus*
 & pau-

¶ pauper, sartoris se arte pascebat, casulam perdiderat, & uundā sibi emeret non habebat. Ad viginti Martyres, quorum memoria apud nos est celeberrima, clarā voce ut vestiretur oravit. Audierunt eum adolescentes, qui fortē aderant irrisores, eumque discedentem exagitantēs persequebantur, quasi à Martyribus quinquagenos folles (genus monetæ aliās æræ aliās argentæ) unde vestimentum emeret, petivisset. At ille tacitus ambulans, ejectum grandem piscem palpitantem vidit in littore, eumque illis faventibus atque adjuvantibus apprehendit, & cuidam coquo Caroso nomine, benè Christiano, ad coquinam conditariam, indicans quid gestum sit, trecentis follibus vendidit; lanam comparare inde disponens, ut uxor ejus quomodò posset, ei quo indueretur efficeret. Sed coquus concidens piscem anulum aureum in ventriculo ejus invenit; moxque miseratione flexus & religione perterritus homini eum reddidit dicens: ecce quomodò viginti Martyres se vestierunt. Ita S. Augustinus.

§. V.

Martyrum numerus innumerabilis.

I. **H**ic enarrandis Martyrum gloriosis Actis finem imponam. Ne autem putet quis, me omnes & singulos, qui veritatem Christianæ Religionis sanguine suo testati sunt, concludere intendisse, manere enim existimavi multo plures, & innumerabiles superesse, à quibus referendis abstinui; in immensum enim volumen crevisset: imò impossibile opus aggressus fuisset, si singulorum certamina vel indicare voluissem. Præter enim innumeros, quorum in Martyrologiis & Menologiis notitiam haurire quisque poterit, quot aliorum in tam generali & tam diuturna trium & ultra seculorum strage excidere potuit notitia, sive Scriptorum incuriā, sive quia in tanta cæcorum multitudine ex omni statu sexu ætate ac conditione cujusvis particularis cognitio haberi non poterat? Accedit, quòd plerorumque Martyrum Acta non solum diuturnitate temporis, sed etiam Tyrannorum malitiā exciderunt: cum enim advertissent, ejusmodi scriptis Fidelium animos in sua Religione confirmari & accendi, imò & numero augeri; non solum Christianis sed & Christianorum illustribus memoriis bellum indixere: quod etiam ante magnam Diocletiani Persecutionem Gentilibus exprobrat Arnobius sub finem Libri 4. adversus Gentes. Quin & aliqui Provinciarum Præsides vetuerunt, ne Martyrum quæstiones cum Actis publicis reservarentur, quòd se Martyrum constantiā vicios erubescerent.

II. De hoc conqueritur Prudentius Hymno 1. de Sanctis Martyribus Emetherio & Chelidonio, quorum Acta Gentiles supprefferant, ne apud Christianos celebrarentur. Is nempe cum Martyres illos Milites ac fratres fuisse dixisset, ac multa pro Christi nomine pertulisse, exponens quare plura de ipsis non retulerit, ait:

O vetustatis silentis obsoleta oblivio!

Invidentur ista nobis, fama & ipsa extinguitur,

Chartulas blasphemus olim nam satelles abstulit,

Ne tenacibus libellis erudita secula,

Ordinem, tempus, modumque passionis proditum

Dulcibus linguis per aures posterorum spargerent.

Imò in illa extrema Diocletiani Persecutione res adeò tumultuosè agebantur, ut plerumquè Christiani quasi *jure belli* tumultum interficerentur, ut Eusebius L. 8. Hist. cap. 10. & alii referunt; unde eorum Martyrum ne quidem nomina nedum Acta posteris innotuerunt: hinc conquesti sunt aliquandò Patres, quòd ex tanta Sanctorum Martyrum multitudine paucorum Acta superessent, quæ in Ecclesia legerentur. Nec valet dicere, quòd Diocletiani Edictum Sacras Scripturas præcipuè feriebat, in quibus Summa Christianæ Religionis continetur: & tamen harum deperditio secuta non fuit; cum Edicto non obstante Sacrarum Scripturarum Codices integri adhuc in Ecclesiis permanerint. Nam respondetur ex Baronio Præfat. ad Martyrol. Rom. cap. 3., quòd Sacræ Scripturæ sicut erat frequentior usus, ita absque dubio numerus Codicum erat multiplicior: nedum enim in Ecclesiis & Archivis earum asservabantur, sed & privata personæ, præsertim Ecclesiæ ministri, eos apud se retinebant. Unde dato, quòd Codices, qui in Ecclesiis aut Archivis servabantur, combusti ac deperditi essent, multi tamen remanserunt apud privatas personas, quarum multæ potiùs quàm eos tradere, Martyrium subire voluerunt. At Martyrum Acta à Notariis conscripta apud particulares Ecclesias, & in earum Archivis asservabantur, quæ cum multis impleverint chartas, nec tradebantur cuivis, nec tradita facile erat exscribere: & idcirco non mirum, si talium perpauca quæ erant exemplaria, & quidè in particularibus Ecclesiis servata, tanto terræmotu Orbis Christiani obruta & universali incendio concremata, perpauca eorum reliquiæ evaserint.

III. Porro quamvis Martyrum Acta magnâ ex parte corrue-
runt, innumerabilis tamen multitudo eorum, qui pro Fide vitam tradiderunt ab hominum memoria non excidit; de qua toto
ferè

ferè Libro 8. Historiæ agit Eusebius de Martyribus Orientis loquens . Quare S. Augustinus Serm. 252. (aliàs 5. de diversis) cap. 8. in rete centum quinquaginta tres pisces concludente Ecclesiam mysticè intelligens, *Si computentur inquit non solum omnes Fideles qui in bona vita exierunt de corpore, sed soli Martyres, unus dies passionis Martyrum si computetur, millia hominum inveniuntur coronatorum* . Si enim de solis Martyribus sub Diocletiano in Thebaide passis loquens Eusebius L. 8. cap. 9., post enarrata atrocia supplicia quibus torquebantur, ait : *Atque hæc omnia non paucis diebus, nec exiguo temporis spatio, sed prolixo aliquot annorum curriculo continuè perpetrata sunt : cum nunc deni, interdum vicieni & amplius, nonnumquam ad triginta & sexaginta, quandoque & centeni Viri ac mulieres cum parvulis uno die interficerentur, variis ac per vices alternatis suppliciis addicti : quorum magna ex parte testem ocularem se fuisse dicit: dicam ego: si tot in sola Thebaide, quot in aliis Orbis regionibus? si tot persequente solo Diocletiano, quot persequentibus per tria secula aliis ejus antecessoribus sanguinem pro Christo fudisse credimus?*

IV. Et sanè si à Nerone singulos usque ad Diocletianum in Imperio ei succedentes percurramus, nonne continuatam ubique terrarum Christianorum carnificinam (quod in præcedentibus me satis ostendisse puto) inveniemus? Leges insuper erant, quas nec ipsi Imperatores convellere poterant, omnium consensu statutz & novis Legibus confirmatz, quibus Christianos Orbe exterminari jubebatur : *Senatus* (inquit Origenes hom. 9. in Josue) *Populusque & Principes Romani decreverunt Legibus suis, ut non sint Christiani* . De his Legibus loquitur etiam Tertullianus in Apolog. cap. 37. . Hinc non mirum, si aliquando pace ab Imperatoribus concessâ, delati tamen Christiani punirentur; unde Apollonius capitali supplicio à Senatu damnatus est, quòd veteri Lege sancitum esset, ne Christiani delati impunè dimitterentur: quòd si his Legibus, ut frequentius eveniebat, nova accedebant Imperatorum Edicta, tunc maxime Persecutio sæviebat, Christiani undique perquirebantur, & deprehensi intolerabilibus afficiebantur suppliciis, Præsidum odio adversus eos justitiæ nomine crudelitatem palliante, de quibus Lactantius L. 5. Inst. cap. 11. & 12. : *Ius, inquit, vocant carnificinas veterum Tyrannorum adversus innocentes rabidè sævientium. & cum sint injustitiæ crudelitatisque doctores, justos se esse tamen ac prudentes videri volunt* .

V. Tantus ergo fuit tribus illis sæculis Martyrum numerus, ut Romæ dumtaxat quidam colligant Martyrum ter dena cen-

tena millia fuisse, inter quos triginta ac tres Romanos Pontifices. Toto autem Orbe inclusâ Diocletiani Persecutione undecies dena centena millia sanguinem pro Christo dedisse: quæ si per dies distribuuntur, sit ut singulis illorum seculorum diebus plusquam triginta millia Martyrum computentur. Jure ergo dixit S. Augustinus Serm. 22. (aliàs 109. de tempore) cap. 4. terram Martyribus fuisse repletam, & Serm. 300. (aliàs 109. de diversis) cap. 2. eorum millibus terram fuisse purpuratam.

§. VI.

Conclusio Argumenti.

I. **N**unc præsentis Operis argumentum perstringamus. Post tot tantosque Idololatriæ per tria secula conatus, ut Religionem ac Nomen Christi ex Orbe deleteret: post totam terram Christianorum sanguine repletam ac purpuratam, fortene Christi nomen evanuit, ejusque Ecclesia à fundamentis diruta corruit, non ampliùs surrectura? At oppositum contigit. Corruere quidem infelici exitu Christi Persecutores, & Idola quæ toto Orbi dominabantur vix in Orbe angulum retinuerunt, & tandem eorum etiam memoria periit: sed Ecclesia Christi Sanguine fundata, suorum etiam sanguine crevit & quasi semine in uberiorem segetem pullulavit. Ita loquitur S. Augustinus, tum in Psalm. 39. tum Serm. 286. (alias de diversis) cap. 4. his verbis: *Quasi semine sanguinis impleta est Martyribus terra, & de illo semine seges surrexit Ecclesia. Plus asseruerunt Christum mortui, quàm vivi. Hodie asserunt, hodie prædicant, tacet lingua sonant facta. Tenebantur, ligabantur, includebantur, producebantur, torquebantur, urebantur, lapidabantur, percutiebantur, bestiis subrigebantur: in omnibus suis mortibus quasi viles irridebantur: „ Sed pretiosa in conspectu Domini mors Sanctorum ejus,,. Tunc in conspectu Domini tantum pretiosa, modò & in conspectu nostro.*

II. Apertiùs tamen ad rem præsentem loquitur idem S. Doctor in Psalm. 134., ubi ostendens adversùs Persecutores impletum esse illud Sophoniæ cap. 2. v. 10. & 11.: *Hoc eis eveniet pro superbia sua; quia blasphemaverunt & magnificati sunt super Populum Domini Exercituum. Horribilis Dominus super eos & attenuabis omnes Deos terræ & adorabunt eum Viri de loco suo, omnes Insulæ Gentium: ita ait: Prævaluit Dominus adversùs eos. Adversùs repugnantes, adversùs rebelles & de occisione Fidelium*
Mar-

Martyres facientes, sed tamen nescientes; prævaluit Dominus adversus eos: & quomodo prævaluit? In Ecclesia sua, videmus, quia prævaluit adversus eos. Volebant paucos Christianos extinguere, occidere: sanguinem fuderunt, de sanguine occisorum tanti exsurrexerunt, à quibus illi interfectores Martyrum superarentur. Tamen & modò quarunt, ubi abscondant Idola sua, qui primò Christianos propter Idola trucidabant. Nonnè prævaluit adversus eos Dominus? Vide si facis quod sequitur: prævaluit Dominus adversus eos: & quid fecit? Exterminavit omnes Deos Gentium terræ; & adorabunt eum unusquisque de loco suo, omnes Insulæ Gentium: quid est hoc? nonnè prædictum erat? nonne completum est? nonnè ut legitur sic videtur?

III. Ita de iis, quæ à Propheta prænuntiata, suis temporibus recens impleta viderat, loquitur Augustinus. Tercentis & ultra annis Imperatores, Principes, Populi, totus Orbis, ad exterminandos Christianos initio paucos pauperes viles inermes totis viribus conjurarunt, & hoc ut Idolis suis cultum, à quibus Christiani abhorrebant, servarent. At eventus in contrarium cecidit: inter strages Christiani de sanguine occisorum multiplicabantur; Idola evertebantur, eorum defensores ad exitium perducebantur, donec tandem abscondere Idola sua coacti sunt: & Diis terræ exterminatis, omnes & Insulæ Gentium Deum, quem persecuti fuerant, adorarent. Quæ ergo potentia tantas vires contregit? Christiani non exercitus compararunt, non seditiones non tumultus in Populis excitarunt, sed ex omni statu conditione sexu ætate vitam alacri constantiâ supplicii & morti tradebant. Quis ergo prævaluit? Prævaluit Dominus, cujus causa agebatur, & qui quod prædixerat implevit. Nec est quòd Judæi vaticinium hoc ad se trahere, & de suo reditu Babylonico interpretari conentur. Unde enim ex Gentibus, & Insulæ Gentium tunc Deum adorare coeperunt, & unaquæque in loco suo; cùm Religio Judaica, ipsis Judæis fatentibus, nonnisi Jerosolymis piè exerceretur?

IV. Manifestum de Christo ejusque Religione per Persecutiones toto Orbe dilatanda protulit vaticinium David Psalm. 2., ubi primò dicit: *Quare fremuerunt Gentes & Populi meditati sunt inania? Assisterunt Reges terræ & Principes convenerunt in unum adversus Dominum & adversus Christum ejus.* Quis hic non videt prædictam Persecutionem, quâ omnes Reges & Principes Gentium conjuraverunt, ut Christus extingueretur; qui tamen meditati sunt inania: *non enim impleverunt quod voluerunt?* inquit August. ibi: *quia qui habitat in Cælis iridebit eos & Dominus sub-*
san-

fannabit eos. Quibus apertè patet, Christum ejusque Religionem planè esse Divinam: fieri enim non poterat, ut tot hostibus impetita non caderet, nisi Deum haberet auctorem & protectorem. Promisit ergo Deus Christo Filio suo: *Postula à me & dabo tibi gentes hæreditatem tuam & possessionem tuam terminos terræ.* Promisit & implevit, dum gentes quæ adversus Christum fremebant, ad pedes ejus humiles prostravit; fecitque ut ejus Ecclesia prædicatione Evangelij eas haberet in hæreditatem, & universam terram in possessionem.

V. Hanc autem Christo victoriam Martyrum patientia peperit. Hæc frementes adversus eum Judæos & Gentes ad ejus obedientiam traxit, & ejus Imperio totum Orbem subjecit. Ita S. August. Epist. 185. (aliàs 50.) ad Bonifacium cap. 5., ubi exponens causam, cur Reges, qui antea iniquitati servierant, postea cœperint servire justitiæ, ait: *Cum itaque nondum Reges Domino servirent temporibus Apostolorum, sed adhuc meditarentur inania adversus Dominum & adversus Christum ejus, ut Prophetarum prædicta omnia complerentur, non utique tunc possent impietatis Legibus prohiberi, sed potius exerceri. Sic enim ordo temporumolvebatur, ut & Judæi occiderent Prædicatores Christi, putantes se officium Deo facere sicut prædixerat Christus; & Gentes fremere adversus Christianos, & omnes patientia Martyrum vinceret:* ita S. August., qui L. 4. de Civit. Dei cap. 29. eam fuisse necessariam dicit ad evertendam vanitatem Idolorum. *Hujus Dei veri erat auxilium necessarium, à quo mitterentur Sancti Viri, & veraciter pii, qui pro vera Religione morerentur, ut falsa à viventibus tollerentur.*

VI. Mirabile sanè ac humanæ prorsus contrarium Divinæ Providentiæ consilium! Quis enim unquam hominum, ut hostes vinceret suorum occisionem elegit? quandonam Exercitus trucidator victor evasit, & qui trucidavit vicus succubuit? Hoc solius Christi prodigium fuit, qui sicut suâ morte Ecclesiam fundavit, ita suorum necè eam augeri voluit: & sicut ipse post mortem gloriosus resurrexit, qui verò eum occiderunt in extremam perniciem traditi sunt; ita & suos exemplo suo post necem voluit gloriosiores resurgere, & ex eorum sanguine Ecclesiam fecundatam multiplicari: ac demum eos, qui utriusque victores fore sibi fuerant adulati, miserâ internecone perire. Quod reverà accidisse compertum est.

VII. Hoc argumenro convictus Magnus Constantinus, videns miserabilem exitum Persecutorum, & parentis sui Constantii, qui à Christianis persequendis abstinuerat, in se derivatam

tam prosperitatem , Christo ejusque Religioni totum se dare decrevit . Ita Eusebius refert in ejus Vita L. 1. cap. 27. : *Igitur (Constantinus) cogitare apud se cepit , quemnam sibi Deum adscisceret . Quod dum sollicitè inquiri , hæc illi subiit cogitatio : ex plurimis qui autè se Imperium tenuerant , eos quidè , qui in Deorum multitudine spem suam collocassent ; & qui victimis illos ac donariis coluissent , primum vaticiniis ad assentationem compositis & oraculis fausta omnia pollicentibus delusis , tandem infausito mortis genere interiiisse ; nec Deorum quemquam præstò illis adfuisse , qui eos in vecto divinitus exitio liberaret . Solùm ipsius patrem , qui contrariam prioribus illis viam iniisset , & qui eorum quidè errorem condemnasset , unum verò supremum omnium Deum totius vitæ spatio coluisset ; eundem servatorem ac Imperii custodem & omnium bonorum autorem habuisse .*

Hæc ille cùm apud se expendisset rectèque animadvertisset , illos qui in Deorum multitudine fiduciam posuissent , in multitudinem quoque exitiorum esse delapsos , aded ut nec generis illorum ac sobolis nec stirpis ac nominis nec memoriæ ullum inter homines vestigium remanserit : contra verò Deum patris sui multa eaque illustria potentia suæ documenta ipsi præbuisse . Cùmque præterea considerasset , eos qui jam antea copias adversus Tyrannum (Maxentium) duxerant , cum Deorum multitudine ad pugnam profectos turpem exitum habuisse : alter enim re infectâ cum omnibus copiis ignominiosè recesserat ; alter in medio exercitu jugulatus , tanquam fortuita mortis præda extiterat : hæc inquam omnia cogitatione suâ complexus , Deos quidè qui nusquam essent colendo nugari , & post tot ac tanta documenta cæco adhuc errore ferri , summæ dementiæ existimavit : solum verò Deum genitoris sui sibi esse colendum censuit .

VIII. Hujus ergo opem Constantinus implorare cepit , orans atque obsecrans , ut se ipsi noscendum præberet ac præsentibus negotiis adjutricem manum porrigeret . Nec defuit misericors Deus : hæc enim precanti & suppliciter postulanti mirabile quoddam signum à Deo missum apparuit ; horis enim pomeridianis Sole in occasum vergente Crucis trophæum in Cælo ex luce conflatum Soli superpositum suis oculis vidit cum hac inscriptione : *Hæc vince* : quo ipse & Milites qui eum sequebantur , & qui spectatores miraculi fuerant obstupefacti manserunt . Cogitanti autem & apud se revolventi , quid signum illud portenderet , nox tandem supervenit . Tunc dormienti Christus apparuit cum signo eodem quod in Cælo ostensum fuerat , præcepitque , ut militari signo ad similitudinem ejus , quod in Cælo viderat fabricato , eo tanquam salutari signo in præliis uteretur .


Paruit pius Imperator, & statim diluculò surgens, arcanum omne amicis exposuit. Et convocatis auri & gemmarum fabris, medius inter eos sedens, speciem signi ejus sermone depinxit, justitque ut auro ac lapillis similitudinem ejus exprimerent. Et hoc est quod postea *Labarum* dictum fuit, illudque describit citato loco Eusebius cap. 31. : Illius figuram in galea ipse gestabat, & in antennis navium appendi jussit. Eoque salutari signo adversus oppositas quorumcumque hostium copias semper est usus & alia ad ejus similitudinem expressa cunctis exercitibus præferri mandavit. Hòc Maxentii exercitus superavit, & Maxentio ipso ponte Tiberis fracto in flumen demerso, primus triumphali ingressu Christi Crucem in Urbem Romam deportavit, universali Populi ac procerum acclamatione exceptus.

IX. Is, amice Lector, tam diuturnæ ac sævæ Persecutionis, in qua describenda hætenùs te detinui, exitus fuit. Is sanguinis tot Martyrum fructus, nimirum Christi, cujus Nomen è terris delere, ejusque Religionis quam per tria secula Idololatræ extinguere conati sunt, gloria triumphus & incrementum; Idolorum autem & eorum qui pro ipsis pugnarunt everfio & totale exterminium. Jure igitur hic repetere Christiani possunt, quod olim submerso Pharaone filii Israel cecinerunt: *Quis similis tui in fortibus Domine? Quis similis tui, magnificus in sanctitate, terribilis atque laudabilis? faciens mirabilia?* (Exod. 15. v. 11.)

X. Claudant ergo præsentem Tractatum ea, quæ S. Leo Serm. 80. in Martyrio SS. Petri & Pauli de Nerone primò Persecutionis auctore dicit: *Cujus furor per omnium vitiorum inflammatus excessum, in hunc eum torrentem suæ præcipitavit insania, ut primus nomini Christiano atrocitatem generalis Persecutionis inferret, quasi per Sanctorum neces gratia Dei posset extingui: cujus hoc ipsum erat maximum lucrum, ut contentus vitæ hujus occidæ perceptio fieret felicitatis aternæ.*., Pretiosa ergo in conspectu Domini mors Sanctorum ejus, nec ullo crudelitatis genere destrui potest Sacramento Crucis Christi fundata Religio. Non minuitur Persecutionibus Ecclesia sed augetur; & semper Dominicus ager segete diviori vestitur, dum grana quæ singula cadunt multiplicata nascuntur. Unde duo ista præclara Divini seminis germina in quantam sobolem pullularint, Beatorum millia Martyrum protestantur, quæ Apostolicorum æmula triumphorum, Urbem nostram purpuratis & longè latèquæ rutilantibus Populis ambierunt, & quasi ex multarum honore gemmarum conferto uno diademate coronarunt. Hæc Sanctus Leo. Aliæ quidem Persecutiones superessent, ut Saporis Persarum Regis, Juliani Apostatæ & aliorum. Sed has omit-

timus , quia ad ostendendam Christianæ Religionis Veritatem , quæ hujus Operis argumentum est , prænarratæ abundè sufficiunt .

XI. Pro hujus Libri coronide solùm adjiciam id quod refert S. Augustinus L. 18. de Civit. Dei cap. 54. , nimirum quòd Pagani stultissimo mendacio spargebant, Christianam Religionem non ultrà tercentos sexaginta quinquaginta annos duraturam . Qui anni cùm tempore , quo scribebat S. Doctor , fuissent jam completi , & Christiana Religio adhuc nedum perseveraret , sed magis ac magis floreret atque extenderetur ; proinde illius Dæmoniæ Divinationis falsitatem his verbis irridet: *Numeratis prosinde Consulibus trecenti sexaginta quinque anni reperiuntur impleti per eisdem Idus (Majas à Missione Spiritus Sancti) Consulatu Honorii & Eutychiani . Porro sequenti anno Consule Manlio Theodoro , quando jam secundum illud oraculum Dæmonum , aut figmentum hominum , nulla esse debuit Religio Christiana , quid per alias terrarum partes forsitan factum sit , non fuit necesse perquirere . Interim quod scimus , in Civitate notissima & eminentissima Carthagine Africa Gaudentius & Jovius comites Imperatoris Honorii quarto decimo Kalendas Aprilis falsorum Deorum Tempia everterunt , & simulacra fregerunt , ex quo usque ad hoc tempus (an. 429. quo scribebat) per triginta ferme annos , quis non videat , quantum creverit cultus nominis Christi ; præsertim postea quàm multi eorum Christiani facti sunt , qui tanquam verà illà divinatione revocabantur à Fide , eamque completo eodem annorum numero inanem ridendamque viderunt ? Si ergo ridenda tanquam fabula fuit , Augustino scribente , illa divinatio , quia Religio Christiana triginta annis post prænuntiatum tempus magis florebat , quo risu exsufflanda non erit modò , cùm post elapsos ab eo tempore annos supra mille tercentos Religio Christiana adhuc permaneat , nec sit toto Orbe Regio in quo nomen Christi non personet ? Stat ergo & stabit ejusdem promissum Matth. 28. v. 11. : *Ecce ego vobiscum sum omnibus diebus usque ad consummationem seculi* . Perierunt violenti Persecutores Pagani , peribunt fraudulentì Hæretici : Ecclesia Christi stabit , donec Evangelii prædicatione toto Orbe completâ , desinat Ecclesia cum Christo esse in terris , ut cum eo in æternum regnet in Cœlis .*



INDEX RERUM ⁵⁸¹

Quæ in hoc sexto Tomo continentur .

A

A Bdon & Sennen Persæ
Romæ sub Decio Marty-
rio coronati; eorum
Corpora in domo Subdiaconi
Quirini tumultata. 152.

S. Abibus Martyr Edessenus .
V. SS. Gurias Samonas &c.

Abitina Urbs in Africa Pro-
consularis . 408. plurium Ci-
vium gloriosâ Christi confes-
sione perit lustris . ibid.

S. Acacius Miles Martyrii sui
revelationem accipit . 501.

— Christianum se sponte pro-
fert Tribuno ac Duci fortiter
doctæque minas inter atque
tormenta . 501. 502.

— Byzantium ad Proconsu-
lem ductus, & ne deficeret in
via Deum precatus voce cæli-
tis ab omnibus recreatus ipse,
ceteri ad Christum conversi .
502. 503-

— Angelorum ad ipsum visi-
tationes . Ejus è plagis perse-
cta sanatio . Constantia & bi-
laritas in confessione ac crucia-
tibus . Prodigia de Cælo .
Tortorum terror . Judicis de
victoria desperatio . Proconsu-
lis expedita sententia . Agonis
consummatio . Corporis deposti-
tio atque assertatio . Latino-
rum ac Græcorum de eo in Ge-

stis Martyrum commemoratio.
503. 504. 505.

S. Acacius Sebastenorum XL.
Martyrum unus . 546.

S. Acacius sub Licinio clarissi-
mus, contritor Idolorum; im-
manium cruciatuum ferarum
& plurium ignium victor, ca-
pite truncatus lacte & sangui-
ne Fidem testatur . 550.

S. Acacius S. Patritii Prusæ
Episcopi Discipulus, & in
passione socius . 569. 570.

S. Accius Sebastenorum XL.
Martyrum unus . 546.

Achatius cujus Urbis in An-
tiochena Regione Episcopus:
ejus confessio coram Martino .
169.

S. Aciscus Martyr Cordubensis
à Prudentio memoratus . 405.

— Ei Victoriâ sororem so-
ciam adjungit Romanum Mar-
tyrologium . 405. 406.

Acta Militum Legionis Thebeæ.
330.

Acta SS. Perpetuæ & Felicita-
tis . 99.

Acta tot Martyrum non injuriâ
tantum temporis, sed & invi-
diâ hominum deperdita . 571.

— Prudentii ea de re lamen-
tatio . Patrum conquestio, à
Baronio confirmata . 572.

SS. Adrianus & Eubulus occa-
sione Pampbili & Sociorum

- recens coronatorum, pro Christo post bestias jugulati. 534.
- Adrias & Paulina Christiana effusa Martyrio coronantur. 210.
- S. Ædesius Martyr Appiani Martyris frater. V. SS. Apphianus & Ædesius.
- Ælius Hadrianus. V. Hadrianus.
- Æmiliani Militis visio & Martyrium. 240.
- Æmilianus Imperator occiditur. 207.
- S. Æmilius Martyr, de quo Augustinus sermonem habuit. 116.
- S. Afra Martyr sub Hadriano. 48.
- S. Afra Augusta Vindelicorum ex Gentili Scorto ad Christum summamque penitentiam conversa cum Matre & ancillis. 438. n. 1. Fidem coram Judice confitetur intrepida. 438. n. 2. Variè tentata Judicem egregiè ex Christi doctrina confutat. 438. 439. Igni damnatur. In igne audita Christum confiteri, orare pro venia, se hostiam offerre, holocausto Martyrium fecit. 439. n. 4.
- Ejus Corpus à quo reperi-
tum; ubi conditum: qua strage
ad sepulcrum peracta. 440.
n. 5.
- Ejus in Romano Martyro-
logio memoria. n. 6.
- SS. Agapes Chionia & Irenes
sorores Theffalonicenses in Sa-
cris Libris legendis assidue.
415. earum secessus & Iara-
bra ac Divina protectio. ibid.
- Theffalonicam reversa ad
Judicem delata Christum con-
fitentur. 415. 416.
- Earum coram Præsede con-
stantia ac tandem initum igni
Martyrium. 416. 417.
- Quæ Græci de iis quæ
Latini memorent. 417. 418.
- Agapes Virgo Martyr. 355.
- S. Agapiti Martyrium. 279.
- Agapius Episcopus Martyr. 248.
- S. Agapius pluriès confessor
Urbe in se immissa obviis oc-
currit. Martyrio coronatur.
500.
- S. Agapius. V. S. Atticus &c.
- S. Agatha Catana in Sicilia pa-
titur. 154.
- Agatho antea Idolorum Mini-
ster, Christi postmodum Con-
fessor. 416.
- Agathodorus famulus occidi-
tur. 164.
- Agathonica soror Papyli spontè
in ignem proflit. ibid.
- Agathopodis Martyrium &
constantia cum Actis. 368.
- Aglaides S. Justina amore ca-
ptus magicis artibus eam ten-
tat. 466. sub passeris forma
quid ei contigerit. 466. 467.
ejus perfecta ad Christum con-
versio. 470. n. 17.
- S. Aglais conversio opere San-
cti Bonifacii. 312.
- S. Agnes Virgo & Martyr cele-
berrima. 430. n. 7.
- Genus ejus educatio, atas,
pudicitia, constantia, Marty-
rium,

- rium, laudes, sepulcrum, parentum vigilia, gloriosa apparitio, duplex in Ecclesiastico Officio commemoratio; atque ejus nomine Deo extructa Roma Tempa. 431. 432.*
- S. Agricola Bononiensis Martyr affixus Cruci maximo clavorum numero. 456. n. 1. V. SS. Vitalis.
- Agrippa Apameæ Præfes Sanctum Basiliscum arcessit. 492. num. 14. miraculis terretur. Damnato Basilisco corripitur à Demone; ope Martyris liberatus in Christum credit. 394. 495.
- S. Agrippinæ Martyrium. 253.
- S. Alexander Episcopus Jerosolymitanus successit Narciso Seni & obiit Martyr. 156.
- SS. Alexander Papa Eventius & Theodolus passi sub Habriano. 41.
- S. Alexander pro Christo moritur. 145.
- S. Alexander Sebastenorum XL. Martyrum unus. 546.
- Alexander Severus virtutibus deditus, ejus familia Christianis plena erat. 121., in suo lavario Christum servabat. 123. malè periit. 213.
- S. Alexandri Martyrium. 254.
- Algerium in Africa Piratis suis famosa, olim Rufuccurum. 433.
- Allatius de Simeonibus Thessalonicam Demetrii Martyris apud Deum intercessione ab obfisione liberatam narrat. 419.
- S. Alphæus Philadelphus Martyr. 154.
- S. Amarantus Martyr in Galia. 155.
- Ambrosii varia fortuna. 130. inter Scriptores Ecclesiasticos ponitur à D. Hieronymo. 131.
- S. Ammon Diaconus quadraginta SS. Virginum Fidei Magister, Beræ sub Licinio Martyr. 552.
- Ammon Martyr alius. 146.
- Ammonaria cruciatur. 145.
- Ammonaria alia decollatur. ibid.
- Amor Paupertatis Christianorum. 266.
- S. Ampelius Legis & Scripturarum custos Fidem coram Tyranno confessus. 412.
- S. Anastasiæ Senioris Martyrium. 253.
- S. Anastasia Martyr inclita. 461., ejus Patria Roma: qui parentes, qui qualisque conjux. 471. n. 12., à S. Chrysogono per litteras consolationem ex vinculis petit; habet. 461. n. 13., à Viro, angustiis, & mendicitate liberatur. 461. n. 14., ejus in pauperes & præsertim Confessores misericordia; ad Præfectum Illyrici transductio, confessio, cruciatus, ac pluribus in Martyrio sociis consummatio agonis. 452. 463., quid de ea Romanum Martyrologium, quid Græcorum Menologium. 463. n. 17. & 18.
- S. Anatoliæ Martyrium. 152.

- S. Andeolus *Subdiaconus Martyr in Gallia sub Severo*. 115.
- S. Andreas *Lampfaci passus*. 162.
- S. Andronicus *Ephesus adolescens SS. Tarachi & Probi eximius in Martyrio socius*. 444.
- *Primum ejus cum Maximo Praside Tarsi certamen, exquisiti cruciatus, plagæ, carcer, plagarum mira sanatio*. 445. 446.
- *Iterum Maximo Mopsuestiæ sistitur, dirissimè caditur, Prasidem confutat, ipsum & tormenta spernit intrepidus, secundis vinculis traditur*. 448. 449. n. 9.
- *Tertium Anazarbe Maximum despicit & objurgat; Prophetico Spiritu exitium Persecutoribus imprecatur, cruciatus inter atrocissimos hilaris ridet*. 452. 453. *quodnam omnium inmanissimum*. 452. n. 16. *in Amphitheatrum delato bestiæ obsequuntur: ab inmissis Gladiatoribus tandem conficitur*. 454.
- *Ad ejus & sociorum Corpora miraculum multiplex. Eorum Acta & testes Martyrii. Græcorum in iis aliqua cum Latinis dissensio conciliata*. 354. 455. 456.
- S. Angiacus *Sebastenorum XL. Martyrum unus*. 546.
- SS. Anicetus & Photius *sanguine propinqui in passione ac corona socii*. 500. 501.
- Animas Sanctorum *de Cælo salutationes sibi à viventibus factas audire*. 565. n. 4.
- Anniversaria *in die Nativitatis Martyrum antiqua in Ecclesia*. 117.
- S. Anterus *Papa Martyr*. 127.
- S. Anthimus *precipitatur in Tiberim, ab Angelo eripitur, & tandem decollatur*. 340.
- S. Antimus *Nicomediensis Episcopus capite truncatur*. 355.
- Antinous *amafius pro Hadriano suo se mergit, ab Hadriano stultè colitur*. 53.
- Antiochi *coactæ falsæque penitentia non una detestabilis imago*. 535. 536. 537. 539. 540.
- Antiochia *Syriæ olim Gentilis Asiarchæ sedes*. 454. n. 19.
- *Urbs toto Romano Imperio & magnitudine celeberrima, & immanitate in Martyres*. 509.
- S. Antiochus *primus Martyr Sardinia*. 48.
- S. Antoninus *Martyr Romæ unà cum Marcellino Papa*. 430. n. 6.
- S. Antonius *sub Licinio Martyr. V. SS. Leontius &c.*
- Anulinus *Africæ Proconsul in Viros duos supra triginta, ac Mulieres septemdecim fuit, atque in Christi confessione constantes crudelissimè laniat*. 408. 409. 410. ad 414. *Crispinam cruciat & capite plectit, aliis tribus in terroris exemplum memoratis*. 459. 460.
- Anulinus *non unus sed multiplex Persecutor Christianorum*. 460. n. 11.
- S. Any-

S. Anyfia *Virgo & Martyr Theſſalonica ſub Maximiano.* 418.

S. Apodemius *Martyr.* 405.

Apollo *conſultus de Chriſtianis perſequendis reſpondet.* 348.

Apollonia *in maxillis percuffa dentibus excuſſis comburit.* 136.

S. Apollonius *in Aegypto Monachus & Diaconus levi pioque reſponſo Philemonem maledicum in ſe Scurram in Chriſti ſervum, & ſibi in Martyrio ſocium mutat.* 483.

— *Tormenta ſuſtinet, igni traditur, precatuſ ignem extinguit, eo miraculo Arrianum ipſum Perſecutorem & Populum Chriſto lucratur.* 484.

— *Ejus & ſociorum Paſſio, atque in Eccleſia tabulis commendatio.* 485.

Apollonius *Senator accuſatus à Servo quoddam eſſet Chriſtianus Martyrio coronatur.* 86.

SS. Apphianus *Martyr (aliis Appianus, Romano Martyrologio Amphianus) & Aedeſius frater.* 496. Eorum patria, parentes, educatio. 497. 498. n. 1. 498. 499.

— *Appiani in Urbanum Provincia Praefidem ingens facinus, in Fide & tormentis fortitudo; Martyrium, miracula poſt ſecuta.* 497. 498.

— *Aedeſii pariter in alium Praefidem eximius animus, & Martyrii aequa cum Appiano fratre conditio.* 499.

S. Arcadius *in Achaja poſt pias*

latebras, ſpontè ſe Praefidi Fidei Athletam ſiſtens, per immaniſſima tormenta coronatus. 556. 557.

Archelaidis *eleemoſyna.* 260.

S. Ardaleon *dum ſe Martyrem fingit, verus Martyr efficitur.* 298.

Ariſtidis *Apologia ad ſedandam Perſecutionem ſub Hadriano.* 50.

Arnobii *diſſum circa combuſtionem Librorum.* 390.

S. Arrianus *primùm Thebaidi Praefectus ſaviffimus Eccleſia Perſecutor.* 477.

— *Immanis ejus crudelitas in SS. Martyres Timotheum & Maurum.* 478. 379. 480., *in S. Aſclam ſeu Sabinum.* 481. 482. *in omnes Antinoi Chriſtianos Cives, praefertim in Clericos, & praeter ceteris in S. Apollonium Monachum & Diaconum.* 483. 484.

— *Mira tandem ejus & totius Populi ad Chriſtum converſio, cum Sauli converſione comparanda.* 484. 485. *In mare demerſio Baptiſmus ipſiſſique atque Martyrium fuit.* 485. *Quid de Arriano Graci in Menol. addant.* 486.

Ars Magica *tempore Chriſti deſtruitur.* 51.

S. Arſenius *pro Fide moritur.* 145.

S. Aſclas *plurium munerum ſub Aegypti Duce Miles ſub Chriſto illuſtrior.* 481.

— *Ejus coram Arriano in Fide conſtantia atque in tormen-*

tis fortitudo. Martyrium, sepultura, atque in Fastis Ecclesiæ commendatio. 481. 482. 483. Arriano Persecutori suo divinitus ad Fidem converso ad sui sepulcrum oranti Martyrium impetrasse perhibetur. 482. n. 12.

Asclepiades una cum Pionio moritur. 186.

Asclepius Episcopus Marcionita S. Petri Aspelami in Martyrio infelix socius. 528.

Asclepiades sanctus in Christianos 380.

Asiarcha cujus olim apud Gentiles Officii nomen. 454. n. 19.

S. Asterius Martyr. 122.

S. Asterius qui Asturius Senator Martyrio coronatur. 268.

Asturius. V. Asterius.

Ater. V. Arsenius.

Athanasius Dæmonum Sacerdos Diis suis invocatis ignem & ipse ingreditur, uti Cyprianus Martyr: quæ fortunâ. 471. 472. n. 20.

S. Athanasius Sebastenorum XL. Martyrum unus. 546.

S. Attalus Pergamenus Martyrio coronatur. 80.

SS. Atticus, Eudoxius, Agapius, Carterius, Styracius, multique alii Milites, Sebasie in Armenia fortissimi sub Licinio Martyres. 551.

S. Audax Martyr. 152.

Augaunenses Martyres iidem qui Legionis Thebeæ. 303.

Augurius socius Fructuosi commuritur. 241.

Aurelianus dat manus, ut Pau-

lus Samosatenus deponatur à Sede Episcopali. 272.

Aurelianus sævit in Christianos. Non est ausus Edictum contra Christianos firmare propter fragorem gladii propè ipsum vibrati. 273. tamen cogitabat destruere Religionem Christianam, quam cogitationem non adimplevit morte præventus. 274.

Auxentius Mopsuestiæ Episcopus Arianus petitis SS. Martyrum Reliquiis, & ab Anazarbensibus concessis, Deo vacante non obtinet. 456. n. 21.

B

S. Babilas Episcopus Antiochenus obiit. 155.

S. Balsamus. V. S. Petrus Balsamus.

S. Barbaræ Martyrium. 128.

Barbaræ Nationes convertuntur ad Fidem. 271.

Barchoceba Dux Judæus sævit in Christianos. 39.

Barcinona Eulaliæ Virginis Martyrio illustris. 402. passionem S. Cucuphatii. 403.

S. Basileus Anasæ Episcopus ex Ancyranæ Concilii Patribus unus. 553. ejus sub Diocletiano & Maximiano Imperatoribus pro Ecclesiæ zelus: sub Licinio in tuenda Glaphyria castitate; in carcere, verberibus, Martyrio, pro virtute fortitudo. 553-554. De sibi in Episcopatu substituendo suos Diaconos monet: Elpidiphora

coronam à Deo pollicetur.
553.

— *Ejus Corporis inventio & translatio; in Ecclesia fastis memoria.* 554.

Basilides gladio diffectus. 353.

S. Basilides Martyr. 277.

Basilides ope S. Potamiana convertitur ad Christum, & Martyr moritur.

S. Basiliscus S.S. Theodori Eutropii ac Cleonici Commilitonum in confessione tantum socius. 491.

— *In carcere moriens de non adepta sociorum corona recreatur, & custodia permissus suos invisit.* 491. 492. *ad vincula revertens, in itinere à se quarentibus quàm crudeliter exceptus & ductus.* 492. 493. *ad ejus preces audita vox de Cælo, terramotus ingens, miraculum multiplex editum.* 403. n. 17. *ejus in Deum spes atque in virtute firmitudo in itinere, erga Milites, coram Præside.* 493. 494. *Deum precatur, & terramotu edito illicò concussum Apollinis Templum, contritam simulacrum.* 494. 495. n. 20. *Iterùm coram Præsidi secretò orans incendit Templum, & ex sententia capite truncatur.* 495. n. 21.

— *Mira in ejus morte & loco Martyrii, Scriptore Actorum teste oculato.* 495. 496.

— *Quid de eo Latini ac Græci in Fastis Martyrum.* 496.

S. Basilæ Martyrium. 252.

S. Bassus Episcopus Nicææ in Pro-

vincia Martyr. 155.

Bassus in foveam dimittitur. 353.

Bassus pugnis & sulsibus percussus obiit. 340.

S. Bernices Antiochena Virgo atque admirandi generis Martyr. V. SS. Domnina &c.

Berytus Scholæ Civilis Juris olim celebris. 496.

Befas Miles moritur pro Christo. 144.

Bestiæ feroces mansuescunt erga Christianos. 392.

S. Bibliades Martyrio coronatur. 79.

S. Blandina Martyrio coronatur. 80.

S. Blasius Sebastenus Episcopus, clarissimus hodieque in Ecclesia Martyr, quoniam tempore passus, quæ de eo Acta, quid Græcorum Menologium. 555.

S. Bonifacii vitia, virtutes, conversio. 317., confessio. 319. & Martyrium. 320.

S. Bonosæ Martyr. 277.

Buderius Judæus, in S. Marcianam Martyrem contumeliosus, suæ domus ruinâ irreparabili punitus, igne divinitus lapsus. 434. n. 4.

C

S. Cæcilia Martyr in Africa ca. sub Anulino. 408. 414.

S. Cæcilianus in Africa sub Anulino Martyr. ibid.

S. Cæcilianus Martyr. 405.

Cæcilius Presbyter quis. 228.

- Cæsaraugusta innumerabilium Martyrum gloria illustris.* 404. 405. 406.
- Cæsaraugustana Ecclesia veneratur S. Polycetem Diaconum.* 18.
- S. Cæsarius Diaconus Terracina precipitatur in mare.* 35.
- S. Cæsidius Martyr.* 127.
- S. Cajus Martyr Cordubensis Cæsaraugusta Martyrium fecit.* 406.
- Cajus nihil fecit contra Christianos.* 11.
- Cajus Papa ordinat multos ex novis Christianis.* 330.
- S. Cajus Sebastenorum XL. Martyrum unus.* 546.
- S. Calepodius Martyr.* 122.
- Calix per Diaconos offerebatur post Sacrificium omnibus presentibus, non exclusis pueris & infantibus.* 143.
- S. Calocer Martyr sub Hadriano.* 48.
- S. Calocerus Martyr.* 182.
- Callinicius Apollonia cruciatur.* 161.
- S. Callixtus Papa & Martyr.* 121.
- Calumnix in Christianos.* 91.
- Calvinistæ faciunt in Corpus S. Irenæi.* 114.
- Candidus confortat Milites Legionis Thebeæ.* 300.
- S. Candidus Sebastenorum XL. Martyrum unus.* 545.
- Capitolium non solum Romæ sed etiam in aliis Urbibus.* 154.
- Caprasius Agennensis Martyr.* 312.
- Caracalla vitiiis deditus fuit in suos, interficitur à Macrino.* 120.
- Carinus necatur à suis.* 293.
- S. Carpus Episcopus Thyatira cruciatur & occiditur.* 164.
- S. Carterius Miles Fidei Sebaſte in Populo propagator, ac coram Tyranno strenuus confessor & Martyr.* 551.
- Cassia coram Præside Christum strenuè confessa.* 416.
- S. Cassianus apud Forum Syllæ puerorum in litteris olim institutor, impiissimo supplicii genere Martyr, nunc ejus Civitatis Patronus.* 557. 558.
- S. Cassianus exceptor, seu Notarius Agricolæ videns sententiam injustam contra Marcel- lum, Fidem Christi professus obiit Martyr.* 346.
- S. Cassianus sub Anulino Mar- tyr.* 408. 414.
- Castitatis illustre Gentilium pro Christianis testimonium.* 433. n. 13.
- Castulus adhuc Catechamenus inter Viennæ Primores in Ferreoli Martyris memoriæ Templum Deo adificat.* 443. num. 13.
- Castulus Palatii Zetarius, & ho- spes Sanctorum, Martyr obiit.* 334.
- S. Castus Martyr.* 116. de quo Augustinus sermonem habuit.
- S. Celerina Martyr, de qua S. Cyprianus.* 117.
- S. Chæremón Nili Urbis Epi- scopus Martyr occubuit.* 147.
- Chalcedon Urbs celebris Mar- ty-*

- tyrio Euphemia, Templo ejusdem Martyris nomine & sepulchro, ac Concilio, magnisque factis insignis. 515.*
- S. Charalampus Martyr. *ibid.*
- S. Chariton Martyr. *285.*
- S. Chionia Thessalonica ignis Martyrio consummata. *V.*
- SS. Agapes.
- Christianæ doctrinæ egregia explicatio à S. Pallione Martyre coram Probo Præsidente. *427. n. 8.*
- Christianismus cum Judaismo à Paganis confundeatur. *22.*
- Christiani sibi fidentes defecerunt, adjuti gratiâ fortiter mortem sustinuerunt. *148.*
- Christianis imputatur incendium Romæ à Nerone, ut se excuset cum Populo. *13.*
- Christiani tempore Hadriani occidebantur vulgi clamoribus. *39.*
- Christiani vocantur Justi à Diocletiano. *348.*
- Christianorum pro data sibi insperatè à Galerio pace magna exultatio. *535. 536. cur frustratè pro Galerio ipsorum preces. 537.*
- Christianorum sanctitas Paganis gratiosa. *27.*
- S. Christophorus. ejus historia ad litteram intelligi debet, non ad allegoriam, quamvis modus quo pingitur aliquod allegoricum iudicat. *183. ejus nomen est proprium, Martyrque obiit. 181.*
- Chromatius hortatus, ut Idola projicias, ut se gesserit. *327.*
- dignitati & peccatis renunciat baptizatus cum tota familia. *328. in Campaniam cum novis Christianis secedit. 329.*
- S. Chrysogonus Romanus Sanctæ Anastasiæ præceptor & per litteras sæpe consolator. *461. ejus confessio & Martyrium. 461. n. 15.*
- Ciliciarcha quod olim apud Gentiles Officii nomen. *453. n. 18.*
- Claudianus Martyr occubuit. *173.*
- S. Claudii Commentariensis Martyrium. *332.*
- Claudii filii liberantur ab infirmitate. *326.*
- Claudius quosdam Romæ expulsi non ut Christianos, sed uti Judæos. *11.*
- S. Claudius Romæ cum Marcelino Papa capite truncatus. *430.*
- S. Claudius, S. Asterius, & Neon fratres Martyres. *293. eorum Acta. 294.*
- S. Claudius Sebastenorum *XL. Martyrum unus. 546.*
- Claudius II. quantus Imperator. *272.*
- Clavorum maximus numerus quo Cruci affixus Martyr Agricola. *456. n. 1.*
- S. Cleonius post Theodorum, & ante Basiliscum commilitones unà cum Eutropio commilitone altero Marmaritana Legionis per Crucem Martyr. *490. 491.*
- Cloaca locus, in quo mittebantur Corpora Martyrum. *336.*
- S. Codratus infans miraculosè nutritus, obiit Martyr. *178.*

- Collecta quid esset apud Veteres.* 414. *cur eo nomine Oratio, quam post salutatum Populum Sacerdos orat, Collecta nuncupatur.* *ibid.*
S. Columba Martyrio coronata. 275.
Commodus ex proprio commodo mitis in Christianos. 87.
Complutum SS. Justi & Pastoris Martyrio clarum. 404.
Concordius Martyrio coronatur. 83. *ejus colloquium cum Torquato.* *ibid.*
Confessores Christi qui appellantur. 172.
Confessores qui in carceribus dire tormentis decesserunt uti Martyres habendi. 189.
Conon Martyr occubuit. 173.
S. Cononis pietas. 283. *Acta & Martyrium.* 284.
Constantia Martyrum argumentum Veritatis Religionis Christianae. 70.
Constantia Martyrum in tormentis. 66.
Constantini Oratio de Decio. 191.
Constantinus exaggerat immanitatem Persecutionis. 366.
Constantinus M. Imperator quo motus argumento abjectis Romanorum Diis in verum unumque Deum spem pones. 576. 577. *ejus à Deo audita de eo agnoscendo preces.* *ibid.* *signum ipsi de Caelo ostensum: Christi apparitio: per signum victoria.* 577. 578.
Constantius in Christianos propensus. ejus Edictum prudentissimum. 346.
Controversia de Corona Militis Christiani unde orta. 125.
Corduba SS. Aciseli & Victoris germanorum; SS. Irenaei fratrum Fuxsi Juliani & Martialis Martyrio illustrata. 405. 406. 559.
Cornelius quomodo electus Pontifex Romanus. 190.
— Ejus fortitudo contra Novatianum. 200.
— Sancti Pontificis aranea. 205.
Corpora SS. Crispini & Crispiniani an Roma, dubium. 311.
S. Corona seu Stephanides uxor S. Victoris Martyrio coronatur: ejus Martyrium describitur. 67.
Corynthis Martyres. 178. *Martyres alii & precipue Mulieres.* 179.
S. Crementis Cordubensis Casarsa Augusta una cum Cajo passus 406. eorum memoria apud Prudentium & Romanum Martyrologium. *ibid.*
S. Crementius idem ac Crementis V.
Cremona Eunus moritur cum Juliano. 144.
Crescens Philosophus Cynicus accusat S. Iulianum. 71.
S. Crescentianus Augusta Vindelicorum Martyr. 440.
SS. Cretenses decem Martyres.
S. Crispina inter Africanos Martyres celeberrima. Augustini de ejus genere & fortitudine testimonia. 458. 459. *num. 7.* *Ejus in secularibus bonis fortuna,*

- na, proles; patria: filiorum
 & omnium tormentorum pro
 Fide contemnit. 459. num. 8.
 coram Anulino Proconsule
 constans confesso & sequentem
 Martyrium. 459. 460. n. 9.
 10.
- S. Crispinianus S. Crispini so-
 cius Martyr. 310.
- S. Crispinus in vita humilis, in
 morte gloriosus. 300.
- Crispinus Vienna in Gallia Con-
 sularis SS. Julianum & Ferro-
 lum obruncat. 441. 442. 443.
- S. Cucuphas sub Daciano Bar-
 cinone Martyr. 403.
- A Prudentio laudatus.
 ibid.
- Ejus Acta in Toletano
 Breviario. ibid.
- Quid de eo Romanum Mar-
 tyrologium, quid Notkerus.
 403. 404.
- S. Cudion Sebastenorum XL.
 Martyrum unus. 546.
- Culcianus Aegypti Praefes plu-
 rimum Fidelium fuso sanguine
 famosus. 520. ejus cum Phileas
 Episcopo & Martyre disputa-
 tio. 521. 522. 523.
- Cybalitana Civitas Valentinia-
 ni Imperatoris clara natalibus.
 426. ubi sita. 427.
- S. Cypriani zelus, ut memoria
 Martyrum ne proderentur.
 193. ejus disciplina. de lapsis.
 192. V. S. Cyprianus Carth.
- S. Cyprianus Antiochenus idem
 sortasse visus D. Gregorio Na-
 zianzeno ac Cyprianus Car-
 thaginensis Episcopus; tamen
 longe alius. 463. 464. n. 1. 2.
- Ejus patria, genus, inge-
 nium, à septennio Daemonum
 mysteriis oblatio, educatio
 Daemoniaca, itinera & profe-
 ctus in Magicis. 464. 365.
 horrenda scelera per magicam
 artem. 465. 466.
- Ad S. Justina virginita-
 tem expugnandam omnes De-
 monum frustra conatus impen-
 dit. 466. 467. Daemonum im-
 becillitatem deprehendit. 467.
 468. iratus Damoni suo im-
 properat; ab eoque mortem
 sibi inferente, Justina Deum
 invocans signoque utens, libera-
 tur. 468. n. 11.
- Ejus conversionis initia, de
 desperanda venia tentatio.
 Servorum Dei opitulationes.
 468. 469. perfecte conversus
 ab Episcopo recipitur, magicis
 Libris palam combustis, bonis
 omnibus in pauperes erogatis.
 470. Penitentia aliarumque
 virtutum eximius cultor, ma-
 gnus à Deo donis ornatus,
 Antiochenis Ecclesia Episco-
 pus electus. 471.
- Coram Antolmo Fidem
 confitetur, diversimode excrucia-
 tur cum S. Justina: ad Dio-
 cletianum missus cum eadem
 capitis Martyrium facit. Cor-
 pora Romam translata. 471.
 472.
- S. Cyprianus Carthaginensis ba-
 ptizatur à Caelio Presbyte-
 ro, ipse admiratur mutatio-
 nem sui. 228. ad dignitatem
 Episcopatus evahitur relu-
 ctans, qualis fuit in Episcopa-
 tu.

- in . 229. In Persecutione Decii, Deo inspirante, corpore sed non curâ reliquit Ecclesiam; ad quam rediit pace aliquatiter redeunte. Ibi disciplinam de recipiendis lapsis in Concilio statuit. ejus caritas tempore pestis etiam circa Infideles. tunc creditur scripsisse Librum de Mortalitate. 231. ejus controversia cum Stephano Papa de baptizandis Hæreticis; an retractaverit errorem. 232. ejus constantia cum Aspasio Proconsule. 233. in exilium mittitur. ejus visio 233. scribit Epistolas ad Confessores in Africa. 234. ab exilio revocatur Carthaginem. 235. ducitur ad Proconsulem. 236. ejus responsa ad interrogatæ Proconsulis, à quo damnatur ad mortem & decollatur. 237. duplex Basilica fuit adificata Carthagine. ejus Corpus Compendii asservatum in Gallia. 238. qua occasione scripserit Librum de Exhortatione ad Martyrium. 202. ejus gaudium in constantia Martyrum. 203. V. S. Cypriani zelus.
- S. Cyrilli pueri constantia & mors pro Christo. 262.
- S. Cyrillus Gortynæ Episcopus & Martyr. ejus Acta recensentur. in ignem missus illæsus exiit. tandem decollatus obiit. 177.
- S. Cyrillus Sebastenorum xl. Martyrum unus. 546.
- S. Cyrinus Christi Martyr. 154.
- S. Cyrinus Cyzici passus Sancto

Theogeni à Latinis Martyrio sociatus. 550.

S. Cyrinus: una cum Marcellino Papa Roma dato capite Martyr. 430. n. 6.

S. Cyrus. V. Quirinus.

D

S. Dacianus in Africa sub Anulino Martyr. 408. 417.

Dacianus Maximiani Herculis nomine Hispania Præfatus. 597. Ejus furor in Vincentium Martyrem. 397. 598. 399. Majori, quam exterius igne Vincentius, interius ipse cruciatus. 6. Strages edit in Hispania Christianorum maximas. 403. Emerita Eulaliæ Virginem duodennem crudelissimè interfecit. 402. Toleti Leocadiam excruciat. 402. 403. Barcinone Cucupbatem perimit. 403. Compluti Justum & Pastorem fratres. 404. Felicem Gerundæ. 407. Casuraugusta penè innumerabiles. 404. 405.

Dæmon mendacii auctor testis Veritatis Christianæ. 159.

S. Daniel Casarea in Palæstina Martyr. V. SS. Elias &c.

S. Daniel in Armenia sub Licinio. V. SS. Leontius &c.

S. Dantus Martyr in Africa sub Anulino. 408. 414.

Daria Nicandri Martyris digna uxor. 565. ejus ad Virum de alacriter jubeundo Martyrio adiunctio; virilis ac Præfide

- dem responsio: ultima ad Virum allocutio virtutis & officii plena. 567. 568. 569.
- S. Dativus sub Anulino Africa Præfetto Fidei Professor constantissimus. 409. ejus fortitudo atque alacritas in tormentis. 409. 410. de Christiani cætus sui Præposito à Proconsule interrogatus, ingenuè indicat Martyrii cupidum. 409.
- SS. Decem millia Martyrum in monte Ararath crucifixi. 35.
- SS. Decem & septem millia Martyrum uno mense Romæ coronantur. 430. num. 6. quo tempore. ibid.
- Decius Editum contra Christianos promulgat. 137.
- Infelicitè moritur. 191.
- Decretum contra Christianos pronuntiatum die Festo Terminalium. 349.
- Defensoris Ecclesiæ munus quale. 330. qui illud obtinuerint. 330.
- S. Demetrius Theffalonica & sanctitate morum & in Fide constantiâ clarus. 418. fueritne Proconsul. 418. 419. quid de eo Græci. 419. n. 9. ejus nomine Deo dicata in Illyrio Ecclesia, & plura narrata miracula. 419. n. 10.
- S. Desiderius Beneventana Ecclesiæ Lector & S. Januarii Episcopi sui Martyrio socius. 475. 476.
- Diabolus duplici persecutionum genere vexator Ecclesiæ: primum violenter, postea fraudolenter. 8.
- S. Didymus uti Theodoram Virginem de lapinari liberaverit. 421. nam. 4. uti illius strenuè rem peractam pande-rit. 422. n. 5. atque intrepidè coram Præside Fidem confessione ac sanguine sanxerit. 322. n. 6.
- Ejus cum Theodora de Martyrii corona contentio & ac tandem consecutio. 422. 423.
- S. Digna Asra Martyris ancilla & ipsa Martyr. 438. 440.
- Dignæ Martyrium. 252.
- Dinocrates uti Perpetua apparuerit. 103.
- Diocletianus Imperator eligi-ur. 292.
- Difficilè inducitur, ut in Christianos saviat. Hominum utitur & Deorum consulatione. 348.
- Ejus de abolito sibi Christi nomine ac Religione blandientis vana confidentia. 403.
- Ejusdem, utriusque Maximiani, & Maximini innumeros in Martyres in Thebaide & Ægypto crudelitas. 519.
- S. Diodorus Martyr. 173.
- S. Dionysia Martyr. 145.
- S. Dionysia, quæ & Dionysius dicitur, Stupratoribus tradita, impudicis territis divinitus à stupro servata. 163.
- S. Dionysii Alexandrini Acta cum Emiliao Præsfecto. 215.
- S. Dionysius Pancratii Martyris patruus. 429. n. 4.
- S. Dioscorus Martyrio coronatus. 145.
- Disciplina de publicis non ad-

- mittendis in Ecclesiam peccatoribus* . 133.
- Disciplina Ecclesiæ tempore Cypriani laxata* . 135.
- Divinatio de Christiana Religione brevi regnatura , post pacem à Constantino datam , à Paganis jactata : ab Augustino risu excepta* . 579.
- Doduvellus falsè asserit , nullam in Christianos fuisse Persecutionem sub Hadriano* . 50.
- *De Moyssis Prebyteri Martyrio ex Cypriano ac Cornelio Papa convincitur* . 151.
- *Solos sub Licinio passos fuisse Episcopos , quam audacter falsèque differat* . 544. 551.
- Dogma Christianum coram Præsidente fidenter à Justino prolatum* . 72.
- Dominicum Aureum Antiochie* . 415.
- Dominicum quid à veteribus Christianis vocaretur* . 414. 415.
- *Quid ipsis esset Dominicum celebrare* . 309. 415.
- Domitianus Imper. quanti in Christianos odii* . 25.
- *In Titum fratrem crudelissimus: peritio Neronis à Terulliano dictus* . 19. , *qua morte sublati* . 25.
- S. Domitianus Sebastienorum* . xl. *Martyrum unus* . 545.
- Domitius Ulpianus Juxrisconsultus Christianorum hostis* . 123.
- S. Domnina Martyr* . 295.
- SS. Domnina Mater , Bernices* . & *Profdoces filia , Fide ac ca-*

- stimonid illustres* . 512. à *paganis Patre prodita ; matris hortatu in flumen secum matrem mergunt , dum ducuntur ad Judicem* . 512. 513. *hujusce facinoris defensor ex D. Chrysostomo* . 513.
- S. Domnus Sebastienorum* . xl. *Martyrum unus* . 545.
- S. Donatiani Martyrium* . 342.
- S. Donatianus Martyr* . 304.
- S. Donatillæ Martyrium* . 251.
- Donatistæ Marcellinum Papam Thurificationis Deorum reum per calumniam traduxere* . 430.
- S. Dorotheus Martyr* . 352.
- S. Dorymedontis Martyrium* . 391.
- S. Drosis Virgo Antiochie per ignem Martyr* , D. Jo: Chrysostomi Panegyri celebris . 559. 560.

E

- E**cclesia *Antiochenapacificè* constituta . 32.
- Ecclesia Christi post mortem Neronis aliquantulum quievit* . 19.
- *Lapsos recepit semper contra ac Montanistæ discurrere* . 147.
- *Ejus pax tempore Galli* . 192.
- Ecclesiæ Africanæ cum Romana communicatio* . 232.
- Ecclesiæ in Persecutione servata* . 364.
- Ecclesiæ Nicomedienfis ruina* . 349.
- S. Ecdices Sebastienorum* . xl. *Mart-*

- Martyrum unus.* 546.
 Edicta Diocletiani contra Chri-
 stianos promulgata. 362.
 Edicta Domitiani contra Chri-
 stianos. 20. rescissa. 25.
 Edicta Principum contra Chri-
 stianos iniusta. 5.
 Edicta Severi contra Christia-
 nos. 93.
 Edicta tria de Ecclesiis demolien-
 dis, sacris codicibus combu-
 rendis, & de omnibus compen-
 dendis ad sacrificandum, præ-
 cipue in Ecclesia Ministros. 394.
 — Quartum de sacrificando
 Diis ab omnibus Christianis. 394.
 Edictum Antonini Pii contra
 Legentes Libros Sybillinos &
 Propheticos. 58.
 Edictum de sacrificando Diis
 Gentilium. 391.
 SS. Eleutherius & Anthia Ma-
 ter sub Hadriano passi. 44.
 SS. Elias, Jeremias, Iſaias,
 Samuel, & Daniel una cum
 Pamphilo ac sociis ad Iudicem
 producti, ante Pamphilum co-
 ronantur. 531. 533. unus il-
 lorum cum Iudice de Urbe Je-
 rosolymitana concertatio. 531.
 S. Elias Sebaſteuorum XL. Mar-
 tyrum unus, 546.
 Emerita Lusitaniæ Urbis S. Eu-
 lalia passione nobilis. 400.
 401.
 S. Emeritæ Martyrium. 252.
 S. Emeritus Anulino Proconsu-
 li se profert, summâ constantiâ
 illum fatigat, tormenta nequid-
 quam veritus. 411. 412.
 S. Encratides seu Engratia Vir-
 go decem & octo Casaraugu-
 stanis Martyribus à Prudentio
 adnumerata. 405.
 S. Engratia eadem quæ Encrati-
 des.
 Ensignius Scriba & Cancellarius
 S. Basiliscus Martyris in
 itinere socius. 492. 493. ejus-
 demque Martyris testis, ac post-
 modum Scriptor. 495. 496.
 S. Epimachus pro Christo mori-
 tur. 145.
 Episcopi multi in Africa Cy-
 priani exemplo excitati Mar-
 tyrium subeunt. 234.
 Episcopi novem Martyrio coro-
 nantur. 50.
 S. Epistemes conjux Galationis
 Emesse passus. 156.
 Errores Gnosticorum Valenti-
 nianorum Cainitarum. 93.
 Ethnici Græci Christianos per-
 secuti. 39.
 Ethnici Virgines ante suppli-
 cium stupradas tradebant. 45.
 S. Eva in Africa sub Anulino
 Christum confessa & pro Chri-
 sto passa. 408. 414.
 S. Eubulus. V. SS. Adrianus
 &c.
 Eudocia Theodosii Jun. uxor
 SS. Cypriani Antiocheni &
 plurium Martyrum historiam
 metricè scripsit. 464. num. 3.
 res inde descriptæ. 464. ad
 472.
 S. Eudoxius V. SS. Atticus
 &c.
 S. Eugenix Martyrium. 252.
 S. Eulalia Martyr Barcinone,
 Ffff 2 alia

- alia ab Eulalia Emeritensi. — Templum Chalcedone in loco sepulcri extructum magnificentissimum. 514. magnis in eo rebus in posterum gestis illustre. 515. Prodigium in Concilio Generali IV. ad sepulcrum Martyris in Fidei testimonium memorabile. 515. 516. quod miraculum, Baronio de veritate suspectum, ab objectis vindicatur. 516. 517.
- 402.
- S. Eulalia Virgo Emeritensis sub Daciano Procons. Martyr. 400.
- Duodennis Præsidentem ultrò adit, objurgat, spernit; Idola sternit, impia evertit sacra. 401. nec tamen ideo culpanda. ibid. Tormentorum in eam immanitas ac corpusculi laniatus. 402.
- Prodigia ejus mortem commendantia. 402.
- Quid de ea Rom. Martyrologium. 402.
- Eadem non paucis est atque Eulalia Barcinone passa. 402. non item nobis. ibid. Prudentii de ea laudes. 401.
- S. Eulogius socius Fructuosi comburitur. 241.
- S. Eunomia Afræ Martyris aucilla, & ipsa ad ejus sepulcrum igne in odium Fidei consumpta. 438. 440.
- S. Euticus Sebastenorum XL. Martyrum unus. 546.
- S. Evotius Martyr. 405.
- Euphemia à quodam Gotho impie decepta. 508. sepulcro inclusa, SS. Martyrum Guria Samonæ & Abibi opem postulans, magnam obtinet. 580. 509.
- S. Euphemia Virgo & Martyr Chalcedone ac toto Orbe celeberrima. 513.
- Picta seculo quarto insignis tabula ejus sepulcro imposita ex S. Asterio describitur. 513. 514.
- Miraculum copiosi sanguinis de corpore ejus non infrequenter manati (ex Evagrius). 517. atque insueti ex sepulcro odoris. 517. 518.
- Ejus Corporis ab impio Imper. Isaurico in mare projectio: recuperatio: non una translatio. 418.
- S. Euphrasie Martyrium. 356.
- S. Euplius Diaconus Catanensis Evangelii Librum secum ferens in Prætorium ultrò se Christianum profitetur. 436. jussus, ex eo quid legeret. ibid. n. 10.
- A Pratore tentatus, ipse in Fide constantior, spretis Diis, Sanctam Trinitatem palam & coram expressè confessus. 436. 437. n. 11. appenso ad collum Evangelio Martyrium subiit capite ex tabella damnavit. 437. n. 12. ejus memoria celebris apud Latinos Græcosque ibid. quid supra Latinos de eo Græci afferant. 437. 438.
- Eusebius Casariensis S. Pamphilum Martyrem quantum laudet, cur Eusebium Pamphili se nuncupaverit. 529.

— *Pamphili in carcere pro Fide non in Martyrio socius. in Tyrienſi Synodo uti accusatus, uti à Potamone exprobratus. 430.*

S. Eusebius inter duas columnas in verſo capite ſuſpeditur. 353.

S. Eusebius Presbyter Martyrio coronatur. 209.

S. Eustachius Martyr sub Hadriano. 42.

S. Eutices Puteolanus Martyr S. Januarii socius. 475. 476.

S. Eutiches unus & alter ex Sebastenis xl. Martyribus duo. 546.

S. Eutropia Afræ Martyris ancilla, & ipsa ad ejus sepulcrum Martyr. 438. 440.

S. Eutropius Legionis Marmarica Miles, S. Cleonici commilitonis in passione socius. 490. 491.

S. Eutropius Martyr. 277.

Eutychia Theſſalonica Fidem coram Præſide profeſſa. 416. quare minimè tum morti addicta ſed carceri tantùm. ibid.

Eutychius ad quatuor palos alligatus. 353.

Exempla Divina ultionis in Lapſos. 143.

Exuperius confortat Milites Legionis Thebææ. 300.

SS. Exuperius & Zoes uxor cum filiis Martyrio coronati. 49.

F

FAlſi Teſtes ad S. Pancratii ſepulcrum adnoti, à Dæmo-

ne correpti atque peremti narrantur. 430. n. 5.

SS. Faustus, Januarius, & Martialis fratres atque in confeſſione ſocii, Cordubæ coronati. 406.

S. Faustus in Africa sub Annulino Martyr. 408. 414.

S. Felix Diaconus cum S. Narcisso Episcopo Gerundæ paſſus. 407. ejus Corpus à Carolo Magno translatus Parisios. 407. alius à Felice M., cujus Reliquie Gerundæ aſſervantur. ibid.

SS. Felix S. Felicis Lectoris in paſſione ſocius, & junior alter. 412.

S. Felix Gerundæ sub Daciano Martyr à Prudentio laudatus. 407. idemne cum S. Felice Diacono ibidem paſſo. ibid.

S. Felix Lector Saturnini Presbyteri & Martyris filius Tyranno ſe offert. 412. Fidem confeſſus Martyrium facit. ibid.

S. Felix Martyr Caſarauguſtæ. 405.

S. Felix Martyr SS. Naboris & Victoris Martyrum frater. 435.

SS. Felices quatuor sub Annulino Martyres. 408. 414.

S. Ferreolus Militum Tribunus Viennæ in Gallia Martyr, S. Juliano Militi conjunctiſſimus. 440. 441. quo conſilio amicum Julianum ad ſecceſſum & latebras hortatus. 441. nãm. 8.

— Caput Juliani M. occultam Fi.

- Fidem publicè confitendi ipsi occasio fuit.* 442. n. 11.
- *Ejus coram Crispino Consulari confessio atque constantia.* 442. 443. n. 11. 12.
- *Caditur, in carcerem con-jicitur, miraculo liber è carcere fugit, Rhodanum armatus facile transnatat. à satellitibus inventus occiditur, quo loco postea conditus est, S. Juliani Caput manu tenens, manu alterà suum.* 432. 443. n. 12. 13. *V. S. Mamentus. Vien. V. Fortunatus. V. Castulus.*
- S. Ferreolus Presbyter & Martyr, alius à Ferreolo Milite & Martyre, sororem Gregorii Turonensis à sebris sanasse perhibetur.* 443. 444.
- S. Festus Beneventi Diaconus S. Januarii Episcopi sui in Martyrio socius.* 476.
- Fidei & pudoris causà sibi mortem inferre num liceat.* 510. *exempla.* 510. ad 513.
- Flaccini Thraciæ Proconsulis effatum de celeri adhibenda in Virum Militarem animadversione.* 504. n. 7.
- Flavius Numerius. V. Maximus.*
- S. Flavius Sebastenorum XL. Martyrum unus.* 546.
- Fortunatus S. Ferreolum Vienna in Gallia Patronum laudat.* 443. *Gennesium Arelatis.* 561.
- Forum Syllæ idem ac Forum Cornelii, nunc Imolam vocant.* 557. 558.
- S. Fronton Martyr.* 405.
- Fundanus Abitina Episcopus Sacrorum Librorum Traditor.* 408.
- G
- G** *Ainas Gorbus in Arcadium perfidus, uti interemptus.* 515.
- Galerius Maximianus Cæsar à Diocletiano adoptatus ipsi suadet, ut contra Christianos Edictum proferat.* 347. *struit in eos calumniam teterrimam.* 350.
- *Premium offert audenti cum Lyæo Gladiatorum sibi summè caro pugnam conferere.* 418. *uti promissi Fidem in audientem congregi imò & vicentem iratus, liberaverit.* 318.
419. *putridà tabe cælitus correptus, à Christiano Medico liberrimè increpitus.* 535.
- *Deum suorum vindicem scelerum agnoscit, Persecutionem vetat, Religionis libertatem & Tempia erigi Christianorum jubet.* 535. 536.
- *Magna inde Fidelium lætitiæ & publica exultatio. admiratio Gentilium ipsis gratulantium: Christianorum pro Imperatore preces, quare frustratæ.* 536. 537.
- *Milus malè perit.* 537.
- Gallienus mitis in Christianos.* 266.
- *Latatur de captivitate Valeriani Patris.* 265. *ejus mors.* 272.
- Gallus & Volusianus Imperatores*

- res à Militibus occiduntur. 206.
- S. Gambas puer Christum confessus pro Christo passus. 381.
- Gelasius mimus Heliopoli convertitur sicut Roma Genesius. 298.
- Genesius mimas dum in scena se fugit Martyrem verè Martyr occubuit. 289.
- Ejus miraculosa conversio. 296. Acta, confessio, & Martyrium. 297.
- S. Gennadius inter Galliarum Martyres celebratissimus, Arelatensium Patronus. 560. egregio facinore officium exceptoris Judici abjicit. Dilatum ab Antistite baptismum transito Rhodano per sanguinem perficit. 560. 561.
- S. Gentianus Martyr. 308.
- Gentiles ad Fidem pertracti ex puritate vitæ, alii ex miraculis Christianorum, & alii ex visionibus somniorum. 88. 89.
- S. Germanicus adolescens in passione constantissimus. 66.
- S. Germanus Emerita in Hispania Martyr. 407.
- Gerunda S. Felicis Diaconi & Narcissi Episcopi passione decorata, ac Felicis alterius. 407.
- S. Givalius in Africa sub Anulino Martyr. 408. 414.
- S. Glaphyra Constantia Augusta ancilla de stupro frustrà à Licinio Imp. tentata. 553.
- S. Glycerio Virgo & Martyr. 63.
- S. Gorgonius Martyr. 352.
- S. Gorgonius Sebastenorum xl. Martyrum unus. 546.
- Gothi cujusdam seculi quarti impietas ac perfidia ope Sanctorum Martyrum Guria Samona & Abibi illusa ac punita. 508. 509.
- SS. Gurias Samonas & Abibus Edesseni Martyres, quo fuerint vitæ instituto. 705.
- Gurias & Samonas quæ coram Fidei desertoribus constantiâ, quæ coram Tyranno, quæ inter tormenta. 505. 506.
- Abibus Diaconus diù post Ecclesia servatus, igne Martyrium consummavit. 507. eodem quo socii loco conditus, eadem in Fastis memoriâ celebratus. 507. 508.
- Uti ad sepulcrum in Fidei jussore adhibiti, uti invocati opem mirè tulerint. 508. 509.

H

- H Adrianus Christianos uti oderit. 41. In eos minime animadverti posse præcipit, nisi judicii ordine servato. 38.
- Jerosolymam vocari Heliam jubet. 40. quàm impius, quàm crudelis. 40. 41.
- Quare Christianis indulserit. 50. an Tempia pro Christianis crexerit. 52. Ejus mors. 54.
- Hæretici Marcellinum Papam veluti iburificationis reum, commenti à Catholicis ex Augustino contemnendi. 430. n. 6.
- Ha-

- Hariolus *suscitat Persecutionem Alexandria*. 135.
- Hebron *antiqua, eadem aliquibus quæ postmodum in Judæa Eleutheropolis*. 525. n. 5.
- S. Helianus *Sebastenorum XL. Martyrum unus*. 546.
- Heliogabalus *scdissimus homo*. 121.
- Heracles *frater Plutarchi ad Thronum Alexandrinum evehtur*. 111.
- S. Heraclides *Discipulus Origenis Martyr*. 111.
- S. Heraclius *Sebastenorum XL. Martyrum unus*. 546.
- Herculius *Imper. Diocletiani in Christianos Edicta uti exceperit*. 362.
- S. Hereclinaus *Martyr in Africa sub Anulino*. 408. 414.
- S. Hermagoras *primus Aquilejensis Episcopus sub Nerone patitur*. 18.
- S. Hermetis *constantia coram Juliano*. 389. *ejus Martyrium*. 390.
- S. Hermias *Miles & Christi Martyr*. 68.
- S. Hermion *filia S. Philippi Diaconi Martyrio coronatur*. 49.
- Herodes *Agrippa secundus Ecclesia Persecutor*. 10.
- Hero *Martyr occubuit*. 145.
- S. Heron *Discipulus Origenis Martyr*. 111.
- S. Hesychius *SS. commilitonibus Piscicari & Valentioni antea Martyrio coronatis salutem plurimam mittit per S. Julium, ad eos per passionem properantem: ipse socios postea affectus*. 565.
- S. Hesychius *Sebastenorum XL. Martyrum unus*. 546.
- Hierocles *Scriptor in Christianos falsus, in Apostolos Petrum & Paulum impius, in Christum blasphemus*. 361. 362.
- S. Hilaria *ad sepulcrum S. Asra filia excubans, una cum ancillis in odum Fidei incendio consumta*. 540. n. 6.
- S. Hilarianus *Saturnini Presbyteri filius infantili ætate sed virili pectore Fidem profectetur*. 413. 414.
- S. Hippolyti *Martyrium sub Valeriano*. 225.
- SS. Hippolyti *Martyres tres*. 204.
- Hippolytus *Cives Romanos ad Stephanum Papam baptizandos deservit*. 209.
- S. Honorata *Martyr in Africa sub Anulino*. 408. 414.
- S. Hyacinthus *Martyr*. 36.

I

- S. I Anuaris *sub Anulino Martyr*. 408. 414.
- S. Januaria *Martyr altera*. ibid.
- S. Januarius *Episcopus Beneventanus Martyr celeberrimus*. 475.
- *Sosio Martyrium pradicat, detentum invist; detentus & ipse cum sociis expositus in Amphitheatro à bestiis minime ladicur, tandem capite truncatur*. 476. 477.

— *Vesuvii ignes ejus ope compressi quantum apud Græcos quoque celebrati* . 476. 477.

— *Mira ejus sanguinis ad conspectum capitis liquatio atque ebullitio usque in bodiernum diem* . 477. n. 11.

S. *Januarius Sanctorum Fausti & Martialis frater atque in passione socius* . 406. 558. 559.

S. *Januarius sub Anulino Martyr* . 408 414.

Idola ad insidiandum Fidelibus uti à Gentilibus spargerentur . 395.

S. *Jeremias Casarea in Palestina Martyr* . V. SS. Elias &c.

Jerusalem Urbis nomen, Maximini Imp. tempore prorsus ignotum . 531. n. 8.

Invocatio Sanctorum quinto Ecclesie seculo celebris; atque inde miracula sequuta . 515. 516. 517. 518.

Invocatio Sanctorum, S. Gregorii Nissenii testimonio dogma confirmatum . 489. n. 7. 490. n. 10. insigni exemplo seculo quarto . 508. 509.

Invocatio SS. viginti Martyrum, ab iisque petenti prestitum prodigio subsidium, Divo Augustino teste . 570. 571.

S. *Joannes Sebastevorum XL. Martyrum unus* 546.

S. *Irenæus Sirmii in Pannonia Episcopus. Ejus parentes, uxor, filii, atas modica, Fides maxima* . 424. *Coram Probo Praside ac contra suorum à recto proposito debortantium lacrymas infractione constantia* . 424. 425.

Tom. VI.

n. 3., ac tandem illustre Martyrium . 425. n. 4. *Apud Latinos celebris ac Græcos memoria* . 426.

S. *Irenes, soror SS. Agapis & Chionie Martyrum, Christum confessa* . 416. *nuda in lupanari constituta à nemine vel verbo polluta* . 417. *in paratum rogam Psalms concinens se projicit* . ibid.

S. *Isaias Casarea in Palestina Martyr* . V. SS. Elias &c.

S. *Julia Eulalia Virginis in Martyrio socia* . 402.

S. *Juliana cum aliis viginti Augusta Vindelicorum Martyr* . 440.

S. *Julianus Cappadox Pampbili & sociorum Casarea in Palestina Martyr* . 533.

S. *Julianus in Gallia Martyr* . 440. n. 7.

— *Genus ejus, officium, morum integritas, cum S. Ferreo lo sancta conjunctio* . 440. 441.

— *S. Ferreoli hortatu in secessu latitat* . 441. n. 8.

— *Militibus se ad necem querentibus proferens obruncatur* . 441. n. 9.

— *Ejus caput quo asportatum, quo corpus. miracula à Gregorio Turonensi narrata* . 442. n. 8.

S. *Julianus inter ceteros ejus nominis Martyres, Panegyri D. Joannis Chrysostomi illustratus* . 561. 562.

— *Ejus patria, ætas, dira inter tormenta robur invictum* ,
G g g g sup-

supplicii genus immanissimum.

562. 563.

S. *Julitta S. Quirici Martyris mater, quâ patriâ quo genere.*

472. à Persecutione declinans in Persecutorem incidit. 472.

473.

— *Christum voce, cruciatibus, & capite conficitur. 473. 474.*

— *Ejus ac Quirici filii corpora Tarfi condita; Reliquiâ à Fidelibus decerpit. 474. n. 3.*

— *Passionis ejus historia num & quâ apocrypha ex Gelasio.*

474. n. 4.

S. *Julius Miles emeritus, Dorostori in Mysia Martyr egregius. 565.*

S. *Justina Virgo & Martyr Antiocbena. 466. n. 7. omnem Damonis vim contra votam Deo virginitatem experta à Cypriano tum Mago. 466. 467.*

— *Ejus de Eusebii conversione mira letitia & Deo acta gratia. 470. 471.*

— *Cypriani tandem conversi in confessione socia. 471. atque in Martyrio, Loculo, ac Templi Romæ erecti Memoria. 472.*

SS. *Justus & Pastor germani fratres ultro se Daciano offerunt. 404. capite plectuntur. ibid. à Prudentio laudantur. ibid.*

— *Quid de illis Rom. Martyrologium. 404.*

S. **L** *Argio Augusta Vindelicorum Martyr. 440.*

Leo *Isauricus in S. Euphemia Martyris Corpus, Templumque ejus nomine dicatum, impiissimus. 518.*

S. *Leo Patara in Licia insignis Martyr. 564.*

S. *Leocadia Virgo Christum confessa, ad ipsum quâ ratione migraverit. 402. 403. ejus Acta in Hymno Breviarii Toletani. 403.*

SS. *Leontius, Mauritius, Daniel, & Antonius, quinque & quadraginta insignium sub Licinio Nicopoli in Armenia Martyrum præcipui. 551.*

Leontius Pratorius Præfetus Martyris Demetrii nomine Ecclesiam Deo in Illyrio dicat. 419.

S. *Leontius Sebastenorum xl. Martyrum unus. 546.*

— *Ejus vita sanctum Institutum; Fidei zelus: in Idolorum Templo ingens facinus: inhumani cruciatus: Martyrii genus. 564. 565.*

Licinius ex vilis agricola filio Caesar à Galerio prouunciatus. 540.

— *Ejus Provincia post Galerium: cum Constantino Mediolani sedus & affinitas iusta: Edictum Christianis summè favorabile. 541.*

— *In Maximinum cum exercitu pergit. ab Angelo monitus Deum cum toto exercitu orat.*

- orat. hostes penè dele: . 541.
542.
— *Christiana Religiois cultor habitus, perperam tamen.* 542. 543.
— *Constantino insensus factus odium in Christum exserit, paulatim tamen.* 543. tandem aperte Ecclesiam persequitur. 544. Episcopos quidè ac Milites quàm maximè, non solos tamen ut fabulosè Dodu- vellus. 544. 545. 548. pluri- dè à Constantino victus, ac tandem mortis datus. 544. 555. 556. ejus versuta erga Chris- tianos agendi ratio. 556.
S. Lucianus Presbyter Antio- chenus, Sacrarum Litterarum peritiâ conspicuus, Nicome- dia sub Maximino Martyr. 539.
S. Luperius Martyr. 405.
Lycus inter Gladiatores Galerio Imperatori carus, à Nestore peremptus. 418. 419.
S. Lysimachus Sebastenorum XL. Martyrum unus.
- M**
- SS. **M** Acrobis & Gordia- nus sub Licinio Mar- tyres. 548. eorum apud Impe- ratores gratia. constantia, exilium, Martyrii genus. 549.
Magiæ Damoniaca in S. Justi- nam Virginem usus execrabi- lis, irritus tamen. 466. 467.
Magistrani crudele in Basili- scum Martyrem ingenium. 492.
S. Major Martyr in Africa sub Anulino. 408. 414.
S. Mamentus Ferreoli Martyris Corpus cum Juliani Martyris capite in à se extructum Tem- plum transulit. 443.
S. Marcellinus Papa Traditio- nis Codicum & Thurificatio- nis reus à Donatistis falsè tra- ductus. 430. n. 6. strenuè pro Christo dato capite Martyr. ibid.
— Magna eo tempore Roma Martyrum multitudo. ibid.
S. Marcellus Tingitanus Mar- tyr, duodecim Martyrum Pa- ter. 406.
S. Marciana Virgo & Martyr Latinis clarissima. 433. n. 1. genere, divitiis, venustate illustis; Fide ac castitate il- lustrior. Diana statuum Deo acta conerit, Populum sibi iratum ab Idolis ad Deum con- vertere hortatione conatur. 433. n. 2. Gladiatoribus con- stupranda traditur. 433. n. 2. repetito miraculo impolluta servatur. 433. 434. n. 3.
— Domui iridentis se Juxta Divino Spiritu excita exitium imprecatur & obtinet. 434. n. 4.
— Leonem, taurum, atque leo- pardum experta, palmam Mar- tyrii tulit. 334. 335.
S. Margarita Martyr in Africa sub Anulino. 408. 414.
S. Maria Saturnini Presbyteri & Martyris filia, sub Anulino Fidem confessa. 408. Mar- tyrium fecit. 414.
G g g g 1 S. Mar-

S. Martialis *Martyr* . 405.
 S. Martialis *Sanctorum Fauſti*
 & *Januarii frater atque in*
Martyrio ſocius . 406. 558.
 559.
 S. Martinus *Martyr in Africa*
ſub Anulino . 408. 414.
 Martyres *Casarauguſta paſſi*
maximo in numero . 404. à
Prudentio celebrantur . ibid.
Celebriores duodeviginti . 405.
 Martyris *non eſſe, ultrò ſe Ty-*
raunis offerre & provocare, ſed
illatam paſſionem tolerare .
 401.
 SS. Martyrum *conſtantia in*
Egypto & in Thebaide . 393.
 Mater S. *Melitonis ſeptem Ma-*
chabæorum Matri comparanda .
 547.
 Matrona *intempèſtâ horâ hortum*
Martyris Sereni deambulans,
quàm graviter reſpreſſa . 518.
 Maritus *de injuria apud Judi-*
cem expoſtulans, Sereni re-
ſponſione pudeſcit . 518.
 519.
 S. Matrona *Martyr in Africa*
ſub Anulino . 408. 414.
 S. Maura S. *Timothei Lectoris*
uxor atque in Martyrio ſocia .
V. SS. Timotheus & Mau-
ra .
 S. Mauritius *in Armenia Mar-*
tyr . V. SS. Leontius &c.
 SS. Maxima, Donatilla, & Se-
 cunda *conſortes S. Criſpina*
ab Anulino Africa Procon-
ſule memoratæ, an eadem quæ
in Romano Martyrologio . 30.
Julii celebrantur . 460. 461.
 S. Maxima *Sirmii in Pannonia*

S. Moſtani uxor atque in paſ-
ſione ſocia , 426.
 Maximiani *Galerii infelix peni-*
tentia . V. *Galerius Maxim.*
 S. Maximianus *Fidem voce ac*
carcere proſicitur . 412.
 Maximianus *Herculius Medio-*
lani in SS. fratres Milites
Victorem Naborem & Feli-
cem animadverti per Anuli-
num jubet . 435.
 Maximini *Imp. in damnatum*
cum Agapio Martyre ad be-
ſſias Paganum ſervum clemen-
tia, & in Agapium ſævities .
 500.
 Maximinus *Cæſar ſeviffimus*
Perſecutor, Galerii Imper. pro
Chriſtianis Edictum ludit .
 436. mortuo *Galerio Perſeca-*
tionem ſenſim inſtaurat . 537.
 538. Acta & flagitia *in Chri-*
ſtianorum infamiam vulgatæ
ac pueris à ludimagiſtris di-
ctanda mandat . 538. Fideles
acerbiùs perſequitur . 538.
 539.
 — *Maximis malis, ac borren-*
dâ ultione à Deo punitus . 539.
 — *Deum iratum ſibi Judicem*
videt. Quæſi in tormentis ada-
ctus ſatetur. plorat, orat ſcele-
ſtus Chriſtum, à quo non eſſet
miſericordiam conſecuturus.
nocentem ſpiritum deteſtabili
borrendoque genere mortis eſ-
ſavit . 539. 540.
 Maximus *Cilicia Prefes Sanctos*
Tarachum Probum & Andro-
nicum fruſtrâ à Chriſto debor-
tatur, fruſtrâ ſurit in eos im-
mani atque amentii crudelitate:
 pri-

primò Tarfi. 444. 445. 446.,
deinde Mospuesia. 446. 447.
448. 449., tandem Anazarbe.
449. ad 455. Tormentorum.
Martyribus illis atrocissimum.
451. n. 13. 452. n. 16.

S. Meliton Sebastenorum qua-
draginta Martyrum unus.
545.

— Carrui, quo cum sociis ad
pyram veberetur, à Matre im-
positus. 547.

S. Menander S. Patritii Episco-
pi Discipulus. Pruse in passio-
ne socius. 569. 570.

Michael IK. Imper. C. P. pa-
trocinio Demetrii Martyris de
Bulgaris victoriam refert.
419. n. 10.

Miracula ad invocationem atque
ad sepulcrum Euphemie Mar-
tyris patrata quinto Ecclesie
seculo. 515. 516. 517.

Miracula quamquam magna,
Gratiâ Dei interius non agen-
te, conversionem minimè opera-
ri posse. 480. num. 5. 6. 484.
n. 15.

Miraculum ad SS. viginti Mar-
tyrum invocationem patratum,
à D. Augustino narratum.
570. 571.

Montanus & Maximilla Cata-
phrygarum hæresiarcha, quâ
morte perierint. 426.

S. Montanus Sirmii in Pauso-
nia Martyr. 426.

Mortem sibi inferre quando li-
ceat. 510. exemplum multi-
plex. 510. ad 513.

Multitudo Martyrum magna.
572. quid de ea Augustinus.

quid Eusebius de solis sub
Diocletiano in Thebaide passis.
quantus inde universorum nu-
merus. 573.

— Ad calcalos deducta, in
plura pro singulis anni diebus
Martyrum millia distribuitur.
574.

N

S. N Abor SS. Felicis & Vi-
etoris Martyrum Mar-
tyr frater. 535.

S. Narcissus Episcopus primus
in Rhetia Evangelium prædi-
cavit. 407. Gerunde in Hi-
spania Martyrium subiit. ibid.
— Non idem ac S. Narcissus
Jerusalem Episcopus. 408.

— Gerunda velut illius Eccle-
sie Pater Episcopus & Martyr
celebratus. 467. quo sub Cæ-
sare palmam Martyrii tulerit.
407. S. Afram cum familia
ad Christum convertit. 438.
440.

Nestor Gladiatorum celeberrim-
um Lyeum coram Galerio
præmium offerente vincit ac
perimit. 418. quis præmium
tulerit. ibid.

— Uti à Gracis in Menologio
Basilii ejus pugna atque inde
Martyrium narratur. 419.

SS. Nicander & Marcianus du-
biis temporis, & loci, certissimi
fortissimique Martyres. 566.

— Equa utriusque Militie
& Fidei professio: quam diver-
sa uxor. 566. 567. utriusque
& Dariæ Nicandri uxoris in
virtute constantia. 567. 568.

Duo

— Duo alii ejusdem nominis
Martyres à Gracis celebrati :
alter quoque Nicaner à Lati-
nis . 569.

S. Nicolaus Sebastenorum XL.
Martyrum unus . 546.

S. Nicopolitanus sub Licinio
Sebaste in Armenia igni à
Marcello Duce damnatus . 551.

S. Nimmia Augusta Vindeli-
corum Martyr . 440.

Numerianus Cilicia Praefes .
V. Maximus .

Numerius Cilicia Praefes . V.
Maximus .

Numerus Martyrum ingens .
573. 574.

O

S. O Ptatus XVIII. Casarau-
gustanorum Martyrum
primus . 505.

— Orationis descriptio, quam
ab Angelo edoctus Licinius,
ejusque exercitus, contra Ma-
ximum praelium initurus
oravit . 541. 542.

P

P Agani de Religione Chri-
stiana brevi casura, post
redditam ipsi à Constantino pa-
cem, quid spargerent. Ab Au-
gustino videntur . 579.

S. Pamphilus Caesarea in Pale-
stina Presbyter admiranda
sanctitatis & doctrina vir,
quanti ab Hieronymo factus,
quanti ab Eusebio . 528. 529.
Sub Urbano Praefide cruciatus
carceri traditur . 529. 530.

In carcere Eusebii amicissimi
socius quid egerit ipse, quid
socius . 530.

— Sub Firmiliano Urbano
successore iterum revocatus ad
pœnas, cum sociis plurimis
Martyrium capite complet.
530. ad 534. Undecim ejus oc-
casione Martyres alii . ibid.

S. Pancratius 14. Ann. adolescens
è Synnada Phrygiae Romam du-
ctus, Christum induit . 429.
n. 4. non diù postea Christum
in Persecutione alacriter con-
fessus, pro Christo capite trun-
catus . 429. nu. 5. Ejus na-
mine Deo dicata Ecclesia
Roma, nunc inter Titulos
Cardinalium una, à quo ex-
tracta . 429. 430.

— Miracula ad ejus sepul-
crum ex Gregorio Turonen .
430. n. 5.

S. Paphnutius Anachoreta . 477.
ejus passio atque Martyrium .
477. 478.

S. Papias . V. SS. Triginta se-
ptem .

S. Paregorius vir factis praecla-
rus, Patarae in Lycia Martyr .
563. S. Leoni ad sui sepulcrum
oranti Martyrium praesignifi-
cat . 564.

Parricidis quod sancitum Roma-
nâ Lege supplicium . 563.

S. Pastor Justus Martyris frater
& socius . V. SS. Justus &c.

SS. Patritius Episcopus, ejusque
Discipuli Acatius, Menander
& Polyanus, Prusa in Bitby-
nia Martyres . 569. 570.

S. Paulini Nolani de SS. Vita-
lis

- lis Agricola & Proculi Bononiensium Martyrio testimonium*. 458.
- S. Paulus Martyr. V. SS. Valens &c.
- S. Paulus SS. triginta septem Martyrum Egyptiorum precipuus. V. SS. Triginta septem.
- Pax à Persecutionis inceptore Galerio Maximiano Christianis insperatè quam ob causam data. 535. 536. 537. Theotecnò auctore per Maximinum erepta, quantà improbitate atque favitiss. 537. 538. 539.
- S. Petrus, Balsamus antea dictus, sub Galerio Martyr. 525. genus ejus, patria, cum Praside egregia disputatio ac constantia: Martyrii per Crucem consummatio. 526. 527.
- S. Pelagia Virgo & Martyr Antiochena Fidei & pudoris causâ sibi mortem intulit. 510. Non culpandam sed admirandam D. Chrysostomus celebrat alique Patres. 510. 511.
- Ambrosii aliqua à Chrysostomo de ea diffensio discutitur. 511. 512. discussio altera de Pelagia filiabus & matre. 412.
- S. Pelusius in Africa sub Annulino Martyr. 408. 414.
- Persecutionibus non minuta sed aucta Christi Ecclesia. 578.
- Petilianus Marcellini Papæ calumniator à S. Augustino repulsus. 430. n. 6.
- S. Petrus Alexandrinus Episcopus sanctitate & doctrinâ celeberrimus sub Maximino Martyr. 538. 539.
- S. Petrus Aspelamus idemne ac Petrus Balsamus. 527. Ejus ex Eusebio patria, vita institutum, ac passio. 527. 528.
- Asclepii Marcionitæ in agone non in exitu socius. 528.
- S. Phileas Ecclesiæ Thmucarum Episcopus securi percussus. 344.
- SS. Phileas & Philoromus insignes in Egypto Martyres. 519. Eorum genus, opes, dignitas. 519. 520. Phileas eruditio & Epistola ab Eusebio & D. Hieronymo laudata. ibid. egregia cum Culciano Praside pro Fide disputatio; familie, propinquorum, amicorum, omniumque pro Christo despectio. 520. 521. 522. 523.
- Philoromi, pro Phileâ constantiâ prolixè nimis tentatâ, zelus, & in tentantes increpatio. 523.
- Uterque capite truncatus. ibid.
- S. Philemon Cboraula S. Apollonio maledicens, extemplò mirè conversus. 483. Judicem repentè adit, Christum confitetur, pro Christo damnatur, Martyrium subit. 484. 485.
- Philippa Christum coram Praside Thessalonica strenuè confessa. 416.
- S. Philoctemon Sebastenorum XL. Martyrum unus. 546.
- S. Philoromus S. Phileæ Thmucarum Episcopi Martyrio socius. V. SS. Phileas & Philoromus.

- S. Photius seu Photinus . V.
SS. Anicetus & Photius .
- SS. Pifcrates & Valenio Martyres. 565. quid de eis in Martyrologio Latini. quid Græci in Menologio. 365. 366.
- Pœnitentiæ fera nimis horribile non unum exemplum. 535. 536. 537. 539. 540.
- S. Pollio Sirmii inclitus Martyr. Probo Præsidi filius uti blasphemus in Deos ac Principes. 426. 427. n. 7.
- Christum alacriter confiteatur Lectorum primicerius. 427. n. 8. Fidei morumque Christianam doctrinam luculenter Judici explicat. ibid. constantissimus in proposito, igne Martyrium facit. 427. 428. n. 9.
- S. Polyænus S. Patritii Prusæ Episcopi Discipulus ac comes Martyrii. 569. 570.
- S. Pomponia in Africa sub Anulino Martyr. 408. 414.
- S. Porphyrius S. Pampbili Martyris famulus. Quâ occasione Christum confessus, quantum excruciat, quo mortis genere Martyr. 532.
- Potamonis, magno Athanasio inter reos stante, acerrima adversus Eusebium inter Judices sedentem increpatio. 530.
- Pregnantes Mulieres morti dare, vetitum Romanis Legibus. 416.
- S. Prima in Africa sub Anulino passa. 408. 414.
- S. Primitius Martyr. 405.
- S. Primus Theogeni Martyri à Latinis in passione copulatus. 350.
- S. Priscus Sebastienorum XL. Martyrum unus. 546.
- S. Probus eximius in Cilicia SS. Tarach & Andronici in Martyrio socius. 444.
- Primum ejus Tharsæ cum Maximo Pratore certamen: tormenta & vincula. 445. n. 4.
- Mpsuestia certamen alterum cum eodem Maximo: verbera, equulei, ignes varii alii qui cruciatus, secundus carcer. 447. 448. n. 8. 9. Anazarbe tertium certamen: vehementiora tormenta, postrema vincula. 450. 451. tormentorum immanissimum. 451. n. 13.
- In Amphitheatrum delatus, ipse & socii à bestiis illasi, à Gladiatoribus conficiantur. 454.
- Multiplex miraculum ad eorum Corpora: eorum Acta: Græcorum à Latinis dissensio, in iis aliqua conciliantur. 454. 455. 456.
- Probus Imperator ubi natus. 424.
- S. Proculus, Miles Bononiensis Martyr à S. Paulino laudatus. 458. n. 5. num Episcopus, num sub Rege Theodorico passus, & quo mortis genere. 458. n. 6.
- S. Proculus Puteolanus Diaconus S. Januarii Martyrio socius. 475. 476.
- S. Prosdoces Antiochena, Virgo, atque insueti generis Martyr. V. SS. Domnina &c.
- Prudentii laudes de S. Eulalia Emeriten. 401.

— De S. Cucuphate. 403.

— De SS. Justo & Pastore.

404.

— De Casaraugustanis Martyribus. 404. 405.

— De S. Engratia. 405.

— De S. Acisclo Martyre.

405.

— De SS. Cajo & Cremente. 506.

— De S. Felice Martyre. 407.

— De S. Agnete Martyre.

Ejus pudore miraculosè defenso. 431.

— De S. Gennesio Arelaten-
sum Patrono. 561.

— Lamentatio de Martyrum
Actis à Gentilibus per invi-
diam suppressis. 572.

S. Publius Martyr. 405.

Pudicitia causâ sibine liceat in-
ferre necem. 510. Exempla.
510. ad 513.

Pudicitia labe Christianis omni
pœnâ, omni morte atrocior.
433. n. 3.

S. Pullio Martyr. V. Pollio.

Q

SS. **Q**uadragesima Sebas-
te in Armenia sub Licinio
Martyrum inter Mi-
lites Præstantia; in Fidei con-
fessione Constantia. 545.

— Singulorum ex Actis Bol-
landianis nomina. 535. 546.

— Immane excogitatum in eos
gelu ignisque supplicium. 546.
557.

— Illorum unus dolore victus,
à Fide desertor, quam vitat
Tom. VI.

mortem, subit. Lictor Deo actus
vicem ac numerum supplet.
547. n. 6.

— Illorum alterum à Militi-
bus consultò neglectum currai,
quo ceteri vebuntur ad pyram,
imponit Mater fortissima. 547.
n. 7.

SS. Quadragesima Virgines va-
rio crudelique mortis genere
Beræa sub Licinio Martyres.
552.

S. Quinctus Fidei coram Anuli-
no confessor. 412.

SS. Quinque & quadragesima
Nicomoli in Armenia insignes
sub Licinio Martyres. 551.

S. Quiriacus Augusta Vindeli-
corum Martyr. 440.

S. Quiricus S. Julitta Martyris
filius. 472. ex ulnis matris ab-
reptus à Judice, Judicem exe-
cratur, Christum confitetur:
& Judicis pede ictus, ex alto
Tribunalis ad terram precipi-
tatus, contrito capite Marty-
rium tulit infansulus. 473.

— Ejus & Matris Julitta
Passio à Manichæis fabulosè
descripta à Gelasio Papa reji-
citur: non item quam Theo-
dorus in sua narrat Epistola.
474. Latinorum de utroque in
Martyrologio & Græcorum in
Menol. memoria. 474. 475.

S. Quirinus Sisiciensis in Panno-
nia Episcopus. 423. ejus in
confessione & plagis coram
Maximo Judice constantia; in
carcere gratiarum actio & cu-
stodis conversio. 524. coram
Provincia Præsede Amantio
H h h h ite-

*iterum Christum professus, in
Sibarim mergitur. 524. 525.*
S. Quintilianus Martyr. 405.

R

S. **R**ecombus. V. SS. Tri-
ginta septem.
S. Regiola Martyr in Africa
sub Anulino. 418. 414.
Religionis Christianæ de Idolo-
latriis & Idololatria triumphus
plaudè Divinus. 574. &c. So-
phonia de eo impletum Oracu-
lum. 574. 575. impletum illud
Psalmi de inani fremitu Popu-
li Gentiumque adversus Chri-
stum Domini. 575. 576.
— Mirabile, ac prorsus huma-
na contrarium, Divina in eo
Providentia consilium. 576.
de ea parum post victoriam ur-
raturæ Paganorum Dæmoniaca
divinatio, risu ab Augustino
excepta. 579.
Reliquiæ sanguinis Agricola
Martyris & instrumenta Mar-
tyrii à D. Ambrosio piè reticu-
ta. 457.
Reliquiis Sanctorum cultus adbi-
bitus quinto Ecclesiæ seculo.
515. 516. 517.
S. Restituta in Africa sub Anu-
lino Martyr. 408. 414.
SS. Rogatiani tres sub Anulino
Martyres. 408. 414.
S. Rogatianus coram Anulino
Fides confessor. 412.
S. Rogatus sub Anulino Mar-
tyr. 408. 414.
Romanis Legibus vetitum, pra-
gantes seminus moris dare.
416.

Rufuccurrum Urbs Africa;
nunc Algerium. 433.

S

S. **S**abinus in Ægypto Miles
& Martyr. V. S. A. scias.
S. Sacerdon Sebastenorum XL.
Martyrum unus. 546.
Sævitia & immanitas Ministro-
rum Gentilium. 395.
S. Samonas Edeffenus Martyr,
V. SS. Gurias Samonas &c.
S. Samuel Casarea in Palesti-
stina Martyr. V. SS. Elias
&c.
S. Saturnina Martyr in Africa
sub Anulino. 408. 414.
S. Saturnini Presbyteri coram
Anulino Proconsule confessi.
410. 411.
S. Saturnini quatuor Casaraug-
usta Martyres. 405.
S. Saturninus junior Saturnini
Presbyteri filius coram Anuli-
no Fidem fortiter ac strenuè
profitetur. 412. 423. Marty-
rium morte complevit. 414.
SS. Saturninus Presbyter, & so-
cii omnes numero undequin-
quaginta, Abitina in Africa
Christum confitentur. 408.
— Cartaginensium ad Anulinum
Proconsulem adducti, 408.
409. Fidem summâ alacritate
confirmant, Deum pro se, pro
suis quoque tortoribus orant.
409. constantissimè se gerunt
Viri omnes. 409. 410. 411.
412. Persecutorem ipsum con-
stantiâ satignant. ibid. & 413.
Feminae similiter Viros viri-
16

- te amulantur . 413. ultimd
Puerulus proveciores fortitu-
dine confessionis aquavit. 413.
444.
- S. Savina Mediolani celebrata .
435. n. 8. Ejus Corpus unâ cum
indumentis à S. Carolo Boro-
meo repertum incorruptum .
ibid.
- Scyllaci in Brutiis S. Acacii
eximii Martyris Corpus hono-
rificè conditum, Baronii sen-
tentia . 504. n. 8.
- S. Secunda in Africa sub Anu-
lino Martyr . 408. 414.
— Secunda altera Martyr .
ibid.
- S. Seleucus inter Milites pri-
mum robustissimus, deinde
Christi Martyr constantissimus.
432. 533.
- S. Serenus Sirmii in Pannonia
Martyr . 518. , Genus ejus,
profectio, latebra, confessionis
& Martyrii decora, ac gravis
occafio . 518. 519.
- SS. Servandus & Germanus
Martyres ubi passi ; ubi conditi
406. 407. Eorum Acta in Bre-
viario Toletano . 407.
- S. Severianus Sebastenorum XL.
Martyrum unus . 546.
- S. Severianus Miles alius, alio-
rum XL. excusator, & ipse post
plura tormenta Martyr egre-
gius . 547. 548.
- S. Silvanus Episcopus Emesa
sub Maximino Martyr . 538.
539.
- Sirmium olim quàm celebris in
Pannonia Civitas, quanta mo-
dò . 424.
- S. Sifinnius Sebastenorum XL.
Martyrum unus . 546.
- S. Smaragdus Sebastenorum XL.
Martyrum unus . 546.
- S. Sotius Misseni in Campania
Diaconus . 475. S. Januarii
in Martyrio socius . 475. 476.
- S. Soteres Virgo & Martyr, ge-
nere Consularis, atque ex ea-
dem quâ S. Ambrosius fami-
lia . 428. n. 1.
- S. Ambrosio cunctis
Virginibus ad imitationem,
Marcelline sorori suæ in
exemplum domesticum proponi-
tur . 428. 429. n. 2. Quo loco
passa fuerit . 429. n. 3.
- S. Styrcius . V. SS. Atticus
&c.
- S. Successus Martyr . 405.

T

- S. T Arachus unâ cum Probo
& Andronico in Cilicia
sub Diocletiano Martyr exi-
mius . 444. n. 1. Illustre ejus
cum Maximo Præside primum
Tarsi pro Fide certamen ; ver-
bera & vincula . 444. 445. Cer-
tamen coram eodem Præside
alterum Mopsuestia ; crucia-
tus variis immanissimis, & vin-
cula . 446. 447. Tertium cer-
tamen Anazarbe cum eodem
Maximo ; summa in tormentis
atrocissimis constantia, & ter-
tius carcer . 449. 450.
- Postremò in Amphithe-
atrum delatus unâ cum sociis .
453. 454. à bestiis illasomnes,
immissis Gladiatoriis occidu-
tur .

- sur* . 454. *Eorum Corpora divinitus stellâ indice à Fidelibus agnita, & in tuto collocata* . 454. 455.
- *Acta, horumque Scriptores. A Rom. Martyrologio Menologii Graci dissensio conciliatur* . 455. 456.
- Templorum sub nomine Martyrum extructio & dedicatio, etiam purioribus Ecclesie post pacem temporibus* . 514. 515.
- Tentationes ut minimè arcescendæ; ita, cùm advenerint, decertandum est* . 513.
- S. Thecla Martyr, alia à Protomartyre* . 500. n. 9.
- S. Thelica spontè se Tyranno ac tormentis profert* . 409.
- *Mira ejus constantia & alacritas* . 409. 410.
- S. Theodora Virgo & Martyr Alexandrina* . 420. n. 1.
- *Genere nobilis, Fide nobilior, constantiâ confessionis nobilissima* . 420. n. 2.
- *Quanta ejus, de virginitate sua custodienda, in Deum fiducia* . 420. n. 2. 421. n. 3.
- *Ad lupanar ducta, uti inde educa à Didymo, uti illum Prasidi ac Populo spectanti* . 421. 422. *Ejus cùm Didymo liberatore de Martyrii præceptâ palmâ contentio, ab Ambrosio narrata* . 422. 423. n. 7.
- *ac tandem unâ cum Didymo adeptâ corona* . ibid. n. 7. & 8.
- Theodorus Iconii Episcopus SS. Martyrum Quirici & Julite Actorum sincerus auctor, unde historiam hausit* . 474.
- S. Theodorus Tiro dictus, Amasenus etiam, & Eucaites nuncupatus* . 486. 489.
- *Recens Militiæ adscriptus strenuè pro Fide Præsidentem, & Tribunalum forti confessione ac patientiâ superat* . 487. *Stultum irrisorem irrisione comprimit* . 487. 488. *Ingenti facinore Cibelis Templum incendit, incensionem interritus fatetur, oblatas dignitates ridet* . 488. *inter cruciatus Domino psallit, bilaris ad ignem incedit, in flammis injectus Deo spiritum dedit, illaso corpore* . 489.
- *Illustre de eo S. Gregorii Nissenî testimonium, dogma Catholicum de Sanctorum invocatione confirmandum* . 489. n. 7.
- *Cur Tiro dictus, cur Amasenus, cur Eucaites* . 489. 490.
- *Tracorum & Latinorum de eo memoria celebris* . 490.
- S. Theodotus immanissimè sub Licinio vexatus, in pace Ecclesie sanctè demortuus* . 554. 555.
- S. Theodulus ex Præsidis familia venerandus senex, Casarea in Palæstina Martyr* . 533.
- S. Theodulus Sebastenorum XL. Martyrum unus* . 546.
- S. Theogenes euechus Cyprii Martyr* . 549. *Ejus in spontè se proferendo alacritas; in Fide dictis confirmanda, passione ac Martyrio fortiundo* . 549. 550.
- *Plura mortem ejus illustrasse*

trasse prodigia ac Persecutorum pœnas. 550.

S. Theonas . V. SS. Triginta septem .

S. Theophilus *Sebastenorum* XL. *Martyrum unus. 546.*

Theotecnus *Antiochia* Curator , Maximino auctor Christianos Urbe ac territorio pellendi . 537. debitas pœnas luit. 238.

Theſſalonica à Barbaris obſeſſa, interceſſione Demetrii Martyris liberata . 419.

Theſſalonica inclyti ſub Diocletiano Martyres . 415. ad 419.

SS. Timotheus Lector & Maura recens uxor . 478.

— Detentus ille vix vigefimo à nuptiis die , uxorem in Fide infirmam ſuggeſtione Judicis , ſe à confeſſione ſeducere conantem reprimis , ad pœnitentiam fleſcit , ad ſe Judici proferendam excitat . 478. 479.

— Viriſque in confeſſione & tormentis fortitudo , & in ſubeunda Cruce *alacritas*. 478. 479. 480.

— Cruci affixi novem dierum ſpatio pendent, mutuo ſe ad conſtantiam hortantes. Thronum Viri in Cælo ſublimiorem ſuo Maura videt , ſuum uterque tandem conſcendit . 480. 481.

S. Tobias Sebaſte in Armenia ſub Marcello Licinii duce igni damnatus . 551.

Tormentorum Chriſtianiſimum , Pudicitia labefaſtatio . 433. n. 3.

SS. Triginta ſeptem Eccleſiaſtici Viri, in Ægypto ſtrenui Prædicatores & Martyres Fidei : qui inter eos præcipui : non unum omnium moriſ genus . 570.

SS. Trinitatis aperta Euplii Martyris in Judicio conſtituti confeſſio . 457. n. 11.

Trojana nobilis Pagana cum filio ac familia ad Chriſtum uti converſa . 439. n. 7.

V

SS. Valens & Paulus, Sancti Pamphili Presbyteri in paſſione ſocii . 530. 521. &c.

S. Urbanus *Sebastenorum* XL. *Martyrum unus. 546.*

Valentia urbs magno Martyre Vincentio clara . 397.

Valentinianus Imp. unde ortus . 426.

Valerius Licinianus Licinius Imperator . V. Licinius .

S. Valerius *Sebastenorum* XL. *Martyrum unus. 546.*

Vesuvius Mons in Campania noſſimus. 476. ejus ignium, S. Januarii implorata ope, compreſſio quantum celebrata . 476. 477.

S. Vibianus *Sebastenorum* XL. *Martyrum unus. 546.*

SS. Victor Nabor & Felix fratres à S. Ambroſio impenſè laudati. 435. n. 6. coram Maximiano in Fide conſtantes, Mediolori excruciantur. Laude Pompeii capite truncantur. 435. n. 7.

- *Eorum Corpora Mediolani asseruata*. 435. n. 8.
- *Quid de Victore specialiter acta referant*. 436. n. 9.
- S. *Victoria Martyr in Africa sub Anulino*. 408. 414.
- *Fortunatianum fratrem de calumnia in Dativum Confessorem coram Proconsule arguit & objurgat*. 410. genere nobilis, formâ præcellens, sed virtute magis. 413.
- *Fidem alacriter intrepida confitetur*. 413. fratrem à Fide ac confessione avertere seconantem despicit, in Fide constantior. 413.
- S. *Victorinus sub Anulino Martyr*. 408. 414.
- S. *Victorinus in Africa sub Anulino Martyr*. 408. 414.
- SS. *Viginti Martyres Hippone quondam in Africa celebratissimi: trium inter eos ex Augustino nomina*. 570.
- *Quod miraculum ad eorum memoriam patratum narrat Augustinus*. 570. 571.
- S. *Vincentius in Africa sub Anulino Martyr*. 208. 214.
- S. *Vincentius Levita quis; ejus constantia coram Daciano*. 307. reverentia erga Valerium Episcopum. *ibid.*
- *Patientia in tormentis*. 398. *In carcere Cælitum visione recreatur, ab Angelis de victoria, de corona fit certior; à vinculis solvitur*. *ibid.*
- *In Dei laudes effunditur*. *ibid.*
- *Custodes miraculo percul-*
- fos, atque ad Fidem inde conversos, lato sermone confirmat*. *ibid.*
- *Pretiosam in mortem resolutus Cælo excipitur*. 399.
- *Tyrannum vicit & mortuus*. *ibid.*
- *Vicit inustus ignibus, vicit immersus fluctibus*. *ibid.*
- *Corpus ejus uti repertum, ubi tumulatum*. 399. 400.
- *Memoria ejus semper & ubique inde locorum celebrima*. *ibid.*
- *Eximia de eo Augustini & aliorum laudes*. *ibid.*
- S. *Vitalis S. Agricolæ servus & in Christo filius, exemplum postea ac collega Martyrii*. 456. n. 1.
- *Utriusque Martyrium à D. Ambrosio celebratum*. 456. 457. num. 2. 3. *Corpora inter Judæorum sepulcra inventa, inde translata*. 457. n. 5. *Agricolæ sanguis, pars ligni, & clavi ab Ambrosio pîd sibi retenta*. n. 4.
- *Quid de iis Rom. Martyrologium & S. Paulini Nolani carmen*. 457. 457. n. 5.
- S. *Ulpianus adolescens in Urbe Tyro Parricidarum horrendo supplicio pro Fide damnatus*. 563.
- Ulpianus *Gentilium Pontifex post Anastasiam Martyrem variè tentatam, visu vitæque ietus*. 462. n. 16.
- S. *Urbanus Martyr Casaraugusta*. 405.

X

3. **X** Anthreas *Sebastenorum*
 XL. *Martyrum unus* .
 545.

Z

- Z** *Elicintbus Legionis Trajana*
Tribunus, in S. Theogenem
Militia nomen dare,
renuentem iratus ac crudelis;
uti sceleris pœnas dederit. 549.
 550.

Zenon *Episcopus de sedatis*
SS. Quirici & Julii Attilis
ab Hæreticis indignatus, au-
ctor fuit Theodoro Iconii
Episcopo, ut eorum Passionem
sincerè describeret. 474. n. 4.
 S. Zoellus *Corduba Martyrio*
coronatus. 406.

— Idem *putatur ac Zoilus*
und cum undeviginti aliis ibi-
dem passis. *ibid.*
 S. Zoilus *idem ac Zoellus.* V.

F I N I S .



